


Teoso sãkire amaneri



New Testament in Apurinã (BR:apu:Apurinã)

Teoso sãkire ameneri
New Testament in Apurinã (BR:apu:Apurinã)

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

Contents

Mateo	1
Marko	62
Arókasi	98
Xoão	161
Átosi	204
Homano	257
1 Korïto	281
2 Korïto	301
Karásia	315
Épeso	324
Piriposi	333
Koroso	339
1 Tesarónika	345
2 Tesarónika	350
1 Tximótxio	353
2 Tximótxio	360
Txito	365
Piremõ	368
Epireo	370
Txiako	388
1 Petro	394
2 Petro	401
1 Xoão	405
2 Xoão	411
3 Xoão	412
Xota	413
Apokorípisi	416

MATEO

Xesosi Nirimaneakori Iua Apisapanika Auakani (Arókasi 3.23-38)

¹ Xesosi Teoso mereëkiti itxaua. Uai aua Xesosi apika atokiriakorini uāka. Xosee inakori Xesosi iri atoko ïkorapokoriti. Apraãoni, Taviini pakini Xesosi apika atokiriakorini atoko. Ininiã Xesosi Taviini, Apraãoni pakini imi atoko itxa.

² Ininiã ia atoko itxa:
Kitxakapirĩka Apraão, Isaki iri.

Isaki, Xakoo iri.
Xakoo, Xotaa itariakorikata iri.

³ Xotaa, Péresi, Sera pakini iri. Inorona Tamara.

Péresi, Ésirõ iri.

Ésirõ, Arão iri.

⁴ Arão, Aminatapi iri.

Aminatapi, Nasoõ iri.

Nasoõ, Sáomõ iri.

⁵ Sáomõ, Póasi iri. Póasi inoro Haapi.

Póasi, Opetxi iri. Opetxi inoro Hotxi.

Opetxi, Xesee iri.

⁶ Xesee, Tavii iri. Tavii Isaeokini auĩte itxaua.

Tavii, Saromão iri. Saromão inoro mitxi Oria ïtanoro. Eereka Tavii takaro oa.

⁷ Saromão, Hopoão iri.

Hopoão, Apia iri.

Apia, Asa iri.

⁸ Asa, Xosapaa iri.

Xosapaa, Xorão iri.

Xorão, Osia iri.

⁹ Osia, Xotão iri.

Xotão, Akasi iri.

Akasi, Esekia iri.

¹⁰ Esekia, Manasee iri.

Manasee, Amõ iri.

Amõ, Xosia iri.

¹¹ Xosia, Xekonia itariakorikata iri. Iuasaaki ïkorakanani kãkiti Isaeokini maĩkaãka.
Papurónia tixinimoni anikaãkana.

¹² Papurónia anikikona atoko,

Xekonia, Saratxieo iri.

Saratxieo, Soropapeo iri.

¹³ Soropapeo, Apiotxi iri.

Apiotxi, Eriakiĩ iri.

Eriakiĩ, Asoo iri.

¹⁴ Asoo, Satoki iri.

Satoki, Akĩ iri.

Akĩ, Eriotxi iri.

¹⁵ Eriotxi, Ereasa iri.

Ereasa, Mataã iri.

Mataã, Xakoo iri.

¹⁶ Xakoo, Xosee iri. Iua Xosee, Maria ïtaniri. Xesosi, iuara Teoso Mereëkiti itxaua. Inoro Maria.

¹⁷ Apraão, iua ãkiri, imekaniri, apika mekaniri, apika mekaniri ãkiri, apika mekaniri apika mekaniri, apiko itxaãpota. Tavii auakasaaki, katosipeka pakini ninoa uãka. Eereka aua Tavii, Tavii ãkiri, imekaniri, apika mekaniri, apiko itxaãpota. Katosipeka pakini ninoa uãka. Iuasaakiika Xoteoakori anikaãka Papirónia tixinimoni. Ninoa mekaniriakori katosipeka inakasaaki, Xesosi iponaniãpeka.

*Xesosi Iponaniini Pirena
(Arókasi 2.1-7)*

¹⁸ Ia atoko itxapaniko Xesosi. Teoso mereëkiti iponaniãkasaaki, Maria ominapatari Xosee. Oñtaniriuatini apisapanika, omotokiãri amarini Erekar Matamatakoti sikakiti. ¹⁹ Xosee uãkatari Maria kamari maerekati ãtikata. Atão inakarínoka kamakari iua, ininiã kona inirekari kãkiti imaropiretiniri oa kamixi onini. Kãkiti sauaki osiniã, Xosee ! inirekaro opëtauatini, kotxi erekari kamakari iua. Ininiã inirekari itakanapiniro oa, ixika kãkiti mimarotakaniã. ²⁰ Ikara atoko inini ixiniremoni, Teoso nitiri iaxitikiri apoka itaponemoni. Ininiã itxa:

—Xosee, Taviini apika mekaniri pite. Kona pipĩkapero Maria papakapini pñtanoro ãkapani, kotxi Erekar Matamatakoti, iuara kamixipeka txĩkitakaro. ²¹ Auako oa ãkiri. Pitakauãkatari Xesosi itxauako, kotxi imakatzakari kãkiti maerekani —itxa Teoso nitiri.

“Xesosi” popĩkari sãkireë, iuatxikana, “Kãkiti Maerekani Makatzakakari,” itxa.

²² Apikomoni Teoso nitiri txari:

—Ikara atoko inakari auapeka, kotxi kitxakapirĩka Teoso sãkire sãpiretakari sãpiretapekari ikara sãkiretxi. ²³ Kitxakapirĩka ia atoko itxa: Hikenakotari. Sito kikikata masirĩkato mixiuatako. Auako oimi. Itakauãkataãka Emanoeo inakori

—itxa Teoso nitiri Xoseemoni. “Emanoeo” popĩkari sãkireë “Teoso atekata aua.”

²⁴ Xosee merekasaaki, iua auikari Teoso nitiri sãkire. Ininiã ãtanorouata Mariakata. ²⁵ Eereka amarini iponaniãkasaaki, Xosee takauãkatari Xesosi itxaua. Amarini iponaniini apisa iua ãsirĩka Mariakata.

2

Atokatxi Pokĩkinimoni Auakani

¹ Xesosi iponaniã Pereë inakori sitatxiti, Xotéia tõpa, Erotxi auñtetxi inakasaakia. Iuasaaki atokatxi pokĩkinimoni auakani sari Xerosareë sitatxitimoni Pereë takote. Iõriki imarotakani ninoa.

² Ininiã itxana kãkitimoni:

—Naniparari amarini Xoteo auñte inakariua? Ate itikapekaro iõrikite atokatxi pokĩkinimoni. Oa iõriki oerekaua auñtetxi Apiananiri iponaniãpeka. Ininiã ate apoka uai akapotoreëkiniua iua apisatoõ, kotxi Apiananiri itxaua —itxana ninoa.

³ Erotxi ikara ikenakoenetakasaaki, kona erekaxinireri. Kona inirekari ãti auñtetxi apokini. Ininiã ikinimane Xerosareë auakani kona erekaxinirena, kotxi ninoa pĩkari Erotxi. ⁴ Ininiã iua apotiitana sasetotxi auñteakori, kaiõkatsoparerini pakini. Ininiã Erotxi pimaãna:

—Nanipa Teoso Mereëkiti iponaniãko? —itxa.

⁵ Ninoa apakapapiretari:

—Pereë sitatxiti, Xotéia tõpa aua. Ia atoko itxapaniko Teoso sãkire sãpiretakari iõkatsopatakiti kitxakapirĩka:

⁶ Pereë sitatxiti auakani, Xotéia tõpa, hñte sitatxine poiãori, iuaritika kona hñpëtauatape, kotxi hñte sitatxineë iponaniãko Isaeokini auñte. Kãkiti mĩkiikakari itxauako —itxa ninoa auñtetxiakori Erotximoni.

⁷ Ininiã Erotxi akiritana ninoa iõriki imarotakani, ninoanani imisãkiretini ãkapani. Ininiã ipimaãna:

—Mitxipitipanika kirisaakipa h̄tikataro oa iōriki? —itxa ninoamoni.

Ininiā ninoa s̄piretari. ⁸ Iposo atoko iokanatana Pereēmoni:

—H̄sako Pereēmoni amarini hinitini ĩkapani. H̄pokasaakiri, h̄s̄piretano. Ininiā nota apaka sako, iua apisatoō nikapotoreēkiniua ĩkapani —itxa Erotxi.

Txamari inirekari okiniri Xesosi, kotxi !inirekari āti aūtetxi auini.

⁹ Erotxi s̄kire ikenakotakana atoko, ipotorikana. Iōriki atokatxi pok̄kinimoni itikakitona ĩkiika. Anikana Xesosi auinimoni. Iuaātaā oa iōriki iotoka. ¹⁰ Ninoa atamatakasaakiro iōriki, iteene ipoxokoniuatana. ¹¹ Ininiā apokana aapoko. ĩroāna. Apokarina amarini inoro Mariakata. Ininiā ikapotoreēkauana Xesosi apisatoō. Itxarina:

—Apiananiri pitxaua. Aāūte pitxaua —itxana.

Iposo atoko itiina imakatzakana. Ininiā imakatzakarina erekari im̄kitina aūtetximoni isikakitina ĩkapani. Isikarina oro, ĩs̄so inakori, miha inakori pakini. ĩs̄so, miha pakini kamariāro peerekari. ¹² Ininiā eereka Teoso s̄piretana iōriki imarotakanimoni itaponeēna:

—Kona h̄kanapiriāpe Erotximoni —itxa Teoso ninoa taponemoni.

Ininiā ninoa kanapiriākasaaki auinimoni, āti kimaporitimoni isana.

Exitomoni Xosee, Maria Pakini Sini

¹³ Iōriki imarotakani sipeka atoko, Teoso nitiri iaxitikiri s̄piretari Xosee itaponemoni:

—Paiamata. Pōkitikaua. Panikari amarini, inoro apaka Exito tixinimoni. Himiteka. Kona h̄kanapiriāpe nota mas̄piretakanisaakii, kotxi Erotxi nitari amarini okiniri ĩkapani —itxa Teoso Xoseemoni.

¹⁴ Ininiā Xosee:

—Nisapitikako —itxa.

Ininiā iua ĩkanōkatika Xosee ōkitikaua. Aiamata Exito tōpamoni isini, amarini anikini ĩkapani. Ininiā imimitekari amarini inorokata Exitomoni. ¹⁵ Erotxi ipinakasaaki, iusaaki ikanapiriāko. Kona ikanapiriā Erotxi ipinini apisa. Ia atoko itxapaniko kitxakapir̄ka Teoso s̄kire s̄piretakari s̄piretakiti:

Nakiritariko namarite Exito tixini itakanapini.

Amarini Okiko Pirena

¹⁶ Erotxi imarotakasaakiri iōriki imarotakani sipe inakasaaki, !imis̄kiretaikarina iua, ininiā iua omanākarauata. Ininiā amarini ipikananipeka inakaniua, apaka axapitipanika inakaniua, imakinikana okākitaka Pereē sitatxitiā auakani. Ikara atoko itxa, kotxi iōriki imarotakani s̄piretari ipikananipeka oa iōriki tokiā. ¹⁷ Kitxakapir̄ka Teoso s̄kire s̄piretakari Xeremia inakori s̄piretakiti iaōka auape iusaaki. ¹⁸ Iua txari:

Hamaa sitatxiti ikenakotaākako ātsaātxi. Hakeo atoko sitoakoro txiapatako oimiakori matinani. !Onirekari kākiti m̄kapiritiniro oa, kotxi oimiakori kona auaika.

Exito Tixini Ikanapiriinina

¹⁹ Erotxi ipinaka atoko, Xosee Exito tixini auakasaaki, Teoso nitiri mis̄kiretari iua itaponemoni. ²⁰ Itxari:

—Pōkitikaua, pimikanapiriāri amarini, inorokata Isaeo tixinimoni. Amarini kinir̄o okaka inakani kona auaika —itxari.

²¹ Ininiā Xosee mikanapiriāri amarini, inorokata Xotéia tōpamoni, Isaeo tixinimoni. ²² Txamari imarotakasaakiri Akirao, Erotxi ākiri aūtetxi ininiua irini tikini, Xosee p̄kari Xotéia tōpa auini. Ininiā Teoso nitiri iuaĭkana itaponemoni s̄piretari ātiātaā isini ĩkapani. Ininiā Xosee, Maria, Xesosi pakini sari Kariréia tōpamoni Isaeo tixini. ²³ Nasaree sitatxiti kaikota itxana. Ia atoko itxa kitxakapir̄ka Teoso s̄kire s̄piretakani s̄piretakiti iaōka inini. Ninoa txari:

Nimereēkiti, Nasareekiri itxauako.

3

*João Kapatxisareri Sãpiretakiti**(Marko 1.1-8; Arókasi 3.1-20; Xoão 1.19-28)*

¹ Eereka Xesosi aneêpe. Iuasaaki Xoão kapatxisareri, âparaã makipakaniãtaã Xotéia tōpa aua. Iuaã iua oerekari Teoso sãkire kãkitimoni. ² Iua txa:

—Himaerekani hītakanapako, kotxi Teoso mereêkiti paĩtiki apokako iua ikinipoko auĩte ininiua ĩkapani —itxari Xoão.

³ Kitxakapirĩka Isaía inakori, Teoso sãkire sãpiretakari, sãpiretapekari Xoão pirena. Itxari: Auako kiki âparaã makipakaniãtaã. Isãpirenauatako. Itxariko: “Hõeretariko kimapori Apiananiri apokini apisapanika. Itĩkaãpo erekari hĩkamako iua napini ĩkapani,” itxa Isaía kitxakapirĩka.

⁴ Xoão takari mãkatxi kamero piti kamakori. Kamero kãkiti pira. Ipakiotsere aamata kamakori. Inikari txĩtxiri. Itximari mapaã ĩtopakero. ⁵ Kãkiti Xerosareêkini, ikinimane Xotéia tōpakini, ikinimane Xotão tinikata auakani pakini sari ikenakotinirina ĩkapani. ⁶ Iuaã ninoa sãpiretari Teosomoni maerekati ikamakitina, imaerekani imakatzakini ĩkapani. Eereka iua patxisatana Xotão uiniti.

⁷ Txama Xoão atapakasaakina pariseoakori, satoseoakori pakini apokini iuamoni ipatxisatikona ĩkapani, iua txana:

—Imini katsiiri anaakorirai hĩte. Teoso misiritapitikai himaerekani xika. Himitekini ! auari. Hinirekari hĩpatxisatiko, txamari ! hinirekari hītakanapiniri himaerekani.

⁸ Hinirekiniãri himaerekani hītakanapini, ininiã hĩkamariko erekari. Ikara atoko ininiã, hõerekari Teoso atão hītakanapiniri himaerekani. ⁹ Hãkixiniremoni !hĩxinikapiri: “Teoso apakapapitikauako ate, kotxi ate atokirini Apraãoni txaua,” !hĩtxapeko. Ari, nota sãpiretai hĩte, Teoso nirekiniãri, iposotari ia kai soroã Apraãoni mekaniriakori ikamini. Kona Apraãoni posotari anikinii Teosomoni. ¹⁰ Aamina maereka iriti atoko hĩtxa. Teoso iposopeka hĩte ixipokini. Kãkiti auari ikitaita kauanari aamina maereka iriti itokini ĩkapani. Ikinika aamina maereka iriti tokaãkako. Xaminaã oka inaãkanako. Teoso kamakiti iua atokokana itxa. Ininiã Teoso kitaite kauanapeka, aamina kotsa sauakiko tĩkane. Iua atokokana ininiã, Teoso aiamatapeka hĩte ixipokini ĩkapani.

¹¹ —Hĩte nipatxisata âparaaã. Hĩpatxisatiko oerekari maerekati hĩkamakiti hītakanapapeka. Nota tikini apoãkari patxisataiko hĩte Erekari Matamatakotiã, xaminaã pakini. Apiatakari itxaua iua. !Apakata iua takote napokini ikiti mata nimakatzakini ĩkapani, kotxi iua apiata. Nota poiãoka. Imakatzakari himaerekani, itxiko metao ãki auakari arikini atoko. ¹² Katakakeri ãpokari ahoisi otãta imakatzakini ĩkapani. Otãta arikaãka. Oki nĩkataãka ikiena nĩkatikoãtaã. Iua atokokana Teoso nĩkatariko kãkiti erekarini. Maerekati kamakani arikaãkako xamina maxipoãkatiã —itxa Xoão.

*Xesosi Patxisatiko Pirena**(Marko 1.9-11; Arókasi 3.21-22)*

¹³ Iuasaaki Xesosi potorika Kariréia tōpa. Isari Xotão uinitimoni, Xoão patxisatiniri ĩkapani. ¹⁴ Txamari Xoão txari Xesosi:

—Pite nirekatari nota patxisatinii? !Apakata, kotxi pitemoni maerekati !auari. Notara nirekari pite patxisatinino nota —itxa Xoão.

¹⁵ Xesosi apakapapiretari:

—Apakatapitika pipatxisatinino. Uatxa akamariko ikinika Teoso nirekaãkiti —itxa.

Ininiã Xoão:

—Ateeneka.

¹⁶ Eereka ipatxisataãka atoko ikanĩkiĩta imiriĩ. Iuasaakipeka iaxiti takaka. Ininiã kãkiti atapari Erekari Matamatakoti katzakaãpotini kamoã atoko inakari. Xesosimoni oãpoka.

¹⁷ Eereka Teoso sãkirauata iaxiti:

—Pite namarite, nitiretakiti, napokaerekatai, kotxi ninirekakiti pikama —itxa Teoso.

4

Satanasi Nirekari Xesosi Kaminiri Maerekati (Marko 1.12-13; Arókasi 4.1-13)

¹ Erekar Matamatakoti anikari Xesosi āparaā makipakaniātaā Satanasi atamakaerekatini ĩkapani. ² Iuaā Xesosi takanapari inipokotini Teoso imisākiretini ĩkapani. Koarēta pokamara, koarēta ĩkanōkati pakini itakanapari inipokotini. Ininiā inatxikatani iuani.

³ Ininiā iusaakiika Satanasi apoka Xesosimoni. Iua katamakaerekareri itxaua. Itxari:

–Pite Teoso ākiri pininiāua, ininiā ere kai soro komiri pitxīkitaka –Satanasi txari Xesosi.

⁴ Xesosi apakapapiretari:

–Kona nikamari pite paniātakiti, kotxi Teoso sākire iōkatsopatakori txari:

Kona komirinanini txīkitakari kākiti ātipirika auini tīkane. Ikinika Teoso sākirera txīkitakari kākiti ātipirika auini tīkane

–itxa Xesosi Satanasi.

⁵ Eereka Satanasi anikari Xesosi Xerosareēmoni. Iua sitatxi akiritaāka Teoso nakiti. Satanasi anikari Xesosi Teoso misākiretiko aikotimoni apiata ōtano tsokitiri nopini.

⁶ Ininiā Satanasi txari Xesosi:

–Teoso ākiri pininiāua, pokaua xiti. Ininiā ikinipoko kākiti imarotariko Teoso ākiri pininiāua, kotxi Teoso sākire iōkatsopatakori txari:

Teoso iokanatanako initiriakori iaxitikini pite inīkatinina tīkane. Ninoa maīkai pimap-inakani tīkane, ininiā pikarouatini !auari. Kona kai soro karotari pikiti,

–itxa Satanasi.

⁷ Xesosi apakapapiretari:

–Teoso sākire iōkatsopatakori apaka txari:

Kona patamakaerekatapiri Apiananiri piTeosone.

⁸ Eereka Satanasi anikari Xesosi ātiātaā iuaīkana. Itano xiratarimoni anikari. Iuaā Satanasi oerekari ikini itixiti, ikinika tiitxiti iuaā auakari pakini. ⁹ Ininiā itxa:

–Pikapotoreēkiniāua nota apisatoō piteosonetinino, ininiā ikinika nisikaiko –itxa Satanasi.

¹⁰ Xesosi apakapapiretari:

–Konapitini. Pisipeka Satanasi. Teoso sākire iōkatsopatakori txari:

Apiananiri piTeosone, iuanokara piteosoneta. Iua ĩkapaninokara piparīkauatako

–itxa Xesosi.

¹¹ Ininiā Satanasi takanapa txari iua. Ininiā Teoso nitiriakori iaxitikini apoka Xesosimoni inīkatinirina ĩkapani, kotxi itapara !auaika.

Xesosi Mipotorikari Iparīka Kariréia Tōpa (Marko 1.14-15; Arókasi 4.14-15)

¹² Xesosi kenakoenetakasaakiri Xoão kapatxisareri kateia āki takiko, isari Kariréia tōpamoni. Nasaree sitatxitimoni isa. ¹³ Ininiā eereka itakanapari Nasaree sitatxiti. Kapanaoō sitatxitipeka aua itxa. Kapanaoō, Kariréia poa takote, apaka Seporō, Natarii pakini tōpati takote. ¹⁴ Kitxakapirīka Isaía, Teoso sākire sāpiretakari sāpiretapekari, iuaā Xesosi auako. Ia atoko Teoso sākire txapeka:

¹⁵ Seporō, Natarii pakini tōpati ipoa mitari takote, Xotāo uiniti ipiniā. Kākiti takauākatari iua itixi, Kariréia tōpa. Xoteo minakanuia tixine itxaua. Iuaā Erekar apokako.

¹⁶ Ninoa kākiti, ipiā auakani, !imarotari Teoso. Ipīkaniātaā ninoa auanāta. Ninoa atamatariko tirikapi. Ikamara mitari. Iua tirikapi iopinipokotako ipiā auakani sauaki.

Ikara atoko itxa Isaía kitxakapirīka.

¹⁷ Xesosi apokasaaki Kapanaoō sitatxiti, imipotorikari oerekarauatini. Ia atoko itxa:

—Himaerekani hĭtakanapa, kotxi iposope Teoso hĭauĭte ininiua —Xesosi txana ikinipoko kĕkiti.

Xesosi Akiritari Ipi Ipi Pakini Kokatsaĕriti
(Marko 1.16-20; Arĕkasi 5.1-11)

¹⁸ Xesosi Karirĕia poa tiniĕ itĭpokotakasaaki, itikari ipi kiki, Simĕo Petro inakori, itari Ātree inakori pakini. Itakanĕtarina hetxi. Kokatsaĕriti itxauana. ¹⁹ Ininiĕ Xesosi akiritana ninoa:

—Masa notakata. Hĭtakanapariko hĕkatsaĕtini parĭkatxiti. Noerekaiko hĭte Teoso sĕkire hĕerekini ĭkapani, kĕkiti imarotini ĭkapani —itxa Xesosi.

²⁰ Ininiĕ iuasaakiika ninoa takanapari okatsaĕtinina. Xesosikata sa itxana.

²¹ Apikomoni itĭpokotakasaaki, atamatana Txiako, Xoĕo pakini. Sepeteo anaakori itxauana. Ninoa irikata kanauaĕ auanĕta. Ihetxina iotsaĕnĕtana. Ininiĕ Xesosi akiritana ninoa. ²² Iuasaakipeka itakanaparina iri, kanaua pakini. Xesosikata sa itxana imoiana-tinirina ĭkapani.

Xesosi Amianatakani Imakananitini
(Arĕkasi 6.17-19)

²³ Xesosi sari ikini Karirĕia tĕpamoni. Aiko Xoteoakori apotiitiniĕtaĕua isa. Iuaĕ isĕpiretana Teoso iokanapirena erekari, Teoso kĕkiti auĭte inini pirena. Apaka erekapeka itxĭkitakana amianatakani. ²⁴ Xesosi kamakiti, apaka isĕpiretakiti, iaripiretapeka ikinika Sĕria tixini. Ininiĕ kĕkiti minana itomaneri amianatakani iuamoni. Ikini sereti amianari auakini sari iuamoni. Kĕkiti maerekati matamatakoti Satanasi nitiri auaiĕtotakiti apoka iuamoni. Apaka kĕkiti mapitxiritakani apoka. Apaka titinanakakari amianariti auakini apoka. Apaka kĕkiti maposota tĭpokotakani pakini apoka Xesosimoni. Ikinikana erekape itxĭkitakana ninoa. ²⁵ Itomaneri sari iua tikini. Kĕkiti Karirĕiakini, tesi pakini sitatxitikini, Xerosareĕkini, kĕkiti Xotĕia tĕpakini, Xotĕo uiniti ipiniĕkini pakini sari iua tikini.

5

Xesosi Sĕkirauata Ixirata Auĭte Nopini
(Kapĭtoro 5, 6, 7)

¹ Xesosi itomaneri kĕkiti atapakasaaki, ixirata nopini isa, topĕka itxa oerekaruatini ĭkapani. Imoianariakori apotiitaua iuamoni. ² Iuasaaki oerekana ia sĕkiretxiti:

Kirimonipa Teoso Sikatari Erekarĭ?
(Arĕkasi 6.20-23)

³ —Teoso takari erekari kĕkitimoni, ia atoko inakanimoni. Ninoa nirekari Teoso nireĕkiti ikaminina, iuaritika imarotarina ĭposotarina Teoso nireĕkiti ikaminina, ininiĕ amanaĕrina Teoso sikaposotiiretinina ninoa. Teoso takari erekari kĕkiti ikara atoko inakanimoni. Ninoa sari Teoso auĭtetxi ininiĕtaĕua.

⁴ —Teoso takari erekari kĕkitimoni, ia atoko inakanimoni. Mitxi ninoa txiapata imaerekanina xika. Ininiĕ eereka Teoso mĭkapiritana ninoa, amarini mĭkapiritiko atoko.

⁵ —Teoso takari erekari kĕkitimoni, ia atoko inakanimoni. Pataparaxinirena ninoa, iuaritika ĭtxitarina ĕti. Iamonĭkarina ĕti. Teoso sikapanikariko ikinika itixi ikara atoko inakanimoni.

⁶ —Teoso takari erekari kĕkitimoni, ia atoko inakanimoni. Ninoa iteene nirekari erekarinoka ikaminina. Nĭpokori inirekinina atoko, ĕparaĕ inirekinina atoko, ninoa iteene nirekari erekari ĭkaminina. Ininiĕ Teoso sikana ninoa ikinipoko erekari inirekakitina.

⁷ —Teoso takari erekari kĕkitimoni, ia atoko inakanimoni. Ninoa amonĭkari ninoa misiritakani, ininiĕ iua atokotxikana Teoso amonĭkanako ninoa kaamonĭkarerini.

⁸ —Teoso takari erekari kĕkitimoni, ia atoko inakanimoni. Ninoa kamari Teoso nireĕkitinoka, ininiĕ ninoa aĕkitariko Teoso.

⁹ —Teoso takari erekari kăkitimoni, ia atoko inakanimoni, kauaĩrerinimoni. Ninoa parĩkauata neenamati xi pokini ĩkapani. Ininiã ninoa akiritaãkako Teoso anaakori.

¹⁰ —Teoso takari erekari kăkitimoni, ia atoko inakanimoni. Ninoa kamari erekari, ininiãkara apanakini kăkiti misiritana. Ninoa erekari kamakani auako Teoso auĩtetxi ininiãtaãua.

¹¹ —Teoso takari erekari hĩtemoni, apanakini misiritakasaakii, imisăkirepiretakasaakii, aãpirena ikamakasaaki hĩtemoni nota săkire hăuikini xika. ¹² Poxokonoka hĩtxako, kotxi Teoso sikai hĩparĩka ĩki ito, itixine hăpokasaaki. Hĩte misiritiko atokokana Teoso săkire săpiretakani kitxakapirĩka misiritaãka, ininiã hĩpoxokoniuatako —itxa Xesosi.

Iőkira Pirena

(Marko 9.50; Arókasi 14.34-35)

¹³ Iuaĩkana Xesosi săkirauata:

—Iőkira erekaro atoko hĩtxaua ikinimane ĩkapani. Iőkira matxoatapeka onakasaaki, ininiã !apakata otxoa kanapiriini iuaĩkana. Ininiã oőkăãka. Kăkiti kitakaro, kotxi kona otxaika.

Tirikapi Pirena

¹⁴ —Tirikapi atoko hĩtxaua ikinimane kăkiti ĩkapani. !Hĩposotari hĩkipatiniri sitatxi xirata nopini auakari, kotxi ikinimane atamatari tirikapi. ¹⁵ Kăkiti !itakari tirikapi kopiti āki. Itakarina itano ikini aapokotxiti iopinikini ĩkapani. ¹⁶ Iua atokokanera hĩtxako, kotxi erekari hĩkamakiti tirikapi kamara atoko itxa. Erekarinokara hĩkamako. Ininiã apanakini atamatari erekari hĩkamakiti. Ininiãra itxarina aĩri iaxitikirimoni: “Peerekai pite.”

Teoso Săkire Moisesi Apakapakiti

¹⁷ Iuaĩkana Xesosi săkirauata:

—Kona hĩtxape: “Xesosi xipokariko Teoso săkire Moisesini apakapakiti,” kona hĩtxape. Apaka, “Kitxakapirĩka Teoso săkire săpiretakani săpiretakiti Xesosi xipokako,” kona hĩtxape. Kona ikara inakari !nixipoka. Nota ina ikinipoko ninoa săpiretakiti nikamini ĩkapani. ¹⁸ Atăopitika ikinika Teoso săkire apokako. Kona xatiki Teoso săkire iőkatsopatakori kona xipoka. Iaxiti, itixi pakini xipokini apisa Teoso săkire !ixipoka. Apokapitikako imakinika isăkire. ¹⁹ Teoso săkire ĩpaniãtakiti apiari aua, apaka poiãori aua. Kăkiti makamakaniãri ikinika Teoso săkire, oerekiniãri apanakini ikinika Teoso săkire imakamakani ĩkapani, poiãori itxaua Teoso auĩtetxi ininiãtaãua. Āti kăkitipekana, ikaminiãri ikinika Teoso săkire, oerekiniãri apanakini ikinika Teoso săkire ikamini ĩkapani, apiari itxaua Teoso auĩtetxi ininiãtaãua. ²⁰ Ia nisăpiretai. Kaiőkatsopareriakori, pariseoakori pakini !ikamari atăo inakari Teoso nireėkiti. Ininiã hĩte kaminiãri ninoa atokotxikana, !hăuiritaãka hĩĩroini Teoso auĩtetxi ininiãtaãua. Atăo inakari Teoso nireėkiti hĩkaminiã, hĩĩroãpitika iuaã.

Omanăkaretxi Pirena

²¹ —Hĩte imarotari kăkiti kitxakapirĩka săpiretaãka. Ia atoko inaãka: “Kona apanakini hőkape. Kokaniri anikaãkako imisiritikomoni,” inaãka kitxakapirĩka. ²² Uatxa apikomoni nota săpiretaiko hĩte. Maxikatiika pomanatiniãri pitari, panikaãkako pimisiritikomoni. Pite napetiniãri pitari, ininiã auĩtetxiakori misiritapitikaĩ. Pakiritiniãri pitari: “Kiĩkitei,” ininiã pimisiritiko paĩtiki apokako. Nota txai hĩte, kona erekari kokaniri. Iua atokokana kona erekari hinaperauatini. Hinaperauatiniã, ininiã maerekani misiritikoãtaã hĩsapitikako.

²³ —Ininiã hĩsikaakii Teoso apisatoõ hĩsikakiti hĩsikini ĩkapani, iuasaaki hĩxinikari hĩtari homanatakiti. ²⁴ Iuasaakiika hĩtakanapariko hĩsikakiti iuaã hĩsikiniri apisa. Hĩsako kati-maritika homanatakitimoni. Himisăkiretari, homanăkare hĩxipokini ĩkapani. Iposo atoko kanapiriã, hĩsikakiti tĩkane sika hĩtxako Teosomoni —itxa Xesosi.

²⁵ Iuaĩkana Xesosi săkirauata:

—Kākiti kinirāo apoŋtakiniāi, ininiā pimisiritiko mereēkarimoni iua anikinii apisapanika, katimariā pisa iuamoni. Pimisākiretari iua, kotxi pimisiritiko mereēkari sikaiko pite pimisiritakirimoni. Ininiā eereka iua takai kateia āki. Iuaā pikaikotako. Ininiā apisapanika pimisākiretariko iua pomanatakiri. ²⁶ Atāo nisāpiretai, kona posipikari kateia ikinika pimisiritiko mereēkari paniātakiti pimiūkitxitakanisaaki —itxa Xesosi.

Kipa Txīkitakai Maerekati Pikamini?

²⁷ Xesosi apikomoni sākirauata:

—Hīte imarotapekari kitxakapirīka sāpiretakori: “Pītanoro minakotokatika kona pisirīkape.” ²⁸ Kitxakapirīka ikara atoko itxama. Nota sāpiretaiko hīte apikomoni. Sito atamatakari kinirāo oakata sirīkaka inakari, iuara kamapekari maerekati ākixinireē. ²⁹ Kona pauiritapiri maerekati pikamini txīkitaākari pitekata ikaikotini. Patamatakiti txīkitakiniāi maerekati pikamini, pimakatxakari poki, oka pitxari, kotxi maerekati pikaminiā, maerekani misiritikoātaā pokaākako. Apiaerekata Teosokata ātipirika pauini āti pokinoka pauini. ³⁰ Piuako pikikomoni auakari txīkitakiniāi maerekati pikamini, ininiā pisauaka, oka pitxa, kotxi maerekati pikaminiā, maerekani misiritikoātaā pokaākako. Apiaerekata mauakotikai pauini ātipirika Teosokata. Kona pauiritapiri maerekati kaikotini pitekata. Pitakanapariko maerekati.

Kiki Ītanorokata Itakanapakakini

(Mateo 19.3-9; Marko 10.2-12; Arókasi 16.18)

³¹ —Kitxakapirīka ia atoko itxa sākiretxi:

Pītanoro pitakanapiniā, aātsopa pisika oamoni ĩtanorotxi takanapiko aātsopati.

³² Iuaritika nota sāpiretaiko hīte, !hītakanapaperoko pītanoro. Pitakanapiniāro, ininiā maerekati pikamapitika, kotxi eereka oa atxiīti nirekakari āti kiki. Ininiā iuasaaki oa kamari maerekati apaka pite xika. Apaka oa takakari kamari maerekati. Apakata pitakanapiniro pītanoro, ātikata osirīkiniā —itxa Xesosi sākire.

Atāopitika Inakari Sākiretxi

³³ Iuaīkana Xesosi sākirauata:

—Hīte imarotapekari kitxakapirīka sākiretxiti. Ia atoko itxapaniko: “Hīkamariko imakinika hīkamaenetakiti. Hīkamariko hīkamaenetakiti Teoso ĩkapani,” itxa. ³⁴ Notara sāpiretai hīte apikomoni: “Nikamapitikariko,” pinakasaaki, !pakiriuākatapiri Teoso tixine uāka, kotxi iuaā Teoso auītetxi ininiātaāua. “Nikamapitikariko,” pinakasaaki, kona apikomoni pakiritape. ³⁵ “Nikamapitikariko,” pinakasaaki, !pakiriuākatapiri itixi uāka, kotxi Teoso uai aua apaka. “Nikamapitikariko,” pinakasaaki, !pakiriuākatapiri Xerosareē uāka, kotxi auītetxi Apiananiri sitatxine itxa. ³⁶ “Nikamapitikariko,” pinakasaaki, !pakiriuākatapiri pikii uāka, kotxi !apakata pitxīkitakiniri piāko pomama inini, kasarori inini. Ātika piāko kona piposotari pitxīkitakiniri kasarori inini, pomamari inini. ³⁷ “Ari,” pinakasaaki, pikamapitikariko. “Kona,” pinakasaaki, kotxi kona piposotari pikaminiri. Kona āti sākiretxi !pikamape. Maxikatiīka kamakori sākiretxiti Satanasi sākire itxaua —itxa Xesosi.

Xikatxitakaniua Pirena

(Arókasi 6.29-30)

³⁸ Xesosi oerekarauatapanika:

—Ia atoko kitxakapirīka sākiretxiti: “Neenamatsisaaki āti makatxakiniāri poki, pixikatxitariko. Iuasaaki pimakatxakariko iua oki apaka. Pitsiriū pataka āti kākiti xika, pixikatxitariko. Iuasaaki iua tsiriū apaka pimapatakako,” itxa sākiretxi kitxakapirīka.

³⁹ Txamari nota sāpiretaiko hīte apikomoni. Kona hīxikatxitapiri maerekati hītemoni auakasaaki. Āti aritiniāri pitoō, ininiā pikirioka ipinitoō iaritini ĩkapani. ⁴⁰ Atxiīti āti nirekari anikinii pimisiritiko mereēkarimoni, kotxi iua nirekari pite sikiniri pimāka iuamoni iua txineirote pimasikakani xika. Ininiā anikinii apisapanika, pisikariko

pimãka inirekakiti, apaka apikomoni ãti pimãka. Ikara atoko hĩkamako. ⁴¹ Ia ãti sãkiretxiti: ãti paniãtiniãi itii panikini ãti õti, ininiã ipi õti panikari itii. Poerekariko pitiraõki. ⁴² Atxiĩti ãti amanaãi pitii, ininiã pisikariko iuamoni inirekakiti. Iua amanainiãi pitii “Akamoni iuaĩkana !nisikai,” ininiã iuasaaki pisikariko iuamoni –itxa Xesosi.

Pomanatakini Pitiretini
(Arókasi 6.27-28, 32-36)

⁴³ Iuaĩkana Xesosi sãkirauata:

–Hĩkenakotapekari ia sãkiretxiti: “Hĩtiretariko hinirimane. Homanatariko himokaiakari.” Ikara atoko kitzakapirĩka auari. ⁴⁴ Ikara atoko itxama. Nota sãpiretaiko hĩte ipinimoni. Kona homanatapiri himokaiakari. Hĩtiretariko iua apaka. Hamanaãri Teoso hĩte omanatakani erekari isikini ĩkapani. ⁴⁵ Apakatapitika amokaiakarimoni erekari akamini, kotxi Teoso kamari atokatxi kãkiti erekarini auiniãtaã iopinikini ĩkapani, apaka maerekani auiniãtaã iopinikini ĩkapani. Iua iokanatarĩ ãparaã atão inakari kamakanimoni, apaka atão minakati kamakanimoni. ⁴⁶ Hĩte tirketakaninani hĩtiretiniã, kinirepa Teoso sikari erekari hĩtemoni hinirimanenokara hĩtirketakasaaki? Kotxi kãkiti maerekati kamakani apaka tirketari ninoa tirketani. ⁴⁷ Hĩte misãkirketakaninani himisãkiretiniã, kãkiti Teoso mimarotakani atoko hĩtxa, kotxi ninoa misãkirketakani imisãkiretana. ⁴⁸ Ikinipoko hĩri iaxiti auakari kamakiti erekari, ininiã iua atokokana hĩtxĩkitakariko ikinipoko hĩte kamakiti erekari –itxa Xesosi.

6

Xesosi Oerekari Teoso Sikiko

¹ Iuaĩkana Xesosi sãkirauata:

–Erepaniko. Erekari pikamakasaaki, kona pikamapiri piukiniua ĩkapani, erekari pikamakiti apanakini imarotini ĩkapani. Pikaminiãri erekari apanakini apokaerekatinii ĩkapani, kona papakapari piparĩka ĩki iaxiti, aĩri iaxiti auakari sikakiti. ² Aua kãkiti ia atoko inakari. Ikamakiti atxiĩti erekari, txamari ixinikakiti kona erekari. Kãkiti ikara atoko inakari sikarauatakasaaki minakati matiitimoni aiko Xoteo apotiitiniãtaãua, apaka mapara kãkiti napiniãtaã, inirekarina ikinimane itikiniri erekari ikamakitina. Inirekarina kãkiti iuikinina. Ikara atoko !pitxape minakati matiitimoni pisikarauatakasaaki. Pixinikariko ia: Ninoa apakapapekari ikinika erekari kãkiti sikakiti, txamari !apakaparina erekari Teoso sikakiti. ³ Pisikarauatakasaaki minakati matiitimoni, kona pauiritapiri piuako pisaneremoni auakari imarotiniiri piuako pikikomoni auakari sikakiti. ⁴ Ikara atoko ininiã, pitenani imarotari pisiãkiti. Piri iaxitikiri, ikinipoko atamatakari, iĩkitxitaiko kãkiti apisatoõ –itxa Xesosi.

Teoso Misãkiretiko Pirena
(Arókasi 11.2-4)

⁵ Iuaĩkana Xesosi sãkirauata:

–Teoso himisãkirketakasaaki, kona hĩkamapiri kamisirienereri atoko hinini. Ninoa potxitari itiminina aiko Xoteo apotiitiniãtaãua, kimaporiã apaka, Teoso imisãkiretini ĩkapani. Ininiã ikinimane itikana. Hĩxinikari. Ninoa apakapapekari poxokonitxi uai ĩkorapokoriti auakari. Txamari ninoamoni atão poxokonitxi !auari. ⁶ Teoso pimisãkirketakasaaki, pisa pitenani auiniãtaã. Kona pauiritapiri ãti kaikotini pitekata Teoso pimisãkirketakasaaki. Iuaã pimisãkiretari piri matamatakoti. Iuaã iua atamataiko pite. Eereka isikaiko erekari iaxitikiri.

⁷ –Teoso pimisãkirketakasaaki, pimixinikariko pisãkire. Maxikatĩka kona pisãkirauatape iuakata. Teoso sãkire mauĩkati xinikari Teoso kenakotiniri isãkire kotxi kaiãori isãkire. ⁸ Ikara atoko !pikamape pimisãkirketakasaakiri iua, kotxi pisãkirauatini apisapanika Teoso imarotapekari pinirekakiti. ⁹ Ia atoko hĩtxako Teoso himisãkirketakasaaki:

“Aĩri iaxiti auakari, ate nirekari piuãka paxitiko.

¹⁰ Anirekari ikini itixiti auakani auñtetini pite. Pite tixine pinireẽkiti kamiko atokokana, anirekari pinireẽkiti kamiko ïkorapokoriti,

¹¹ Nipokori ikiniõtika pisikauako.

¹² Pimaxinĩkaretariko maerekati akamakiti. Maerekati atemoni kamakori amaxinĩkaretini atokokana pimaxinĩkaretariko.

¹³ Kona panikapeua aãtaerekatikomoni. Pisikakauako ate, maerekati sauaki aãuakasaaki. Ikara atoko piposota, kotxi pitenanira auñtetxi txaua. Pitenanira kaposotiire. Ætipirika peerekai pite. Ameẽ.”

Ikara atoko hĩtxako Teosomoni.

¹⁴ –Pimaxinĩkaretiniãri maerekati ãti kamakiti pitemoni, ininiã piri iaxiti auakari maxinĩkaretari maerekati pite kamakiti apaka. ¹⁵ Pimamaxinĩkaretakaniãri maerekati ãti kamakiti pitemoni, ininiã piri iaxitikiri kona maxinĩkaretari maerekati pite kamakiti apaka –itxa Xesosi.

Nipokori Takanapiko Pirena

¹⁶ Iuaĩkana Xesosi sãkirauata:

–Aua kãkiti ia atoko inakari. Ikamakiti atxiĩti erekari, txamari ixinikakiti kona erekari. Kãkiti ikara atoko inakari takanapari inipokotini Teosokata isãkirauatini ïkapani. Txamari ninoa nirekari ikinimane imarotini itakanapinirina inipokotinina, kãkiti iuikinina ïkapani. Ininiã ninoa matinaniuata itooãna ikara kãkiti imarotini ïkapani. Atão nitxai, ninoa apakapapekari ikinika erekari kãkiti sikakiti, txamari !apakaparina erekari Teoso sikakiti. Kona ikara atoko !pitxape nipokori pitakanapakasaaki Teoso pimisãkiretini ïkapani. ¹⁷ Hĩte ikara atoko !hĩkamape. Hinipokotini hĩtakanapakasaaki Teoso himisãkiretini ïkapani, hãrokatoõtaua. Hõeretari hiãko. ¹⁸ Ininiãkara apanakini !imaro-tari hĩtakanapiniri hinikini. Ininiã hĩri matamatakoti, iuananira itikariko hĩkamakiti, apanakini mimarotakiniti, ininiã isikaiko hĩparĩka ïki –itxa Xesosi.

Pitiretakiti

(Arókasi 12.33-34)

¹⁹ Iuaĩkana Xesosi sãkirauata:

–Maxikatiĩka kona papotiitapiri pitiretakiti uai auakari, kotxi atxiĩti kamara nikari pitii. Atxiĩti oerẽkata. Atxiĩti kiĩtiriri ïtirĩkari iua. ²⁰ Ikara atoko kona pikamape. Papotiitariko pitiretakiti Teoso tixineẽ, kotxi iuaã !auari kamara. Iuaã tiitxi !oerẽkata. Kona ixipoka. Kiĩtiriri !ïtirĩkari iua. ²¹ Pitiretakiti auiniãtaã, iuaã pixinikapika. Iuaã pinirekari pauini –itxa Xesosi.

Tirikapi Ætotxiãkiri Pirena

(Arókasi 11.34-36)

²² –Poki tirikapi atoko itxa piĩto ïkapani. Poki ereka inakasaaki, ipinikare aua pãkixinireẽ, ininiã pinireẽkiti imakinika erekari. Erekarinokara patamatiniã, erekari pixinire. ²³ Txamari poki oerekasaakii maerekati pikamini, ipiã apoka pãkixiniremoni. Iuasaaki tirikapi kamara na xatiki !auari pitemoni –itxa Xesosi.

Ipi Auñtetxi Pirena

(Arókasi 16.13; 12.22-31)

²⁴ Iuaĩkana Xesosi sãkirauata:

–!Apakata kãkiti parĩkauatini ipi iauñtena ïkapani, kotxi atxiĩti ãti omanata, ãti itireta. Atxiĩti ãti apokaerekata, ãti inorita. Iua atokokana kãkiti kona posotari iparĩkauatini tiitxi ïkinipoko iamotini ïkapani, Teoso ïkapani iparĩkauatakasaaki. !Apakata piauñtetiniri Teoso, txineiro piauñtetakasaaki.

Teoso Nĩkatiniua Ate

(Arókasi 12.22-31)

²⁵ –Ininiã nitxai: Pinirekari nipokori, iãriã pakini auãki pinini ïkapani. Apaka pinirekari mãkatxi pïto ïkapani. Ikara pinirekini xika maerekaxiniretika kona pitxape. Erekarari nipokori. Apiaerekata pixinire. Erekarari mãkatxi. Apiaerekata pïto. Ininiã ãtipirika !pixinikapiri nipokori, mãkatxi pakini pinitini. ²⁶ Kona pipïkarauatape nipokori poião auakasaaki. Pixinikariko kotipiriki. Kona ninoa takarauata. Kona apotiitari ikiena. Kona ipotetari ikiena. Iuaritika piri iaxitikiri sikakienatana ninoa. Ininiã ninoamoni nipokori !ixipoka. Teoso apia xinikai hïte. Ininiã kona pipïkarauatape. ²⁷ Kinirepa maerekaxiniretinoka pitxa? Pimaerekaxinirene !itxïkitakai apikomoni ãti oara pauini.

²⁸ –Kinirepa maerekaxiniretinoka pitxa pimãka pinirekini xika. Aãui pixinikako. Kona aãui parïkauata. !Ikamari imãka, iuaritika aãui peereri. ²⁹ Kitxakapirïka auïtetxi Saromão inakori, iteene katiiri itxaua. Kaiãori imãka ereri, iuaritika apia ereri ikinika aãui. ³⁰ Aãui !okanani aua. Uatxa aua. Katana ikatikata iotikaãka. Iuaritika Teoso nïkatari aãui. Ininiã apiata inïkakai hïte. Ikamamãkatapitikai. Poiãonoka hïte auikari Teoso sãkire. Ikara xika maerekaxiniretinoka hïtxa.

³¹ –Ininiã maerekaxiniretinoka kona hïtxape. “Kipa ninika? Kipa niãta? Nãpa napokari mãkatxi?” kona hïtxape. ³² Teoso sãkire mauiãkani maerekaxiniretinoka itxana ikara atoko. Piri iaxiti auakari imarotari pinirekaãkiti. Ininiã maerekaxiniretika ! pitxape. ³³ Merepitipanika pinirekariko Teoso piauïte ininiãua. Iua nireëkiti pinitako, ininiã atão inakarinoka pikamako. Ikara atoko inakari pikaminiã, pite nirekakiti apaka isikaiko. ³⁴ Maerekaxiniretinoka kona pitxape katana pinirekakiti pixinikini xika. Pinirekakiti auapitikako katana, iuaritika mitxipanika kona pixinikapiri ikara maerekaxiniretika, kotxi ikiniõtika aua ikara atoko inakari –itxa Xesosi.

7

Apoïretxi Pirena

(Arókasi 6.37-38, 41-42)

¹ Iuaïkana Xesosi sãkirauata:

–“Kona erekari pikamakiti,” kona pitxape ãtimoni, ininiãkara Teoso kona txai pite: “Kona erekari pite kamakiti,” !itxai, ² kotxi Teoso misiritai pimaerekani xika, ãti pite misiritini atokokana. Itene pimisiritiniãri ãti imaerekani xika, itene Teoso misiritai pite, pite maerekani xika. ³ Ikara ia atoko. Pisãpiretari ãti: “Aãsorõ aua poki ãki,” txamari kona pimaãkatari aãtxirata pite oki ãki auakari. Kinirepa ikara atoko inakari pikama? ⁴ !Apakata pisãkire pitarimoni: “Pauritano aãsorõ poki ãki auakari nimakatzakini.” Ikara atoko pininiã !erekari, kotxi aãtxirata aua pite oki ãki. ⁵ Maerekati kamakarii pite, kotxi pikamakiti erekari atxiïti, txamari maerekatinoka pixinikakiti. Pimakatzakariko aãtxirata pite oki ãki auakari merepanika, ininiã eereka apakata patamatiniiri aãsorõ pitari oki ãki auakari pimakatzakini. Ikara oerekaua piteka maerekani auakasaaki, pitakanapariko piteka maerekani, ininiã eereka apakata pimoianatiniri ãti iua maerekani itakanapini ïkapani.

⁶ –Kãkiti kona sikari Teoso nakiti anãpamoni, kotxi atxiïti iua anãpa kirioka, akatsata txai. Iua atokokana Teoso nakiti kona asika Teoso mapaxitakatimoni, kotxi iua anãpa atoko. Eereka iua misiritapitikai.

–Apaka kona pinoakitsa ereri kona pisika irarimoni, kotxi iua katxaratari. Iua atokokanera Teoso mapaxitakanimoni kona hïsikari Teoso nakiti, kotxi eereka imisiritari Teoso nakiti noakitsatxi irari misiritini atoko –itxa Xesosi.

Kona Hïtakanapapiri Teoso Himisãkiretini

(Arókasi 11.9-13)

⁷ Iuaïkana Xesosi sãkirauata:

–Teosomoni pamanarauatakasaaki, papakapariko pinirekakiti. Pinitarauatakasaaki, papokapitikariko pinireëkiti. Aïri iaxitikiri pakiritiniã, iua apakapapiretai.

Ia atoko itxako: “Pikanikauata. Piïroã,” itxako. ⁸ Ikinika amanarauatakari apakapariko inirekakiti. Nitarauatakari apokariko initakiti. Teoso akiritakari apakapaãkapitikako. ⁹ Amarini amanainiãri iri komiri, atauako kai sorokani isikatari imi? ¹⁰ Ximaki amanainiãri, atauako iminikani isikari? Konapitini. Irĩtxi kona kamari ikara atoko inakari. ¹¹ Kãkiti maerekani apaka imarotari erekari isikini amaritenamoni. Aĩri iaxitikiri apiata imarotari isikiniri erekari iua anaakorimoni, ninoa amanaãkasaakiri.

Ãti Pitiretini Pirena

¹² –Pixinikariko. Natokopa pinirekari apanakini tiretini pite? Ininiã iua atokokana pitiretariko apanakini. Ikara atoko itxa ikinika Teoso paniãtakiti aãtsopaã auakari, apaka Teoso sãkire sãpiretakani sãpiretakiti kitxakapirĩka –itxa Xesosi.

Ipi Kimapori Pirena

(Arókasi 13.24)

¹³ Iuaĩkana Xesosi sãkirauata:

–Teoso tixine hiĩroã axapitiri ĩronakikoãtaã. Mitari ĩronakikoãtaã sikari sari maerekani misiritikoãtaã. Iua kimapori mitari, kotxi itomaneri kãkiti sari iuaã. ¹⁴ Axapitiri ĩronakikoãtaã, kimapori axapitiri. Iua apo sari auapininiika inini tixinemoni. Iua kimaporiti axapitiki, kotxi poiãoka kãkiti sari iua kimaporiti –itxa Xesosi.

Omina, Ori Pakini Pirena

(Arókasi 6.43-44)

¹⁵ Iuaĩkana Xesosi sãkirauata:

–Erepaniko. Auapitika Teoso sãkire sãpiretakari, txamari iua na atão isãpireta, kotxi isãpiretari iua sãkire Teoso sãkirekata. Ikoketari. Atão inakari ikoketa maerekatikata. Erepaniko. Pamonõkoniri iua. Mapara patamatakasaakiri, soti auĩte atoko itxa. Ākixiniremoni ãkiti atoko itxa. ¹⁶ Pimarotari kãkiti ikara atoko inakari, kotxi patamatari ninoa kamakiti maerekati. Inako mina kona iritari kĩpaima. Aanaia kona iritari pama. Iua atokotxikana kãkiti maerekati kamakani kona kamari erekari. ¹⁷ Ikinika aamina erekari, erekari iri. Aamina maerekati, ininiã maerekati iri. ¹⁸ Aamina erekari kona posotari maerekati iritini. Iua atokokana aamina maerekati kona posotari erekari iritini. ¹⁹ Aamina maereka iriti itoãka, arika inaãka. ²⁰ Ininiã aamina iriãra kãkiti imarotari ereka inini. Iua atokokanera kãkiti imarotaãka –itxa Xesosi.

Kãkiti Teoso Tixine ĩroãkani

(Arókasi 13.25-27)

²¹ Iuaĩkana Xesosi sãkirauata:

–Apanakini txano nota: “Pite niauĩte” inakani, !isapanina Teoso auĩtetxi ininiãtaãua. Niri iaxiti auakari nireẽkiti kamakarinanira sapaniko iuaã. ²² Itixi xipokini õtisaaki, itomaneri kãkiti maxikatiĩka akiritano: “Pite aãũte apiatakari. Papakapaua. Aõerekapekari pisãkire apanakinimoni. Aõmitikapekari maerekati matamatakoti piuãkaã. Akamapekari posotiiretxi kaiãopokori,” itxanako ninoa. ²³ Txamari nitxanako: “Kona nimarotai hĩte. Hĩsipiniikaua. Maerekatira hĩkama.” Ikara atoko nisãpiretanako ninoa, kotxi maerekati kamakani itxauana –itxa Xesosi.

Aapokotxi Kamakari

(Arókasi 6.46-49)

²⁴ Iuaĩkana Xesosi sãkirauata:

–Nisãkire kenakotakari, nisãkire nĩkaenetakari, ia kiki kimaroreri atoko itxa. Ia kiki kamakasaakiri aapoko, iopitimita aapokotxi tsota. Otsomori ikama. ²⁵ Ininiã ãparaã kipakasaaki, uini apoãtakasaaki, ĩtima apisatakasaaki, aapoko kona irika, kotxi iua tsota itakapekari otsomori. Nisãkire kenakotakani nisãkire nĩkaenetakani, iua kiki kimaroreri atoko itxana.

²⁶ –Nisãkire kenakotakari, nisãkire miinĩkaenetakati, kãkiti miĩkiteti atoko itxa. Iua kamari aapoko ikipatxiteẽ. ²⁷ Ikipakasaaki, uini apoãtakasaaki, ĩtima apisatakasaakiri,

aapoko irika. Irika, kotxi aapokotxi !otsomori. Poião tsomikari. Irikasaaki, ikinika xipoka. Ikara atoko itxa nisäkire miinikaenetakati. Iua imarotapitikamari, txamari ! ikamari. Ikara atoko nisäkire mapaxitakani –itxa Xesosi.

Xesosi Posotiire Pirena

²⁸ Xesosi oerekaruatini xipoka atoko, kãkiti xinikari: “Paimatireri Xesosi. Iua imarotari atão.” ²⁹ Ikara atoko ixinikana, kotxi Xesosi imarotapitikari Teoso sãkire oerekini. Kaposotiireri iua isãkirauatakasaaki. Kaiõkatsoparerini atoko kona itxa. Ninoa kona imarotari Teoso sãkire Xesosi imarotiniri atoko.

8

Kiki Maere Matati

(Marko 1.40-45; Arókasi 5.12-16)

¹ Xesosi ixirata iokiriitaka atoko, itomaneri kãkiti sari iua tikini. ² Iuasaaki amianatakari maere matati apoka iuamoni. Ikapotoreëkua iua apisatoõ. Itxari:

–Nimarotari pinirekiniã, erekapeka pitxikitakano nota –itxa.

³ Xesosi maãtakari iua. Ininiã itxa:

–Ari, ninirekapitikari. Erekapekai –itxari.

Iuasaakipeka erekapeka itxa. ⁴ Ininiã Xesosi:

–Kona ïkora !pisãpiretape apanakinimoni. Uatxa sasetotximoni pisa. Poerekaua iuamoni erekapeka pinini. Moisesini paniãtakiti atoko pikama. Pikaminiãri ipaniãtakiti atoko, ininiã ikinimane imarotari erekapeka pinini –itxa Xesosi.

Eereka isari Xesosi paniãtakiti ikamini ïkapani.

Sotato Auïte Nitiri Makananitiko

(Arókasi 7.1-10)

⁵ Kapanaoõ sitatxiti apokasaaki, sotatoakori auïte sari Xesosimoni. Homano itxaua. Iua iteene amanaãri Xesosi:

⁶ –Xesosi, ninitiri iteene amianata naapoko. Ikikinanaka. !Itïpokotaika. Inikoriãtsiitari –itxari Xesosi.

⁷ Ininiã Xesosi:

–Iuaã nisako erekape inini ïkapani –itxa Xesosi.

⁸ Ininiã iua Homano:

–Konapitini. Pite auïtetxi apiatakari pitxaua. Nota poiãorino. !Apakata naapoko piïroini. Pisãkirenani piokanata. Ininiã erekapeka itxako ninitiri. ⁹ Nimarotari ikaranani apakatako, kotxi nota kamari nota auïte paniãtakiti. Apaka sotato auïte nitxaua nota. Nisãkirauatakasaaki, nisotatone kamapitikari nipaniãtakiti. Nota txari: “Pisa.” Iuasaakipeka isa. Nitxari ãti: “Pina.” Iuasaakipeka ina itxa. “Ia pikama,” nitxari ninitiri. Iuasaakipeka ikamari. Ininiã pisãkirenani apakatapitika –itxari Xesosi.

¹⁰ Isãkire Xesosi kenakotakasaaki, iteene ipotxitari isãkire. Iposo atoko itxa:

–Atão nitxai. Isaeo auakani poião auikari nisãkire. Ia Homano itxaua, iuaritika apiata iua auikari nota posotiire. Kona nitikapanikari kãkiti Isaeo auakari auikiniri nisãkire ia kiki auikiniri atoko. ¹¹ Nota sãpiretai hïte, itomaneri kãkiti ãti uãka atokatxi pokïkini tixinimoni auakani, atokatxi ereëkokini tixinimoni auakani apaka, itomaneri itixi auakani kiiniritauatako Teoso auïtetxi ininiãtaãua. Ninoa nipokotako anirimanekata kitxakapirïka auakanikata. Apraão, Isaki, Xakoo pakinikata inipokotana. ¹² Iuasaaki apanakini Apraão apika mekaniriakori kona sari iua Teoso kiiniritemoni, kotxi ninoa !auikari Teoso sãkire. Piãkatximoni iokanataãkanako. Iuaã itxiapatanao, akatsakat-siriãtauanako imisiritikona xika –itxa Xesosi sãkire.

¹³ Ininiã Xesosi txari sotatoakori auïte:

–Pisa paapokomoni. Pite auikari niposotiire pinitiri erekape inini ïkapani. Uatxa auape pinirekakiti –itxa Xesosi.

Ininiã initiri iuasaakipeka erekape itxa.

Simão Petro Imakiro Makananitiko
(Marko 1.29-34; Arókasi 4.38-41)

¹⁴ Iposo atoko Xesosi sari Petro aapokomoni. Iuaã apokasaaki, atamataro Petro imakiro. Osirimata nopini osirĩkanãta. Oãpoomata. ¹⁵ Ininiã Xesosi takapiotaua ouako nopini. Iuasaakipeka apoomari xipoka. Ininiã oõkitikaua. Osikakienatana ninoa.

Xesosi Makananitana Amianatakani

¹⁶ Mapiãpeka inakasaaki, kãkiti anikana itomaneri maerekati matamatakoti auaĩtotakini iuamoni. Isãkireẽ omitikana maerekani matamatakoni. Imakananitana ikinikana amianatakani. ¹⁷ Ikara atoko itxa Xesosi, kotxi inirekari Isaía sãkire iaõka apokini. Kitxakapirĩka Teoso sãkire sãpiretakari Isaía inakori txari: Iua tiretariko amianatakari. Imakatzakariko aamianare. Imakananitaua. Iuaka atatsiirauata ate ĩkapani.

Kãkiti Xesosi Imoianatinina Nireẽkani
(Arókasi 9.57-62)

¹⁸ Itomaneri kãkiti iuakata auakasaaki, Xesosi txari imoianariakori:

–Masa ipiniãmoni –itxana.

¹⁹ Iuasaakipeka aĩ kaiõkatsopareri apoka Xesosimoni. Itxa:

–Koerekareri, nota iposope nisini pite nirekinimoni –itxa.

²⁰ Ininiã Xesosi:

–Atauako pinirekatari pisini notakata? Aripa aua auini iriko. Araãkani auari ikoa. Txamari nota kãkiti itari iaxitikiri !auari nimakiniãtaã –itxa Xesosi.

²¹ Ātipekana apoka Xesosimoni. Xesosi moianari iua. Itxari:

–Niauĩte, paupiritano niri nikatanapini merepanika, kotxi kiomãtxipekari iua. Eereka nisa pitekata –itxari.

Itene iua !inirekari isini Xesosikata. ²² Xesosi apakapapiretari:

–Notakata pisa uatxa. Nisãkire mauĩãkani ipĩkani atoko itxana. Ininiã paupiritana ipĩkani katiniri inirimane nisãkire mauĩãkani –itxa Xesosi.

Xesosi Iotokakiniri Ītima Pirena
(Marko 4.35-41; Arókasi 8.22-25)

²³ Iposo atoko, Xesosi imoianariakorikata iereẽtaua, ĩpiriãtinina ĩkapani.

²⁴ Mokatanitika ĩtima kataparari apoãkata. Tsakati okari ãparaã kanaua ãki. Iuasaaki Xesosi imakanãta. ²⁵ Imoianariakori sari iuamoni. Ōpirĩkarina. Akiripoakatana:

–Apiananiri, !paupiritapiri apinini. Apinanapanoka –itxana.

²⁶ Ininiã Xesosi:

–Kinirepa hĩpĩkarauata? Poiãonoka hãuikari niposotiire –itxa.

Iposo atoko õkitikaua, pinita itxari ĩtima, tsakati pakini. Iuasaakipeka ĩtima, tsakati pakini iotoka. ²⁷ Ininiã imoianariakori tsorĩkaãta. Itxana:

–Natokopa inakaripa ia kiki? Ītima, tsakati pakini kenakotari isãkire –itxana imoianariakori.

Ipi Kiki Maerekani Matamatakoni Auaĩtotakini
(Marko 5.1-20; Arókasi 8.26-39)

²⁸ Ipiniaã apokasaakina Xerasa tõpamoni, itaõkitarina ipi kiki itomane maerekani matamatakoni auaĩtotakini. Akauariã auanãtana. Paneenamana. Ikara xika kãkiti pĩkari akauarimoni isinina. ²⁹ Xesosi inaãpotakasaaki, maerekani matamatakoni iĩtoãna auakani akiripoakata:

–Xesosi, Teoso ãkiri pitxaua. Kiripa pinirekaka atemoni? Pite ina uaimoni amisiritiko õti apisapanika pimisiritiniua ĩkapani atxiĩti? –itxarina.

³⁰ Ikara ininiãtaã takote auana itomane irariakori. Ikira atoko inipokonãtana. ³¹ Ininiã maerekani matamatakoni txari:

–Ate pomitikiniã, irariakorimoni piokanataua –itxarina.

³² Ininiã Xesosi:

—Hĩsipeka ninoamoni —itxa.

Iuasaakipeka irariakori ãtoã ãroãna. Ininiã imakinikana irariakori miteẽkata. Iokiriĩkatana. Ipoamoni isana. Iuaã ikomokana, axãpoãta itxana. ³³ Ninoa irariakori nĩkatakani miteka sitatximoni. Iuaã ikinika isãpiretana irari ipinini pirena, kiki maerekani matamatakoni auaĩtotakini pirena apaka. ³⁴ Ininiã ikinimane sitatxikini sari Xesosi itaõkitinina ãkapani. Iua itaõkitakasaakina, amanaãrina ninoa tixine itakanapini ãkapani.

9

Matĩpokotakati Pirena

(Marko 2.1-12; Arókasi 5.17-26)

¹ Ininiã Xesosi iereẽtaua kanauaã. Ikanapiriã iua auinimoni Kapanaoõ sitatxitimoni.

² ãtikaka kikiakori minari matĩpokotakati Xesosimoni. Xesosi imarotari ninoa auikiniri iua sãkire. Ininiã itxari:

—Namarite, pipoxokoniuatako. Pimaerekani makatxakapeẽkaika —itxa.

³ Iuasaaki aua ãtikaka kaiõkatsoparerini iuaã. Ninoa ãkixinireẽ itxana:

—Kona erekari isãkire. Teosonanira posotari kãkiti maerekani imakatxakini —itxana ninoa.

⁴ Xesosi imarotari maerekati ixinikakitina ãkixinireẽna. Ininiã iua txa:

—Kinirepa hũãkatari nisãkire maerekati inini? ⁵ Nitxari iua imaerekani nimakatxakini, txamari !himarotari imaerekani atão nimakatxakini. “Põkitikaua. Pitĩpokota,” nininiã, himarotari nisãkire atão ininiãua, kotxi hĩtikari. Niposotiire imaerekani nimakatxakini ãkapani, niposotiire iua nõkitikini ãkapanitxikana. ⁶ Ininiã uatxaika noerekai hĩte, Teoso iokanatano nota hĩtari iaxitikiri ãkorapokoritimoni kãkiti maerekani nimakatxakini ãkapani —itxa Xesosi.

Ininiã itxari matĩpokotakatimoni:

—Põkitikaua. Pisirimata pikoseka, sipe pitxa paapokomoni —itxa Xesosi.

⁷ Iuasaakipeka iua õkitikaua, aapokomoni sipe itxa. ⁸ Ikara inakari apanakini itikasaaki, ipĩkarauatana.

—Peerekari Teoso, kotxi iua oerekari iposotiire kãkitimoni —itxana.

Mateo Pirena

(Marko 2.13-17; Arókasi 5.27-32)

⁹ Ikara inakari oereka atoko Xesosi sipeka. Isikasaaki, itaõkitari Mateo inakori. Auĩtetxiakori txineirote apotiitakari iua. Xesosi napakasaaki, iitopãkanãta txineiro apakapiniãtaã. Ininiã Xesosi txari:

—Masa notakata pimoianatinino ãkapani.

Ininiã Mateo õkitikaua, Xesosikata sa itxa. ¹⁰ Eereka Xesosi imoianariakorikata nipokota Mateo aapoko. Txineiro apotiitakani, apanakini kãkiti maerekati kamakani pakini apoka Xesosikata inikinina ãkapani. Kãkiti kona potxitari txineiro apotiitakani, kotxi ninoa sikaro oa txineiro ãti uãka auĩteakorimoni. !Neerekana ninoa. ¹¹ Pariseoakori itikari ninoa nipokotini, ininiã itxana Xesosi moianariakorimoni:

—Kinirepa hũauĩte nipokota txineiro apotiitakanikata, maerekanikata? —itxana.

¹² Ininiã Xesosi kenakotari ninoa sãkire. Itxa:

—Maerekati kamakari amianatakari atoko itxa. Ninoa nirekari erekape ininina. Kãkiti mamianatakani !inirekari ipini sikakarimoni isinina. Amianatakaninoka nirekari ipini sikakarimoni isinina. Hĩte !inirekari nota makatxakiniri himaerekani, kotxi hĩte uãkatari !auari himaerekani. ¹³ Hĩxinikariko ia Teoso sãkire iõkatsopatakori: Hĩsakarauata notamoni. Apiaerekata hiamonĩkiniri apanakini.

Nota ina ñkorapokoriti kona kãkiti “atão inakarino kamakarino nota” inakani ñkapanini, kotxi nino uãkatari erekarini ininiãuana, txamari kona erekana. Kãkiti maerekati kamakani ñkapanira nina nota uai imaerekanina itakanapinina ñkapani –itxa Xesosi.

Nipokori Takapaniko Teoso Misãkiretiko Ñkapani

(Marko 2.18-22; Arókasi 5.33-39)

¹⁴ Eereka Xoão kapatxisareri moianariakori apoka Xesosimoni. Itxana:

–Ate, pariseoakori pakini atakanapari anipokotini itokata Teoso amisãkiretini ñkapani. Kinirepa pite moianariakori !itakanapari inikinina Teoso imisãkiretinina ñkapani? – itxana.

¹⁵ Ininiã Xesosi apakapapiretana:

–Nota kiiniri kamakari atoko nitxa. Kiki nirekiniã ñtanorouatini, ikamari kiiniri. Iuasaaki imoianariakori kona nirekari imatinaniuatinina, iua ninoakata auakasaaki. Ininiã kona itakanaparina inikinina Teoso imisãkiretinina ñkapani. Ñti õti nimaãkãkako. Nanikaãkako nino mauakaniãtaã. Iuasaakiko itakanaparina inikinina Teoso imisãkiretinina ñkapani –itxa Xesosi.

Mãkatxi Tãpanatiko Pirena

¹⁶ –Kiomãtxiakori kitxakapirãka auakani sãkirekata kona hãkoketapiri nota sãkire. Ikara hãkaminiã, ininiã mãkatxi kitxakari amaneriã hãtãpanatini atoko itxa. Mãkatxi kitxakari amaneriã kona hãtãpanatape, kotxi parokasaakiri, amaneri txikika, ininiã ikatsorãkari mãkatxi kitxakari. Ininiã mitari itsorãkare. Mãkatxi amaneri nota oerekakiti atoko. Mãkatxi kitxakari, kãkiti kitxakapirãka oerekakiti atoko itxa. Hãkoketiniãri kitxakapirãka oerekakiti, amaneri oerekakitikata, imakinika xipoka.

Sako Aamata Kamakori

¹⁷ –Kitxakapirãka kãkiti takari iãriã sako aamata kamakori ãki. Iuasaaki kona kãkiti takari amaneri iãriã kitxakari mata ãki, kotxi iãriã txiõkaãtakasaaki, itiãkaãpota. Ininiã omata kitxakari tsorakitako, kotxi paikori. Kona itiãka. Ininiã iãriã katxaka. Iãriã, aamata pakini xipoka. Amaneri matariã itakaãka iãriã amaneri. Ikara atoko ininiã, erekapitikari. Kona ixipokapaniko. Iua atokokana kona hãkoketapiriko kiomãtxi kitxakapirãka oerekakiti nota oerekakitikata –itxa Xesosi sãkire.

Xoteoakori Auãte Pirena

(Marko 5.21-43; Arókasi 8.40-56)

¹⁸ Xesosi sãkirauatapanika, inakasaaki Xoteoakori auãte apoka iuamoni. Ikapotoreẽkaua Xesosi apisatoõ. Itxa:

–Namarite opinanapanoka. Masa. Piuako pitaka oa nopini, ininiã kona opina –itxari Xesosi.

¹⁹ Ininiã Xesosi imoianariakorikata õkitikaua, iuakata sa itxana.

Xesosi Mãka Maãtakakaro

(Mateo 9.20-22; Arókasi 8.43-48)

²⁰ Isikasaakina, sito apoka iua porikimoni. Oamianare oãrẽka !iotokiniãro. Tosikanani oamianatini. Oãpokasaaki, omaãtakari imãka imapotomatare. ²¹ Oãkixinireẽ otxa:

–Imãka nimaãtakiniã, erekape nitxako –otxa.

Ininiã otikakari imãka. ²² Iuasaakipeka Xesosi kirioka, atamata itxaro:

–Namarite, kataparaxinire pitxako. Pauikari niposotiire, ininiã erekapekai –itxaro. Iuasaakipeka oa erekape.

Xãiro Ñkero Õkitikiko Pirena

(Marko 5.35-43; Arókasi 8.49-56)

²³ Iposo atoko Xesosi sari Xoteoakori auãte aapokomoni. Iuaã apokasaaki, iãroã. Itikari sokonaki xõkakani, itomaneri kãkiti txiapatakani apaka. ²⁴ Ininiã Xesosi:

–Mapara hãsa, kotxi oa amarini kona opina. Omakanãta –itxa Xesosi.

Ininiã ninoa napetari Xesosi:

—!Omakanãta. Opïpe. Pite !imarotari —inapetarina.

²⁵ Ikinimane mapara isikasaakina, Xesosi sari oa ãtokoromoni. Imaïkaro ouako. Iuasaakipeka oõkitikaua. ²⁶ Ikara ene iaripireta iua tõpa.

Xesosi Kõsiãrepeka Txïkitakari Mõsiãreti

²⁷ Iposo atoko Xesosi sipe. Iuasaaki ipi mõsiãreni sari iua tikini. Iuasaaki ninoa akiripoakata:

—Tavii apika mekanirii, piamonïkaua ate —itxana.

²⁸ Aapokotxi Xesosi ãroãkasaaki, ninoa ãroã apaka. Ininiã Xesosi:

—Hãuikatari niposotiniri erekapeka nitxïkitakinii hïte? —itxa Xesosi.

Ininiã ninoa:

—Ari, Apiananiri —itxana.

²⁹ Ininiã itakapiotaua ninoa oki nopini. Ininiã itxa:

—Ari, hãuikakiti iaõka itxako —itxa Xesosi.

³⁰ Iuasaakipeka ninoa kõsiãrepeka itxana. Ininiã Xesosi:

—Kona hïsäpiretapiri nikamakiti apanakinimoni —itxa Xesosi.

³¹ Eereka ninoa sipe. Txamari iaripiretarina ikamakiti ikinika iua tõpa.

Masãkireti Pirena

³² Ninoa kiki potorikasaaki, masãkireti anikaãka Xesosimoni. Iua kona kasãkireri, maerekati matamatakoti auaïtotakiti xika. ³³ Iuasaaki Xesosi omitikari iua maerekati matamatakoti. Iuasaakipeka iua kiki säkirauata. Itomaneri kãkiti itikari. Iuasaakiika ninoa tikoka. Ininiã itxana:

—Ikinika Isaeo tixiniã auakani, mitxi !itikapanikari ãkora atoko inakari —itxana.

³⁴ Txamari pariseoakori txari:

—Xesosi omitikari maerekati matamatakoti Satanasi posotiireẽ —itxana.

Na atão ninoa säkire.

Xesosi Ikini Sitatxiti Sini

³⁵ Ininiã Xesosi sari ikini sitatxiti tõpa. Aapokotxi auiniãtaã apaka isa. Oerekarauata aiko Xoteo apotiitiniãtaãua. Isãpiretari Teoso iokanapirena erekari, Teoso auïtetxi ininiãua pirena. Apaka erekapeka itxïkitakana ikinipoko amianatakani. Ikini sereti amianari aua kãkitimoni. Ikinika imakananita. ³⁶ Atamatakasaakina ninoa kãkitipokoni, iamoniãkana ninoa, kotxi soti auïte minïkatakoni atoko itxana, kotxi !imarotarina isinimonina. Imaãkauana. ³⁷ Ininiã itxari imoianariakori:

—Kaiãori kãkiti iposope auikiniri nisãkire, txamari !imarotarina nisãkire, kotxi ! ikenakotapanirina. Ninoa kikio erekari atoko itxana. Imakinika iposope iuaã. Ininiã iposope auikinirina nisãkire. Txamari, poiãoka parïkauatakani aua nisãkire isãpiretinina ãkapani. ³⁸ Ininiãkara himisãkiretariko Apiananiri iaxitikiri iokanatinina parïkauatakani iua säkire auiãkani apotiitinina ãkapani. Ikara atoko hïtxako Teosomoni —itxa Xesosi.

10

Xesosi Mereẽna Tosi Imoianariakori
(Marko 3.13-19; Arõkasi 6.12-16)

¹ Xesosi mereẽna tosi imoianariakori. Isikari iposotiire ninoamoni maerekati matamatakoti omitikinina ãkapani. Isikari iposotiire ninoamoni amianatakani imakananitinina ãkapani, ikinika amianari inokasaakina ninoa amianatakani. ² Naia imoianariakori uãka: Merepitipanika auari Simão Petro inakorima, apaka itari ãtree inakorima. Auari Txiakoma, apaka itari Xoãoma. Ninoa Sepeteo anaakori. ³ Auari Piripima, Patoromeoma, Tomeema. Apaka auari Mateoma, txineiro apotiitakari. Apaka ãti Txiakoma, Aoepo ãkiri. Aua Tateoma. ⁴ Aua Simãoma, Homano omanatakari. Apaka

aua Xotasi Isikariotxi inakorima. Iua Xesosi mĩkapiritakari itxaua. Ninoa Xesosi moianariakori itxauana.

Xesosi Iokanatanana Imoianariakori Kãkitimoni
(Marko 6.7-13; Arókasi 9.1-6)

⁵ Ininiã Xesosi iokanatanana ninoa isãkire isãpiretinina. Ia atoko õtãkikana:

–Kona hĩsipeko Xoteo minakonimoni, apaka Samaria tõpa sitatxitimoni kona hĩsipeko.

⁶ Hĩsako kãkiti Isaeo tixinikinimoni. Hinirimanemoni, Xoteoakorimoni hĩsako. Ninoa soti auĩte pĩpinanaãkani atoko itxana. ⁷ Hãpokasaaki kãkitimoni, hĩtxariko: “Teoso ikinimane auĩte ininiua manapi paĩtiki apokako.” ⁸ Himakananitanako amianatakani. Maere matati erekapeka hĩtxĩkitakako apaka. Ipĩkani hõkitikako. Homitikariko maerekati mata-matakoti kãkiti auaitotakini. Ikara atoko hĩkamako. Kona hĩte ĩkitxitari Teoso hãpakapakiti ĩkapani. Ininiã ikara atokokana hĩtxako. Kona hinirekapiri kãkiti ĩkitxitinii hĩte, hĩte sikakiti ĩkapani. ⁹ Kona hanikapero txineiro oro kamakoro. Pirata kamakoro, ãtião txineiro apaka, kona hanikape. ¹⁰ Uatxa hianaxititakasaaki, sako mata !hanikape. Āti himãka !hanikape. Āti hĩkiti mata kona hanikape. Hĩtsonere !hanikape. Kona himaãkapeua, kotxi parĩkauatakani apakapariko nipokori. Hinirekakiti apokapitikako.

¹¹ –Sitatxi hãpokasaaki, hinitari kãkiti Teoso sãkire kenakotakani, hĩte apakapakani. Hĩkaikota ninoakata. Eereka kona hĩsipe ãti aapokomoni hĩkaikotini ĩkapani.

¹² Aapokotxi ãki hĩĩroãkasaaki, hĩtxako: “Erekari Teoso sikakiti kaikotako hĩtekata,” hĩtxako.

¹³ Kãkiti ipoxokoniritika apakapiniã, hĩtxako: “Teoso takari erekari hĩtemoni,” hĩtxako. Imanirekakaniã, hĩtxariko: “Teoso kona takari erekari hĩtemoni.” ¹⁴ Atxiĩti aapokotxi hãpokasaaki, kãkiti iuaãtaã !apakapai. Atxiĩti !inirekarina hĩsãkire, ininiã iusaaki hĩsipeka. Hĩtakanapariko iuaãtaã. Hĩpotorikasaaki, himakatzakari kipatxi hĩkiti mataã auakari. Ininiã iusaaki ninoa imarotari Teoso kona apokaerekatana. ¹⁵ Hĩxinikariko ia nisãkire. Kãkiti misiritiko õti apokasaaki, ninoa apiata misiritaãka. Sotoma sitatxiti auakani, Komoha sitatxiti auakani pakini misiritaãka poiãoka –itxa Xesosi.

Misirikaretxi Pirena
(Marko 13.9-13; Arókasi 21.12-19)

¹⁶ Iuaĩkana Xesosi sãkirauata:

–Erepaniko, pamonõkoniri. Hĩte soti auĩte atoko hĩtxa, kotxi !kaposotiirei hĩte, iuaritika niokanatai kãkitimoni. Ninoa ãkiti atoko, ininiã erepaniko. Ininiã kimarorei hĩtxako. Imini kimaroreri atoko hĩtxako. Ininiã maerekati ninoa auakiti kona misiritai. Iusaakiika kamo atoko hĩtxako, kotxi kamo !imisiritari kãkiti.

¹⁷ –Erepaniko. Araõkire hĩtxako. Auako kãkiti kinirão anikinii maxikatiĩka kãkiti misiritiko mereẽkanimoni. Apanakini xirokaiko hĩte maxikatiĩka aiko ãki Xoteo apotitiniãtaãua. ¹⁸ Nota sãkire hãuikini xika hanikaãkako auĩtetxiakorimoni himisiritiko himarotini ĩkapani. Ikara atoko ininiã, iusaaki erekapitikari, kotxi hĩsãpiretariko nota sãkire iuaã auakanimoni, Xoteo minakonimoni apaka.

¹⁹ –Kãkiti misiritiko mereẽkarimoni hanikikosaaki, kona himaãkapeua hĩsãkirauatini apisa. Teoso sikaiko hĩsãpirena tĩkane. ²⁰ Sãkiretxi hĩsãpiretakiti kona hĩte sãkireni. Erekari Matamatakoti, iuarako sikariko sãkiretxi hĩsãkirauatini ĩkapani iusaaki.

²¹ –Āti õti hĩtari sikaiko hĩte homanatakinimoni okinii ĩkapani, kotxi hĩte auikari nota sãkire. Iua atokokanerako irĩtxi sikariko imi ãtimoni okiniri ĩkapani, kotxi imi auikari nota sãkire. Auako apaka imi omanatinina iri, inoro pakini, kotxi inoro, iri pakini auikari nota sãkire. Iua sikanako ãtimoni okinina ĩkapani. ²² Ikinimane omanataiko hĩte nota sãkire hãuikini xika, iuaritika hãuikiniãri nisãkire ãtipirika, nimakatzakai himapinakani ĩkapani. ²³ Sitatxiã hãuakasaaki, himisiritikosaaki, ãti sitatxitimoni himitekako. Atão nota sãpiretai hĩte. Kona hĩte xipokapaniri hĩparĩka ikini sitatxiti Isaeo tixini hĩtari iaxitikiri kanapiriini apisa –itxa Xesosi sãkire.

Apiatakari, Poiãori Pakini

²⁴ Iuaĩkana Xesosi sãkirauata:
—Apaiaõkarauatakari poião. Koerekareri apiata. Apaka nitiritxi poião. Iauĩte apiata. ²⁵ Apakatapitika apaiaõkarauatakari koerekareri imarotakiti iaõka imarotini. Iua atokokanera nitiritxi iua auĩte atoko inini. Apanakini akiritano nota “Peosepoo,” Satanasi inakori. Ininiã itakauãkatai hĩte hĩuãka apia maerekati, kotxi nota anaakorirai hĩte —itxa Xesosi.

Kipatakori !Auari
(Arókasi 12.1-3)

²⁶ —Ininiã kona !hĩpĩkapena ninoa maerekati kamakani, kotxi nota kanapiriãkasaaki, kona kipatakori auapanika. Ikinika imarotaãkako. ²⁷ Hĩtemoni ĩkanõka nimaasakapiretakiti, ĩkara nisãkire hãkiripoakatako aapokotxi nopini imakinika kãkiti imarotini ĩkapani. Uatxa hĩtemoninani nisãpiretakiti ãti õti ikinimanemoni hĩsãpiretako.

Kipa Apĩka?
(Arókasi 12.4-7)

²⁸ Kona hĩpĩkapena hĩto okakani, kotxi liposotarina hĩxinire okinina. Hĩpĩkariko Teoso, kotxi iuanokara posotari iokanatinii hĩte, hĩto, hĩxinire pakini maerekani misiritikoãtaã. Iuara hĩpĩkako.

²⁹ —Ipi kotipiriki ĩki poião, ãtika txineiro otanoka. Iuaritika hĩri iaxiti auakari turetana ninoa. Imauritakaniãri, kona ãtika ipina. ³⁰ Kipakinipa piãko pikiiã auakari aua? !Pimarotari. Teoso imarotapitikari, kotxi iteene inĩkatai, ininiãkara !hĩpĩkarauatape. ³¹ Kotipiriki ĩki poião, iuaritika Teoso turetari kotipiriki. Ininiãkara kona hĩpĩkarauatape. Kaiãopokori kotipiriki auiniã, iuaritika hĩte ĩki apiata, ininiã Teoso turetakitikai hĩte —itxa Xesosi.

Xesosi Turetakani, Xesosi Manirekakani Pakini
(Arókasi 12.8-9)

³² Xesosi sãkirauatapanika:
—Apanakini apisatoõ hĩsãpiretiniãri: “Xesosi nakiti nitxaua nota,” iua atokokanerako nitxariko niri iaxiti auakari apisatoõ: “Nota nakitipitikara iua,” nitxako —itxa Xesosi. ³³ Hĩsãpiretiniãri apanakini: “Xesosi nakiti !nitxaua nota,” iusaaki nisãpiretari niri iaxiti auakari: “Kona nota nakitini iua.”

Pinirekakiti Pirena
(Marko 8.34-35; Arókasi 12.49-53; 14.26-27)

³⁴ —Kona hĩxinikapiri nota ĩkorapokoriti napokini neenamatzixi nixipokini ĩkapani. Kotxi kãkiti auikari nisãkire, ininiã eereka apanakini omanatana. Kona neenamatzixi xipokapanika, kotxi nota minari niposotiire maerekati nixipokini ĩkapani. ³⁵ Nota apokini xika imi omanatana iri, inoro pakini, kotxi ninoa auikari nisãkire. Tiĩrotxi omanataro oimakiro, kotxi ãto omanatano nota, ãto turetano nota. ³⁶ Iusaaki pinirimane pimokaiakarinarako itxauanako.

³⁷ —Poiãoka pitiretiniãno nota, apiata pitiretiniãna pinoro, piri pakini, kona erekari nimoianari pininiua. Apiata pitiretiniãna pamariteakori, kona erekari nimoianari pininiua. ³⁸ Nota kinirão moianataka hinakasaaki, notakata hĩsa. Himamĩteenekakanisaakiri himisiritiko nota ĩkapani, ininiã !apakata himoianatinino. ³⁹ —Pite ãtipirika kaminiãri piteka nireẽkitinoka, ininiã pinireẽkiti xipokapitikako pitekata. Pite nireẽkiti xipokiniã, nota sãkire pauikini xika, pite auapininiika txako Teosokata —itxa Xesosi.

Hĩte Apakapakani Pirena
(Marko 9.41)

⁴⁰ Iuaĩkana Xesosi sãkirauata:
—Kãkiti hĩte apakapakani, apakapano nota apaka. Nota apakapakari apakapari nota iokanatakari apaka. ⁴¹ Papakapiniãri Teoso sãkire sãpiretakari, kotxi iua sãpiretari Teoso

sãkire, ininiã papakapari erekari Teoso sikakiti iua apakapakiti iaõka. Papakapiniãri atão inakari kamakari, kotxi iua kamari atão inakari, ininiã papakapari erekari Teoso sikakiti iua apakapakiti iaõka. ⁴² Pisikiniãri ãparaã nimoianari poiãorimoni iãtini ïkapani, kotxi nimoianari itxaua, Teoso ïkitxitapitikai pite –itxa Xesosi.

11

Xoão Kapatxisareri Tikini Sikani (Arókasi 7.18-35)

¹ Xesosi moianariakori tosi pakini isãkire oerekini xipoka atoko, Xesosi sipe. Isa ãti sitatxitimoni, eereka ãti sitatxitimoni Kariréia tõpa itxaãpota oerekarauatakasaaki. Teoso sãkire isãpiretari kãkiti.

² Xoão kapatxisareri, kateia ãki auakasaaki, ikenakoenetari Xesosi kamakiti, ininiã iokanatarari ipi imoianariakori Xesosimonikari.

³ Ininiã Xoão txari imoianariakori:

–Hïpimaãri Xesosi: “Pitekani iaxiti ïkari, kãkiti iãtapakiti pitxataua? ãtikani atxiïti aiãtapakiti pitxataua?” hïtxariko –itxa Xoão.

Ininiã ninoa sipe. Ipimaãrina Xesosi Xoão sãkire iaõka. ⁴ Ininiã Xesosi apakapapiretana:

–Hïkanapiriã Xoãomoni. Hïspiretari hïkenakotakiti, hãtamatakiti pakini. ⁵ Hïte atamatapekari mõiããreti kõiããrepeka inini. Matïpokotakati tïpokotapeka. Hãtamatapekari maere matati erekapeka inini. Makenakokiti kakenakokipeka. Ipïkani õkitikapekua. Teoso iokanapirena erekari sãpiretapeëkaika minakati mauapikinitinimoni. Pakini hãtamatapeka. Ikara hïspiretako Xoãomoni. ⁶ Kãkiti iteene auikiniãri nota sãkire, Teoso takari erekari iuamoni. Ikara nisãkire hïspiretari Xoão –itxa Xesosi.

⁷ Ininiã ninoa sipe. Isikasaakina, Xesosi sãpiretari Xoão pirena itomaneri kãkitimoni. Ia atoko itxa:

–Kipa ïkai hïte, Xoão kapatxisarerimoni hïsikasaaki, ãparaã makipakaniãtaã iua auakasaaki? Hïte sari iuamoni, kotxi ãtitxika isãkire aua. Teoso sãkirenoka isãpireta. ïtima ãpokaxitikasaaki, katsotati ipinimoni ipapïka, iuaïkana ipinimoni ipapïka inini atoko kãkiti, kotxi isãkire kita ãti, isãkire uatxa ãtião, isãkire katana iuaïkana ãtião, itxaãpota isãkire. Ikara atoko !itxa Xoão.

⁸ –Kipa ïkai hïte Xoãomoni hïsikasaaki? Hïte sari iuamoni, kotxi !inirekari tiitxi, txineiro pakini. !Kakaroneri imãka, kotxi !ikaikota auïtetxi aapoko. Auïtetxi aapoko peereri mãkatxi.

⁹ –Kipa ïkai hïte iuamoni hïsikasaaki? Hïte sari iuamoni, kotxi iua Teoso sãkire sãpiretakari itxaua. Atãopitika Teoso sãkire sãpiretakari itxaua. Iua Xoão Teoso sãkire sãpiretakari apiari.

¹⁰ –Teoso sãkire iõkatsopatakori kitxakapirïka txari:

Niokanatariko nisãkire sãpiretakari kãkitimoni pite apisa, papokini isãpiretini ïkapani, kãkiti iposope inini ïkapani.

¹¹ Atãopitikara. Ikinimane sauaki Xoão kapatxisareri apiatakari itxaua. Iuaritika Teoso auïtetakari poiãori inakari apia imarotariko Teoso kamakiti tïkane. ¹² Xoão auakasaaki Teoso auïtetakani misiritaãka, kotxi kãkiti kaneenamari naiatana ninoa. Ninoa nirekari ixipokinirina Teoso auïtetxi ininiua ïkorapokoriti. Uatxapiima auapanika ikara atoko inakari. ¹³ Xoão apokini apisapanika, ikinika Teoso sãkire sãpiretakani, ikinika Teoso sãkire iõkatsopatakani, sãpiretari Teoso auïtetxi ininiua pirena. Xoão apokasaaki, iua apaka oerekari Teoso auïtetxi ininiua pirena.

¹⁴ –Kitxakapirïka Teoso sãkire sãpiretakani sãpiretaua:

ãti Teoso sãkire sãpiretakari Eríasi atoko inakari apokako, itxana. Iuakara Xoão. Hãuikiniãri nisãkire, hãuikariko iuara apokapeka. ¹⁵ Kakenakokii, ininiã hïkenakotariko nisãkire –itxa Xesosi.

¹⁶ –Kanatokopa itxa kākiti ĩkorasaaki auakani? Amarini sarauatini atoko itxana ĩkorasaaki auakani. Ninoa amarini topāka tiitxi amotikoātaā. Apanakini amarini txitana apanakini amarini. Itxana: ¹⁷ “Ate xikarauata hĭte serenini ĩkapani, txamari !hĭserena. Kākiti pĭkasaaki xikariti axikareta, txamari !hĭtxiapata.” Ninoa amarini sarauatini atoko itxana ĩkorasaaki auakani, ¹⁸ kotxi Xoāo kapatxisareri apoka ĩkorapokoriti. Itakanapari inikini Teoso imisākiretini ĩkapani. !Iātari ovaā. Iuaritika hĭte txari: “Maerekati matamatakoti auaĭtotari Xoāo,” hĭtxari. ¹⁹ Nota hĭtari iaxitikiri apoka ĩkorapokoriti. ! Nitakanapari ninikini. Ikiniōtika ninipokota. Niātari ovaā. Ininiā hĭte txari: “Iua kiki ixori. Poātakari iua. Iua moianatana txineiro apakapakani, kākiti maerekati kamakani,” himisākirepirenātano. Kimaroreri atāo inakari kamari erekarinani. Kākiti atamatakasaakiri ikamakiti, imarotari kimaroreri atāo inakari ininiua –itxa Xesosi.

Sitatxi Auakani Teoso Sākire Mauiākani
(Arókasi 10.13-15)

²⁰ Ininiā Xesosi pinitana Korasiĭ sitatxiti auakani, Petsáita sitatxiti auakani pakini, kotxi kaiāopokori iposotiire ikamapeka iuaātaā, iuaritika kona itakanaparina maerekati.

²¹ Xesosi txana ninoa:

–Kākiti Korasiĭ auakani himisiritaākako. Kākiti Petsáita auakani hĭte apaka misiritaākako. Kitxakapirĭka Txiro, Sitoō pakini sitatxitikini kamari maerekati, ininiā Teoso xipokana ninoa arikatxiā. Ninoa atamataākamariko nota posotiire hĭte atamatiniri atokokana, ininiā ninoa mākatamariko sako mata. Itakamariko atapani iĭtoāna. Ikara atoko ininiā, ninoa oerekari maerekati itakanapinina. ²² Nisāpiretai hĭte ia: “Kākiti misiritiko ōtisaaki, Txirokini, Sitoōkini pakini misiritaāka poiāo. Hĭte apiata.” ²³ Hĭte Kapanaoōkinipekana, Teoso ākiri aua hĭtekata. Hĭte itikapekari ito posotiiretxi iaxitikiri. Txamari hōkakatapeēkako maerekani misiritikoātaā. Nikamakiti hĭtemoni Sotoma auakani sauaki nikamaākamako, kona ninoa xipokamako. Auapanikamanako. ²⁴ Ininiā nitxai hĭte: “Himisiritikosaaki, apiata himisiritaāka. Poiāoka Sotomakini misiritaāka,” – itxa Xesosi.

Teoso Imarore Apakapakani
(Arókasi 10.21-22)

²⁵ Iuasaaki Xesosi misākiretari iri:

–Niri, pitixine auakani auĭte pitxaua. Uai ikini itixiti auakani auĭte apaka pitxaua. Peerekai pite, kotxi na poerekari pimarore kākiti kimarorerinimoni, iuikakanimoni. Pite oerekari pimarore kākiti poiāorinimoni, miuikakanimoni. ²⁶ Ari niri, ikara atoko pinireka. Ikara atoko papokaerekata –itxari iri.

²⁷ Eereka imisākiretari kākiti:

–Niri sikapekano ikinika. Kākiti !imarotano nota Teoso ākiri nininiua. Nirinokara atāo imarotano nota. Apaka kākiti na atāo imarotari niri. Notanokara imarotari niri, kotxi iua ākiri nitxaua. Kākiti nirekiniāri imarotiniri niri, nota oerekari niri iuamoni.

²⁸ –Iteene minari atoko itxa himaerekani. Hinireka hĭtakanapiniri iua, txama !hĭposota hĭtakanapiniri. Hĭsāpakiniā himaerekani xika, hina notamoni hĭtomatini ĩkapani. Iuasaaki nimakatzakari himaerekani. ²⁹ Hĭtakariko nipaniātakiti hākixinireē. Hāpaiaōkariko nota pirena. Erekapitikari hāpaiaōkiniri ninirekakiti, kotxi kona kaneenamano. Kona nota napetari kākiti. Niukiniua !auari. Ikara atoko ininiā, hĭxinire tomatapitika. ³⁰ Hĭposotapitikari nipaniātakiti hĭkamini, notakata hĭparĭkauatiniā. Nipaniātakiti ! kasāpaniri. Kona kamimari. Peerekari nipaniātakiti –itxa Xesosi.

12

Tomatiko Ōti Pirena
(Marko 2.23-28; Arókasi 6.1-5)

¹ Mapaõti atoko tomatiko õtisaaki, Xesosi imoianariakorikata napaãpota triko takikoãtaã. Inatxitana. Inapaãpotakasaakina, imakatzakarona triko iki mapaki inikinirona ïkapani. ² Pariseoakori ikara itikasaaki, itxarina Xesosi:

–Patamata. Pimoianariakori kamari ate mauritakiniti. Ninoa parïkauata tomatiko õtisaaki –itxana.

³ Ininiã Xesosi:

–Atxiïti kona hãtatsopatapanikari Taviini kamakiti imoianariakorikata kitxakapirïka inatxitakasaakina? ⁴ Iua ïroã Teoso misãkiretikoãtaã. Imoianariakorikata inikari komiri Teosomoni sikakori. Sasetotxinokara auiritaãka iua komiri inikinina. Apanakini ! auiritaãka inikiniri. Iuaritika ninoa sasetotxiakori tiretari Taviini, imoianariakori pakini inatxitakasaakina. ⁵ Atxiïti kona hãtatsopatapanikari Moisesini iõkatsopatakiti. Iua auiritari sasetotxi parïkauatini tomatiko õtisaaki, Teoso misãkiretiko aikotiã. Iuasaaki ninoã likamari maerekati, kotxi iparïkauatana Teoso misãkiretiko aikotiã. ⁶ Atão nisãpiretai, hïte paniãtakiti poiãori. Nota paniãtakiti apiari. ⁷ Teoso sãkire iteene hãuikasaaki, kona hãpoïtana kãkiti maxikatiïlka, kotxi Teoso sãkire txari:

Nota nirekari apanakini hïtoretini. Pimatiretakanisaakiri ãti, !apakata pisikarauatini notamoni. Iuasaaki kona ninirekari pisikakiti, itxa Teoso kitxakapirïka.

⁸ –Nota hïtari iaxitikiri posotari ikinipoko ninireëkiti nikamini tomatiko õtisaaki, kotxi Apiananiri nitxaua –itxa Xesosi.

Motïkauakotakari Pirena (Marko 3.1-6; Arókasi 6.6-11)

⁹ Xesosi ikara inaãka atoko, isa aiko Xoteoakori apotiitiniãtaãua. ¹⁰ Iuaã aua kiki motïkauakotakari. Iuaã aua apaka pariseoakori Xesosi kinirão apoïtaka inakani tomatiko õtisaaki iparïkauatini xika. Ninoa amanaãri Xesosi:

–Atauako apakata atxiïti tomatiko õtisaaki, erekape pitxïkitakiniri kãkiti? –itxarina.

¹¹ Ininiã Xesosi pimaãna:

–Hïpira soti auïte tomatiko õtisaaki aariko ãki irikiniã, himakatzakatari? Atãopitikara Teoso sãkire auiritapitikari kãkiti makatzakiniri ipira tomatiko õtisaaki. ¹² Soti auïte poiãori, kãkiti apiari. Ininiã Teoso sãkire auiritapitikari tomatiko õti erekape nitxïkitakiniri kãkiti –itxa Xesosi.

¹³ Ininiã itxari kiki motïkauakotakarimoni:

–Poerekauakotauako –itxa.

Oerekauakotakasaakia, erekapeka itxa, ipini uako atokopeka itxa. ¹⁴ Iuasaaki pariseoakori sipeka atoko, ninoakakarika misãkiretakakauana:

–Natokopa atxatari Xesosi aõkini? –itxakakana.

Nitiritxi Teoso Mereëkiti

¹⁵ Xesosi imarotakasaakiri ninoa okaenetiniri iua, iusaakipeka Xesosi sipeka. Itomaneri kãkiti sa iuakata. Ikinika amianatakani erekapeka itxïkitaka. ¹⁶ Xesosi ! auiritana isãpiretinirina ikamakiti apanakinimoni. ¹⁷ Ikara atoko itxa Xesosi, Teoso sãkire sãpiretakari Isaïa inakori sãpiretakiti iaõka apokini ïkapani. Ia atoko itxa Teoso Isaïamoni:

¹⁸ Ia ninitiri nimereëkiti. Ia nitiretakiti napokaerekatakiti. Nota sikariko Erekeri Matamatakoti iuamoni. Iua sãpiretariko nota sãkire Xoteo minakonimoni.

¹⁹ !Katapasãkireri ahoa kimaporiti ïtiniãpo isãkirauatakasaaki. !Inenamauata. ! Itxitakaka apanakinikata kãkiti napiniãtaã.

²⁰ Apanakini Teoso sãkire auïãkani oiõkapeta ãkixinireëna. Itapara ! auari. Ninoa aanaia katxitoãkari atoko itxana. Iuaritika kona imapirinikari iua aanaia katxitoãkari. Iua atokokana kona ixipokari iua sãkire auïãkani mataparani. Itiretana. Apanakini Teoso sãkire auïãkani, kona iteene auikari Teoso sãkire. Ininiã ninoa tirikapi iopinikare xapitikiri atoko itxana, iuaritika kona iua oakari. Iua

atokokana kona ixipokana Teoso sākire auiākani. Ikamaāpotari erekari, erekari-noka kāiatini ĩkapani.

²¹ Xoteo minakaniua auikariko iua sākire. Itxa Isaia sāpirena kitxakapirika.

*Maerekani Matamatakoni Omitikiko
(Marko 3.20-30; Arókasi 11.14-23)*

²² Iuasaaki kākiti anikari kiki maerekati matamatakoti auaĩtotakiti Xesosimoni. ! Isākirauata. Mōsiāreti itxaua iua, maerekati matamatakoti xika. Xesosi erekapeka txĩkitakari iua. Iuasaaki kōsiārepeka, kasākirepeka itxa. ²³ Iuasaaki kaiāopokori kākiti iuaā tsorĩkaāta. Ininiā ipimaākakauana:

—Atuako ia kiki aāuĩte Taviini apika mekanirikani? Atxiĩti Teoso iokanatakitikani? —itxana.

²⁴ Pariseoakori ikara ikenakotakasaakina:

—Konapitini. Maerekati matamatakoti auĩte Peosepoo inakori sikari iposotiire Xesosimoni maerekati matamatakoti omitikini ĩkapani —itxana pariseoakori.

²⁵ Xesosi imarotari ikara ixinikakitina. Ininiā itxa Xesosi:

—Kākiti tixine auakani ninoakakarika inaiatakakiniāuana, ixipokakakauana. Iarikapenako. Iua atokokana kākiti aapokoā auakani inaiatakakiniāuana, ixipokakakauanako. ²⁶ Iua atokokana Satanasi nitiriakori, ninoakakarika inaiatakakiniāuana, ixipokako Satanasi tapara. ²⁷ Hĩte sākire, Peosepoo sikari iposotiire notamoni maerekati matamatakoti nomitikini ĩkapani. Ininiā nota pimaāi: “Kipa sikari posotiiretxi hĩte moianariakorimoni, maerekati matamatakoti omitikinina ĩkapani?”

Himoianariakori sāpiretai: “Teosonoka sikari posotiiretxi maerekati matamatakoti omitikakanimoni.” ²⁸ Teoso posotiireē nomitikari maerekani matamatakoni. Ikara atoko ininiā, Teoso oerekai iua apokapeka hĩtemoni hĩauĩte inini ĩkapani.

²⁹ —Kiki pataparari iua aapoko auiniā, kona kiĩtiriri ĩroā ĩtiriuatini ĩkapani. Kiĩtiriri iaxirikiniāri iua kiki pataparari, iuasaakiika apakata ĩtirĩkiniri itii.

³⁰ —Notakata maparĩkauatakani omanatano nota. Imamoianatakaniāno, inirekari niparĩka ixipokini. ³¹ —Ininiā nisāpiretai. Apakata Teoso makatxakiniri ikinipoko maerekati kākiti kamakiti, imaerekani Teoso imisākirepiretini pakini. Txamari Erekari Matamatakoti misākirepiretakari maerekani makatxakiko kona auari. ³² Kākiti misākirepiretiniāno nota hĩtari iaxitikiri, eereka amanainiāri Teoso ikara imaerekani imakatxakini, ininiā Teoso makatxakapitikari. Kākiti misākirepiretiniāri Erekari Matamatakoti, !kimakatxakikori ikara maerekati ikamakiti —itxa Xesosi.

*Aamina Iri Pirena
(Arókasi 6.43-45)*

³³ Ininiā Xesosi sākirauata iuaĩkana pariseoakorimoni:

—Aamina atoko hĩtxa. Aamina erekari ininiā, iri erekari apaka. Aamina maerekati ininiā, iri apaka !erekari. Patamatiniāri amātiiri, pimarotari imina. ³⁴ Nimarotai hĩte. Imini katiiri atoko hĩtxaua hĩte. Hĩte maerekati kamakanii. Ininiā !hĩposotari erekari hĩsāpiretini, kotxi hākixinire !erekari. Hinamaā hĩsāpiretakiti hākixinireē potoriākari itxaua. ³⁵ Kākiti erekari ininiā, erekarinoka isākire, kotxi iua ākixinireē erekarinoka aua. Kākiti maerekati ininiā, isākire maerekati apaka, kotxi maerekatinoka auari iua ākixinireē. ³⁶ Atāo nisāpiretai hĩte. Ikinipoko kākiti sākire Teoso atamakaerekata xipokatxi ōtisaaki. Iuasaaki Teoso mereēri kākiti misiritiko. Maxikatiĩka hĩsāpiretakiti kona apakata. Kona iua potxitari. Ininiā iuasaaki iua pimaāi: “Kinirepa ikara atoko pisākire?” itxako. ³⁷ Pisākire ereka ininiā, ixika !auari Teoso misiritinii. Pisākire maerekati ininiā, pisākire maerekati xika Teoso misiritai —itxa Xesosi.

*Pariseoakori Nirekari Xesosi Oerekiniri Iposotiire
(Marko 8.11-12; Arókasi 11.29-32)*

³⁸ Ātikaka kaiōkatsoparerini, pariseoakori pakini txari:

—Koerekareri, takaōtxikari Teoso posotiire poerekaua ate, aātamatiniri ĩkapani, Teoso iokanatinii ĩkorapokoriti aimarotini ĩkapani —itxarina.

³⁹ Xesosi apakapapiretana:

—Kākiti uatxarini !erekana. Itakanaparina Teoso. Hĭte nirekari noerekinii Teoso takaōtxikare, iposotiire. Konapitini. Kona noerekai hĭte. Kitxakapirĭka Teoso sākire sāpiretakari Xonasini inakori auakasaaki, Teoso kamari posotiiretxi. ĩkara atoko inakari posotiiretxi Xonasini auakasaaki, iuaĭkana ikamapanikariko. Iua posotiiretxi Teoso takaōtxikare itxapanikaua hĭte ĩkapani. Iua takaōtxikarinoka Teoso takaōtxikare hĭte ĩkapani. ⁴⁰ Xonasi kaikota ximaki mitari tikako āki ipi āti pakini ōti. Iua atokokanerako hĭtari iaxitikiri napako ipi āti pakini ōti ipĭkani auiniātaā.

⁴¹ —Itixi xipokini ōtisaaki, kākiti Nĭnivi sitatxiti auakani sākirauatapitikako. Ninoa txai hĭte: “Kona erekai hĭte, kotxi !hĭtakanapari himaerekani. Ate takanapari amaerekani Xonasi sākire akenakotakasaaki,” itxanako ninoa. Uatxa uai aua hĭte apisatoō Xonasi apiatakari. Imisākiretai hĭte, iuaritika kona !hĭtakanapari himaerekani.

⁴² —Xipokatxi ōtisaaki, sito Sapaa auakani auĭte sākirauatapitikako. Oa ōtakoxiti auakaro, iuaritika osari Saromāomoni imatire okenakotini ĩkapani. Uatxa apopeka Saromāo apiatakari, iuaritika hĭte !auikari nota sākire —itxa Xesosi.

Maerekati Matamatakoti Kanapiriini Pirena

(Arókasi 11.24-26)

⁴³ Iuaĭkana Xesosi sākirauata:

—Maerekati matamatakoti kiki auaĭtotakiti takanapakasaakiri iua kiki, iua maerekati matamatakoti saāpota āparaā makipakaniātaā, ikaikotiniātaā inĭtini ĩkapani, txamari ! apokari. ⁴⁴ Ininiā itxa: “Nikanapiriāpiriko mitxi nauinimoni nipotorikinimonikari,” itxa iua maerekati matamatakoti. Ininiā ikanapiriā. Apokasaaki, āti iuaā auakari ! auari. Oeretapeēkaika. Iposope āti auini ĩkapani. ⁴⁵ Ininiā apana apikomoni setxi pakini maerekani matamatakoni apia maerekanitakani. Imakinikana aua iua kiki ĭtoā. Ininiā iua kiki mitxi poiāoka imaerekani, eereka apia maerekanita. Ikara atoko itxako kākiti uatxarini maerekani —itxa Xesosi.

Xesosi Inoro, Itariakori Pakini

(Marko 3.31-35; Arókasi 8.19-21)

⁴⁶ Xesosi sākirauata itomane kākitimoni, inakasaaki oāpoka inoro, itariakorikata. Iporikiti auana. Ipĭkapiretarina. ⁴⁷ Ininiā āti txari Xesosi:

—Pinoro, pitariakori ikiraā iporikiti auana. Inirekakarina imisākiretinii pite —itxa.

⁴⁸ Ininiā Xesosi:

—Keropa ninoro? Kiripa nitariakori? —itxa Xesosi.

⁴⁹ Ininiā imioakari imoianariakori:

—Hātamata. Uai aua ninoro, nitariakori pakini. ⁵⁰ Niri iaxitikiri nirekaākiti kamakanira, ninoara nitariakori, nitaroakoro, ninoro txaua —itxa Xesosi.

13

Katakareri Pirena

(Marko 4.1-9; Arókasi 8.4-8)

¹ Iua ōtisaaki Xesosi takanapari iua aapokotxi. Ipoa tiniā isa. Iuaā ipoa tiniā iitopāka.

² Iuaā auana itomaneri kākiti. Apotiitauana iua takote. Ininiā kanaua āki iereētaua, topāka itxa oerekarauatini ĩkapani. Ninoa kaikota imiriĭ. ³ Ininiā itori sāpirenatxi atāo inakari oerekiko isāpiretana ninoa Teoso imarotininina ĩkapani.

Ia atoko itxa:

—Katakareri potorika itakarauatini ĩkapani. ⁴ Takari iki itakaāpotakasaaki, okaāpotakasaaki, ātikaka irika kimapori tiniāpo. Kotipiriki apoka. Inikari imakinika.

⁵ Apanakini irika kai auiniātaā. Poiāoka kipatxi auari, ininiā mokatanitika ipitxaka.

⁶ Txamari, atokatxi papatakari inakasaaki, arikari iua takari. Otxiaroka, kotxi kona kakotsari. ⁷ Apanakinipekana irika aanaia auiniãtaã. Ininiã aanaia aneẽ takari takote. Aãpitsa iapinokari takari, oka txari. ⁸ Apanakinipekana irika kipatxi erekariãtaã. Ininiã iriuata. Ætiãtaã Æti takari iriuata seĩ oki pakini. Ætiãtaã takari iriuata sesẽta oki pakini. Ætiãtaã Æti takari iriuata trĩta oki pakini. ⁹ Kakenakokii, ininiã hĩkenakotariko nisãkire –itxa Xesosi.

Kãkiti Mimarotakiniti Xesosi Sãpiretini Pirena
(Marko 4.10-12; Arókasi 8.9-10)

¹⁰ Imoianariakori apoka Xesosimoni. Ipimaãrina:

–Kinirepa sãpirenatxi atão inakari oerekiko pisãpiretari kãkiti? –itxarina.

¹¹ Ininiã Xesosi:

–Kãkiti xinikiniãri Teoso auĩtetxi ininiãua pirena, auapitika kaiãopokori ninoa mimarotakiniti, kotxi Teoso kona oerekana ninoa. Teoso oerekai hĩte ninoa mimarotakiniti. ¹² Teoso sãkire auakiti, iua sãkire kĩpitakari, Teoso sikari apikomoni imaroretxi iuamoni. Txamari Teoso sãkire kenakotakari, isãkire makĩpitakati, imarore xapiti iuamoni auakari makatzakaãkako. ¹³ Nisãkirauatakasaaki kãkitikata, nisãpiretana sãpirenatxi atão inakari oerekiko, kotxi kokiri kãkiti, iuaritika !atamatar Teoso kamakiti. Kakenakokiri kãkiti, iuaritika !imarotari Teoso sãkire. ¹⁴ Ininiã apokapeka Isaia sãkire kitxakapirĩka, kotxi iua sãpiretari Teoso sãkire:

Hĩkenakotapiikamari nisãkire, iuaritika !himarotari. Hĩtikapiikamari nikamakiti, iuaritika !himarotari,

¹⁵ kotxi !hinirekari himarotiniri atão inakari. !Hinirekaikari nisãkire hĩkenakotini. !Hinirekaikari nikamakiti hãtamatin. Hinirekaãkamariko, hãtamatariko nikamakiti. Hinirekaãkamariko, hĩkenakotamariko nisãkire. Hinirekaãkamariko, himarotamariko nisãkire. Hĩkanapiriaãkamako notamoni, nimakatzakamariko himarekani,

itxa Teoso.

¹⁶ –Hĩtepekana, Teoso sikari erekari hĩtemoni, kotxi hõki atamatapitikari iua kamakiti. Hĩkenakoki kenakotapitikari iua sãkire. ¹⁷ Atão nisãpiretai. Itomaneri Teoso sãkire sãpiretakani, apanakini kiki atão inakari kamakani pakini kitxakapirĩka nirekari atamatiniri hĩte atamatakiti, txamari kona atamatarina. Inirekarina ikenakotinirina hĩte kenakotakiti, txamari kona ikenakotarina –itxa Xesosi.

Katakareri Pirena Oerekiko
(Marko 4.13-20; Arókasi 8.11-15)

¹⁸ Xesosi sãkirauanãtapanika:

–Hĩtakaõtxikari ikara sãpirenatxi atão inakari oerekiko, katakareri pirena. Noerekai ikara. ¹⁹ Kãkiti kenakotakasaakiri Teoso auĩtetxi ininiãua pirena, imimarotakaniãri ikenakotakiti, kimapori kãkiti katxaratakiti ikotaxiti atoko itxa iua ãkixinire, kotxi Satanasi apoka iuamoni. Imakatzakari Teoso sãkire iua ãkixinireẽ apokakari. Teoso sãkire takariki atoko itxa.

²⁰ –Takariki kai auiniãtaã iriãkari, Teoso sãkire ipoxokoniritika apakapakari atoko itxa. ²¹ Itxama kona okanani aua, kotxi kona kakotsari. Omanatiko inakasaaki, inapetiko inakasaaki, Teoso sãkire auikini xika, itakanapari Teoso sãkire auikini.

²² –Æti kãkitipekana kenakotari Teoso sãkire, txamari ixinikapikari tiĩtxi, nipokori, iparĩka pakini. Ikinipoko ixinikapika, ininiã maerekaxiniretinoka itxa. Txineiro ipotxitini xika !inirekaikari Teoso sãkire. Takariki aanaia auiniãtaã iriãkari atoko itxa iua. Takari mariti atoko itxa iua ãkixinire.

²³ –Æti kãkitipekana ikenakotakasaakiri Teoso sãkire, atão iua auikari. Iua ãkixinire kipatxi erekari atoko itxa. Takari mininiãua atoko, iua kãkiti minari atxiĩti seĩ pakini kãkiti Teosomoni isãkire auikinina ãkapani. Atxiĩti iminari sesẽta pakini kãkiti. Atxiĩti iminari trĩta pakini kãkiti Teosomoni isãkire auikinina ãkapani –itxa Xesosi.

Katsotati Ahoisi Atoko Inakaro

²⁴ Iuaĩkana Xesosi sãpiretari ãti sãpirenatxi atão inakari oerekiko. Ininiã ia atoko itxa:

—Teoso auĩtetxi ininiua ia atoko itxa. Teoso katakareri atoko itxa. Iua katakareri takari erekari takariki ikikioteẽ. ²⁵ ãti ãkanõkati ikinimane imakasaaki, imokaiakari apoka. Itakaro katsotati ahoisi atoko inakaro ahoisi sauaki. Kona !otxa. Iposo atoko ãkorape itxa. ²⁶ Takari aneẽka atoko, oriuata. Iuasaaki kãkiti imarotapekari katsotati ahoisi atoko inakaro auapeka. Kona otxa. ²⁷ Ininiã katakareri nitiriakori apoka iauĩtemonina. “Auĩtetxi, pite takaro takariki erekaro. Nanipa oina katsotati?” itxana ninoa.

²⁸ —“Amokaiakari takari,” itxa.

—“Pinirekatari amaporokiniri?” itxana initiriakori.

²⁹ —“Kona. Katsotati himaporokiniã, atxiĩti himaporokaro nitakare apaka.

³⁰ Hĩtakanapari imakinika aneinina ãkapani. Oamikosaakirako, omakatzakaãka. Ininiã iuasaakiko nipaniãtaiko hĩte: ‘Merepanika himakatzakaroko katsotati. Hãpotiitaro. Xaminamoni oka inaãkako. Iposo atoko hãpotiitari ahoisi. Hĩtakari nikiena nĩkatiko aikoti ãki.’”

Mostata Pirena

(*Marko 4.30-32; Arókasi 13.18-19*)

³¹ Iuaĩkana Xesosi oerekari ãti sãpirenatxi atão inakari oerekiko. Ininiã ia atoko itxa:

—Teoso auĩtetxi ininiua, kiki takiniro mostata iki ikikioteẽ atoko itxa. ³² Mostata iki axapitiki. Apanakini takariki apiata, iuaritika oaneẽka atoko amananiĩkaro. Aamina otxaua. Ininiã kotipiriki ina. Ikamari ikoa okatiã —itxa Xesosi.

Tirekakari Pani

(*Arókasi 13.20-21*)

³³ Xesosi iuaĩkana sãpiretari sãpirenatxi atão inakari oerekiko. Ininiã ia atoko itxa Xesosi:

—Teoso auĩtetxi ininiãtaãua ãkorapokoriti ia atokokana itxa. Sito kosekari tirekakari pani. Okoketari axapiti tirekakari pani kaiãopokori triko panikata, ãparaãkata. Eereka ikinika ipe tirekaãpota otxa.

Sãkiretxi Atão Inakari Oerekiko

(*Marko 4.33-34*)

³⁴ Xesosi sãkirauatakasaaki kãkitikata, isãpiretari sãpirenatxi atão inakari oerekiko. Ikara sãpirenatxinokara isãpiretari kãkiti. ³⁵ Ininiã kitxakapirĩka Teoso sãkire sãpiretakari sãpiretakiti apokapeka, kotxi iua txari:

Nisãkirauatakasaaki kãkitikata, nisãpiretari sãpirenatxi atão inakari oerekiko. Itixi kamikosaakipanika aua kãkiti mimarotakiniti. Ikara noerekako kãkitimoni, itxa Teoso sãkire.

Xesosi Sãpiretari Katsotati Pirena

³⁶ Eereka Xesosi takanapana ninoa kãkitipokoni. Iĩroã aapokotxi. Imoianariakori apoka iuamoni. Itxana:

—Poerekaua ate ikara sãpirenatxi atão inakari oerekiko, katsotati pirena, mixikanani pisãpiretakiti. Ate !imarotari —itxana.

³⁷ Ininiã Xesosi:

—Hĩtari iaxitikiri, iua erekari oki taãkari itxaua. ³⁸ Itixi iua kikiõ atoko itxa. Teoso auĩtetakani takariki erekari atoko itxana. Kãkiti Satanasi nakitiakori iua katsotati atoko itxana. ³⁹ Katsotati takakari Teoso nakitiakori mokaiakari itxaua. Satanasi itxaua. Itixi xipokini õti iua takari amiko õti atoko itxa. Teoso nitiriakori iaxitikini ninoa takari amakani atoko itxana. ⁴⁰ Iua katsotati apotiitaãka, xaminamoni oka inaãka. Iua atokotxikana inaãka itixi xipokini õti. ⁴¹ Hĩtari iaxitikiri iokanatanako initiriakori itiximoni. Apotiitarinako maerekati oerekakani. Apotiitarinako ikinimane maerekati kamakani. ⁴² Iposo atoko Teoso nitiriakori okana ninoa xaminamoni. Iuaã itene

itxiapatana. Akatsatsiriñtauana. ⁴³Iuasaaki atão inakarínoka kamakani aua iotximerena Teoso auñtetxi ininiãtaãua. Atokatxi iotximere atoko itxa ninoa iotximere. Kakenakokii, ininiã hñkenakotariko nisãkire –itxa Xesosi.

Txineiro Kipatakoro Pirena

⁴⁴ –Teoso auñtetxi ininiua, txineiro itomanero kipatakoro atoko itxa. Oa txineiro kipataãka kikio. Æti õti kiki napaãpotakasaaki, apokaro, ininiã iuaĩkana ikipataro. Iteene ipoxokoniyata, ininiã ivẽtxitari ikinika itii, iua kikio iamotini ãkapani. Eereka sa itxa iua kikio iamotini ãkapani. Ikara atoko itxa Teoso auñtetxi ininiua.

Pérora Inakori Pirena

⁴⁵ –Teoso auñtetxi ininiua, pérora iamotakari atoko itxa. Iua nitari pérora apia erekari. ⁴⁶ Pérora iteene erekari apokiniã, ikinika itii ivẽtxita iua pérora iamotini ãkapani.

Hetxi Pirena

⁴⁷ –Teoso auñtetxi ininiua hetxi ipoaã taãkori atoko itxa. Ikini sereti ximaki apotiita hetxi. ⁴⁸ Ixãpokasaaki kaiotaroariti kosekaãpotari itakoãmoni. Iuaã kaiotaroariti iitopãka. Imereërina ximaki. Ximaki erekari kotariã itaka. Kãkiti maniãkiniti mapara oka. ⁴⁹ Xipokatxi õtisaaki ikara atoko itxa. Teoso nitiriakori mereëriko kãkiti. Mapara itakarina erekarini. Mapara itakarina maerekani. ⁵⁰ Ininiã xaminamoni okanako kãkiti maerekati kamakani. Iuaã itxiñtana. Akerakitatsiriñtauana, kotxi patsiiri.

Kitxakapirĩka Oerekakori, Amaneri Oerekakori Pakini

⁵¹ Xesosi pimaãna imoianariakori:

–Hñte imarotatari ikara atoko inakari nisãpiretakiti? –itxa.

–Ari, aimarotapitikari –itxarina.

⁵² Ininiã Xesosi:

–Kaiõkatsopareri oerekikosaaki Teoso auñtetxi ininiua imarotini ãkapani, imarotari amaneri oerekakori, apaka kitxakari oerekakori. Kaapokori atoko itxa. Iua kaapokori makatxakari apokaerekatakiti mareta ãki inĩkatakiti. Amaneri, kitxakari apaka imakatxaka.

Nasaree Auakani Kona Auakari Xesosi Sãkire (Marko 6.1-6; Arókasi 4.16-30)

⁵³ Ikara sãpirenatxi atão inakari oerekiko ixipokapiretaka atoko, Xesosi sipe. ⁵⁴ Ikanapiriã Nasaree sitatxitimoni. Ininiã oerekarauata aiko Xoteoakori apotiitiniãtaãua. Ininiã kãkiti tsorĩkaãta isãkire ikenakotakasaakina. Itxana:

–Kiripa sikatari iua imarore? Kiripa sikaposotiiretari iua? ⁵⁵ Aapokotxi kamakari ãkiri iua. Inoro Maria. Itariakori Txiako, Xoão, Simão, Xotasi pakini. ⁵⁶ Itaroakoro uai apaka aua. Nanipa apaiaõkari ikinika imarore? –itxana.

⁵⁷ Ininiã kona inirekarina iua. Ininiã Xesosi txari:

–Teoso sãkire sãpiretakari paxitaãka, txamari Teoso sãkire sãpiretakari itixineẽ auakasaaki, inirimane sauaki auakasaaki, lipaxitaãka. Isãkire !auikaãka –itxa Xesosi.

⁵⁸ Ininiã Xesosi kona kamari itori Teoso posotiire iuaã Nasaree sitatxiti auakani ãkapani, kotxi kãkiti iuaãkini !auikari isãkire.

14

Xoão Kapatxisareri Ipinini Pirena (Marko 6.14-29; Arókasi 9.7-9)

¹ Iuasaaki Erotxi Kariréia auakani auñte txaua. Iuasaaki ikenakopiretari Xesosi pirena. ² Iuasaaki itxana initiriakori:

–Iua Xoão kapatxisareri ipĩpekariika õkitapekaua. Iuakara Xesosi txaua. Ininiã uatxa apiata iposota ikamini –itxa Erotxi.

Txamari Xesosipitikara. Kona Xoãoni iua. ³ Mitxi Erotxi paniâtari Xoão kapatxisareri iaxirikiko, itari Pîripi Îtanoro xika. Ouãka Erotxia. Oomanatari Xoão, ininiã itakaãka kateia ãki. ⁴ Mitxi Xoão kapatxisareri txari Erotximoni:

—Kona erekari pitari Îtanorokata pisirîkîni. !Apakata pikamakiti —itxa.

⁵ Ininiã Erotxi nirekamari okiniri Xoão, iuaritika kona okari, kotxi ipîkana Xoão sãkire auîãkani. Ninoa uãkatari Xoão, Teoso sãkire sãpiretakari ininiua. ⁶ Erotxi kamari kiiniri auini ôti pirena. Erotxia ãkero serena iua Erotxi apisatoõ, ikemaîtxitakini apisatoõ pakini. Ininiã oserenini kamari ninoa poxokoniuatini. ⁷ Ininiã Erotxi poxokoniu-atakasaaki itxa:

—Nisikai imakinika pinireëkiti pitemoni —itxaro oa.

Ininiã osari onoromoni. ⁸ Onoro nirekari Xoão okiko, ininiãkara oamanaãri Xoão kii prato nopini. Ininiã otxari Erotximoni:

—Xoão kapatxisareri kii ninireka prato nopini.

⁹ Ininiã Erotxi kona erekaxinireri. Kipa ikama? Kotxi ikinimane ikemaîtxitakini kenakotari isikaenetiniri oa nirekakiti oamoni. Ininiã iua paniâtari oa nirekakiti sikiko oamoni. ¹⁰ Ininiã iua iokanatarari sotatoakori kateiamoni Xoão kii tsotakiko Îkapani. ¹¹ Ininiã ninoa minari ikii prato nopini. Isikarina oamoni. Oa sikari onoromoni. ¹² Eereka Xoão moianariakori sari kateiamoni. Ninoa anikari îto akauarimoni. Iuaã ikatarina. Eereka ninoa sari Xesosimoni. Isãpiretarina Xesosi Xoão ipinini pirena.

*Sîko Mio Kãkiti Xesosi Sikakienatini
(Marko 6.30-44; Arókasi 9.10-17; Xoão 6.1-14)*

¹³ Xesosi kenakopiretakasaakiri Xoão okiko, ipotorika kanauaã. Ætiãtaã iuanani auini nire isa, txamari itomaneri kãkiti imarotari Xesosi sinimoni. Ininiã itakanaparina sitatxi. Isana imiriï iua sinimoni. ¹⁴ Iua kanîkiïtakasaaki, atapari kãkiti apokaãpotini. Ininiã iua amonîkana ninoa. Imakananitana amianatakani.

¹⁵ Mapiãpeka inakasaaki, imoianariakori apoka iuamoni. Itxarina:

—Mapiãpeka. Uai aapokotxi mauakaniãtaã, ininiã uai nipokori !auari. Piokanatarari kãkiti aapokotximoni, ininiã iamotarina nipokori iuaãtaã —itxana imoianariakori.

¹⁶ Xesosi apakapapiretana:

—Nota kona iokanatanana isinina. Hîtekarako sikakienatanana ninoa —itxa Xesosi.

¹⁷ Ininiã ninoa:

—Komiri ipi ipi ãti pakininokara aua atemoni. Ipi ximaki apaka aua. !Apakata —itxana.

¹⁸ Ininiã Xesosi:

—Himina uai notamoni —itxa.

Ininiã imoianariakori minari Xesosimoni. ¹⁹ Eereka iua paniâtari kãkiti xiti topãkini. Eereka ikosekari komiri sîko, ximaki ipi pakini. Ininiã iua ionakaãta iaxiti. Itxari:

—Niri pisikakiti peerekari —itxa.

Ininiã imaxinîkaãpotari. Isikaãpotana imoianariakori. Ninoa sikaãpotana kãkiti.

²⁰ Ikinikana nipokota. Ikinimane:

—Kamitopekaua ate —itxana.

Eereka imoianariakori apotiitari itetakori. Ininiã xãpokaka itxarina tosi kotari.

²¹ Iuasaaki sîko mio kikiãkini nipokota. Sitoãkini, amarini pakini nipokota apaka.

*Xesosi Ipoa Nopini Itîpokotini
(Marko 6.45-52; Xoão 6.15-21)*

²² Eereka ipaniãtana imoianariakori kanauaã iereëtiniua iua apisa Îpiriãtinina Îkapani. Ninoa sipeka. Iua kaikota kãkiti itakapiretini nire. ²³ Kãkiti itakapiretanapaka atoko, Xesosi sari oxiratarimoni, Teoso imisãkiretini nire. Îkanõkapeka inakasaaki, iuanani iuaã aua. ²⁴ Iuasaaki kanaua ipoa apanîkakiãpeka. Îtima apiãkatáro kanaua. Ininiã tsakati iteene apoãkata.

- ²⁵ Imaropirĩkatapeka inakasaaki Xesosi sari ninoamoni. Itĩpokota ipoa nopini.
- ²⁶ Imoianariakori atapakasaakiri Xesosi ipoa nopini itĩpokotini, ninoa pĩkarauata.
—Kamiri napani —itxana.
Akiripoakatana. ²⁷ Iuasaakipeka Xesosi:
—Kataparaxinire hĩtxako. Notara. Kona hĩpĩkarauatape —itxa.
- ²⁸ Ininiã Petro sãkirauata:
—Apiananiri. Xesosi pininiãua, pipaniãtano pitemoni napokini ipoa nopini —itxa Petro.
- ²⁹ Ininiã Xesosi:
—Uai pina —itxari.
Ininiã Petro katzaka. Ipotorika ianini ipoa nopini Xesosimoni isini. ³⁰ Txamari kataparari itimati itikasaaki, ipĩkarauata, ininiã ipatapiã itairakaãpota. Ininiã iua akirikata:
—Apiananiri. Pimaĩkano.
- ³¹ Iuasaakipeka Xesosi maĩkari iua. Itxari:
—Poiãoka pauikari niposotiire. Kinirepa kona atão pauikari? —itxa Xesosi.
- ³² Iuaĩkana morõkoka itxauana kanaua ãki. Iuasaaki itima iotoka. ³³ Imoianariakori kapotoreẽkaua Xesosi apisatoõ:
—Apiananiri pitxaua. Atãopitikara Teoso ãkiripitikarai —itxana.

Xesosi Makananitana Amianatakani Xenesareekini
(Marko 6.53-56)

- ³⁴ Ipoa ĩpiriãtana, Xenesaree tõpamoni apoka itxana. ³⁵ Iuaã kãkiti imarotari Xesosi, ininiã iokanapireta kãkiti ninoa tixine takote auakanimoni:
—Amianatakani himina.
Ininiã kãkiti minari itomane amianatakani Xesosimoni. ³⁶ Amianatakani amanaãri Xesosi:
—Pauiritaua pimãka mapotomatara atakapiotini —itxana.
Ikinimane imãka takapiotakani makananitaãka.

15

Xoteoakori ĩkĩte Pirena
(Marko 7.1-13)

- ¹ Iuasaaki pariseoakori, kaiõkatsopareriakori pakini apoka Xesosimoni. Xerosareẽkini ninoa. Ipimaãrina Xesosi:
² —Kinirepa pimoianariakori kona kamari aãtokiriakorini sãkire iaõka, kotxi inipokotakasaakina, kona arokauakotauana —itxana.
³ Ininiã Xesosi apakapapiretana:
—Hĩtepekana, kinirepa kona hĩte kamari Teoso sãkire iaõka? Hĩte kamari hõereẽkitinokara, ⁴ kotxi Teoso txari: “Pipaxitariko piri. Pipaxitaroko pinoro.” Apaka Teoso txari: “Piri, pinoro pimisãkirepiretiniã, pokaãkako.” ⁵ Txamari hĩte oerekari kãkiti: “Kãkiti auakiti iri, inoro pakini nirekiniã, iua manirekakaniãri isikiniri ninoamoni, isãpiretana: ‘Ia nota auakiti nisika Teosomoni.’” Ininiã ! isikari ninoa nirekakiti ninoamoni. ⁶ Ininiã hĩte oerekari kãkiti mapaxitakanina iri, inoro pakini. Ininiãkara hĩte sãkire hõereẽkiti kipatari Teoso sãkire. ⁷ Hĩte txari: “Akamapitikari Teoso sãkire iaõka,” txamari kona hĩte kamari. Atãopitikara Isaía sãkire kitxakapirĩka. Iua sãpiretari Teoso sãkire hĩte pirena. Teoso txari:
⁸ Kamisirienererini ninoa kãkiti. Ninoa sãkireẽnanira ipaxitanona. ãkixinireẽna ! inirekanona.
⁹ Maxikatĩka ninoa kapotoreẽkaua nota apisatoõ. Maxikatĩka ninoa txano: “Ateosone pitxaua,” kotxi ninoa !oerekari nota sãkire. Ninoaka sãkire oerekana, txamari “Teoso sãkire asãpiretai” itxana.
Itxa Teoso Isaíamoni kitxakapirĩka —itxa Xesosi.

*Ākixiniretxi Txiko Pirena
(Marko 7.14-23)*

¹⁰ Xesosi akiritana kākiti, ininiā itxana:

—Hīkenakota himarotini ĩkapani. ¹¹ Nipokori, piixirākakiti kona kamatzikotari pākixinire. Pisākire maerekati, pinamaā potoriākari, iuara txikotapitikari pākixinire —itxa Xesosi.

¹² Iuasaaki Xesosi moianariakori apoka iuamoni. Itxarina:

—Pimarotatari pariseoakori !apokaerekatari ikara pisākire ninoamoni?

¹³ Ininiā Xesosi:

—Kākiti takari atoko itxa. Ininiā ikinika takari niri iaxitikiri mataākiniti ma-porokaākako. ¹⁴ Kona himaākatapena pariseoakori. Īkiikakani mōsiāreni atoko itxana. Mōsiāreti mīkiikiniāri mōsiāreti, ikinipoko irikako aariko āki. Iua atokokana maerekati ōtākikiniāri maerekati, imakinika ninoa sari imisiritikoātaā —itxa Xesosi.

¹⁵ Ininiā Petro:

—Poerekaua ate ikara sāpirenatxi atāo inakari oerekiko. Ate !imarotari —itxa.

¹⁶ Ininiā Xesosi:

—Hīte apanakini atoko hītxa atxiīti? Kona himarotapanikari? ¹⁷ Himarotari. Nipokori hinamaā hīixirākakiti hītikakomoni isa. Eereka hītikatakasaaki, inapa. ¹⁸ Hīsākire hinamaā pokīkakari potorika hākixinireē. Iuara txikotari kākiti ākixinire. ¹⁹ Kotxi hākixinireē hīxinikakiti maerekati potorika. Okaniuatakatxi, āti kākiti ĩtanorokata sirīkiko nire, anokaretxi, ĩtiriuatakatxi, misirieneretxi, āti misākirepiretiko pakini potorika hākixinireē. ²⁰ Ikara atoko inakarinanira txikotari kākiti ākixinire. Kākiti marokauakotakaniua kona txikotari ākixinire —itxa Xesosi.

*Xoteo Minakatoua Auikiniri Xesosi Sākire
(Marko 7.24-30)*

²¹ Ikara atoko inaāka atoko Xesosi sipe. Isipeka Txiro, Sitoō pakini tōpamoni.

²² Iuasaaki sito Kanaaākero, iuaā auakaro, apoka Xesosimoni. Iteene oamanaāri:

—Apiananiri, Tavii apika mekaniri, piamonīkano. Maerekati matamatakoti auaītotoaro namarite. Iua iteene misiritaro oa —otxari.

²³ Txamari Xesosi kona apakapapiretaro oa. Imoianariakori apoka Xesosimoni. Itxana:

—Piokanataro, osipekako. Atemoni ātipirika oākiripoanāta —itxana. ²⁴ Xesosi apakapa-piretaro oa:

—Niokanataāka Isaeokini ninīkatini ĩkapani. Ninoa soti auīte pīpinanaākani atoko itxana. Txamari pite kona Isaeokero. Pite āto uāka —itxa.

²⁵ Iuaritika oa sito apoka iuamoni. Okapotoreēkaua iua apisatoō. Ininiā oa:

—Apiananiri, pimakananitaro namarite —otxari.

²⁶ Ininiā Xesosi:

—Isaeokini amarini atoko. Nota ninoa iri atoko. Kona erekari amarini komirite nimixirikini, anāpamoni nisikini ĩkapani —itxaro.

²⁷ Ininiā oa:

—Ari, atāopitikara pisākire. Anāpa atoko nitxaua, iuaritika anāpa nikari nipokori iriākari kaapokori patapi koa —otxa.

²⁸ Ininiā Xesosi:

—Atāopitikara. Sito, pite iteene auikari niposotiire. Pinirekakiti nikamapitikako —itxaro.

Iuasaakipeka oimi erekapeka otxa.

Xesosi Erekapeka Txīkitakari Kākiti

²⁹ Eereka Xesosi sari Kariréia poatimoni. Iuaā oxirataro nopini topāka itxa.

³⁰ Itomane kākiti iuamoni apoka. Ninoa minari iuamoni kākiti mōsiāreni, masākireni, matīpokotakani, apanakini amianatakani itomaneri pakini. Xesosi makananitana ninoa.

³¹ Kākiti iuaā auakani tsorīkaāta, kotxi itikarina Xesosi makananitinina amianatakani.

Kākiti masākireti sākirauatapeka. Kākiti matīpokotakati tīpokotapeka. Mōsiāreti, kōsiārepeka itxapeka. Ikinimane txari:

—Peerekari Teoso, Isaeo auakani Teosone —itxana.

*Xesosi Sikakienatana Ipi Ipi Pakini Mio Kākiti
(Marko 8.1-10)*

³² Xesosi akiritana imoianariakori. Itxana:

—Nota amonīkana naia kākiti. Ipi ōti, āti ōti pakini notakata auana. Uatxa kona minakati kona auari inikinina īkapani. Kona nota iokanatana ninoa natxiritika, kotxi arikama ipītaxititamana, irika itxamana —itxa Xesosi.

³³ Ininiā imoianariakori txari:

—Nanipa ate apokari nipokori komiri naia kākiti asikakienatini? —itxana.

³⁴ Ininiā Xesosi:

—Kipakinipa komiri aua hītemoni? —itxa Xesosi.

Ininiā ninoa:

—Setxi komiri, ātikaka ximaki axapitiri pakini —itxana.

³⁵ Ininiā Xesosi:

—Hīpaniātana kākiti xiti topākini —itxa Xesosi.

³⁶ Eereka imaīkari ninoa setxi komiri, ximaki pakini. Itxari Teoso:

—Erekapitikari ia komiri, ximaki pakini pite sikakiti.

Mapixinika itxari komiri, ximakikata. Eereka xanakaāpota itxari imoianariakori-moni. Ininiā ninoa xanakaāpotari kākitimoni. ³⁷ Ikinika nipokota. Kamitopeka itxana. Imoianariakori xāpokakari setxi kotari nipokori itetakori. ³⁸ Ipi ipi pakini mio kikiākini nipokotapeka, apaka sitoākini, amarini pakini. ³⁹ Eereka Xesosi iokanatana kākiti aapokomonina. Iposo atoko iereētaua kanaua āki. Makataā tōpamoni isa.

16

*Teoso Takaōtxikare
(Marko 8.11-13; Arókasi 12.54-56)*

¹ Pariseoakori, satoseoakori pakini sari Xesosimoni. Inirekarina Xesosi kerokiniri, ininiā itxarina Xesosi:

—Takaōtxikari, Teoso posotiire poerekaua ate, aātamatiniri īkapani, Teoso iokanatinii īkorapokoriti aimarotini īkapani —itxarina.

² Txamari Xesosi txana:

—Na noerekai. Mapiānikata iaxiti pōkamarari inakasaaki: “Peereōtiri katana,” hītxa.

³ Iua atokokana īkanōkapanika iaxiti pōkamarari, piākaxitita inakasaaki: “Āparaānapani. Kataparari ītimatipani,” hītxa. Himarotapitikari takaōtxikari iaxiti auakari. Txamari kona himarotari Teoso kamanātakiti īkorakanani. Hīsākirauatakasaaki, kākiti erekarini atoko hītxa, txamari maerekati hīkama. ⁴ Kākiti uatxarini !erekana. Itakanaparina Teoso. Hīte nirekari noerekinii Teoso takaōtxikare, iposotiire. Konapitini. Kona noerekai hīte. Kitxakapirīka Teoso sākire sāpiretakari Xonasi inakori auakasaaki, Teoso kamari posotiiretxi. Ikara atoko inakari posotiiretxi Xonasi auakasaaki, iuaīkana ikamapanikariko. Iua posotiiretxi Teoso takaōtxikare itxapanikaua hīte īkapani. Iua takaōtxikarinoka Teoso takaōtxikare hīte īkapani —itxa Xesosi.

Iposo atoko Xesosi takanapana, sipe itxa.

*Pāo Tireēkari Pirena
(Marko 8.14-21)*

⁵ Xesosi imoianariakorikata ĩpiriātari ipoa. ĩpiniā apokasaakina, imoianariakori xinikaro pāo imaxinīkaretakitona. ⁶ Iuasaaki Xesosi ōtākikana ninoa:

—Erepaniko. Pariseoakori, satoseoakori pakini pāote tireēkari pamonōkoniri —itxana imoianariakori.

⁷ Ininiā imoianariakori misākiretakakaua:

—Pão amaxinĩkaretini xika Xesosi ikara atoko txaua ate —itxana imoianariakori.

⁸ Xesosi imarotari imisãkiretakakiniuana, ininiã iua:

—Kinirepa himisãkiretakakaua, pão himaxinĩkaretini xika? Kona iteene hãuikari ninĩkatini. ⁹ Atauako kona kiĩkitepanikai hĩte? Atauako himaxinĩkaretapekari pão sĩkonoka sĩko mio kãkiti nisikakienatini? Hĩxinikariko kipakinipa kotari hĩxãpokaka pão itetakoro? ¹⁰ Atauako kona hĩxinikatari ãti õti ipi ipi pakini mio kãkiti setxinoka pão nisikakienatini? Hĩxinikariko kipakinipa kotari hĩxãpokaka pão itetakoro? ¹¹ Hĩte nõtãkikasaaki: “Erepaniko. Pariseoakori, satoseoakori pakini pãote tireẽkari pamonõkoniri,” ninakasaakii, kinirepa kona himarotatari kona pãoni ikara atoko nitxai hĩte? —itxa Xesosi ninoamoni.

¹² Iuasaakiika imarotarina kona pão tireẽkarini monõkori txaua. Imarotarina pariseoakori, satoseoakori pakini sãkirera, ninoa oereẽkitira, monõkori txaua.

Petro Aukari Xesosi Teoso Ækiri Ininiãua
(Marko 8.27-30; Arókasi 9.18-21)

¹³ Xesosi sari Sesaréia-Piripi sitatxiti takote. Iuaã ipimaãna imoianariakori:

—Kipa kãkiti uãkatano nota hĩtari iaxitikiri?

¹⁴ Ininiã imoianariakori:

—Åtikaka uãkatai Xoãoni kapatxisarerini iuaĩkana õkitikaua inakarii. Apanakini uãkatai Eríasini iuaĩkana õkitikaua inakarii. Apanakinipekana uãkatai Xeremiani iuaĩkana õkitikaua inakarii. Minakanisaaki åtikaka: “Åti Teoso sãkire sãpiretakarini iuaĩkana õkitikaua inakarii,” itxaina —itxarina.

¹⁵ Ininiã Xesosi:

—Hĩtepekana, kipa hĩte uãkatano nota? —itxana ninoa.

¹⁶ Simão Petro apakapapiretari:

—Teoso mereẽkitirai pite. Teoso mapĩkati åkirirai pite —itxari iua.

¹⁷ Ininiã Xesosi:

—Simão Petro, Xoão åkiri, Teoso takari erekari pitemoni, kotxi kona kãkitini sãpiretai Teoso åkiri nininiua. Niri iaxitikirira sãpiretai. ¹⁸ Nisãpirenauatapanika pitemoni. Piuãka Petro. Kai sorotxikana piuãka. Kai aapokotxiti kamakari mereẽri kai kaikori xiti itakini ĩkapani, aapokotxi iua kai nopini ikamini ĩkapani, ininiã aapokotxi !irika, kotxi kaikori nopini aua. Aapokotxi kamakari takari kai kaikori xiti. Iua kai atoko itxa ikara Teoso sãkire, isãpiretakiti pitemoni. Kãkiti nota nakitiakori naapoko atoko, ninoa sauaki nauini ĩkapani. Napotiinãtapanikari kãkiti naapoko ĩkapani. Satanasi tapara kona posotapaniri ixipokiniri ia naapoko. ¹⁹ Nipaniãtai Teoso sãkire pisãpiretini kãkitimoni. Xavi nisikinii atoko itxa ikara, kotxi kãkiti aukasaakiri Teoso sãkire ĩroã Teoso auĩttxi ininiãtaãua. ĩkorapokoriti kãkiti kamakiti pimauiritakaniã, Teoso tixine apaka !auritaãka. ĩkorapokoriti kãkiti kamakiti pauiritiniã, apaka auiritaãka Teoso tixine —Xesosi txari Petro.

²⁰ Iposo atoko Xesosi:

—Teoso mereẽkiti nininiua, apanakinimoni !kasãpirena hĩtxapeko —itxana imoianariakori.

Xesosi Sãpiretari Ipinini
(Marko 8.31-9.1; Arókasi 9.22-27)

²¹ Iua õtisaaki Xesosi potorika isãpiretinina imoianariakori:

—Nisako Xerosareẽmoni. Iuaã kiomãtxiakori, kaiõkatsoparerini, sasetotxi auĩteakori pakini misiritanoko. Iposo atoko oka ninaãkako. Ipi ãti õtisaaki iuaĩkana nõkitikaãkako. Iuaĩkana aua nitxako —itxana.

²² Ininiã Petro misãkiretari Xesosi iuanoka inakasaaki. Itapararitika itxari:

—Konapitini, kona ikara atoko inakari kona auapani pitemoni, Apiananiri. Kona Teoso auiritapaniri ikara atoko piniko —itxari.

²³ Ininiã Xesosi kirioka Petromoni.

—Pisipiniikaua Satanasi. Nikimapore katokapareri atoko pitxa, kotxi pite nireēkiti kākiti nireēkiti atokotxikana. Pite nireēkiti kona Teoso nireēkiti atokoni —itxari.

Xesosi Moianari Atã Inakari
(Marko 8.34-38; Arókasi 9.23-27)

²⁴ Iposo atoko Xesosi misākiretana imoianariakori:

—Notakata kinirão sika pinakasaaki, piteka nireēkiti kona pinirekape. Notakata kinirão sika pinakasaaki, nota misiritiko atokokana pimisiritaākako. Ia atoko pinirekiniã, notakata pisapitikako. ²⁵ Pite ātipirika kaminiãri pite nireēkitinoka, ininiã pinireēkiti xipokapitikako pitekata. Pite nireēkiti pimanirekakaniã, nota sākire pauikini xika, Teoso iokanapirena erekari pisāpiretini xika, pite auapininiika txako Teosokata. ²⁶ Atxiiti papakapari ikinipoko tiitxi, ikini itixiti auakani tii, pinakiti ĩkapani. Atxiiti iua tiitxi xika kona pikĩpitari Teoso sākire, ininiã kona pikaikota ātipirika Teosokata. Ikara atoko ininiã, erekari atxiiti ikinipoko tiitxi auinii? Konapitini. Apiaerekata Teosokata ātipirika pikaikotini. !Apakata kākiti ĩkitxitiniri Teoso, iuamoni isini ĩkapani. ²⁷ Nota hĩtari iaxitikiri apokako ninitiriakorikata. Iuasaaki niri iotximeretxikana nota iotximere-tako. Iuasaakirako erekari isika erekari kamakanimoni. Iparĩkana ĩki isika iparĩkana iaõka. Txamari imisiritanako maerekati kamakani. ²⁸ Atãopitikara nisāpiretai hĩte. Uai uatxa aua kākiti, ninoa imarotapanikariko nota hĩtari iaxitikiri auĩtetxi nininiua. Ikara imarotinina apisa kona ipinapanikana —itxa Xesosi.

17

Moisesi, Eríasi Pakini
(Marko 9.2-13; Arókasi 9.28-36)

¹ Seisi õti napaka atoko Xesosi anikana Petro, Txiako, Xoão pakini. Xoão Txiako itari. Ikanĩkana oxiratarari nopinixiti. Ninoanani anika iuaã. ² Iuaã ninoa atamatari iua. Ipinimonipo itxapeka. Itoõ iotximere atokatxi iotximere atoko itxa. Imãka serõka ipinikare atoko itxa. ³ Iuasaakipeka Moisesi, Eríasi pakini tokiã iuaã, misākireta itxarina Xesosi. ⁴ Ininiã Petro akiritari Xesosi:

—Apiananiri, erekapitikari uai aãuini. Pinirekiniãri, nota kamari ipi āti pakini papiri uai. Pite nakiti ĩkapani, Moisesi nakiti ĩkapani, Eríasi nakiti ĩkapani nikama.

⁵ Petro sākirauanãtakasaaki, katxiãri pomēkoriri ninoa nopini apoka. Katxiãri āki Teoso txari:

—Ere namarite, nitiretakiti. Napokaerekatarari iua, kotxi ikamari ninirekakiti. Hĩkenakotariko iua sākire.

⁶ Xesosi moianariakori ikara atoko inakari ikenakotakasaakina, iteene ipĩkarauatana, ininiã iriãkatana xitipe. Itoõna ikipatana. ⁷ Xesosi sari ninoamoni. Itakauakotaua ninoa nopini. —Hõkitikaua. Kona hĩpĩkarauatape —itxana.

⁸ Ininiã itikapokotana. Xesosinoka aua.

⁹ Oxiratarari xirata iokiriiãpotakasaakina, Xesosi txana ninoa:

—Kona hĩsāpiretapiri apanakinimoni hĩtikakiti. Nota hĩtari iaxitikiri nipina iuaĩkana naua ninaka atokoikarako hĩtikakiti mixikanani hĩsāpiretako —itxana.

—Ateeneka —itxarina.

¹⁰ Xesosi moianariakori pimaãri iua:

—Kinirepa kaiõkatsoparerini oerekaua: “Eríasi apokako Teoso mereēkiti apokini apisa?”

¹¹ Ininiã Xesosi apakapapiretana ninoa:

—Ari, atãopitikara ninoa sākire. Merepitipanika Eríasi apokapitika. Iua kamari imakinika iposope inini ĩkapani. ¹² Ari, nisāpiretai, Eríasi apokapeka. Txamari kākiti ! imarotari iua. Imisiritarina iua inireēkitina iaõka. Iua atokotxikana itxanonako nota hĩtari iaxitikiri. Imisiritanona —Xesosi txana Petro, Txiako, Xoão pakini.

¹³ Ininiã imoianariakori imarotari Xesosi sākire. Eríasi, Xoão kapatxisareri itxaua.

*Amarini, Maerekati Matamatakoti Auaĩtotakiti Pirena
(Marko 9.14-29; Arókasi 9.37-43)*

¹⁴ Ikanapiriãkana atoko, itomaneri kãkiti apotiitiniãtaãua apokasaakina, kiki apoka Xesosimoni. Ikapotoreẽkaua iua apisatoõ. ¹⁵ Itxari:

—Apiananiri, piamonĩkari namarite. Maerekati matamatakoti auaĩtotari iua. Atatsi-irauata. Xaminaã irikapika. Kãuaãriã ikomokapika. ¹⁶ Niminamari namarite pimoia-nariakorimoni. Ninoa kona posotari erekapeka itxĩkitakinirina.

¹⁷ Ininiã Xesosi txari:

—!Kauikarei hĩte. Maerekati kamakanii hĩte. Kipakinikananipa Teoso nirekatari hĩtekata nauini? Kipakinikananipa Teoso nirekatari hĩte nimĩteenekini? Himinari amarini notamoni —itxana.

¹⁸ Apokaãka atoko, Xesosi txitari iua maerekati matamatakoti:

—Pisipe.

Ininiã iua maerekati sipe. Iusaakipeka iua amarini erekapeka itxa.

¹⁹ Eereka imoianariakori apoka Xesosimoni. Iusaaki ninoanoka aua iuakata. Imisãkiretarina:

—Kanatokopa ininiãpa ate kona posotari maerekati matamatakoti aomitikini?

²⁰ Ininiã Xesosi:

—Kona atãoni hãuikari nisãkire, ininiã kona hĩposotari homitikiniri iua. Atãoenepitikara nisãpiretai hĩte. Mostata iki axapitikiri. Axapitipitika nisãkire hãuikiniã, mostata iki atoko nisãkire hãuikiniã, hĩposotari ia õtanoxiratari hĩpaniãtini: “Pite oxiratari, uai posipika, ikaimoni pisa,” ininiã oxiratari sapitikamako. Hĩte posotari ikinipoko hinireẽkiti hĩkamini. ²¹ Txamari himamisãkiretakaniãri Teoso, hinipokotini himatakanapakaniã Teoso himisãkiretini ãkapani, ininiãra kona hĩposotari maerekati matamatakoti homitikini —itxa Xesosi.

*Xesosi Iuaĩkana Sãpiretari Ipinini
(Marko 9.30-32; Arókasi 9.43-45)*

²² Kariréia tõpa apokasaakina, Xesosi misãkiretana imoianariakori:

—Nota, hĩtari iaxitikirino mĩkapiritaãkako. Nisikaãkako kikiakorimoni inirekaãkitina ikaminina tĩkane. ²³ Ninoa okano nota. Ipi ãti pakini õtisaaki iuaĩkana nõkitikauako, iuaĩkana aua nitxako —itxana ninoa.

Ikara inakari ikenakotakasaakina, imatinaniuatana.

Txineiro Teoso Misãkiretiko Aikoti Ìkapani

²⁴ Kapanaoõ sitatxiti apokasaakina, kikiakori sari Petromoni. Ninoa kiki apakaparo txineiro Teoso misãkiretiko aikoti nĩkatakani amanaãkito. Ipimaãrina Petro:

—Hĩte oerekakari sikataro txineiro Teoso misãkiretiko aikoti nĩkatakani amanaãkito? —itxarina iua Petro.

²⁵ Ininiã Petro:

—Ari, isikapitikaro —itxa.

Eereka Petro ãroã aapokotxi ãki ikara sãkiretxiti Xesosi isãpiretini ãkapani. Xesosi sãkirauata, Petro masãkirauatakani apisa:

—Petro, ikini itixiti kipa sikataro txineiro auĩtetxiakorimoni? Atauako auĩtetxi nirimane sikataro? Atauako kãkiti ãtiãtaã ãkanikani sikataro? —itxari.

²⁶ —Kãkiti ãtiãtaã ãkani sikaro txineiro auĩtetximoni —itxa Petro.

—Ari atãopitikara. Ininiã kona auĩtetxi nirimani sikaro txineiro iuamoni. Iuaritika asikapitikaro. ²⁷ Txineiro amasikakaniã, txineiro apotiitakani !apokaerekataua. !Anirekari ikara atoko inakari. Ininiã ipoa pisa. Pokatsaãta. Pimanamãkaro ximaki merepitipanika pimaãkito. Onamaã papokaro txineiro ota aĩkitxirauatini ãkapani. Oa txineiro ota apakata nota sikakito ãkapani, pite sikakito ãkapani apaka. Panika. Pisikaro oa txineiro Teoso misãkiretiko aikoti nĩkatakanimoni —itxa Xesosi.

Ininiã Petro kamari Xesosi sãkire iaõka.

18

Kiripa Kākiti Apiatakari Txataua?

(Marko 9.33-37; Arókasi 9.46-48)

¹ Iuasaaki Xesosi moianariakori apoka iuamoni.

—Teoso auñtetxi ininiãtaãua, kipa kãkiti apiatakari txataua? —itxana.

² Xesosi akiritari amarini axapitiri. Ninoa apisatoõ taka itxari.

³ —Atãopitikara nota sãkire. Himaerekani himatakanapakanisaaki, Teoso nireẽkiti himakamakanisaaki, amarini axapitiri atoko himinakanisaaki, kona hñsapani Teoso auñtetxi ininiãtaãua. ⁴ Ia amarini axapitiri !iuikaua. Kãkiti ia amarini atoko inakarira, iuaka poiãotakiniãua, iuara apiatakari itxaua Teoso auñtetxi ininiãtaãua. ⁵ Nota nireẽkiti pikamakasaaki, pipoxokoniritika papakapiniãri amarini ia atoko inakari pinakasaaki, papakapano nota apaka —itxa Xesosi.

Maerekati Oerekakari

(Marko 9.42-48; Arókasi 17.1-2)

⁶ Xesosi sãpirenauatapanika:

—Kãkiti txĩkitakiniãri amarini, nota sãkire auiãkari, maerekati ikamini, !apakata. Erekamariko kai mitari iua kãkiti maerekati oerekakari iaxirikanokitaãkamako, iposo atoko ipoa apanĩkakiã okaãkamako ipinini ãkapani. ⁷ Kãkiti ikini itixiti auakani misiritaãkako, kotxi auari kãkiti maerekati apanakini kamini txĩkitakakani. Auapika kãkiti ikara atoko inakani. Ninoa misiritaãkako. ⁸ Piuako txĩkitakiniãri maerekati pikamini, ininiã pitsotakari, oka pitxariko. Pikiti txĩkitakiniãri maerekati pikamini, ininiã pitsotakari, oka pitxariko. Kotxi maerekati pikaminiã arikatxi maxipokatimoni pokaãkako. Apiaerekata mauakotikai pauini ãtipirika Teosokata. Apiaerekata makititikai pauini ãtipirika Teosokata. Pauiritiniãri maerekati pikamini txĩkitaãkari pitekata ikaikotiniã, ininiã pite kamari maerekati apaka, ininiã arikatxi maxipokatimoni pokaãkako. ⁹ Iua atokokana poki txĩkitakiniãri maerekati pikamini, pimaporoka, oka pitxariko. Kotxi maerekati pikaminiã, arikatximoni maerekani misiritikoãtaã pokaãkako. Apiaerekata Teosokata ãtipirika pauini ãti pokinoka pauini. Kona pauiritapiri maerekati pikamini txĩkitaãkari pitekata ikaikotini —itxa Xesosi sãkire.

Soti Auñte Pĩpinanaãkari

(Arókasi 15.3-7)

¹⁰ —Ikinipoko amarini pipaxitako, kotxi niri tixine aua niri nitiriakori. Ninoa nĩkatari amarini. Niri apisatoõ ãtipirika iniritiriakori auapika, ininiã kãkiti mapaxitakaniãri amarini, isãpiretarina niri. ¹¹ Nota hĩtari iaxitikiri napoka ãkorapokoriti kãkiti pĩpinanaãkani atoko inakani napokini ãkapani, kotxi !imarotarina Teoso kimapore.

¹² —Kiãtokopa itxa hĩxinikakiti? Kiki aua ipiraakori soti auñte seĩ pakini. Txamari ãtika pĩpinanaka. Kiãtokopa itxa? Itakanapari ipiraakori novẽta novi pakini. Isari oxiratarimoni. Initari iua pĩpinanaãkari. ¹³ Ipiraakori novẽta novi na pĩpinanaka, ininiã ipoxokoniuata. Apokasaakiri iua pĩpinanaãkari, iteene ipoxokoniuata. ¹⁴ Iua atokokana hĩri iaxitikiri kona nirekari amarini ãtika pĩpinanakini. Hĩri nirekari imakinika amarini imarotini ikimapore iuamoni sikari apo —itxa Xesosi sãkire.

Maerekati Pitemoni Kamakari

¹⁵ —Pitari nisãkire auiãkari kaminiãri maerekati pitemoni, ininiã pisa iuamoni. Pitenoka pisa iuamoni. Iuanani pimisãkiretako. Põtãkikiniri ikĩpitakasaaki, pimoianari iuaĩkana itxapekaua. ¹⁶ Põtãkikiniri imakĩpitakanisaaki, ipi kãkiti panikako iuamoni. Ipi minakanisaaki ãtika panika iuamoni. Ininiã iuaĩkana põtãkikari iua maerekati kamakari. Iuasaaki pitekata sikani apaka õtãkikari. Kotxi Teoso sãkire iõkatsopatakori oerekaua kãkiti sãkire kenakotakani, kãkiti kamakiti itikakani ipi ãti pakini auiniã, apakata apanakini atão inakari imarotini ãkapani. Ipi ãti minakanisaaki, ipi apakata. ¹⁷ Ninoa

pitekata sikani sākire imakīpitakanisaaki, pisāpiretana kākiti Teoso misākiretikoātaā apoti-itakaniua. Ninoa ikinipoko Teoso sākire auiākani ōtākikariko iua. Imakīpitakanisaakiri ninoa sākire, himarotari atāo maerekati kamakari itxaua iua. Teoso sākire mauiākati atoko itxaua iua, kotxi kona inirekari ōtākikiko. Ate mokaiakari moianari atoko itxaua —itxa Xesosi sākire.

Pauiritakiti, Pimauiritakiniti Pakini

¹⁸ —Atāopitikara nitxai hīte. Īkorapokoriti kākiti kamakiti himauiritakiniti, Teoso tixine apaka ! auiritaāka. Īkorapokoriti kākiti kamakiti hāuiritakiti, apaka auiritaāka Teoso tixineē.

¹⁹ —Apikomoni ia nisāpiretai. Pite xinikakititxikana āti xinikiniā apaka, hinirekakiti hamanainiāri Teoso, niri iaxitikiri sikapitikai hamanaākiti. ²⁰ Kākiti apotiitakasaakiaua nota ixinikinina ĩkapani, nota ninoakata aua. Atxiīti ipi ātinoka aua. Atxiīti ipinoka aua. Iuaritika nota aua ninoakata —itxa Xesosi.

Nitiritxi Āti Matiretakati

²¹ Petro sari Xesosimoni, pimaā itxari Xesosi:

—Apiananiri, kipakinikatapa napakapari nitari, maerekati ikaminano ātipirika in-akasaaki? Setxikata atxiīti?

²² Ininiā Xesosi:

—Kona, kona setxikatani papakapari iua. Setxikata setēta papakapari iua, ininiā ātipirika papakapariko.

²³ —Apikomoni noerekai papakapiniri kākiti, maerekati ikamakasaaki pitemoni. Teoso auītetxi ininiua patrāo ia atoko inakari itxa. Ia patrāo nirekari initiriakori ĩkitxitiniri iua. ²⁴ Ininiā iua iaōtaro txineiro isikakitopeka. Iuasaaki initiri minaāka iuamoni. Mitxipeka iua patrāo sikari tesi mirāo txineiro ota iua initirimoni. Tx-ineiropokoni. Oa txineiro isikasaaki, itxari initiri: “Āti ōti iuaĭkana pisikano oia nitxineirote,” itxari initirimoni. Txamari, lisikaro, kotxi !oāuaika. ²⁵ Kona katxineiroteri. Ininiā ipatrāote paniātari ivētxitiko iua, ĩtanoro, imiakori, itii ikinipoko, ipatrāote ĩkitxitini ĩkapani. ²⁶ Iua initiri ikara inakari sākiretxiti ikenakotakasaaki, ipatrāote apisatoō ikapote-reēkaua. Itxari iua: “Piātaparoko. Ikinika pitxineirote nisikaiko,” itxari ipatrāotemoni.

²⁷ —Ininiā ipatrāote amonīkari. “Kona ninirekaikaro nitxineirote pisikinino.” Ininiā auiritari isini.

²⁸ —Ininiā sipe itxa. Iua nitiritxi mitxi sikapekaro txineiro iua inakito seī ota āti ipatrāote nitirimoni. Poiāonoka oa txineiro. Iuasaaki, aapokomoni isikasaaki, aōkitari iua āti nitiritxi ipatrāote nitiri. Imaīkari inoakiā. “Uatxa pisikano nitxineirote,” itxari.

²⁹ —Ininiā imoianari kapotoreēkaua iua apisatoō. “Piātaparoko. Ikinika pitxineirote nisikaiko,” itxari.

³⁰ —Txamari mitxiri nitiritxi: “!Niātapaikaroko,” itxari. Ininiā kateiamoni ieretakak-itākari imoianari txineiro xika. “Ikinika nitxineirote pisikasaakiikanoko, pikatxakako,” itxari. ³¹ Ikara inakari ene apanakini iua patrāo nitiriakori kenakotakasaaki, ninoa naiataua. Ininiā isana ipatrāotemonina. Isāpiretarina initiri iokanatiniri āti initiri kateiamoni. ³² Ininiā iua patrāo akiritari iua initiri: “Pite maerekati pitxaua, kotxi kita pite amanaāno nota niamonīkinii, ininiā piīkitxitinino !ninarekaika. ³³ Kinirepa kona pite amonīkari pimoianari nota amonīkinii atokokana? Kona erekai,” itxari.

³⁴ —Ininiā ipatrāote iteene naiataua. Iokanataro iua kateiamoni imisiritikomoni ipatrāote txineirote okinika imasikakanisaaki.

³⁵ Ininiā Xesosi xipokapiretari ia isāpirena:

—Niri iaxitikiri iua atokokana txaike hīte, maerekati āti kamakasaakii hītemoni hima-maxinīkaretakaniā hākixinireē —itxa Xesosi.

19

Kiki Ītanorokata Itakanapakakini

(Mateo 5.31-32; Marko 10.1-12; Arókasi 16.18)

¹ Ikara inaka atoko Xesosi potorika Kariréia tōpa. Isa Xotéia tōpamoni uini Xotāo ipiniā.

² Iuaā itomaneri kākiti sari iuamoni. Erekapeka itxīkitakana amianatakani.

³ Pariseoakori apaka sari iuamoni. Inirekarina Xesosi kerokiniri isākire. Ininiā ipimaārina Xesosi:

—Auiritaāka atxiīti kiki takanapiniro ĩtanoro, itakanapiniro inirekasaaki? —itxarina.

⁴ Ininiā Xesosi:

—Hīte imarotapekari ia Teoso sākire iōkatsopatakori:

Kitxakapirīka merepitipanika ikinipoko Kamakari kamari kākiti, kiki inini, sito onini apaka ikamari kākiti.

⁵ Ikara atoko ininiā, kiki takanapari iri, inoro pakini, ĩtanorokata auini ĩkapani, ininiā ninoa ātika atoko itxauana,

itxa Teoso sākire iōkatsopatakori. ⁶ Ininiā kona ipi !itxaikauana. Ātika itxauana. Ikara atoko ininiā, !erekari kākiti kaiarikiniri Teoso apotiitakini —Xesosi txana ninoa.

⁷ Ininiā ninoa pariseoakori pimaāri:

—Ikara atoko ininiā, kinirepa Moisesi paniātari kiki iōkatsopatiniri aātsopa, ĩtanoro itakanapini aātsopate, ininiā eereka auiritari iua iokanatiniro oa?

⁸ Ininiā Xesosi apakapapiretana:

—Moisesi auiritai hītanoro hītakanapini, kotxi paikori hīxinire. Teoso nireēkiti hi-manirekakani xikara, Moisesi auiritai hītanoro hītakanapini. Txamari kitxakapirīka merepitipanika kona kiki takanaparo ĩtanoro. ⁹ Ininiā nītxai hīte, kiki takanapiniāro ĩtanoro, ātikata masirīkatoka, iua kamari maerekati. Itakiniāro āto sito, maerekati apiata ikama, kotxi !imaākatari Teoso paniātakiti. Oa itakanapakito taākari apaka kamari maerekati —Xesosi txana ninoa.

¹⁰ Ininiā imoianariakori ikara ikenakotakasaakina, itxarina Xesosi:

—Ītaniritxi, ĩtanorotxi ! auiritaāka itakanapakakinina, ininiā erekapiimana imītaniriuatakanina —itxarina.

¹¹ Ininiā Xesosi:

—Erekapitikari kākiti ĩtanorouatini. Ātikakanoka Teoso kona nirekari ĩtanorouatinina.

¹² Ixika auapitika kākiti mītanorouatakani. Kotxi ātikaka kiki auakasaaki, iītona kona apakata ninoa takiniro sito. Apanakinipekana ikisauakatsikitiko xika kona ninoa posota itakinirona sito. Apanakinipekana kona nirekari ĩtanorouatini Teoso auītetxi ininiāua ātipirika isāpiretini ĩkapani. Teoso manirekakaniāri pite ĩtanorouatini, ininiā kona pītanorouatape —itxa Xesosi.

Xesosimoni Amarini Apokini

(Marko 10.13-16; Arókasi 18.15-17)

¹³ Iposo atoko kākiti minana amarini Xesosimoni. Inirekarina ninoa kii nopini iuako itakini. Inirekarina Xesosi misākiretiniri Teoso amarini ĩkapani. Txamari imoianariakori txitana. !Auiritana amarini anikinina Xesosimoni. ¹⁴ Ininiā Xesosi txana imoianariakori:

—Hāuiritanako amarini notamoni apokini. Kona hītokakapena notamoni apokinina. Kotxi kākiti Teoso auītetakani amarini atoko itxauana —itxana.

¹⁵ Ininiā iuako itaka ninoa kii nopini. Iposo atoko ĩkorape itxa.

Ātokori Ito Txineiroteri

(Marko 10.17-31; Arókasi 18.18-30)

¹⁶ Ātokori apoka Xesosimoni.

—Koerekareri erekarii, kiripa erekari nikama ātipirika Teosokata nauini ĩkapani? —itxari.

¹⁷ Ininiã Xesosi:

—Kininiãpa “erekari” pitxano? Kãkiti erekari !auari. Teosonanira erekari. Teosokata ãtipirika pauini pinirekiniã, pikamariko Teoso paniãtakiti.

¹⁸ —Ïkiripa? —itxa.

Ininiã Xesosi:

—! Pokaniuatape. !Pisirĩkape ãti ãtanorokata. !Pĩtiriuatape. Poxiene !pikamape. ¹⁹ Piri, pinoro pakini pipaxitako. Pitiretanako apanakini, piteka pitiretiniua atokokana, pitxapaniko —itxari.

²⁰ —Nikamapitikari ikara atoko pinakiti. Kiripa apikomoni nikamaã Teosokata ãtipirika nauini ãkapani? —itxari.

²¹ —Ikinika kinirão kamaka pinakasaaki, ikinika pitii pivẽtxitako. Txineiro papakapito pisika kãkiti matxineirotenimoni. Ikara atoko inakari pikaminiã, Teoso tixine papokasaaki ikinipoko erekari auiniiko pite. Pitii pivẽtxitaka atoko, notakata sa pitxako —Xesosi txari.

²² Iua ãtokori ikara ikenakotakasaaki, isipe. Imatinaninoka itxari ãtokori, kotxi kaiãori itii. !Inirekari itii ivẽtxitini. ²³ Ininiã Xesosi txana imoianariakori:

—Atãopitikara ia nitxai hĩte. Pamimari katxineiroterini auĩtetiniri Teoso. ²⁴ Apikomoni nisãpiretai. Atauako kamero napatari ãkorike sonakiã? Apia mimari kãkiti katxineiroterini auĩtetiniri Teoso —itxana.

²⁵ Xesosi moianariakori ikara ikenakotakasaakina, itsorĩkaãtana. Ninoa uãkatari katxineiroterinimoni txineiro aua, kotxi Teoso apokaerekatana ninoa, ininiã txineiro isika ninoamoni, ninoa uãkatakiti. Ininiã ninoa pimaãri:

—Katxineiroteri maposotakaniãri Teoso tixinemoni isini, kipa posotari iuaã isini? —itxanãtana.

²⁶ Xesosi atamatana. Apakapapiretana:

—Kãkitika kona posotari. Teoso posotari ikinipoko ikamini.

²⁷ Petro misãkiretari Xesosi:

—Atepekana, ate takanapapekari ikinipoko pitekata asini ãkapani. Ikara atoko aniniã, kiripa ate apakapako? —itxari.

²⁸ Ininiã Xesosi:

—Atãopitikara nitxai hĩte. Nota, hĩtari iaxitikiri niitopãkako auĩtetxi itopanere nopini. Iuasaaki ikini itixiti amaneri itxauako. Ikinipoko atamatanoko nota hĩtari iaxitikiri iotximere. Iuasaaki hĩte nisãkire kĩpitakanii apaka topãkako auĩtetxi itopanere nopini. Iua iitopaneretxi tosi pakini. Tosi nirimanetxi Isaeo tixine auakani auĩteakori hĩtxauako.

²⁹ Atxiĩti nota ãkapani pitakanapari paapoko, pitariakori, pitaroakoro. Atxiĩti nota ãkapani pitakanapari piri, pinoro, pamarite. Atxiĩti pitakanapari pikikiote nota ãkapani. Ikara pitakanapakasaaki nota ãkapani, apiata papakapariko. Itori papakapariko. Ikara atoko pininiã nota ãkapani, ãtipirika paua Teosokata. ³⁰ Itori kãkiti apiarini uatxa, itixi xipokini õtisaaki poiãorini itxapekauana. Uatxa itori kãkiti poiãorini, apiarini itxapekauana itixi xipokini õtisaaki —itxa Xesosi sãkire.

20

Ova Takakoriãtaã Parĩkauatakani

¹ Xesosi txari:

—Teoso auĩtetxi ininiua ia kakikioteri atoko itxa. Ia kakikioteri takapekari txipokori ova inakoro ikikioteẽ. Ovanoka itaka. Oiõpeka onakasaaki, iua kakikioteri potorika ãkanõkapanika. Initari parĩkauatakani ova amakani ãkapani. ² Aõkitakasaakina, ipimaãna: “Hinirekatari parĩkatxi?” itxa.

—“Ari, anirekapitikari,” itxana.

—“Atauako ãtoka txineiro ota pirata kamakori apakata ãti õti pokamara piparĩka ãki ãkapani?” itxana.

—“Ari, apakatapitika,” itxana. Kotxi ãtoka ota pirata kamakori iuasaaki atão parĩkatxi ĩki ãti õti pokamara kãkiti parĩkauatini ĩki. Ininiã itakaremoni iokanatana iparĩkauatinina ĩkapani.

³ —Novi oarape inakasaaki iuaĩkana ipotorika. Nipokori vẽtxitikoãtaãmoni isa. Iuaã atamatana kãkiti maparĩkauatakani. ⁴ Ininiã imisãkiretana: “Hĩte apaka atxiĩti nirekatari hĩparĩkauatini nitakareãtaã, ininiã niĩkitxitai atão inakari hĩparĩka ĩki,” itxa. Ininiã ninoa apaka sari.

⁵ —Apaniãxitipeka inakasaaki iuaĩkana iokanatana apanakini parĩkauatakani itakaremoni. Itinĩtikitakasaaki iuaĩkana iokanatana apanakini parĩkauatakani itakaremoni. Mitxi isãkire atokokana itxa isãkire ninoamoni. ⁶ Mapiãnikata takotepeka inakasaaki iuaĩkana isa parĩkauatakani initini. Apokapanikana maparĩkauatakani. Ipimaãna: “Kinirepa ia õti maparĩkauatakanika hĩtxa?” itxana.

⁷ —“Kotxi kona kãkiti sikaua parĩkatxi,” itxarina.

—“Nitakareãtaã hĩsa. Iuaã hĩparĩkauata. Hĩte apakapariko hĩparĩka ĩki erekari,” itxana.

⁸ —Īkanõkapeka inakasaaki kakikioteri akiritari initiri apiari: “Parĩkauatakani pakirita. Piĩkitxitana. Merepanika piĩkitxitana kikata parĩkauatakani. Eereka piĩkitxitana tinĩtikita parĩkauatakani, pitxaãpotako,” itxari.

⁹ —Kikata parĩkauatakani imakinikana apakapari ãtoka txineiro ota pirata kamakori. ¹⁰ Kikiãkini ĩkanõkapanika parĩkauatakani ikara itikasaakina, oãkatarina: “Ate apakaparoko apiatako aparĩka ĩki,” itxamana. ãtoka txineiro ota pirata kamakoro imakinikana apakapana. ¹¹ Txineiro apakapakana atoko, omanãkarauatana. “!Erekari kakikioteri,” itxanãtana. ¹² Ininiã ninoa txari iua: “Naia kikata parĩkauatakani poiãoka iparĩkauatana. ãto oaranoka iparĩkauanãtana. Ate parĩkauata ikiniõtika kapatakariã. Ate parĩkauatapitipo, txamari pite ĩkitxitaua ate naia piĩkitxitini atokokana. Kona erekai,” itxarina.

¹³ —Iua kakikioteri apakapapiretana: “Nitiretakini, kona nota misirienetai hĩte. Īkanõkapanika nipimaãi: ‘Atauako ãtoka txineiro ota pirata kamakori apakata ãti õti pokamara piparĩka ĩki ĩkapani?’ nitxai mixikanani. Ininiã hĩte: ‘Ari, apakatapitika,’ hĩtxa. Ininiã na nimisirienetai hĩte. ¹⁴ Ininiã txineiro nisikakito hanikaika. Haãpokomoni hĩsipeka. Nota nirekari niĩkitxitinina hĩte tikini parĩkauatakani hĩte niĩkitxitini iaõka. ¹⁵ Atauako kona erekari nota txineirote ninirekakitimoni nisikini? Hĩte xikotano, erekari nikamini xika,” itxana ninoa.

¹⁶ Xesosi xipokari isãpirena:

—Itori kãkiti apiarini uatxa, itixi xipokini õtisaaki poiãorini itxapekauana. Uatxa itori kãkiti poiãorini, apiarini itxapekauana itixi xipokini õtisaaki. Teoso aiatana kaiãopokori kãkiti itixine isinina ĩkapani, txamari poiãonoka iua mereẽ —itxa Xesosi.

Iuaĩkana Xesosi Sãpiretari Ipinini

(Marko 10.32-34; Arókasi 18.31-34)

¹⁷ Xesosi Xerosareẽmoni ikimaporitakasaaki, akiritana imoianariakori. Ninoanoka imisãkireta.

¹⁸ —Hĩkenakotari nisãkire. Xerosareẽmoni asako. Iuaã nota hĩtari iaxitikiri mĩkapiritaãkako. Sasetotxi auĩteakori, kaiõkatsoparerini pakinimoni nisikaãkako, ininiã ninoa apotiitaua. Iuasaakiko ninoa txari: “Okaãkapitikako.” ¹⁹ Eereka ninoa sikano Xoteo minakonimoni. Ninoa napetano. Ixirokitatanona aãpitsaã. Iposo atoko aamina ĩpiriãmitakariã tokakita ninaãkako, oka itxanonako. Ipi ãti õtisaaki nõkitikauako, iuaĩkana aua nitxako —itxa imoianariakorimoni.

Txiako, Xoão Pakini Amanaãkiti

(Marko 10.35-45)

²⁰ Eereka Sepeteo ĩtanoro apoka Xesosimoni. Ominana imi Txiako, Xoão pakini. Ninoa Txiako, Xoão pakini Xesosi moianariakori. Okapotoreẽkaua iua apisatoõ.

—Atauako ninirekakiti pikaminano? —otxari.

²¹ –Kipa pinireka? –itxaro.

–Ikinimane auñte pinakasaakiaua, ninirekari naia ipi namariteni auñtetxiakori ininiãuana pitekata. Pauiritatana pitekata iitopãkinina, ãti pikikomoni inini, ãti pisaneremoni inini? –otxari.

²² Ininiã Xesosi apakapapiretana ninoa:

–!Himarotari hamanaãkiti. Mapaõti napa atoko iteene nimisiritaãkako. Atauako hĩposotatari hãtatsiitiniri notakata? –itxana ninoa.

–Aposotapitika –itxarina.

²³ –Atãopitikara hãtatsiirauata notakata, txamari kona notani mereẽna kãkiti nikikomoni, nisanaremoni topãkakani ïkapani. Nirira mereẽpekana ninoa kãkiti notakata topãkini ïkapani –itxana.

²⁴ Apanakini Xesosi moianariakori kenakoenetari Txiako, Xoão pakini amanaãri Xesosi auñtetxi ininiuana ïkapani, ininiã omanatana. ²⁵ Ininiã Xesosi akiritana ninoa imakinikana iuamoni.

–Himarotari Xoteo minakaniaua auñteakori paniãtari kãkiti ikinika auñteakori nireẽkiti ikaminina ïkapani. Kona atão itiretana kãkiti. Kãkiti kona kamari auñtetxiakori mauir-itakiniti. ²⁶ Kona ninoa auñtetxiakori atoko !hĩtxape. Atão apiari pininiua pinirekiniã, pimoianatariko apanakini. ²⁷ Apanakini auñte pininiã pinirekiniã, nitiritxi pitxauako merepanika. ²⁸ Ikara atoko nitxa nota hĩtari iaxitikiri ïkorapokoriti napokasaaki. Ninitiri ! auari. ïkorapokoriti napoka, kãkiti nitiri nininiua ïkapani, kãkiti nitiretini ïkapani. ïkorapokoriti napoka nipinini ïkapani, kaiãopokori kãkiti mapinakani ïkapani, kotxi nota iĩkitxirauata ninoa mapinakani ïkapani –itxana ninoa.

Ipi Mõsiãreni Xesosi Makananitini

(Marko 10.46-52; Arókasi 18.35-43)

²⁹ Xerikoo sitatxiti ipotorikasaakina, itomaneri kãkiti sari Xesosikata, imoianariakori pakinikata. ³⁰ Iuasaaki ipi mõsiãreni topãkanãta kimapori tiniãpo. Xesosi napaãpotini ikenakotakasaakina, akiritana:

–Apiananiri, aãuñte Taviini apika mekanirii, piamonĩkaua ate –itxarina.

³¹ Kãkiti iuaã pinitana:

–Himaãtako –itxana.

Txamari apiata akirikatana:

–Apiananiri, aãuñte Taviini apika mekanirii, piamonĩkaua ate –itxarina.

³² Ininiã Xesosi iotoka. Akiritana ninoa mõsiãreni. Apokana iuamoni.

–Kipa hinireka nikaminii hĩte? –itxa.

³³ –Apiananiri, aĩtikapokotini anireka.

³⁴ Ininiã Xesosi amonĩkana. Okina nopini itakari iuako. Iuasaakipeka kõsiãrepekana, sa itxana Xesosikata.

21

Xesosi Xerosareẽ Apokaãpotini

(Marko 11.1-11; Arókasi 19.28-40; Xoão 12.12-19)

¹ Xesosi imoianariakorikata imatokoãpotari Xerosareẽ. Apokana Petxipaxee inakori aapokotxiti, õtanoxiratari takote Oriva inakori xiratamoni. Iuaã Xesosi iokanatana ipi imoianariakori aapokotximoni.

² –Hĩsa ikiraã kaixiti auakari aapokotxitiã. Iuaxiti hãpokasaaki, hãpokaroko xomẽta iaxiriãkoro oimikata. Hĩkoxirikana. Uaimoni mina hĩtxanako. ³ ãti misãkiretakasaakii: “Kinirepa hĩkaxirikatari pirãtxi?” Ininiã hĩte: “Apiananiri nirekana,” hĩtxako. Ininiã iua auiritai himininina –itxana ninoa.

⁴ Kitxakapirĩka Teoso sãkire sãpiretakari sãpiretapekari ikara atoko inakari. Ininiã iua sãpiretakiti kitxakapirĩka atão inakari apokapeka. ⁵ Iua txari:

Hĩtxariko Xerosareẽ auakanimoni: “Hãtamata. Hĩauĩte apokaãpota hĩtemoni. !Kaneenamari. Xomẽta nopini iitopãkanãta. Xomẽta ãkiri nopini isaãpota,” hĩtxako ninoamoni,

itxa Teoso sãkire sãpiretakari kitzakapirĩkapeka.

⁶ Ininiã Xesosi moianariakori sari. Ipaniãtakiti iaõka ikamana. ⁷ Ininiã iminaro xomẽta oimikata. Itakarina imãkana inopinina Xesosi topãkini ĩkapani. Ininiã Xesosi topãka xomẽta ãkiri nopini. ⁸ Itomaneri kãkiti katamẽkari imãkana kimapori ãpo. Apanakini sauakari aãxike. Ikasirĩkaxikeãpotarina aãxike kimapori ãpo. Ikara atoko ikamana, Xesosi paxitiko oerekinina ĩkapani. Imãkana nopini, aãxike nopini, xomẽta napaãpota. ⁹ Kãkitipokoni ĩkiikakani. Kãkitipokoni Xesosi tikini ĩkani. Imakinika saãpotakasaakina, akirikatana:

–Peerekari Tavii apika mekaniri. Teoso posotiirekata ĩkari, Teoso nireẽkiti kamakari iua. Teoso sikariko erekari iuamoni. Peerekari Teoso, iaxiti apiko nopinixiti auakari. Apiananiri itxaua –itxaãpokatana.

¹⁰ Ininiã Xesosi apokapeka Xerosareẽ. Iuasaaki ikinimane Xerosareẽ auakani tsorĩkaãta.

–Kirinapanipa ikira kiki inatari? –itxanãtakakana.

¹¹ Kãkiti Xesosikata ĩkani sãpiretana:

–Xesosikara ikira. Teoso sãkire sãpiretakari, ikira. Nasaree sitatxitikiri, Kariréia tõpa auakari ikira –itxana.

Pirãtxi Vẽtxitakani Omitikiko

(Marko 11.15-19; Arókasi 19.45-48; Xoão 2.13-22)

¹² Xesosi ĩroã aiko ãki Teoso misãkiretikoãtaã. Omitikenatana tiitxi vẽtxitakani. Amotitakani Teoso misãkiretikoãtaã auakani omitikenata. Ikitakari txineiro vẽtxitakani mesate. Kamoã vẽtxitakani topãkini apaka ikitaka. ¹³ Xesosi misãkiretana:

–Teoso sãkire iõkatsopatakori txari:

Ia naapoko, “Teoso misãkiretiko aikoti” akiritaãkako,

itxa. Txamari hĩte txĩkitakari ia aiko kiĩtiririni iomaãtiniãtaã ininiua –itxa Xesosi.

¹⁴ Mokirini, kãkiti matĩpokotakani pakini apoka Xesosimoni Teoso misãkiretiko aikotiã. Erekapeka itxĩkitakana ninoã. ¹⁵ Iuasaaki amarini Teoso misãkiretikoã auakani iteene akirikata:

–Peerekari aãuĩte Taviini apika mekaniri –itxanãtana.

Sasetotxi auĩteakori, kaiõkatsoparerini pakini itikari Xesosi posotiire, kãkiti erekapeka itxĩkitakini. Ninoã kenakotari amarini akiritakiti:

–Peerekari aãuĩte Taviini apika mekaniri.

Ininiãkara ninoã omanãkarauata. ¹⁶ Ininiã imisãkiretarina Xesosi:

–Pikenakotatari ikara amarini akiritakiti? –itxana.

–Nikenakotapitikari. Hĩte atatsopatapekari ia Teoso sãkire iõkatsopatakori:

Ãtokoriakori, amarini pakini, ninoapeka apaka txariko: “Peerekari iua,” itxanako,

itxa Teoso sãkire iõkatsopatakori. Ininiã Teoso sãkire iaõka ninoã kamanãta. Ininiã erekapitikari ninoã akiritakiti –itxa Xesosi.

¹⁷ Iposo atoko itakanapana. ĩkorape itxa. Itakanapari Xerosareẽ. Isa aapokotximoni Petãnia inakorimoni. Iuaã itxiaka.

Piko Mina Marito Pirena

(Marko 11.12-14, 20-25)

¹⁸ Katimatinĩkata iuaĩkana Xesosi sari sitatximoni. Ipixinipokoriti inatxita.

¹⁹ Atamataro piko mina kimapori ĩtiniãpo. Isa oamoni txipokori itximini ĩkapani. Txamari otsopanani auaro. Iuasaaki itxa:

–Kona kariikaiko –itxaro.

Iuasaakipeka otxiaroka.

²⁰ Imoianariakori ikara itikasaakina, itsorikitaãtana.

–Ii natokopa otxape katimari otxiarokini? –itxanãtana ninoã.

²¹ Ininiã Xesosi:

—Atão nisãpiretai. Teoso sãkire hãuikiniã, hïte posotari hïkaminiri mixikanani nikamak-iti atoko inakari. Piko mina txiarokini nitxïkitakini atoko, hïposota hïkamini. Teoso sãkire iteene hãuikiniã, apiata hïkamako. Hïposotamariko hïpaniãtiniri ikira ixirata: “Põkitikaua. Ipoamoni oka pitxaua.” Iuasaakipekamako ixirata ipoamoni oka itxamauako. ²² Pite atão pauikiniãri Teoso sãkire, iua pimisãkiretakasaaki, ikinipoko pamanaãkiti Teoso sikai —itxa Xesosi.

Xesosi Paniãtakari Moerekakoni
(Marko 11.27-33; Arókasi 20.1-8)

²³ Xesosi ïroã Teoso misãkiretiko aikotiã. Kãkiti oerekasaaki, sasetotxi auïteakori, kiomãtxiakori pakini apoka iuaã. Ipimaãrina Xesosi:

—Kipaniãpa pikamari ïkora pikamakiti? Kipa paniãtai? —itxarina.

²⁴ Ininiã Xesosi:

—Nota apaka pimarauatako hïtemoni. Ätinoka nipimaãiko hïte. Nota pimaãkitiko hïtemoni hïsäpiretiniãno, nota apaka säpiretai hïte hïpimaãkiti notamoni, ininiã nisãpiretai nota paniãtakari uãka apaka. ²⁵ Ia nipimaãi hïte: “Kipa paniãtari Xoãoni ipatxisarauatini? Teosokani paniãtari Xoão? Kãkitikani paniãtari Xoão?” —itxana.

Ininiã ninoa misãkiretakakaua:

—“Teoso paniãtari,” aniniã, “Kinirepa kona hãuikatari isãkire?” Xesosi txamaua eereka.

²⁶ “Kãkitira paniãtari Xoão,” aniniã, apanakini omanatamaua, kotxi ninoa uãkatari Xoão Teoso sãkire säpiretakari ininiua.

Ikara atoko itxana imisãkiretakakiniuana. ²⁷ Ininiã apakapapiretana:

—!Aimarotari iua paniãtakari.

Ininiã Xesosi:

—Nota apaka kona säpiretai nota paniãtakari uãka.

Iri Sãkire Kïpitakari, Iri Sãkire Makïpitakati Pakini

²⁸ —Hïxinikariko ia nisãpiretakitiko: Kiki auari ipi imi. Akiritari anakari. “Namarite uatxa piparïkauata nitakare ova auiniãtaã,” itxari imi.

²⁹ —Ininiã imi anakari: “!Nisapani. !Ninirekari niparïkauatini,” itxari. Eereka ixinikaxitinãta. “Ari, nisapitikako,” ininiã isa iri takaremoni.

³⁰ —Iua kiki akiritari imi maneritakari. Ipaniãtari iua atokokana. Iua imi: “Ari, nisapitikako.” Txamari, !isari.

³¹ —Ininiã ïkiripa kamatarari iri paniãtakiti? —itxa Xesosi.

Ininiã ninoa kiomãtxiakori, sasetotxi auïteakori pakini apakapapiretari:

—Anekarira.

Ininiã Xesosi:

—Atãopitika nisãpiretai hïte. Kïtiriri apokako Teoso auïtetxi ininiãtaãua hïte apisapanika. Kanokarero apokako Teoso auïtetxi ininiãtaãua hïte apisapanika. ³² Kotxi Xoão kapatxisarerini apoka hïtemoni. Oerekai erekari kimaporiti. Txamari kona hïte auikari isãkire. Kïtiriri, kanokarero pakini auikari isãkire. Iuasaaki himarotari ninoa maerekati kamakani takanapiniri imaerekanina. Ikamarina erekarinoka. Hïte itikapekari. Txamari hïte kona takanapari himaerekani. Kona hãuikari Xoão sãkire, ininiã iua kiki sãkire makïpitakati atoko hïtxa, kotxi hïsäkire: “Akïpitapitikari Teoso sãkire,” txamari kona hïkïpitari —itxa Xesosi.

Parïkauatakani Maerekani
(Marko 12.1-12; Arókasi 20.9-19)

³³ —Äti säpirenatxi atão inakari oerekiko nisãpiretai. Hïkenakota —Xesosi txana.

—Kiki kakikioteri takaro txipokori ova inakoro. Ovanoka itaka. Iposo atoko ipirike-taro. Eereka iuaãtaã ikamari ova katsonakiko. Iposo atoko ikamarari aapokotxi õtanori, ikinipoko itakare atamatini ïkapani. Iposo atoko ïkitxitana kikiãkini itakare nïkatakani

ĭkapani. Ininiã ninoa nĭkatari itakare. Eereka kakikioteri sari ãti itixiti. ³⁴ Ova manapi inakasaaki, iokanatana initiriakori itakare nĭkatakanimoni, ova apakapinina ĭkapani.

³⁵ –Txamari, ninoa maĭkapena initiriakori. Ixirokitatarina ãti. Okapirina ãti. ãti kai soroã ikiporonakana. ³⁶ Iuaĭkana iua kakikioteri iokanatana initiriakori. Iuasaaki ito iokanata. Mitxirini atokokana itakare nĭkatakani txapena ninoani. ³⁷ Eereka imapotökire iokanatarimi imi ninoamoni. Iuãkatari: “Namarite iua, ininiã ninoa paxitari iua,” itxa.

³⁸ –Txamari, imi atapakasaakina, imisãkiretakakana: “Erepani imi. Maökari, ininiã okinika itakare kaikotinaua atemoni.” ³⁹ Ininiã imaĭkarina imi. Kikio xiripirexiti anikarina. Iuaã oka itxapirina.

Ininiã Xesosi pimaãri kãkiti iua takote auakani:

⁴⁰ –Ininiã iua kakikioteri ĭkasaaki, kiãtokopa itxatanako ninoa kikiãkini? –itxa Xesosi.

⁴¹ Ininiã ninoa iua takote auakani apakapapiretari:

–Kakikioteri okanako ninoa maerekati kamakani. ĭkitxitanako apanakini itakare nĭkatakani ĭkapani, ininiã ninoa sikapitikaroko ova oiökasaaki –itxarina Xesosi.

⁴² Ininiã Xesosi:

–Hĭte atatsopatapekari ia iökatsopatakori Teoso sãkire:

Kai aapokotxi kamakani kona nirekari ãti kai soro. Iua kai imanirekakiniti kai apiari itxapekaua. Apanakini kai soro maĭkakari itxaua. Teosokara txĭkitakari ikara atoko inini. Ikara peerekari atemoni.

Nota hĭtari iaxitikiri iua kai atoko nitxaua. Peerekari Teoso, kotxi nota hĭtari iaxitikiri kãkiti manirekakiniti. Teoso txĭkitakano nota apiananiri nininiãua.

⁴³ –Ininiã nisãpiretai hĭte, Teoso kona hĭauĭte !itxaikauako. Iua mereëriko apanakini kãkiti inakitiakori ĭkapani. Ninoa kamapitikari Teoso nireëkiti. ⁴⁴ Apikomoni Teoso sãkire iökatsopatakori sãpiretaua iua kai apiari atoko inakari. Itxari:

Kãkiti iua kai nopini irikasaaki, ikarouata iua. Kai kãkiti nopini irikiniã, !auaika kãkiti, –Xesosi txana ninoa.

⁴⁵ Sasetotxi auĭteakori, pariseoakori pakini kenakotakasaakiri ikara sãpirenatxi atão inakari oerekiko Xesosi sãpiretakiti, ninoa !apokaerekatarina isãpirena, kotxi imarotarina ninoa takari nĭkatakani maerekani atoko inakani itxauana. ⁴⁶ Ininiã ia xika inirekarina imaĭkinirina. Txamari !imaĭkarina, kotxi ipĭkarina kãkiti iuaã apotiitakaniua. Kãkitimoni Xesosi atão Teoso sãkire sãpiretakari itxaua.

22

Kiiniri ĭtanorouatiko Pirena (Arókasi 14.15-24)

¹ Iuaĭkana Xesosi sãkirauatakasaaki kãkitikata, isãpiretari sãpirenatxi atão inakari oerekiko. Itxari:

² –Teoso auĭtetxi ininiãua ia auĭtetxi atokokana. Ia auĭtetxi kamari kiiniri imi ĭtanorouatini ĭkapani. ³ Ipaniãtari initiriakori akiritinina ikemaĭtxitakini kiiniriã ininina ĭkapani. Txamari ikemaĭtxitakini !inirekari ikiiniriteë isinina. ⁴ Iuaĭkana iokanatarimi apanakini initiriakori ikemaĭtxitakinimoni. “Hĭtxanako: ‘Nipokori iposopeka. Nokapekari kema auĭte, kema auĭte ãkiri pakini. Paĭpepokori. Imakinika niposotapekari. Hĭsapoka kiinirimoni,’ hĭtxanako.” Ininiã ninoa kamari isãkire iaõka.

⁵ –Txamari ikemaĭtxitakini !imaãkapiretarina. Iparĭkamoni isana. ãtikaka sari kikiomoni. Apanakini sari ãtiãtaã tiitxi ivĕtxitinimoni. ⁶ Apanakinipekana maĭkapena initiriakori, noropata, oka itxapena. ⁷ Iua auĭtetxi ikara inakariene ikenakotakasaaki, iteene inaiataua. Iokanatarimi isotatoneakori ninoamoni. Ininiã okapena ninoa kokanirini. Iotikapirina ninoa aapoko.

⁸ –Eereka iua auĭtetxi akiritana apanakini initiriakori: “Kiiniri namarite ĭtanorouatini pirena iposopeka. Txamari merepitipanika nikemaĭtxitakini !erekana. ⁹ Iua atoko

ininiã, hîsa ahoaãtaã, kãkiti napanakiniãtaã. Hîkemaïtxitana ikinimane haõkitakini,” itxana ninoa.

¹⁰ –Ininiã isana ahoaãtaã. Ikemaïtxitana ikinimane aõkitakini. Apotiitarina kãkiti itanapoko. Maerekani, erekarini pakini apotiitana. Anikana kiinirimoni, ininiã kãkitipokoni xãpoãkata.

¹¹ –Iua auïtetxi atamatana ikemaïtxitakini. Atamatari kiki mãkatxi ïtanorouatikosaaki ieretaãkori mieretaãkati. ¹² Ininiã akiritari iua: “Nimoianari, kiãtokopa piïroã naapoko, kotxi mãkatxi ïtanorouatikosaaki ieretaãkori kona pieretaka?” Iua kona kasãkireri.

¹³ –Ininiã iua auïtetxi paniãtari iniritiakori: “Himaïkariko. Hïaxirikariko iuako, ikitinota pakini, anika hïtxariko mapara. Piãkatximoni hõkariko,” itxana iniritiakori. Iuaãtaã kãkiti txiapatiniãtaã, kãkiti akerakitatsiriïtiniãtaã.

¹⁴ Xesosi xipokapiretari isãpirena.

–Itomaneri kemaïtxitakoni. Txamari poiãoka mereëkoni –itxana ninoamoni.

*Homano Auïte Ìkitixitiko Pirena
(Marko 12.13-17; Arókasi 20.19-26)*

¹⁵ Ninoa pariseoakori sipeka. Eereka apotiitauana. Imisãkiretakakana. Ixinikaxit-inãtarina:

–Anirekari Xesosi kerokiniri isãkire, aãpoïtiniri ïkapani. Ininiã kiãtokopa atxatari apimainiri ikerokiniri ïkapani? –itxanãtakakana.

¹⁶ Ininiã ninoa pariseoakori paniãtana ãtikaka ninoa oerekakini, apaka ãtikaka Erotxi sãkire auïãkani, Xesosimoni isinina ïkapani. Ininiã isana iuamoni. Imisãkiretarina. Pariseo sãkire iaõka isãpiretana.

–Koerekareri, aimarotari atãoenepitikara pisãkire. Atãoenepitikara pisãpiretari Teoso nireëkiti akamini ïkapani. Pite na pïkarauata xatiki kãkiti sãkire xika. ãtinoka pisãkire pisãpireta ikinakariti kãkitimoni. Apanakinimoni pisãpiretakiti iuatxikana pisãpiretari apanakininapemoni. ¹⁷ Ininiã pisãpiretaua. Atãokani txineiro asikini Homanoakori auïtemoni, Sesa inakorimoni? Apakata amasikakaniri iuamoni? –itxarina iua.

¹⁸ Xesosi imarotari ninoa nirekari ikerokiniri isãkire. Ininiãkara itxana:

–Kinirepa hinirekari nikerokiniri nisãkire? Kona erekai hïte. Hïãkirauatakasaaki, kãkiti erekarini atoko hïtxa, txamari maerekati hïkama. ¹⁹ Hõerekano txineiro ota Homano auïte asikini ïkapani.

Ininiã iminarona txineiro ota.

²⁰ –Kisanõkapa ia? Kiuãkapa aua uai? –itxana ninoa.

²¹ –Ari, Homano auïte –itxana.

–Ininiãkara hïskariko Sesamoni iua nakiti. Hïskariko Teosomoni iua nakiti –Xesosi txana ninoa.

²² Ikara apakapapirenatxi ikenakotakasaakina itsoriãkaãtana.

–Paimatireri iua –itxanãtakakana.

Ininiã itakanaparina, sipeka itxana.

*Ipïkari Õkitikiniua Mauikakoni
(Marko 12.18-27; Arókasi 20.27-40)*

²³ Iua õtisaakipeka ãtikaka satoseo apoka Xesosimoni. Satoseo inakoni !auikari ipïkani iuaïkana õkitikiniua.

²⁴ –Koerekareri, Moisesinira oerekari ia sãkiretxiti: “Kiki meenetipanika ipininiã, iua itari takaroko tikinitakoro. Iua itari keene ininiã, itakauãkatari amarini iua itarini ipïpekarini uãka,” itxa Moisesini. ²⁵ Setxi itaritxiakori aua mitxi ïkorapokoriti. Apia anekatakari ïtaniriuata. Eereka ipïpe meenetika, ininiã itari takaro iuani tikinitakito.

²⁶ Iua atokokana iua itari ipïpe meenetika. ãti itari iuaïkana takaro iuani tikinitakito. Txamari iua atokokana ipïpe meenetika. Iua atokokana txaãpota ikinika itariakori.

²⁷ Eereka oa sito apaka opïpe. ²⁸ Ininiã ipïkani iuaïkana õkitikasaakia iuaïkana auãki

ininina, ĩkiripa oĭtaniri aua oakata iuasaaki? Kotxi ikinimane ninoa setxi itariakori takapekaro oa –itxarina iua.

²⁹ Ininiã Xesosi:

–Hĭte kerokari, kotxi !himarotari Teoso sãkire iõkatsopatakori. !Himarotari Teoso posotiire apaka. ³⁰ Ipĭkani iuaĭkana aua inakasaaki, kona ninoa ĭtaniriuataika. Teoso nitiriakori ĭaxitikini atokopeka itxanako. ³¹ Hĭte !auikari ipĭkani õkitikiniua iuaĭkana auãki inini. Atauako kona hãtatsopatapanikari Teoso sãpiretakiti hĭtemoni? Iara isãpiretai:

³² Apraão, Isaki, Xakoo pakini Teosonekarano nota, itxa Teoso. Ininiã Apraão, Isaki, Xakoo pakini auãkipanika itxana, kotxi auãki inakani Teosonera iua. Ninoa uatxa auãki inakani, kotxi kona ipĭkani Teosoneni Teoso –itxa Xesosi.

Iuasaaki kãkitipokoni kenakotari ikara Xesosi sãkire. ³³ Xesosi sãkire ikenakotakasaakina, itsorĭkaãtana, kotxi paimatireri Xesosi apakapapiretakiti satoseoakorimoni.

Teoso Paniãtakiti Apiari Akamini

(Marko 12.28-34)

³⁴ Xesosi ĭĭkiteritika apakapapiretari satoseo pimainiri, ininiã satoseo !ipimarauataika. Pariseoakori kenakotari ikara, ininiã apotiitauana. ³⁵ Pariseo, Moisesi sãkire oerekakari, iua nirekamari Xesosi kerokiniri isãkire. Ininiã ipimaãri:

³⁶ –Koerekareri, ĭkiripa Teoso paniãtakiti apiari txataua? Kipa apiaerekata Teoso nireẽkiti akamini? –itxa.

³⁷ Ininiã Xesosi apakapapiretari:

–“Pitiretariko Apiananiri piTeosone, ikinipoko pinireẽkitiã, ikini pãkixinireẽ, ikinipoko pixinikakitiã pakini.” ³⁸ Ikara atoko inakari Teoso merepitipanika paniãtaua akamini. Ia ipaniãtakiti akamini apiari itxaua. ³⁹ Iuaĭkana Teoso paniãtaua. Ia ipaniãtakiti apaka apiari. Merepanika ipaniãtakiti akamini atoko itxa. “Piteka pitiretiniãua atokotxikana, pitiretariko ãti.” ⁴⁰ Iteene atiretiniãri Teoso, iteene atiretiniãri ãti, ininiã akamapitikari apanakini Teoso paniãtakiti, Moisesinimoni isãpiretakiti. Iteene atiretiniãri Teoso, iteene atiretiniãri ãti, ininiã akamapitikari Teoso sãkire sãpiretakani paniãtakiti apaka –Xesosi txari iua.

Teoso Mereẽkiti Tavii Apika Mekaniri

(Marko 12.35-37; Arókasi 20.41-44)

⁴¹ Pariseoakori apotiitapanikaua inakasaaki, Xesosi pimaãna ninoa:

⁴² –Teoso mereẽkiti pisãpiretano. Kiripa apika mekaniripa iua? –itxana ninoa.

Ninoa apakapapireta:

–Ari, Taviini apika mekanirira –itxana.

⁴³ Ininiã Xesosi:

–Ikara atoko ininiã, kinirepa Erekarari Matamatakoti kamasãkiretari Tavii: “Teoso mereẽkiti niauũte itxaua,” ina sãkiretini? ⁴⁴ Kotxi Tavii txari:

Apiananiri misãkiretari niauũte: “Nota kikomoni piitopãkiniritika nixipokariko pimokaiakariakori. Nikamariko ninoa pikiti pitakiniãtaã atoko ininiua,” Apiananiri txari niauũte,

itxa Taviini. ⁴⁵ Ininiã Tavii akiritari Teoso mereẽkiti “niauũte.” Ikara atoko ininiã, kiãtokopa itxa Teoso mereẽkiti Taviini apika mekaniri ininiãua? –Xesosi txari pariseoakori.

⁴⁶ Kona imarotarina, ininiã kona kasãkirena ninoa. Ikara eereka kona kãkiti pimarauataika Xesosimoni, kotxi ipĭkarina Xesosi imarore.

23

Xoteo Auũteakori Maerekani

(Marko 12.38-40; Arókasi 11.37-54; 20.45-46)

¹ Ininiã Xesosi misãkiretana imoianariakori, itomaneri kãkiti iuaã auakani apaka. ² Ia atoko isãpiretana:

—Kaiõkatsoparerini, pariseoakori pakini, Moisesini sãkire oerekakani itxauana.

³ Ininiãra ikinika kaiõkatsoparerini, pariseoakori pakini paniãtakiti hĩkamako, kotxi ninoa sãpiretari Moisesini sãkire Teoso oerekakiti. Ikara erekari. Txamari kona ninoa kamari Moisesini paniãtakiti. Ikara !erekari. Ininiã ninoa kamakiti atoko !hĩkamape. Kotxi isãkirena erekari, txamari ikamakitina !erekari. ⁴ Ninoa kaiõkatsoparerini, pariseoakori pakini, kiki ia atoko inakari ninoa. Ia kiki takari iminani imoianariakori porikiã, txamari iuaka na xatiki nirekari iporikitiniri. Kaiõkatsoparerini, pariseoakori pakini, ikara kiki atoko itxana. Ninoa paniãtakiti iua iminani atoko itxa.

⁵ —Pariseoakori kamari erekari apanakini atamatini ĩkapaninoka, ereka ininina apanakini uãkatini ĩkapaninoka. Himarotari kãkiti ieretakari Teoso sãkire iõkatsopatakori aãkoana xapitikiri ãki. Eereka iaxirikarina iteẽtaãna, iuakonotaãna pakini. Ninoa kaiõkatsoparerini, pariseoakori pakini takari aãkoana mitari apanakini atamatini ĩkapaninoka. Paĩtanori itsarãpe imãkana apanakini atamatini ĩkapani. ⁶ Kiinirisaaki ninoa nirekari kãkiti potxitiniãtaã iitopãkinina. Aiko ãki Xoteoakori apotiitiniãtaãua inirekarina kãkiti potxitiniãtaã iitopãkinina. ⁷ Apokaerekatarina okapiretikona ipaxitikona kienatxi vẽxitikoãtaã. Apokaerekatarina kãkiti akiritinina: “Koerekareri” inikona.

⁸ —Txamari, ãtinani hĩte oereẽkari txaua, Teoso mereẽkitira iua. Koerekareri hiniko !hãuritapeko, kotxi himakinikara hĩtaritakakaua. ⁹ Kona ĩkorapokoriti auakari “niri,” ! hĩtxape, kotxi ãtinani ãri auari iaxiti auakari. ¹⁰ Apaka apanakini akiritinii “aãũte,” ! hãuritapeko, kotxi ãtinani hĩauũte. Teoso mereẽkiti itxaua. ¹¹ Auĩtetxi pininiua pinirekiniã, apanakini nitiri atoko pitxauako. ¹² Iua “Auĩtetxi nitxaua,” inakari, Teoso txĩkitakariko nitiritxi itxauako. Iua “Nitiritxi nitxaua,” inakari, Teoso txĩkitakariko auĩtetxi itxauako.

Xoteo Auĩteakori Misiritaãkako
(Marko 12.40; Arókasi 11.37-44, 52; 20.47)

¹³ Iuaĩkana Xesosi sãkirauata:

—Erepaniko hĩte kaiõkatsoparerinii, pariseoakorii pakini. Hĩsãkire atxiĩti erekari, txamari kona hĩkamari hĩsãkire iaõka. Kinirão ĩroãkari apisapanika aapokotxi tore totakani atoko hĩtxa, kotxi hĩte iotokakari kãkiti Teoso sãkire atão auikini, ininiãkara hĩte iotokakari kãkiti ĩroini Teoso auĩtetxi ininiãtaãua. Hĩte kona ĩroã. Apaka kona hĩte auiritana kinirão ĩroãkani. ¹⁴ Erepaniko hĩte kaiõkatsoparerinii, pariseoakorii pakini. Hĩsãkire atxiĩti erekari, txamari kona hĩkamari hĩsãkire iaõka. Hĩte mixirikari tikinitakoro aapoko. Himisirienetana. Teosokata hĩsãkirauatakasaaki, itori sãkiretxi hĩkama apanakini, “paimatirena” inini ĩkapaninokara. Ikara xika himisiritiko apiatako.

¹⁵ —Erepaniko hĩte kaiõkatsoparerinii, pariseoakorii pakini. Hĩsãkire atxiĩti erekari, txamari kona hĩkamari hĩsãkire iaõka. Hĩte sari õtakoxiti. Hĩpiriãtari kãuaãri. Imiriĩ õtakoxiti hĩsa, hĩsãkire auikakari hinitini ĩkapani. ãtinoka hĩsãkire auikakari auiniã, iuaritika hĩsa iuaxiti. Eereka hõerekari iua ikinipoko himarotakiti. Eereka hĩte maerekani xika, iua kiki maerekani apiatako. Isapitika hĩtekata maerekani misiritikoãtaã.

¹⁶ —Erepaniko hĩte. Mõsiãreni atoko hĩtxa, iuaritika hinirekari hõerekiniri Teoso kimapore apanakinimoni. !Hĩposotari. Hĩte oerekari apanakini ia hĩsãkire: “‘Ia nikamapitikako’ pinakasaaki, Teoso misãkiretiko aikoti pakiriuãkatakasaaki, pimakamakaniãri, kona pimisiritaãkako,” itxa hĩte sãkire. Iuaĩkana hĩte sãkire: “‘Nikamapitikariko,’ pinakasaaki, Teoso misãkiretiko aikoti ãki auakaro oro pakiriuãkatakasaaki, pikamapitikariko pikamaenetakiti. Ikara pimakamakanisaaki, pimisiritaãkako,” itxa hĩte sãkire.

¹⁷ —Hĩte mõsiãreni atoko. Kona kiĩkitei hĩte. ĩkiripa apiari? Orokani? Teoso misãkiretiko aikotikani? Teoso misãkiretiko aikoti apiari, kotxi oa oro aiko ãki aua, ininiã aiko txĩkitakaro oro Teoso nakito oniniãua.

18 –Hīte oerekari apanakini ia hīsākire apaka: “ ‘Nikamapitikariko’ pinakasaaki, Teosomoni sikakori takikoōtaā pakiriuākatakasaaki, pikamaenetakiti pimamakaniā, kona pimisiritaākako. ‘Nikamapitikako’, pinakasaaki, Teosomoni sikakori takikoōtaā nopini takakori pakiriuākatakasaaki, pikamapitikariko pikamaenetakiti. Pimakanisaakiri, pimisiritaākako,” itxa hīte sākire.

19 Hīte mōsiāreni atoko hītxa. !Kiīkitei hīte. Īkiripa apiata? Sikakorikani? Sikakori takikoōtaākani? Sikakori takikoōtaā apiata, kotxi sikakori inopini takikosaaki, iusaakipeka Teoso nakitipeka. Ininiā sikakori takikoōtaā txīkitakari sikakori Teoso nakiti ininiāua. 20 Ininiā pisāpiretakasaakiri Teoso pikamaenetakiti, Teoso sikakori takikoōtaā pakiriuākatiniā, iuatxikana iua nopini auakari pakiriuākata. 21 Pakiriuākatakasaakiri Teoso misākiretiko aikoti, iua atokotxikana pakiriuākatari Teoso, kotxi iua aiko āki aua. 22 Pakiriuākatakasaakiri Teoso tixine, ininiā iua atokotxikana pakiriuākatari Teoso topākini. Iua atokotxikana pakiriuākatari Teoso, kotxi Teoso topākini nopini iitopāka Teoso.

23 –Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Ipixini hinakiti hīsikari Teosomoni. Tesi hīti auiniāi, hīsikari āti Teosomoni. Tesi txineiro ota auiniāi, hīsikari āto Teosomoni, hītxaāpota. Ikara hīkamakiti erekari. Nipokori koke, oteraā, erva tosi, komínio, axapitikiri inakari, iuaritika ipixini hīsika Teosomoni. Ikara Teoso paniātakiti hīkamapitika. Txamari, Teoso paniātakiti apiari !hīkama, kotxi !hīkamari atāo apanakinimoni. !Hiamonīkana apanakini. Hīkamaenetakiti !hīkama. Ikinika Teoso paniātakiti hīkamako. 24 Mōsiāreni atoko hītxa, iuaritika hinirekari hōerekiniri Teoso kimapora apanakinimoni. !Hīposotari. Himaktxakaro xikiri iāriā āki komokakaro, txamari hīxirapoataro kamero, kotxi Teoso paniātakiti poiāori hīkama, txamari ipaniātakiti apiari kona hīkama.

25 –Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Hōeretari hīto maparakiri, txamari hākixinireē !erekari. Papotxinanii, patirenanii, paītirii. 26 Hīte pariseoakorii, mōsiāreni atoko hītxa. Merepitipanika himaktxakariko maerekati hākixinire auakari, ininiā hīto erekatxikana. Hākixinire ereka ininiā, hīkamakiti ereka apaka.

27 –Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Kai auīte iriko, ipīkari takikoōtaā atoko hītxa. Mapara txīta kasarori minapaākapeka, ininiā mapara peerekari. Txamari, iriko āki ipinakari api, arakapoakatakari aua. 28 Iua atokokanera hītxa. Kākiti uākatai hīte atāo inakarinoa kamakani hininiua, kotxi hinopini ererini hītxa. Txamari, hākixinire !ereri, kotxi maerekatinoaka hīkama. Hīsākire atxiīti erekari, txamari kona hīkamari hīsākire iaōka –itxa Xesosi sākire.

Xoteo Auīteakori Misiritiko
(Arókasi 11.47-51)

29 Iuaīkana Xesosi sākiraauata:

–Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Hīkamari akauari Teoso sākire sāpiretakanini īkapani. Peereri akauari hīkama. Hīkamari akauari ipīkani atāo inakarinoa kamakani īkapani. Txīta himinapa akauariā. Aāui hītaka iuaātaā. 30 Hītixari: “Kitxakapirīka aātokiriakorini okana Teoso sākire sāpiretakani. Atepitika auaākamako iusaaki, konimako ate okana ninoa,” hītxa. 31 Teoso sākire sāpiretakanini okakani mekaniriakori hītxa hīte. Kotxi hītekara txari: “Aātokiriakorini okana Teoso sākire sāpiretakani.” Hīte maerekati kamakani ninoa atokokana hītxa. 32 Hātokiriakorini mipotorikari Teoso sākire sāpiretakani okinina. Hīte xipokapanikanako ātikaka kaikotakani Teoso sākire sāpiretakani.

³³ —Imini atoko hĩtxa. Imini anaakori atoko hĩtxa hĩte. Himisiritaãkapitikako maerekani misiritikoãtaã. Himitekini !auari. ³⁴ Ininiã nisãpiretai hĩte. Niokanapanikari hĩtemoni Teoso sãkire sãpiretakani, Teoso iokanapirena imarotakani, korekarerini pakini niokanata hĩtemoni. Txamari ãtikaka hõka, aamina ĩpiriãmitakari nopini hĩtokakitana apanakini. Apanakinipekana hĩxirokitata aiko Xoteo apotiitiniãtaãua. Eereka hãsikatikinitana ninoa ãti sitatxitimoni sikani, eereka ãti sitatxitimoni, eereka ãti sitatxitimoni hĩtxaãponãta ninoa hãsikatikinitini. ³⁵ Ininiã hĩte misiritaãkako ikinika atão inakari kamakani okiko xika. Kitxakapirĩka Apeo inakorini okapeẽka. Atão inakari kamakari iua. Ikinimane okapekoni tikinimoni okapeẽka Sakariani, Parakia ãkiri. Iua Sakariani okapeẽka sikakorĩ takikoãtaã takote Teoso misãkiretiko aikoti ãki. ³⁶ Atãopitikara nisãpiretai hĩte. Kãkiti uatxa auakani apakapariko misirikaretxi ninoa erekarini okapekoni xika —itxa Xesosi sãkire.

Xerosareẽ Xesosi Tiretini
(Arókasi 13.31-35)

³⁷ Iuaĩkana Xesosi sãkirauata:

—Xerosareẽ auakanii, Xerosareẽ auakanii, hĩte okapekana Teoso sãkire sãpiretakani. Kai soroã hĩkiporonakana ninoa hĩtemoni Teoso iokanatakini. Kaiãokatani ninirekamari ninĩkatinii, patari oimiakori omĩkita patapi otakini atokokana nitxanakamaiko hĩte. Txamari !hãuiritano nota nĩkatinii. ³⁸ Ikara atoko inakari xika haãpoko asikaãkako. Teoso !auaika hĩtekata. ³⁹ Nisãpiretai. Ia õti hãtamatanano, eereka !hãtamataikano. “Teoso takari erekari uaimoni ĩkarimoni, Apiananiri posotiireẽ ĩkarimoni,” hinakasaaki, iuasaakinanirako hãtamatanoko nota —itxa Xesosi.

24

Teoso Misãkiretiko Aikoti Irikiko
(Marko 13.1-2; Arókasi 21.5-6)

¹ Teoso misãkiretiko aikoti Xesosi potorikasaakipeka, imoianariakori apoka iuamoni. —Patamata. Peerepokori aikoniri —itxarina.

² Ininiã Xesosi:

—Ari, hãtamatatari ere aikoniri? Atãopitikara nisãpiretai hĩte. Koniko kai kaikotapani ãti kai nopini. Imakinika kai irikaãkako —itxana.

Misirikaretxi Apokaenetini
(Marko 13.3-13; Arókasi 21.7-19)

³ Iposo atoko Xesosi sari oxiratarimoni, Oriva inakorimoni. Iuaã topãka itxa. Imoianariakori sari iuamoni. Ninoanoka auari iuaãtaã.

—Pisãpiretaua kirisaakiparako aiko Teoso misãkiretiko irikataãkako. Natokopa ininiãparako ate imarotatari pite kaiama kanapirikape pinini? Natokopa ininiãparako aimarotatari itixi xipokini õti kaiamapeka inini õti? —itxarina Xesosi.

⁴ Ininiã Xesosi:

—Erepaniko. !Hãuiritapena apanakini misirienetini. ⁵ Kotxi apokako kãkiti itomaneri “Teoso mereẽkiti nitxaua nota,” inakani. Ninoa misirienetana itomaneri.

⁶ Hĩkenakopiretariko neenamatzĩ ene uaimoni, õtakoxiti apaka. Iuaritika !hĩpĩkarauatape. Kotxi auapitikako neenamatzĩ. Txamari itixi xipokini õti !apokapanika. ⁷ Ikara inakari apisapanika, ãti uãka neenamauatako ãti uãkakata. Apanakini auĩte inirimanekata neenamauatako apanakini auĩtekata inirimane pakinikata. ãtiãtaã kãkiti inikoriãriko natxi. ãtiãtaã amianari inokanako kãkiti. ãtiãtaã itixi iakeẽkatakako. ⁸ Ikara atoko itxako misirikaretxi potorikini. Sito amarini tsii atoko itxako iuasaaki.

⁹ —Iuasaaki hĩte maĩkaãkako, himisiritiko ĩkapani. Iposo atoko oka hinaãkako. Nisãkire hãuikini xika ikinimane omanataiko hĩte. ¹⁰ Iuasaaki itomaneri !auikaikari Teoso sãkire. Itakanapapekarina Teoso kimapore. Imĩkapiritakakanako. Omanatakakanako.

¹¹ Apokako kãkiti “Nota Teoso sãkire sãpiretakari nitxaua,” inakari. Txamari kona atão.

Ninoa misirienetanako itomaneri kākiti. ¹² Kākiti turetiko poiāotako, kotxi maerekanitxi iarikako ikini itixitimoni. ¹³ Iuasaaki kākiti mīteenekiniāri misirikaretxi, imatakana-pakaniāri Teoso sākire, auapikako ātipirika Teosokata. ¹⁴ Teoso iokanapirena erekari, Teoso auītetxi ininiāua, sāpiretaākako ikini itixiti auakani, ikini kākiti imarotiniiri ĩkapani. Ikara inakari auaāka atokoikarako itixi xipokini ōti apokako.

Iteene Maerekanitxi Apokini

(Marko 13.14-23; Arókasi 21.20-24)

¹⁵ Xesosi sāpirenauatapanika:

—Hīte itikariko iteene maerekati kamakari timini aiko Teoso misākiretiko āki. Kitx-akapirīka Tanieo inakori, Teoso sākire sāpiretakari, sāpiretapekari ikara ene. Hīte ia atatsopatakani, himarotariko ikara. ¹⁶ Ikara atoko inakari hītikasaaki hīte ĩkorapokoriti Xotēia auakani, oxiratarimoni himitekako. ¹⁷ Ikara ōti apokasaaki haāpoko nopini hāuiniā, katima hītixako himitekini. !Apakata haāpoko āki hītii himakatzakini. ¹⁸ Kikio hīparīkauanātakasaaki, hāapokomoni !hīkanapiripe himāka hāpini ĩkapani. ¹⁹ Ikara ōti apokasaaki, kamixironi, kaxitakareroni pakini iteene atatsiitariko. Pasāpaniri ninoa mitekini. ²⁰ Hamanaāriko Teoso katxīkareri mauakani himitekini ōtisaaki. Hamanaāriko tomatiko ōtisaaki ikara inakari mauakani ĩkapani. ²¹ Kotxi ikara mitekatzxi ōtisaaki kākiti iteene atatsiitariko imisiritiko. Ikara ōti apisa kākiti !imarotari iteene imisiritiko. Itixi kamikosaakipanika !auari ikara atoko inakari misirikaretxi. Ikara mitekatzxi ōti napaāka atoko kākiti !imarotaikari iteene imisiritiko. Ikara ōti apiatako kākiti misiritiko. ²² Teoso poiāotakari iua ōti ikinipoko kākiti mapinakani ĩkapani. Ito ōti ininiā, kākiti !auaika. Ipoiāotakari iua ōti, kotxi itiretana kākiti imereēkini.

²³ —Iuasaakiko āti: “Ia kiki Teoso mereēkiti aiātapakiti inakari,” inakasaakii, !hāuikapiri. Ātipekana: “Ikira Teoso mereēkiti inakari,” inakasaakii, !hāuikapiri. ²⁴ Kotxi apokako kākiti paxirari kamakari, “Teoso mereēkiti hiātapakitino nota,” inakari, “Teoso sākire sāpiretakari nitxaua nota,” inakari. Ninoa kamariko posotiiretxi kākiti tsorikitaātini ĩkapani. Inirekarina kākiti Teoso mereēkini imisirienetinina. ²⁵ Hīkenakota. Nōtākikai hīte ikara inakari apokini ōti apisa.

²⁶ —Hīte sāpiretikosaaki: “Hīkenakota. Teoso mereēkiti aiātapakiti āparaā makipakaniātaāpekarari,” hinikosaaki, !hīsipe iuaā. Hīsāpiretikosaaki: “Iriko ākirari iua,” hinikosaaki, kona hāuikapiri. ²⁷ Kotxi nota hītari iaxitikiri nikanapiriākasaaki, !ikara atokoni nitxa. Mēkokari atoko itxa nota hītari iaxitikiri nikanapiriākasaaki, kotxi mēkokari atokatxi pokīkinimoni imēkoka, isapitipo atokatxi ereēkokinimoni, ininiā ikinimane itikariko. Iua atokokana nota hītari iaxitikiri napokini. Ikinimane itikanoko nota. ²⁸ Aātamatakasaakiri maiori apotiitiniua, aimarotari ipīkari iuaātaā auini. Iua atokokana nota kanapiriākasaaki, ikinimane imarotari napokini.

Kākiti Itari Iaxitikiri Kanapiriini

(Marko 13.24-27; Arókasi 21.25-28)

²⁹ Xesosi sāpirenauatapanika:

—Apikomoni nisāpiretai nikanapiriini pirena. Iua inikoriākori napaka atoko, atokatxi piākako. Kasiri kona ponikaikako. Iōriki iaxitikero irikako. Iaxiti iōriki auiniātaā auakari iakeēkatakako. ³⁰ Iuasaaki Teoso takaōtxikare auako iaxiti, nota hītari iaxitikiri kaiamapeka uai nikanapiriini himarotini ĩkapani. Ikara atoko inakasaaki, ikini kākiti itixi auakani txiapatako, kotxi ninoa atapanoko nota kākiti itari iaxitikiri katxiāri āki nikatzakaāpotini. Nitapararitika napoākatakako, kotxi ikinimane auīte nitxauako iuasaaki. Niotximerekata nikatzakaāpota. ³¹ Okenakotaākako koitxi mitaro, trōpeta inakoro. Iuasaakipekako niokanatanana ninitiriakori itixi iaōka kākiti Teoso mereēkini apotiitakani ĩkapani.

Piko Mina Pirena

(Marko 13.28-31; Arókasi 21.29-33)

³² Xesosi sãpirenauatapanika:

—Nisãpiretai sãpirenatxi atão inakari oerekiko, piko mina pirena, nikanapiriini api-ata himarotini ïkapani. Pooïoporipeka onakasaaki, otomorekasaaki, “Kamoï apokanapanoka,” hïtxa. ³³ Iua atokokana, ikara misirikaretxi mixikanani nisãpiretakiti hïtikasaaki, himarotapekariko nota kaiama kanapirikapeka ninini. ³⁴ Ia nisãkire atão. Itixi auakani !ixipoka ïkinipoko nisãpiretakiti mapokakani apisa. ³⁵ Iaxiti xipokapitikako. ïkoraxiti apaka xipokapitikako. Iuaritika nota sãkire !ixipoka.

Kãkiti !Imarotari Xesosi Apokini Manapi

(Marko 13.32-37; Arókasi 17.20-37)

³⁶ Xesosi sãpirenauatapanika:

—Kãkiti !imarotari ikara õti, nota hïtari iaxitikiri nikanapiriini õti. Teoso nitiriakori iaxitikini apaka !imarotari ikara õti. Nirinanira imarotari. ³⁷ Nota hïtari iaxitikiri nikanapiriãkasaaki, kitzakapirïka Noee auakasaaki atoko itxako. ³⁸ Xirataãtxi apisa ïkinimane nipokota, iãta itxa. Kiki, sito ïtaniriuata. Ikara atokokanera itxa Noee maporo ãki iereëtini õti. ³⁹ Ikara apisa !imarotarina ipininina tïkane. Mokatanitika xirataãtxi apoka, ïkinikana xipoka itxana. Nota hïtari iaxitikiri nikanapiriãkasaaki, iua atokokanerako itxa, ininiã iposope hïtxako.

⁴⁰ —Iusaaki nikanapiriini õtisaaki, ipi kiki parïkauanãta kikio. Teoso nitiri iaxitikiri anikariko ãti, ãti kaikota itxako. ⁴¹ Ipi sito atarokiri kamakani, ãto anikaãkako, ãto takanapaãkako. ⁴² Ininiã iposope hïtxako, kotxi kona himarotari hïauïte kanapiriini õti. ⁴³ Hïxinikariko. Kaapokori imarotaãkamariko kïtiriri apokini õti, !imakamako. ! Auiritamariko kïtiriri anikiniri itii. ⁴⁴ Kïtiriri apoka kãkiti miãtapakinitipanika. Iua atokokanerako nota apokako himimarotakinitipanikarako. Ininiã iposope hïtxako nota hïtari iaxitikiri hiãtapini —itxa Xesosi sãkire.

Nitiritxi Erekarï, Nitiritxi Maerekati Pakini

(Arókasi 12.41-48)

⁴⁵ —Ininiã Teoso nitiriakori erekarini hïtxauako. Nisãpiretai nitiritxi kimaroreri inakari, kotxi iua kïpitari ipatrãote sãkire. Iuakara ipatrãote paniãta, apanakini initiriakori inïkatini ïkapani. Isikakienatana ipatrãote nitiriakori, nipokori sikiko manapi. ⁴⁶ Iua initiri poxokoniuata ipatrãote paniãtakiti iaõka ikaminiã, ipatrãote apokasaaki iposope itxa. ⁴⁷ Atãopitikara nitxai hïte. Iua patrão paniãtariko iua initiri ïkinika inakiti inïkatini ïkapani. ⁴⁸ Nitiritxi maerekatipekana xinikari: “!Katimari ikanapiriã nipatrãote,” itxa. ⁴⁹ Ininiã apanakini nitiritxi ixiroka. Inipokota, iãta poãtakanikata. ⁵⁰ Ininiã ipatrãote kanapiriãko imiãtapakinitipanika. Ikanapiriãko initiri mimarotakinitipanika. ⁵¹ Ininiã ipatrãote xirokitatariko aãpitsaã. Iposo atoko imisiritaãkako maerekanikata, “Erekapitikaua ate,” inakanikata. Iuaã kãkiti txiapata, akatsatsiriïtaua ãtipirika. Ininiã ikara nitiritxi maerekati atoko kona hïtxape —itxa Xesosi sãkire.

25

Tesi ãtokoroakoro Pirena

¹ Xesosi sãpirenauatapanika:

—Ia nisãpirena oerekai Teoso auïtetxi ininiãua. Tesi ãtokoroakoro kosekari tirikapi. Isana kimaporiã. Iãtaparina ipatrãotena. Iua inapanikako kiinirimoni ïtanorouatini ïkapani. ² Sïko ãtokoro kiïkiterini, sïko miïkiteni. ³ Miïkiteni anikari tirikapi koana, txamari !anikarina tirikapiã. ⁴ Kiïkiterini anikari tirikapi koana. Apaka anikarina tirikapiã. ⁵ Ipatrãotena !katimari apokini. Ininiã itaponoka ininiãna, imakanãtana.

⁶ —Apanïkanõka ikenakotarina: “Apokanapanoka. Hïsapoka. Hãpiãkatari.”

⁷ —Ininiã ãtokoroakoro õkitikaua, tirikapi iopotokaka, sa itxana. ⁸ Ninoa miïkiteni amanaãri kiïkiterini tirikapiãte, kotxi miïkiteni tirikapite oakaarita.

⁹ –Kiikiterini apakapapiretana: “Kona. Tirikapiã ate nakiti !apakata hïte ïkapani. Ate ïkapaninokara apakata. Hïsa tirikapiã vëtxitakarimoni. Hiamotariko.”

¹⁰ –Ininiã ninoa miikiteni sari tirikapiã iamotinina. Ninoa sikasaaki, ipatrãotena apoka. Ätokoroakoro iposope inakani ïroã iuakata aapokotxi äki ïtanorouatakari kiiniritiã. Itore totaãka.

¹¹ –Eereka ätokoroakoro tirikapiã amotakani kanapiriã. Ninoa akirita: “Patrão, patrão, pimatakakinaua itore aïroini ïkapani,” itxana.

¹² –Ipatrãotena apakapapireta: “Hïsipeka. Atão nisãpiretai. !Nimarotai hïte.”

¹³ Xesosi sãkirauata:

–Erepaniko. Iposope hïtxako, kotxi !himarotari nota hïtari iaxitikiri kanapiriini òti. ! Himarotari amonikitaauako napokini –itxa Xesosi.

Ipi Äti Pakini Nitiritxiakori

(Arókasi 19.11-27)

¹⁴ Xesosi sãpirenauatapanika:

–Nikanapiriini ia atoko itxapaniko. Kiki aiamatapeka òtakoxiti äti itixitimoni isini ïkapani. Ininiã akiritari initiriakori. “Hinïkatariko ikini nitii,” itxana. ¹⁵ Isikari initiri apia imaroretakari txineiro ota sïko mio. Äti initiri isika txineiro ota ipi mio. Äti initiri poiãoka imarotakari ätika mio txineiro ota isikari iua. Eereka sipe itxa.

¹⁶ –Sïko mio apakapakari amotari tiitxi, eereka vëtxita itxari. Ikara atoko ininiã apakaparo txineiro ota tesi mio. ¹⁷ Iua ipi äti mio apakapakari iua atokokana itxa. Iua apakaparo ipi ipi pakini mio txineiro ota. ¹⁸ Iua ätika mio txineiro ota apakapakari, ikisakari kipatxi, taka itxaro txineiro iua aariko äki. Ikatáro ipatrãote txineirote.

¹⁹ –Eereka okananixiti inaka atoko ipatrãotena kanapiriã. Akiritana: “Kiãtokopa hïtxataro nitxineirote?” itxana. ²⁰ Iua sïko mio apakapakari minari tesi mio. Iua sãpiretari ipatrãote: “Patrão, pite sikano sïko mio txineiro ota. Patamata. Napakapari apikomoni sïko mio txineiro ota pite ïkapani,” itxa.

²¹ –Ipatrãote apakapapiretari: “Erekapitikai pite. Erekarit nitiritxi pitxaua. Erekarit pinïkatiniro nitxineirote. Erekapitikari pinïkatiniro poiãoka nisikini. Ininiã nauiritaiko itomaneri pinïkatini. Ininiã pipoxokoniuatako notakata,” itxa.

²² –Iua ipi mio ota apakapakari apoka. Iminaro ipi ipi pakini mio. Isãpiretari ipatrãote: “Patrão, pite sikano ipi mio txineiro ota. Patamata. Apikomoni nota apakaparo ipi mio txineiro ota pite ïkapani,” itxa.

²³ –“Erekapitikai pite. Erekarit nitiritxi pitxaua. Erekapitikari nitxineirote pinïkatini. Erekarit poiãoka pinïkatini. Ininiã itomane nitakanapako pinïkatini ïkapani. Ininiã pipoxokoniuatako notakata,” itxa.

²⁴ –Eereka iua ätika mio txineiro ota apakapakari apoka. Iua sãpiretari ipatrãote: “Patrão, nimarotai pite. Pataparaxinirei pite. Pite amotari pikiena, kotxi kona pite takarauata. Pite apari pikiena pimaparïkauatakaniãtaã. ²⁵ Nipïkarauatiniã, nikipataro pitxineirote kipatxi äki. Patamata. Oia pitxineirote,” itxa.

²⁶ –“Nitiritxi maerekati iareri pitxaua pite. Pimarotari niamotiniri nikiena, kotxi !nitakarauata. Pimarotari nota apari nikiena nimaparïkauatakaniãtaã. ²⁷ Ikara atoko ininiã, pimanirekakaniãri piparïkauatini, kinirepa kona pisikatari nitxineirote pãkomoni? Pisikaãkamaroko, napakapamaroko apikomoni nitxineirote nikanapiriãkasaaki,” itxa.

²⁸ Ininiã äti ipaniãta:

–“Pimakatxakariko iua mio ätika mio auakiti. Tesi mio txineiro ota auakitimoni pisika. ²⁹ Kotxi apikomoni isiãkako iua itomaneri auakiti, ininiã apiata auinariko iua. Iua poiãoka auakiti, inakito mixirikaãkako. ³⁰ Ia ninitiri iareri hõka mapara piãkatximoni. Iuaã kãkiti txiapata. Akerakitatsiriãta itsii xika.”

Ikinimane Apotiãtaãkako Xesosi Apisatoõ

³¹ Apikomoni Xesosi sãpirenauata:

—Nota hõtari iaxitikiri nikanapiriãkasaaki auõtetxi ninakasaakia, ikinika Teoso niritiakorikata, niitopãkako auõtetxi itopanere nopini. Peerekari iusaaki. Ikinimane paxitanoko nota. ³² Ikini uãkati kãkiti apotiitaãkako nota apisatoõ. Iusaaki nikaiarik-itatanako ninoa. Soti auõte, kapra pakini piratakari ipiraakori koketakaniau ikaiarik-itatini atokokanera, nota hõtari iaxitikiri kaiarikitatana ikinimane kãkiti. ³³ Pirãtxi piratakari takiniri soti auõte ikikomoni, itakiniri kapra isanaremoni, iua atokokanera nota hõtari iaxitikiri takari kãkiti erekarini nikikomoni. Kãkiti maerekani nitaka nisanaremoni.

³⁴ —Eereka nota kãkiti auõte txanako ninoa kãkiti erekarini nikikomoni auakani: “Niri sikari erekari hõtemoni. Hina. Hõõroã auõtetxi nininiãtaãua. Ia auõtetxi nininiãtaãua ma-iamatapeẽkaika hõte ãkapani itixi kamikosaakipeka. ³⁵ Mitxipeka ninatxitakasaaki, hõte sikakienatapekano nota. Niposonatakasaaki, ãparaã hõsikapekano. Åti itixiti nãkasaaki, hõte apakapapekano nota. ³⁶ Nimamãkanisaaki, mãkatxi hõsikapekano. Namianatakasaaki, hinãkatapekano. Kateia ãki nauakasaaki, himotikaẽtapekano. Ininiã hõõroã,” nota kãkiti auõte txanako kãkiti erekarini.

³⁷ —Ininiã kãkiti atão inakari kamakani apakapapiretariko: “Apiananiri, kirisaakipa pinatxitakasaaki, asikakienatai? Kirisaakipa piposonatakasaaki, ãparaã asikai?

³⁸ Kirisaakipa åti itixiti pãkasaaki, aãpakapai? Kirisaakipa pimamãkanisaaki, mãkatxi asikai? ³⁹ Kirisaakipa pamianatakasaaki, anãkatai? Kirisaakipa kateia ãki pauakasaaki, amotikaẽtai?” itxanonako nota.

⁴⁰ —Ininiã nota kãkiti auõte apakapapiretanako: “Atãopitikara nitxai hõte. Kãkiti poiãori, nisãkire auõãkari, hõtiretiniã, iusaaki nota hõtiretini atokokana hõtiretari,” nitxanako ninoa.

⁴¹ —Iusaaki nitxanako nisanaremoni auakani: “Hõsipeka. Teoso misiritaiko hõte, kotxi !hõõpitari iua sãkire. Hõsipeka arikatxi maxipokatimoni. Teoso kamari iua arikatxi, Satanasi misiritikoãtaã tãkane, Satanasi nitiriakori misiritikoãtaã tãkane. Hõsipeka iuamoni.

⁴² Kotxi ninatxitakasaaki nipokori !hõsikano. Niposonatakasaaki, ãparaã !hõsikano. ⁴³ Åti itixiti nãkasaaki, !hinirekano haãpoko napokini. Nimamãkanisaaki, kona mãkatxi !hõsikano. Namianatakasaaki, !hinãkatano. Kateia ãki nauakasaaki, !himotikaẽtano,” itxanako kãkiti maerekani.

⁴⁴ —Ininiã ninoa apakapapiretariko: “Apiananiri, pinatxitakasaaki, piposonatakasaaki, pamianatakasaaki, pimamãkanisaaki, kateia ãki pauakasaaki, åti itixiti pãkasaaki, kirisaakipa ate !apakapai?” maerekani txanoko nota.

⁴⁵ —Ininiã nota kãkiti auõte apakapapiretanako ninoa: “Atãopitikara nitxai hõte. Himanirekakanisaakiri hõtiretiniri kãkiti poiãori nisãkire auõãkari, iusaaki !hinirekari nota hõtiretini,” nitxanako ninoa.

⁴⁶ —Ininiã Teoso iokanatanako ninoa maerekani kamakani misiritikoãtaã. Iuaãtaã ninoa misiritaãkapikako. Imisiritikona kona xipokaikako. Kãkiti atão inakarinko kamakani auapininiika imaxipopekaniika Teosokata —itxa Xesosi.

26

Xesosi Okaenetiko Pirena

(Marko 14.1-2; Arókasi 22.1-2; Xoõo 11.45-57)

¹ Ikara inakari isãpiretaka atoko, Xesosi misãkiretana imoianariakori:

² —Hõte imarotari ipi õti napaka atoko aua Pãskoa inakori kiiniriti. Iua kiiniriti auakasaaki nota hõtari iaxitikiri nisikaãkako nimokaiakariakorimoni. Aamina ãpiriãmitakari nopini nitakaãkako. Iua atoko ipina nitxako —Xesosi txana imoianariakori.

³ Iusaaki sasetotxi auõteakori, kaiõkatsopareriakori, kiomãtxiakori pakini apotiitaua. Sasetotxi auõte apiatakari Kaipasi inakori aapoko ãki apotiitauana. ⁴ Imapapiretarina Xesosi imaãkinina ãkapani. Inirekarina Xesosi imaãkinina apanakini mimarotakinitika. Imisãkiretakakana Xesosi okinina ãkapani.

⁵ —Kiinirisaaki ! amaïkapaniri. Amaïkiniãri, apanakini kãkiti naiatamaua ate — itxakakana.

Sito Kamariãro Mïkaro
(Marko 14.3-9; Xoão 12.1-8)

⁶ Xesosi auanãta aapokotxi Petãnia inakoriãtaã. Isari Simão inakori aapokomoni. Iua Simão mitxi amianatakari, maere matati. Eereka erekapekari. ⁷ Simão aapoko Xesosi auakasaaki, sito apoka iuamoni. Ominari kopitipaki kai kamakori, kai arapãstiro inakori. Kopitipaki xãpoka kamariãro. Oa pakaronero. Xesosi nipokonãtakasaaki, oa sito kitakaro kamariãro ikiiã.

⁸ Imoianariakori itikari Xesosi kiiã okitakiniro, ininiã ninoa naiataua:

—Kinirepa oa ioanatataro kamariãro? ⁹ Kinirepa kona ovêtxitataro? Ovêtxitaãkamaroko oãpakapamaroko txineiro ito, matxineirotenimonikari osikini ïkapani —itxakakana.

¹⁰ Xesosi imarotari ninoa ikara atoko ininina.

—Kinirepa homanatataro oia sito? Erekari okaminano notamoni. ¹¹ Auapikanako matxineiroteni hïtekata. Kona nota auapani hïtekata. ¹² Oia kitakaro kamariãro nikiiã, nota iposope ninini nikatiko apisa. ¹³ Atão nisãpiretai hïte. Teoso iokanapirena erekari sãpiretikoãtaã ikini itixiti, isãpiretaãkako apaka oia sito kitakiniro kamariãro nikiiã, ininiã kãkiti ikini itixiti auakani xinikapikaro oa —Xesosi txana ninoa.

Xotasi Sari Sasetotxi Auïteakorimoni
(Marko 14.10-11; Arókasi 22.3-6)

¹⁴ Eereka Xesosi moianari Xotasi Isikariotxi inakori sari sasetotxi auïteakorimoni.

¹⁵ —Xesosi nisikiniãi hïtemoni, kiripa hïte sikano nota? —itxana ninoa.

Ininiã ninoa:

—Asikaiko trïta txineiro ota pirata kamakoro —itxana ninoa.

Ininiã ïkitxitarina. ¹⁶ Eereka Xotasi iãtapari Xesosi poiãonoka kãkitikata auakasaaki, imïkapiritiniri ïkapani.

Pãskoã Kiiniriti Kamiko
(Marko 14.12-21; Arókasi 22.7-13)

¹⁷ Pão miãtiãkati nikiko kiiniriti potarikini õti, Xesosi moianariakori apoka iuamoni.

—Namonipa ate maiamatari Pãskoã kiiniriti pite ïkapani? —itxarina iua.

¹⁸ —Hïsa sitatximoni. Nisãpiretakiti iaõka hïnitari kiki. Hãpokasaakiri, hïtxariko iua: “Koerekareri txai, ipinini tïkane kaiamapeka. Ikamariko kiiniri Pãskoã inakori pite aapoko imoianariakorikata,” hïtxako.

¹⁹ Ininiã imoianariakori kamari Xesosi paniãtakiti iaõka. Imaiamatari ikinika kiiniri ïkapani.

²⁰ ïkanõkapeka inakasaaki, Xesosi imoianariakorikata topãka inipokotinina ïkapani.

²¹ Inipokotakasaakina, Xesosi txana:

—Atão nisãpiretai hïte. ãtika hïte sauaki mïkapiritanoko nota.

²² Ininiã imoianariakori tsorïkaãta. Iteene imatinaniuatana. ãti pimaãri:

—Apiananiri, atauako notakani?

Iua atokokana ãtipekana:

—Apiananiri, atauako notakani?

Ikara atoko itxanãtana ikinikana, ipimaaãpotinirina Xesosi. ²³ Ininiã Xesosi apakapapiretana:

—Ia tiitxiã notakata nikakari mïkapiritanoko. ²⁴ Nota hïtari iaxitikiri okaãkako. Teoso sãkire iõkatsopatakori sãpiretapekari nipinini tïkane. Nota hïtari iaxitikiri mïkapiritakari iteene misiritaãkako. Erekamariko maponaniãkatika inaãkamako.

²⁵ Ininiã Xotasi kamïkapirireri misãkiretari Xesosi:

—Koerekareri, atauako notakani?

Xesosi apakapapiretari:

—Ari, pitepitikara.

Xesosi Īto, Iarēka Pakini

(Marko 14.22-26; Arókasi 22.14-23; 1 Korīto 11.23-25)

²⁶ Inipokonātakasaakina, Xesosi kosekari komiri. Imisākiretari Teoso:

—Erekapitikari ia komiri pisikakiti atemoni —itxa.

Eereka imaxinīkitari, sika itxari imoianariakorimoni.

—Apakapa, nika hītxako. Ia niīto —itxana.

²⁷ Eereka ikosekari iākoanatxi iāriā auini. Imisākiretari Teoso:

—Erekapitikari ia iāriā pisikakiti atemoni —itxa.

Eereka sika itxari iākoanatxi ninoamoni:

—Hīkinika hiātariko. ²⁸ Ia niarēka xiketakariko makatxakariko kaiāopokori kākiti maerekani. Teoso sāpiretapekari kākiti ikamaenetakiti amaneri kākiti ĩkapani. Ia niarēka oerekari kākiti, Teoso kamapekari ikamaenetakiti. ²⁹ Atāo nisāpiretai. !Niātaikaroko ovapeē, Teoso auītetxi ininiātaāua nimapokakanisaaki. Iuaā napokasaaki niātari. Amaneri iāriāti niātako hītekata —itxana imoianariakori.

³⁰ Xipoka atoko ixikaretarina xikari Teoso ĩkapani. Eereka isana oxiratarimoni Oriva inakorimoni.

Xesosi Sāpiretari Petro Kipatiniri Iua

(Marko 14.27-31; Arókasi 22.31-34; Xoāo 13.36-38)

³¹ Iuaā Xesosi misākiretana imoianariakori:

—Ia ĩkanōkati hīkinika hīte takanapanoko nota, kotxi Teoso sākire iōkatsopatakori sāpiretapekari ikara atoko inakari. Itxari:

Nōkariko soti auīte piratakari, ininiā ikinika ipiraakori iarikitatako,

itxa Teoso sākire iōkatsopatakori. ³² Ininiā eereka nota nipinaāka atoko, iuaīkana nōkitikaākaua atoko, nisako hīte apisa Kariréiamoni —itxa.

³³ Ininiā Petro apakapapiretari:

—Nota !nitakanapai pite. Atxiīti ikinimane takanapai, iuaritika kona nota takanapai —itxa.

³⁴ Ininiā Xesosi:

—Atāo nisāpiretai. Ia ĩkanōkati patari sākirauatini apisapanikako, “!Nimarotari iua,” pitxanoko ipi āti pakinikata.

³⁵ Ininiā Petro:

—Ikara atoko !nitxapanii pite. Nikipatinii apisapanikamako, nipinamako.

Ikinika Xesosi moianariakori ikara atoko itxana.

Xesosi Misākiretiniri Teoso Xetsémani Inakoriātaā

(Marko 14.32-42; Arókasi 22.39-46)

³⁶ Eereka Xesosi sari imoianariakorikata Xetsémani inakoriātaā. Xesosi:

—Uai hīitopāka. Ikiraā nisako Teoso nimisākiretini ĩkapani —itxa Xesosi.

³⁷ Anikari Petro, Sepeteo anaakori ipi pakini iuakata isinina. Iuaā Xesosi tsorīkaānāta, imaromaxiretari. ³⁸ Imisākiretana ninoā:

—Nixinire imaromaxiretari. Iteene nimaxire, ininiā okaaritano. Uai hīkaikota. Araōkire hītxako —itxana ninoā.

³⁹ Apikomoni isa, pamaka itxa, misākireta itxari Teoso:

—Niri, atauako apakata pimakatxakiniri nimisiritiko akamoni ĩkari? Kona ninirekari natatsirauatini. Iuaritika pite nirekiniāri, ininiā nota apaka nirekari —itxari Teoso.

⁴⁰ Iuasaaki ikanapiriā ipi āti imoianariakori auiniātaā. Ninoā imakanāta:

—Petro, atauako kona hīte mīteenekari hītikapokotini āto oaranoka? ⁴¹ Erepaniko. Hinirekasaakiri maerekati hīkamini, !hīkamapiri. Araōkire hītxako. Himisākiretariko Teoso, ininiā !hīkamari maerekati. Kākiti xinire atxiīti !inirekari maerekati ikamini. Txamari kākiti ĩto tapara poiāoka, ininiā ikamari maerekati. Ininiā erepaniko —Xesosi txari Petro.

⁴² Iuaīkana isa apikomoni Teoso imisākiretini ĩkapani:

—Niri, pinirekiniāri natatsiitiniri nimisiritiko akamoni ĩkari, ininiā nikamapitikariko pinirekakiti —itxari Teoso.

⁴³ Iuaĭkana ikanapiriā imoianariakorimoni. Imakanātapanikana. Itaponoka itxana. Kona iposotarina ikoatinina. ⁴⁴ Iuaĭkana Xesosi takanapana, iuaĭkana ikanapiriā iuaātaākana. Iuaĭkana misākireta itxari Teoso. Mitxi atokokana itxa isākire.

⁴⁵ Iuaĭkana ikanapiriā imoianariakorimoni:

—Himakanātapanika? Hĭtomanātapanika? Nisikiko manapi apopeka. Nota hĭtari iaxitikiri nimĭkapiritaāka maerekanimoni nisikiko, inireĕkitina ĩkaminina ĩkapani.

⁴⁶ Hōkitikaua. Masipeka. Hātapa. Ikiraā ina nota mĭkapiritakari —itxana ninoa.

Xesosi Maĭkiko Pirena

(Marko 14.43-50; Arōkasi 22.47-53; Xoāo 18.1-11)

⁴⁷ Xesosi sākirauanātapanika inakasaaki, Xotasi, Xesosi mitxi moianari, apoka. Iuakata ina itomaneri kākiti, saasara mĭkani, piriri mĭkani pakini. Sasetotxi auĭteakori, kiomātxiakori pakini iokanatana ninoa. ⁴⁸ Iua Xotasi kamĭkapirireri sāpiretapekana ninoa:

—Iuapitipankarako napitxokapaniko. Himaĭkariko iua napitxokakiti.

⁴⁹ Xotasi apoka. Xesosimonipitipo isa.

—Ereĕkai koerekareri.

Eereka apitxoka itxari. ⁵⁰ Ininiā Xesosi txari Xotasi:

—Nitiretakiti, pikamariko pinirekakiti. Nauiritai —itxari.

Iuasaakipeka Xotasikata sikani sakata Xesosimoni, maĭka itxarina. ⁵¹ Āti Xesosi moianari kosekaro saasara. Isuaaākatari sasetotxi auĭte apiatakari nitiri. Itsotakāĭpitatari.

⁵² Ininiā Xesosi txari:

—Pitaka saasara mĭtxi oāuiniātaā. !Pineenamauatape. Ikeekotxi himaĭkiniā, āti ōti hĭpinako ikeekotxi xika. ⁵³ !Pimarotari niposotiire. Nota nirekiniāri, nakiritari niri moianatinino nota. Nakiritiniāri, iuasaakipeka iua iokanatariko seĭ mio initiriakori nota imakatzakinina ĩkapani. ⁵⁴ Kona nakiritari niri, kotxi Teoso sākire iōkatsopatakori sāpiretapekari nimaĭkiko tĭkane ia atoko inakari.

⁵⁵ Iuasaaki Xesosi misākiretana iuamoni ĩkani:

—Kinirepa himinari saasara, piriri pakini himaĭkinino ĩkapani? !Kiĭtirino nota. !Kikeekono nota. Ikiniōtika niitopāka Teoso misākiretiko aikoti āki noerekinii hĭte. Iuasaaki kona himaĭkano. ⁵⁶ Ia atoko himaĭkano, kotxi kitxakapirĭka Teoso sākire sāpiretakani iōkatsopatapekari ia atoko himaĭkinino. Ininiā Teoso sākire iōkatsopatakori iaōka uatxa apokapeka —itxa Xesosi. Iuasaakipeka Xesosi moianariakori asikari iua, miteka itxana.

Xesosi Xoteo Auĭteakori Apisatoō

(Marko 14.53-65; Arōkasi 22.66-71; Xoāo 18.12-14, 19-24)

⁵⁷ Ninoa Xesosi maĭkakani anikari Xesosi Kaipasi aapokomoni. Iua Kaipasi sasetotxi auĭte apiatakari itxaua. Iuaātaā kaiōkatsopareriakori, kiomātxiakori pakini apotitapekaua iuasaaki. ⁵⁸ Ninoa anikasaakiri Xesosi, Petro sari Xesosi tikini. Ikira atoko auāāponāta. Sasetotxi auĭte apiatakari aapoko takote isa. Īroā pirikere āki. Iitopāka Kaipasi nitiriakorikata. Kiatokopa inaākapani Xesosi, ininiāra isa Xesosi tikini imarotiniiri ĩkapani.

⁵⁹ Kaipasi aapoko āki Sasetotxi auĭteakori, kiomātxiakori, ikinika Xoteo auĭteakori pakini nitana kākiti aāpirena kamakani Xesosi okinina ĩkapani. ⁶⁰ Itori kākiti sāpiretari aāpirena Xesosi ikamapiretinina. Txamari ixika !auari Xesosi okinina ĩkapani.

Eereka apokana ipi aāpirena kamakani. ⁶¹ Ninoa txari:

—Ia kiki txari: “Nota posotari aiko Teoso misākiretiko nirikini. Ipi āti ōtisaaki niposotari iuaĭkana nōkitikiniri,” itxa isākire.

Kona atāo ninoa sākire. ⁶² Sasetotxi auĭte apiatakari ōkitikaua.

—Kona papakapapiretatari pitemoni apoĭrauatakani? Atāokani piposotatari ikara atoko pikamini? —itxari Xesosi.

⁶³ Xesosi !kasākireri. Ininiã sasetotxi auïte apiatakari iuaïkana misākiretari Xesosi:

—Uatxa nipimaãi Teoso mipïkati apisatoõ. Atãonani pisãpiretaua. Pite, Teoso mereëkiti pitxataua? Teoso ãkirikai pite? —itxari Xesosi, kotxi inirekari Xesosi kerokiniri isãkire.

⁶⁴ —Ari, iuapitikanano. Nisãpiretaiko hïte hïkinika. Hãtamatariko kãkiti itari iaxitikiri topãkini Kaposotiireri kikomoni. Hãtapariko kãkiti itari iaxitikiri uai apokaãpotini katxiãri ãki —Xesosi txana ninoa.

⁶⁵ Sasetotxi auïte apiatakari kenakotari ikara Xesosi sãkire. Iuasaakipeka iua mat-sorãkari imãka, kotxi kona xatiki ipotxitari Xesosi sãkire.

—Maerekati isãkire: “Teoso ãkirirano,” itxa. !Anirekaikari apanakini kamapiretiniri Xesosi. Uatxaika hïkenakotapekari isãkire maerekati. ⁶⁶ Kiãtokopa atxatari Xesosi? —itxana ninoa.

—Ixika auapeka ipinini ïkapani ininiã uatxa okaãkapitikako —ninoa txari iua.

⁶⁷ Eereka ikiisokatoõtarina. Iãsokarina. Apanakini aritoõtari Xesosi.

⁶⁸ —Pite Teoso mereëkiti pininiãua, pisãpiretaua, kipa aritai? —itxarina iua.

Inapetarina.

Petro Kipatari Xesosi Imarotini

(Marko 14.66-72; Arókasi 22.54-62; Xoão 18.15-18, 25-27)

⁶⁹ Iuasaaki Petro topãkanãta mapara pirikeri ãki. Åtokoro Kaipasi nitero sari iuamoni.

—Pite Xesosi Kariréiakiri moianaripitikanarai —otxari iua.

⁷⁰ Txamari iua kipatari ikinimane apisatoõ.

—!Nimarotari ikara atoko pinanãtakiti.

⁷¹ Ininiã isa pirikeri ïroãnakikomoni. Iuaã ãto ãtokoropekana Kaipasi nitero atamatari iua. Ininiã osãpiretana kãkiti iuaã auakani:

—Xesosi Nasareekiri moianaripitikara ikira —otxa.

⁷² Iuaïkana ikipatari:

—Teoso imarotari iua kiki nimimarotakani —itxa.

⁷³ Eereka païtiki atoko kikiãkini iuaã auakani sari Petromoni:

—Pite atãopitika iua moianaripitikanarai, kotxi pisãkire ipinimoni. Kãkiti Kariréiakiri sãkire atokokana, Xesosi sãkire atokokana pitxa pite sãkire —ninoa txari Petro.

⁷⁴ Ininiã Petro apakapapiretana:

—Atão nisãkire minakaniãua Teoso misiritanoko. Nisãkire atãopitika. !Nimarotari iua kiki —itxama.

Iuasaakipeka patari sãkirauata. ⁷⁵ Ikara ikenakotakasaaki, Petro xinikari Xesosi sãkire, kotxi mitxiipe Xesosi txari iua: “Patari sãkirauatini apisapanikako, ipi ãti pakinikata, ‘!Nimarotari iua,’ pitxanoko.” Ininiã Petro sipeka. Itxiapakata.

27

Xesosi Pirato Apisatoõ

(Marko 15.1; Arókasi 23.1-2; Xoão 18.28-32)

¹ Katimatinïkata sasetotxi auïteakori, kiomãtxiakori pakini apotiitaua. Imisãkiretakakana:

—Kiãtokopa atxatari Xesosi aõkini? —itxana.

² Eereka iaxirikãkitakarina Xesosi, anika itxarina Homano auïte Põsio Pirato inakorimoni, sikanapa itxarina.

Xotasi Ipinini

(Åtosi 1.15-19)

³ Xotasi, Xesosi mïkapiritakari, kenakoenetakasaakiri Xesosi ipinini tïkane, maerekaxiniretinoka itxa, kotxi iuaka sikari Xesosi imokaiakariakorimoni okiko tïkane. Iuaïkana isipikaro trïta txineiro ota pirata kamakoro sasetotxi auïteakori, kiomãtxiakori pakinimoni.

4 —Nota kamari maerekati. Nimĩkapiritari Xesosi. Ixika !auari iua ipinini ĩkapani — itxana ninoa.

Ininiã ninoa:

—Pite kamakiti xikakara. Pitekara sikaua ate Xesosi.

5 Ininiã Xotasi okaro txineiro ota Teoso misãkiretiko aikoti ãki, eereka isipe ãtiãtaã. Iuaãtaã iuaka iaxirikanokitapeua, aamina poriã iaxirikaua, arõka, ipĩpe itxa.

6 Teoso misãkiretiko aikoti ãki sasetotxi auĩteakori kosekaro oa txineiro.

—Oia txineiro kiki okiko ĩki. Ia xika ate !auritaãka aãpotiitiniro oia txineiro ãto txineirotikata Teoso misãkiretiko aikotiãkero. 7 Kiãtokopa atxataro oia txineiro? — itxakakana.

Eereka ninoa imarotape. Iamotarina kikio, tiitxi kamakari kikiote, Xoteo minakaniua ikatiko tĩkane. 8 Oa txineiro kiki okiko ĩki xika, Xesosi okiko ĩki xika, iua akauari takauãkataãka “Arẽkatxi Akauariti” inaãka. Uatxa akiritaãkapanika iuaãtaã “Arẽkatxi Akauariti.” 9 Iua atoko ininiã, kitzakapirĩka Teoso sãkire sãpiretakari Xeremia inakori atão txari:

Isaeo auakani iĩkitxitari trĩta ota pirata kamakoro Teoso mereẽkiti okiko ĩkapani.

10 Eereka isikarona oa txineiro ota tiitxi kamakarimoni, ikikiote iamotinina ĩkapani, kotxi Teoso nirekari ia atoko ikaminina, itxa Xeremia kitzakapirĩka. Ininiã Xeremia sãkire iaõka apopeka iusaaki.

Xesosi Pirato Apisatoõ

(Marko 15.1-5; Arõkasi 23.1-5; Xoão 18.28-38)

11 Iusaaki Xesosi tima Homano auĩte Pirato inakori apisatoõ. Pirato pimaãri Xesosi:

—Pitekani Xoteoakori auĩte txataua?

—Ari, iuapitikarano —itxari.

12 Eereka sasetotxi auĩteakori, kiomãtxiakori pakini apoĩtari Xesosi. !Kasãkireri Xesosi iusaaki. 13 Ininiã Pirato txari:

—Atauako kona pikenakotatari apoĩtiniina?

14 Xesosi !kasãkireri, ininiã Pirato tsorĩkaãta. ãkixinireẽ iua:

—Kininiãpa !kasãkireri?

Xesosi Okiko Nirekiko

(Marko 15.6-15; Arõkasi 23.13-25; Xoão 18.38-19.16)

15 Ikini kiiniriti Pãskoa inakori, Homano auĩte sikakari ãtika kateia ãki auakari kãkiti nirekakiti. 16 Iusaaki aua kateia ãki auakari Pahapasi inakori. Ikinimane imarotari iua. 17 Itomaneri kãkiti apotiitakasaakiua, Pirato pimaãna ninoa:

—Ĩkiripa kateia ãki auakari hinireka nisikakini? Pahapasikani? Xesosi Teoso mereẽkiti inakorikani? —itxana ninoa.

18 Pirato imarotari Xesosi isikinina iuamoni ixikotinirina xika.

19 Iusaaki Pirato topãkanãta kãkiti misiritiko isãpiretini pakita ãki. Iusaaki ĩtanoro iokanapireta iuamoni.

—Maerekati !pikamape iua kikimoni, kotxi ixika !auari pokiniri. Erekari iua. Minipani nitaponetari iua kiki, ininiã maerekaxiniretinoka nitxa —otxari.

20 Mapara sasetotxi auĩteakori, kiomãtxiakori pakini misãkiretana kãkiti iuaãtaã apoti-itakaniua:

—Piratomoni hĩtxako: “Pisikakariko Pahapasi. Pokãkitakariko Xesosi,” hĩtxariko — itxana kãkiti.

Ininiã ninoa auikari isãkirena. 21 Eereka Pirato pimaãna kãkiti iuaã apotiitakaniua:

—Ĩkiripa kateia ãki auakari hinireka nisikakini?

Ininiã ninoa akirikata:

—Pahapasira.

22 —Kiãtokopa nitxatari Xesosi, Teoso mereẽkiti inakorima? —itxa Pirato.

Ikinikana apakapapiretana:

—Aamina ĩpiriãmitakari nopini pitokakitariko.

²³ Ininiã Pirato:

—Kixikapa? Maerekati !ikama —itxa.

Iuasaakipeka ninoa iteene akiripoakatana:

—Aamina ĩpiriãmitakari nopini pitokakitariko.

²⁴ Ininiã Pirato kona sãpiretaikari Xesosi isikakini, kotxi ninoa neenamauatanapanoka. Ikosekari ãparaã. Arokauakotaua ninoa apisatoõ.

—Na nota xikani ia kiki ipinako. Hĩte xikakara ia kiki ipina —Pirato txana ninoa.

²⁵ Ikinimane apakapapiretari:

—Atãopitikara. Misirikaretxi auiniã okiko xika, ate, amariteni pakini apakapariko iua misirikaretxi —itxana.

²⁶ Iuasaakipeka Pirato sikakari Pahapasi. Eereka ipaniãtari Xesosi xirokitatiko aãpitsaã. Eereka isikari Xesosi isotatonemoni aamina ĩpiriãmitakari nopini itokakitini-rina tĩkane.

Sotatoakori Napetiniri Xesosi

(Marko 15.16-20; Arókasi 22.63-65; Xoão 19.2-3)

²⁷ Ininiã sotatoakori anikari Xesosi ninoa auĩte aapokomoni. Iuaã akiritarina apanakini sotatoakori, ininiã ikinimane sotatoakori ãkitari Xesosi. Inapetarina.

²⁸ Imakatzakarina Xesosi mãka. Mãkatxi põkamarari ieretaka itxarina. ²⁹ Eereka itakarina saporieĩta kotipiaro kamakori ikiiã. Iuako ikikomoni taka itxari aãke. Ininiã itxĩkitakarina Xesosi auĩtetxi atoko ininiãua. Eereka ikapotoreẽkauana iua apisatoõ, napeta itxarina Xesosi:

—Aãũte —itxarina Xesosi inapetinina.

—Xoteo auĩtekai pite —itxarina.

³⁰ Ikiisokarina. Iua aãke ikosekana, arikiita itxapikarina. ³¹ Inapetarina, eereka imakatzakarina mãkatxi põkamarari. Iua nakiti imãka iuaĩkana ieretaka itxarina. Eereka mapara anika itxarina, aamina ĩpiriãmitakari nopini itokakitinirina ĩkapani.

Xesosi Tokakitaãka Aamina ĩpiriãmitakari Nopini

(Marko 15.21-32; Arókasi 23.26-43; Xoão 19.17-27)

³² Xesosi anikaãpotakasaakina, aõkitarina Sireni sitatxitikiri, Simão inakori. Ninoa paniãtari iua, Xesosi anikakiti aamina ĩpiriãmitakari, anikini ĩkapani, kotxi Xesosi ! iposotaikari anikiniri. Ininiã Simão anikari. ³³ Apokana Kóokota inakoriãtaã. Apanakini akiritari “Kiitãtatxi” inaãka akiritiko. ³⁴ Iuaã iãriãmoni ikoketarina pinĩtxi kipixiãri, sika itxarina Xesosimoni, Xesosi iãtini ĩkapani, imakini ĩkapani. Atapixiãtaãka atoko, !iãtari.

³⁵ Ininiã itokakitarina Xesosi aamina ĩpiriãmitakari nopini. Inaãka atoko ikamarina sarauatxi kai soroã. Sarauatxi kãiatakani apakapari Xesosi mãka. Kitxakapirĩka Teoso sãkire sãpiretakari sãpiretpekari ikara atoko inini tĩkane. Iua txari:

Ixanakarina nimãka. Sarauatxi ikamana nimãka apakapakani imarotinina ĩkapani.

Itxa Teoso sãkire sãpiretakari kitxakapirĩka. ³⁶ Sarauatxi xipoka atoko iitopãkana. Imoiaãrina Xesosi, kãkiti manikakaniri ĩkapani. ³⁷ Aamina ĩpiriãmitakariã ikii nopini itakarina iõkatsopatakori: “Xesosi, Xoteoakori Auĩte,” itxa iõkatsopatakori. Ikara xika okaãka Xesosi.

³⁸ Xesosi takote itokakitarina ipi kiĩtiririni aamina ĩpiriãmitakari nopini, ãti Xesosi kikomoni, ãti Xesosi sanaremoni. ³⁹ Kãkiti iuaã napakani napetari, nokonoko itxa kiitana. Maerekaeneti isãkirepitarina Xesosi:

⁴⁰ —Pite txari: “Aiko Teoso misãkiretiko niriãka atoko, ipi ãti õtisaaki iuaĩkana nõkitikari,” pitxa. Piteka pimakatzakaua. Pite Teoso ãkiri pinakasaakiaua, pikatzaka. Ikara atoko itxa sãkiretana kãkiti iuaã napakani. ⁴¹ Iua atokotxikana itxana sasetotxi auĩteakori, kaiõkatsoparerini, kiomãtxiakori pakini ikara atoko inapetarina Xesosi:

⁴² —Iua makananitapekari apanakini. Txamari iuaka !iposotari imakananitiniua. Iua Isaeo auakani auĩte ininiãua, iuaka imakatzakamauako. Ikatxakiniã, ate auikari iua

sākire. ⁴³ Iua auikari Teoso sākire. Maiātapani. Atauako Teoso nirekari imakatzakiniri iua uatxa, kotxi iua txari: “Teoso ākirirano nota,” itxa –itxana.

⁴⁴ Kūtiririni iuakata tokakitakoni apaka maerekaeneti isākirepiretarina Xesosimoni.

Xesosi Ipinini Pirena

(*Marko 15.33-41; Arókasi 23.44-49; Xoão 19.28-30*)

⁴⁵ Apaniāxiti itixi piāka. Ipi āti pakini oara ipiāka. ⁴⁶ Ipi āti pakini oarape kikatomipeka Xesosi iteene akirikata:

—Erii, Erii, aremaa sapakatani.

Ikara Epiro sākire. Ia atatsopatakari sākireē, “NiTeosone, niTeosone, kinirepa pitakanapano?”

⁴⁷ Kākiti iuaā auakani kenakotari Xesosi sākire. Ninoa uākatari akirinātiniri Eríasi.

⁴⁸ Ininiā āti miteka, mapoa atoko inakari iāka itxari iāriā katxioārimoni. Aāke mapotōkire taka, isirīka itxamari Xesosi iātini ĩkapani. ⁴⁹ Txamari apanakini:

—Kona pisikapiri. Atxiīti Eríasi makatzakari iua –itxana.

⁵⁰ Iuaīkana Xesosi iteene akirikata. Eereka iokanatarari ixinire Teosomoni, eereka ipīpe.

⁵¹ Iuasaakipeka mākatxi mata Teoso misākiretiko aikoti āki arōkakari tsorakita. Itano it-sorakita. Ixitipeka apoka. Mitxi iua mākatxi mata !auritari kākiti ĩroini Teosonani Auini Pakitaātaā. Itsorakitakasaaki, itixi iakeēkata. Kai mitari xoreka iuasaaki. ⁵² Apanakini akauari xoreka. Itomaneri kākiti ipīkani Teoso nakitiakori iuaīkana ōkitikapekaua. ⁵³ Osipikarina akauari. Xesosi iuaīkana ōkitikaākaua atoko, isana Xerosareēmoni, Teoso nakiti sitatxitimoni. Iuaā itomaneri kākiti itikana ninoa iuaīkana ōkitikakaniua.

⁵⁴ Sotato auīte, sotatoakori Xesosi moiaākani apaka, itikarina Xesosi ipinini. Imarotarina itixi iakeēkatini, ininiā iteene ipīkarauatana.

—Atāopitikara Teoso ākiri itxaua –itxana.

⁵⁵ Ito sitoākini ikira atoko atamanātari Xesosi. Kariréia tōpa Xesosi potorikasaaki ninoa sitoākini moianatarari iua. ⁵⁶ Maria Matarena inakoro iuaā aamina ĩpiriāmitakari ikira atoko auanāta apaka. Txiako, Xosee pakini inoro, Maria inakoro iuaā aua. Sepeteo anaakori inoro iuaā auanāta apaka.

Xesosi Ikatiko Pirena

(*Marko 15.42-47; Arókasi 23.50-56; Xoão 19.38-42*)

⁵⁷ ĩkanōka katxineiroteri Xosee inakori, Arimateia sitatxitikiri, apoka. Iua apaka Xesosi sākire auiākari itxaua. ⁵⁸ Isa Piratomoni. Xesosi ĩto amanaā. Ininiā Pirato paniātari isikiko. ⁵⁹ Ininiā Xosee anikari Xesosi ĩto. Mākatxi mataā iapirika itxari. Mākatxi mata amaneri arínio inakoriā iapirikari. ⁶⁰ Eereka taka itxari akauari āki. Iua akauari amaneri, Xosee kisakakiti kai auīte iriko. Ikamari iua akauari ipīkasaaki ikatiko ĩkapani. Xesosi ĩto iriko āki itaka atoko ikakanapiritari kai meraminapoari, itota itxari akauari iriko, sipe itxa. ⁶¹ Iuasaaki Maria Matarena inakoro, āto Maria inakoro apaka topākanāta akauari apisatoō.

Imoiaārina Xesosi Akauari

⁶² Iua ōti sesta veira, tomatiko ōti apisa. Iua ōti Xoteoakori parīkauatapitipo, tomatiko ōti imaparīkauatakani ĩkapani. Katimatinīkata sasetotxi auīteakori, pariseoakori pakini sari Piratomoni. ⁶³ Ninoa txari:

—Ate xinikari iua kamisirienereri sākire. Iua txari: “Nipīkasaaki eereka ipi āti pakini ōtisaaki iuaīkana nōkitikauako.” ⁶⁴ Pipaniātana pisotatoneakori ipi āti pakini ōti akauari imoiainina. Imamoiaākaniārina, imoianariakori ĩkanōka sari iuaā ĩto ĩtirīkinina. Ininiā eereka isāpiretarina kākiti: “Teoso ōkitikapekari iua. Iuaīkana auāki itxapeka,” itxamana ninoa imoianariakori. Ininiā ikara misirieneretxi apiatama eereka. Mitxiri misirieneretxi poiāoka –itxarina Pirato.

⁶⁵ —Ininiā hanikari sotatoakori akauari moiaākani tīkane. Hīsa. Hītotariko akauari sona —Pirato txana.

⁶⁶ Ininiã isana iuaã. Akauari sona iteene itotinina ïkapani. Itakarina Pirato takaõtxikare itore nopini. Sotatoakori iuaã kaikota. Imoiaãrina akauari.

28

Xesosi Iuaïkana Auãki Inini
(Marko 16.1-8; Arókasi 24.1-12; Xoão 20.1-10)

¹ Tomatiko õti xipoka atoko, tomïko ïkanõkapanika Maria Matarena, oa ãto Maria pakini sari akauarimoni.

² Ninoa saãpotakasaaki, katimaritika itixi iakeëkata itapararitika. Iuasaaki Teoso nitiri iaxitikiri katxaka. Ikatapakiritari kai akauari tore, topãka itxa iua kai nopini. ³ Itoõ atokatxi iotximere atoko itxa. Imãka mapoa saro atoko itxa. ⁴ Sotatoakori, akauari moiaãkani, kikinanaãkata, ipïkarauatinina. Irikana xitipeka. Ipïkani atokopeka itxana.

⁵ Eereka ninoa sitoakoro apoka akauari. Teoso nitiri misãkiretana:

—! Hïpïkarauatape. Nimarotari hïte nitanãtiniri Xesosi, aamina ïpiriãmitakari nopini tokakitakori. ⁶ !Auaika uai. Teoso õkitikapekari iua. Ikara iua sãpiretpekai hïte. Uai hina. Hãtamatarari ïto mitxi auiniãtaã.

Ininiã ninoa atamatarari.

⁷ —Katima hïtxako imoianariakorimoni hïsini ïkapani. Hïsaãpiretana: “Iuaïkana auapeka itxa Xesosi. Teoso õkitikapekari iua. Iua sari hïte apisapanika Kariréiamoni. Iuaã haõkitariko iua,” hïtxako ninoamoni. Ikara atoko nitxa nisãpirena hïtemoni —itxa Teoso nitiri.

⁸ Ininiã ninoa takanapari akauari. Ipïkareritikana, ieneniritikana isana. Imitekana Xesosi moianariakorimoni õkitikiniua isãpiretini tïkane. ⁹ Ninoa mitekaãpotakasaaki, ipix-inipokoriti Xesosi tokiã ninoamoni:

—Hïtepinini ina —itxana.

Ininiã ninoa kapotoreëkaua iua apisatoõ, maïkakitita itxarina.

—Peerekai. Apiananiri pitxaua —itxanãtana.

¹⁰ Ininiã Xesosi:

—Kona hïpïkarauatape. Nitariakorimoni hïsa. Hïsaãpiretana Kariréiamoni isinina. Iuaã aõkitaõnakõ nota —Xesosi txana ninoa Mariaakoro.

Ininiã ninoa sipe.

Sotatoakori Xesosi Akauare Moiaãkani

¹¹ Sitoãkini sikasaaki, ãtikaka sotatoakori akauari moiaãkani kanapiriã sitatximoni. Isãpiretarina itikakitina sasetotxi auïteakorimoni. ¹² Ininiã sasetotxi auïteakori, kiomãtxiakori pakini apotiitaua ikara ene ixinikinina ïkapani. Eereka isikarina itoro txineiro sotatomoni, atão imasãpiretakanina ïkapani apanakinimoni. ¹³ Ininiã sasetotxi auïteakori, kiomãtxiakori pakini txana:

—Hïtxariko apanakinimoni: “Xesosi moianariakori apoka ïkanõka aimakasaaki. ïtirïkarina Xesosi ïto,” hïtxako. ¹⁴ Hïauïte Pirato imarotakasaakiri himakini, ininiã ate misãkiretariko iua, ininiã kona himisiritaãka himakini xika —itxarina sotatoakorimoni.

¹⁵ Ininiã sotatoakori apakaparo txineiro, sãpireta itxarina kãkiti Xesosi moianariakori ïtirïkiniri Xesosi ïto. Ikara aãpirena iaripireta Xoteoakorimoni. Uatxa apaka ikara aãpirena auïãkapanika.

Xesosi Apoka Imoianariakorimoni

(Marko 16.14-18; Arókasi 24.36-49; Xoão 20.19-23; Átosi 1.6-8)

¹⁶ Õsi pakini Xesosi moianariakori sari oxiratarimoni Xesosi paniãtinimoni Kariréia tõpamoni. ¹⁷ Ninoa atamatarari Xesosi. Ikapotoreëkauana iua apisatoõ.

—Peerekai. Apiananiri pitxaua —itxanãtana.

Txamari ãtikaka kona iteene aukari iua Xesosi ininiãua. ¹⁸ Xesosi apoka ninoa takote, misãkireta itxana ninoa:

—Teoso txīkitakano itixine auakani auīte nininiāua. Itxīkitakano ĩkoraxiti auakani auīte apaka nininiāua. Ininiā ikinika posotiiretxi aua notamoni. ¹⁹Ininiā nipaniātai. Hīsako ikini uākati kākitimoni ikini itixitika. Hōerekana ninoa nisākire. Hīpatxisatana nisākire kīpitakani niri uākaā, imi uākaā, Erekarī Matamatakoti uākaā pakini hīpatxisatanako. ²⁰Hōerekanako ninoa ikinika nipaniātakiti ikaminina ĩkapani. Hīxinikariko ia. Nota ātipirika auako hītekata. Hītekata nauiniritika itixi xipokako —itxa Xesosi sākire.

MARKO

Xoão Kapatxisareri Sãpiretakiti
(Mateo 3.1-12; Arókasi 3.1-20; Xoão 1.19-28)

¹ Ia Xesosi Kristo iokanapirena erekari. Teoso ãkiri itxaua Xesosi.

² Teoso sãkire sãpiretakani iõkatsopatari ia:

Niokanatariko niokanapirena aniãkari kãkitimoni kimapori oeretini ìkapani pite uai apokini apisa.

³ Iua auako ãparaã makipakaniãtaã. Isãpirenauatako: “Hõeretariko kimapori Apiananiri apokini apisapanika. Itikaãpo erekari hìkamako iua napini ìkapani,” itxa iua.

Itxa Teoso sãkire iõkatsopatakorì kitxakapirìka.

⁴ Ikara atoko Xoão kapatxisareri ãparaã makipakaniãtaã aua. Ipatxisatakasaakiri kãkiti, isãpiretari ia pirena:

—Hìtakanapariko maerekati hìkamakiti. Hìpatxisataãkako. Ininiã Teoso makatxakariko maerekati hìkamakiti —itxa Xoão kapatxisareri.

⁵ Ikinimane kãkiti Xotéia auakani Xerosareë sitatxiti auakani pakini sari Xoãomoni isãkire ikenakotinina ìkapani. Ninoa sãpiretakasaakiri maerekati ikamakitina, ipatxisatana uini Xotão inakoriãtaã.

⁶ Xoão takari imãka kamero piti kamakori. Itakari ipakiomatare pirãtxi mata kamakori. Inikari txìtxiri. Mapaã itxima. ⁷ Iua txari kãkitimoni:

—Nota poiãori. Nota tikini apokako apiatakari. !Apakata nikapotoreëkiniua iua takote ikiti mata nimakatzakini ìkapani, kotxi nota poiãoka. Iua apiata. ⁸ Nota patxisatai ãparaãnokara. Iua patxisataiko Erekarì Matamatakotiã. Iuasaaki hìte apakapariko Erekarì Matamatakoti.

Xesosi Patxisatiko Pirena
(Mateo 3.13-17; Arókasi 3.21-22)

⁹ Iuasaaki Xesosi apoka Nasaree sitatxiti, Kariréia tõpamoni. Iuasaaki Xoão kapatxisareri patxisatari iua uini Xotão inakoriãtaã. ¹⁰ Xesosi kanìkiitakasaaki, iua itikari iaxiti takakini. Iuasaaki Erekarì Matamatakoti katxaka kamoã katxakini atoko. Iua nopini apoka. ¹¹ Iuasaakipeka Teoso iaxitikiri txari:

—Pite namarite, nitiretakiti, napokaerekatai, kotxi ninirekakiti pikama.

Satanasi Atamakaerekatiniri Xesosi
(Mateo 4.1-11; Arókasi 4.1-13)

¹² Iuasaaki Erekarì Matamatakoti iokanatarì Xesosi ãparaã makipakaniãtaã. ¹³ Iuaãtaã ikaikota koarëta õti. Iuasaaki Satanasi atamakaerekatari iua. Iuaãtaã auari kaxipirini kaneenamarini. Ininiã Teoso nitiriakori iaxitikini nìkatari Xesosi.

Xesosi Mipotorikiniri Iparìka Kariréia Tõpa
(Mateo 4.12-22; Arókasi 4.14-15)

¹⁴ Xoão kateia ãki takikosaaki, Xesosi sari Kariréia tõpamoni. Iuaãtaã isãpiretari Teoso iokanapirena erekari, Teoso auñtetxi ininiãua pirena. ¹⁵ Itxari:

—Teoso keto apopeka. Iua auñtetxi ininiua apokaãpotapeka. Ininiã hìtakanapariko himaerekani. Hãuikariko Teoso iokanapirena erekari —itxa Xesosi.

¹⁶ Xesosi tìpokota Kariréia poati tiniã. Iuasaaki atamatana ipi hetxi takakani, Simão Petro, itari Ætree pakini. Iua atamatana itakinirina hetxi. ¹⁷ Ininiã Xesosi txana:

—Uatxa masa notakata. !Himaikaikariko ximaki. Ætião hìparìka auako. Nisãkire hìsãpiretako kãkitimoni —itxa.

¹⁸ Ininiã iuasaaki ninoa takanapari hetxi, sa itxana Xesosikata.

¹⁹ Apikomoni ninoa saãpota. Itikana Txiako, itari Xoão pakini. Ninoa Sepeteo anaakori. Kanaua miramaneri ãki auanãtana iuasaaki. Hetxi iotsaãnãtana. ²⁰ Iuasaaki iua akiritana ninoa. Ininiã ninoa takanapari iri, iri nitiriakori pakini kanaua ãki. Eereka isana Xesosikata.

Kiki Maerekati Matamatakoti Auãtotakiti
(Arókasi 4.31-37)

²¹ Xesosi imoianariakorikata apoka Kapanaoõ sitatxiti. Ininiã tomatiko õtisaaki Xesosi sari aiko Xoteo apotiitiniãtaãua oerekarauatini ìkapani. ²² Iua sãkire kenakotakani tsorìkaãta, kotxi kona kaiõkatsoparerini atokoni litxa. Iua oerekakiti sãkiretxiti pataparari, kotxi !isãpiretari ãti koerekareri sãkire apanakini kaiõkatsoparerini atoko. Iuaka sãkirekara isãpireta.

²³ Iuasaaki aiko ãki Xoteo apotiitiniãtaãua aua kiki maerekati matamatakoti auakiti. Iua akiripoakata:

²⁴ —Xesosi Nasaree sitatxitikiri. Kipa pinireka atemoni? Pite ina ate pixipokini ìkapanikani? Erekarinoka kamakarii. Teoso nakiti pitxaua —itxa.

Ìkara atoko iua akiripoakata, kotxi iua maerekati matamatakoti pìkari Xesosi.

²⁵ Ininiã Xesosi itapararitika txari:

—Piotoka. Pitakanapariko ere kiki ìto.

²⁶ Iuasaaki maerekati matamatakoti iõkokaãtotari. Ikatxakasaaki, akiripoakata.

²⁷ Kãkiti iuaãtaã auakani tsorìkaãta. Iuasaaki imisãkiretakakauana:

—Kiripa? Atxiãti oerekakori sãkiretxiti amaneri apopeka? Iua sãkire kaposotiireri. Ipaniãtakiti maerekati matamatakoti kamapeka —itxanãtana.

²⁸ Ininiã ikara pirena iaripireta ikini Kariréia tõpati.

Xesosi Makananitiniro Simão Petro Imakiro
(Mateo 8.14-15; Arókasi 4.38-39)

²⁹ Ininiã Xesosi, Txiako, Xoão pakini takanapakasaakiri aiko Xoteo apotiitiniãtaãua, isana Simão, Ætree pakini aapokomoni. ³⁰ Iuasaaki Simão imakiro apoomata. Osirìkanãta. Ininiã ninoa sãpiretari Xesosi oamianare. ³¹ Ininiã Xesosi sari oamoni. Imaïkaro ouako. Õkitikaro. Iuasaakipeka oãpoomare !auaika. Ininiã opotorika oparìkauatini, ninoa kiena okamini ìkapani.

Xesosi Makananitinina Amianatakani
(Mateo 8.16-17; Arókasi 4.40-41)

³² Ininiã mapiãnikata kãkiti minana ikinipoko amianatakani, maerekati matamatakoti auãtotakini pakini iuamoni. ³³ Ininiã ikinimane iua sitatxi auakani apotiitaua aapokotxi tore takote. ³⁴ Ininiã Xesosi makananitana itomaneri amianatakani. Kaiãopokori amianari auakini imakananita. Apaka omitikana itomaneri maerekani matamatakoni. Iuasaaki !auiritana ninoa sãkirauatini, kotxi ninoa imarotari Teoso ãkiri ininiua Xesosi.

Xesosi Sãpiretiniri Teoso Sãkire
(Arókasi 4.42-44)

³⁵ Ìkanõkapanika mapiãpanika Xesosi õkitikaua. Itakanapari aapokotxi. Iuanoka sari kãkiti mauakaniãtaã iri iaxitikiri imisãkiretini ìkapani. ³⁶ Eereka Simão imoianariakorikata sari Xesosi initinina ìkapani. ³⁷ Ninoa apokasaakiri, itxana:

—Ìkinimane nitai —itxarina.

³⁸ Xesosi apakapapiretana:

—Masa ãtiãtaã kãkiti aapokomoni. Iuaã nisãpiretariko Teoso sãkire, kotxi ikara atoko itxa niparìka kãkitimoni. ³⁹ Xesosi sari ikini Kariréia tõpa. Aiko Xoteo apotiitiniãtaãua isãpiretari Teoso sãkire. Apaka omitikana maerekani matamatakoni kãkiti ìtoã auakani.

Kiki Maere Matati
(Mateo 8.1-4; Arókasi 5.12-16)

⁴⁰ Amianatakari maere matati apoka Xesosimoni. Ikapotoreëkua iua apisatoõ. Iua iteene amanaãri:

—Nimarotari, pinirekiniãri piposotari erekape pitxĩkitakinino —itxa.

⁴¹ Ininiã iuasaaki Xesosi iteene turetari iua. Itakari iuako iua nopini. Itxari:

—Ari, ninirekapitikari. Erekapekai uatxa.

⁴² Iuasaakipeka amianari !auaika. Erekapekari iua.

⁴³ Xesosi iokanatarari iua. Iuasaaki isãpiretari iua:

⁴⁴ —Kona pisãpiretapiri apanakini pitemoni nikamakiti. Uatxa merepanika pisa sase-totxiakorimoni. Poerekari piito ninoamoni. Eereka pikamariko Moisesini paniãtakiti. Ikara atoko oerekari kãkiti atão erekapeka pinini —itxari.

⁴⁵ Iuaritika isãpiretapikari Xesosi kamakiti. Ininiã iaripireta ikara pirena. Ikara xika Xesosi !iposotaika isini aapokotximoni. Ikaikota kãkiti mauakaniãtaã. Iuaritika kãkiti sari iuamoni.

2

Matĩpokotakati Pirena
(Mateo 9.1-8; Arókasi 5.17-26)

¹ Eereka mapaõtipeka inaka atoko iuaĩkana Xesosi Kapanaoõ sitatxiti apoka itxa. Iaripireta Xesosi inirimane aapoko apokini. ² Iuasaakipeka mirikiniti kãkiti apoka iuamoni, ininiã iua aapokotxi xãpoka. Apotiitauana İronakikoãtaã apaka. Ininiã !apakata apanakini kãkiti İroini aapokotxi ãki. Iuasaaki Xesosi sãpiretari Teoso sãkire kãkitimoni. ³ Iuasaaki ipi ipi pakini kikiakori minari matĩpokotakati. ⁴ Kãkiti itomaneri İronakikoãtaã aua, ininiã kona iposotarina Xesosi takote apokinina. Ininiã aapokotxi nopini, Xesosi manapi ninoa sonatarari iua matĩpokotakati iokatxakinina tĩkane Xesosimonikari. Iposo atoko isikakaãpotarina iua manapi. ⁵ Xesosi imarotari ninoa atão auikiniri iua sãkire. Ininiã Xesosi txari matĩpokotakatimoni:

—Namarite, pimaerekani makatxakapeëkaika —itxa.

⁶ Iuasaaki ãtikaka kaiõkatsopareriakori topãkanãta iuaã. Itsorĩkaãnãtana. Ixiniremoninani:

⁷ —Kinirepa ia kiki ikara atoko itxa? Maerekati isãpiretakiti, kotxi Teosonanira posotari imakatxakiniri kãkiti maerekani —itxa ninoa sãkire.

⁸ Iuasaakipeka Xesosi imarotari ninoa xinikakiti ãkixinireña. Ininiã Xesosi txana ninoa:

—Kininiãpa ikara atoko hĩtxa xinireta? ⁹ Nitxari iua imaerekani nimakatxakini, txamari !himarotari imaerekani atão nimakatxakini. “Põkitikaua. Pisirimata pikoseka, sipe pitxa,” nininiã, iuasaaki himarotari nisãkire atão ininiãua, kotxi hĩtikari. Niposotiire imaerekani nimakatxakini İkapani, niposotiire iua nõkitikini İkapanitxikana. ¹⁰ Ininiã uatxaika noerekai hĩte, Teoso iokanatanano nota hĩtari iaxitikiri İkorapokoritimoni kãkiti maerekani nimakatxakini İkapani —itxana kaiõkatsopareriakori.

¹¹ Ininiã matĩpokotakatimoni itxa:

—Põkitikaua. Pisirimata pikoseka, sipe pitxa paapokomoni —itxa.

¹² Iuasaakipeka iua õkitikaua. Ikosekari isirimata. İkorape itxa ikinimane okiãtaã. Imakinika kãkiti tikoka.

—Peerekari Teoso kamakiti. Kona mitxi ate itikari İkora atoko inakari —itxanãtana kãkiti.

Mateo Pirena
(Mateo 9.9-13; Arókasi 5.27-32)

¹³ Ininiã iuaĩkana isari ipoamoni. Kaiãopokori kãkiti apotiitaua iuakata. Iuasaaki oerekana ninoa. ¹⁴ Isaãpotakasaaki, atamatari Arevii inakori. Æti iuãka Mateo inaãka.

Aopeo inakori ākiri itxaua iua. Iitopākanāta auñtetxiakori txineirote apakapiniātaā. Ininiā Xesosi txari:

—Masa notakata.

Iuasaakipeka ōkitikaua, Xesosikata sa itxa.

¹⁵ Eereka Xesosi nipokota Arevii aapoko. Itori auñtetxiakori txineirote apakapani, itori apanakini maerekani, topākanāta Xesosi takote, imoianariakori takote pakini. Kaiāopokori kākiti aua iuasaaki, kotxi kaiāopokori kākiti Xesosikata sikani.

¹⁶ Pariseoakori, kaiōkatsopareriakori pakini itikari Xesosi auñtetxiakori txineirote apakapakanikata, apanakini maerekanikata pakini inipokotini. Ininiā kaiōkatsopareriakori, pariseoakori pakini pimaāna Xesosi moianariakori:

—Kinirepa hinipokota auñtetxiakori txineirote apakapakanikata, maerekanikata? — itxana.

¹⁷ Xesosi ikara ikenakotakasaaki, itxana:

—Kākiti mamianatakani kona nirekari kākiti pinñtxi imarotakari. Amianatakani-nokara nirekari pinñtxi imarotakari. Nota uai apoka maerekani nakiritini ĩkapani, imaerekanina itakanapinina ĩkapani. Kona nakiritari kākiti “atāo inakari kamakani” uākatakaniua —itxa Xesosi.

Nipokori Takanapiko Teoso Misākiretiko ĩkapani
(Mateo 9.14-17; Arókasi 5.33-39)

¹⁸ Āti ōti Xoāo moianariakori, pariseoakori pakini takanapari inikinina Teoso imisākiretinina ĩkapani. Iuasaaki kākiti pimaāri Xesosi:

—Kinirepa Xoāo moianariakori, pariseoakori pakini takanapari inikinina Teoso imisākiretinina ĩkapani, txamari pite moianariakori kona ikara atoko !itxana.

¹⁹ Ininiā Xesosi:

—Kiiniri kākiti ĩtanorouatakasaaki, ĩtanorouatakari aua iuaā, ininiā kona kākiti takanapari inikini iuasaaki. Kona iua ĩtanorouatakari nirekari kākiti natxitini. Ininiā iua auakasaaki ninoakata, ikinimane nipokota.

²⁰ Ininiā nota ĩtanorouatakari atoko nitxa. Nota auakasaaki nimoianariakorikata, kona itakanaparina inikinina Teoso imisākiretinina ĩkapani. Āti ōti nota !auaika nimoianariakorikata. Iuasaakiikarako itakanaparina inipokotinina Teoso imisākiretinina ĩkapani.

Amaneri Mākatxi Pirena

²¹ Kona kākiti tāpanetari mākatxi kitxakari mākatxi mata amaneriā. Mākatxi mata amaneri itxikika, ininiā kitxakari tsorakita.

Amaneri Sako Aamata Kamakori

²² Kona kākiti takari iāriā amaneri sako kitxakari aamata kamakori āki. Itakiniāri, koanatzki kitxakari aamata kamakori tsorakita, ininiā iāriā xikepoata, ininiā koanatzki !kikeikari. Sako amaneri āki itakaāka iāriā amaneri. Iua atokokana kona hīkoketari kitxakari sākiretxiti amaneri sākiretxitikata.

Tomatiko Ōti Pirena

(Mateo 12.1-8; Arókasi 6.1-5)

²³ Tomatiko ōti Xesosi imoianariakorikata napaāpota kikio triko takikoātaā. Ininiā ninoa makatzakaro triko iki mapaki inikinirona ĩkapani. ²⁴ Pariseoakori atamatana, ininiā itxarina:

—Kinirepa ninoa parĩkauata tomatiko ōtisaaki? —itxana.

²⁵ Ininiā Xesosi apakapapiretana:

—Kona hātatsopatapanikari Taviini kamakiti? Iua, imoianariakorikata natxitakasaaki, kona himarotatari ikamakiti? ²⁶ Iua ĩroā Teoso misākiretikoātaā. Apiataa inakori sasetotxi auñte apiatakari iuasaaki. Iuaā Tavii nikari komiri Teosomoni sikakori. Sasetotxinokara auiritaāka iua komiri inikinina. Apanakini !auiritaāka inikiniri. Txamari Tavii sikari imoianariakori inikinina ĩkapani.

²⁷ –Tomatiko òti kamaãka, kãkiti ìto ereka inini ìkapani. Kona kãkiti kamaãka tomatiko òti auini ìkapani. ²⁸ Nota hītari iaxitikiri posotari ikinipoko ninireēkiti nikamini tomatiko òtisaaki, kotxi Apiananiri nitxaua –itxa Xesosi.

3

Motĩkauakotakari Pirena (Mateo 12.9-14; Arókasi 6.6-11)

¹ Iuaĩkana Xesosi imoianariakorikata ìroã aiko Xoteoakori apotiitiniãtaãua. Iuaã apokari kiki motĩkauakotakari. ² Ininiã iuaã auakani txari

–Atxiĩti iua erekapeka txĩkitakari motĩkauakotakari uatxa tomatiko òtisaaki?

Ninoa xinikari ikara atoko inini, kotxi ninoa kinirão apoĩtaka txari Xesosi. ³ Ininiã Xesosi akiritari iua motĩkauakotakari:

–Uaimoni pina –itxari.

⁴ Iposo atoko ipimaãna iuaã auakani:

–Kipa atão Teoso paniãtaua akamini tomatiko òtisaaki? Maerekati akaminikani? Erekar akaminikani? Ipaniãtataua ãti amakananitini? Ipaniãtataua ãti aõkini?

Txamari ninoa !kasãkirena. ⁵ Xesosi atamatana. Iuasaaki inaiataua, iuaritika imatini-niuata, kotxi ninoa !inirekari atão imarotinina. Ininiã Xesosi txari iua motĩkauakotakari:

–Pisirĩkauakota –itxari.

Ininiã itamēkauakota. Erekape itxa iuako. ⁶ Ininiã pariseoakori potorika iuaã. Isana Erotxi sãkire auĩãkanimoni. Iuaãtaã ninoa xinikari Xesosi okaenetinina.

Itori Amianatakani Sari Xesosimoni

⁷ Ininiã Xesosi sari Kariréia poamoni. Iuasaaki itori kãkiti Kariréia tixinikini, Xotéia tixinikini pakini sari iuamoni. ⁸ Xerosareē sitatxitikini, Itoméiakini, Xotão ipiniãkini, Txirokini, Sitoõkini pakini sari iuamoni. Ninoa kenakoenetari ikamakiti, ininiã iuamoni isana. ⁹ Ininiã ipaniãtana imoianariakori:

–Kanaua himina, kotxi kaiãopokori kãkiti katikaãpotano. Ininiã kanaua ãki niereētaua –itxa Xesosi.

¹⁰ Iuasaaki kaiãopokori kãkiti erekapeka itxĩkitakapeka. Apanakini amianatakani nirekakari imaãtakinirina Xesosi, erekapeka ininina ìkapani. Ininiã ikatikaãpotarina Xesosi, kotxi kaiãori kãkiti. ¹¹ Maerekati matamatakoti auakini atamatakasaakiri Xesosi, irikana Xesosi apisatoõ. Akiripoatana:

–Teoso ãkiripitikai pite.

¹² Ininiã Xesosi kona auiritana ninoa: “Teoso ãkiripitikai,” ininina.

Xesosi Mereẽna Tosi Imoianariakori (Mateo 10.1-4; Arókasi 6.12-16)

¹³ Iposo atoko Xesosi sari õtanoxiratarimoni, akirita itxana inirekaãkini. Ininiã ninoa sari iuamoni. ¹⁴ Ininiã iua mereẽna tosi kikiakori iuakata kaikotakani tĩkane, Teoso sãkire sãpiretakani ìkapani. ¹⁵ Iua sikari iposotiire ninoamoni, amianatakani erekapeka itxĩkitakinina ìkapani, apaka maerekati matamatakoti omitikinina ìkapani. ¹⁶ Ininiã akiritari Simão. Xesosi takauãkatari Simão ãti iuãka. Petro itxaua. ¹⁷ Akiritana Txiako, itari Xoão pakini. Sepeteo anaakori itxauana. Xesosi takauãkatana ninoa Poanexi. Poanexi Popĩkari sãkireẽ “Ikarokirauari anaakori.” ¹⁸ Akiritana Ætree, Piripi, Patoromeo, Mateo, Tomee, Txiako pakini. Aotheo ãkiri itxaua iua Txiako. Akiritana Tateo, Simão pakini. Homano omanatakari iua Simão. ¹⁹ Akiritari Xotasi Isikariotxi inakori apaka. Xesosi mĩkapiritakari itxaua iua Xotasi Isikariotxi. Pakini Xesosi akiritakini imoianariakori ininiuana ìkapani.

Maerekani Matamatakoni Omitikiko (Mateo 12.22-32; Arókasi 11.14-23; 12.10)

²⁰ Iuaĩkana ãti aapokotxitimoni isa Xesosi, imoianariakorikata. Iuasaaki mirikiniti kãkiti iuaĩkana apotiitaua. Ikara atoko ininiã kona ninoa nipokota. !Apakata inipokotinina, kotxi mirikiniti kãkiti aua iuaã. ²¹ Xesosi nirimane kenakotari kãkiti apotiitiniua iuakata. Ininiã isana iua apinina ĩkapani.

—Imapitxiritapeka —itxana.

²² Kaiõkatsopareriakori Xerosareẽ ĩkani apoĩtari Xesosi maerekati ikamini. Ninoa sãkire: —Peosepoo inakori auaĩtotari iua. Ininiã Peosepoora omitikari maerekati mata-matakoti —itxana.

Peosepoo Satanasi itxaua. Apanakini sãkire:

—Maerekani matamatakoni auĩte sikaposotiiretari Xesosi maerekati matamatakoti omitikini.

²³ Ininiã Xesosi akiritari kãkiti isãkire ikenakotinina ĩkapani. Sãpirenatxi atão inakari oerekiko isãpiretana ninoa. Ipimaãna:

—Natokopa itxa Satanasi omitikiniua? ²⁴ Auĩtetxi tixine auakani naiatakakiniãua, ixipokaãkanako. ²⁵ Kãkiti aapoko ãki auakani ninoakakarika neenamauatiniã, ixipokaãkanako apaka. ²⁶ Iua atokokana, Satanasi nitiriakori, ninoakakarika naiatakakiniãua, Satanasi tapara xipokako.

²⁷ —Kona kãkiti ĩroã kiki mitapoari aapoko ãki ĩtiriuatini ĩkapani. Kinirão ĩtiriuatana, ininiã iaxirikari mitari mitxi. Iposo atoko inirekaãkiti ĩtirĩka.

²⁸ —Ari, atãopitikara nota txai hĩte. Apakata Teoso makatxakiniri ikinipoko maerekati kãkiti kamakiti, imaerekani Teoso imisãkirepiretini pakini. ²⁹ Txamari ãtipekana maerekati kamakari aua. Erekari Matamatakoti misãkirepiretakari maerekani makatxakiko kona auari. Ikara atoko inakani inikoriãriko imisiritiko maerekani misiritikoãtaã —itxa Xesosi.

³⁰ Xesosi ikara atoko itxa, kotxi pariseoakori txari: “Iua auari maerekati mata-matakoti.”

Xesosi Inoro, Itariakori Pakini
(Mateo 12.46-50; Arókasi 8.19-21)

³¹ Iuasaaki itariakori inorokata apoka porikiti. Ipaniãtarina ãti akiritiniri Xesosi.

³² Iuasaaki itori kãkiti topãkakani ãkitari Xesosi. Isãpiretarina:

—Pitariakori, pinoro apaka porikiti aua. Initanãtai —itxarina.

³³ Ininiã Xesosi apakapapireta:

—Kiripa nitariakori, ninoro pakini?

³⁴ Iua atamatana itakote topãkakani:

—Hãtamata, uai aua ninoro, nitariakori pakini. ³⁵ Teoso nireẽkiti kamakani nitariakori, nitaroakoro, ninoro pakini itxauana —itxa Xesosi.

4

Katakareri Pirena
(Mateo 13.1-9; Arókasi 8.4-8)

¹ Iuaĩkana Xesosi oerekarauata ipoa takote. Kãkiti mirikiniti, ininiã imorõkokaua kanaua ãki. Iitopãka. Ninoa aua imiriĩ, ininiã iua kanauaã oerekarauata. ² Itori Teoso sãkire oerekana ninoa sãpirenatxi atão inakari oerekikoã. Itxana:

³ —Hĩkenakota. Katakareri takarauata. ⁴ Itakarauatakasaaki itakareki irika kimapori tiniãpo. Ininiã kotipiriki nikari itakareki.

⁵ —Apanakini itakareki irika kai auiniãtaã, kipatxi mauakaniãtaã. Atãoka ipitxaka.

⁶ Kipatxi poiãoka auiniã atokatxi pataka apokasaaki itxarika. Omakotsani xika osonãka.

⁷ Apanakini irika inako sauaki. Inako aneẽkasaaki, okari takari. !Iriuata. Ipinã.

⁸ —Apanakini irika kipatxi auiniãtaã. Ininiã iriuata. ãti poiãoka iriuata, trĩtakata. ãti apiata iriuata, sesẽtakata. ãti kaiãopoko iriuata, seĩkata.

⁹ –Kakenakokii, ininiã hïkenakotariko nisãkire –itxa Xesosi.

Kãkiti Mimarotakiniti Xesosi Sãpiretini Pirena
(Mateo 13.10-23; Arókasi 8.9-15)

¹⁰ Iuanani imoianariakorikata auakasaaki, ipimaãrina Xesosi:

–Poerekaua mixikanani sãpirenatxi atão inakari oerekiko pisãpiretakiti? –itxarina.

¹¹ Ininiã isãpiretana:

–Teoso sãkire mauïãkani !imarotari Teoso auïtetxi ininiua. Teoso oerekai hïte ninoã mimarotakiniti. Teoso oerekana ninoã isãkire sãpirenatxi atão inakari oerekikoã.

¹² Atxiïti ninoã iteene atamatarari Teoso oerekakiti, iuaritika !imarotarina atamatakitina. Atxiïti iteene ikenakotarina Teoso sãkire, iuaritika !imarotarina ikenakotakitina. Imarotaãkamariko, akiritaãkamariko Teoso, ininiã Teoso makatxakamariko ninoã maerekani.

¹³ Ininiã Xesosi txari:

–Himarotatarari ikara sãpirenatxi atão inakari oerekiko?

–!Aimarotari –itxana.

–Ininiã natokopa ininiãparako himarotatarari apanakini sãpirenatxi atão inakari oerekiko?

¹⁴ Ininiã imimarotakinitina oerekana:

–Iua takarauatakari takari Teoso sãkire. ¹⁵ Aua kãkiti kimapori tiniãpo takarekitxi irikiniãtaã atoko inakani. Ininiã Teoso sãkire ikenakotakasaaki Satanasi apoka. Ininiã imakatxakari Teoso sãkire ãkixinireẽna apokakari.

¹⁶ –Aua kãkiti kai auiniãtaã atoko inakani. Ninoã kenakotakasaakiri Teoso sãkire, iuasaakipeka apakaparina ipoxokoniritikana. ¹⁷ Itxamana, kona kakotsari. Imaxikiko apokiniã, imisiritiko Teoso sãkire auikinina xika apokiniã, iuasaaki itakanaparina Teoso sãkire.

¹⁸ –Aua kãkiti aanaia auiniãtaã atoko inakani. Ninoã kenakotapitikari Teoso sãkire. ¹⁹ Txamari maerekaxiniretinoka itxana. Txineironoka inirekana, ininiã ikara misirienetana ninoã. Kaiãopokori inireẽkitina, Teoso manirekakiniti. Maerekaxiniretinoka ininina, txineiro, inireẽkitina pakini inako atoko itxa, ininiã !ixinikaikarina Teoso sãkire, ininiã kona iriuata.

²⁰ Aua kãkiti kipatxi erekari auiniãtaã atoko inakani. Ninoã auikari Teoso sãkire. Iriuatana. ãti iriuata poiãoka, trïtakata. ãti iriuata apiata, sesëtakata. ãti iriuata ito, seïkata.

Tirikapi Pirena
(Arókasi 8.16-18)

²¹ Xesosi pimaãna ninoã:

–Nanipa hïtakari tirikapi? Kopiti ãkikani hïtakatarari? Amesã patapikani hïtakatarari? Konapitini. Hïtakari itano imakinika iopinikini ïkapani. ²² Iomaãtakori ãti õti oerekaãkako. Kipatakori oerekaãkako, kotxi nota imarotapitikari hïkamakiti. ²³ Kakenakokii, ininiã hïkenakotariko nisãkire –itxa Xesosi.

²⁴ Xesosi sãkirauatapanika:

–Hïtakaõtxikariko nisãkire. Imakinika hïkenakotako. Erepaniko pikamakiti ãtimoni, kotxi pite kamakititxikana kamaãka pitemoni. Erepaniko, kotxi apiata ikamaãka pitemoni. ²⁵ Teoso sãkire auakiti, iua sãkire kïpitakari, Teoso sikari apikomoni imaroretxi iuamoni. Txamari Teoso sãkire kenakotakari, isãkire makïpitakati, imarore xapiti iuamoni auakari makatxakaãkako.

Takariki Pirena

²⁶ Apikomoni Xesosi txari:

–Teoso auïtetxi ininiãua kiki takariki taãkari atoko itxa. ²⁷ Itakarauata. Imaka ïkanõka. ãti iparïka ikama pokamara. Iuasaaki itakare pitxakapeka. Kona iua imarotari otomorekini. ²⁸ Merepanika otomoreka. Iposo atoko opitxaka. Eereka opa aua.

²⁹ Oaneẽpeka onakasaaki katakareri makoapatara, kotxi oamiko manapipeka itxa.

Ikara atoko itxa Teoso auñtetxi ininiãua.

Mostata Pirena

(*Mateo 13.31-32; Arókasi 13.18-19*)

³⁰ Xesosi sâkirauatapanika. Itxari:

—Natokopa itxa Teoso auñtetxi ininiãua? Ìkiripa sâpirenatxi atão inakari oerekiko oerekaua? Ia atoko itxa: ³¹ Teoso auñtetxi ininiãua mostata oki atoko itxa. Axapitikiro oa. Apanakini iki apiata. ³² Otakaãka atoko opitxaka. Eereka oaneë. Apanakini takari ìtano apiata oa. Amaripokoro okati. Kotipiriki takari okoa okatiã. Iua atokotxikana Teoso auñtetxi ininiãtaãua.

Merepanika poião kãkiti. Eereka apiata. Eereka kaiãopokori kãkiti auñtetari Teoso. Txamari iuasaaki Satanasi apoka ninoamoni kotipiriki apokini atokokana.

³³ Kaiãopokori sâpirenatxi atão inakari oerekiko isâpiretana, Teoso sãkire imarotinina ìkapani. Ninoa imarotakasaakiri isãkire, apiata isâpiretana. Imimarotakanisaakiri isãkire, poiãonoka isâpiretana. ³⁴ Teoso sãkire oerekasaakina ninoa, sâpirenatxi atão inakari oerekikonoka isâpireta. Eereka imoianariakorinoka auakasaaki iuakata, oerekana ikara imarotinina ìkapani.

Xesosi Iotokakiniri Ìtima

(*Mateo 8.23-27; Arókasi 8.22-25*)

³⁵ Iua õtipanika mapiãnikata itxana imoianariakori:

—Mañpiriãta ipoa. Ipiniãmoni masa —itxana.

³⁶ Ininiã itakanapana itomaneri kãkiti. Iuasaaki imoianariakori anikari Xesosi kanauaã. Apanakini kanaua axapitiri apaka sari ninoakata. ³⁷ Ìpiriãtakasaakina ìtima kataparari apoka ninoamoni. Tsakati kataparari, ininiã ãparaã ierepeëpokataua kanaua ãki. Kanaua sakikaariãpotape.

³⁸ Iuasaaki Xesosi ikapokiãmoni imakanãta. Isirimata nopini imakanãta. Ninoa õpirĩkari iua:

—Kona pimaãkataua ate. Kona pitiretataua? Apinanapanoka —itxana.

³⁹ Ininiã imereka. Ipinitari ìtima:

—Piotoka. Auapika pitxako —itxari ipoa.

Ininiã itsorĩkaxitita. Ìtima iotoka. Tsakati iotoka apaka. ⁴⁰ Ininiã Xesosi:

—Natokopa ininiãpa kapĩkarei hĩte? Kinirepa hĩte kona auikano nota? —itxana ninoa.

⁴¹ Apiapĩkareta ninoa. Ininiã ninoa:

—Kinakaripa ia kiki, kotxi ìtima, tsakati pakini auikari iua sãkire —itxana.

5

Kiki Maerekani Matamatakoni Auañtotakiti

(*Mateo 8.28-34; Arókasi 8.26-39*)

¹ Xesosi imoianariakorikata apoka ãtiãtaã Xerasa tõpa, Kariréia poa ipiniã. ² Xesosi kanĩkiĩtakasaaki, kiki ina iuamoni. Iua akauariãtaã auakari. ³ Iuaãtaã iua auanãta. Kãkiti !iposotari ìtxikiniri iua. Ìtxikare metao kamakori karakitapekata. ⁴ Kaiãokatani kãkiti ìtxikari iuako, ikiti pakini metaoã, txamari ikakarakitsatari metao. !Apakata kãkiti nĩkatiniri iua. ⁵ Ìkanõka, pokamara pakini ixirataãtaã akiripoanãta akauari auiniãtaã. Kai soroã iuaka ikisauakitataua. ⁶ Õtakopanika atapari Xesosi inini. Ininiã imiteëkata iuamoni. Ikapotoreëkua iua apisatoõ.

—Apiananiri pitxaua —itxa.

⁷ Akiripoakata:

—Xesosi, Teoso ãkiri pitxaua. Apiananiri ãkiri pitxaua. Kipa pinireka nota ìkapani? Teoso uãkaã namanaãi pite, kona pimisiritapeno —itxa maerekati matamatakoti. ⁸ Ikara atoko itxa kotxi Xesosi paniãtari:

—Maerekati matamatakoti pisipeka. Pitakanapari ere kiki —itxari.

⁹ Xesosi pimaãri:

—Kipa piuãka? —itxari.

Iua apakapapiretari:

—“Itori” ninaãka niuãka. Kotxi itori maerekani matamatakoni ate.

¹⁰ Iteene iua amanaaãpotari Xesosi:

—Kona piokanatapeua ãtiãtaã.

¹¹ Iuasaaki auari kaiãopokori irari ixiratamoni nipokonãtakani. ¹² Maerekati matamatakoni iteene amanaãri Xesosi:

—Piokanataua ate irarimoni. Pauiritaua ate sini ninoamoni —itxanãtana.

¹³ Ininiã Xesosi iokanatana. Iuasaakipeka maerekani matamatakoni takanapari iua kiki, ãroã itxana irari ãtomoni. Iuaãtaã auari ipi mio irari. Ninoa ãroãkasaaki, irari miteẽkata oiokiriãtini ipoamoni. Komoka, axãpoãta itxana iuasaaki.

¹⁴ Irari nãkatakani miteka sitatximoni, aapokotxi poião auinimoni pakini. Isãpiretana kãkiti itikakitina. ¹⁵ Eereka isana Xesosimoni. Iuasaaki atamatarina kiki mĩtxi maerekati auãitotakiti. Iitopãkanãta. Mãkatxi auapekari. Atão iũkitapeka auari. Iuaritika ninoa pĩkarauata. ¹⁶ Itikakani sãpiretari apanakini iua kiki pirena, irari pirena pakini.

¹⁷ Kãkiti iuaãtaã auakani paniãtari Xesosi osipikiniri iuaãtaã.

¹⁸ Xesosi iereẽtakasaakiua kanaua ãki, iua kiki amanaãri iuakata isini ãkapani. ¹⁹ Xesosi !auritari. Itxari:

—Pisa pinirimanemoni. Pisãpiretana Apiananiri kamakiti pite ãkapani. Pisãpiretana iua iteene iamoniãkai pite. ²⁰ Ininiã iua sipe. Iuaãtaã auari sitatxi tesi pakini. Iua kiki sari ninoa tesi sitatxitimoni. Isãpiretari kãkiti Xesosi kamakiti iua ãkapani. Iuaãtaã auakani tsorĩkaãta:

—Anekani, peerekari Teoso —itxana.

Xãiro Amanaãkiti Pirena

(Mateo 9.18-19; Arõkasi 8.40-42)

²¹ Ininiã eereka Xesosi ãpiriãta ipoa. Ininiã ipoa ãtiniã kaiãopokori kãkiti apotiitaua iuakata. ²² Aiko Xoteo apotiitiniãtaãua sikani auĩte apoka iuamoni. Akiritaãka Xãiro iua. Iua kapotoreẽkaua Xesosi apisatoõ. ²³ Iua iteene amanaãri Xesosi:

—Namarite opinanapanoka. Masa notakata. Pitakari piuako oa nopini erekape onini ãkapani.

²⁴ Ininiã Xesosi sari iuakata. Kãkiti kinapokope itxakata isinina.

Xesosi Mãka Mãtakakaro

(Mateo 9.20-22; Arõkasi 8.43-48)

²⁵ Iuasaaki sito amianatakaro apoka. Tosikanani oa arẽka !iotoka. ²⁶ Okinika otxineiroteẽ oiãkitxapekari oamianare imarotakani. Kaiãopokori ipitamaro. Txamari ninoa !iposotari imaktxakinirina oamianare. Kona erekaro. Apiata oamianare. ²⁷ Okenakoenetakasaakiri Xesosi napini, osari iuamoni. Omaãtakari imãka, ²⁸ kotxi oamoni: “Nimaãtakiniãri imãka, iuasaakiika erekapekano,” otxanãta oxinikakiti. ²⁹ Ininiã omaãtakasaakiri, oarẽka iotoka. Iuasaakipeka oimarotari erekape onini.

³⁰ Iuasaakiika Xesosi posotiire sari oamoni. Ininiã ikirioka kãkiti sauaki. Eereka ipimaãna:

—Kipa mãtakatari nimãka? —itxa.

³¹ Iuasaaki imoianariakori apakapapiretari:

—Apiananiri, patamata. Itomaneri kãkiti kinapokopeka, iuaritika pite pimaãri kãkiti: “Kipa mãtakatano?” pitxa —itxana.

³² Iuaritika Xesosi nitari imãka mãtakakari. ³³ Iuasaaki oa sito imarotari erekape onini, ininiã okapotoreẽkaua iuamoni. Opĩkarauata. Okikinanaka. Eereka osãpiretari ikinika oamianare iuamoni. ³⁴ Ininiã Xesosi txaro:

—Namarite, pite erekapekai uatxa, kotxi pauikari niposotiire. Pisipiniikaua, erekaxinirepekai —itxa Xesosi.

*Xáiro Ákero Ôkitikiko
(Mateo 9.23-26; Arókasi 8.49-56)*

³⁵ Xesosi sâkirauatakasaaki oakata, apanakini Xáiro nitiriakori apoka. Itxari:

—Pamarite !auaika. Opîpeka. Pauiritari Xesosi kanapiriini.

³⁶ Ininiã Xesosi !imaãkatari ikara pirena. Itxari Xáiro:

—Kona pipîkarauatape. Pauikano —itxari.

Ininiã ninoa sari Xáiro aapokomoni. ³⁷ Xesosi auiritana Petro, Txiako, Txiako itari Xoão pakini sini iuakata. !Auiritana apanakini sini iuakata. ³⁸ Ninoa apokasaaki Xáiro aapoko, kâkiti iuaãtaã auakani !imarotarina ikamakitina. Ikinipoko kâkiti txiapanãta, akiripoakanãtana. ³⁹ Xesosi ãroã. Itxana:

—Kinirepa iteene hîtxiapanãta? Kinirepa hâkiripoanãta? Amarini !ipina. Oimakanãta —itxa.

⁴⁰ Ininiã inapetarina iua. Ininiã iokanatana ninoa mapara. Oïri, onoro, Xesosi moianariakori pakini ãroã amarini auiniãtaã. ⁴¹ Imaïkaro ouako. Iuasaaki isâpiretaro oa isâkireẽ:

—Taritaa komii.

Popîkari sâkireẽ: “Amarini pôkitikaua.” ⁴² Iuasaakipeka oôkitikaua. Otîpokota. Oa amarini aua tosi anokanani. Iuasaaki ninoa iteene tsorïkaãta. ⁴³ Ininiã Xesosi paniãtana:

—!Hîsâpiretapiri apanakini nimakananitiniro oa.

Apaka ipaniãtana isikakienatiniro oa.

6

*Nasaree Auakani Kona Auikari Xesosi Sâkire
(Mateo 13.53-58; Arókasi 4.16-30)*

¹ Xesosi imoianariakorikata potorika iuaã. Nasaree sitatxitimoni isana. Iuaãtaã mitxi Xesosi aneẽ. ² Tomatiko ôtisaaki iua oerekari kâkiti aiko Xoteo apotiitiniãtaãua. Xesosi sâkire kenakotakani tsorïkaãta. Itxana:

—Nanipa apaiaôkarauata, ikara atoko imarotini? Kipa oerekari imarore? Ikamakiti oerekari apiata imarore aua. Kininiãpa ãkora atoko itxa posotiireta? ³ Ate imarotari iua, kotxi aapokotxi kamakari itxaua iua. Maria ãkiri iua. Iua itariakori Txiako, Xosee, Xota, Simão pakini itariakori itxauana. Itaroakoro apaka aua uai, ininiã ate imarotari iua — itxana.

Ikara xika kona ninoa auikari isâkire.

⁴ Ininiã Xesosi txana ninoa:

—Teoso sâkire sâpiretakari paxitaãka, txamari Teoso sâkire sâpiretakari itixineẽ auakasaaki, iuaã auakani, inirimane, iua aapoko ãki auakani pakini !ipaxitari. ! Auikarina iua sâkire —itxa.

⁵ Ininiã iuaã kona ikamari iposotiire apiari. Iuako itaka ãtikaka amianatakani nopini, ininiã amianatakani erekapeka itxïkitaka. ⁶ Itsorïkaãta, kotxi iuaã auakani !auikari isâkire. Ininiã iua tîpa isari aapokotximoni. Oerekarauata iuaã. Eereka isari apanakini aapokotxitimoni. Iuaïkana oerekarauata. Itxaãpota iuaãtaã.

*Xesosi Iokanatana Imoianariakori Kâkitimoni.
(Mateo 10.5-15; Arókasi 9.1-6)*

⁷ Xesosi akiritana imoianariakori tosi pakini. Ipi iokanata ãtiãtaã, iuaïkana ãtiãtaã iokanatana ipi. Ikara atoko iokanaãpotana imoianariakori. Iposotiire isikana ninoa maerekani matamatakoni omitikinina ãkapani.

⁸ Itxana:

—Kona minakati hanikape. Hîtsonerenoka hanika. Kona hîtii, kona auatxi, kona txineiro !hanikape. ⁹ Hîkiti mata hîeretaka. ãtika kasipiri himãka hanika. ¹⁰ Sitatxi hâpokasaaki, ãtika aapokotxinanirako hãua. Iua sitatxi hãuakasaaki, hîkaikota iua kâkiti aapoko. Kona hãuape ãti kâkiti aapoko. ¹¹ Kâkiti mapakapakanisaakii, hîsâkire imake-nakotakanisaakina, ininiã hîtakanapana. Hîpotorikasaaki, hîkaxipokari kipatxi hîkiti mataã

auakari, ininiã ikara atoko hõerekana ninoa maerekani ininiuana. Kãkiti misiritiko sãpiretiko õti apokasaaki, Sotoma sitatxiti auakani misiritiko auapitika. Iuasaaki Komoaha sitatxiti auakani misiritiko auapitika. Iuaritika sitatxi auakani hõte mapakapakani misiritaãkako apiata iuasaaki.

¹² Ininiã isana. Isãpiretari kãkiti imaerekani itakanapini.

¹³ Mirikiniti maerekati matamatakoti iokanatana. Iĩtxiã itakana amianatakani nopini. Ininiã erekapeka itxĩkitakana amianatakani.

João Kapatxisareri Ipinini
(Mateo 14.1-12; Arókasi 9.7-9)

¹⁴ Auĩtetxi Erotxi inakori kenakopiretari Xesosi pirena. Xesosi uãka iaripireta ikini tõpati. Ininiã Erotxi xinikanãta:

—Ikara Xesosi, João kapatxisareri itxaua. Uatxa iua õkitikapekaua. Iuakara Xesosi itxa. Ininiãkara iposotiire aua iuamoni.

¹⁵ Ætikaka uãkatari Xesosi Eríasi ininiuana. Ætikaka uãkatari Xesosi Teoso sãkire sãpiretakari kitxakapirĩka ininiuana.

¹⁶ Ikara Erotxi kenakopiretakasaaki, itxari: —Joãookara nitsotakakiitakitikara iua Xesosi txa. Ipĩpekariika iuaĩkana õkitikapekaua —itxa.

¹⁷ Mitxi Erotxi takaro itari Piripi ãtanoro. Ouãka Erotxia inakoro. Oa xika Erotxi maĩkari João. Iaxiriĩtotari, kateia ãki taka itxari. ¹⁸ João takaãka kateia ãki, kotxi itxari Erotximoni:

—!Erekari pitari ãtanoro pitakini —itxari.

¹⁹ Ikara xika Erotxia apaka omanatari João. Oa iteene kinirão okaka otxamari João. Kona oposotari oõkiniri iua, ²⁰ kotxi Erotxi pĩkari João. Iua imarotari, atão inakarínoka kamakari, erekarínoka kamakari ininiuana João. João sãkire ikenakotakasaaki, !iteene ! imarotari isãkire, iuaritika iua apokaerekatari ikenakotiniri isãkire.

²¹ Erotxi kamari isaiã kiiniriti. Iua kemaĩtxitana sotato auĩteakori, Kariréia auakani auĩteakori, apanakini auĩteakori pakini. ²² Ininiã Erotxia ãkero apoka iua kiiniritiã. Iuasaaki oserenapirĩkata Erotxi apisatoõ, ikemaĩtxitakini apisatoõ pakini. Ninoa potxitaritari oserenini. Ininiã Erotxi txaro oa ãtokoro:

—Pinirekakiti pamanaãno, ininiã nisikai. ²³ Atãopitikara nisikai pamanaãkiti. Nitixine pinirekiniã, ipixini nisikai —itxaro.

²⁴ Ininiã oa miteka onoromoni. Oa pimaã txaro onoro:

—Kiripa namanaãtari? —otxaro.

Ininiã onoro txaro:

—“João Kapatxisareri kii prato nopini ninireka,” pitxari. Ikara atoko pamanaãri iua —otxaro.

²⁵ Ininiã katimariã okanapiriã kiiniri auiniãtaã iuaĩkana. Katimariã auĩtetximoni osa. Oamanaãri iua:

—Ninirekari João kapatxisareri kii prato nopini —otxa.

²⁶ Ininiã Erotxi maerekaxiniretinoka itxa, kotxi mitxi iua sãpiretaro oa amanaãkiti isikiniro oa ikemaĩtxitakini apisatoõ. Ininiã !apakata imasikakaniãri isikaenetakiti.

²⁷ Ininiã katimariã ipaniãtari sotatoakori okiniri João:

—Ikii himina —itxa.

Ininiã isana kateiamoni. Itsotakakiitarina João. ²⁸ Pirato nopini itakarina ikii, sika itxarona ãtokoro. Ininiã oa sikari onoromoni.

²⁹ Ininiã João moianariakori kenakopiretakasaakiri João okiko pirena, isana kateiamoni. Aparina iĩto. Itakarina iĩto kai iriko ãki.

Sĩko Mio Kãkiti Xesosi Sikakienatini
(Mateo 14.13-21; Arókasi 9.10-17; João 6.1-14)

³⁰ Ininiã Xesosi iokanatakini kanapiriã iuamoni. Apoka itxana Xesosimoni. Isãpiretarina ikamakitina, oerekakitina pakini. ³¹ Iuasaaki kaiãopokori kãkiti aua iuaãtaã, ininiã !apakata inipokotinina. Ininiã:

—Amasipeka kãkiti mauakaniãtaã atomatini ãkapani —itxana.

³² Ininiã kanauaã iereẽtauana. Ñpiriãtarina ipoa. Isana kãkiti mauakaniãtaã. ³³ Kãkiti itikari Xesosi inapaãpotini, ininiã ninoa miteka. Iopiriãrina ipoa koropoa, apoka itxana Xesosi apisapanika. ³⁴ Iua kanãkiãtakasaaki apisamoni mirikiniti kãkiti, ininiã iamoniãkana, kotxi soti auãte ipitikiri mauakiniti atoko itxana. Iuasaaki Xesosi oerekana kaiãori Teoso sãpiretakiti.

³⁵ Ininiã mapiãpeka inaãpotiniã, Xesosi moianariakori iuamoni apoka. Itxarina:

—Kona kãkiti aapoko auari uai. Uatxa mapiaãpopeka. ³⁶ Ininiã pipaniãtana kãkiti isinina ãkapani nipokori iamotinina tãkane.

³⁷ Ininiã Xesosi:

—Hãtekarako sikakienatana ninoa —itxana.

Ininiã ninoa:

—Pinirekatari asini komiri aamotini ãkapani? Oito kasiriti kãkiti parãkauatini ãki anireka komiri ãki naia kãkiti nikini ãkapani —itxana.

³⁸ Ininiã Xesosi pimaãna ninoa:

—Kipakinipa komiri katari aua? Hãtariko —itxa.

Ninoa imarotakasaakiri, apoka iuamoni. Itxana:

—Sãko pakini komiri katari, ipi ximaki pakini aua —itxarina.

³⁹ Xesosi paniãtana ikinika kãkiti topãkini katsotati nopini. ⁴⁰ Ñtiãtaã iitopãkana sãkoẽta, ipinimoni iitopãkana seã. Imakinikana ikara atoko itxaãpotana iitopãkinina.

⁴¹ Ininiã Xesosi kosekari sãko pakini komiri, ipi ximaki pakini. Iuasaaki ionakaãta iaxiti:

—Erekapitikari pisikakiti —itxa.

Eereka imaxiõpekari komiri. Isikari imoianariakori. Imoianariakoripekana sikaãpotana apanakini. Iuaãkana imapirinikari ximaki, xanaka itxari imakinikana.

⁴² Ikinimanekana nipokota, kamitopeka itxana. ⁴³ Ininiã imoianariakori apotiitari ximaki itetakori, komiri itetakori pakini. Tosi pakini kotari xãpoka itetakori. ⁴⁴ Iuasaaki sãko mio kikiakori nipokotakani.

Xesosi Ipoa Nopini Itãpokotini

(Mateo 14.22-33; Xoão 6.15-21)

⁴⁵ Xesosi takapiretakasaakiri kãkiti, iuasaaki iokanatanana imoianariakori ãpiriãtinina iua apisa, Petsãita tixinimoni isinina ãkapani. ⁴⁶ Xesosi takapiretanapaka atoko, mitaxiratari nopini isa Teoso imisãkiretini ãkapani. ⁴⁷ Mapiãpe inakasaaki kanaua ipoa apanãkakiãxitipeka aua. Iuasaaki Xesosi imiriãpanika aua.

⁴⁸ Xesosi atamatana ninoa, itaparanoka itxana imekoãtinina, kotxi ãtima, tsakati pakini anikaãpotana ninoa. Ininiã ikatimaãpotakasaaki, Xesosi apokaãpota ninoamoni. Itãpokota ipoa nopini. Inapaãpoaritana imoianariakori. ⁴⁹ Ininiã ninoa atapakasaakiri ipoa nopini itãpokotini, ninoa uãkatari kamiri. Ininiã ninoa akiripoakata. ⁵⁰ Ininiã iua misãkiretana:

—Kataparaxinire hãtxako. Notakara. Na !hãpãkarauatape —itxana imoianariakori.

⁵¹ Eereka kanauaã iereẽtaua. Iuasaaki ãtima iotoka itxa. Ininiã itikokitatana ninoa. Itsoriãkaãtana:

—Kiripa atxiãti? —itxana.

⁵² Ikara atoko isãkirena, kotxi kona ixinikaikarina Xesosi posotiire komiri ixanakasaaki. Paikoxinirena ninoa iuasaaki.

Xesosi Makananitana Amianatakani Xenesareekini

(Mateo 14.34-36)

⁵³ Xesosi imoianariakorikata ĩpiriātari ipoa. Isari Xenesaree tixinimoni.
⁵⁴ Ikanĩkiĩtakasaakina apanakini itikari Xesosi.

—Xesosira —itxana.

⁵⁵ Ininiã imitekana kãkiti auinimoni amianatakani apinina ĩkapani. Anikana isiri-matana nopini Xesosimoni. ⁵⁶ Ikini sitatxiti kãkiti amianatakani sirĩka kimapori tiniãpo. Amanaãrina Xesosi auringinina ninoa imãka itikakinina. Ikinikana imãka tikakakani erekapeka itxĩkitaka.

7

Xoteoakori ĩkite Pirena *(Mateo 15.1-9)*

¹ Ininiã pariseoakori, kaiõkatsopareriakori pakini, Xerosareẽ ĩkani, apotiitaua Xesosikata. ² Iuasaaki itikarina Xesosi moianariakori marokapiotakanuia nipokori inikinina apisa. Ininiã itxana:

—!Erekari imarokapiotakanianuana —itxana.

³ Pariseoakori, imakinikana Xoteoakori apaka kamari ikiomaneakori kitxakapirĩkarini sãkire iaõka. Inipokotinina apisapanika arokapiotauana.

⁴ Nipokori amotikoãtaã Xoteoakori sikasaaki, eereka apokasaakina aapokona imarokapiotakanianuana kona inipokotana. Tiitxi iãkoanatxi, kopiti, apanakini itiina pakini arokasaakina ikiomaneakorini oerekakiti iaõka arokana.

⁵ Ininiã pariseoakori, kaiõkatsopareriakori pakini pimaãri Xesosi:

—Kinirepa pimoianariakori kona kamatari kitxakapirĩka atoko ininina? Kinirepa marokapiotakanikaua inikarina nipokori? —itxarina.

⁶ Ininiã Xesosi apakapapireta:

—Mitxipitipanika Isaía sãpiretai hĩte. Atão iua sãkire, kotxi hĩsãkire atxiĩti erekari, txamari kona hĩkamari hĩsãkire iaõka. Iua txari: Kamisirienererini ninoa kãkiti. Ninoa sãkireẽnanira ipaxitanona. Ākixinireẽna ! inirekanona.

⁷ Maxikatiĩka ninoa kapotoreẽkaua nota apisatoõ. Maxikatiĩka ninoa txano: “Ateosone pitxaua,” kotxi ninoa !oerekari nota sãkire. Ninoaka sãkire oerekana, txamari “Teoso sãkire asãpiretai” itxana.

Ikara atoko Isaía iõkatsopatakiti Teoso sãkire.

⁸ —Ininiã hĩtakanapapekari Teoso sãkire, kãkiti oereẽkiti hĩkamini ĩkapani.

⁹ Hĩtakanapapikari Teoso paniãtakiti, hinirekaãkiti hĩkamini ĩkapani. ¹⁰ Kitxakapirĩka Moisesi txari:

Pipaxitariko piri. Pipaxitaroko pinoro. Piri, pinoro pimisãkirepiretiniã, pokaãkako, itxa Moisesi sãkire. ¹¹ Txamari hĩte oerekari kãkiti: “Kãkiti auakiti iri, inoro pakini nirekiniã, iua manirekakaniãri isikiniri ninoamoni, isãpiretana: ‘Ia nota auakiti nisika Teosomoni.’” Ininiã !isikari ninoa nirekakiti ninoamoni. Ikara atoko inakari kãkiti sikakiti Teosomoni, hĩte takauãkatari “Kopaã.” ¹² Ininiãkara hõerekari kãkiti imatiretakanina iri, inoro pakini. !Apakata hõerekakiti. ¹³ Ikara hõerekakiti xika kona hĩte maãkatari Teoso sãkire. Apiata hinirekari kãkiti oereẽkiti. Auapanika itori hõereẽkiti sãkiretxiti ikara atoko inakari —itxa Xesosi.

Ākixiniretxi Txiko Pirena *(Mateo 15.10-20)*

¹⁴ Xesosi iuaĩkana akiritana ikinimane kãkiti. Itxana:

—Hĩkinika hĩkenakota. Hĩtakaõtxikariko nisãkire. ¹⁵ Imakinika hinikakiti, mapara auakari. !Ikamari ate maerekani. Hĩxinireẽ potoriãkarira kamari maerekanitxi.

¹⁶ Kakenakokii, ininiã hĩkenakotariko nisãkire —itxa Xesosi.

¹⁷ Ikinimane kãkiti itakanapaka atoko, aapokotxi åki ĩroã. Iuasaaki imoianariakori pimaãri:

—Pisãpiretaua mixikanani pisãpiretakiti —itxana.

¹⁸ Ininiã iua txari:

—!Kiïkitei hïte. Kona hïte imarotatari hinamaã ïroãkari kona kamari maerekanitxi.

¹⁹ Kotxi ïroãkari !isari hïxiniremoni. Hïtikako ãki isa. Iposo atoko hïtikatakasaaki inapa. Ikara atoko ininiã, erekari ikinipoko kãkiti niãkiti.

²⁰ —Ixinireẽ potoriãkari iuara kamari kãkiti maerekani. ²¹ Kãkiti ãkixinire ipotorika ixinikakiti maerekati, anokaretxi, ïtiriuaataktxi, okaniuataktxi, ãti kãkiti ïtanorokata isirïkini nire pakini. ²² Kãkiti ãkixinireẽ ipotorika itirenani, maerekati Satanasi oerekakiti, misirieneretxi, pëtauataktxi kamakari, xikotaktxi, ãti misãkirepiretiko, iuikiniua, miïkiteti inini pakini. ²³ Ikinika ikara maerekati kãkiti ãkixinire auakari txikotari kãkiti xinire —itxa Xesosi.

Xoteo Minakatoua Auikiniri Xesosi Sãkire (Mateo 15.21-28)

²⁴ Xenesaree tixini Xesosi potorika. Txiro sitatxiti tõpa, Sitoõ tixini pakinimoni isa. Iuaã kãkiti aapoko ïroã. Kona inirekari kãkiti imarotiniã iua auiniãtaã. Txamari ! iposotari iomaãtiniua. Kãkiti imaroãpotari iua auiniãtaã. ²⁵ Sito apoka Xesosimoni, kotxi oa kenakopiretari Xesosi pirena. Maerekati matamatakoti auaïtotaro oimi. Oãpokasaaki Xesosimoni, okapotoreëkãu iua apisatoõ.

²⁶ Oa sito sãkiretari Kreko sãkire. ãto uãka oa. Siropenísia tixinikero oa. Okapotoreëkãsaakia Xesosi apisatoõ, oamanaãri Xesosi:

—Pomitikenatariko maerekati matamatakoti namarite ïtoã auakari —otxari.

²⁷ Ininiã Xesosi:

—Xoteo !pitxaua. Maparakerorai. Pite nirekakari nisikinii Xoteoakori nakiti. Amarini mitxi nikini atão. !Erekari nokiniri amarini kiena anãpamoni —itxaro oa.

²⁸ Oa apakapapireta:

—Atãopitikara ikara atoko pitxa, kotxi nota maparakeroro, anãpa atoko Xoteoakorimoni. Iuaritika kãkiti auiritari anãpapiki nikiniri nipokori katxakakari amarini nipokotiniãtaã patapi —otxari Xesosi.

²⁹ Ininiã Xesosi apakapapireta:

—Erekari papakapapiretini, ininiã paapokomoni pisa. Maerekati matamatakoti ! auaika pamarite ïtoã —itxaro.

³⁰ Oaãpoko oãpokasaaki, oãpokaro oamarite sirïkanãta. Erekapekaro oa. Maerekati matamatakoti asikapekaro.

Makenakoreti Pirena

³¹ Eereka Xesosi takanapari Txiro sitatxiti tõpa. ïpirixititari Sitoõ tixini. Sitatxi tõpa tesi pakini ïpirixitita. Apoka Kariréia poamoni. ³² ãtikaka kãkiti minari makenakoreti Xesosimoni. !Iposota atão isãkirauatini. Ninoa iteene amanaãri Xesosi:

—Piuako pitaka iua nopini kakenakorepeka inini ïkapani —itxana.

³³ Xesosi anikari iua kiki kãkiti mauakaniãtaã. Itakari iuakoki ikïpita ãki. Eereka ikiisoka, taka itxari ienemaã masãkireti nini nopini. ³⁴ Eereka ionakaãta iaxiti, oõka itxa:

—Epataa —itxa.

Popïkari sãkireẽ, “Piauãka.” ³⁵ Iuasaakipeka ikenakoki auãka, ininiã kakenakorepeka itxa. Iuasaaki inini poiõpeka apaka. Eereka erekapeka itxa isãkirauatini. ³⁶ Ininiã Xesosi txana ninoa:

—Kona hïãpiretapiri apanakini nimakananitiniri iua.

Txamari apiata ninoa sãpirenauata. ³⁷ Kãkiti tsorïkaãta:

—Ikinika ikamakiti peerekari. Makenakoreti kakenakorepeka itxa. Mi-matasãkiretakiti, kasãkirepeka itxa —itxana.

8

Xesosi Sikakienatana Ipi Ipi Pakini Mio Kākiti
(Mateo 15.32-39)

¹ Eereka mapaōti itomaneri kākiti apotiitaua Xesosimoni. Nipokori xipokapeka, ininiā Xesosi akiritana imoianariakori. Itxana ninoa:

² —Nota amonīkana naia kākiti, kotxi ipi ōti, āti ōti pakini ōtipeka auana notakata. Ininiā uatxa nipokori !auaika. ³ Niokanatinīāna auinimoni manipokotakatipanikana, ininiā ipixiniāpo iōkapetana. Irikana. Ātikaka ōtako īkani kona apakata manipokotakanika isinina —Xesosi txana imoianariakori.

⁴ Imoianariakori apakapapireta:

—Uai aapokotxi mauakaniātaā, ininiākara nāpa aāpokari nipokori ito naia kākiti asikakienatini īkapani? —itxana.

⁵ Ininiā Xesosi:

—Kipakinipa komiri katari hītemoni aua?

—Setxinokara komiri aua atemoni —itxana.

⁶ Ipaniātari kākiti topākini ixiti. Imaīkari iua komiri setxi.

—Erekari pisiākiti —itxari Teoso.

Iposo atoko imaxiōpekari komiri, sika itxana imoianariakori. Imoianariakori sika itxana apanakinimoni. ⁷ Ninoamoni aua ātikaka ximaki axapitiri. Ininiā Xesosi txari:

—Ia erekari —itxa Teosomoni.

Eereka ipaniātana imoianariakori sikiniri kākitimoni. ⁸ Ininiā ikinipoko kamitopeka itxana. Iposo atoko apotiita itxarina itetakori. Xāpokaka itxarina setxi kotarina. ⁹ Ninoa komiri nikakani ipi ipi pakini mio kākiti. Kamitopeka itxana.

Ininiā itakapiretanapana ninoa. ¹⁰ Iposo atoko imoianariakorikata iereētaua kanaua āki. Taomanota tōpamoni isana.

Pariseoakori Nirekari Xesosi Oerekiniri Iposotiire
(Mateo 12.38-42; 16.1-4; Arókasi 11.29-32)

¹¹ Pariseoakori apoka Xesosimoni. Inirekarina Xesosi kerokiniri, ininiā itxarina Xesosi:

—Takaōtxikari, Teoso posotiire poerekaua ate, aātamatiniri īkapani, Teoso iokanatinii īkorapokoriti aimarotini īkapani —itxarina. ¹² Ininiā Xesosi oōka. Itxari:

—Kinirepa kākiti uatxarini nirekari noerekiniri Teoso takaōtxikare, iposotiire? Atāopitikara nota txai hīte, kona noerekai hīte.

¹³ Ininiā itakanapana. Iereētaua kanaua āki. Ikanapiriā ipoa ipiniāmoni iuaīkana.

Pāo Tireēkari Pirena
(Mateo 16.5-12)

¹⁴ Xesosi moianariakori maxinīkaretari pāo. Ātika pāo porīi kanaua āki aua. ¹⁵ Ininiā Xesosi ōtākikana:

—Erepaniko, pamonōkoniri pariseoakori, Erotxi pakini pāote tireēkari —itxa Xesosi.

¹⁶ Xesosi moianariakori misākiretakakaua:

—Ikara atoko itxaua, kotxi amaxinīkaretari pāo.

¹⁷ Xesosi imarotari ninoa sākire, ininiā itxana:

—Kinirepa hīsākirauanāta pāo mauakani xika? Kona himarotatapanikari niposotiire? Kona hīikitetapanikari? Kona hinirekatari hāuikiniri nisākire? ¹⁸ Kokimai, txamari, ! hātamatari. Kakenakokimai, txamari ! hīkenakotari nisākire. ¹⁹ Kona hīxinikapanikari iusaaki nimaxiōpekitakiti sīko komiri, sīko mio kākiti nisikakienatini? Kipakinipa kotari itetakori hīxāpokaka? —ipimaāna.

Ininiā ninoa apakapapireta:

—Tosi kotari axāpokaka.

²⁰ Xesosi txana ninoa:

—Eereka āti ōti nimaxiōpekari setxi komiri porī. Nisikari ipi ipi pakini mio kākiti. Itetakori hāpotiitakiti, kipakinipa kotari hīxāpokaka? —ipimaāna.

Ininiā ninoa:

—Setxi kotari axāpokaka.

²¹ Ininiā Xesosi:

—Ininiā kinirepa kona hīkitetapanikari?

Mōsiāreti Petsáita Aapokotxitikiri

²² Xesosi Petsáita aapokotxitimoni apoka. Iuasaaki kākiti minari mōsiāreti iuamoni. Amanaārina Xesosi maātakiniri iua mōsiāreti. ²³ Ininiā iua anikaāpotari iuakoā kākiti mauakanimoni. Iuaā iminapari ienemaā mōsiāreti okiā. Eereka taka itxari iuako iitoā. Ipimaāri iua:

—Kōsiārepekai? —itxari.

²⁴ Ininiā iua atamata.

—Nota itikapokotapeka, txamari nitikari kākiti tīpokotakari aamina atoko —itxa.

²⁵ Iposo atoko Xesosi iuaīkana takari iuako mōsiāreti nopini. Eereka mōsiāreti atāo itikapokotapeka. Ikinipoko atamata. ²⁶ Ininiā Xesosi iokanatarari:

—Pisipeka paapokomoni. Kona pisipe Petsáita aapokotxitimoni, kotxi kona ninirekari pisāpiretiniri nikamakiti kākitemoni —itxa Xesosi.

Petro Auikari Xesosi Teoso Mereēkiti Ininiāua (Mateo 16.13-20; Arókasi 9.18-20)

²⁷ Eereka Xesosi imoianariakorikata sari kākiti poiāoka auinimoni, Sesaréia-Piripi sitatxiti takote isana. Ipixiniāpo Xesosi pimaāna imoianariakori:

—Kiripa kākiti uākatano nota? —itxa.

²⁸ Ninoa apakapapireta:

—Xoāo kapatxisareri iuākataina. Apanakini “Eríasi inakori” iuākataina. Ininiā apanakini “Teoso sākire sāpiretakari” iuākataina —itxana Xesosi moianariakori.

²⁹ Iuaīkana Xesosi pimaāna:

—Hītepekana, kipa hīte uākatano? —itxana.

Ininiā Petro apakapapiretari:

—Teoso mereēkiti, kākiti iātapanātakiti pitxaua —itxari.

³⁰ Ininiā Xesosi txana imoianariakori:

—Teoso mereēkiti nininiua !hīsāpiretapiri apanakini —itxa.

Xesosi Sāpiretari Ipinini

(Mateo 16.21-28; Arókasi 9.22-27)

³¹ Ininiā ia atoko oerekarauata:

—Nota hītari iaxitikiri iteene atatsiirauatako. Kiomātxiakori, sasetotxi auīteakori, kaiōkatsoparerini pakini kona nirekapanino nota. Nokaākako. Eereka ipi āti pakini ōtisaaki iuaīkana nōkitikauako.

³² Ikara isāpireta ikinimane kākitemoni. Ininiā Petro anikari iua maparamoni. Itxari:

—Kona ikara atoko !pitxape. Kona erekari pisākire ikara atoko pinini —itxa Petro.

³³ Ininiā Xesosi kirioka imoianariakorimoni. Iua txitari Petro:

—Pisipiniikaua Satanasi. Pite nireēkiti kākiti nireēkiti atokotxikana. Pite nireēkiti kona Teoso nireēkiti atokoni —itxa Xesosi.

Xesosi Moianari Atāo Inakari (Mateo 16.24-28; Arókasi 9.23-27)

³⁴ Xesosi akiritana kākiti imoianariakori apaka. Itxana ninoa:

—Notakata kinirāo sika pinakasaaki, piteka pinireēkiti kona pixinikape. Notakata kinirāo sika pinakasaaki, nota misiritiko atokokana pimisiritaākako. Ia atoko pinirekiniā, notakata pisapitikako. ³⁵ Pite ātipirika kaminiāri piteka nireēkitinoka, ininiā

pinireëkiti xipokapitikako pitekata. Pite nireëkiti xipokiniã, nota sãkire pauikini xika, Teoso iokanapirena erekari pisãpiretini xika, pite auapininiika txako Teosokata.

³⁶ Atxiïti papakapari ikinipoko tiitxi, ikini itixiti auakani tii, pinakiti ïkapani. Atxiïti iua tiitxi xika kona pikïpitari Teoso sãkire, ininiã kona pikaikota ätipirika Teosokata. Ikara atoko ininiã, erekari atxiïti ikinipoko tiitxi auinii? Konapitini. Apiaerekata Teosokata ätipirika pikaikotini, kotxi tiitxi ïki poiãoka, pixinire karone apiata. ³⁷ !Apakata kãkiti ïkitxitiniri Teoso, iuamoni isini ïkapani.

³⁸ ïkorasaaki kãkiti !inirekari Teoso. Inirekari maerekatino. ïkorasaaki pipëtatinianõ nota, pipëtatinianõ nota sãkire, ininiãkara nota kãkiti itari iaxitikirino pëtataiko pite, uai nikanapiriãkasaaki. Nikanapiriãkasaaki, niri iotximere aua notamoni. Nina niri nitiriakorikata, erekarinikata.

9

¹ Xesosi txana ninoã:

—Hïxinikariko ia nisãkire. Apanakini hïte uatxa uai auakanii, hïpinini apisapanika himarotari Teoso auïtetxi ininiãua. Auïtetxi kaposotiireri itxaua —itxa Xesosi.

Moisesi, Eríasi Pakini

(Mateo 17.1-13; Arókasi 9.28-36)

² Seisi pakini õti napaka atoko Xesosi anikana Petro, Txiako, Xoão pakini oxiratarimoni, mitaxiratarimoni. Iuasaaki ninoanani aua iuaã. Iuaã auakasaakina, Xesosi ïto ipinipo itxa. ³ Imãka kasarori itxaua. Iotximere apaka auari. Ikara imãka saro atoko inakari, !auari. Kãkiti iteene arokiniãri mãkatxi, iuaritika ikara isaro atoko !auari. ⁴ Iuasaaki Eríasi, Moisesi pakini tokiã iuaã. Isãkirauatana Xesosikata. ⁵ Ininiã Petro txari Xesosi:

—Koerekareri, erekapitikari uai aãuini. Makamari papiri ipi äti pakini, pite ïkapani, Moisesi ïkapani, Eríasi ïkapani —itxa.

⁶ Ikara atoko itxa Petro, kotxi !imarotaikari isãkire, iteene ipïkarauatiniã.

⁷ Iuasaaki katxiãri apoka ninoamoni. Katxiãri äki auana. Katxiãri äki Teoso txari:

—Ere namarite, nitiretakiti. Hïkenakotariko iua sãkire —itxa.

⁸ Katimaritika Xesosi moianariakori sapotorika. Itikapokotana. Mitxi Xesosikata sãkirauatakani !auaika iuaã. Xesosinokara kaikota ninoakata.

⁹ Otanoxiratarari iokiriiãpotakasaakina, Xesosi txana:

—Mixikanani hïtikakiti !hïsapiretapiri apanakini. Nota hïtari iaxitikiri nipinaka atoko iuaïkana nõkitikaãkaua atokoikarako, hïsapiretariko mixikanani hïtikakiti —itxana.

¹⁰ Ininiã !isãpiretarina apanakinimoni. Ninoanoka isãkirauanãtana:

—Natokopa itxa kãkiti ipïkaripeka iuaïkana õkitikiniãua —itxanãtana.

¹¹ Ipimaãrina Xesosi:

—Kinirepa kaiõkatsoparerini sãkire: “Teoso mereëkiti apokini apisapanikarako Eríasi apokako.” Kinirepa ikara atoko itxana?

¹² Ininiã Xesosi:

—Inipitikara Eríasi apoka merepanika, kãkiti iposope inini ïkapani. Teoso sãkire iõkatsopatakori txari: “Kãkiti itari iaxitikiri iteene atatsiirauatako. !Inirekaãkako.” Kinirepa ikara atoko itxa Teoso sãkire iõkatsopatakori? ¹³ Nisãpiretaiko Eríasi apokapeka. Kãkiti misiritapekari iuani. Inireëka iaõka imisiritarina. Teoso sãkire iõkatsopatakori sãpiretapekari ikara ene —itxa Xesosi.

Amarini Maerekati Matamatakoti Auaïtotakiti

(Mateo 17.14-21; Arókasi 9.37-43a)

¹⁴ Ninoã apokaãpotakasaaki apanakini imoianariakorimoni, atamatana kãkitipokoni. Ninoã äkitana Xesosi moianariakori. Iuasaaki kaiõkatsoparerini kãkitikata itaparakiene-takakaua. ¹⁵ Iuasaaki kãkiti atapari Xesosi. Ipoxoniritikana itxana:

—Xesosi napani.

Ininiã imitekana iuamoni, okapireta itxarina:

—Piteni?

¹⁶ Ininiã Xesosi:

—Ari, notara.

Ipimaãna:

—Kininiãpa hĩtxitakakaua? —itxa.

¹⁷ Ininiã kiki kãkiti sauaki auakari apakapapiretari:

—Nota minamari namarite pitemoni. Maerekati matamatakoti auaĩtotari iua. ! Auiritari namarite sãkirauatini. ¹⁸ Iua maĩkasaakiri, okaĩtotari iua xiti. Iuasaaki namarite sorikipeta. Akatsakatsiriĩtaua. Itorõkaĩtota. Ininiã nimisãkiretamana pimoianariakori omitikiniri maerekati matamatakoti, txamari ninoa !iposotari.

¹⁹ Xesosi txari:

—!Kauikarei hĩte. Maerekati kamakanii hĩte. Kipakinikananipa Teoso nirekatari hĩtekata nauini? Kipakinikananipa Teoso nirekatari hĩte nimĩteenekini? Himinari amarini notamoni —itxana.

²⁰ Ininiã ninoa anikari iua amarini Xesosimoni. Iuasaakipeka maerekati matamatakoti atamatari Xesosi. Iuasaakipeka maerekati matamatakoti txĩkitakari amarini okaratiniua. Ininiã iua amarini iriãkata. Ikanapirikata, isorikipekata, itxĩkitakari amarini. ²¹ Xesosi pimaãri iri:

—Kirisaakipa ipotorika ĩkora atoko inini?

—Axapitipanikara ipotorika ĩkora atoko inini. ²² Itokata maerekati matamatakoti okaĩtotari xaminamoni. Itokata okaĩtotari kãuaãrimoni. Inirekari okiniri iua. Piposotiniãri, pomitikariko maerekati matamatakoti. Piamonĩkauako atepaniko —itxa iri sãkire.

²³ Ininiã Xesosi:

—Nota posotatari? Teoso sãkire auiãkari posotari ikaminiri ikinika —itxari.

²⁴ Iuasaaki iua kiki apakapapiretari iãtsaritika:

—Nauikapitikari piposotiire. Axapitikinoka ! nauikari, ininiã pisikaposotiiretano iteene pisãkire nauikini ĩkapani.

²⁵ Isãkirauanãtakasaakina, kãkitipokoni miteẽkata ninoamoni Xesosi kamakiti imarotina ĩkapani. Ininiã Xesosi itapararitika txitari maerekati matamatakoti:

—Pite maerekati matamatakoti. Pitxĩkitakari kãkiti masãkireti inini. Pitxĩkitakari kãkiti makenakokiti inini. Nota omitikai pite. Pipokĩka. Iuaĩkana !piĩroãpinikako iua ĩtoã —itxa Xesosi.

²⁶ Iua maerekati matamatakoti akiripoakata. Okaraĩtokatari atoko, sipe itxa. Iua amarini ipĩkari ĩto atokopeka itxa. Ininiã apanakini kãkiti:

—Ipĩpeka —itxarina.

²⁷ Ininiã Xesosi maĩkauakotari. Ōkitikari iua, ininiã itima.

²⁸ Xesosi aapokotxi ãki auakasaaki, iuanoka inakasaaki, imoianariakori pimaãri:

—Natokopa ininiãpa kona ate posotatari maerekati matamatakoti aomitikini? —itxana iuamoni.

²⁹ Ininiã Xesosi:

—Teoso pimisãkiretakasaaki, iuasaaki pimanipokotakaniãra, iuasaaki piposotari ikara atoko inakari maerekati matamatakoti pomitikini —itxa Xesosi.

Xesosi Iuaĩkana Sãpiretari Ipinini

(Mateo 17.22-23; Arókasi 9.43b-45)

³⁰ Iuaã ipotorikana. Ĩpirixititarina Kariréia tõpa. Xesosi !inirekari apanakini kenakoenetiniri iua auiniãtaã. ³¹ Kotxi inirekari oerekinina imoianariakorinoka ipinini pirena. Ininiã Xesosi:

—Nota hĩtari iaxitikiri mĩkapiritaãkako. Nisikaãkako kikiakorimoni inirekaãkitina ikaminina tĩkane. Ninoa okano nota. Ipi õti ãti õti inakasaaki iuaĩkana nõkitikauako —itxa.

³² Ninoa !imarotari Xesosi sãkire. Ninoa pĩkari ipimainirina iua.

*Kiripa Kākiti Apiatakari Txataua?**(Mateo 18.1-5; Arókasi 9.46-48)*

³³ Kapanaoō sitatxiti apokana. Aapokotxi āki auakasaakina, Xesosi pimaãna ninoa: –Natokopa itxa hīsākire, uaimoni aĩkasaaki hĩtaparakienatakakasaakiua? –itxa.

³⁴ Masākirenika itxana, kotxi kimaporiãpo ninoa sākire: “Īkiripa ate apiatakari?” itxana.

³⁵ Xesosi, iitopãka atoko, akirita itxana imoianariakori tosi pakini.

–Hĩkinika uaimoni hiĩtopãka. Apiatakari pininiãua pinirekiniã, piteka poiãotakaua. Ikinimane nitiri pitxauako.

³⁶ Xesosi kosekari amarini, mina itxari imoianariakori sauaki, katarata itxari.

³⁷ –Papakapiniãri amarini pipoxokoniritika, papakapano nota apaka. Papakapiniãno nota, na notananini papakapa. Iuasaaki papakapari iua uaimoni niokanatakiri –itxa Xesosi.

*Maerekani Matamatakoni Omitiãkari**(Arókasi 9.49-50)*

³⁸ Xoão sãpiretari Xesosi:

–Koerekareri, ate kenakotari kiki omitikinina maerekani matamatakoni pite uãkaã. Kona pimoianarini iua. Ininiã ate: “Ikara atoko !pitxape,” atxari.

³⁹ Ininiã Xesosi:

–!Hĩotokakapiri ikara ikamini. Kākiti nota uãkaã maerekati matamatakoti omitiãkari, kona imisākirepiretano. ⁴⁰ Iua ate mokaiakari minakatiua. Atiretakiri itxaua. ⁴¹ Nota atãopitikara nitxai hĩte. Atxiĩti kākiti sikai ãparaã, kotxi Teoso mereẽkiti nakiti pitxaua. Iua kamakiti erekari, ininiã apakapapitkariko ikamakiti ĩki.

*Maerekati Oerekakari**(Mateo 18.6-9; Arókasi 17.1-2)*

⁴² !Erekari kākiti mitari oerekiniãri amarini nota sākire auiãkari maerekati ikamini. !Erekari. Erekamariko kai mitari iaxirikaãkamako iua kākiti mitari nokiã, eereka okaãkamako ipoamoni ipinini ĩkapani. ⁴³ Piuako maerekati ikamãkitakiniãi, pitsotakari. Erekamariko ãtinani piuako Teosokata ãtipirika pauini ĩkapani, kotxi maerekati pikaminiã, pisa maerekani misiritikoãtaã. Iuaã xamina tirinapika. !Oakaãka. Atxiĩti piuako ipi aua, txamari pite sari iuaãtaã. !Erekari. ⁴⁴ Iuaã kĩtxi piĩtoã auakaro !opina. Xamina !oakaãka. ⁴⁵ Pikiti maerekati ikamãkitakiniãi, pitsotakari. Erekamariko ãtinani pikiti Teosokata ãtipirika pauini ĩkapani, kotxi maerekati pikaminiã, pisa maerekani misiritikoãtaã. Iuaã xamina tirinapika. !Oakaãka. Atxiĩti pikiti ipi aua, txamari pite sari iuaã. !Erekari. ⁴⁶ Iuaã kĩtxi piĩtoã auakaro !opina. Xamina !oakaãka. ⁴⁷ Poki maerekati ikamãkitakiniãi, pimakatxakari. Erekamariko ãtinoka poki auini Teoso auĩtetxi ininiãtaãua pisini ĩkapani, kotxi maerekati pikaminiã pisa maerekani misiritikoãtaã. Iuaã xamina tirinapika. !Oakaãka. Atxiĩti poki ipi aua, txamari pite sari iuaã. !Erekari. ⁴⁸ Iuaã kĩtxi piĩtoã auakaro !opina. Xamina !oakaãka.

⁴⁹ Iõkira nipokorimoni takiko atokokana xamina tirinakari takaãkako ikinimane kãkitimoni. Ikara atokokana ikinimane ataerekataãkako. ⁵⁰ Iõkira erekaro. Txamari iõkira koketikosaaki kipatxikata, !erekaikaro. !Apakata xinitxi piõkiratini ĩkapani. Atão iõkira atoko hĩtxako. !Hĩtxitakakapeua.

10*Kiki Ītanorokata Itakanapakakini**(Mateo 5.31-32; 19.1-12; Arókasi 16.18)*

¹ Xesosi potorika iuaã. Xotéia tõpa isa. Īpiriãkitari Xotão kãuaãriti. Iuaĩkana kākiti apotiitaua iuamoni. Kaiãopokori kākiti, ininiã oerekarauata, mitxi oerekarauanãtini atokokana.

² Kikiakori, pariseo inakaniua, apoka Xesosimoni. Ninoa nirekari Xesosi kerokiniri isäkire, ininiã ipimaãrina:

—Atãokani erekari kiki takanapiniro ïtanoro?

³ Ininiã Xesosi:

—Kiatokopa itxa Moisesi paniãtakiti?

⁴ Ininiã ninoa:

—Moisesi paniãtari kiki iõkatsopatiniri aãtsopa, ïtanoro itakanapini aãtsopate, ininiã eereka auiritari iua iokanatiniro oa —itxana.

⁵ Ininiã Xesosi:

—Moisesi auiritai hïtanoro hïtakanapini, kotxi paikori hïxinire. Teoso nireëkiti hi-manirekakani xikara, Moisesi auiritai hïtanoro hïtakanapini. ⁶ Kotxi merepitipanika Teoso ikinipoko ikamakasaaki, ikamari kiki, sito pakini. ⁷ Ikara atoko ininiãpitikara, kiki takanapari iri, inoro pakini, ïtanorokata auini ïkapani. ⁸ Ininiã ätika atoko itxauana. Ininiã ipi kãkiti !itxaikauana. Ätinokara itxapekauana. ⁹ Ikara atoko ininiã, !erekari kãkiti kaiarikiniri Teoso apotiitakini —itxa Xesosi.

¹⁰ Eereka Xesosi imoianariakorikata kanapiriã aapokomonina. Iuaã apokasaakina, imoianariakori pimaãri iua ikara sãkiretxiti iuaïkana oerekinina ïkapani. ¹¹ Ininiã isãpiretana:

—Kiki ïtanoro takanapakari, äto sito itaka inakari, maerekati ikaminaro ïtanoro. ¹² Iua atokokana sito õtaniri takanapakaro, äti õtanirita inakaro maerekati okaminiri õtaniri —itxa Xesosi.

Xesosimoni Amarini Apokini

(Mateo 19.13-15; Arókasi 18.15-17)

¹³ Iposo atoko ätikaka kãkiti anikari amarini Xesosimoni. Inirekarina Xesosi misãkiretiniri Teoso ninoa amarini ïkapani. Txamari imoianariakori txitana. !Auiritana amarini anikinina Xesosimoni. ¹⁴ Xesosi ikara ikenakotakasaaki, !apokaerekatari. Ininiã iua:

—Hãuiritariko amarini notamoni apokini. !Hïotokakapiri, kotxi kãkiti Teoso auïtetakani amarini atoko itxauana. ¹⁵ Ia atão: Kãkiti mapakapakaniãri Teoso, amarini apakapiniri atoko iminakaniã, kona isa Teoso auïtetxi ininiãtaãua —itxa Xesosi.

¹⁶ Ininiã Xesosi kataratari amarini. Itakari iuako ikiina nopini. Amanaãri Teoso erekari itakini amarinimoni.

Ätokori Ito Txineiroteri

(Mateo 19.16-30; Arókasi 18.18-30)

¹⁷ Xesosi iuaïkana potorika. Iuasaaki ätokori miteka iuamoni. Ikapotoreëkaua Xesosi apisatoõ.

—Koerekareri erekari, kiripa nikama Teosokata ätipirika nauini ïkapani? —itxa.

¹⁸ Ininiã Xesosi:

—Kininiãpa “erekari” pitxano? Teosonanira erekari. ¹⁹ Pite imarotari Teoso paniãtakiti. !Pokaniuatape. !Pisirïkape äti ïtanorokata. !Piïtiriuatape. Poxiene !pikamape. Apanakini !pimisirienetape. Piri, pinoro pakini pipaxitako —itxa Xesosi.

²⁰ Iua ätokori txari:

—Noereëkiri, axapitipanikara ninakasaaki, nikïpitari ikara Teoso paniãtakiti —itxari.

²¹ Ininiã Xesosi apokaerekatari iua.

—Auapanika ätinoka pikamini tïkane. Pisa. Tiitxi ikinika pinakiti pivëtxitako. Txineiro papakapakito pisikako matxineirotenimoni. Eereka pimoianatanoko nota. Ikara atoko inakari pikaminiã, Teoso tixine papokasaaki ikinipoko erekari auiniiko pite —itxari iua.

²² Ikara Xesosi sãkire ikenakotakasaaki, imatinaniuata. Isipe. Maerekaxiniretinoka itxa, kotxi kaiãori itii.

²³ Xesosi sapotorika, misãkireta itxana imoianariakori:

—Pamimapaniri katxineiroteri sini Teoso auïtetxi ininiãtaãua —itxa.

²⁴ Imoianariakori:

—Anekani? —itxana.

Iuaĩkana Xesosi txari:

—Pamimapaniri katxineiroteri sini Teoso auĩtetxi ininiãtaãua. ²⁵ Atauako kamero napatari ãkorike sonakiã? Apia mimari kãkiti katxineiroterini auĩtetiniri Teoso —itxana.

²⁶ Imoianariakori iteene tsorĩkaãnãta.

—Ininiã kipa sari Teoso auĩtetxi ininiãtaãua? —itxana imoianariakori.

²⁷ Ininiã Xesosi apakapapiretana:

—Teoso posotari ikinipoko ikamini. Kãkiti !iposotari. Teoso posotari anikiniri katxineiroteri itixinemoni —itxa.

²⁸ Petro txari:

—Ate takanapapekari ikinipoko pite amoianatini ĩkapani —itxari Xesosi.

²⁹ Ininiã Xesosi:

—Atão nitxai. Paapoko pitakanapiniã, pitariakori, pitaroakoro, piri, pinoro, pĩtanoro, pamariteni, pikikiote, pitakanapiniã notakata pisini ĩkapani, Teoso iokanapirena erekari pisãpiretini ĩkapani, ³⁰ pitakanapakiti iua apiata nisikaiko. ĩkorasaaki nisikaiko itomaneri aapokotxi, itomaneri pitariakori, itomanero pitaroakoro, itomanero pinoroakoro, itomaneri pamariteni, itomaneri pikikiote, nisikaiko. Txamari iusaaki patatsiitari pimisiritiko. Iuaritika eereka Teosokata pauapika ãtipirika. ³¹ Uatxa apiari inakari, iusaakiko minakati itxauako. Uatxa minakati inakari, iusaakiko apiari itxauako —itxa Xesosi sãkire.

Iuaĩkana Xesosi Sãpiretari Ipinini

(Mateo 20.17-19; Arókasi 18.31-34)

³² Xesosi imoianariakorikata Xerosareẽ kimaporite iãpotakasaakina, Xesosi ĩkiika. Iusaaki ninoa maerekaxiniretinoka itxana. Apanakini ninoa tikini sikani pĩkarauata. Ininiã Xesosi iotoka. Akiritana imoianariakori tosi pakini. Isãpiretana paĩtiki kãkiti kamakiti iuamoni tĩkane. ³³ Ininiã iua:

—Hĩkenakota. Xerosareẽmoni asa uatxa. Iuaã nota hĩtari iaxitikiri sikaãkako sasetotxi auĩteakorimoni, kaiõkatsopareriakorimoni pakini. Ninoa paniãtariko nota okiko. Iposo atoko Xoteo minakonimoni sika ninaãkako. ³⁴ Inapetanonako. Inoropatanonako aãpitsaã. Ikiisokanonako. Iposo atoko oka ninaãkako. Ipi ãti pakini õti inakasaaki iuaĩkana nõkitikauako —itxa imoianariakorimoni.

Txiako Xoão Pakini Amanaãkiti

(Mateo 20.20-28)

³⁵ Iposo atoko Txiako, Xoão pakini sari Xesosimoni. Ninoa Sepeteo anaakori.

—Koerekareri, ate nirekari aamanaãkiti pikamini —itxana.

³⁶ Ininiã Xesosi pimaãna:

—Kipa hinireka nikaminii hĩte? —itxana.

³⁷ —Pite ikinimane auĩte pinakasaakia, pauiritaua pitekata aĩtopãkini, pikikomoni, pisaneremoni aĩtopãkini —itxana.

³⁸ Ininiã Xesosi:

—!Himarotari hamanaãkiti, kotxi mapaõti napa atoko nota apakapariko iãtatxi tsiĩtxiã niãtini ĩkapani. Hĩposotatari ikara hiãtini? Nipatxisataãkako tsiĩtxiã. Hĩposotatari ikara atoko hĩpatxisatiko?

³⁹ —Aposotapitika —itxana ninoa.

Xesosi txana ninoa:

—Inipitikara hiãtariko nota iãtakiti. Inipitikara hĩpatxisataãkako nota patxisatiko atokokana. ⁴⁰ Txamari !niposotari nauiritinii hĩte nikikomoni, nisanaremoni hĩtopãkini, kotxi Teoso mereẽpekana kãkiti nikikomoni, nisanaremoni topãkakani tĩkane —itxa Xesosi.

⁴¹ Xesosi moianariakori tesi pakini kenakopiretakasaakiri Txiako, Xoão pakini amanaãkiti, ininiã ninoa omanatana. ⁴² Ininiã Xesosi akirita txana imoianariakori:

—Uaimoni hina. Hiĩtopãka notakata —itxana ninoa.

—Hĩte imarotari Xoteo minakaniua auĩteakori pataparana. Ninoa auiritari kãkiti kaminiri ninoa paniãtakinoka. ⁴³ Ninoa atoko !hĩtxape. Apiari pininiua pinirekiniã, pimoianatana apanakini. ⁴⁴ Apanakini auĩte pininiã pinirekiniã, nitiritxi pitxauako merepanika. ⁴⁵ İkara atoko nitxa nota hĩtari iaxitikiri İkorapokoriti napokasaaki. Ninitiri ! auari. İkorapokoriti napoka, kãkiti nitiri nininiua İkapani, kãkiti nitiretini İkapani. İkorapokoriti napoka nipinini İkapani, kaiãopokori kãkiti mapinakani İkapani, kotxi nota İkitxirauata ninoa mapinakani İkapani —itxa Xesosi.

Mõsiãreti Patximeo Inakori
(Mateo 20.29-34; Arókasi 18.35-43)

⁴⁶ Xesosi imoianariakorikata apoka Xerikoo sitatxiti. Eereka ipotorikasaaki imoianariakorikata itomaneri kãkitikata, iusaaki mõsiãreti Patximeo inakori kimapori İtiniãpo iitopãkanãta. Tximeo inakori ãkiri iua. Iua mõsiãreti amanaãnãtaro txineiro.

⁴⁷ Iua kenakotari Xesosi Nasareekiri inapaenetini, ininiã akirinãta:

—Xesosi, Taviini apika mekanirii, piamonİkanoko —itxa.

⁴⁸ Ininiã apanakini kãkiti pinitari:

—Maãtako. !Pakirinãtape —itxarina mõsiãreti.

Iuaritika apiata akirinankata:

—Taviini apika mekani. Piamonİkanoko nota —itxanãta.

⁴⁹ Ininiã Xesosi iotoka itxa.

—Hãkiritari iua mõsiãreti —itxa.

Ininiã ninoa:

—Pipoxokoniuatako. Põkitikaua. Akiritapekai —itxarina iua mõsiãreti.

⁵⁰ Ininiã Patximeo okanapari imãka inopini auakari. Pakoteri õkitikaua, sa itxa Xesosi akiritiniri manapi.

⁵¹ Ininiã Xesosi:

—Kİpa pinireka nota kaminii pite? —itxari.

—Apiananiri, nõsiãrera ninireka —itxari.

⁵² Ininiã Xesosi:

—Pisa. Erekapekai, kotxi pite auikari niposotiire —itxari.

Iusaakipeka Patximeo kõsiãrepeka itxa. Xesosikata sa itxa kimaporiã.

11

Xesosi Xerosareẽ Apokaãpotini
(Mateo 21.1-11; Arókasi 19.28-40; Xoão 12.12-19)

¹ Xesosi imoianariakorikata imatokoãpotari Xerosareẽ. Őtanoxiratari, oriva mina takikoãtaã takote apokana. Iuaã aua aapokotxi Petxipaxee inakori, Petãnia inakori apaka. Iuaã Xesosi İokanatana ipi imoianariakori.

² —Hİsa ikiraã kaixiti auakari aapokotxiã. Iuaã hãpokasaaki, hãpokari xomẽta ãkiri iaxiriãkori. Kãkiti !iĩtopãkapanika iua nopini. Hİkoxirikari. Uaimoni mina hĩtxari. ³ Kãkiti pimaãkasaakii hĩte: “Kinirepa hİkoxirikatari xomẽta ãkiri?” hinikosaakiko: “Apiananiri nirekari iua. Iuaİkana akamoni aminariko,” hĩtxako.

⁴ Ininiã eereka isana. Apokarina iua xomẽta ãkiri iaxiriãkori kimaporiã aapokotxi tore takote. Ininiã ikoxirikarina. ⁵ ãtikaka kãkiti iuaã auakani:

—Kinirepa hİkoxirikatari xomẽta ãkiri? —itxana Xesosi moianariakorimoni.

⁶ Ininiã Xesosi paniãtini iaõka apakapapiretana. Ininiã kãkiti iuaã auakani:

—Ininiã hanikaikari —itxana.

⁷ Ninoa anikari xomẽta ãkiri Xesosimoni. Ininiã imãkana ãti imãkana nopini auakari itakarina xomẽta ãkiri nopini Xesosi topãkini İkapani. ⁸ Apanakini kãkiti matameẽkari imãkana ãti imãkana nopini auakari kimaporiã Xesosi napini tİkane. Apanakinipekana

sauakari aãxike. Kimaporiã itakaãpotarina. ⁹ Ninoa Xesosi tikini ïkani, iua apisa sikani pakini akiriãpokatana ipoxokoniritikana imakinikana:

–Peerekari Teoso, Apiananiri. Iua iokanatai pite atemoni. Anirekari erekari isikinii pite. ¹⁰ Peerekari Teoso, aãtokirini Tavii aãuïte ininiua atokokana iuaïkana apoka. Peerekari Teoso, iaxiti apiko nopinixiti auakari. Apiananiri itxaua –itxaãpokatana.

¹¹ Xesosi apoka Xerosareë. Teoso misãkiretiko aikotimoni isa. Iuaã ïroã itxa. Ikinika iroko äki itikapokota. Iua atoko mapiãpe, ininiã isari Petãnia aapokotxitimoni tosi imoianariakorikata.

Piko Mina Marito Pirena
(Mateo 21.18-19)

¹² Ikatimatakasaaki ipotorikana Petãnia. Iuusaaki Xesosi natxita. ¹³ Ikira atoko atamataro piko mina. Ito otsopa aua. Isari oamoni kariro iuaãkatiniãro, kotxi piko mina tsopa auakasaaki, ori auapitika. Txamari apokasaaki, otsopanani auari, kotxi kona ori manapini. ¹⁴ Ininiã Xesosi:

–Kãkiti !itximaikaiko piri –itxari piko mina.

Imoianariakori kenakotari isãkire.

Pirãtxi Vẽtxitakani Omitikiko
(Mateo 21.12-17, 20-22; Arókasi 19.45-48; Xoão 2.13-22)

¹⁵ Xesosi imoianariakorikata apoka Xerosareë. Xesosi ïroã Teoso misãkiretiko aikotiã. Omitikana kãkiti iuaãtaã amotiitakani, sikatiitakani. Ikapakitikari amesa ninoa tx-ineiro apakapakani amesane. Ikapakitikari kamoã vẽtxitakani topãkini apaka. ¹⁶ Iua ! auiritana kãkiti anikiniri tiitxi aiko ïpirikoatinina. ¹⁷ Xesosi oerekana kãkiti iuaã auakani:

–Teoso sãkire iõkatsopatakori txari:

Ia naapoko. “Teoso misãkiretiko aikoti” akiritaãkako, ikini itixiti auakani misãkiretinino ïkapani,

itxa. Txamari hïte txïkitakari ia aiko kiïtiririni iomaãtiniãtaã ininiua –itxa Xesosi.

¹⁸ Sasetotxi auïteakori, kaiõkatsoparerini pakini kenakotari Xesosi sãkire. Ininiã ninoa tsorïkaãta. Ixinikaxititana.

–Kanatokopa atxatari Xesosi aõkini? –itxanãtana.

Ikinimane iteene apokaerekatari Xesosi sãkire, ininiãkara sasetotxi auïteakori, kaiõkatsoparerini pakini pïkari Xesosi.

¹⁹ Ipiãkapokotapeka Xesosi takanapari sitatxi imoianariakorikata.

²⁰ Katimatinïkata kimaporiã isaãpotakasaakina, atamatarona oa piko mina. Opïpe. Okotsapekara ipinakepeta apaka. ²¹ Petro xinikari iua apisapanika Xesosi sãkire, ininiã akiritari Xesosi:

–Koerekareri, patamataro piko mina. “Kãkiti !itximaikaiko piri,” pinakito. Oa piko mina ipïpeka –itxari.

²² Ininiã Xesosi:

–Pauikapiretariko Teoso sãkire. ²³ Atãoenekara nisãpiretai. Pauikiniãri Teoso sãkire, piposotari pipaniãtiniri ikira õtanoxiratar: “Põkitikaua. Pokakataua potxoari uinitimoni.” Pãkixinireë iteene pauikiniãri pisãkire iaõka apokini, ininiã apokapitakako pamanaãkiti. ²⁴ Ikara atoko ininiã nota txai hïte, Teoso pimisãkiretakasaaki, pamanaãkasaakiri pinirekakiti, pauikariko iposope Teoso sikinii, ininiã papakapanikariko. ²⁵ Teoso pimisãkiretakasaaki, ãti pomanatiniã, pitakanapariko pomanãkare. Pimaxinïkaretiniãri maerekati ikaminii, ininiã piri iaxitikiri maxinïkaretari maerekati pite kamakiti. ²⁶ Pimamaxinïkaretakaniãri maerekati ãti kamakiti pitemoni, ininiã piri iaxitikiri kona maxinïkaretari maerekati pite kamakiti apaka.

Xesosi Paniãtakari Moerekakoni
(Mateo 21.23-27; Arókasi 20.1-8)

²⁷ Iuaĩkana apokana Xerosareẽ. Xesosi tĩpokota aiko Teoso misãkiretiko pirikere ãki tinikata. Itĩpokonãtakasaaki, sasetotxi auĩteakori, kaiõkatsoparerini, kiomãtxiakori pakini apoka iuamoni. ²⁸ Ininiã ninoa txari:

—Kipaniãpa pikamari ãkora pikamakiti? Kipa paniãtai? —itxarina Xesosi.

²⁹ Ininiã Xesosi apakapapiretana:

—Nota apaka pimarauatako hĩtemoni. ãtinoka nipimaãiko hĩte. Hĩsãpiretiniãno, nota sãpiretai hĩte niokanatakiri uãka apaka. ³⁰ Kipa paniãtari Xoõoni ipatxisarauatini? Teosokani paniãtari Xoõo? Kãkitikani paniãtari Xoõo? Hĩsãpiretano —itxana.

³¹ Ininiã ninoa xinikaxitinãta. Imisãkiretakakana. Ipimaãkakana:

—Natokopa itxa aãpakapapiretiniri iua? Aãpakapapiretiniãri: “Teoso paniãtari iua,” ininiã iua: “Kinirepa kona hãuikatari iuani sãkire?” itxapemaua. ³² Aãpakapapiretiniãri: “Kãkiti paniãtari iua,” ikinimane omanataua —itxanãtana.

Ninoa pĩkari kãkiti kotxi ikinimane auikari Xoõoni atão Teoso sãkire sãpiretakari ininiua.

³³ Ikara atoko ininiã ninoa apakapapiretari Xesosi:

—Ate !imarotari.

Ininiã Xesosi:

—Ikara atoko ininiã, nota !nisãpiretai hĩte nipaniãtakiri uãka.

12

Parĩkauatakani Maerekani (Mateo 21.33-46; Arókasi 20.9-19)

¹ Eereka Xesosi sãpiretana ninoa sãpirenatxi atão inakari oerekiko. Itxari:

—Kiki takarauata. Txipokori ova inakoronoka itaka. Ipiriketari. Ikamari ova maõkiko. Iposo atoko itakare apanĩkakixitika ikamari aapokotxi axapitiri õtanori ikikiote imakinetini ãkapani. Iposo atoko ipaniãtana ãtikaka kikiakori itakare inĩkatinina ãkapani, kotxi iua sariko õtakoxiti. Ninoa apakapamaroko ipixini ova iparĩkana ãki. Iposo atoko katakareri sipe. ² Ova manapi, iua katakareri iokanatarini inininiã ninoa kikiakorimoni ova ipixini apakapini ãkapani. ³ Txamari iua apokasaaki ninoa maĩkari iua. Ixirokitatarina. “Pisipeka,” itxarina. Miketika ikanapiripe.

⁴ —Iuaĩkana katakareri iokanatarini ãti inininiã ninoamonikana. Txamari ninoa kikiakori misiritari iua. Kai soroã ikiporonakarina, karota itxapirina ikiiã. ⁵ Iuaĩkana katakareri iokanatarini ãti ninoamonikana, txamari ninoa okapiri iuani. Kaiãopokori inininiã ninoamonikana iokanata ninoamoni. Apanakini inoropatana. Apanakini okana. Itxaãpotana.

⁶ —Iua katakareri auapanika ãtinoka iokanatinini ãkapani, imi iteene itiretakiti. Imapotõkire iokanatarini imi ninoamonikana. “Notamoni ninoa paxitariko namarite” itxa. Ininiã imi apoka ninoamoni. ⁷ “Katakareri ãkiri napani. Maõkari. Aõkiniãri, itakare imakinika kaikotinãua ate,” itxakakana kikiakori.

⁸ —Ininiã ninoa maĩkari katakareri ãkiri, oka itxapirina, kikio xiripire oka itxarina iĩto.

⁹ —Ininiã kiripa ikama katakareri? —itxa Xesosi.

—Iua kanapiriã. Okanako ninoa kikiakori. Ipaniãtana apanakini itakare imakinetinina ãkapani —itxa Xesosi.

¹⁰ Hĩte atatsopatapekari ia Teoso sãkire iõkatsopatakori: Aapokotxi kamakani kona nirekari ãtika kai soro. Iua kai imanirekakiniti kai apiari itxapekaua. Apanakini kai soro maĩkakari itxaua.

¹¹ Teosokara txĩkitakari ikara atoko ininiã. Ikara peerekari atemoni, itxa Teoso sãkire iõkatsopatakori.

¹² Xoteo auĩteakori imarotarina Xesosi sãkire. Ninoa imarotari ikamakitina takari makinetakani kamakiti atokokana, ininiã ninoa omanãkarauata Xesosi sãpiretakiti xika. Ninoa kinirão maĩkaka itxarina Xesosi, txamari !imaĩkarina iua, kotxi ipĩkarina kãkiti. Ininiã itakanaparina Xesosi, sipe itxana.

*Homano Auñte Ìkitxitiko
(Mateo 22.15-22; Arókasi 20.19-26)*

¹³ Eereka Xoteo auñteakori iokanatanana ãtikaka Erotxi sãkire auñãkani, ãtikaka pariseoakori pakini Xesosimoni. Inirekarina Xesosi kerokiniri isãkire, kotxi ninoa nirekari Xesosi kaminiri maerekati imañkinirina ìkapani. ¹⁴ Ninoa apokasaaki, imisãkiretarina Xesosi:

—Koerekareri, ate imarotari pite sãkire atãonani ininiãua. Poerekari atãonani Teoso nireëkiti kãkiti kamini ìkapani. !Pipìkari kãkiti. Kãkiti poiãori pimisãkiretini atokokana kãkiti apiari pimisãkireta apaka. Ikara atoko ininiã, pisãpiretau. Atãokani txineiro asikini Homanoakori auñtemoni, Sesa inakorimoni? ¹⁵ Atãokani asikiniri iuamoni? Apakata amasikakaniri iuamoni? —itxana.

Xesosi imarotari isãkirena. Imarotari ninoa pimarauatini isãkire ikerokini ìkapani. ! Inirekarina atão inakari imarotinina. Ininiã Xesosi txana ninoa:

—Kinirepa hãtamakaerekatano nota? Himinaro txineirota. Ninirekari natamatiniro — itxa.

¹⁶ Ininiã iminarona.

—Kisanõkapa ia? Kiuãkapa aua uai? —itxana.

Ininiã ninoa:

—Sesa sanõka, iuãka pakini —itxana.

¹⁷ Ininiã Xesosi:

—Ikara atoko ininiã, hñsakariko Sesamoni iua nakiti. Hñsakariko Teosomoni iua nakiti —itxana.

Ininiã kasãkirena ninoa, kotxi peerekari Xesosi apakapapiretakiti.

*Ipìkari Òkitikiniua Mauikakoni
(Mateo 22.23-33; Arókasi 20.27-40)*

¹⁸ Kikiakori satoseo inakoni, !auikari kãkiti ipìkaripeka iuañkana òkitikiniua iuañkana auãki inini ìkapani. Ninoa satoseo apoka Xesosimoni.

¹⁹ —Koerekareri, Moisesini iõkatsopatarari ia ipaniãtakiti: “Kiki meenetipanika ipininiã, iua itari takaroko tikinitakoro. Iua itari keene ininiã, itakauãkatari amarini iua itarini ipìpekarini uãka,” itxa Moisesi. ²⁰ Setxi itaritxiakori aua ìkorapokoriti. Apia kiomanetakari takaro sito. Txamari ipìkasaaki meenetopanika itikinitaro. ²¹ Ininiã ãti itari takaro oakana. Ipìkasaaki !keenepanikaro oa. Iua atokokana itxape ãti itari. ²² Ininiã imakinikana ninoa takapiimaro oa. Ikinikana ninoa meenenipanika ipìpena. Eereka oanipekana apaka opìpe. ²³ Ipìkani òkitikasaakiaua, kiriiñtanoropa otxatauako? Kotxi ìkinikana setxi takapekaro oa —itxana.

²⁴ Ininiã Xesosi:

—Hñte kerokari, kotxi !himarotari Teoso sãkire iõkatsopatakori. Teoso posotiire apaka !himarota. ²⁵ Ipìkani iuañkana òkitikasaakiaua, Teoso nitiriakori iaxitikini atoko itxapekauana. !ñtanorouataikako. ²⁶ Hñte !auikari ipìkani òkitikiniua. Hñte atatsopatapekari Moisesi iõkatsopatakiti aanaia tirinakari pirena. Iuasaaki Teoso misãkiretari Moisesi: “Apraão, Isaki, Xakoo pakini Teosonekarano nota,” itxari Moisesimoni. ²⁷ Ikara atoko ininiã Apraão, Isaki, Xakoo pakini òkitikapekaua iuañkana, kotxi auãki inakani Teosonera iua. Kona ipìkani Teosoneni itxaua Teoso. Amananini hñkerokari —itxa Xesosi satoseoakorimoni.

*Teoso Paniãtakiti Apiari Akamini
(Mateo 22.34-40)*

²⁸ Iuaãtaã aua kaiõkatsopareri. Ikenakotana ninoa misãkiretakakiniua. Ikenakotari Xesosi apakapapiretakiti erekari ene. Ininiã iua pimaãri Xesosi:

—Ìkiripa Teoso paniãtakiti apiari txataua? Kipa apiaerekata Teoso nireëkiti akamini?

²⁹ Xesosi apakapapiretari:

—Teoso paniãtakiti apiari ia: “Isaeo tõpa auakani, hñkenakota. Ateosone Apiananiri iua. Iuananira Teoso txaua. ³⁰ Pitiretariko Apiananiri piTeosone, ikinipoko pinireëkitiã, ikini pãkixinireë, ikinipoko pixinikakitiã, ikini pitaparaxinireë pakini.” ³¹ Ætipekana Teoso paniãtakiti apiari ia: “Piteka pitiretiniãua atokotxikana, pitiretariko ãti.” Iuananira Teoso paniãtakiti ipi apiari txaua —itxa Xesosi.

³² Ininiã iua kaiõkatsoparererini apakapapiretari Xesosi:

—Inipitikara pisãkire, koerekareri. !Auari ãti Teoso. Iuanokara auari. ³³ Ininiã atiretamariko Teoso ikinipoko anireëkitiã, ikinipoko axinikakitiã, ikini ataparaxinireë. Atiretamanako apanakini ãtoka atiretini atokokana. Ikara Teoso paniãtakiti ipi apiari txaua. Teoso paniãtakiti pirãtxi aõkini iua ãkapani poiãori —itxa Xesosimoni.

³⁴ Xesosi kenakotakasaakiri isãkire ereka inini, itxari iua:

—Pite auñtearitari Teoso.

Iposo atoko apanakini !kataparaxinireika apikomoni ipimainirina.

Teoso Mereëkiti Tavii Apika Mekaniri

(Mateo 22.41-46; Arókasi 20.41-44)

³⁵ Xesosi Teoso misãkiretiko aikoti oerekaruanãtakasaaki, ipimaãri:

—Kinirepa kaiõkatsoparererini sãkire: “Tavii apika mekanirako Teoso mereëkiti txauako?” itxana. ³⁶ Erekariko Matamatakoti kamasãpirenatakari Tavii:

Apiananiri misãkiretari niauñte: “Nota kikomoni piitopãkiniritika nixipokariko pimokaiakariakori. Nikamariko ninoa pikiti pitakiniãtaã atoko ininiua,” Apiananiri txari niauñte,

itxa Taviini. ³⁷ Tavii akiritari iua Teoso mereëkiti “Niauñte.” Ikara atoko ininiã, natokopa itxa iua Tavii apika mekani ininiua? —itxa Xesosi.

Iusaaki ikinimane kãkiti iuaã apitiitakaniua potxitari Xesosi sãkire.

Kaiõkatsoparererini Maerekani Pirena

(Mateo 23.1-36; Arókasi 20.45-47)

³⁸ Xesosi oerekaruanãtakasaaki, õtãkikana kãkiti:

—Kaiõkatsoparererini moianari !hñtxapeua. Ninoa potxitari mãkatxi ereri ieretakinina kãkiti apisatoõ inapinina ãkapani, kãkiti atamatinina ãkapani. Ninoa apokaerekatarini imisãkiretikona ipaxitikona nipokori sikikoãtaã inapaãpotakasaakina. ³⁹ Ninoa potxitari kãkiti topãkini apiaerekatakari nopini iitopãkinina aiko Xoteo apotiitiniãtaãua. Kiiniriã ninoa potxitari kakiiniriteri topãkinimoni iitopãkinina. ⁴⁰ Ninoa mixirikari tikinitakoni aapoko, iuaritika okanani imisãkiretarina Teoso kãkiti apisatoõ, ininiã kãkiti uãkatari ninoa erekarini atoko ininiãuana. Teoso iteene misiritanako kãkiti ikara atoko inakani.

Tikinitakoro Matxineiroto Sikakito

(Arókasi 21.1-4)

⁴¹ Xesosi topãka txineiro Teoso ãkapani apakapikoãtaã. Xesosi itikari kãkiti ieretakiniro txineiro kaixa ãki. Itori katxineiroterini okaro txineiro mirikinito kaixa ãki. ⁴² Eereka tikinitakoro matxineiroto apoka iuaã. Otakaro ipi txineiro otaki kaixa ãki. Poiãonoka txineiro. ⁴³ Ininiã Xesosi akiritana imoianariakori.

—Inipitikara nisãpiretai hñte. Õkora tikinitakoro matxineiroto sikakito apiata. Apanakini sikakito poiãoka. ⁴⁴ Kotxi ninoa sikaro txineiro itetakoro. Oa matxineiroto sikari okinika onakito —itxa Xesosi.

13

Teoso Misãkiretiko Aikoti Irikiko

(Mateo 24.1-2; Arókasi 21.5-6)

¹ Teoso misãkiretiko aikoti Xesosi pokãkasaaki, imoianari misãkiretari iua:

—Koerekareri, patamata ia kai aapokotxiti itomaneri. Amaripokori. Ia aiko Teoso misãkiretiko peerekari.

² Ininiã Xesosi:

—Hâtamatari ia aiko mitari. Æti ôti imakinika irikaãkako. Kona kai kaikotaikako ãti kai nopini —itxa Xesosi.

Misirikaretxi Apokaenetini

(Mateo 24.3-14; Arókasi 21.7-19)

³ Xesosi topãka oxiratarari nopini Teoso misãkiretiko aikoti apisatoõ. Iuaã aua oriva minanape. Iuasaaki Petro, Txiako, Xoão, Ætree pakini apoka iuamoni. Ninoanoka aua iuaã. ⁴ Ipimaãrina Xesosi:

—Kirisaakipa aiko Teoso misãkiretiko irikaãka? Natokopa itxa aimarotini ikara ôti apisapanika?

⁵ Ininiã Xesosi:

—Erepaniko. !Hãuiritapiri apanakini misirienetini hïte. ⁶ Itopaniriko kãkiti, “Xesosikarano,” inakanipaniko. Ninoa misirienetari kaiãopokori kãkiti. ⁷ Neenamatzixi hïkenakoenetakasaaki, neenamatzixi ene hïkenakoenetakasaaki, !hïpïkarauatape. Ikara auapitakako, iuaritika kona xipokatxi ôtipanikani. ⁸ Æti uãka neenamauata ãti uãkakata. Æti tixini auakani neenamauatako ãti tixini auakanikata. Ætikaka itixi iakeëkatakako. Kaiãopokopaniri natxi. Amarini auini tsii atoko itxapaniko.

⁹ —Erepaniko hïte. Himaïkaãkako, auïtetximoni hïsiãkako. Hinoropataãkako aãpitsaã aiko ãki Xoteo apotiitiniãtaãua. Nota sãkire hãuikini xika hïte anikaãkako poiãori auïtetximoni. Apiari auïtetximoni apaka hanikaãkako. Iuasaaki hïte sãpiretanako nino Teoso iokanapirena erekari. ¹⁰ Itixi xipokini apisapanika Teoso iokanapirena erekari sãpiretaãkako ikinimanemoni ikini itixitikinimoni. ¹¹ Kãkiti maïkasaakii hïte, anikasaakii hïte auïtetxiakorimoni, !hïxinikapiri hïsiãkire tïkane hïsiãkirauatini apisapanika. Hïsiãkirauatakasaaki, iuasaakipeka himarotari hïsiãkire. Erekari Matamatakoti txïkitakai iuasaaki hïsiãkire himarotini. ¹² Kãkiti sikanapariko atão itariakori auïtetximoni okiko tïkane. Iriakoritxi sikanapanako imiakori auïtetximoni okiko tïkane. Eenetxiakori omanatana iriakori, inoroakoro pakini. Eenetxiakori xika ninoa okapeëka. ¹³ Nota sãkire hãuikini xika, ikinimane omanatai hïte, iuaritika himatakanapakaniãri nisãkire hãuikini, hanikaãkako Teoso tixinemoni —itxa Xesosi imoianariakorimoni.

Iteene Maerekanitxi Apokini

(Mateo 24.15-28; Arókasi 21.20-24)

¹⁴ Iuaïkana Xesosi sãpiretana:

—Hïtikariko Maerekati Apiatakari Teoso misãkiretiko aikoti ãki. Kitxakapirïka Teoso sãkire sãpiretakari Tanieo inakori sãpiretapekari ikara pirena. (Ininiã hïte ia atatsopanãtakanii, hïkenakotariko Xesosi ôtãkikinua.) Maerekati Apiatakari Teoso misãkiretiko aikoti ãki hïtikasaaki, hïte Xotéia tãpa auakanii, himitekapoka mitaxiratarimoni. ¹⁵ Iuasaaki hïte haãpoko nopini auakanii, katima hïtxako hïkatxakini. Haãpoko ! hïroãpe hïtii himakatzakini ïkapani. ¹⁶ Hïte kikio auakanii, !hïkanapiripe haãpokomoni himãka hãpini ïkapani. ¹⁷ Ikarasaaki ! erekapaniri sito kamixiromoni, sito kaxitakakareromoni. ¹⁸ Teoso hamanaã himitekini kamoïsaaki, kotxi himitekini mitaãsaaki !erekari. ¹⁹ Iuasaaki atatsiiri auakatapitikako. Ia atatsiiri apiata atatsiitaãkako. Kitxakapirïka itixi Teoso kamakasaaki kãkiti atatsiirauata poiãoka. Ikara atatsiiri ôti apisa kãkiti atatsiirauata poiãoka. Ikara atatsiiri ôti napa atoko !ikara atoko inakari atatsiiri !auaikako. ²⁰ Teoso mapoiãotakaniãri iua ôti kãkiti atatsiirauatini ôti, !auaikamako kãkiti. Ikinipekamako ipïpemanako. Teoso iotokakariko ïkora atatsiiretxi, imereëkini mapinakani ïkapani.

²¹ —Apanakini sãpiretiniãi hïte: “Xesosi Teoso mereëkiti ia,” hinikosaaki, !hãuikapiri. “Xesosi Teoso mereëkiti ikiraãtaã,” hinikosaaki, !hãuikapiri. ²² Kotxi Teoso mereëkiti minakanua apokapitikako, “Xesosikarano nota,” inakari. Apaka apanakini apokapitikako, “Teoso sãkire sãpiretakaritarano nota,” inakari. Paxirari ninoa sãkire. Kãkiti ikara

atoko inakani kamariko posotiiretxi, kākiti itikiniri ĩkapani. Ninoa nirekamari Teoso mereĕkini imisirienetinina. ²³ Erepaniko. Ikara ōti apokini apisapanika nōtākikai hĕte –itxa Xesosi imoianariakorimoni.

Kākiti Itari Iaxitikiri Kanapiriini
(Mateo 24.29-31; Arókasi 21.25-28)

²⁴ –Iua misirikaretxi napa atoko atokatxi iuakapeka. Kasiri !iponikaika. ²⁵ Iōriki iaxitikero irikako. Ikinipoko kaikori iaxiti auakari ioĭketaākako. ²⁶ Iuasaakipekako ikinimane atapariko kākiti itari iaxitikiri apokaāpotini katxiāri āki. Itapararitika apoka. Kaiotximereri itxaua iuasaaki. ²⁷ Iuasaaki iokanatana iniritiakori iaxitikini ĩtinixitimoni, ipinimoni ĩtinixitimoni, atokatxi pokĭkinimoni, atokatxi ereĕkokinimoni. Iokanatana iniritiakori ikini itixitimoni kākiti imereĕkini apitiitinina ĩkapani –itxa Xesosi imoianariakorimoni.

Piko Mina Pirena
(Mateo 24.32-35; Arókasi 21.29-33)

²⁸ Iuaĭkana Xesosi sākirauata.
–Nisāpiretai sāpirenatxi atāo inakari oerekiko, piko mina pirena, nikanapiriini apiata himarotini ĩkapani. Pooĭoporipeka onakasaaki, otomorekasaaki, “Kamoĭ apokanapanoka,” hĕtxa. ²⁹ Iua atokokana ikara misirikaretxi mixikanani nisāpiretakiti hĕtikasaaki, himarotapekariko nota kaiama kanapirikapeka ninini. ³⁰ Ia nisākire atāo. Itixi auakani !ixipoka ikinipoko nisāpiretakiti mapokakani apisa. ³¹ Iaxiti xipokapitikako. ĩkoraxiti apaka xipokapitikako. Iuaritika nota sākire !ixipoka –itxa Xesosi imoianariakorimoni.

Kākiti !Imarotari Xesosi Apokini Manapi
(Mateo 24.36-44)

³² Iuaĭkana Xesosi sākirauata:
–Kākiti !imarotari ikara ōti manapi apokini. Teoso nitiriakori iaxitikini apaka !imarotari ikara ōti. Nota Teoso ākirikanera ĩmarotari ikara ōti. Niringanira, Teosonaira, ĩmarotari. ³³ Hiātapapikariko. Hĭkoatapikako. Teoso himisākiretapikako. Kotxi !himarotari ikara ōti apokini.

³⁴ –Nikanapiriākasaaki, kiki ōtako sikari kanapiriini atoko nitxa. Iua kiki potorikasaaki, ipaniātana iniritiakori aapoko inĭkatinina. Ikininape isikanapana parĭkatxi ikaminina. Ipaniātari initiri aapoko toreātaā kaikotakari, “Araōkire pitxako,” itxari. ³⁵ Nota hĕtari iaxitikiri iua kiki ōtako sikari atoko nitxako. Ātipirika hiātapapikanoko, kotxi !himarotari nota apokini ōti. !Himarotari mapiātikikauako napoka. !Himarotari apanĭkanōkauako napoka. Imaropirĭkatauako napoka. ĩkanōkapanikauako napoka !himarotapaniri. ³⁶ Atxiĭti patimari napokini, ininiā hĭkoatapikako, mimakatika hinini ĩkapani nota apokasaaki. ³⁷ Ininiā ātipirika hiātapapikanoko. Ikininapemoni apaka ikara nitxa –itxa Xesosi imoianariakorimoni.

14

Xesosi Okaenetiko Pirena
(Mateo 26.1-5; Arókasi 22.1-2; Xoāo 11.45-53)

¹ Iuasaaki kākiti apotiitaua ipi kiiniriti auakasaaki. Páskoa kiiniriti, pāo miātiākati nikiko kiiniriti pakini aua. Ipi ōti kiiniri potorikini apisapanika sasetotxi auĕteakori, kaiōkatsoparerini pakini xinikaxitita:

–Natokopa atxatariko Xesosi amaĭkini aōkini ĩkapani? ² !Amaĭkapaniri kiinirisaaki, kotxi amaĭkiniāri, kākiti naiatamaua eereka –itxanātana.

Sito Kamariāro Mĭkaro
(Mateo 26.6-13; Xoāo 12.1-8)

³ Xesosi auanāta Petānia aapokotxiti Simāo inakori aapoko. Iua Simāo akiritaāka “Maere Matati.” Simāo aapoko Xesosi nipokonātakasaaki, sito apoka. Oa minari

kopitipaki kai kamakori, kai arapástiro inakoro. Kopitipaki āki aua kamariāro, nato inakoro. Pakaronepokoro. Oāpokasaaki Xesosimoni, opakauanakari kopitipaki. Okitakaro kamariāro Xesosi kiiā. ⁴ Iuasaakipeka apanakini iuaā auakani omanākarauata.

—Kinirepa oioanataāka kamariāro? ⁵ Ovētxitamaroko, ininiā kaiāopokomaniko txineiro oāpakapamako. Tresētosi txineiro ota prata kamakori oāpakamako. Txineiro mauakinimoni osikiniā erekamariko —itxana.

Iteene ikapatitana. ⁶ Ininiā Xesosi:

—Ikara atoko !hītxapero. !Homanatapero. Erekarī okaminano. ⁷ Kākiti matxineiroteni auapikako hītekata. Hinirekasaakiriko hīsikaro txineiro ninoamoni. Nota !auari ātipirika hītekata. ⁸ Oia sito kamari ikinipoko oimarotakiti nota ĩkapani. Nipinini apisapanika oina notamoni. Omaritari nīto, nīto iposope inini nikatiko ĩkapani. ⁹ Atāo nisāpiretai hīte. Teoso iokanapirena erekari sāpiretikoātaā ikini itixiti, osāpiretaākako apaka oia sito kitakiniro kamariāro nikiiā, ininiā kākiti ikini itixiti auakani xinikapikaro oa —itxa Xesosi.

Xotasi Mīkapiritiniri Xesosi

(Mateo 26.14-16; Arókasi 22.7-16, 21-23; Xoāo 13.21-30)

¹⁰ Tosi pakini Xesosi moianariakori. Imoianari Xotasi inakori sari sasetotxi auīteakorimoni. Imisākiretana ninoa Xesosi imīkapiritini ĩkapani, ninoamoni isikiniri ĩkapani. ¹¹ Ikenakotakasaakirina Xotasi sākire, ipoxokoniuatana. Isikaenetarona txineiro iuamoni. Eereka Xotasi iātapari Xesosi imīkapiritini ōti.

Páskoa Kiiniriti Kamiko

(Mateo 26.17-25; Arókasi 22.7-13)

¹² Páskoa kiiniriti potorikini ōti, soti auīte anaakori okiko ōti, Xesosi moianariakori misākiretari iua:

—Namonipa pinirekatari Páskoa kiiniriti akamini?

¹³ Ininiā Xesosi iokanatanana imoianariakori ipi.

—Hīsa sitatximoni. Iuaā kiki āparaā kopitiā anikakari hāpiākata. Iua kikikata hīsa.

¹⁴ Iua sinimoni kaapokori himisākireta. Hītxariko iua: “Koerekareri nirekari imarotiniri, namonipa erekari imoianariakorikata inipokotini Páskoa kiiniriti ikamakasaakina?” hītxariko. ¹⁵ Ininiā iua oerekaiko hīte itanokiri koa mitapoari. Auapeka kākiti topākini. Imakinika oeretapeēkaika —itxana.

¹⁶ Ininiā imoianariakori sari. Sitatxi apokasaakina Xesosi sākire iaōka aua. Ininiā ninoa kamari nipokori Páskoa kiiniriti ĩkapani.

¹⁷ Īkanōkapeka inakasaaki Xesosi apoka tosi imoianariakorikata.

¹⁸ Inipokonātakasaakina, Xesosi txana:

—Atāo nisāpiretai. Āti hīte notakata nipokotakari mīkapiritanoko nota —itxa.

¹⁹ Ininiākara Xesosi moianariakori matinaniuata. Ipimaārina Xesosi:

—Notakani atxiīti?

Ātipekana:

—Notakani atxiīti?

Ininiā imakinikana ikara atoko itxana. ²⁰ Ininiā Xesosi:

—Ātika hīte notakata auakari mīkapiritano. Notakata komiri iopitiātakarikarako sikano nimokaiakariakorimoni. ²¹ Nota hītari iaxitikiri okaākako. Teoso sākire iōkatsopatakori sāpiretpekari nipinini tīkane. Nota hītari iaxitikiri mīkapiritakari iteene misiritaākako. Erekariko maponaniākatika inaākamako.

Xesosi Īto, Iarēka Pakini

(Mateo 26.26-30; Arókasi 22.14-23; 1 Korīto 11.23-25)

²² Xesosi imoianariakorikata nipokonātakasaaki, Xesosi kosekari komiri. Imisākiretari Teoso:

—Erekapitikari ia komiri pisikakiti atemoni —itxari.

Imapopeēri komiri, xanaka itxari imoianariakorimoni.

—Apakapa, nika hītxako. Ia niūto —itxana.

²³ Iposo atoko koseka itxaro iākoanatsi. Imisākiretari Teoso:

—Erekapitikari ia iāriā pisikakiti atemoni.

Ininiā iākoanatsi isikana imoianariakori. Ikinikana iātarina iāriā. ²⁴ Ininiā Xesosi:

—Ia niarēka xiketakariki makatzakariko kaiāopokori kākiti maerekani. Teoso sāpiretapekari kākiti ikamaenetakiti amaneri kākiti ikapani. Ia niarēka oerekari kākiti, Teoso kamapekari ikamaenetakiti. ²⁵ Atāo nisāpiretai. !Niātaikaroko ovapeē, Teoso auītetxi ininiātaāua nimapokakanisaaki. Iuaā napokasaaki niātari. Amaneri iāriāti niātako —itxa Xesosi.

²⁶ Eereka ninoa xikarauata Teoso ikapani. Iua atoko isana oriva mina auiniātaā, oxiratari nopini.

Xesosi Sāpiretari Petro Kipatiniri Iua

(Mateo 26.31-35; Arókasi 22.31-34; Xoāo 13.36-38)

²⁷ Xesosi misākiretana imoianariakori:

—Ia ikanōkati hīkinika hīte takanapanoko nota, kotxi Teoso sākire iōkatsopatakori sāpiretapekari ikara atoko inakari. Itxari:

Nokariko soti auīte piratakari, ininiā ikinika ipiraakori iarikitatako, itxa Teoso sākire iōkatsopatakori. ²⁸ Ininiā eereka nota nipinaāka atoko, iuaīkana nōkitikaākaua atoko, nisako hīte apisa Kariréiamoni —itxa Xesosi.

²⁹ Ininiā Petro:

—Nota !nitakanapai pite. Atxiīti ikinimane takanapai, iuaritika kona nota takanapai.

³⁰ Ininiā Xesosi:

—Atāo nisāpiretai. Ia ikanōkati patari ipikata sākirauatini apisapanikako, ipi āti pakinikata, “!Nimarotari iua,” pitxanoko —itxari Petro.

³¹ Petro apakapapiretari itaparaxinireritika:

—Atxiīti pitekata nokaāka, iuaritika kona nota sāpiretari apanakini nimimarotakanii pite.

Ikininape Xesosi moianariakori Petro sākire iaōka ikamana.

Xesosi Misākiretiniri Teoso Xetsémani Inakoriātaā

(Mateo 26.36-46; Arókasi 22.39-46)

³² Xesosi imoianariakorikata apoka ātiātaā kākiti akiritakiti Xetsémani inakoriātaā. Iuaā Xesosi paniātana imoianariakori:

—Uai hītopāka. Teoso nimisākiretako —itxa.

³³ Anikari Petro, Txiako, Xoāo pakini iuakata apikomoni. Iuaā Xesosi iteene matina-niuata. Maerekaxiniretinoka itxa. ³⁴ Ininiā iua:

—Nixinire imaromaxiretari. Iteene nimaxire, ininiā okaaritano. Uai hīkaikota. Araōkire hītxako —itxana.

³⁵ Apikomoni isa. Ipamaka xitimoni, misākireta itxari Teoso. ³⁶ Itxari iri:

—Papai, pite posotari ikinipoko pikamini. !Pauritapeno paītiki natatsiirauatini, iuaritika ninirekari pite nirekakiti nikamini. Nota nirekakiti nikamini kona ninireka —itxari iri.

³⁷ Eereka ikanapiriā Petro, Txiako, Xoāo pakinimoni, txamari ninoa imakanāta. Xesosi akiritari Petro:

—Simāo, himakanāta? Kona hīposotatari āti oaranoka hīkoatini? ³⁸ Erepaniko. Hinirekasaakiri maerekati hīkamini, !hīkamapiri. Araōkire hītxako. Himisākiretariko Teoso, ininiā !hīkamari maerekati. Kākiti xinire atxiīti !inirekari maerekati ikamini. Txamari kākiti ito tapara poiāoka, ininiā ikamari maerekati. Ininiā erepaniko —itxana ninoa.

³⁹ Iuaĩkana isa Teoso imisãkiretini ĩkapani. Teoso imisãkireta, mitxi isãkire atokokana itxa. ⁴⁰ Iposo atoko ikanapiriã. Txamari iuaĩkana ninoa imakanãtapanika. !Iposotarina ikoatinina. Ipẽtauatana, ininiã !kasãkirena.

⁴¹ Iuaĩkana ikanapiriã Petro, Txiako, Xoão pakinimoni.

–Himakanãtapanika? Hĩtomanãtapanika? Iaõpe. Hãtapana. Hĩtari iaxitikiri uatxa sikaãkako maerekati kamakanimoni. ⁴² Hõkitikaua. Masa. Hãtapana. Apokaãpota kiki nimĩkapiritakiri –itxana.

Xesosi Maĩkiko Pirena

(Mateo 26.47-56; Arókasi 22.47-53; Xoão 18.1-11)

⁴³ Xesosi sãkirauanãtakasaaki, Xotasi apoka. Iua Xotasi Xesosi moianarikamara. Im-inana ito kiki, saasara mĩkani, piriri mĩkani. Sasetotxi auĩteakori, kaiõkatsoparerini, kiomãtxiakori pakini iokanatarı Xotasi kikiakorikata Xesosi imaĩkinina ĩkapani. ⁴⁴ Xotasi mitxipeka sãpiretari kikiakori:

–Nota apitxokakiti Xesosipitikarako iua. Iuasaaki himaĩkapekariko. Erepaniko hanikasaakiri, imamitekakani ĩkapani –itxa.

⁴⁵ Xotasi apokasaaki, isakatapitipori Xesosimoni. Akiritari:

–Koerekareri.

Inakasaakipeka apitxoka itxari.

⁴⁶ Inakasaakipeka kikiakori maĩka, anika itxarina Xesosi. ⁴⁷ Kiki iuasaaki iuaã auakari kosekaro saasara. Iua sauaãkatari sasetotxi auĩte apiatakari nitiri. Itsotakakĩpitari.

⁴⁸ Iuasaakipeka Xesosi:

–Hĩte ina himaĩkinino ĩkapani, saasarakata, piririkata. Kĩtiriri atoko hĩtxapeno nota himaĩkinino. ⁴⁹ İkiniõtika nota auanãtari hĩtekata Teoso misãkiretiko aikoti ãki, noereka-rauatakasaaki. Iuaã hĩte !imaĩkano nota, kotxi Teoso sãkire iõkatsopatapeẽkaika hĩte maĩkinino kiĩtiriri himaĩkini atoko –itxana ninoa.

⁵⁰ Iuasaakipeka ikinika Xesosi moianariakori miteka, asika itxarina iua. ⁵¹ Iuasaaki ãtokori sari Xesosi tikini. Iua mãka ãtinoka aua iĩtoã pirikakari. Kikiakori maĩkamari iua.

⁵² Imãkanoka kaikota iuakoãna. Kasarapeka imiteka iua ãtokori.

Xesosi Xoteo Auĩteakori Apisatoõ

(Mateo 26.57-68; Arókasi 22.54a, 63-71; Xoão 18.12-14, 19-24)

⁵³ Ninoa anikari Xesosi sasetotxi auĩte apiatakari aapokomoni. Iuaã ikinika sasetotxi auĩteakori, kiomãtxiakori, kaiõkatsoparerini pakini apotiitaua. ⁵⁴ Petro ikira atoko isaãpota Xesosi anikakani tikini. İroã sasetotxi auĩte aapoko piriketakorıã. Iuaã iitopãka sasetotxi auĩte apiatakari nitiriakorikata. İroka xamina tinipoki.

⁵⁵ Aapokotxi ãki sasetotxi auĩteakori, ikinika Xoteo auĩteakori pakini pimaãna kãkiti:

–Kipa imarotatarı maerekati Xesosi kamini?

Ninoa nirekari Xesosi okiko imaerekani xika. Txamari !apokarina imaerekani imarotakani, kotxi !ikamari maerekati. ⁵⁶ Kaiãopokori kãkiti sãpiretari maerekati Xesosi kamakiti, txamari paxirari ninoa sãkire, kotxi ãti sãpiretakiti ipinimoni, ãti sãpiretakiti ipinimoni, itxaãpotana.

⁵⁷ Apanakini kiki õkitikaua, sãpireta itxarina ia aãpirena Xesosi ikamapiretinina.

⁵⁸ Ninoa:

–Ate kenakotari isãpiretiniri: “Nirikariko ia aiko Teoso misãkiretiko aikoti kãkiti kamakiti. İpi ãti pakini õti inakasaaki nikamariko ãti aiko kãkiti makamakiniti,” itxa isãkire.

⁵⁹ Txamari ikara sãkiretxi ãti sãpiretakiti ipinimoni, ãti sãpiretakiti ipinimoni, itxaãpota.

⁶⁰ Iposo atoko sasetotxi auĩte apiatakari tima ikinimane apisatoõ. Iua pimaãri Xesosi:

–Kininiãpa na papakapapiretari ninoa sãkire? Kixikapa ninoa ikara atoko txanãtai? –itxari.

⁶¹ Txamari !kasãkireri Xesosi. !Apakapapiretari. Ininiã sasetotxi auïte apiatakari iuaïkana pimaãri:

—Pitekani Teoso mereëkiti txataua? Pitekani Teoso ãkiri txataua? —itxari.

⁶² Ininiã Xesosi:

—Ari, iua ãkiripitikanano. Hãtamatariko kãkiti itari iaxitikiri topãkini Kaposotiireri kikomoni. Hãtapariko kãkiti itari iaxitikiri uai apokaãpotini katxiãri ãki —itxa.

⁶³ Iuasaakipeka sasetotxi auïte apiatakari matsorãkari imãka, kotxi iuãkatari Xesosi sãkire maerekati ininiua.

—!Anirekaikari Xesosi kamakiti sãpiretakani. Atokopeka. ⁶⁴ Kotxi hïte kenakotapekari isãkire maerekati, “Teoso ãkirirano” inini. Natokopa atxatari iua? —itxana.

Ininiã ninoa apakapapiretari:

—Okaãkapitikako —itxarina.

⁶⁵ Apanakini kiisokari Xesosi. Mãkatxi mataã iapirikarina ikiiã oki manapi imata-matakani ïkapani. Iposo atoko iãsokarina.

—Pisãpiretaua, kipa ãsokai? —itxarina.

Sasetotxi auïte nitiriakori apaka ãsokari iua iuakoãna.

Petro Kipatari Xesosi Imarotini

(Mateo 26.69-75; Arókasi 22.54b-62; Xoão 18.15-18, 25-27)

⁶⁶ Iuasaaki Petro ixiti aua aapokotxi piriketakori ãki. Sasetotxi auïte apiatakari nitero ãtokoro apoka iuaã. ⁶⁷ Oãtamatarari Petro irokanãtini xamina tinipoki. Oa mixinitari iua. Ininiã oa:

—Xesosi Nasareekiri moianarikai pite apaka —otxa.

⁶⁸ Ininiã:

—Kona, nota !imarotari pisãkire —itxaro.

Iuasaaki pirikere ïronakikoãtaã isari. Iuasaakipeka patari sãkirauata. ⁶⁹ Oa sasetotxi auïte nitero atamatari iua iuaã.

—Ere kiki iua moianaripitikara —otxana ninoa Petro takote auakani.

⁷⁰ —Kona iuano nota —itxa.

Païtiki ninoa iuaã auakani:

—Iua moianaripitikarai. Pite Kariréiakirikarai. Pisãkireëra ate imarotai —itxarina.

⁷¹ Ininiã Petro:

—Nota !imarotari kiki ikara atoko hinanãtakiti. Atãoene nimasãpiretakaniã, Teoso misiritamanoko. Teoso imarotari nota sãkire atãoka nisãpiretinii —itxana.

⁷² Ikara atoko Petro inakasaaki, iuaïkana patari sãkirauata. Ininiã Petro xinikari Xesosi sãpiretakiti iuamoni. “Ipikata patari sãkirauatini apisapanikako, ipi ãti pakinikata, ‘!Nimarotari iua,’ pitxanoko.” Ikara inakari ixinikasaaki, itxiapata.

15

Xesosi Pirato Apisatoã

(Mateo 27.1-2, 11-14; Arókasi 23.1-5; Xoão 18.28-38a)

¹ Katimatinïkata sasetotxi auïteakori, kiomãtxiakori, kaiõkatsoparerini, ikinimane Xoteo auïteakorikata xinikaxitinãta. Ipaniãtarina Xesosi iaxirikiko. Iposo atoko anika, sika itxarina Piratomoni. ² Pirato pimaãri Xesosi:

—Pitekani Xoteoakori auïte txataua? —itxari.

Ininiã Xesosi:

—Ari, pisãkire atãopitikara.

³ Sasetotxi auïteakori apoiãpotari Xesosi, txamari Xesosi !kasãkireri. ⁴ Ininiã Pirato:

—Na papakapapiretatari? Ninoa iteene misãkirepiretai —itxari.

⁵ Iuaritika Xesosi !apakapapiretari. Ininiã Pirato ãkixinireë:

—Kinirepa kona apakapapiretari? —itxa.

*Xesosi Okiko Nirekiko**(Mateo 27.15-26; Arókasi 23.13-25; Xoão 18.38b-19.16)*

⁶ Páskoia kiiniriti auakasaaki, Pirato itotari isikakiniri kateia āki auakari kākiti nireēkiti. ⁷ Iuasaaki Xesosi maīkikosaaki, Pahapasi inakori aua kateia āki. Iua Pahapasi apanakini kateia āki auakanikata okaniuatapeka Homanoakori inaiatakasaakina.

⁸ Pirato sākirauatakasaaki Xesosikata, kākutipokoni apoka Piratomoni.

—Kateia āki auakari pisikaka —itxarina.

⁹ Ininiā Pirato pimaāna:

—Hinirekatari nisikakiniri Xoteo auīte hīte īkapani? —itxana.

¹⁰ Pirato iteene imarotari sasetotxi auīteakori sikari Xesosi iuamoni Xesosi ixikotinina xika. ¹¹ Sasetotxi auīteakori maasakana ninoa iuaā apotiitakaniua:

—Hamanaāri Pirato Pahapasi isikakini īkapani —itxana kākitimoni.

¹² Pirato iuaīkana pimaāna:

—Natokopa nitxatari ia kiki Xoteo auīte inakori? —itxa.

¹³ Akiripoakatana:

—Aamina ĩpiriāmitakari nopini hītokakitari —itxana.

¹⁴ Ininiā Pirato:

—Kixikapa? Maerekati !ikama —itxa.

Apiata akiripoakatana:

—Aamina ĩpiriāmitakari nopini hītokakitari —itxakatana.

¹⁵ Ininiā Pirato sikakari Pahapasi ninoa īkapani, kotxi inirekari ikamapoxokonitinina ninoa kākiti. Eereka ipaniātari Xesosi xirokitatiko aāpitsaā. Eereka Pirato paniātari sotatoakori tokakitiniri Xesosi aamina ĩpiriāmitakari nopini.

*Sotatoakori Napetiniri Xesosi**(Mateo 27.27-31; Arókasi 22.63-65; Xoão 19.1-3)*

¹⁶ Ininiā sotatoakori anikari Xesosi Pirato aapoko āki. Akiritarina ikinika sotato.

¹⁷ Iposo atoko ieretakarina mākatxi pōkamarari Xesosi ĩtoā. Ikamarina saporīēta kotipiaro kamakori, taka itxarina Xesosi kiiā.

¹⁸ —Aāuīte —itxarina Xesosi inapetinina.

—Xoteo auītekai pite —itxarina.

¹⁹ Iaritakiitarina aākeē. Ikiisokarina. Ikapotoreēkauana Xesosi apisatoō.

—Aāuīte —itxarina Xesosi inapetinina.

²⁰ Inapetakarina atoko imakatzakarina mākatxi pōkamarari. Xesosi māka iuaīkana ieretaka. Eereka anikarina Xesosi aamina ĩpiriāmitakari nopini itokakitinirina īkapani.

*Xesosi Tokakitaāka Aamina ĩpiriāmitakari Nopini**(Mateo 27.32-44; Arókasi 23.26-43; Xoão 19.17-27)*

²¹ ĩpixinipokoriti itaōkitarina kiki Simāo inakori. Sireni sitatxitikiri iua. Iua anaakori Arexātri, Hopo pakini. Iuasaaki Simāo apoka Xerosareē. Sotatoakori paniātari iua:

—Ia aamina ĩpiriāmitakari panikinari —itxana.

²² Anikarina Xesosi ixirataā, Kóokota inakoriātaā. Xoteo sākire “Kóokota.” Apanakini akiritari iua oxiratari uāka “Kiitātatxi,” inaāka akiritiko. Iuaā apokana. ²³ Isikamarina iāriā pinītxikata, miha inakorokata, Xesosi iātini īkapani, itsii imimarotakani īkapani, txamari !inirekaro iātiniro. ²⁴ Ininiā itokakitarina aamina ĩpiriāmitakari nopini. Eereka ikamarina sarauatxi, Xesosi māka apakapakani imarotinina īkapani. Ikara atoko apanakini anikari Xesosi māka. ²⁵ ĩkanōkapanika novi oara itokakitapeēka Xesosi aamina ĩpiriāmitakari nopini. ²⁶ Aaminaā auari iōkatakina, apoītiko pirena, “Xoteoakori Auīte” itxa. ²⁷ Ninoa tokakitana ipi kiītiririni apaka aamina ĩpiriāmitakari nopini, ikikomoni āti, isanaremoni āti. ²⁸ Kitxakapirīka Teoso sākire iōkatsopatakori txari:

Okapeēkako iua, kokaniri okiko atoko inapeēkako.

Ininiā Xesosi okikosaaki ia Teoso sākire iōkatsopatakori iaōka auapeka iuasaaki.

²⁹ Ninoa iuaã napakani misãkirepiretapikari Xesosi:

—Kiikitei. Pite sãkire: “Nirikariko Teoso misãkiretiko aikoti. Ipi ãti pakini õti inakasaaki nikamari iuaĩkana,” pitxama. ³⁰ Ikara atoko piposotiniã, piteka pimakatxakauako, ininiã pikatxaka aamina ĩpiriãmitakariã —itxarina Xesosi inapetinina.

³¹ Sasetotxi auĩteakori, kaiõkatsoparerini pakini napetari Xesosi:

—Iua makananitapekari apanakini. Txamari iuaka !iposotari imakananitiniua —itxakakana.

³² —Ikatxakiniãrako ate auikari Teoso mereẽkiti ininiãua. Ikatxakiniã, aãuikari Isaeo auakani auĩte ininiãua —itxakakana.

Kiĩtiririni iuakata tokakitakoni apaka misãkirepiretari.

Xesosi Ipinini Pirena

(Mateo 27.45-56; Arókasi 23.44-49; Xoão 19.28-30)

³³ Iuasaaki apaniãxiti ipiãka. Ikini itixitika piãka. Ipi ãti pakini oara ipiãka. ³⁴ Ipi ãti pakini oara napa atoko Xesosi akiripoakata:

—Erii, Erii, aremaa sapatatanii —itxa.

Ia atatsopatakari sãkireẽ: “NiTeosone, niTeosone, kinirepa pitakanapano?” itxa.

³⁵ Kãkiti iuaã auakani kenakotari akirinãtini.

—Hĩkenakota. Akirinãtari Eríasi —itxana.

³⁶ Iuasaakipeka kiki ina katimariã. Iãkari mapoa atoko inakari iãriã katxioãrimoni, aãke mapotõkire taka itxari, sika itxari Xesosi iãtini ĩkapani.

—Mitxipanikako. Maiãtapari. Atauako Eríasi makatxakatapaniri Xesosi —itxana.

³⁷ Xesosi itapararitika akiripoakata, eereka ipĩpe itxa. ³⁸ Iuasaakipeka mãkatxi mata Teoso misãkiretiko aikoti ãki arõkakari tsorakita. Itano itsorakita. Ixitipeka apoka. Mitxi iua mãkatxi mata !auiritari kãkiti ĩroni Teosonani Auini Pakitaãtaã. ³⁹ Sotatoakori auĩte aua aamina ĩpiriãmitakari apisatoõ. Ikenakotari Xesosi akiritini. Itikari ipinini.

—Atãopitikara Teoso ãkiri itxaua ia kiki —itxa.

⁴⁰ ãtokaka sitoakoro ikira atoko atamanãtarina Xesosi, Maria Matarenama, Saromeema, ãto Mariama, apanakini sitoakorokata. Xesosi, Txiako pakini inoro oa Maria. Iua Txiako maneripanika inakari. ⁴¹ Xesosi Kariréia auakasaaki, ninoa sitoakoro moianatari iua. Imiparĩkatarina. Xesosi ipĩkasaakikanera apanakini sitoakoro kaiãopokoro aua iuaãtaã. Ninoa apoka Xerosareẽ Xesosikata.

Xesosi Ikatiko Pirena

(Mateo 27.57-61; Arókasi 23.50-56; Xoão 19.38-42)

⁴² Ikara õti, Xesosi ipinini õti, kãkiti parĩkauatini õti, kãkiti tomatini õti apisapanika, iuasaaki kikatatikipeka. ⁴³ Iuasaaki Xosee inakori, Arimateia sitatxitikiri, sari Piratomoni. Iua Xosee Xoteo auĩte apanakinikata. Ikinimane paxitari iua. Iua apaka iãtapari Teoso ikinimane auĩte ininiua õti apokini. Itaparaxinireritika Piratomoni isa, amanaã itxari Xesosi ĩto. ⁴⁴ Ininiã Pirato ãkixinireẽ:

—Atauako patimari Xesosi ipinini? —itxa.

Ininiã ipĩkapiretari sotatoakori auĩte. Iua apokasaaki Pirato pimaãri:

—Atauako Xesosi ipĩpeka? —itxa.

⁴⁵ Ininiã iua:

—Ari, ipinapitipeka —itxari.

Ininiã Pirato:

—Panikaikari iĩto —itxari Xoseemoni.

⁴⁶ Iuasaaki Xosee amotari mãkatxi mata erekari, arínio inakori. Eereka imakatxakari Xesosi ĩto. Iapirikari iĩto mãkatxi mataã, anika itxari akauari irikomoni. Kai kisakakori ãki ieretakari Xesosi ĩto. Eereka kai mitapoari ikatika, tota itxari iriko. ⁴⁷ Ipi Maria itikanãtari Xesosi ĩto takikoãtaã, Maria Matarenama, Maria, Xesosi inakori inoroma pakini.

16

Xesosi Iuaĩkana Auãki Inini (Mateo 28.1-8; Arókasi 24.1-12; Xoão 20.1-10)

¹ Tomatiko õti xipoka atoko mapiãnikata, ipi ãto pakini sito amotaro kamariãro, Xesosi ãto ikamamaritinina ĩkapani, Maria Matarenama, Saromeema, Maria Txiako inoroma pakini. ² Katimatinĩkata, tomĩkosaaki, ĩkanõkapanika, atokatxi pokĩkasaaki, ninoa sari akauarimoni. ³ Kimaporiã isikasaakina, isãkirauaãpotana:

–Kipa makatxakinoua kai auĩte iriko tore? –itxaãpotana.

Amaripokori iua kai. ⁴ Iuaã apokasaakina, atamatarina. Kai makatxakapeẽkaika.

⁵ Ininiã ĩroãna iriko ãki. Atamatarina ãtokori topãkanãta ikikomoni. Imãka ĩtanori, kasarori. Ininiã ninoa tikoka.

⁶ Ininiã iua:

–!Hĩtikokape. Hĩte nitanãtari Xesosi Nasareekiri, aamina ĩpiriãmitakari nopini tokakitakori. Õkitikapekaua iua. !Auaika uai. Hãtamata. Mitxi itakarina ĩto uai. ⁷ Hĩsipeka. Hĩsãpiretari Petro, apanakini Xesosi moianariakori pakini: “Xesosi sapanikako hĩte apisa Karirẽiamoni. Iuaã hĩte aõkitari iua, kotxi ipinaka apisapanika isãpiretapekari ikara hĩtemoni,” –itxana ninoa.

⁸ Itimaritikana ninoa pokĩka. Imitekana. Ikininanakana, ipĩkarena xika. !Isãpiretarina apanakini, kotxi ipĩkarauatana.

Xesosi Oerekaua Maria Matarenamoni (Mateo 28.9-10; Xoão 20.11-18)

⁹ Xesosi õkitikasaakia ipinaka atoko ĩkanõkapanika semana potarikini õti, tomĩkosaaki, oerekaua merepitipanika Maria Matarenamoni. Mitxipe Xesosi aõkitakasaakiro oa Maria, omitikari maerekani matamatakoni setxi pakini oa ĩtoã auakani. ¹⁰ Xesosi õkitikasaakia, iua oaõkitaka atoko, osari merepanika Xesosi moianariakorimoni. Iuasaaki iteene imatinaniuatana. Itxiapanãtana. Osãpiretana ninoa:

¹¹ –Xesosi iuaĩkana auãki itxapeka. Nota aõkitari iua –otxana.

Txamari ninoa kona auikari osãkire.

Xesosi Oerekaua Ipi Imoianariakorimoni (Arókasi 24.13-35)

¹² Eereka iuaka oerekaua ipi imoianariakorimoni, kimaporiã isikasaakina aapokotxi mauakaniãtaã. Iuasaaki itoõ ipinipo itxa. ¹³ Eereka ninoa kanapiriã. Isãpiretana apanakini imoianariakori, txamari !auikarina isãkirena.

Xesosi Oerekaua Imoianariakorimoni (Mateo 28.16-20; Arókasi 24.36-49; Xoão 20.19-23)

¹⁴ Eereka Xesosi oerekaua õsi imoianariakorimoni inipokotakasaakina. Xesosi õtãkikana:

–Kinirepa hĩte !auikatari nota iuaĩkana auãki ninini? Kinirepa !hãuikatari nota aõkitakani sãkire? !Kaiokakarekii –itxa.

¹⁵ Iposo atoko Xesosi txana:

–Ikini itixiti hĩsako. Hĩsãpiretariko Teoso iokanapirena erekari ikinimanemoni.

¹⁶ Teoso sãkire auĩãkari patxisatakori, iuarako sari Teoso tixinemoni. Teoso sãkire mauikakati, Teoso misiritapikariko. ¹⁷ Teoso sikaposotiiretanako isãkire auĩãkani, ininiã apanakini imarotari Teosokara sikari iposotiire ninoamoni. Ia atoko Teoso sikaposotiiretana. Omitikarina maerekani matamatakoni nota uãkaã. Isãkirauatana imimarotakinitina sãkiretxitiã. ¹⁸ Imaĩkiniãrina imini, !ipinana. Iãtiniãrina ikianari, !amianatana. !Ipinana. Itakauakotaua amianatakani nopini, ininiã amianatakani makananitaãka –itxa Xesosi sãkire.

Xesosi Anikaãka Teoso Tixinemoni (Arókasi 24.50-53; Átosi 1.6-11)

¹⁹ Imoianariakori imisãkiretanapaka atoko, Xesosi anikaãka Teoso tixinemoni. Iuaã iua topãka Teoso kikomoni. ²⁰ Xesosi moianariakori eereka isipekana, Teoso sãkire ikini aapokotxiti auakani isãpiretinina Ìkapani. Apiananiri moianatana. Apiananiri sikaposotiiretana ninoa, ininiã apanakini imarotari ninoa sãpiretakiti atão inini. Ameẽ.

ARÓKASI

Arókasi Iōkatsopata Teópiromoni

¹ Nota Arókasi iōkatsopata pite Teópiromoni. Iteene nipaxitai. Kākiti ito iōkatsopatapekari ikinipoko Xesosi kamakiti Xoteoakori sauaki auakasaaki. ² Ninoa, nota pakini imarotari ikinipoko Xesosi kamakiti, kotxi Xesosi kamakiti atamatakani, isākire oerekakani, sãpiretpekaua ate. ³ Nota apaka apaiaōkapekari ikinipoko Xesosi sākire, ikamakiti pakini. Ininiã nota apokaerekatari ikinipoko Xesosi pirena niōkatsopatini pite Teópiromoni. Merepitipanika ikamakiti nisãpiretai. Ininiã eereka ikamakiti nisãpiretai. Ininiã eereka ikamakiti nisãpiretai, nitxaãpotako. ⁴ Koerekarerini oerekepekai Xesosi pirena, ininiã uatxa pimarotari ninoa oerekakiti atão inini.

Xoã Kapatxisareri Iponaniini Sãpiretiko

⁵ Erotxi inakori Xoteoakori auite inakasaakiua Xotéia tōpa, iuasaaki auanãta sasetotxi Sakaria inakori. Sakaria auite, apanakini sasetotxiakori auite apaka, Apia inakori. Sakaria tanoro ouãka Isapeo otxaua. Oĩri, oãtokiri, oãtokiri iri imakinikana sasetotxi itxauana. Oãtokiri kitxakapirĩkari Moisesi itari Arão inakori. Iua apaka sasetotxi itxaua. ⁶ Teoso nirekaãkitinanira ikamana Sakaria, Isapeo pakini. Ninoa kamari ikinipoko iua paniãtakiti, Apiananiri paniãtakiti. Atão inakarínoka ikamana. !Ikerokarina ikamak-itina. ⁷ Txamari !keenena. Isapeo !oposotari kamixi onini. Iuasaaki ikiomaneẽpekana.

⁸ Āti õti Sakaria, apanakini sasetotxiakorikata, parĩkauanãta Teoso misãkiretiko aikoti āki. Iuasaaki ninoatene iuaã parĩkauata. ⁹ Sasetotxiakori itotari sasetotxi imereinina Apiananiri misãkiretiko aikoti ĩroini kamariãro arikini ĩkapani, ininiã iuasaaki ninoa mereẽri Sakaria. Ininiã iua ĩroã. ¹⁰ Sakaria aiko āki kamariãro arikanãtakasaaki, mapara kãkiti apotiitakaniua misãkiretari Teoso.

¹¹ Iuasaakipeka Teoso nitiri iaxitikiri tokiã Sakariamoni kamariãro arikikoãtaã takote. ¹² Sakaria atamatakasaakiri, itikoãkata, pĩkarauata itxa. ¹³ Teoso nitiri misãkiretari iua:

–Sakaria, kona pipĩkarauatape. Teoso sikapitikaiko pamanaãkiti. Ininiã pĩtanoro Isapeo keenepitikaroko. Pitakauãkatariko pamarite Xoã. ¹⁴ Iua auakasaaki ikamapox-okonitaiko pite, itori kãkiti apaka. ¹⁵ Apiananirimoni apiari itxauako iua Xoã. Kona Xoã iãtapaniroko kapoãro. Erekari Matamatakoti auariko iua ākixinireẽ. Inoro irokota ākipanika auakasaaki, Erekari Matamatakoti auako iua ākixinireẽ. ¹⁶ Iua Xoã anikanako itomaneri kãkiti Isaeo auakani Teosomoni. Apiananirimoni iua anikana. Ininiã iuaĩkana ninoa kanapiriã iTeosonemonina, isākire auikinina ĩkapani. ¹⁷ Xoã apokako Apiananiri apokini apisapanika. Erekari Matamatakoti sikataparatarari Eríasi kitxakapirĩka. Iuatxikana Erekari Matamatakoti sikataparatariko Xoã. Ikara atoko ininiã, iua oerekariko irĩtxi iuaĩkana amaritena itiretinina ĩkapani. Iua Xoã oerekariko kãkiti Teoso paniãtakiti makamakani, imaerekanina itakanapinina, erekarinoka ikaminina ĩkapani. Paimatirenako ninoa iuasaakiko. Iua Xoã oerekariko kãkiti iposope ininina Apiananiri apokini apisapanika –itxa Teoso nitiri Sakariamoni.

¹⁸ Ininiã Sakaria pimaãri:

–Kiãtokopa nitxa uatxa keenepeka ninini, kotxi nota, nĩtanoro apaka kiomaneẽpeka – itxa.

¹⁹ Teoso nitiri apakapapireta:

–Niuãka Kapirio. Nota auari Teosokata ipaniãtakiti nikamini ĩkapani. Teoso iokanatanano pitemoni pite nimisãkiretini ĩkapani, ia erekari pirena niminapiretini ĩkapani.

²⁰ Txamari na pauikari nisãpiretakiti. Ia xika !kasãkireikaiko, kotxi nisãpiretakiti atãopitika.

Teoso sikaenetakiti apokapitikako. Apokasaaki, pimarotariko nisäkire atão ininiua. Iuasaakiikarako piposotari pisäkirauatini –itxa Teoso nitiri Sakariamoni.

²¹ Iuasaaki kãkiti mapara auakani iãtapanãtari Sakaria.

–Kiripa ikamanãta Sakaria aiko ãki? !Katimari –itxanãtana.

²² Ipokĩkasaaki !kasäkireikari. Ninoa kãkiti imarotari Teoso misäkiretiniri iua aiko ãki itaponeẽ, kotxi !kasäkireikari. Iuakoãnokara imisäkiretana ninoa.

²³ Mapaõti iparĩka xipoka atoko aapokomoni isipeka. ²⁴ Eereka Isapeo kamixipeka otxa. Onapari ipi ipi ãti pakini kasiriti oaãpoko. !Osari ãtiãtaã.

²⁵ –Apiananiri sikano namarite. Erekari ikaminano notamoni. Uatxa !nipẽtauataika kãkiti apisatoõ. Keenepekanõ –otxa.

Kapirio Iokanataãka Mariamoni

²⁶ Isapeo seisi pakini kasiriti kamixi onakasaaki Teoso iokanatarini iniriti iaxitikiri Kapirio Nasaree sitatxitimoni, Karirẽia tõpamoni. ²⁷ Iuaã iokanatarini iua ãtokoromoni Maria inakoromoni. Oa kona sirĩkapanika kikikata. Osãpiretapekari ãtokori Xosee inakori iuakata oĩtaniriuatini iĩkapani. Xosee atokiri kitxakapirĩka Xoteoakori auĩte Tavii inakori.

²⁸ Teoso nitiri apokasaaki oamoni, akiritaro Maria:

–Ereẽkai. Apiananiri pitekata aua. Iua mereẽi pite. Itooro sitoakoro ikini itixiti aua, iuaritika pitenanirako Teoso sika iteene erekari –itxaro oa.

²⁹ Maria pĩkarauata Teoso nitiri sãkire okenakotakasaaki.

–Kinirepa ikara atoko itxa sãkireta? –otxa oãkixinireẽ.

³⁰ Teoso nitiri txaro:

–!Pipĩkarauatape, Maria. Teoso apokaerekatai pite. ³¹ Pimixiuatako, keene pitxako. Pitakauãkatariko pamarite Xesosi. ³² Iua Apiatakari itxauako. Apiananiri ãkiri akiritãkako. Teoso Apiananiri kamariko iua auĩtetxi ininiãua. Kitxakapirĩka Xoteoakori auĩte Tavii. Tavii auĩtetxi ininiua atokokana, Teoso txĩkitakariko Xesosi Xoteoakori auĩte ininiua. ³³ ãtipirika Xoteoakori auĩte, Xakooni apiko mekaniriakori auĩte, itxauako. Iua auĩtetxi ininiua !ixipoka –itxaro oa.

³⁴ Ininiã oa:

–Kiãtokopa nitxa kikikata masirĩkatokano, keenepe ninini? –otxa.

³⁵ Teoso nitiri apakapapiretaro:

–Erekari Matamatakoti apokako pãkixinireẽ. Apiananiri posotiire ãkitaiko pite, ininiã amarini auakari Teoso ãkiri akiritãkako. ³⁶ Pinoromane Isapeo kiomãtxipe, iuaritika kamixiro oa. Kãkiti sãkirema: “!Oposotaikari kamixi onini” iuaritika seisi pakini kasiritipe kamixi onini. ³⁷ Kotxi Teoso posotari ikinipoko ikamini –itxaro oa.

³⁸ –Nikamapitikariko Apiananiri nirekaãkiti. Pisãpiretakiti iaõka ninirekapitika –otxa Maria.

Iuasaakipeka Teoso nitiri sipeka.

Maria Isapeomoni Motikini

³⁹ Mapaõti napa atoko Maria katimariã sari oxiratarimoni, Xotẽia tõpamoni. Iuaã osari sitatximoni. ⁴⁰ Oĩroã Sakaria aapoko. Oãkiritaro Isapeo:

–Ereẽkai –otxa.

⁴¹ Isapeo kenakotakasaakiri Maria akiritiniro oa, iuasaaki amarini otikakoãkiri oãkika. Iuasaakipeka Erekari Matamatakoti itapararitika apoka Isapeo ãkixinireẽ.

⁴² Iuasaaki otapararitika otxaro Maria:

–Kaiãopokoro sito itixi auakani, iuaritika pitenokara Teoso sika apia erekari. Apaka Teoso sikariko erekari pamaritemoni. ⁴³ Erekari Teoso kaminano nota, kotxi niaũte inoro motikaẽtano. Kinirepa ia erekari Teoso kaminano, kotxi nota minakato nitxaua.

⁴⁴ Nikenakotakasaakiri “Ereẽkai” pininino, namarite nitikakoãkiri oãkika, ipoxokoniuatiniã. ⁴⁵ Teoso sikari erekari pitemoni, kotxi pite auikari isãkire. Pite auikari isikaenetakiti atão isikinii –otxa Isapeo Mariamoni.

Maria Xikaretakiti

⁴⁶ Maria txari:

“Erekapitikari Apiananiri notamonikari.

⁴⁷ Nipoxokoniuata, kotxi Teoso nimaerekani makatxaãkari itxaua.

⁴⁸ Nipoxokoniuata, kotxi ixinikano nota. Initero poiãoro nitxaua. Ìkorakanani eereka auakani kãkiti txanoko: ‘Teoso kamapoxokonitaro, erekari isikiniro,’ txanoko nota.

⁴⁹ Nipoxokoniuata, kotxi Teoso Apiananiri kaminano posotiiretxi. Maerekati !auari iuamoni.

⁵⁰ Iua amonĩkari kãkiti iua paxitakani, kitxakapirĩkarini, ìkorakanani auakani, eereka auakani apaka iamoniãka.

⁵¹ Pataparari iua, ininiã ikamari posotiiretxi. Teoso txĩkitakana kãkiti iuikakaniua minakani ininiãuana, kotxi ãkixinireẽ iuikauana.

⁵² Teoso makatxakapekari auĩtetxi pataparari inakaniua. Eereka auĩtetxi !itxaikauana ninoa. Kãkiti poiãorini inakaniua Teoso kamari auĩtetxi ininiãuana.

⁵³ Isikakienatari natxitakani. Iokanatarari katxineiroteri sini. Kona xatiki isikari iuamoni.

⁵⁴ Imoianatapekana Xoteoakori, iua ìkapani parĩkauatakani. !Imaxinĩkaretari iamoniãkinina ninoa.

⁵⁵ Kitxakapirĩka Teoso xinikari Apraãoni iamoniãkini. Apaka iua tikini auakani ãtipirika iamoniãka, kotxi: ‘Nimoianataiko hĩte,’ itxa anirimanemoni kitxakapirĩkarinimoni,”

otxa Maria.

⁵⁶ Okaikota ipi, ãti pakini kasiriti Isapeokata. Eereka oaãpokomoni kanapiriã otxa Maria.

Xoão Kapatxisareri Iponaniini

⁵⁷ Amarini auini õti apopeka. Isapeo auãkitakari amarini kiki. ⁵⁸ Oaãpoko takote auakani, onirimane pakini kenakotari erekari Teoso kaminaro oa, ininiã ninoa, Isapeo pakini poxokopeka itxana ninoa.

⁵⁹ Oito õtisaaki, onirimane motika oamoni, Teoso takaõtxikare amarinimoni itakinina ìkapani. Inirekarina iuãka Sakaria itakauãkatinirina, kotxi iri uãkatxikana ninoa nireka itakauãkatinirina. ⁶⁰ Txamari inoro:

—Kona Sakariani iuãka. Xoãorako akiritaãkako —otxa.

⁶¹ Ininiã ninoa txaro:

—Pinirimane ãtika kona Xoão txa uãkataua.

⁶² Ninoa pimaãri amarini iri Sakaria iuakoãna amarini uãka inirekaãkiti. ⁶³ Ininiã Sakaria amanaãri iõkatsopatiko. Iõkatari: “Imi uãka Xoão.” Ininiã ikinimane tsorĩkaãta.

⁶⁴ Iuasaakipeka Teoso sikaposotiiretari isãkirauatini:

—Peerekari Teoso —itxa Sakaria.

⁶⁵ Kãkiti iua aapoko takote auakani pĩkarauata. Teoso posotiire ipĩkana. Ikara inakariene Sakaria, Xoão pakini pirena iaripireta oxiratari Xotéia tõpa, ininiã kãkiti iuaãtaã sãpirenauanãta ikara pirena. ⁶⁶ Kãkiti ikara inakariene kenakotakani tsorĩkaãta:

—Kanatokopa inakaripa itxatapaniua ia amarini? —itxana.

Ikinimane imarotari Apiananiri nĩkatiniri iua amarini.

Sakaria Xikaretakiti

⁶⁷ Iuasaaki Erekari Matamatakoti sikaposotiiretari Xoão iri Sakaria, ininiã Sakaria sãpiretari Teoso sãkire:

⁶⁸ “Peerekari Apiananiri aTeosone, ikinimane Xoteoakori Teosone, kotxi iua apoka inakitiakorimoni imakatzakinina ìkapani, imapinakanina ìkapani.

⁶⁹ Teoso iokanatarari kãkiti maerekani makatxakakari kaposotiireri atemoni. Teoso nitiri Taviini mekanirira iua.

⁷⁰ Kitxakapirĩka Teoso sãkire sãpiretakani erekarini sãpiretari ikara Teoso sãkire.

- ⁷¹ Teoso txari: ‘Nimakatxakaiko h̄ite himokaiakari mokakanii t̄ikane, homanatakini mokakanii t̄ikane.’
- ⁷² Is̄apiretari āatokiriakorini kitxakapir̄ikarini: ‘Niamon̄ikai. Nikamariko nikamaenetakiti h̄ite ĩkapani,’ itxa ninoamoni. Ikara Teoso kamaenetakiti erekari.
- ⁷³ Kitxakapir̄ika Teoso txari āatokiri Aprāõni: ‘Kona nimaxin̄ikaretari nisikaenetakiti.
- ⁷⁴ Nimakatxakapitikaiko h̄ite himokaiakari mokakanii t̄ikane, ininiã h̄ipar̄ikauata nota ĩkapani map̄ikaretika.
- ⁷⁵ Ininiã h̄ite auini erekari. Kona h̄ikamari maerekati h̄auapanika hinakasaaki,’ Teoso txari Aprāõni.
- ⁷⁶ Pitepekana namarite Xoã, Teoso s̄akire s̄apiretakari pitxauako. Teoso Apiananiri iaxitikiri s̄akire s̄apiretakari pitxauako. Pite sari Apiananiri apisa. Ikinika pimaiamatako iua apokini apisa, ikinika iposope inini ĩkapani.
- ⁷⁷ Pis̄apiretariko k̄akiti Teoso nakitiakori, Teoso makatxakiniri maerekanitxi k̄akiti kamakiti. Ininiã ninoa imarotariko ikara.
- ⁷⁸ Katiraõkiri aTeosone. Kaamon̄ikareri iua. Ininiã iua tixinekiri apokako atemoni. Atokatxi pok̄ikini atoko itxako. Iuasaaki ipiã !auaika, kotxi iua makatxakari amaerekani.
- ⁷⁹ Ininiã iua iopinikari k̄akiti xinire, ipinini p̄ikakani xinire. Ipiaã auakani atoko ninoa. Ininiã iua iopinikari axinire Teoso kimapore aimarotini ĩkapani, āuini ereka inini ĩkapani.”

Itxa Sakaria xikare.

⁸⁰ Iua amarini aneẽ. Teoso s̄akire iaõka ikamapika. Teoso s̄akire Xoteoakorimoni imas̄apiretakani apisapanika ãparaã makipakaniãtaã aua Xoã.

2

Xesosi Iponaniini Pirena (Mateo 1.1-25)

¹ Iuasaaki Homanoakori aūite Sesa Akósito inakori. Iua paniãtana initiriakori iaõtiniri ikininape k̄akiti iua aūitetxi ininiãtaãua t̄õpa auakani, ikini aapokotxitikini uãka imakatxakini ĩkapani. ² Mitxi Sesa Akósito !ikamapanikari k̄akiti iaõtiko. Iuasaaki Síria tixini auakani aūite Sirénio inakori. ³ Iuasaaki ikinimane sari sitatximoni iponaniiniãtaãna. Iuaã isikarina iuãkana.

⁴ Ininiã Xosee apaka sari iuãka isikini ĩkapani. Ininiã ipotorika Nasaree sitatxiti Kariréia t̄õpa. Xotéia t̄õpamoni isa, Pereẽ sitatxitimoni. Iuaã isa, kotxi iuaã aūitetxi Taviini kitxakapir̄ika aua. Taviini nirimane itxaua Xosee. ⁵ Isa Mariakata. Ītanoro t̄ikane oa. Iuasaaki !itakapanikaro. Kamixipeka otxa iuasaaki. ⁶ Pereẽ apoka itxana. Iuaã auakasaakina, aua itxa amarini. ⁷ Oãuãkitakari merepitipanika oimi kiki. Ininiã m̄akatxi mataã oiapirikari, pirãtxi nipokotini tiitxitiã taka otxari amarini, kotxi k̄akiti imakanakiniãtaã imakinika x̄apokapeka, ininiã ninoa auanãta pirãtxi auiniãtaã.

Soti Aūite Piratakani Pirena

⁸ Iuaãtaã Pereẽ sitatxiti mapotõkire ĩkanõka kikiakori soti aūite piratakani n̄ikanãtari ipiraakorina. ⁹ Iuasaaki katimaritika Apiananiri nitiri iaxitikiri tokiã ninoamoni. Iuasaaki Apiananiri iotximere iopinikari ninoa auiniãtaã, ininiã imarotarina Teoso apokini iuaãtaã. Ininiã iteene ip̄ikarauatana ninoa. ¹⁰ Ininiã Teoso nitiri txana ninoa:

—!H̄ip̄ikarauatape. Nota minapiretari erekari pirena ikinimane k̄akiti enen̄ikini ĩkapani, ¹¹ kotxi ia õti k̄akiti maerekan̄i makatxaãkari iponaniãpeka Taviini auini sitatxitiã. Iua Teoso mereẽkiti. Apiananiri iua. ¹² Himarotariko nis̄akire atão inini, kotxi h̄apokariko ia amarini m̄akatxi mataã iapirikiko pirãtxi nikini tiitxitiã —Teoso nitiri txana ninoa.

¹³ Iuasaakipeka itomaneri Teoso nitiriakori iaxitikini tokiã iuaãtaã. Ninoa xikarauata Teoso ĩkapani. ¹⁴ Ixikaretarina:

—Peerekari Teoso, iaxiti apiko nopinixiti auakari. Iua kamaerekaxiniretari kākiti iua apokaerekatakini —itxana ixikarena.

¹⁵ Teoso nitiriakori kanapiriā itxana Teoso tixinemoni. Iuasaaki ninoa pirātxi nīkatakani misākiretakakaua:

—Masa Pereēmoni. Maātamatarari ikara Apiananiri sāpiretakiti —itxana.

¹⁶ Ininiā katimaritika isana Pereēmoni. Iuaā apokasaakina, initarina amarini. Apokana Xosee, Maria pakini. Ininiā atamatarina amarini pirātxi nikini tiitxitiā.

¹⁷ Ikara atamataākana atoko, isāpirenātarina Teoso nitiri sāpiretakiti amarini pirena ikinimanemoni. ¹⁸ Kākiti kenakotakasaakiri soti auīte nīkatakani sāpiretakiti, ikini-

mane tsorīkaāta iuasaaki. ¹⁹ Maria kenakotakasaakiri soti auīte nīkatakani sāpiretakiti, oa ākixinireē onīkatari ikara ene. !Omaxinīkaretari ninoa sāpiretakiti. Oxinikapikari.

²⁰ Eereka pirātxi nīkatakani kanapiriā ipiraakori auinimon. Imisākiretakakana:

—Peerekari Teoso. Apiananiri iua, kotxi erekapitikari aītikakiti. Erekapitikari initiri iaxitikiri sāpiretakiti. Isāpiretakiti atāopitika, kotxi aātamatarari isāpiretakiti iaōka —itxanātana ninoa soti auīte nīkatakani.

Xesosi Takauākatiko

²¹ Xesosi oito ōti auakasaaki, inirimane kamari Teoso takaōtxikare iītoā. Iuasaaki inirimane takauākatari Xesosi, kotxi iua iaōka Teoso nitiri iaxitikiri sāpiretapekaro Maria oa kamixi oinini apisapanika.

Xesosi Anikiko Teoso Misākiretiko Aikotimoni

²² Moisesini ketotiniri manapi Xosee, Maria pakini kamari Moisesini paniātakiti iaōka amarini auakasaaki, Xosee, Maria pakini maerekani Teoso makatxakini īkapani. Ikara xipoka atoko anikarina Xesosi Xerosareē sitatxitimoni Apiananirimoni isikinirina īkapani, ²³ kotxi Apiananiri paniātakiti iōkatsopatakori txari:

Merepitipanika iponaniākari sikaākako Teosomoni, kotxi Teoso nakiti iua.

²⁴ Apaka Apiananiri paniātakiti iōkatsopatakori txari:

Amarini iponaniākasaaki, ipi kamoā pisika Teosomoni. Iminakaniā, ipi kamoā ākiri pisika Teosomoni,

itxa Teoso. Ininiā Xosee, Maria pakini sari Xerosareē kamoā isikinina īkapani.

²⁵ Iuasaaki kiki Simiāo inakori aua Xerosareē. Iua erekari kamakari. Ikinipoko Teoso paniātakiti ikama. Erekari Matamatakoti auari ākixinireē. Ākixinireē iātapanātapikari Teoso Mereēkiti apokini, kotxi Isaeo auakani maerekani makatxaākari itxaua. ²⁶ Erekari Matamatakoti sāpiretapekari iua: “Pipinini apisa paōkitapanikariko Apiananiri Mereēkiti,” itxari Simiāo. ²⁷ Erekari Matamatakoti sikanireōtari Simiāo aiko Teoso misākiretiko aikoti īroini. Iuasaaki Xosee, Maria pakini īroā iuaātaā, Apiananirimoni Xesosi isikinina īkapani, Teoso paniātakiti ikaminina īkapani. ²⁸ Iuasaakipeka Simiāo apakapari Xesosi:

—Peerekari Teoso. ²⁹ Niauīte Apiananiri, uatxa apokapeka ia amarini pisikaenetakiti. Nota pite īkapani parīkauatarino. Uatxa niposotari nīpinini erekaxinirepeka ninini,

³⁰ kotxi nota atamatarari ia amarini piokanatakiti atemoni, amaerekani imaktxakini īkapani, amapinakani īkapani. ³¹ Pite iokanatapekari ia īkorapokoriti ikini itixiti auakani maerekani imaktxakini īkapani. ³² Ia amarini tirikapi atoko, kotxi iopinikariko pikimapore, pisākire Xoteo minakaniua imarotini īkapani. Ia amarini tirikapi apiatakari atoko Xoteoakorimoni pinakitiakorimoni, kotxi oerekai pite ninoamoni —itxa Simiāo sākire Teosomoni.

³³ Xosee, Xesosi inoro apaka tsorīkaānāta ikara Simiāo sākire ikenakotakasaakina. ³⁴ Simiāo amanaāri Teoso ikinipoko erekari ninoamoni isikini īkapani. Eereka imisākiretaro Maria, Xesosi inoro:

—Teoso mereēri ia amarini Xoteoakorimoni iokanatiniri īkapani. Ia apakapakari Teoso apakapa apaka. Ia mapakapakati Teoso !apakapari. Imisiritaākako. Ia amarini oerekari Teoso kākitemoni, txamari itori kākiti !auikari isākire. ³⁵ Ikara atoko ininiā, itori kākiti

xiniäkiti kipatakori äkixinireë, imarotaäkako. Pitepekana pite matinaniuatako. Päkipa iouata iorotini tsii atoko itxako –itxa Simião säkire Mariamoni.

³⁶ Iuasaaki oãua sito Teoso säkire säpiretakaro Ana inakoro. Panoeo äkero oa. Oãtokiri kitzakapirika Asee inakori. Iuasaaki kiomãtxipekaro oa. Oãua setxi ano õtanirikata. Eereka ipiãpe. ³⁷ !Oõtaniriuataika. Oitëta koatrokananipeka oãuini. Oa auapika Teoso misäkiretiko aikoti äki. Iuaã ikini õti, ikini ikanõkati pakini omisäkiretapikari Teoso. Itokata otakanapari onipokotini Teoso omisäkiretini ìkapani. ³⁸ Xosee, Maria pakini Simião misäkiretaka atoko Ana apoka. Omisäkiretari Teoso:

–Erekapitikari ia amarini pimereëkiti kãkiti iãtapakiti piokanatini atemoni –otxa.

Eereka osãpirenauata Xesosi apokini pirena Xerosareë auakanimoni kãkiti maerekani makatxaäkari iãtapakanimoni.

Nasaree Sitatxitimoni Ikanapiriinina

³⁹ Xosee, Maria pakini Apiananiri paniãtakiti iõkatsopatakori imakinika ikamaäkana atoko, kanapiriã itxana Karirëia tõpamoni. Iuaã isana aapokomonina Nasaree sitatxitiã. ⁴⁰ Iua amarini aneë. Itapara auããpotari. Kimaroreri itxaua. Teoso iteene tiretari iua Xesosi.

Xesosi Misäkirenãtari Koerekarerini

⁴¹ Ikinikanani Xosee, Maria pakini sari Pãskoã kiiniritimoni Xerosareë sitatxiti-moni. ⁴² Xesosi tosi anopeka inakasaaki, isana Xerosareë auakari kiiniritimoni mitxi isanãtinina atokokana. ⁴³ Kiiniri xipoka atoko Xosee, Maria pakini potorika aapokomonina isinina ìkapani. Iuasaaki Xesosi kaikota Xerosareë. Txamari ninoa !imarotari ikaikotini. ⁴⁴ Ninoa uãkatamari apanakini inirimanekata isini. Ikara atoko ininiã, ikimaporitana äti õtiãpeka. Mapiãnikata ipixinipokoriti initamarina inirimanemoni, aõkimaneremoni. !Apokarina. ⁴⁵ Ininiã ikanapiriãna Xerosareëmoni iuaãkana initinirina ìkapani. ⁴⁶ Ipi, äti pakini õti initapiimarina. !Apokarina Xesosi. Eereka apokarina Teoso misäkiretiko aikoti äki. Moisesi säkire oerekakanikata iitopãkanãta. Xesosi kenakonãtari ninoa säkire. Apaka ipimarauata. ⁴⁷ Ninoa Xesosi säkire kenakotakani tsorikaãnãta, kotxi paimatireri iua. ⁴⁸ Xosee, Maria pakini apokasaakiri iua, kona imarotarina Xesosi parika. Inoro txari:

–Namarite, kinirepa pimisiritaua ate? Piri, nota pakini pikamamaxirexiniretaua ate. Anitapiimai. Kona aãpokai –otxari Xesosi.

⁴⁹ Ininiã Xesosi:

–Kinirepa hinitanãtano? Kona himarotatari uai niri aapoko ninirekari nauini, ipaniãtakiti nikamini ìkapani –itxa.

⁵⁰ Txamari ninoa !imarotari Xesosi säkire.

⁵¹ Ikara atoko ininiã, Xesosi kanapiriã ninoakata Nasaree sitatxitimoni. Ikinika Xosee, Maria pakini säkire ikãpita. Inoro xinikapikari Xesosi säkire oãkixinireë. Opotxitari oxinikiniri Xesosi säkire. ⁵² Xesosi aneë. Imatire apaka aneë. Teoso apokaerekatari Xesosi. Kãkiti apaka apokaerekatari Xesosi.

3

Xoão Kapatxisareri Säpiretakiti

(Mateo 3.1-12; Marko 1.1-8; Xoão 1.19-28)

¹ Homa sitatxitiã Homanoakori auãte Txipërio inakori iua. Kãsi anokananipeka iua auãtetxi ininiua iuasaaki. Iuasaaki Xotëia tõpa auakani auãte Põsio Pirato inakori. Karirëia tõpa auakani auãte Erotxi inakori. Erotxi itari Piripi inakori. Itoreia tixini auakani auãte, Takonitxi tixini auakani auãte apaka itxaua Piripi. Iuasaaki Apireni auakani auãte Arisãnia inakori. ² Iuasaaki Anasi inakori, Kaipasi inakori pakini sasetotxi auãteakori apiatakani itxauana ninoa. Iuasaaki Teoso säpiretari isäkire Xoãomoni Sakaria

ãkirimoni, ãparaã makipakaniãtaã auakasaaki. ³ Ininiã Xoão sari ikininape kãkitimoni, uini Xotão takote auakanimoni. Isãpiretari Teoso sãkire:

—Hĩtakanapariko himaerekani. Eereka patxisata hinaãkako. Ikara atoko hininiã, Teoso makatxakinii himaerekani —itxanãta Xoão ikininape kãkitimoni.

⁴ Kitxakapirĩka Teoso sãkire sãpiretakari Isaía inakori iõkatsopatari:

Auako kiki ãparaã makipakaniãtaã. Isãpirenauatako. Itxariko: “Hõeretariko kimapori Apiananiri apokini apisapanika. Itĩkaãpo erekari hĩkamako iua napini ĩkapani.

⁵ Kipatxiã ixãpokakaãkako ikini isauana. Ixirata miriĩ oerekataãkako. Kimapori ikitokare oerekataãkako. Kimapori pakota totaãkako.

⁶ Ikinimane kãkiti itixi auakani imarotariko Teoso makatxakiniri kãkiti maerekani imapinakani ĩkapani,” itxanãta.

Ikara atoko itxa Isaía iõkatsopatakiti Xoão pirena. Kimapori kãkiti oerekatini atokokana, auĩtetxi apokini apisa, iua atokokana Xoão nirekari kãkiti iposope inini Apiananiri apokini apisa, imaerekanina itakanapinina ĩkapani.

⁷ Itomaneri kãkiti sari Xoãomonni ipatxisatikona ĩkapani. Ininiã Xoão:

—Imini katsiiri anaakorirai hĩte. Teoso misiritapitikai himaerekani xika. Himitekini ! auari. Hinirekari hĩpatxisatiko, txamari ! hinirekari hĩtakanapiniri himaerekani.

⁸ Hinirekiniãri himaerekani hĩtakanapini, ininiã hĩkamariko erekari. Ikara atoko ininiã, hõerekari Teoso atão hĩtakanapiniri himaerekani. Hãkixiniremoni ! hĩxinikapiri: “Teoso apakapapitikauako ate, kotxi ate atokirini Apraãoni txaua,” !hĩtxapeko. Ari, nota sãpiretai hĩte, Teoso nirekiniãri, iposotari ia kai soroã Apraãoni mekaniriakori ikamini. Kona Apraãoni posotari anikinii Teosomoni. ⁹ Aamina maereka iriti atoko hĩtxa. Teoso iposopeka hĩte ixipokini. Kãkiti auari ikitaita kauanari aamina maereka iriti itokini ĩkapani. Ikinika aamina maereka iriti tokaãkako. Xaminaã oka inaãkanako. Teoso kamakiti iua atokokana itxa. Ininiã Teoso kitaite kauanapeka, aamina kotsa sauakiko tĩkane. Iua atokokana ininiã, Teoso aiamatapeka hĩte ixipokini ĩkapani —itxa Xoão ninoamoni.

¹⁰ —Ikara atoko ininiã, kipa akama Teoso mamisiritakaniua ĩkapani? —itxarina.

¹¹ Ininiã Xoão apakapapireta:

—Pimãka kauanata ipi auiniãi, ãti pisika mãkatxi kauanata mauakinitimoni. Nipokori auiniãi, pisikari nipokori mauakinitimoni —itxa Xoão sãkire.

¹² Kikiãkini, txineiro apakapakani Homano auĩte nitiriakori, apoka apaka ipatxisatikona ĩkapani.

—Koerekareri, atepékana, kipa ate kama Teoso mamisiritakaniua ĩkapani? —itxarina.

¹³ Ininiã Xoão:

—Kãkiti txineirote himakatzakakito, Homano auĩte nireẽkito iaõka himakatzakako. Apikomoni !himakatzakapero —itxana.

¹⁴ ãtikaka sotatoakori apaka pimaãri:

—Atepekana, kipa ate kama amaerekani atakanapini ĩkapani?

Ininiã Xoão:

—!Himaĩkapiri kãkiti, itxineirote himixirikini ĩkapani. Kona ãti maxikatiĩka !hãpoĩtape. Hĩpoxokoniuatako txineiro hãpakapakitoã hĩparĩka ĩki. !Hinirekapero apikomoni —itxa sotatoakorimoni.

¹⁵ Iuasaaki kãkiti iãtapanãtari Teoso mereẽkiti apokini. Ininiã Xoão sãpiretakiti ikenakotakasaakina, ãkixinireẽna ixinikarina:

—Xoãokani Teoso mereẽkiti txataua atxiĩti? —itxanãtana ixinikanãtakitina.

¹⁶ Ininiã Xoão:

—ãparaaãnokara nipatxisatai hĩte. Nota tikini apoãkari patxisataiko hĩte Erekari Mata-matakotiã, xaminaã pakini. Apiatakari itxaua iua. !Apakata iua takote napokini ikiti mata nimakatzakini ĩkapani, kotxi iua apiata. Nota poiãoka. Imakatzakari himaerekani, itxiko metao ãki auakari arikini atoko. ¹⁷ Katarereri ãpokari ahoisi otãta imakatzakini

ĭkapani. Otāta arikaāka. Oki nĭkataāka ikiena nĭkatikoātaā. Iua atokokana Teoso nĭkatariko kākiti erekarini. Maerekati kamakani arikaākako xamina maxipoākatiā.

¹⁸ Ikara atokora itxa Xoāo sāpirena ōtākikinina kākiti. Isāpiretari erekari pirena Teoso pirena kākitemoni. ¹⁹ Āti ōti Xoāo pinitari Erotxi, Kariréia auakani auĭte:

—Pitakiniāro pitari Piripi ĭtanoro Erotxia inakoro, maerekati pikama. Apaka apikomoni maerekati pikamapitipo —itxa Xoāo.

²⁰ Ininiā iuasaaki iuaĭkana Erotxi kamari maerekati, kotxi itakari Xoāo kateia āki isākire imapokaerekatakani xika.

Xesosi Patxisatiko Pirena
(*Mateo 3.13-17; Marko 1.9-11*)

²¹ Xoāo Erotxi maĭkini apisapanika ikinimane kākiti ipatxisatakasaaki, Xesosi apaka patxisataāka. Iuasaaki Xesosi sākirauatakasaaki Teosokata, iaxiti takaka. ²² Erekari Matamatakoti katxaka Xesosi nopini. Kamoā katxakini atoko itxa ikatxakini. Iuasaaki ikenakotaāka iaxitikiri sākire:

—Pite namarite, nitiretakiti, napokaerekatai, kotxi ninirekakiti pikama —itxa.

Xesosi Nirimaneakori Iua Apisapanika Auakani
(*Mateo 1.1-17*)

²³ Iuasaaki Xesosi potorika iparĭkauatini Teoso ĭkapani. Trĭta anokananipeka itxaua iuasaaki Xesosi. Kākiti uākatari iua Xosee ākiri ininiāua.

Xosee iri Erii.

²⁴ Erii iri Matatxi.

Matatxi iri Arevii.

Arevii iri Meokii.

Meokii iri Xanai.

Xanai iri Xosee.

²⁵ Xosee iri Matatxia.

Matatxia iri Amosi.

Amosi iri Naoō.

Naoō iri Esirii.

Esirii iri Nakai.

²⁶ Nakai iri Maatxi.

Maatxi iri Matatxia.

Matatxia iri Semei.

Semei iri Xosee.

Xosee iri Xota.

²⁷ Xota iri Xoanaā.

Xoanaā iri Hesa.

Hesa iri Soropapeo.

Soropapeo iri Saratxieo.

Saratxieo iri Nerii.

²⁸ Nerii iri Meokii.

Meokii iri Atxii.

Atxii iri Kosaā.

Kosaā iri Eomataā.

Eomataā iri Eri.

²⁹ Eri iri Xosoe.

Xosoe iri Eriesa.

Eriesa iri Xoriĭ.

Xoriĭ iri Matatxi.

Matatxi iri Arevii.

³⁰ Arevii iri Simiāo.

Simiāo iri Xotaa.

Xotaa iri Xosee.

Xosee iri Xonaā.

Xonaā iri Eriakiĭ.

³¹ Eriakiĭ iri Mereaa.

Mereaa iri Mena.
 Mena iri Matata.
 Matata iri Nataã.
 Nataã iri Tavii.
³² Tavii iri Xesee.
 Xesee iri Opetxi.
 Opetxi iri Póasi.
 Póasi iri Sáomō.
 Sáomō iri Nasoō.
³³ Nasoō iri Aminatapi.
 Aminatapi iri Átximĩ.
 Átximĩ iri Anii.
 Anii iri Ésirō.
 Ésirō iri Péresi.
 Péresi iri Xotaa.
³⁴ Xotaa iri Xakoo.
 Xakoo iri Isaki.
 Isaki iri Apraão.
 Apraão iri Tera.
 Tera iri Nakoo.
³⁵ Nakoo iri Seroki.
 Seroki iri Hakaoo.
 Hakaoo iri Pareki.
 Pareki iri Epi.
 Epi iri Sara.
³⁶ Sara iri Kainaã.
 Kainaã iri Apaxatxi.
 Apaxatxi iri Seĩ.
 Seĩ iri Noee.
 Noee iri Arameki.
³⁷ Arameki iri Metosareẽ.
 Metosareẽ iri Enoki.
 Enoki iri Xaretxi.
 Xaretxi iri Marereo.
 Marereo iri Kainaã.
³⁸ Kainaã iri Enosi.
 Enosi iri Setxi.
 Setxi iri Adão.
 Adão iri Teoso. Imapotōkirepe.

4

Satanasi Nirekari Xesosi Kaminiri Maerekati (Mateo 4.1-11; Marko 1.12-13)

¹ Xesosi ipatxisatiko atoko, Erekarı Matamatakoti iteene sikaposotiiretari iua. Erekarı Matamatakoti txĩkitakari Xesosi uini Xotão itakanapini, āparaã makipakaniãtaã isini ĩkapani. ² Iuaã koarēta ōti auakasaaki, Satanasi atamakaerekatari Xesosi. Koarēta ōti manipokotakatinoka itxa Xesosi. Ininiã natxinoka itxa Xesosi.

³ Ininiã Satanasi txari:

—Pite Teoso ākiri pitxaua, ininiã ia kai soro komiri pitxĩkitaka —itxari Xesosi.

⁴ Ininiã Xesosi apakapapiretari:

—Kona, kotxi Teoso sākire iōkatsopatakori txari:

Kona komirinanini txĩkitakari kākiti ātipirika auini tĩkane. Ikinika Teoso sākirera txĩkitakari kākiti ātipirika auini tĩkane.

⁵ Ininiã iuasaaki Satanasi anikari Xesosi ixirata nopinixiti. Iuaã pakoteri oerekiniri ikinimane tixine. ⁶ Ininiã Satanasi:

—Nota posotari nisikini ikinimane auñtetxiakori posotiire. Ikinipoko ninoa txineirote apaka nıposotari nisikini. Merepitipanika notamoni isikaãka ia posotiiretxi, ininiã nota sikari ninirekaãkitimoni. ⁷ Ikara atoko ininiã, piteosonetiniãno, ia posotiiretxi nisikai pite —Satanasi txari Xesosi.

⁸ Ininiã Xesosi:

—Konapitini. Pisipeka Satanasi. Teoso sãkire iõkatsopatakori txari: Apiananiri piTeosone. Iuanokara piteosoneta. Iua ïkapaninokara piparïkauatako.

⁹ Eereka Satanasi anikari Xesosi Xerosareẽmoni, aiko Teoso misãkiretiko nopinixiti. Itanoxiti pañtanori. Pamonõkoniri. Iuaã itxari:

—Teoso ãkiri pininiãua, pokaua xiti. Ininiã ikinipoko kãkiti imarotariko Teoso ãkiri pininiãua, ¹⁰ kotxi Teoso sãkire iõkatsopatakori txari:

Teoso iokanatanako initiriakori iaxitikini pite inïkatinina tïkane.

¹¹ Ninoa maïkai pimapinakani tïkane, ininiã pikarouatini !auari. Kona kai soro karotari pikiti,

itxa Teoso sãkire —Satanasi txari Xesosi.

¹² Ininiã Xesosi:

—Teoso sãkire iõkatsopatakori apaka txari: Kona patamakaerekatapiri Apiananiri piTeosone, —itxari.

¹³ Iuasaakipeka Satanasi atamakaerekatini Xesosi xipope. Ininiã itakanapari Xesosi ãti õti iuaïkana ikanapiriini iuamoni ïkapani.

Xesosi Mıpotorikari Iparïka Kariréia Tõpa
(Mateo 4.12-17; Marko 1.14-15)

¹⁴ Ikara inaãka atoko Xesosi kanapiriã Kariréia tõpa auakanimoni. Paposotiireri, kotxi Erekari Matamatakoti auari iuakata. Iua pirena iaripireta ikini Kariréia tõpa auakanimoni. ¹⁵ Iua oerekarauata aiko ãki Xoteo apotiitiniãtaãua. Ininiã ikinimane txari:

—Peerekari iua, kotxi erekapitikari iua sãpiretakiti —itxana.

Nasaree Auakani Kona Auikari Xesosi Sãkire
(Mateo 13.53-58; Marko 6.1-6)

¹⁶ Eereka Xesosi sari Nasaree sitatxitimoni. Iuaã Xesosi aneẽ mitxi. Xoteo tomatini õtisaaki Xesosi itotapekari aiko Xoteo apotiitiniãtaãua isini. Ininiã iuasaaki, Xoteo tomatini õtisaaki isari iuaã. Iuaãtaã itima Teoso sãkire iõkatsopatakori atatsopatini ïkapani.

¹⁷ Teoso sãkire sãpiretakari Isaía iõkatsopatakiti tsopa isikaãka. Ininiã imatakireẽri aãtsopa. Ia Teoso sãkire inita, atatsopata itxa:

¹⁸ —Erekari Matamatakoti notakata aua, ininiã Apiananiri mereẽno nota matx-ineirotenimonikari erekari pirena nisãpiretini ïkapani. Iokanatanano kateia ãki auakani nisikakini ïkapani. Iokanatanano mõiãrenimoni iuaïkana atamarauatinina ïkapani. Iokanatanano misiritakonimoni, ninoa misiritakani nixipokini ïkapani.

¹⁹ Ipaniãtano kãkiti nisãpiretini: “Ïkorakanani Teoso apokapeka kãkiti maerekani imaktx-akini ïkapani, imapinakanina tïkane.”

Ikara atatsopata Xesosi.

²⁰ Aãtsopa iapirikaãka atoko, sika itxari sasetotxi nitirimoni. Ikara inaãka atoko Xesosi topãka. Imakinika kãkiti aiko Xoteo apotiitiniãtaãua ãki auakani, imakinikana atamatari Xesosi, isãpiretakiti kinirão kenakotaka inakani. ²¹ Ininiã Xesosi sãpiretana:

—Ikara Teoso sãkire hïkenakotakiti apokapeka uatxa —itxa ninoamoni.

²² Ikinimane kãkiti sãpirenauata Xesosi ereka inini. Itsorïkaãñãtana isãkire erekari ikenakotakasaakina:

—Kiãtokopa ininiãpa imarotatari ikara atoko inakari isãpiretini? Kotxi Xosee ãkirira iua, minakati ãkirira iua —itxanãtana.

²³ Ininiã Xesosi txana ninoa:

—Atxiiti hite txanoko nota imatiretxi kitzakapirika kiomãtxiakori sãkire. Ninoa txari: “Pinĩtxi imarotakari pininiãua, piteka pipitaua.” Atxiiti hĩxinikanãtari: Kapanaoõ sitatxiti nauakasaaki, nikamari posotiretxi iuaãtaã. Kinirepa na nikamatari posotiretxi uai nauiniãtaã? Ikara atoko atxiiti hĩxinikanãta. ²⁴ Atão nisãpiretai, kãkiti Teoso sãkire sãpiretakari inirimane sauaki auakasaaki, inirimane !auikari isãkire. Ia xika kona nikamari posotiretxi uai. ²⁵ Atãopitika nisãpiretai hite. Kitzakapirika Teoso sãkire sãpiretakari Eríasi inakori auakasaaki, ipi ãti pakini ano ipixini ano pakini ãparaã !kipa. Iuaã Isaeo tixini natxinoka aua. Iuasaaki kaiãopokoro sitoakoro tikinitakoro auari iuaãtaã. ²⁶ Iuaritika Teoso !iokanatarari Eríasi ninoa ikininapemoni. Iokanatarari ãtoka sitomoni tikinitakoromoni, nipokori isikiniro ãkapani. Oa sito aua Sarepita sitatxiti Sitoõ tãpa, Isaeo tixini takote. Xoteo !otxaua oa.

²⁷ —Ikara atokotxikana itxa Teoso sãkire sãpiretakari Eriseo inakori. Iua auakasaaki, kaiãopokori amianatakani maere matati Isaeo tixini auakani aua. Kona imakinikani erekapeka inaãkana. Kiki Naamaã inakori Síria tixini auakari, iuanokara erekapeka itxĩkitakaãka. Iua Naamaã kona Xoteo !itxaua iua —itxa Xesosi ninoamoni.

²⁸ Ikinimane aiko ãki apotiitakaniua, ikara ikenakotakasaakina, iteene inaiatauana. ²⁹ Ininiã ikosekaĩtotarina Xesosi sitatxi mapotõkiremoni. Anikarina ixirata nopini sitatxi auiniãtaã. Iuaã inirekarina Xesosi okinina ixiratamoni ipinini ãkapani. ³⁰ Txamari Xesosi napari ninoa sauaki, ãkorape itxa.

*Kiki Maerekati Matamatakoti Auaĩtotakiti
(Marko 1.21-28)*

³¹ Eereka Xesosi sari Kapanaoõ sitatxitimoni Kariréia tãpa. Iuaã tomatiko õtisaaki oerekana kãkiti Teoso sãkire. ³² Kãkiti iuaã auakani tsorĩkaãnãta oerekakiti ikenakotakasaakina, kotxi paimatireri iua. Isãpiretakiti atãonoka itxa isãkire. ³³ Iuasaaki aiko ãki kãkiti apotiitiniãtaãua, aua kiki maerekati matamatakoti auaĩtotakiti.

³⁴ Iua kiki ãkixinire auakari akiripoakata:

—Xesosi Nasareekiri, kipa ãkai uai? Kiãtokopa pitxataua ate? Atxiiti papoka ate pixipokini ãkapani? Nota imarotai pite. Pite maerekati mauakiniti pite. Teoso nakiti pitxaua pite —itxa maerekati matamatakoti Xesosimoni.

³⁵ Ininiã Xesosi txitari iua. !Auiritari isãkirauatini:

—Maãtako. Posipikari ere kiki —itxari.

Ininiã maerekati matamatakoti iriãkatari iua kiki ikinimane okiãtaã. Ininiã itakanapari iua, makarotika itxa kiki. ³⁶ Kãkiti iuaãtaã tsorĩkaãnãta. Imisãkiretakakauana:

—Ãkora kiki paposotireri isãkire. Itapararitika ipaniãtari maerekati matamatakoti sini, ininiã nãkorape itxapena maerekani matamatakoni.

³⁷ Ininiã Xesosi pirena iua tãpa iaripireta.

*Xesosi Makananitaro Simão Petro Imakiro
(Mateo 8.14-17; Marko 1.29-34)*

³⁸ Eereka Xesosi potorika aiko Xoteoakori apotiitiniãtaãua. Simão aapokomoni isa. Iuasaaki Simão imakiro iteene oãpoomata. Ininiã amanaãrina Xesosi oa erekape inĩkitakini. ³⁹ Ininiã ipapĩka oamoni:

—Nipaniãtari apoomari iotokini —itxa.

Ininiã apoomari iotoka. Iuasaakipeka oa õkitikaua, nipokori osikana ninoa.

*Xesosi Makananitana Amianatakani
(Mateo 8.16-17; Marko 1.32-34)*

⁴⁰ Atokatxi ereëkokaãpotapeka inakasaaki, kãkiti anikana amianatakani ikinipoko amianari auakini, Xesosimoni. Itakari iuako amianatakani nopini. Iuasaakipeka ninoa erekapeka itxana. ⁴¹ Omitikari maerekati matamatakoti kãkiti ãtoã auakari apaka. Osipikasaakina, akiripoakatana:

—Pite Teoso ãkiri pitxaua.

Ininiã Xesosi txitana ninoa. !Auiritaikana akiritinina, kotxi ninoa imarotari Teoso mereëkiti ininiãua Xesosi.

Xesosi Sãpiretari Erekarî Pirena
(Marko 1.35-39)

⁴² Katimatinîkata Xesosi sari kãkiti mauakaniãtaã. Iuasaaki kãkiti nitanãtari iua. Apokasaakirina, amanaãrina Xesosi:

—Pikaikota atekata —itxarina.

⁴³ Txamari Xesosi txari:

—!Apakata uai nikaikotini, kotxi ãtiãtaã apaka nisãpiretariko erekarî pirena Teoso auñtetxi ininiãua pirena. Ikinimanemoni ikara nisãpiretini ïkapanira, Teoso iokanatanano kãkitimoni.

⁴⁴ Ikara atoko ininiãra, isãpirenauata ikininape aiko ãki Xoteoakori apotiitiniãtaãua ikinipoko Xoteoakori tixine.

5

Merepitipanika Xesosi Moianariakori
(Mateo 4.18-22; Marko 1.16-20)

¹ Æti õti Xesosi auanãta Xenesaree inakori poa tinikata. Xenesareetxikana Kariréia poa. Ipi iuãka aua. Iuasaaki kãkitipokoni ãkitari iua Teoso sãkire ikenakotinina ïkapani. Iuakatapeka xãpoka itxana. ² Iuasaaki Xesosi atamatari ipi kanaua ioporoko. Kokat-saãriti kanauate. Ninoa imiriï arokanãtari hetxi. ³ Xesosi iereëtaua Simão kanauate ãki:

—Pikatika pikanauate amaãtiki apanîkakiã —itxa Simãomoni.

Eereka iitopãka kanaua ãki. Iuaãtaã isãpiretari Teoso sãkire kãkitimoni imiriï apoti-itakanimoni.

⁴ Isãpirenauataka atoko itxari:

—Apanîkakiã pimekota. Iuaãtaã pitakari hetxi kãuaãriã —Xesosi txari Simão.

⁵ Ininiã Simão:

—Koerekareri, hetxi atakapikama ïkanõka. Iteene aõkatsaãkatapiikama. Txamari na xatiki ximaki amaïka. Kona ãtika amaïka. Iuaritika pite paniãtiniãno, iuaritika nitakapitkariko hetxi —itxa Simão.

⁶ Hetxi ninoa takasaaki kãuaãriã, ximakipokoni imaïkana, ininiã hetxi tsorakiarita.

⁷ Ikara xika akiritana imoianariakori ãti kanauate ãki auakani:

—Åpina. Himoianataua ate. Hetxi tsorakiãpotanapanoka.

Ininiã ninoa ina. Ikinimane kosekari hetxi. Ximakipokoni. Ipi kanaua xãpoãkata ximakinoka. Ximaki xika kanaua sakikaarita. ⁸ Simão Petro atamatakasaakiri ximakipokoni, ikapotoreëkua Xesosi apisatoõ:

—!Pikaikotape nota takote, kotxi erekai pite. Maerekati kamakarino nota —itxa.

⁹ Ikara atoko itxa Simão sãkire, kotxi iua, imoianariakori apaka tsorîkaãta kaiãopokori ximaki ninoa maïkakiti xika. ¹⁰ Simão moianariakori Txiako, Xoão pakini, ninoa apaka tsorîkaãta. Txiako, Xoão pakini Sepeteo anaakori. Ininiã Xesosi txari Simão:

—!Pipîkarauatape. !Pimaïkaikari ximaki. Ætião piparîka auako. Nisãkire pisãpiretako kãkitimoni —itxa.

¹¹ Eereka ninoa apokitaãka atoko, ikinika itiina itakanapana, Xesosikata sa itxana imiparîkatinirina ïkapani.

Kiki Maere Matati
(Mateo 8.1-4; Marko 1.40-45)

¹² Æti õti Xesosi auanãta ãti sitatxitiã. Iuaã auakasaaki, aua kiki maere matati. Atamatakasaakiri Xesosi, ikapotoreëkua, iãka Xesosi apisatoõ. Iteene amanaãri Xesosi: —Apiananiri, pinirekiniãri, piposotari nota ereka pitxîkitakini —itxari.

¹³ Ininiã Xesosi maãtakari iua:

—Ari ninirekapitikari. Erekapekai —itxari.

Iuasaakipeka erekapekai itxa. ¹⁴ Ininiã Xesosi paniãtari:

—!Pisãpiretapiri apanakini ereka nitxĩkitakinii. Pisa sasetotximoni. Poerekari piĩto iuamoni, ininiãkara itxai: “Atãopitika erekapekai pite.” Eereka pisikari Teosomoni Moisesi paniãtakiti iaõka. Ikara atoko pikaminiã, ikinimane imarotari pite atão ereka pininiãua —itxa Xesosi.

¹⁵ Xesosi paniãtari iua apanakini imasãpiretakani, iuaritika Xesosi pirena apikomoni iaripireta. Ininiã kãkitipokoni sari iuamoni isãkire ikenakotinina ĩkapani, amianari imakatzakini ĩkapani. ¹⁶ Ininiãkara Xesosi itotapekari iuanoka isini kãkiti mauakaniãtaã Teosokata isãkirauatini ĩkapani.

Matĩpokotakati Pirena

(Mateo 9.1-8; Marko 2.1-12)

¹⁷ Āti õti Xesosi sãpirenauata. Iua takote pariseoakori, kaiõkatsoparerini apaka topãkanãta. Ninoa Karirẽia tãpakini, Xotẽia tãpakini, Xerosareẽ sitatxitikini pakini. Iuasaaki Xesosi sãpirenauatakasaaki, Apiananiri sikaposotiiretari Xesosi amianatakani erekapeka itxĩkitakini ĩkapani.

¹⁸ Iuasaaki kikiakori apoka iuaã. Iminarina kiki matĩpokotakatinoka inakari. Isirimata nopini iminarina. Inirekarina aapokotxi ãki ĩroinina, Xesosi apisatoõ iua matĩpokotakati itakinina ĩkapani. ¹⁹ Txamari !apakata ninoa ĩroini, kotxi kãkitipokoni xãpoka. Ininiã ikanĩkana kanikoatxiã aapokotxi nopini. Imakatzakarina itano auakari kipatxi kai kamakori, eereka isikakaãpotarina iua matĩpokotakati isirimata nopini Xesosi manapi kãkiti sauaki. Xesosi apisatoõ apoka. ²⁰ Ininiã Xesosi imarotari ninoa auikiniri iua posotiire. Ininiã itxari matĩpokotakati:

—Namarite, pimaerekani makatzakapeẽkaika.

²¹ Iuasaaki pariseoakori, kaiõkatsoparerini pakini tsorĩkaãnãta. Ākixinireẽna ninoa:

—Teosonokara posotari amaerekani imakatzakini. Maerekati Xesosi kama Teosomoni —itxana.

²² Xesosi imarotari ninoa xinikakiti ãkixinireẽna, ininiã Xesosi txana:

—!Erekari hãkixinireẽ ikara hĩxinikakiti. ²³ Nitxari iua imaerekani nimakatzakini, txamari !himarotari imaerekani atão nimakatzakini. “Põkitikaua. Pitĩpokota,” nininiã, ininiã himarotari nisãkire atão ininiãua, kotxi hĩtikari. Niposotiire imaerekani nimakatzakini ĩkapani, niposotiire iua nõkitikini ĩkapanitxikana. ²⁴ Ininiã uatxaika noerekai hĩte. Teoso iokanatanano nota hĩtari iaxitikirino ĩkorapokoritimoni kãkiti maerekani nimakatzakini ĩkapani.

Ininiã ipaniãtari matĩpokotakati:

—Põkitikaua. Pisirimata pikoseka, sipe pitxa paapokomoni —itxari.

²⁵ Iuasaakipeka õkitikaua. Ikinimane kãkiti okiãtaã õkitikaua. Ikosekari isirimata, sipe itxa aapokomoni. Isikasaaki ipoxokoniua.

—Peerekari Teoso —itxaãpota iua.

²⁶ Ikinimane kãkiti tsorĩkaãta. Ipĩkarauatana.

—Peerekari Teoso. Mitxi !ãtikari matĩpokotakati erekapeka txĩkitaãkari. Peerekari uatxa aĩtikakiti —itxanãtana ninoa.

Mateo Pirena

(Mateo 9.9-13; Marko 2.13-17)

²⁷ Eereka Xesosi tĩpokoãponãtakasaaki, atamatari kiki Arevii inakori. Iitopãkanãta iparĩkauatiniãtaã. Iuaã apakapari txineiro Homanoakori auĩte paniãtakiti kãkiti ãtiãtaã tiitxi anikini ĩkapani. Xesosi akiritari Arevii:

—Āpina, uatxa nimoianari pitxaua —itxari.

²⁸ Iuasaakipeka Arevii õkitikaua. Ikinika itii itakanapa, Xesosikata sa itxa, Xesosi imiparĩkatini ĩkapani. ²⁹ Eereka Arevii kamari kiiniri aapokoã Xesosi ĩkapani. Kiinirisaaki aua ĩkamanere kaiãopokori. Txineiro apakapakani aua kiiniriã. Ninoa apanakinikata nipokota Xesosikata Arevii aapokoã. ³⁰ Pariseoakori, ninoakata

parĩkauatakani, kaiõkatsoparerini pakini txitana Xesosi moianariakori, Xesosi txineiro apakapakanikata nipokotini xika. Ininiã ninoa txari:

—Kinirepa hĩte nipokota txineiro apakapakanikata, maerekati kamakanikata? — itxana.

³¹ Xesosi apakapapiretana:

—Kãkiti mamianatakani ! inirekari pinĩtxi siãkarimoni isinina. Amianatakarinoka nirekari pinĩtxi siãkarimoni isini. ³² Iua atokokana, nota ina ãkorapokoriti kona kãkiti “Atão inakaranoka kamakarino” ãkapanini, kotxi ninoa uãkataru atão inakaranoka ikaminina, txamari !ikamarina atão. Kãkiti maerekati kamakani ãkapanira nina nota uai imaerekani itakanapini ãkapani. Nota pinĩtxi siãkari atoko inakarino nota —itxa Xesosi sãkire iuusaaki.

Nipokori Takanapiko Teoso Misãkiretiko ãkapani
(Mateo 9.14-17; Marko 2.18-22)

³³ Kãkiti txari Xesosi:

—Xoão kapatxisareri moianariakori itokata takanapari inikinina Teoso imisãkiretinina ãkapani. Iua atokotxikana itxa pariseoakori moianariakori. Txamari pite moianariakori !itakanapari nipokori, iãriã, Teoso imisãkiretinina ãkapani. Kinirepa? —itxana kãkiti.

³⁴ Ininiã Xesosi apakapapiretana:

—Kiki ãtaniriuatini pirenasaaki erekari atxiĩti kemaĩtxitakoni manikakaniãri nipokori? ! Erekari. Ninoa poxokoniyata imoianari ãtaniriuatini, ininiã inipokotapitikana.

³⁵ Txamari ãti õti ninoa moianari mãkaãkako, oka inaãkako. Iuusaakiko ninoa takanapari inipokotini, kotxi imatinaniuatana. Iua atokotxikana nota. Nota auapanika nimoianariakorikata. ãti õti nokaãkako. Iuusaakiko ninoa takanapari inipokotini Teoso imisãkiretinina ãkapani —itxa Xesosi.

³⁶ Eereka Xesosi sãpiretari sãpirenatxi, atão inakari oerekiko.

—! Pikitsorãkitari mãkatxi amaneri, kitxakari pitãpanetini ãkapani. Ikara atoko pikaminiã, mãkatxi amaneri pioanata. Mãkatxi mata amaneri ãsapekata piotsainiã, mãkatxi kitxakari tsorakita iuaĩkana. ³⁷ Kãkiti kitakari ovaã sako aamata kamakori ãki. Ovaã amanero auiniã, !otakaãka aamata kitxakari ãki. Pitakiniãro aamata kitxakari ãki, aamata tsorakita. Ovaã xikepoatamako. Sako !otxaika. ³⁸ Ovaã amanero pikitakako aamata amanero ãki. ³⁹ Ovaã kitxakaro auiniã, kãkiti !inirekaro amanero, kotxi: “Ovaã kitxakaro apiaerekata,” itxa.

Ikara atoko Xesosi txari kãkitimoni. Ikara sãkiretxiti Xesosi sãpireta, kotxi apanakini kãkiti itotapekari Moisesini sãkire, Teoso sãkire kitxakapirĩka isãpiretakiti, ininiã ! inirekari Xesosi sãkire amaneri inakari. Ninoa mãkatxi kitxakari atoko. Sako kitxakari atoko ninoa. Ovaã kitxakaro atoko ninoa. Xesosi sãkire mãkatxi amaneri atoko. Ovaã amanero atoko itxa Xesosi sãkire.

6

Tomatiko Õti Pirena
(Mateo 12.1-8; Marko 2.23-28)

¹ Xoteoakori tomatini õtisaaki Xesosi imoianariakorikata motipetari kikio takari triko auiniãtaã. ãpiripetakasaakirina, imoianariakori makatxakaãpotari triko oki. Iuakoã ikotxokarona, ixõka itxarona otãta katxakini ãkapani, okinoka nika itxana. ² ãtikaka pariseoakori itikana imakatxakinirona:

—Kinirepa triko hĩkotxoka tomatiko õtisaaki? !Auiritaãka tomatiko õtisaaki parĩkauatiko —itxana.

³ Ininiã Xesosi apakapapiretana:

—Himarotari Taviini kamakiti kitxakapirĩka, iua imoianariakorikata natxitakasaaki.

⁴ Iua ãroã Teoso misãkiretikoãtaã. Iuusaaki imakatxakari komiri Teosomoni sikakori.

Inikari, sika itxari imoianariakorimoni. Ninoa nikari apaka. Sasetotxinokara auri-taãka iua komiri inikinina. Apanakini !auritaãka inikiniri. Iuaritika iua Taviini nikari. ⁵ Nota hĩtari iaxitikiri posotari ikinipoko ninireẽkiti nikamini tomatiko õtisaaki, kotxi Apiananiri nitxaua –Xesosi txana ninoa pariseoakori.

Motĩkauakotakari Pirena
(Mateo 12.9-14; Marko 3.1-6)

⁶ Åti tomatiko õtisaaki Xesosi ĩroã aiko åki Xoteoakori apotiitiniãtaãua. Oerekarauata. Iuasaaki iuaãtaã aua kiki iuako ikikomoni motĩkauakotakari. ⁷ Kaiõkatsoparerini, pariseoakori apaka aua iuaã. Atamatapikarina Xesosi, atauako erekapeka itxĩkitakapaniri motĩkauakotakari tomatiko õtisaaki. Inirekarina Xesosi kerokiniri. Tomatiko õtisaaki iparĩkauatiniã, ninoa apoĩtari iua. ⁸ Xesosi imarotari åkixinireẽna ixinikakitina, ininiã ipaniãtari kiki motĩkauakotakari:

–Põkitikaua. Åpina ikinimane okiãtaã.

Ininiã iua kiki õkitikaua, sa itxa Xesosimoni. ⁹ Ininiã Xesosi pimaãna kaiõkatsoparerini, pariseoakori pakini:

–Natokopa itxa Moisesini paniãtakiti iõkatsopatakiti tomatiko õtisaaki atão akamini? Ipaniãtataua maerekati akamini tomatiko õtisaaki? Ipaniãtataua erekari akamini tomatiko õtisaaki? Inirekatari amoianatiniri åti imapinakani ĩkapani tomatiko õtisaaki? Inirekatari aõkaniuatini tomatiko õtisaaki? –itxa Xesosi ninoamoni.

¹⁰ !Kasåkirena ninoa kaiõkatsoparerini, pariseoakori pakini. Xesosi atamatana ikini-mane.

–Piuako poerekata –itxari iua kiki.

Oerekatari iuako. Iuasaakipeka iuako erekapeka itxa. ¹¹ Pariseoakori, kaiõkatsoparerini pakini omanåkarauata. Imisåkiretakakauana Xesosi okinina ĩkapani.

Xesosi Mereẽna Tosi Imoianariakori
(Mateo 10.1-4; Marko 3.13-19)

¹² Åti õti Xesosi kanĩka oxiratari nopini, Teoso imisåkiretini ĩkapani. ĩkanõka ikaikota iuaãtaã Teosokata isåkirauatini ĩkapani. ¹³ Katimatinĩkata akiritana itomaneri imoia-nariakori iuamoni apokinina ĩkapani. Apokasaakina, imereẽna kikiakori tosi pakini kåkitimoni iokanatakini tĩkane. ¹⁴ Imereẽna

Simåoma, (Iuåka Petro apaka.)

Åtreema, (Simåo itari)

Txiakoma,

Xoåoma,

Piripima,

Patoromeoma,

¹⁵ Mateoma,

Tomeema,

Txiakoma, (Aopeo åkiri)

Simåoma, (Homano omanatakari)

¹⁶ Xotasima, (Txiako åkiri, åti Txiakoti)

Xotasi Isikariotxima (Xesosi mĩkapiritakari tĩkane) pakinima.

Ninoa kikiakori tosi pakini Xesosi mereẽkini imoianariakori ĩkapani.

Xesosi Amianatakani Imakananitini
(Mateo 4.23-25)

¹⁷ Eereka oxiratari iokiriiåpotana. Ipitexitimoni apokana. Iuaã aua kaiåopokori imoianariakori. Apanakini kåkiti iuaãtaã aua apaka. Xotẽia tõpa ĩkani, Xerosareẽ sitatxiti ĩkani pakini auari iuaã. Apaka auari Txiro sitatxiti ĩkani, Sitoõ sitatxiti ĩkani apaka. Txiro, Sitoõ pakini potxoari uiniti ĩtinikata aua. ¹⁸ Ninoa kåkitipokoni sari Xesosimoni isåkire ikenakotinina ĩkapani, amianarena imaktxakini ĩkapani. Ninoa maerekati matamatakoti auaĩtotakini sari Xesosimoni maerekati imaktxakini ĩkapani.

¹⁹ Ikinimane nirekari imaãtakiniri Xesosi, kotxi imaãtakiniãrina, apakapari Xesosi tapara amianarena sini ïkapani. Ininiã ikinimane amianatakani Xesosi maãtakakani iuaïkana erekape itxana.

Kirimonipa Teoso Sikatari Erekarì?

(Mateo 5.1-12)

²⁰ Eereka Xesosi misãkiretana imoianariakori:

—Hïte matxineiroteni Teoso sikai erekari. Teoso hïauïte itxaua. Iua nakitiakori hïtxaua.

²¹ —Hïte ïkorapokoriti natxitakani Teoso sikai erekari. Himitouatapanikako.

—Hïte ïkorapokoriti txiapatakani Teoso sikai erekari. Hãpiapoxokonitapanikako. Hïsiroatapanikako.

²² —Apanakini omanatiniãi hïte, hïtari iaxitikiri sãkire hãuikini xika, Teoso sikai erekari. Atxiïti apanakini !nirekai. Atxiïti apanakini misãkirepiretai. Atxiïti ninoa akiritai “maerekati kamakari” nota hïtari iaxitikiri sãkire hãuikini xika. Ikara atoko hinaãkako.

²³ —Ninoa misiriãpotakasaakii, hïpoxokoniuatako. Himïteenekariko hïpoxokoniritika, kotxi erekari Teoso nïkatini iaxiti itixine. Inïkatakiti hïte ïkapani peerekari. Apanakini misiritini atokokanera, ninoa atokiriakorini misiritari Teoso sãkire sãpiretakani kitxakapirïka.

²⁴ —Hïte ïkorapokoriti katxineiroterini misiritaãkako. Mitxi papoxokonii hïte. Uatxa hïpoxokoni !auaïka.

²⁵ —Hïte ïkorapokoriti ikiniõtika mitouanãtakanii misiritaãkako. Hinatxitapanikako.

—Hïte ïkorapokoriti siroatakanii misiritaãkako. Himatinaniuatapanikako. Hïtxiapatapanikako.

²⁶ —Ikinimane: “Peerekai pite,” ininiã, himisiritaãkako, kotxi ninoa nirimane kitxakapirïkarini sãpiretari ikara atoko inakari Teoso sãkire atão masãpiretakanimoni —itxa Xesosi.

Kãkiti Mokaiakari Tiretiko

(Mateo 5.38-48)

²⁷ Iuaïkana Xesosi sãpirenauata:

—Nõtãkikai hïte nisãkire kenakotakanii. Hïtiretanako himokaiakari. Erekarì hïkaminana hïte omanatakani. ²⁸ Himisãkiretariko Teoso erekari hïte misãkirepiretakani isikini ïkapani. Himisãkiretariko Teoso hïte misiritakani ïkapani. ²⁹ Kãkiti aritiniãi pikakota, ipinimoni pikakota iuaïkana pisikana. Kãkiti anikiniãari pimãka õtanominari, pauiritari iua pimãka kauanata apaka anikini. ³⁰ Pitii amanaãkarimoni pisika inirekakiti. Kãkiti anikiniãari pitii, !pamanaãpiri iuaïkana imikanapiriiniri. ³¹ Åti tiretini pinirekini atokotxikana, pitiretari åti.

³² —Pite tiretakaninani pitiretiniã, kinirepa Teoso sikari erekari pitemoni, pinirimanenokara pitiretakasaaki? Kotxi kãkiti maerekati kamakani apaka tiretari ninoa tiretakani. ³³ Pimoianatiniãna pite moianatakaninani, !apakata, kotxi iua atokotxikana maerekati kamakari moianatana iua moianatakaninani. ³⁴ Pisikiniãro pitxineirote, pitxineirote mikanapiriãkarimoninani, !apakata, kotxi iua atokotxikana maerekati kamakani sikaro itxineirotena apanakini maerekati kamakanimoni åti õti iuaïkana imikanapiriiniro ïkapani. ³⁵ Iua atokokana na pitxape. Pitiretariko pimokaiakari. Erekarì pikaminariko. Inirekiniãari pitii iparïkauatini ïkapani, pisika iuamoni. !Pimaãkapeua, pitii iuaïkana imasikakaniãi. Iua atokokana hïkaminiã, Teoso sikai hïte iteene erekari. Iua atokokana hïkaminiã, Apiananiri iaxitikiri anaakori hïtxauako, kotxi iua amonïkari kãkiti maerekati kamakani. Ninoa !isãpiretari Teoso iua ereka inini, iuaritika Teoso amonïkana. ³⁶ Piamonïkariko åti, aïri Teoso amonïkarauatini atokokana —itxa Xesosi.

Apoïretxi Pirena

(Mateo 7.1-5)

³⁷ —!Papoĩtapiri āti. Papoĩtiniāri āti, ininiā pite apaka apoĩtaākkako. !Pisāpiretapiri āti ikamakiti maerekati inini, ininiākara Teoso !isāpiretai pite pikamakiti maerekati inini. !Pixinikapinikari maerekati āti kamakiti pitemoni, ininiā Teoso !ixinikaikari maerekati pite kamakiti. ³⁸ Pisikarauatako ātimoni, ininiā Teoso sikarauata ito pitemoni. Kaiāopokori papakapa. Atarokiri arata āki takakori atokokana papakapa. Atarokiri iōkokakori, kaiākakori kinapakopeka iuaīkana atarokiri inopini takaāka. Xāpoākata, ininiā katxapoaāpota. Iua atokotxikana Teoso sikai kaiāopokori, ātimoni pisikarauatiniā. Ātimoni pisikarauatini atokotxikana, Teoso sikarauata pitemoni —itxa Xesosi.

³⁹ Xesosi sāpiretari ia sāpirenatxi atāo inakari oerekiko:

—Apakata āti mōsiāreti anikiniri āti mōsiāreti? !Apakata. Ninoa ipi irikako aariko āki. Ininiā nota sākire himimarotakanisaaki, kona apakata hōerekiniri āti. Hōerekiniri āti, hīkerokari. Ninoa mōsiāreni aariko āki irikakani atoko hītxa. ⁴⁰ Apaiaōkarauatakari !imarotari koerekareri imarotakiti atoko. Poiāonoka imarota. Apaiaōkarauatini ixipokasaaki, iuaasaaki koerekareri imarotakiti atoko imarotape.

⁴¹ —Pisāpiretari āti: “AāSORO aua poki āki,” txamari kona pimaākatari aātxirata pite oki āki auakari. Kinirepa ikara atoko inakari pikama? ⁴² Kinirepa pitxari pitari? “Nitari, nota makatxakinii aāSORO pokiā auakari,” kotxi !piposotari patamatiniiri aātxirata piteka pokiā auakari. Pisākire atxiīti erekari, txamari pikamakiti kona erekari. Merepitipanika pimakatxakari aātxirata piteka pokiā auakari. Eereka piposotari patamatiniiri aāSORO pitari okiā auakari pimakatxakini. Maerekati pite kamakiti apiata atxiīti iua aātxirata atoko. Maerekati āti kamakiti poiāoka atxiīti iua aāSORO atoko. Iuaritika !pimaākatari maerekati piteka kamakiti. Pōtākikari āti imaerekani itakanapini. Ikara atoko !apakata. Merepitipanika pite takanapariko pite maerekani, eereka pōtākikari āti imaerekani itakanapini —itxa Xesosi sākire.

Amātiiri Pirena (Mateo 7.15-20; 12.33-35)

⁴³ —Amātiiri erekari kona iritari matximakoti. Amātiiri matximakoti kona iritari erekari. ⁴⁴ Patamatiniāri amātiiri, pimarotari imina. Txipokori piko inakoro pinirekiniā, kona pisa inakomoni. Ova pinirekiniā, kona pisa inakomoni. ⁴⁵ Kākiti erekari amātiiri erekari atokokana itxa. Iua erekari, ininiā erekarinoka ikama, kotxi iua ākixinireē erekarinoka aua. Kākiti maerekati amātiiri matximakoti atoko itxa. Iua maerekati, ininiā ikamakiti maerekati apaka, kotxi maerekatinoka auari iua ākixinireē. Iua ākixinire ereka, ininiā isākire ereka apaka. Iua ākixinire maerekati, ininiā isākire maerekati apaka, kotxi isākire poterika ākixinireē —itxa Xesosi sākire.

Aapokotxi Kamakari (Mateo 7.24-27)

⁴⁶ Xesosi sākirauatapanika:

—Kinirepa pakiritano nota “Apiananiri,” nipaniātakiti pimakamakanisaaki? ⁴⁷ Kākiti notamoni ikari, nisākire kenakotakari, nisākire kīpitakari, aapokotxi kamakari atoko itxa. ⁴⁸ Iua kamari aapokotxi. Ikisakari kipatxi. Otsomori aapoko tsota ikama. Iua apokari kai, ininiā iopitīkari aapoko tsota iua kai nopini. Ininiā aapokotxi ikamakiti paikori. Āparaā apoātakasaaki, itorōkani inokasaakiri iua aapoko, !iakeka, kotxi iua kiki atāo ikamari aapoko. Iua kiki atoko kākiti nisākire kīpitakari.

⁴⁹ —Āti kiki aapokotxi kamakari, iua iopitīkari aapoko tsota motsomotika popaiape ininiātaā. Āparaā apoātakasaaki, itorōkani inokasaakiri iua aapoko pakitika. Xipoka itxa. Iua kiki atoko kākiti nisākire kenakotakari, nisākire mauīakati —itxa Xesosi.

7

Xesosi Makananitiniri Sotato Auīte Nitiri (Mateo 8.5-13)

¹ Ikara sãkiretxiti isãpiretaka atoko, Kapanaoõ sitatxitimoni isa Xesosi. Iuaãtaã apoka.
² Kapanaoõ auari kiki ãti uãka Homano inakori. Sotatoakori auíte itxaua iua Homano. Ipaniãtana sotatoakori seĩ pakini inireẽkiti ikaminina. Xesosi apokasaaki Kapanaoõ, iua Homano nitiri iteene itiretakiti amianata. Ipinanapanoka.

³ Iua Homano kenakopiretari Xesosi. Ininiã ipaniãtari Xoteoakori kiomãtxiakori Xesosimoni isinina.

—Hĩtxariko: “Homano nirekai iuamoni pisini, initiri pimakananitini ĩkapani.”

⁴ Ininiã ninoa sa itxana Xesosimoni, aõkita itxarina.

—Masa sotatoakori auĩtemoni. Initiri amianata. Masa, pimakananitiniri ĩkapani. Iua Homano erekari itxaua, ininiã erekapitikari pimoianatiniri iua. ⁵ Itiretari Xoteoakori. Aiko aãpotiitiniãtaãua ikaminaua ate, ininiã iua Homano erekari itxaua —itxana ninoa.

⁶ Ininiã Xesosi sari ninoakata. Iua Homano aapoko takote apokasaaki, iua Homano iokanatarari imoianariakori Xesosimoni, isãpiretinirina ĩkapani:

—Apiananiri, apikomoni !pisipe, kotxi minakati nota. Pite Apiananiri txaua. Nota apakapiniãi naapoko ãki !apakata. ⁷ Nota pitemoni napokini !apakata, kotxi pite Apiananiri, nota poiãori. Ininiãkara ereẽ piotoka. Ereẽkarako pitxĩkitakariko ninitiri ereka inini. ⁸ Nota auíte paniãtiniãno nota ipaniãtakiti nikamini ĩkapani, ininiã nikamapitikariko. Nota auĩtetxi nitxaua apaka. Nota paniãtakiti sotatoakori kamapitika. ãti nipaniãta: “Pisa,” ininiã iua sa. ãti nipaniãta: “Uai pina,” ininiã iua ina. Ninitiri nipaniãta: “Ia pikama,” ininiã iua kamari. Ininiã nimarotari ereẽ pite paniãtiniãri ninitiri ereka inini, ereẽkarako erekapeka pitxĩkitakari ninitiri —itxa Homano sãkire Xesosimoni.

⁹ Iua Homano sãkire ikenakotakasaaki, Xesosi tsoriãkaãta. Isapotorika, misãkireta itxana kãkiti iuakata sikani.

—Iua Homano iteene auikari nisãkire. Peerekari. Mitxi !naõkitari nisãkire auĩãkari iua Homano atoko inakari. Na naõkitapanikari Xoteo iua Homano atoko inakari —itxa.

¹⁰ Eereka ninoa Homano iokanatakini kanapiriã Homano aapokomoni. Iuaã apokasaakina, atamatarina Homano nitiri. Erekapeka itxa.

Xesosi Txĩkitakari Ipĩkari Iuaĩkana Auãki Inini

¹¹ Mapaõti napaãka atoko Xesosi sari Naiĩ sitatxitimoni. Imoianariakori, kãkitipokoni apaka sari iuakata. ¹² Iimatokoãpotakasaakiri sitatxi pirikere tore kãkiti ĩronakikoãtaã, ipĩkari imipokĩkaãka sitatxi mapara. Sito imatonõkari oimi ipĩpe. Oa sito tikinitakoro. Kaiãopokori kãkiti sitatxi auakani pokĩka oakata sikani. ¹³ Apiananiri atamatakasaakiro, iamoniãkaro oa, ininiã:

—!Pitxiapatape —itxaro.

¹⁴ Isa ipĩkarimoni. Imaãtakari ipĩkari auini kaixati, ininiã iua kaixa anikakani iotoka. Iuasaaki iua akiritari:

—ãtokori, nipaniãtai põkitikaua —itxa Xesosi.

¹⁵ Iuasaakipeka iua ãtokori topãka, sãkirauata itxa. Ininiã Xesosi sikari iua inoromoni.

¹⁶ Ikinimane pĩkarauata.

—Peerekari Teoso. Teoso iokanatarari isãkire sãpiretakari apiatakari atemoni. Teoso apokapeka ĩkorapokoriti ate inakitiakori imoianatinini ĩkapani —itxanãtana ninoa.

¹⁷ Ia Xesosi pirena iaripireta ikini tõpati Xotéia tõpa. Apaka apikoxiti Xesosi pirena kenakopiretaãka.

Xoão Kapatxisareri Pimaãkiti Sãkiretxiti (Mateo 11.2-19)

¹⁸ Xoão kapatxisareri moianariakori minapiretari Xesosi pirena Xoãomoni. Eereka Xoão akiritari imoianariakori ipi:

¹⁹ —Hĩsa Xesosimoni. Hĩpimaãri: “Teoso mereẽkitikai pite? Kãkiti iãtapanãtakitikai pite? Kãkiti iãtapanãtakiti ãtikani atxiĩti?” Ikara atoko hĩtxako Xesosimoni —Xoão txana ninoa.

²⁰ Ininiã ninoa ipi sari Xesosimoni. Iuamoni apoka itxana.

—Xoão kapatxisareri iokanataua ate pitemoni. Ipimaã: “Teoso mereëkitikai pite? Kãkiti iãtapanãtakitikai pite? Kãkiti iãtapanãtakiti ãtikani atxiĩti?” itxai —itxana.

²¹ Iuasaaki ninoa Xesosimoni apokasaaki, amianatakani kaiãopoko erekapeka itxĩkitaka Xesosi. Iua omitikari maerekani matamatakoni kãkiti itotaã auakani. Mõsiãreni kõiãrepeka itxĩkitaka. ²² Ininiã Xesosi apakapapiretana Xoão moianariakori:

—Hĩkanapiriã Xoãomoni. Hĩsãpiretari mixikanani uai hĩtikakiti, hĩkenakotakiti pakini. Hĩsãpiretari mitxi mõsiãreni uatxa kõiãrepeka nitxĩkitakapeka. Hĩsãpiretari mitxi matĩpokotakani tĩpokotapeka uatxa. Mitxi maere matati erekapeka uatxa. Mitxi makenakokini uatxa kakenakokipeka. Mitxi ipĩkani iuaĩkana auãki itxapekana. Hĩsãpiretari Xoão, nota sãpiretari Teoso iokanapirena erekari minakati mauakinimoni. ²³ Kãkiti iteene auikiniãri nota sãkire, Teoso takari erekari iuamoni. Ikara nisãkire hĩsãpiretari Xoão —itxa Xesosi.

Xoão Kapatxisareri Pirena

²⁴ Ininiã ninoa Xoão moianariakori sipe. Eereka Xesosi sãpiretari Xoão pirena kãkiti iuamoni apotiitakaniua.

—Kipa ĩkai hĩte Xoão kapatxisarerimoni hĩsikasaaki ãparaã makipakaniãtaã iua auakasaaki? Hĩte sari iuamoni, kotxi isãkire ãtinoka, Teoso sãkirenoka. Kãkiti katsotati ĩtima anikakiti atoko itxa. Isãkire kita ãti, isãkire uatxa ãtião, isãkire katana iuaĩkana ãtião, itxaãpota isãkire. Ikara atoko !itxa Xoão. ²⁵ Kipa ĩkai hĩte Xoãomoni hĩsikasaaki? Hĩte sari iuamoni, kotxi !inirekari tiitxi, txineiro pakini. !Kakaroneri imãka, kotxi !ikaikota auĩtetxi aapoko. Auĩtetxi auiniãtaã kãkiti mãka peereri. ²⁶ Kipa ĩkai hĩte iuamoni hĩsikasaaki? Hĩte sari iuamoni, kotxi iua Teoso sãkire sãpiretakari itxaua. Atão inakari Teoso sãkire sãpiretakari itxaua. Apiata iua Xoão. ²⁷ Apiata iua, kotxi kitxakapirĩka Teoso sãkire iõkatsopatakori sãpiretapekari Xoão pirena:

Ia kiki nisãkire sãpiretakari. Niokanataru iua kãkitimoni, pite nimereëkiti sini apisa, papokini isãpiretini ĩkapani, kãkiti iposope inini ĩkapani, itxa Teoso sãkire iõkatsopatakori.

²⁸ Iuaĩkana Xesosi txana kãkiti:

—Atão nisãpiretai, ãti Xoão atoko inakari !auari. Xoão apiata. Iuaritika kãkiti Teoso auĩtetakari poiãori inakari apia imarotariko Teoso kamakiti tĩkane —itxa Xesosi.

²⁹ Ikinimane kãkiti, txineiro apakapakani apaka kenakotakasaakiri Xesosi sãkire, imarotarina Teoso nireëkiti kãkiti kamini ĩkapani atão inini, kotxi ninoa sari Xoãomoni ipatxisatikona ĩkapani. ³⁰ Txamari pariseoakori, Teoso paniãtakiti oerekakani pakini !inirekari Xoão patxisatinina ninoa, ininiãkara Teoso nireëkiti iaõka !inirekana ikaminina.

Kãkiti ĩkorasaaki Auakani

³¹ Xesosi sãpirenauatapanika:

—Kiãtokopa itxana kãkiti ĩkorasaaki auakani? ³² Amarini sarauatini atoko itxana ĩkorasaaki auakani. Ninoa amarini topãkanãta tiitxi amotikoãtaã. Ipixini amarini tsoanãta. Itxana apanakinimoni: “Ate xikarauata hĩte serenini ĩkapani, txamari !hĩserena. Kãkiti ipĩkasaaki xikariti axikareta, txamari !hĩtxiapata.” Ninoa amarini sarauatini atoko itxana ĩkorasaaki auakani, ³³ kotxi Xoão kapatxisareri apoka ĩkorapokoriti. Itakanapari inikini Teoso imisãkiretini ĩkapani. !Iãtari ovaã. Iuaritika hĩte txari: “Maerekati matamatakoti auaĩtotari Xoão,” hĩtxari. ³⁴ Nota hĩtari iaxitikiri apoka ĩkorapokoriti. !Nitakanapari ninikini. Ikiniõtika ninipokota. Niãtari ovaã. Ininiã hĩte txari: “Iua kiki ixori. Poãtakari iua. Iua moianatana txineiro apakapakani, kãkiti maerekati kamakani,” himisãkirepiretano. ³⁵ Paimatireri Teoso. Iua nakitiakori imarotari isãkire atão ininiua —itxa Xesosi.

Sito Arokari Xesosi Kiti Oãtsaã

³⁶ Āti ōti pariseo Simão inakori aiataro Xesosi inipokotini iuakata, ininiã Xesosi sari iua aapoko. Iuaã apoka atoko iitopãka inipokotini ĩkapani. ³⁷ Simão auini sitatxiti oãua sito kanokarero. Oa kenakopiretari Xesosi iua pariseo aapoko inipokotini, ininiã oa anikaro kamariãro iuamoni. Kopitipaki kai arapástiro kamakori āki oãua kamariãro. Xãpoka. ³⁸ Otima Xesosi kiti takote. Otxiapanãta. Oãtsaã oãrokari ikiti. Okaxipokari oiãkoã. Ikiti oãpitzoka. Eereka okitakari kamariãro ikiti nopini.

³⁹ Iua Simão atamatakasaakiro Xesosi kiti oãrokini, ākixinireẽ ixinikari:

—Xesosi atão Teoso sãkire sãpiretakari inaãkamako, imarotamaroko oa sito iua maãtakakaro. Imarotamaroko maerekati kamakaro oa —itxa ākixinireẽ.

⁴⁰ Ininiã Xesosi:

—Simão, ninirekari nimisãkiretinii —itxa.

—Ei, koerekareri, pisãkirauata —itxa Simão.

⁴¹ Ininiã Xesosi:

—Ipi kiki apakapari txineiro sikakari txineirote. Imikanapiriãpanikaroko txineiro isikakito. Āti apakapari isikakito txineiro kaiãopokoro, kiētosi txineirota. Ātipekana apakapari isikakito poiãonoka, sĩkoëta txineirota. ⁴² Ninoa ipi !iposotaikarina iuaĩkana txineiro isikinirina txineiro sikakarimoni, kotxi !oãuaika. Iuaritika iua xipokari ninoa kõtane. !Inirekaikaro itxineirote. Ininiãkara ĩkiripa ninoa kiki ipi apia apokaerekatari iua txineiro sikakari? —Xesosi pimaãri Simão.

⁴³ Ininiã Simão:

—Niuãkatari kiētosi txineirota apakapakari. Iua apia apokaerekatari txineiro sikakari, kotxi iua apakaparo kaiãopokoro txineiro —itxa.

—Iuapitikara —itxa Xesosi.

⁴⁴ Iuasaaki Xesosi sapotorika sitomoni. Itxari Simãomoni:

—Patamatataro oia sito? Niĩroã pite aapoko, txamari kona pite sikano āparaã nikiti narokini ĩkapani. Oia arokapekari nikiti oãtsaã. Oiãkoã okaxipokari. ⁴⁵ Uai napokasaaki kona pite apitzokano. Oia !iotoka nikiti oãpitzokini. ⁴⁶ Pite na takari iĩtxi nikiiã. Oia kitakari kamariãro nikitiã. ⁴⁷ Oia iteene turetano, ininiã aimarotari omaerekani kaiãopokori makatxakaãkapeka. Kãkiti poiãonoka turetakasaakino, aimarotari imaerekani poião inakari makatxakaãkapeka —itxa Xesosi.

⁴⁸ Iuasaaki Xesosi sãpiretaro:

—Nimakatxakapekari pimaerekani —itxaro oa sito.

⁴⁹ Xesosikata nipokonãtakani ākixinireẽna ixinikanãtarina:

—Kiripitipa ia kiki atxiĩti? Iua makatxakatari kãkiti maerekani? —itxanãtana ninoa.

⁵⁰ Iuasaaki Xesosi txaro oa sito:

—Atão pauikari nisãkire, ininiãkara pimaerekani makatxakaãkapeka. Pisipiniikaua erekaxinirepeka pinini —itxaro oa.

8

Sitoãkini Xesosi Moianatakani

¹ Mapaõti napaãka atoko Xesosi sari āti sitatxitimoni, ininiã eereka āti sitatxitimoni isa, itxaãpota. Isãpiretari erekari pirena Teoso auĩtetxi ininiãua. Imoianariakori tosi pakini sari iuakata. ² Sitoakoro apaka sari iuakata. Mitxipe Xesosi erekapeka txĩkitakana ninoa sito. Mitxipe ātikaka amianata. Mitxipe maerekati matamatakoti auaiãtotana ātikaka. Maria Matarena inakoro sari iuakata. Mitxipe Xesosi omitikana maerekani matamatakoni setxi pakini oĩtoã auakani. ³ Xoana inakoro, Kosa inakori tanoro, oa apaka sari Xesosikata. Kosa parĩkauata auĩtetxi Erotxi inakorikata. Erotxi paniãtakiti ikama. Sosana inakoro apaka sari Xesosikata. Apanakini sitoakoro apaka sari iuakata. Ninoa sikari itxineirotena Xesosimoni, imoianariakori pakinimoni nipokori iamotinina ĩkapani.

Katakareri Pirena
(Mateo 13.1-9; Marko 4.1-9)

⁴ Kãkitipokoni apokaãpota Xesosimoni, ãti sitatxitikini, iuaĩkana ãti sitatxitikini, iuaĩkana ãti sitatxitikini txaãpota apokinina Xesosimoni. Kãkitipokoni apotiitakasaakia Xesosikata, Xesosi sãpiretana ninoa sãpirenatxi atão inakari oerekiko.

⁵ –Kiki sari ikikiote itakarauatini ĩkapani. Triko oki itaka. Okaãpotari. Okaãpotakasaakiro, kimaporiã apaka oãpoka oki okakiti. Eereka oki katxarataãka. Apanakini kotipiriki nika. ⁶ Oki apoka kai nopini. Kai auiniãtaã kipatxi poiãonoka auari. Eereka ipitxaka, txamari pitxakakaro kotsa imiti masakaniã, ãparaã mauakaniã, opina. ⁷ Triko oki apoka inako sauaki apaka. Eereka inako aneẽ takarikata, txamari inako matxorotakaro takari, ininiã opina. ⁸ Oki apoka kipatxi erekari nopini apaka. Eereka takari pitxaka, aneẽ otxa. Eereka ominaua kaiãopokori. Triko katiã seĩ oki aua.

Xesosi sãkirauata iuaĩkana:

–Kakenakokii, ininiã hĩkenakotariko nisãkire –itxa Xesosi.

Kãkiti Mimarotakiniti Xesosi Sãpiretini Pirena
(Mateo 13.10-23; Marko 4.10-20)

⁹ Xesosi moianariakori pimaãri iua:

–Poerekaua ikara sãpirenatxi atão inakari oerekiko pisãpiretakiti. !Aimarotari mixikanani pisãpiretakiti.

¹⁰ Ininiã Xesosi:

–Nisãpiretapitikaiko hĩte Teoso auĩtetxi ininiãua, ininiã hĩte imarotari. Apanakini ! imarotari hĩte imarotakiti Teoso auĩtetxi ininiãua. Ninoa apanakinimoni nisãpiretari sãpirenatxi atão inakari oerekiko. Ninoa kenakotari, txamari ĩmarotarina nisãpiretakiti sãkiretxiti, kotxi kitxakapirĩka Teoso sãkire sãpiretakani sãpiretari:

Kokiri kãkiti, txamari !atamatarari Teoso kamakiti. Karokokenakokiri kãkiti, txamari ! ikenakotari Teoso sãkire.

¹¹ –Noerekai hĩte ikara sãpirenatxi atão inakari oerekiko, kiki takarauatini pirena. Triko oki atoko itxa Teoso sãkire.

¹² Apanakini kãkiti kimapori atoko itxa. Ninoa kenakotari Teoso sãkire, kimapori nopini oki apokini atoko itxa. Txamari Satanasi apoka kotipiriki apokini atoko. Imakatzakari Teoso sãkire ãkixinireẽna apokakari, ininiã ninoa !auikaikari Teoso sãkire, ininiã Teoso ĩmakatzakari ninoa maerekani.

¹³ –Apanakini kãkiti kai auiniãtaã atoko itxa. Ninoa kenakotari Teoso sãkire, ininiã ipotxitarina. Txamari oki kipatxi poião nopini apokini atoko, Teoso sãkire !ĩroã ninoa ãkixinireẽ. Mapa kasiriti ninoa auikari Teoso sãkire atxiĩti. Eereka imisiritaãkana Teoso sãkire auikinina xika, ininiã itakanaparina Teoso sãkire.

¹⁴ –Apanakini kãkiti inako auiniãtaã atoko itxa. Ninoa kenakotari Teoso sãkire. Eereka ninoa maerekaxinirenoka itxana. Inirekarina txineiro, tiitxi pakini. Inirekarina isarauatinina. Inako atoko itxa txineiro, tiitxi, isarauatinina, maerekaxinirenoka ininina pakini. Ininiã !ixinikaikarina Teoso. Oki inako sauaki pitxakakaro !ominaua. Iua atokokana, ninoa kãkiti ĩkamari erekari Teoso ĩkapani.

¹⁵ –Apanakini kãkiti kipatxi erekari atoko itxa. Ninoa kenakotari Teoso sãkire. Teoso sãkire ĩroã ninoa ãkixinireẽ ikaikotini ĩkapani. Erekari ninoa ãkixinire. Ninoa nirekari Teoso paniãtakiti ikaminina ikiniõtika. Eereka ninoa kamapitikari erekari Teoso ĩkapani.

Tirikapi Pirena
(Marko 4.21-25)

¹⁶ –Tirikapi iopotokaãkari iomaãtatari tirikapi kopiti ãki atxiĩti? Isĩkatatxi patapi itakatari atxiĩti? Konapitini. Itano itakari tirikapi, ininiã iopinikari aapokotxi ãki ĩroãkani atamarauatini ĩkapani. ¹⁷ Ikinika iomaãtakori atamataãkako. Ikinika ipatakori apokaãkako, iopinikaremoni anikaãkako.

¹⁸ –Erepaniko. Iteene pikenakotariko Teoso sãkire, kotxi isãkire auakiti, Teoso sãkire kïpitakari, Teoso sikari apikomoni imaroretxi iuamoni. Txamari Teoso sãkire kenakotakari, isãkire makïpitakati, imarore xapiti iuamoni auakari makatxakaãkako – itxa Xesosi.

Xesosi Inoro, Itariakori Pakini
(Mateo 12.46; Marko 3.31-35)

¹⁹ Xesosi sãpirenauanãtakasaaki, inoro, itariakori pakini apoka iuaãtaã. Inirekamarina Xesosimoni apokinina, txamari kãkitipokoni ãkitari iua. ²⁰ Iuasaaki kãkiti txari Xesosi:

–Pinoro, pïtariakori porikiti auanãta. Inirekarina imisãkiretinii –itxana.

²¹ Ininiã Xesosi sãpiretari ikinimane:

–Teoso sãkire kenakotakani, isãkire kïpitakani, ninoro atoko itxauana. Nitariakori atoko itxauana –itxa Xesosi.

Xesosi Iotokakiniri Ìtima
(Mateo 8.23-27; Marko 4.35-41)

²² Ìti òti Xesosi iereëtaua kanaua ãki imoianariakorikata. Aiatana:

–Masa ipoa ipiniã –itxana imoianariakori.

Ininiã Ìpiriãtana. ²³ Ìpiriãtakasaakina, Xesosi imaka. Mokatanitika Ìtima inataparata. Kataparari Ìtima apokasaaki, tsakati kataparari apaka, ininiã ierepeëpokataua. Iuasaaki kanaua ãki ãparaã xãpokaãpokata. Pamonõkoniri. ²⁴ Xesosi moianariakori õpirïkari.

–Apiananiri, Apiananiri, pimereka. Apinanapanoka.

Ininiã Xesosi õkitikaua. Ipaniãtari Ìtima, tsakati pakini iotokini:

–Hïtotokako –itxa.

Iuasaakipeka Ìtima, tsakati pakini iotoka. Itsorïkaãta. ²⁵ Iuasaaki Xesosi txari imoianariakori:

–Kinirepa hïte !auikano nota?

Itsorïkaãkatana, ipïkarauakatana. Ninoakakarika isãkirauatana:

–Kinakaripa ia kiki? Iua paniãtari Ìtima, tsakati pakini iotokini, ininiã ninoa kïpitari isãkire –itxakakana.

Kiki Maerekani Matamatakoni Auaïtotakiti
(Mateo 8.28-34; Marko 5.1-20)

²⁶ Eereka ipoa ipiniã apokana Xesosi imoianariakorikata. Ninoa potorikiniãtaã Kariréia tõpa. Ninoa apokiniãtaã Xerasa tõpa. ²⁷ Xesosi kanïkiïtakasaaki, kiki apoka iuamoni. Xerasa sitatxitikiri iua. Maerekani matamatakoni auaïtotari iua. Okana-nipe !itakaikari imãka. !Inirekari aapoko ãki ikaikotini. Akauariã auanãta.

²⁸ Atamatakasaakiri Xesosi, akiripoakata. Iriãkata Xesosi apisatoõ. Maerekati matamatakoti akiritari Xesosi:

–Xesosi, Teoso ãkiri, Apiananiri ãkiri, kiatokopa pitxanoko? Namanaãi !pimisiritapeno –itxa.

²⁹ Ikara atoko itxa isãkire, kotxi Xesosi paniãtana maerekani matamatakoni takanap-iniri iua kiki. Mitxi inirimane ìtxikapiimari ìto imasikani ìkapani. Ìtxikarina iuako, ikiti kohëtxiã. Txamari maerekati matamatakoti itotapekari imaïkiniri, ininiã iua kiki kapatakari kohëtxi. Maerekati matamatakoti txïkitakari iua kiki mitekini kãkiti mauakaniãtaã.

³⁰ Xesosi aõkitakasaakiri iua kiki, ipimaãri:

–Kipa piuãka?

Ininiã maerekati matamatakoti txari:

–Nota uãka “Itori,” ninaãka –itxa.

Ikara atoko iuãka, kotxi itori maerekani matamatakoni auaïtotari iua kiki.

³¹ Maerekati matamatakoti amanaãri Xesosi:

–Aariko mamapotõkire irikotimoni !piokanatapeua ate –itxa.

³² Iuaãtaã auari kaiãopokori irariakori piratakoni. Inipokonãtana oxiratari nopini. Maerekati matamatakoni amanaãri Xesosi:

—Pauiritaua irariakori ãki aĩroini —itxana.

Ininiã Xesosi auiritana. ³³ Ininiã ninoa takanapari iua kiki. Irariakori ãto ãki ãroãna. Iuasaakipeka ikinika irari miteẽkata. Iokiriĩkatana oxiratari. Kãuaãriãmoni ikomoãkatana, ipĩpe itxana irariakori.

³⁴ Kikiakori irari piratakani itikari irari mitekini, ininiã imitekana sitatximoni. Anikapiretarina itikakitina sitatxi auakanimoni, sitatxi mapara auakanimoni apaka.

³⁵ Ininiãkara kãkiti sari Xesosimoni ikamakiti imarotiniãna ikapani. Ninoa apoka iuamoni. Atamatarina iua kiki mitxi maerekani matamatakoni auaĩtotakiti. Iitopãkanãta Xesosi apisatoõ. Kamãkapekari. Kiĩkitepekari apaka. Ininiã iuasaaki ninoa kãkiti pĩkari Xesosi posotiire. ³⁶ Xesosi kamakiti itikakani sãpiretari ninoa kãkiti, Xesosi erekapeka itxĩkitakiniri iua kiki. ³⁷ Eereka ikinimane kãkiti Xerasa tãpa auakani paniãtari Xesosi ãtiãtaã isini ipĩkarena xika. Ininiã Xesosi iereẽtaua kanaua ãki ipoa iuaĩkana ipiriãtini ikapani. ³⁸ Iua kiki mitxi maerekani matamatakoni auaĩtotakiti amanaãri Xesosi:

—Pauiritano pitekata nisini.

Txamari Xesosi iokanatarari aapokomoni.

³⁹ —Pikanapiriã paapokomoni. Pisãpiretari kãkiti Teoso kamakiti pitemoni —itxa Xesosi.

Ininiã iua sari ikini aapokotxitimoni. Isãpiretari ikinimane kãkiti Xesosi kaminiri iua erekapeka inini.

Xáiro Amanaãkiti Pirena

(Mateo 9.18-19; Marko 5.25-34)

⁴⁰ Xesosi kanapiripe, ipoa ipiriãtini. Apokitakasaaki, kãkitipokoni apakapari Xesosi ipoxokoniritikana. Ninoa iãtapanãtari iua, ipiniã iua auakasaaki. ⁴¹ Iuasaaki kiki Xáiro inakori apoka iuaã. Iua auĩtetxi itxaua aiko Xoteo apotiitiniãtaãua. Apoka Xesosimoni. Ikapotoreẽkaua Xesosi apisatoõ.

—Masa naapoko. ⁴² Nota ãkero imatonõkaro, tosi ano auakaro, opinanapanoka —itxari Xesosi.

Iuakata Xesosi sikasaaki, kãkitipokoni ãkitari iua, ininiã ikaiarikaãpotana kãkiti.

Xesosi Mãka Maãtakakaro

(Mateo 9.20-22; Marko 5.25-34)

⁴³ Kãkiti sauaki oãua sito amianatakaro. Tosi ano oamianata oãrẽka !iotokinaro. Otxineirote !auaika, kotxi okinika otxineiroteẽ oĩkitxitapekari pinĩtxi siãkani, txamari erekapeka otxĩkitakakiri !auari. ⁴⁴ Kãkiti sauaki oãpoka Xesosi porikimoni. Omaãtakari imãka mapotomatara. Omaãtakasaakipeka, oãrẽka iotoka. ⁴⁵ Ininiã Xesosi pimaãri kãkiti:

—Kipa maãtakano?

Ikinimane kãkiti:

—!Ateni —itxana.

Ininiã Petro:

—Apiananiri, kãkitipokoni ãkitai. Ikinimane kãkiti tikakai.

⁴⁶ Txamari Xesosi:

—Kãkiti maãtakapitikano, kotxi iuasaaki nitapara sari iuamoni.

⁴⁷ Iuasaaki oa sito imarotari Xesosi imarotiniro oa maãtakiniri. Ininiã osa Xesosimoni otitinanakiniritika. Okapotoreẽkaua iua apisatoõ. Ikinimane okiãtaã osãpiretari Xesosi:

—Notara maãtakai namianatiniã. Nimaãtakasaakii, iuasaakipeka erekapekano —otxari.

⁴⁸ Ininiã Xesosi:

—Namarite, pauikari niposotiire, ininiãkara erekapekai. Pisipiniikaua erekaxinirepeka pinini —itxaro.

Xáiro Ákero Ôkitikiko
(*Mateo 9.23-26; Marko 5.35-43*)

⁴⁹ Xesosi sâkirauanâtakasaaki, Xáiro aapoko potoriâkari apoka Xáiromoni.

—Pamarite !oãuaika. Pauiritari Xesosi kanapiriini —itxa.

⁵⁰ Xesosi kenakotari iminapiretakiti, ininiâ Xesosi txari:

—!Pipîkarauatape. Pauikari nisâkire, ininiâ iuaîkana oãuapanikako pamarite —Xesosi txari Xáiro.

⁵¹ Xesosi apokasaaki Xáiro aapoko, auiritana Petro, Xoão, Txiako, Xáiro, Xáiro ïtanoro pakini ïroini iuakata.

⁵² Iuaãtaã ikinimane kâkiti txiapanâta. Imatinaniuatana amarini ipinini xika. Ininiâ Xesosi:

—!Hîtxiapatape. !Opina. Oimakanâta —itxa.

⁵³ Ininiâ ninoa napetari Xesosi, kotxi imarotarina amarini ipinini. ⁵⁴ Ininiâ Xesosi paniâtana ninoa porikiti ipokîkinina. Eereka Xesosi maîkaro oa âtokoro uako, akirita itxaro:

—Âtokoro, pôkitikaua.

⁵⁵ Iuasaakipeka iuaîkana oa auâkipeka otxa. Oôkitikaua. Xesosi paniâtana oïri, onoro pakini nipokori isikinirona. ⁵⁶ Oïri, onoro pakini tsorîkaâta. Xesosi sâpiretana apanakini imasâpiretakanina ïkapani.

9

Xesosi Iokanatana Imoianariakori Kâkitimoni
(*Mateo 10.5-15; Marko 6.6-13*)

¹ Xesosi akiritana imoianariakori tosi apotiitiniuana ïkapani. Iuasaaki isikata-paratana. Isikaposotiiretana maerekani matamatakoni iokanatinina ïkapani, amianari imakatzakinina ïkapani. ² Eereka iokanatana imoianariakori kâkitimoni Teoso auïtetxi ininiâua isâpiretinina ïkapani, amianatakani erekapeka itxîkitakinina ïkapani. ³ Xesosi txana ninoa:

—Hîsikasaaki, !hanikapiri hîtii. Na hîtsonere !hanikape. Na sakora, na nipokori, na txineiro, na âti himâka, !hanikape. ⁴ Kâkiti apakapakasaakii, iuaã ninoa aapoko hîkaikota iua sitatxiti hâuakasaaki. ⁵ Kâkiti mapakapakaniâi, hîtakanapari iua sitatxiti. Hôsipikasaakiri, hîkaxipokariko kipatxi hîkitiâkiri. Ikara oerekana iua sitatxiti auakani Teoso misiritanako ninoa, kotxi !inirekarina ikenakotinirina Teoso sâkire —itxa Xesosi imoianariakorimoni.

⁶ Eereka imoianariakori potorika. Ninoa sari ikinipoko aapokotxiti. Isâpiretarina Teoso iokanapirena erekari aapokotxiâ auakanimoni. Erekapeka itxîkitakana amianatakani ikini aapokotxiti auakani.

Erotxi Nirekari Xesosi Aôkitini
(*Mateo 14.1-12; Marko 6.14-29*)

⁷ Erotxi Kariréia tōpa auakani auïte kenakopiretari Xesosi pirena. Maerekax-iniretinoka itxa, kotxi kâkiti sâpiretari:

—Xoão kapatxisareri iuaîkana auâki itxapekaua. Iuara Xesosi txaua —itxana.

⁸ Apanakini sâpiretari:

—Eríasi iuaîkana uatxa auâki itxapekaua. Iuara Xesosi txaua —itxana.

Apanakinipekana:

—Teoso sâkire sâpiretakari kitxakapirîka auakari iuaîkana uatxa auâki itxapekaua. Iuara Xesosi txaua —itxana.

⁹ Erotxi txari:

—Notara paniâtari Xoão nopi tsotakiko, ininiâ Xesosi kona Xoãoni. Kiripitipa Xesosi? Âtipirika nikenakopiretari iposotiire —itxa Erotxi.

Kinirão aôkitaka itxari Xesosi.

Síko Mio Kákiti Xesosi Sikakienatini
(Mateo 14.13-21; Marko 6.30-44; Xoão 6.1-14)

¹⁰ Ninoa Xesosi iokanatakini kanapiripeka iuamoni. Ikinika ikamakitina isãpiretarina Xesosi. Eereka Xesosi anikana ninoa kákiti mauakaniãtaã, Petsáita sitatxiti takote. Ninoanoka sari iuaã. ¹¹ Txamari apanakini kenakopiretari Xesosi sinimoni, ininiã kãkitipokoni sari iua tikini. Ninoa apokasaaki Xesosimoni, Xesosi apakapana ipox-okoniritika. Isãpiretana Teoso auñtetxi ininiãua. Erekapeka itxíkitakana amianatakani.

¹² Tinítikita imoianariakori tosi pakini apoka iuamoni:

—Piokanatana kákiti aapokotxi imatokotinimoni inipokotinina ñkapani, imakinina ñkapani, kotxi uai aapokotxi mauakaniãtaã —itxarina Xesosi.

¹³ Txamari Xesosi txana:

—Hítekarako sikakienatana ninoa.

Ininiã ninoa:

—Poiãonoka nipokori aua atemoni, sikonoka komiri, ipinoka ximaki pakininokara aua. !Apakata aiamotiniri nipokori kaiãopokori kákiti asikakienatini ñkapani —itxarina Xesosi.

¹⁴ Iuaãtaã kikiakorinoka síko mio auakata. Xesosi paniãtana imoianariakori:

—Hípaniãtari kákiti topãkini, uai síkoëta, apikomoni iuañkana síkoëta, apikomoni iuañkana síkoëta, txaãpokata kákiti —itxa. ¹⁵ Ininiã imoianariakori paniãtari kákiti ikara atoko iitopãkinina. Ininiã ninoa topãka. ¹⁶ Iuasaaki Xesosi kosekari komiri síko, ximaki ipi pakini. Iaxiti ionakaãta, misãkireta itxari Teoso:

—Peerekari ia nipokori pisikakiti —itxa.

Iuasaaki ixanakari komiri, ximaki pakini, sika itxari imoianariakorimoni, ininiã ninoa sikari kãkitimoni. ¹⁷ Ikinimane nikari, kamitopeka itxana. Eereka Xesosi moianariakori amari nipokori itetakori. Ixãpokakarina kotari tosi pakini.

Petro Auikari Xesosi Teoso Mereëkiti Ininiãua
(Mateo 16.13-20; Marko 8.27-30)

¹⁸ Äti õti Xesosi iuanani misãkiretari Teoso. Eereka imoianariakori apoka iuamoni. Iprimaãna:

—Kiripa kákiti uãkatano nota? —itxa.

¹⁹ Ininiã ninoa:

—Apanakini xinikakiti pite Xoão kapatxisareri pitxaua. Apanakinipekana xinikakiti pite Eríasi pitxaua. Apanakinipekana xinikakiti pite Teoso sãkire sãpiretakari kitx-akapiríka auakari iuañkana auãki inakari pitxaua —itxarina Xesosi.

²⁰ Ininiã Xesosi:

—Hítepekana, kipa híte uãkatano nota? —itxa.

Petro apakapapiretari:

—Pite Teoso mereëkiti kákiti iãtapanãtakiti pitxaua —itxa.

²¹ Ininiã Xesosi iteene pinitari ikara apanakinimoni imasãpiretakani.

Xesosi Sãpiretari Ipinini
(Mateo 16.21-28; Marko 8.31-9.1)

²² Ininiã Xesosi:

—Nota hñtari iaxitikiri iteene natatsiitariko nimisiritiko. Kiomãtxiakori, sasetotxi auñteakori, kaiõkatsoparerini pakini !inirekano nota, ininiã nokaãkako. Ipi äti õtisaaki Teoso õkitikanoko nota iuañkana auãki ninini ñkapani —itxari imoianariakori.

Xesosi Moianari Atão Inakari
(Mateo 16.24-28; Marko 8.34-38)

²³ Eereka isãpiretari ikinimane:

—Notakata kinirão sika pinakasaaki, piteka pinireëkiti kona pixinikape. Notakata kinirão sika pinakasaaki, nota misiritiko atokokana pimisiritaãkako. Ia atoko pinirekiniã ikiniõtika, notakata pisapitikako. ²⁴ Pite ätipirika kaminiãri piteka nireëkitinoka, ininiã pinireëkiti xipokapitikako pitekata. Pite nireëkiti xipokiniã, nota

sākire pauikini xika, Teoso iokanapirena erekari pisāpiretini xika, pite auapininiika txako Teosokata. ²⁵ Atxiīti papakapari ikinipoko tiitxi, ikini itixiti auakani tii, pinakiti ĩkapani. Atxiīti iua tiitxi xika kona pikīpitari Teoso sākire, ininiā kona pikaikota ātipirika Teosokata. Ikara atoko ininiā, erekari atxiīti ikinipoko tiitxi auinii? Konapitini. Apiaerekata Teosokata ātipirika pikaikotini. ²⁶ Pipētadiniāno nota, pipētadiniāri nisākire, nota kākiti itari iaxitikiri pētataiko pite uai nikanapiriākasaaki. Peerekari iuasaaki uai nikanapiriini ōti. Iuasaaki kākiti imarotariko niposotiire, niri posotiire, initiriakori iaxitikini posotiire apaka. Teoso nitiriakori erekarini itxauana. ²⁷ Atāo nisāpiretai, apanakini hīte uatxa uai auakanii, hīpinini apisapanika himarotari Teoso auītetxi ininiāua –itxa Xesosi.

Moisesi, Eríasi Pakini Xesosi Aōkitini
(Mateo 17.1-3; Marko 9.2-13)

²⁸ Āti semanati napaka atoko, Xesosi anikana Petro, Xoāo, Txiako pakini. Ikanīkana oxirataro nopini Teoso imisākiretini ĩkapani. ²⁹ Teosokata isākirauanātakasaaki, itoō ipinipo itxa, imāka ponika, kasarori. ³⁰ Iuasaaki ipi kiki tokiā iuaā, Moisesi, Eríasi pakini. Isākirauatana Xesosikata. ³¹ Ninoa iotximere aua, kotxi ipotorikana Teoso tixine. Isākirauatana Xesosikata, Xesosi ipinini pirena, mapa semanati napaka atoko Xerosareē ipinini Teoso paniātakiti ikamini ĩkapani. ³² Iuasaaki Petro, Xoāo, Txiako pakini imakanāta. Eereka imerekana. Atamatarina Xesosi iotximere. Atamatarina ninoa ipi kiki iuakata itiminina. ³³ Moisesi, Eríasi, takapiretakasaakiri Xesosi, Petro akiritari Xesosi:

–Koerekareri, erekari uai akaikotini. Makamari papiri ipi āti pakini, pite ĩkapani, Moisesi ĩkapani, Eríasi ĩkapani –itxa.

Txamari maxikatīka isākirauata. !Imarotari amanaākiti.

³⁴ Petro sākiraunātakasaaki, katxiāri apoka. Xesosi moianariakori pīkarauata katxiāri āki auakasaakina. Katxiāri ākitana. ³⁵ Katxiāri āki ikenakotaāka sākiretxi:

–Ere namarite, nitiretakiti. Hīkenakotariko iua sākire –itxa.

³⁶ Isākirauataka atoko Xesosi moianariakori atamataro Xesosinani. Eereka !isāpiretarina itikakitina apanakinimoni. Masākirenika itxana.

Amarini Maerekati Matamatakoti Auaītotakiti
(Mateo 17.14-20; Marko 9.14-29)

³⁷ Katimatinīkata iokiriītana. Iuasaaki kākitypokoni apoka Xesosimoni. ³⁸ Ninoa sauaki kiki akiritari Xesosi:

–Koerekareri, patamataro nota ākiri imatonōkari namarite. ³⁹ Ātipirika maerekati matamatakoti mākari iua. Iuasaaki akiripoakata, okarakataua. Isorikipekata inamamoni. Maerekati matamatakoti kamatsiitari namarite. Poiāonoka itakanapari. ⁴⁰ Iteene namanaāpekari pimoianariakori omitikiniri, txamari liposotarina –itxa Xesosimoni.

⁴¹ Ininiā Xesosi txari kākitymoni:

–!Kauikarei hīte. Maerekati kamakanii hīte. Kipakinikananipa Teoso nirekatari hītekata nauini? Kipakinikananipa Teoso nirekatari hīte nimīteenekini? –itxa.

Eereka ipaniātari iua kiki:

–Pamarite pimina uai.

⁴² Iua amarini apokaāpotakasaaki, maerekati matamatakoti irikari ixiti. Amarini okarakataua. Xesosi paniātari maerekati takanapiniri amarini. Erekapeka itxīkitakari amarini, ininiā isika iua iuaīkana irimoni. ⁴³ ĩkinimane tsoriākaāta Teoso posotiire itikasaakina.

Xesosi Iuaīkana Sāpiretari Ipinini
(Mateo 17.22-23; Marko 9.30-32)

ĩkinimane tsoriākaātakasaaki, Xesosi misākiretari imoianariakori.

⁴⁴ –!Himaxinīkaretapiri uatxa nisāpiretakiti. Nota hītari iaxitikiri mīkapiritaākako. Nisikaākako kākitymoni ninoaka nirekakiti ikaminina ĩkapani –Xesosi txana ninoa.

⁴⁵ Imoianariakori kenakotari Xesosi sãkire, txamari !imarotarina isãpiretakiti. Teoso !nirekari ninoa imarotiniri Xesosi sãpiretakiti iusaaki. Ninoa pĩkari Xesosi ipimainina isãkire oerekinina ĩkapani.

Kiripa Kãkiti Apiatakari Txataua?

(Mateo 18.1-5; Marko 9.33-37)

⁴⁶ Āti ōti Xesosi moianariakori !auikakauana isãkirena, kotxi inirekarina imarotinirina apiatakari ninoa sauaki auakari. ⁴⁷ Xesosi imarotari ninoa xinikakiti, ininiã iminari amarini ninoamoni. Xesosikata tima itxa amarini. ⁴⁸ Iusaaki Xesosi txana:

—Papakapiniãri amarini ia atoko inakari, papakapano nota apaka. Papakapiniãno nota, papakapari niokanatakiri apaka. Iuaka poiãotakakariua hĩte sauaki, iuarako apiatakari txauako —itxa Xesosi.

Kiki Maerekani Matamatakoni Omitiãkari

(Marko 9.38-41)

⁴⁹ Xoão sãpiretari Xesosi:

—Koerekareri, ate kenakotari kiki omitikinina maerekani matamatakoni pite uãkaã. Ate sãpiretari iua kiki ikara atoko inakari imakamakani, kotxi kona pimoianarini iua —itxa.

⁵⁰ Ininiã Xesosi:

—! Hĩotokakapiri ikara atoko inakari ikamini, kotxi iua kiki !omanataua ate. Iua apamonĩkaua ate —itxa.

Samaria Auakani !Apakapari Xesosi

⁵¹ Teoso tixine iuaĩkana Xesosi kanapiriini ōti apokaãpota, ininiã Xesosi ãkixinireẽ txari: —Nisapitikako Xerosareẽmoni.

⁵² Iokanatarı kãkiti iua apisa, imakiniãtaã initinina ĩkapani. Ipixinipokoriti ninoa kãkiti nitari imakiniãtaã aapokotxi Samaria auakani auiniãtaã. ⁵³ Txamari kãkiti iuaãtaã !inirekarina Xesosi apakapinina, kotxi iua nirekari Xerosareẽmoni isini. Samaria auakani omanatana Xerosareẽ auakani. ⁵⁴ Txiako, Xoão pakini kenakopiretari ikara ene. Iusaaki ipimaãrina Xesosi:

—Apiananiri, pinirekatari aamanainiri Teoso xamina iaxitikiri iokanatinı ninoamoni ixipokinirina ĩkapani?

⁵⁵ Txamari Xesosi pinitana, isãkirena maerekani xika.

⁵⁶ —Nota, hĩtari iaxitikiri kona kãkiti nixipokini ĩkapanini napoka uai. Kãkiti maerekani nimakatzakini ĩkapanira uaimoni nina —Xesosi txari Txiako, Xoão pakini.

Eereka ninoa sari apikoxiti apanakini kãkiti auiniãtaãmoni.

Kãkiti Xesosi Imoianatinina Nireẽkani

(Mateo 8.18-22)

⁵⁷ Xesosi imoianariakorikata saãpotakasaaki kimaporiã, kiki txari Xesosi:

—Apiananiri, pite sinimoni nota apaka sako.

⁵⁸ Ininiã Xesosi:

—Karikori aripa auini. Kakoari kotipiriki auini, txamari nota hĩtari iaxitikiri nimakiniãtaã !auari. Pimoianatinıãno, ikara atoko pimisiritiko pinireka atxiĩti? —itxa Xesosi.

⁵⁹ Xesosi txari āti kiki:

—Notakata pisako.

Txamari iua kiki:

—Koerekareri, merepanika ninirekari niãtapiniri niri ipinini —itxa.

⁶⁰ Ininiã Xesosi:

—Ikara piparĩka pauiritari āti kamini. Piparĩka apiari uatxa aua. Pite sari kãkitimoni. Pisãpiretanako Teoso auĩtetxi ininiãua —itxa Xesosi iuamoni.

⁶¹ Āti kikipekana txari Xesosi:

—Koerekareri, nota pimoianari nitxamauako. Mitxi pauiritano nikanapiriini nauinimoni. Nitakapiretanapana ninirimane —itxari.

⁶² Ininiã Xesosi:

—Teoso kimaporeë potoriãkari nirekiniãri mitxi ikamakiti iuaïkana ikamini, !apakata iparïkauatini aãuïte Teoso ïkapani —itxa Xesosi.

10

Xesosi Iokanatana Setêta Pakini Kãkiti

¹ Ikara inaãka atoko Apiananiri mereëna setêta pakini kãkiti. Iokanatana ipi, iuaïkana ipi, iuaïkana ipi, itxaãpotana iokanatinina. Iokanatana iua sini apisapanika ikini aapokotxitimoni. Ninoa ïkiika. Apokana Xesosi apisa. ² Xesosi txana ninoa:

—Kaiãori kãkiti iposope auikiniri nisãkire, txamari !imarotarina nisãkire, kotxi ! ikenakotapanirina. Ninoa kizio erekari atoko itxana. Imakinika iposope iuaã. Txamari, poiãoka parïkauatakani aua nisãkire isãpiretinina ïkapani. Ininiãkara himisãkiretariko Apiananiri kakikioteri iokanatinina parïkauatakani iua sãkire auiãkani apotiitinina ïkapani.

³ Hïsa. Soti auïte anaakori ãkitimoni iokanatiko atoko, niokanatai hïte kãkitimoni, kotxi pamonõkonina ninoa. ⁴ Txineiro !hanikape. Tiitxi !hanikape. ãti hïkiti mata !hanikape. Kimaporiãpoã kãkiti akiritakasaakii, !hïotokaãpotape kãkitikata hïsãkirauatini ïkapani. Hïsapitiporiko niokanatinimoni. ⁵ Kãkiti aapoko hãpokasaaki, merepitipanika hïtxariko: “Namanaãri Teoso, ikamaerekaxiniretinina kãkiti uai auakani,” hïtxako. ⁶ Kaapokori nirekiniãri Teoso ikara atoko inakari ikaminana ninoa, Teoso kamapitikari hamanaãkiti. Kaapokori manirekakaniãri, hïsapiretana Teoso kona kamaerekaxiniretana ninoa. ⁷ Kaapokori apakapiniãi hïte, hïkaiketako iua aapokonoka. ãti aapoko, eereka ãti aapoko kona hïtxaãpotapeko iua sitatxiti hãuakasaaki. Iuaã ninoa sikakiti hinikini ïkapani, hiãtini ïkapani hãpakapariko. !Hïpêtauatape hãpakapiniri, kotxi hïte nota ïkapani parïkauatakani hïtxaua. Apakatapitika hãpakapiniri hïparïka ïki.

⁸ —Aapokotxiãtaã hãpokasaaki hãpakapikoã, iuaã hïsikiko hinikako, hiãta hïtxaãpotako. !Hïxinikapiri ninoa sikakiti mapitxiri ininiua. Hinikariko. ⁹ Erekapeka hïtxïkitakanako amianatakani iuaã auakani. Hïsapiretana ninoa, kaiaapekari Teoso ninoa auïte ininiua tïkane. ¹⁰ Aapokotxiãtaã himapakapakoniã, hïsa kãkiti napaãporetxiã. Hïsapiretana kãkiti iuaã auakani: ¹¹ “Hãuiniãkiri pani akitiãkiri akaxipoka, kotxi !erekari uai, kotxi maerekati hïkama ate himapakapakaniã. Hïxinikariko, ate apoka uai Teoso auïtetxi ininiãua asãpiretinii ïkapani, txamari !hinirekari.” Ikara atoko hïtxa sãkiretako ninoamoni. ¹² Kãkiti misiritiko õtisaaki Teoso misiritanako kãkiti Sotoma sitatxiti auakani ninoa maerekani xika, txamari Teoso apia misiritanako iua aapokotxiti auakani hïte mapakapakani, kotxi hïte sãpiretana Teoso sãkire, iuaritika !auikarina. Kitxakapirïka Teoso sãkire sãpiretakani !isana Sotoma sitatxitimoni —itxa Xesosi.

Kãkiti Sitatxi Auakani Maerekati Matakanapakani

(Mateo 11.20-24)

¹³ —Hïte Korasiï sitatxiti auakani inipitika atatsiitariko misirikaretxi. Hïtepekana Petsáita sitatxiti auakani apaka atatsiitariko misirikaretxi, kotxi nota kamapekari posotiiretxi hïte sauaki, txamari !hïtakanapari himaerekani. Ikara posotiiretxi Sitoõ sitatxiti, Txiro sitatxiti pakini auaãkamako, kãkiti iuaã auakani uatxakapokoikamani itakanapamarinako maerekati ikamakitina. Ninoa sako mata ieretakamanako, atapani iïtoãna itakamanako, imaerekanina itakanapinina oerekinina. ¹⁴ Kãkiti misiritiko õti apokasaaki, Teoso misiritariko Txiro sitatxiti auakani, Sitoõ sitatxiti auakani pakini, txamari iua apia misiritaiko hïte Petsáita sitatxiti auakani, hïte Korasiï sitatxiti auakani apaka. ¹⁵ Hïtepekana Kapanaoõ sitatxiti auakani apiarini hinireka hininiãua, txamari maerekani misiritikoãtaã iuamonirako hõkapeëkako —itxa Xesosi.

¹⁶ Xesosi misãkiretana imoianariakori:

—Hĩte sãkire kenakotakani kenakotari nota sãkire apaka. Hĩte mapakapakani !apaka-pano nota apaka. Nota mapakapakani !apakapari nota uaimoni iokanatakari apaka —itxana imoianariakori.

Setēta Pakini Kãkiti Kanapiriini

¹⁷ Ninoa setēta pakini kãkiti kanapiriã. Poxokonoka itxakatana.

—Apiananiri, maerekani matamatakoni apaka kĩpitari asãkire, pite uãkaã aiokanatakasaakina —itxarina Xesosi.

¹⁸ Ininiã Xesosi:

—Ari, nitikapekari Teoso patimari iokanatiniri Satanasi, okaratxirari patimari imēkokini atoko itxa. ¹⁹ Hĩkenakota. Nota sikaposotiiretai hĩte imini, kaxapiro pakini hĩkatxaratini. Kona ioãkai hĩte. Amokaiakari Satanasi pataparari, iuaritika hĩposota hĩokanatiniri iua, kotxi nota sikataparatai hĩte. !Auari hĩte karotakani. ²⁰ Hĩpoxokoniuata, kotxi maerekani matamatakoni kamari hĩpaniãtakiti. Apia hĩpoxokoniuatako, kotxi hĩuãka Teoso tixine aãtsopateẽ iõkatsopatapeẽkaika iuaã hĩsini ìkapani —Xesosi txana ninoa.

Xesosi Iri

(Mateo 11.25-27; 13.16-17)

²¹ Iuasaaki Erekarì Matamatakoti kamapoxokonitari Xesosi, ininiã Xesosi misãkiretari Teoso:

—Niri, pitixine auakani auĩte pitxaua. Uai ikini itixiti auakani auĩte apaka pitxaua. Peerekai pite, kotxi kimarorerini, iuikakaniua kona poereka pimarore. Poiãorini, miuikakaniua poereka pimarore. Ari niri, ikara atoko pinireka. Ikara atoko papokaerekata —itxari iri.

²² Eereka imisãkiretari kãkiti:

—Niri sikapekano ikinika. Kãkiti !imarotano nota Teoso ãkiri nininiua. Nirinokara atão imarotano nota. Apaka kãkiti na atão imarotari niri. Notanokara imarotari niri, kotxi iua ãkiri nitxaua. Kãkiti nirekiniãri imarotiniri niri, nota oerekari niri iuamoni —itxa Xesosi.

²³ Eereka Xesosi aua imoianariakorikata. Ninoanani aua iuakata. Imisãkiretana:

—Teoso sikari erekari hĩtemoni, kotxi hĩte atamatari nota kamakiti, hĩte kenakotari nota sãpiretakiti. ²⁴ Nota sãpiretai hĩte. Kitxakapirĩka Teoso sãkire sãpiretakani, auĩtetxiakori pakini kinirão atamataka txari hĩte atamatakiti, txamari ninoa !atamatari. Ninoa nirekari hĩte kenakotakiti ikenakotinina, txamari !ikenakotarina —Xesosi txari imoianariakori.

Kiki Karotakori Tiretakari

²⁵ Kiki Moisesi sãkire oerekakari apoka Xesosimoni. Inirekamari Xesosi kerokiniri isãkire.

—Koerekareri, kiripa nikama Teosokata ãtipirika nauini ìkapani? —itxa.

²⁶ Ininiã Xesosi:

—Kiripa patatsopata Teoso aãtsopateẽ? Pisãpiretano Teoso paniãtakiti —itxari.

²⁷ Ininiã iua kiki apakapapireta:

—Teoso paniãtaua: “Pitiretariko Apiananiri piTeosone, ikinipoko pinireẽkitiã, ikini pãkixinireẽ, ikini pitaparaxinireẽ, ikinipoko pixinikakitiã pakini.” Apaka Teoso paniãtaua: “Piteka pitiretiniãua atokotxikana, pitiretariko ãti,” itxa.

²⁸ —Atãopitikara papakapapiretano. Ikara pikaminiã, pauapika ãtipirika Teosokata —itxa Xesosi.

²⁹ Txamari iua kiki !inirekari ikara atoko inakari ikamini, ininiã iua pimaãri Xesosi:

—Kiripa ãti nitiretini ìkapani?

³⁰ Xesosi apakapapiretari, ia sãpirenatxi atão inakari oerekiko isãpiretini:

—Kiki potorika Xerosareẽ. Inirekari Xerikoo sitatxitimoni isini. Ipixinipokoriti kiĩtiririni maĩkari iua. Iĩtirĩkarina imãka, itii pakini, noropata, karota, itxarina. Mauãkixiniretinoka itakanaparina iua kiki. ³¹ Iuasaaki sasetotxi iãpota iua kimaporiti.

Iua atamatari iua kiki karotakori, txamari !imaãkatari. Iopiriãri, napa, ïkorape itxa. ³² Eereka kiki Arevii apika mekaniri, sasetotxiakori moianatakari apoka. Iua apaka atamatari iua kiki karotakori, txamari iua sasetotxi atokokana !imaãkatari. Iopiriãri, napa, ïkorape itxa. ³³ Eereka kiki Samaria tōpakiri iãpota iua kimaporiti. Iua apoka iuaã. Atamatari iua kiki maïkapekori, ininiã iua amonïkari. ³⁴ Iuamoni isa. Arokari ikaro ipiniã. Ipitari ikaro iïtxiã. Mãkatxi mataã iapirika itxari ikaro. Eereka õkitika itxari, ipira poho nopini taka itxari. Anikari kãkiti imakiniãtaã aikotimoni. Iuaã imoiaãri. ³⁵ Katimatinïkata isikari txineiro kaapokorimoni. Ipi ota pirata kamakori isika. “Nisipekako. Pite moiaãriko ia kiki. Apikomonipanika txineiro pinirekiniã ikiena ïkapani, nikanapiriãkasaaki niïkitxitai,” itxa Samariakiri, –itxa Xesosi Moisesi sãkire oerekakarimoni.

³⁶ Xesosi pimaãri iua:

–Ipi ãti kikiakori iãpota iua kimapori. ïkiripa iua kiki kiïtiririni maïkakiti tiretakari? – itxa.

³⁷ Ininiã iua Moisesi sãkire oerekakari:

–Ari, Samariakirinokara tiretari iua –itxa.

Ininiã Xesosi:

–Pisipe. Samariakiri kamakiti atoko inakari pikamako, kotxi iua tiretari ãti.

Xesosi Motikaẽtaro Mata, Maria Pakini

³⁸ Xesosi imoianariakorikata sipeka. Apokana aapokotxiãtaã. Iuaã sito Mata inakoro apakapana oaãpoko. ³⁹ Oïtaro Maria inakoro topãka Apiananiri takote isãkire okenakotini ïkapani. ⁴⁰ Mata maerekaxiniretonoka otxa oparïka ito inini xika. Ininiã osari Xesosimoni.

–Apiananiri, nitaro topãkanãta ereẽ. Notanani parïkauanãta. Pitemoni erekari atxiïti? Pipaniãtaroko notakata nipokori okamini –otxa.

⁴¹ Ininiã Xesosi:

–Mata, Mata, maerekaxiniretonokai pitxa, kotxi piparïka ito inini xika. ⁴² ãtinoka pikamini tïkane ninireka. Maria mereëri ikara. Omereëri nota sãkire okenakotini. Oa mereëkiti apiaerekata, ininiã !niotokakaro oa nisãkire okenakotini –itxa Xesosi.

11

Teoso Misãkiretiko Pirena (Mateo 6.5-15; 7.7-11)

¹ ãti õti Xesosi misãkiretari Teoso. Ixipoka atoko ãtika imoianari txari:

–Apiananiri, Xoão oerekari imoianariakori Teoso imisãkiretinina. Iua atokokana poerekaua ate Teoso amisãkiretini. Natokopa itxa Teoso amisãkiretini?

² Xesosi apakapapireta:

–Teoso himisãkiretakasaaki, ia atoko hïtxako:

“Aïri, iaxiti auakari, ate nirekari piuãka paxitiko. Anirekari ikini itixiti auakani auïtetinii pite. Pite tixine pinireëkiti kamiko atokokana, anirekari pinireëkiti kamiko ïkorapokoriti.

³ Nipokori ikiniõtika pisikauako.

⁴ Pimaxinïkaretariko maerekati akamakiti. Maerekati atemoni kamakori amaxinïkaretini atokokana, pimaxinïkaretariko. Kona panikapeua aãtaerekatikomoni. Pisikakauako ate, maerekati sauaki aãuakasaaki.”

Ikara atoko hïtxako Teoso himisãkiretini –itxa Xesosi.

⁵ Eereka Xesosi oerekana imoianariakori:

–Atxiïti apanïkanõka pisa pimoianari aapokomoni nipokori pamanaini ïkapani. Ininiã pakiritari iua: “Nimoianari, ipi ãti pakini komiri psikano. ⁶ Naõkimanere iãpotakari uatxaika apoka naapoko. Natxinoka itxape. Nipokori !auari nisikiniri,” atxiïti pitxari iua.

⁷ —Atxiïti pimoianari iroko âki apakapapiretai: “!Pakirinâtapeno. Naapoko tore katoreri. Nota, namariteni apaka imakanâtape. !Niposota nõkitikiniua, nipokori nisikini.”

⁸ —Pimoianari itxaua iua, iuaritika atxiïti !inirekari õkitikiniua. Iuaïkana, iuaïkana pakiritiniâri pimoianari, iua õkitikapitikaua. Ikini nipokoriti pinirekakiti isikaiko, iuaïkana imakini ïkapani. Iua pimoianari na atoko itxa Teoso. ⁹ Ininiâkara pamanaâriko pinirekakiti, ininiâ Teoso sikapitikai. Pinitariko pinirekakiti, ininiâ papokapitikari. Pakiritariko Teoso, ininiâ iua apakapapiretai. ¹⁰ Amanarauatakari apakapapitikari amanaâkiti. Nitarauatakari apokapitikari initakiti. Teoso akiritakari apakapapiretaâkapitika.

¹¹ —Hïte irïtxiakori, hamariteni amanainiâi komiri, kaikani hïssikatana hamariteni? Ximaki amanainiâna, iminikani hïssikatana hamariteni? ¹² Patari naki amanainiâna, kaxipirokani hïssikatana hamariteni? Konapitini. ¹³ Hïte maerekati kamakani hïtxaua, iuaritika himarotari erekari hamaritenimoni hïssikini, ininiâ hïri iaxiti auakari, erekari-nani kamakari, iua sikapitikariko Erekari Matamatakoti hïtemoni hamanainiâri iua — itxa Xesosi.

*Maerekani Matamatakoni Omitikiko
(Mateo 12.22-32; Marko 3.20-30)*

¹⁴ Âti õti Xesosi omitikari maerekati matamatakoti masâkireti. Iua maerekati matamatakoti sipeka atoko, iua kiki mitxi maerekati matamatakoti auaitotakiti posotari iuaïkana isâkirauatini. Kâkiti Xesosi kamakiti itikakani tsorïkaânâta. ¹⁵ Âtikaka ninoa txari: —Satanasi, maerekani matamatakoni auïte, iuakara sikataparatarari Xesosi maerekani matamatakoni omitikini.

¹⁶ Apanakinipekana nirekari Xesosi kerokiniri, ininiâ itxarina Xesosi: —Takaõtxikari, Teoso posotiire poerekaua ate, aâtamatiniri ïkapani, Teoso iokanatinii ïkorapokoriti aimarotini ïkapani —itxarina.

¹⁷ Xesosi imarotari ninoa xinikanâtakiti, ininiâ iua txana: —Kâkiti tixine auakani, ninoakakarika inaiatakakiniâuana, ! apakata. Ix- ipokakakauana. Iua atokokana kâkiti aapokoâ auakani inaiatakakiniâuana, ninoakakarika ixipokakakauana. ¹⁸ Iua atokokana Satanasi nitiriakori, ninoakakarika inaiatakakiniâuana, Satanasi tapara xipokako. Ikara atoko ininiâ, kona atâo hïte sâkire, nota iokanatinina Satanasi nitiriakori, maerekani matamatakoni, Satanasi taparaâ. Ikara hïssâkire kona atâoni. ¹⁹ Hïte sâpiretano, maerekani matamatakoni Satanasi taparaâ nomitika, ininiâkara kitaparaâpa hïte moianariakori omitikana maerekani matamatakoni? Ninoa omitikana maerekani matamatakoni Teoso taparaâ, ininiâ ninoakara oerekari !atâo hïssâkire nota pirena. ²⁰ Teoso posotiireë nomitikari maerekani matamatakoni. Ikara atoko ininiâ, Teoso oerekai iua apokapeka hïtemoni hïauïte inini ïkapani.

²¹ —Kiki pataparari ikeeko iposope inakari moiainiâri aapoko, kona kiïtïrikikori itii. ²² Txamari âti kiki apiataparata inaiatiniâri, iriâkata, ininiâ anikapitikari kaapokori ikeeko. Mitxi iua kaapokori sâkire: “Nikeeko auiniâ, kona kamakatzakikori nitii,” itxama, iuaritika kiki apiataparatakari ïtirïkari itii. Eereka imoianariakorimoni ix-anakari tiitxi.

²³ —Notakata maparïkauatakani omanatano nota. Imamoianatakaniâno, inirekari nïparïka ixipokini —itxa Xesosi.

*Maerekati Matamatakoti Kanapiriini Pirena
(Mateo 12.43-45)*

²⁴ Iuaïkana Xesosi sâpirenauata:

—Maerekati matamatakoti omitikikosaaki, kâkiti itakanapakasaaki, isaâpota âparaâ makipakaniâtaâ auiniâtaâ initini ïkapani. Imapokakaniâri, “Iuaïkana nikanapiriâko mitxi nauinimoni,” itxa. ²⁵ Iuaâ apoka. Iua aapoko mitxi inakari iusaaki peereri. Oeretapeêkaika. ²⁶ Ininiâ apana apikomoni setxi pakini maerekani matamatakoni, apia

maerekanitakani. Ninoa ikinikana ñroaítotari iua kiki. Iua ñtoã aua itxana. Iuasaaki oitope maerekani matamatakoni misiritari iua kiki, ininiã apiata itsii inikoriã. Mitxipe átinoka maerekati matamatakoti paniãtari iua maerekati ikamini. Eereka oito paniãtari iua –itxa Xesosi.

²⁷ Xesosi sãkirauataka atoko, sito iuaã kãkiti sauaki auakaro txari Xesosi:

–Pite auãkítakakaro, pite axitakakaro, poxokoniuata, kotxi Teoso sikari erekari oa-
moni –otxa.

²⁸ Xesosi apakapapiretaro oa:

–Ari, inipitikara. Iuaritika Teoso sãkire kenakotakani, isãkire auiãkani, apia poxoko-
niuatako, kotxi Teoso sikari apikomoni erekari ninoamoni –itxa Xesosi.

Xonasi Pirena

(Mateo 12.38-42; 16.1-4; Marko 8.11-13)

²⁹ Kaiãopokori kãkiti apokaãpota Xesosi takote. Iuasaaki Xesosi txari:

–Kãkiti uatxarini !erekana. Hñte nirekari noerekinii Teoso takaõtxikare, iposotiire.
Konapitini. Kona noerekai hñte. Kitxakapirñka Teoso sãkire sãpiretakari Xonasini
inakori auakasaaki, Teoso kamari posotiiretxi. Ikara atoko inakari posotiiretxi
Xonasini auakasaaki, iuañkana ikamapanikariko. Iua posotiiretxi Teoso takaõtxikare
itxapanikaua hñte ñkapani. Iua takaõtxikarinoka Teoso takaõtxikare hñte ñkapani.

³⁰ Kitxakapirñka Nñnivi sitatxiti auakani imarotari Teoso iokanatiniri Xonasi ninoamoni.
Iua atokokana kãkiti uatxa auakani imarotariko Teoso iokanatinino nota kãkiti itari
iaxitikiri ninoamoni.

³¹ –Kitxakapirñka sito Sapaa auakani auñte sari õtakoxiti auñtetxi Saromão inakorimoni
imarore okenakotini ñkapani. Kãkiti misiritiko õti apokasaaki, oa sito txitanako kãkiti
uatxa auakani, kotxi uatxa uai aua Apiatakari. Iua Saromão auñtetxi itxaua, iuaritika
uatxa uai aua auñtetxiakori auñte. Txamari kãkiti uatxa auakani !inirekari ikenakotini-
rina nota sãkire.

³² –Kãkiti misiritiko õti apokasaaki, kãkiti Nñnivi sitatxiti auakani txitaiko hñte ñkorsaaki
auakani, kotxi ninoa kenakotari Xonasi sãkire. Iuasaaki itakanaparina maerekati
ikamakitina. Uatxa uai aua Apiatakari. Xonasi poiãoka. Hñte kenakotapekari nota sãkire,
txamari himaerekani !hñtakanapa –itxa Xesosi.

Tirikapi ñtotxiãkiri Pirena

(Mateo 6.22-23)

³³ Iuañkana Xesosi sãpirenauata:

–Kãkiti iopotokakasaakiri tirikapi, itano itaka ikinimane ñroãkani atamarauatini
ñkapani. !Ikipatari tirikapi. !Iomaãtari tirikapi kopiti ãki. ³⁴ Poki tirikapi atoko itxa
piñto ñkapani. Poki ereka inakasaaki ipinikare aua pãkixinireẽ. Poki maerekanisaaki,
pãkixinireẽ mapiãriko. ³⁵ Erepaniko. Atxiñti piuãkatari ipinikare pãkixinireẽ auini, txamari
atxiñti ipiãnoka auari pãkixinireẽ. ³⁶ Ipinikarenoka pãkixinireẽ auiniã, ipiã na xatiki auinii,
tirikapi iopinikini atoko itxa –itxa Xesosi.

Pariseoakori Maerekani

(Mateo 23.1-36; Marko 12.37-40)

³⁷ Xesosi sãkirauataka atoko pariseo aiatari Xesosi:

–Manipokota naapoko –itxari.

Ininiã Xesosi sari iuakata. Apokaãka atoko, iitopãka inipokotini ñkapani. ³⁸ Iua pariseo
tsorñkañãta Xesosi marokauakotakaniãua inipokotini apisa, kotxi iuasaaki Xesosi !
ikamari Xoteo kiomaneakorini oerekakiti iaõka. ³⁹ Ininiã Xesosi:

–Hñte pariseoakori arokari hiñto, txamari hãkixinire patxikopiñri, kotxi maerekatino
hñkama. Kapotxinaniri hñtxaua. Iãkoanatxi inopinino arokiko atoko hñtxa. Pirato
inopinino arokiko atoko hñtxa. ⁴⁰ !Kiñkitei hñte. Teoso hiñto kamakari kamari hãkixinire
apaka. ⁴¹ Iãkoanatxi ãki auakari iãriã hñsikako matxineirotenimoni. Hñpratone ãki auakari

nipokori h̄sikako matxineirotenimoni. H̄tiretariko apanakini. Ikara atoko h̄kaminiã, Teoso atamatarì h̄kixinire ereka inini.

⁴² –H̄ite pariseoakori misiritaãkako. H̄ite sikari ipixini h̄takare kikio auakari Teosomoni Moisesi paniãtakiti iaõka. Apikomoni h̄kama, kotxi ipixini takari kanaua ãki h̄takakiti apaka h̄sika Teosomoni, oteraã, seporia h̄sika. Erekapitikamari h̄ite sikakiti Teosomoni, txamari himisirienetari kãkiti. Teoso !h̄tireta. Erekarì ipixini h̄tii h̄sikiniri Teoso. Iuakatikana erekarì atão h̄kaminari kãkiti. Erekarì atão h̄tiretiniri Teoso.

⁴³ –H̄ite pariseoakori misiritaãkako. H̄ite potxitari h̄itopãkini kãkiti apisatoõ, aiko ãki Xoteo apotiitiniãtaãua kãkiti atamatinii ìkapaninoka. Nipokori sikaretikoãtaã h̄auakasaaki, h̄ite apokaerekatarì kãkitipokoni paxitinii h̄ite koerekareri hininiãua.

⁴⁴ –H̄ite pariseoakori misiritaãkako. Akauari matakaõtxiãkoti atoko h̄itxa. Iua nopini kãkiti napa imimarotakoniã, kotxi h̄ito peerekarì, txamari h̄kixinire !erekarì. Akauari ãki arakakarì atoko itxa h̄kixinire –itxa Xesosi.

Moisesi Paniãtakiti Oereẽkani Maerekani

⁴⁵ Ikara sãkiretxiti kiki Moisesi paniãtakiti oereẽkarì kenakotakasaaki, omanãkarauata. Itxari Xesosi:

–Koerekareri, ikara atoko pisãkirauatiniã, ate apaka “maerekati kamakani” pitxataua ate –itxari.

⁴⁶ Ininiã Xesosi:

–H̄ite Moisesi paniãtakiti oereẽkanii h̄tekanerako misiritaãkako. H̄ite paniãtari kãkiti h̄teka paniãtakiti ikaminina. Ninoa !iposotari ikinika h̄ipaniãtakiti ikaminina. Iminani ninoa porikiã h̄takini atoko h̄kamanãta h̄ite. !Iposotarina anikinirina. H̄ite apaka ! h̄kamari h̄teka paniãtakiti. ⁴⁷ H̄ite misiritaãkako. H̄ite kamari takaõtxikari peereri Teoso sãkire sãpiretakanini ikatikoãtaã h̄takini. Txamari h̄ite atokiriakorinikara okapena ninoa Teoso sãkire sãpiretakanini. ⁴⁸ Iuaritika h̄ite sãpiretari ikinimane h̄pokaerekatiniri h̄ite atokiriakorini kamakiti. Txamari ninoara okana Teoso sãkire sãpiretakanini. H̄itera takari takaõtxikari peereri ninoa Teoso sãkire sãpiretakanini akauariãtaã, ininiã kãkiti uãkatari h̄ipaxitinina ninoani, txamari !h̄kamari ninoani paniãtakiti.

⁴⁹ –Paimatireri Teoso, kotxi mitxipe imarotari ninoa kamakiti t̄kane. Mitxipe iua txari: “Nota iokanatanako nisãkire sãpiretakani, niokanapirena aniãkani pakini ninoamoni, txamari ninoa okapanikana apanakini. Imisiritapanikana apanakini,” itxa Teoso. ⁵⁰ Kãkiti uatxa auakani misiritaãkako, Teoso sãkire sãpiretakanini okiko xika. Teoso itixi ikamakasaakipeka ipotorika Teoso sãkire sãpiretakani okiko. ⁵¹ Merepitipanika Apeo inakori okapeẽka. Eereka apanakini okaãpotapeẽka. Imapotõkire okakori Sakaria inakori. Teosomoni sikakori takikoãtaã takote, Teoso Auini Pakitaãtaã takote apaka, iuaã okapeẽka Sakaria. Inipitikara nota sãpiretai h̄ite, uatxa auakani misiritaãkako ninoa Teoso sãkire sãpiretakani okiko xika.

⁵² –H̄ite Moisesi paniãtakiti oereẽkani misiritaãkako. H̄ite kipatarì atão inakari Teoso iokanapirena. H̄ite apaka !auikari ikara. !H̄ãuritari apanakini auikiniri –itxa Xesosi.

⁵³ Ikara Xesosi sãkire xika, Moisesi paniãtakiti oereẽkani, pariseoakori pakini tsoata, Xesosi omanatinina. ãtipirika ipimaãnãtapikarina Xesosi. ⁵⁴ Inirekarina Xesosi kerokiniri isãkire, imaĩkiko ìkapani.

12

Kipatakori !Auari (Mateo 10.26-27)

¹ Kãkitipokoni apotiitaua kinapokopeka, ininiã ikatxarakititakakauana. Iusaaki Xesosi merepanika õtãkikana imoianariakori:

–Erepaniko pariseoakori sãkire. Pamonõkoniri isãkirena, kotxi !ikamarina isãkirena iaõka. Ikara imaerekanina kipataua pão tireẽkarì pani koketakori atoko itxaua. Eereka

imarotaãka imaerekani. ² Ikinika seretakori oerekaãkako. Ikinika kipatakori imarotaãkako. ³ Ininiã ipiãpokoã pisãpiretakiti, pokamara imarotaãkako. Aapokotxi katoreri ãki pimaasakapiretakiti aapokotxi nopini akiritaãkako ikinimane imarotiniiri ìkapani.

Kipa Apïka?

(Mateo 10.28-31)

⁴ –Nimoianariakori nõtãkikapanikai hïte. !Hïpïkapiri hïte okakani tïkane. Hiïtonanira iposotana okinina. Hïxinire !iposotana okinina. ⁵ Nisãpiretai hïpïkakiti tïkane. Teosora hïpïkako. Iuara posotari hïto okini, eereka iposotari iokanatinii maerekani misiritikoãtaã. Ari, iuara hïpïkako.

⁶ –Kiripa ipi ipi ãti pakini kotipiriki karone? Poiãonoka txineiro, ota ipinoka. Iuaritika Teoso !imaxinïkaretari ãtika kotipiriki. ⁷ Kipakinipa piãko pikiiã auakari aua? !Pimarotari. Teoso imarotapitikari, kotxi iteene inïkakai, ininiãkara !hïpïkarauatape. Kotipiriki ìki poião, iuaritika Teoso tiretari kotipiriki. Kaiãopokori kotipiriki auiniã, iuaritika hïte ìki apiata, ininiã Teoso tiretapitikai hïte –itxa Xesosi.

Xesosi Nakitiakori

(Mateo 10.32-33; 12.31-32; 10.19-20)

⁸ Xesosi sãpirenauatapanika:

–Apikomoni nisãpiretai. Kãkiti ikinimanemoni: “Xesosi nakiti nitxaua nota,” inakari, iua atokokana nota hïtari iaxitikiri txako Teoso nitiriakorimoni: “Nota nakitipitikara iua,” nitxako. ⁹ Kãkiti ikinimanemoni: “Xesosi nakiti !nitxaua nota,” inakari, iua atokokana nota hïtari iaxitikiri txako Teoso nitiriakorimoni: “Kona nota nakitini iua,” nitxako.

¹⁰ –Kãkiti misãkirepiretiniãno nota hïtari iaxitikiri, eereka amanainiãri Teoso ikara imaerekani imakatzakini, ininiã Teoso makatzakapitikari. Kãkiti misãkirepiretiniãri Erekari Matamatakoti, !kimakatzakikori ikara maerekati ikamakiti.

¹¹ –Hanikikosaaki aiko Xoteo apotiitiniãtaãua hãpoïtikoã, hanikikosaaki auïtetxiakorimoni hãpoïtikoã, mitxi !hïxinikapiri hïte apoïtakani hãpakapapiretini. Maerekaxiniretinoka !hïtxape. ¹² Iuasaaki ninoa apoïtakasaakii, Erekari Matamatakoti sãpiretaiko hïte hãpakapapiretini ìkapani –itxa Xesosi sãkire.

Kiki Katxineiroteri Mïkiteti

¹³ Kiki kãkitipokoni sauaki misãkiretari Xesosi:

–Koerekareri, pipaniãtari nitari sikinino nota ipixini aïrini tii ipïkasaaki itakanapakiti –itxa.

¹⁴ Ininiã Xesosi:

–Naõkimanere, kona nota parïkani pirini tii nixanakini –itxa Xesosi.

¹⁵ Ininiã Xesosi misãkiretana ikinimane:

–Erepaniko. !Erekari tiitxi iteene pinirekini. Kapotxinani !hïtxape. Itomaneri tiitxi !itxïkitakai okanani pauini –itxa Xesosi.

¹⁶ Ininiã Xesosi sãpiretari ia sãpirenatxi atão inakari oerekiko:

–Kiki katxineiroteri aua kikiõ mitari. Itakare peerekari, kaiãopokori. ¹⁷ Ixinikaxitita ãkixinireë: “Nãpa ninïkatari nikiena? Nikiena nïkatikoãtaã xapitikiri. !Apakata itomaneri nikiena ìkapani. Kipa nikama? ¹⁸ Ari, nimarotari nikamakiti tïkane. Nõtïkariko nikiena nïkatikoãtaã. Iuaïkana nikamari ãti mitari. Iuaã ikinika nikiena, nitii apaka ninïkata. ¹⁹ Eereka notaka nitxauako: ‘Peerekano nota. Kaiãopokori nikiena. Kaiãopokori nitii. Apakatapitikako kaiãopokori anokanani ìkapani. Ininiã !niparïkauataika. Ninipokotako, niãtako, nipoxokoniuatoko nitxako,’ ” itxa iua kiki. ²⁰ Txamari Teoso misãkiretari iua: “Kïkïitei pite. Uatxa ia ìkanõkati pipinako, ininiã kipa apakapatari ikinipoko pikiena, pitii apaka?” itxa Teoso.

²¹ –Ikara atoko itxa kãkiti tiitxinoka xinikakari, Teoso maxinikati –itxa Xesosi ikara sãkiretxiti ixipokini.

Teoso Nīkatiniua Ate
(Mateo 6.25-34)

²² Ininiā Xesosi misākiretari imoianariakori:

—Ininiākara nota sãpiretai hīte, maerekaxiniretinoka !hītxape, hiniākiti nire, mākatxi hīretaākiti nire. ²³ Nipokori, mākatxi pakininoka kona txīkitakari pauini ereka inini. Nipokori, mākatxi pakini poiãoka. ²⁴ Hātamatari kotipiriki. Ninoa !itakarauata. !Amarina ikiena. !Ipotetarina ikiena. Iuaritika Teoso sikakienatana ninoa. Teoso nīkatiniāri kotipiriki, inīkatapitikai hīte apaka. Hīte ūki apiata. ²⁵ Kinirepa maerekaxiniretinoka pitxa? Pimaerekaxinirene !itxīkitakai apikomoni āti oara pauini. ²⁶ Pimaerekaxinirene kona txīkitakai axapitiki apikomoni pauini, ininiā kinirepa maerekaxiniretika pitxa?

²⁷ —Aãui pixinikako. Kona aãui parīkauata. !Ikamari imāka, iuaritika aãui peereri. Kitx-akapirīka auītetxi Saromão inakori, iteene katiiri itxaua. Kaiãori imāka ereri, iuaritika apia ereri ikinika aãui. ²⁸ Aãui !okanani aua. Uatxa aua. Katana ikatikata iotikaãka. Iuaritika Teoso nīkatari aãui. Ininiā apiata inīkakai hīte. Ikamamākatapitikai. Poiãonoka hīte auikari Teoso sãkire. Ikara xika maerekaxiniretinoka hītxa. ²⁹ Ininiākara maerekaxiniretinoka !hītxape. !Hīxinikanātapiri nipokori mauakanisaaki, iāriā mauakanisaaki. ³⁰ Kākiti Teoso sãkire mauīākani ikiniōtika maerekaxiniretinoka itxana imākana ixinikinina xika, inipokore ixinikinina xika. Hīri imarotari himāka hinirekini, hīkiena hinirekini. ³¹ Merepitipanika pinirekariko Teoso piauīte ininiāua. Iua nireēkiti pika-mako, ininiā, himāka, hīkiena apaka Teoso sikaiko hīte —itxa Xesosi sãkire.

Hīparīka Ūki Nīkatiko
(Mateo 6.19-21)

³² —Ininiā hīte ninakitiakori !hīpīkarauatape, kotxi hīri apokaerekatari isikinii ikinipoko erekari iua auītetxi ininiātaãuakiri. ³³ Ikinika hīti hīvētxitako. Txineiro hīsikako matxineirotenimoni. Ikara atoko hīkaminiā, hīparīka ūki auapitika Teoso tixine. Iuaā hīparīka ūki !ixipoka. Kītiriri !ītirīkari. Kīriki !inikari. Iuaā hinīkatariko hīparīka ūki. ³⁴ Erekari hīparīka ūki Teoso tixine auiniā, ininiākara iuaā pixinikapika. Iuaā pinirekari pauini —itxa Xesosi.

Nitiritxi Erekarini

³⁵ Xesosi sãpirenauatapanika:

—Himerekako, kamāka hītxako. Tirikapi hīopotokakako. Iposope hītxako nīparīka hīkamini ūkapani. ³⁶ Nitiritxi ipatrãotena iātapakani atoko hītxako. Ipatrãotena sari ūtanorouatakari kiiniritemoni. Initiriakori iātapari ikanapiriini. Apokasaaki, akiritakasaaki, pakoteri initiriakori matakakari itore ipatrãotena ūroini ūkapani. Ninoa nitiritxi atoko hītxako. ³⁷ Patrão apokasaaki initiriakori merekapanika inakasaaki, iātapanātakasaakiri iua, ininiākara erekapitikari. Himarotatari patrão kamakiti? Iua ieretakari imāka iparīkauatini ūkapani. Ipaniātana ninoa topākini. Eereka isikakienatana initiriakori. ³⁸ Erekapitikari ipatrãotena apokasaaki imirekiniāna. Atxiīti apanīkanōka apoka ipatrãotena. Atxiīti imaropirīkata apoka ipatrãotena, iuaritika iposope itxana, ininiā erekapitikari.

³⁹ —Hīxinikari ia. Kaapokori imarotaākamariko kītiriri apokini, !auiritamariko iua aapoko ūroini itii ūtirīkini ūkapani. ⁴⁰ Hītepekana, hīte apaka iposope hītxako, kotxi nota hītari iaxitikiri kanapiriāko. Iuasaaki, “!Apoka uatxa,” hinakasaaki, iua ōtipitika nota kanapiriā uai —itxa Xesosi.

Nitiritxi Erekarini, Nitiritxi Maerekati Pakini
(Mateo 24.45-51)

⁴¹ Petro misākiretari Xesosi:

—Apiananiri, ikara sãpirenatxi atão inakari oerekiko pisãpiretakiti, atenani poerekini ūkapanikani? Ikinimane poerekini ūkapanikani ikara pisãpireta? —itxa Petro Xesosimoni.

⁴² Ininiā Xesosi:

—Nitiritxi kimaroreri ipatrãote paniãatakiti kamakari ia atoko itxako. Iuara apanakini nitiritxi auïte itxaua. Iuara sikakienatana apanakini nitiritxi nipokotiko manapi. ⁴³ Nitiritxi ipatrãote paniãatakiti iaõka kamakari poxokoniyata ipatrãote apokasaaki, kotxi ipatrãote paniãatakiti iaõka ikama. ⁴⁴ Ipatrãote auiritariko iua ikinika itii, aapoko, ikikiote pakini inïkatini.

⁴⁵ —Txamari atxiïti ãti patrão nitiri !inirekari ipatrãote paniãatakiti iaõka ikamini, ipatrãote auapokotini xika. Atxiïti inoropatari apanakini ipatrãote nitiriakori, apanakini ipatrãote niteroakoro apaka. Atxiïti inipokota, kapoãro iãta, ipoãta. ⁴⁶ Ipatrãote apoka initiri mimarotakanisaaki, ininiãkara initiri !iposopanika ipatrãote apakapini. Ìkara xika ipatrãote misiritari iua. Eereka iokanatarari iua Teoso sãkire mauiãkani misiritikoãtaã.

⁴⁷ —Nitiritxi ipatrãote nireëkiti imarotakari makamakaniãri ipatrãote paniãatakiti iposope inini ìkapani, ixirokitataãkako aãpitsaã. ⁴⁸ Nitiritxi ipatrãote nireëkiti mimarotakati kaminiãri maerekati, ixirokitataãkako, txamari poiãonoka. Teoso sikari parïkatxi, imaroretxi pakini kãkitimoni. Kaiãopokori parïkatxi, kaiãopokori imaroretxi isikiniãi pitemoni, ininiã Teoso nirekari pite iteene parïkauatini iua ìkapani. Apikomoni parïkatxi, apikomoni imaroretxi isikiniãi pitemoni, ininiã Teoso nirekari pite apiata piparïkauatini iua ìkapani —itxa Xesosi sãkire.

Neenamatzxi Xesosi Sãkire Auikiko Xika (Mateo 10.34-36)

⁴⁹ Xesosi sãkirauatapanika:

—Teoso misiritariko kãkiti imaerekani xika. Xamina tirinini atoko itxa kãkiti misiritiko. Ia itixi napoka ìkara xamina tirinini nitxïkitakini ìkapani. Ninirekari ikara niparïka nixipokini. ⁵⁰ Nota atatsiirauatako. !Erekaxinireno. Ninirekakari natatsiirauatini katima xipokaka inini. ⁵¹ Kona neenamatzxi niotokakini ìkapanini napoka ìkorapokoriti. Nota sãkire auikiko xika neenamatzxi auapitikako. ⁵² Aapokotxi ãki auakani sïko. Atxiïti ipi ãti pakini naiatarari ipi, atxiïti ipi naiatarari ipi ãti pakini, nota sãkire auikiko xika. ⁵³ Irïtxiakori omanatana ninoa ãkiri nota sãkire auikiko xika. Ninoa ãkiri omanatana iriakori. Inorotxiakoro omanatana ninoa ãkero. Ninoa ãkero omanatana inoroakoro. Imakirotxiakoro omanatana otiroakoro. Otiroakoro omanatana oimakiroakoro nota sãkire auikiko xika —itxa Xesosi sãkire.

Iaxiti Imarotiko (Mateo 16.1-4)

⁵⁴ Xesosi iuaïkana misãkiretari kãkiti:

—Atokatxi ereëkokinimoni ipiãkaãpotakasaaki, “ãparaãnapani,” hïtxa. Ari, ikipapitikako. ⁵⁵ Ìtima ikiitaã ìkari apokasaaki ìkorapokoriti, hïte: “Kamoïpani,” hïtxa. Ari, kapatakapi-tikariko. ⁵⁶ Kamisirienererini hïtxaua. Hãtamatarari iaxiti, itixi pakini, ininiã himarotapitikari ãparaã, kamoï pakini. Kinirepa kona hãtamatanano nota? Kinirepa kona hïkenakotari nisãkire Teoso kamaenetakiti himarotini ìkapani? —itxa Xesosi sãkire.

Pimisiritiko Mereëkarimoni Pimasikani Ìkapani (Mateo 5.25-26)

⁵⁷ —Kinirepa hïteka na xinikari atão inakari hïkamini tïkane? ⁵⁸ Maerekati pika-makasaaki, ãti nirekari anikinii pimisiritiko mereëkarimoni. Iua anikinii apisapanika, pisãkirauata iuakata atão pikamini ìkapani, ininiã iua !anikaikai pimisiritiko mereëkarimoni. Pimamisãkiretakaniãri, iua anikaiko pimisiritiko mereëkarimoni. Eereka pimisiritiko mereëkari sikaiko sotatomoni. Eereka sotato takai kateia ãki. ⁵⁹ Atão nisãpiretai, kona posipikari kateia ikinika pimisiritiko mereëkari paniãatakiti pimiïkitxitanisaaki —itxa Xesosi.

13

Himatakanapakaniãri Himaerekani, Hïpinako

¹ Xesosi sãkirauatakasaaki, kãkiti iuaã auakani sãpiretari iua Kariréia auakani okiko pirena. Ninoa Teoso misãkiretiko aikotiã auakasaaki, ninoa okari ipirana imaerekanina Teoso makatxakini ïkapani. Ininiã iuasaaki Pirato sotatone apoka iuaã. Iuasaaki ninoa okana. ² Xesosi imarotari kãkiti ãkixinire xiniãkiti. Ininiã ia atoko itxa:

–Hïte uãkatari ninoa Kariréia auakani maerekani apiata. Ininiã, “Ikara atoko inapeẽkana ninoani,” hïtxa. ³ Konapitini. Nota sãpiretai hïte, himaerekani himatakanapakanisaaki, hïpinako ninoa atokokana hinaãkako –itxa Xesosi.

⁴ Ininiã Xesosi sãpiretana ninoa apanakini ipinini pirena:

–Xerosareẽ aua Siroee inakori aapokotxiti. Iua aapokotxi ïtanori irika. Irikasaaki, tesoito kikiakorini ipïpe. Hïte uãkatana iuaã auakani apia maerekani itxauana?

⁵ Konapitini. Hïtekanera himaerekani himatakanapakanisaaki, ninoa atokokanera hïpina –itxa Xesosi.

Piko Mina Mariti Pirena

⁶ Ininiã Xesosi sãpiretari ãti sãpirenatxi atão inakari oerekiko:

–Aua kiki. Initirikata isari ikikiote atini ïkapani. Iuaãtaã aua amãtiiri piko inakori mina. Iuaã apokasaaki, maritoka otxa itakare. ⁷ Ininiã itxari: “Ipikanani ãtikanani pakini ninapiïma. !Kariro. Ininiã erekari otokiko, kotxi kona oïriuata. Ininiã kona erekari uai okaikotini, kotxi oxipokari takari kiena kipatxi ãki auakari,” itxari initiri.

⁸ Ininiã initiri: “Kona pitokapero. Nota oeretariko opatapi. ãti kipatxi erekari patari tikakata nitakapatapitaroko. ⁹ ãtikanani inakasaakiua karipeka oniniã, ereẽ oãua. Erekari okaikotini. Omiriuatakanisaaki, iuasaaki erekapekari otokiko,” itxa initiri – itxa Xesosi.

Tomatiko Ôtisaaki Xesosi Makananitiniro Sito

¹⁰ Tomatiko ôtisaaki Xesosi auari aiko Xoteo apotiitiniãtaãua. ¹¹ Iuasaaki sito apoka. Tesoito anokananipeka ina amianaretakaro. Ia atoko otxa amianareta. Okomïkaãpota, kotxi maerekati matamatakoti amianari kamakari ïroaïtotaro. Kona oposota oõkitikaïtotiniãua. ¹² Xesosi atamatakasaakiro, itxaro:

–Sito, erekapitikaiko uatxa –itxaro.

¹³ Ininiã itakari iuako onopini. Iuasaakipeka oõkitikaïtotaua. Ininiã iuasaaki otxa:

–Peerekari Teoso. Erekari imakinika ikamakiti –otxa.

¹⁴ Iuasaakipeka Xoteo apotiitiniãtaãua aikotiã auakani auïte naiataua, kotxi tomatiko ôtisaaki Xesosi makananitaro amianatakaro. Ininiã iua txitari kãkiti:

–Auari seisi pakini õti kãkiti parïkauatini ïkapani. Ininiã ïkora seisi õti hina iua makananitinii ïkapani. Kona hinape tomatiko õti erekapeka hïtxïkitakiko ïkapani –itxana.

¹⁵ Ininiã Xesosi txari iua:

–Hïsäkire atxiïti erekari, txamari kona hïkamari hïsäkire iaõka. Tomatiko ôtisaaki hïte tiretari hïpiraakori, kotxi hanikari hïpiraakori, kema auïte iaãmoni ãparaã iãtinina ïkapani.

¹⁶ Oia sito Apraãoni apika mekaniro otxaua. Satanasi kamaamianaretaro oa tesoito anokananipeka. Iaõpe. Apakatapitika tomatiko ôtisaaki nitiretiniro oa, nimakananitiniro oa –itxa Xesosi.

¹⁷ Xesosi apakapapiretakasaakina, imokaiakariakori pëtauata. Iuasaaki apanakini iuaã auakani poxokoniua, kotxi imarotarina erekari Xesosi kamakiti.

Mostata Pirena

(Mateo 13.31-32; Marko 4.30-32)

¹⁸ Ininiã Xesosi pimaãna:

–Natokopa itxa Teoso auïtetxi ininiãua? Kiãtokopa itxa axinikiniri? ¹⁹ Teoso auïtetxi ininiãua mostata iki atoko itxa. Kiki takaro mostata ikikioteẽ. Oa aneẽ. Mitape

onakasaaki kotipiriki kamari ikoa okatiã. Ikara atoko itxa Teoso auñtetxi ininiua –itxa Xesosi.

Merepanika poião kãkiti auñtetari Teoso. Eereka kaiãopokori kãkiti auñtetari iua. Txamari iuasaaki Satanasi apoka ninoamoni kotipiriki apokini atokokana.

Pão Tirekakari Pirena
(Mateo 13.33)

²⁰ Iuaĩkana Xesosi pimaãna:

–Natokopa itxa ïkorapokoriti Teoso auñtetxi ininiãua? ²¹ Ia atokokana itxa: Sito kosekari pão tirekakari pani. Okoketari axapiti pão tirekakari pani kaiãopokori triko panikata, ãparaãkata. Eereka ikinika ipe tirekaãpota otxa.

Axapitiri Ironakikoãtaã
(Mateo 7.13-14, 21-23)

²² Ikara inaka atoko Xesosi potorika Xerosareẽ sitatxiti isini ïkapani. Isaãpotakasaaki, isãpiretari Teoso sãkire. Isãpiretari ãti sitatxitiã, ãti aapokotxitiã, ãti sitatxitiã, itxaãpota isãpiretiniri Teoso sãkire kãkitimoni. ²³ Oerekarauanãtakasaaki, kiki pimaãri:

–Niauĩte, poiãokani satako Teoso auiniãtaã?

²⁴ Ininiã Xesosi apakapapiretari:

–Teoso tixine ïronakikoãtaã axapitiri. Hinirekariko iuaã hiĩroini. Kaiãopokori kãkiti nirekari ïroinina. Txamari, liposotarina. ²⁵ Kaapokori totiniri aapoko tore atoko itxa. Itotakasaakiri, kãkiti iporikiti aritari itore: “Pimataakariko itore ate ïkapani.” Iuasaaki iua kaapokori txako: “Kona nimarotai hĩte,” itxanako ninoamoni. ²⁶ Ininiã ninoa: “Ate nipokota pitekata. Sitatxi ate auiniãtaã pauakasaaki, pitekara oerekaua,” itxanako ninoa. ²⁷ Ininiã iuaĩkana itxako ninoamoni: “!Nimarotai hĩte. Namonipa hãua hĩte? Hĩsipiniikaua. Imakinika hĩkamakiti !erekari.”

²⁸ –Hãtamatakasaakina Apraão, Isaki, Xakoo, ikinimane Teoso sãkire sãpiretakani pakini Teoso auñtetxi ininiãtaãua, iuasaaki hĩtxiapatapitikako. Apanakini ïroãpeka. Txama hĩtenoka kaikotape iporikiti himaerekani xika. ²⁹ Teoso auñtetxi ininiãtaãua apokako kaiãopokori kãkiti, ikini itixiti ïkani. Atokatxi pokĩkinimoni ïkani, atokatxi ereẽkokinimoni ïkani, atokatxi pokĩkini sanaremoni ïkani, atokatxi pokĩkini kikomoni ïkani pakini apokako Teoso kiiniritimoni. ³⁰ Merepitipanika Xoteoakori kenakotari Teoso sãkire, txamari !imaãkatari. Eereka Xoteo minakaniua kenakotari Teoso sãkire, ininiã auikarina. Ininiã Xoteo minakaniua apokako Teoso auñtetxi ininiãtaãua Xoteoakori apokini apisa –itxa Xesosi sãkire.

Xesosi Tiretari Xerosareẽ Auakani
(Mateo 23.37-39)

³¹ Ikarasaakipeka ãtikaka pariseoakori apoka. Itxarina Xesosi:

–Pisipiniikaua, kotxi Erotxi okaenetai –itxarina.

³² Ininiã Xesosi apakapapiretana:

–Hĩsa iuamoni. Hĩtxariko iua aripa kamisirienereri: “Nota omitikari maerekati matamatakoti, apaka amianatakani erekapeka nitxĩkitaka. Uatxa, katana pakini niparĩkauatako. Ipi ãti õtisaaki nixipokariko niparĩka ïkorapokoriti.” Ikara atoko hĩtxariko iua. ³³ Ininiã uatxa niparĩkauatako. Katana niparĩkauatako. Ininiã katana eereka nisa Xerosareẽmoni, kotxi ãtiãtaã Teoso sãkire sãpiretakani okikoãtaã !auari. Xerosareẽnanira ninoa ipina. Ininiã nota sako iuaã.

³⁴ –Xerosareẽ auakanii, Xerosareẽ auakanii, hĩte okapekana Teoso sãkire sãpiretakani. Kai soroã hĩkiporonakana ninoa hĩtemoni Teoso iokanatakini. Kaiãokatani ninirekamari ninĩkatinii, patari oimiakori omĩkita patapi otakini atokokana nitxanakamaiko hĩte. Txamari !hãuiritano nota nĩkatinii. ³⁵ Ikara atoko inakari xika haãpoko asikaãkako. Teoso !auaika hĩtekata. Nisãpiretai. Ia õti hãtamatano, eereka !hãtamataikano. “Teoso takari

erekari uaimoni ìkarimoni, Apiananiri posotiireẽ ìkarimoni,” hinakasaaki, iusaakinani-rako hãtamatanoko nota –itxa Xesosi.

14

Xesosi Erekepeka Txĩkitakari Amianatakari

¹ Tomatiko õtisaaki Xesosi sari pariseoakori auĩtemoni, iuakata inipokotini ìkapani. Iuaã auakani mixinitari iua apoĩtinirina ìkapani. ² Iusaakipeka apoka kiki amianatakari. Ikanoke, itapike, imakinika ananaĩtota. Iua apoka Xesosimoni. ³ Ininiã Xesosi pimaãna Moisesini sãkire oerekakani, pariseoakori pakini. Ipimaãna:

–Erekari atxiĩti tomatiko õtisaaki amianatakari erekepeka nitxĩkitakini? –itxa Xesosi.

⁴ Ininiã ninoa tsorĩkaãnãta. !Apakapapiretarina. Ininiã iusaaki Xesosi erekepeka txĩkitakari iua amianatakari.

–Pisipeka paapokomoni –itxa Xesosi.

⁵ Eereka ipimaãna pariseoakori:

–Hĩpira kema auĩte, hĩpira poho apaka aariko ãki irikiniã tomatiko õtisaaki, iusaaki himakatzakatarari? Ari, himakatzakapitikari hĩpira tomatiko õtisaaki. Ininiã kinirepa kona hinirekatari erekari nikamini tomatiko õtisaaki? –itxa Xesosi.

⁶ Txamari kona ninoa apakapapiretari, kotxi atão Xesosi sãkire.

Kiiniri Kamakari Pirena

⁷ Iusaaki Xesosi itikana kãkiti. Apanakini mereẽri kãkiti apiatakari takote iitopãkini. Ininiã isãpiretari ia sãpirenatxi atão inakari oerekiko.

⁸ Kãkiti ìtaniriuatini kiiniriti pirena isãpireta:

–Kiiniriã hĩsikasaaki, kona himereẽpiri kãkiti apiatakari topãkiniãtaã hĩitopãkini, kotxi atxiĩti eereka kemaĩtxitakori apiatakari apoka. ⁹ Ininiã iua apiatakari apokasaaki, kakiiniriteri txaiko pite: “Ikiraã piitopãka. Ia kiki topãka nota takote.” Iusaaki pipẽtauata. Ininiã pitakanapari iuaã. Maparapeka apanakinikata topãka pitxa.

¹⁰ Kiiniriã hĩsikasaaki, apanakinikata hĩitopãka. Ikara atoko ininiã, kakiiniriteri akiritai: “Nitari uaimoni pina. Piitopãka uai. Uaira erekari.” Ikara atoko pininiã, apanakini iuaã auakani imarotariko pite apiatakari pininiãua. ¹¹ Ætikaka kãkiti txari: “Nota apiari nitxaua.” Txamari Teoso txariko: “Poiãori itxaua.” Ætipekana txari: “Nota poiãori nitxaua.” Txamari Teoso txariko: “Iua apiari itxaua.”

¹² Xesosi txari ikemaĩtxitakiri:

–Kiiniri pikamakasaaki, kona pikemaĩtxitapiri pinirimane, pitariakori, paõkimaneri, paapoko takote auakani, katzineiroteni pakini, ninoa iuaĩkana kemaĩtxitini pite ìkapani. Ininiã ikara atoko ninoa iĩkitxitai. ¹³ Apiaerekata kiiniri pikamakasaaki, pikemaĩtxitari kãkiti minakati mauakiniti, mokirini, matĩpokotakati pakini. ¹⁴ Ikara atoko pininiã, Teoso sikari erekari pitemoni, kotxi ninoa !iposotari kiiniri ikaminina, iuaritika kãkiti erekarini iuaĩkana õkitikasaakia, iusaaki Teoso ìkitxitaiko pite –itxa Xesosi sãkire.

Kiiniri Mitari Pirena

(Mateo 22.1-14)

¹⁵ Ininiã ãti Xesosikata nipokotakari kenakotari ikara Xesosi sãkire. Ininiã iua txari:

–Teoso auĩtetxi ininiãtaãua sikani nipokotako iuaã. Ininiã iusaaki Teoso sikapox-okonitana –itxari.

¹⁶ Ininiã Xesosi apakapapireta. Ia atoko itxa:

–Kiki kiiniri kamakari kemaĩtxitari itomaneri kãkiti. ¹⁷ Nipokori iposopeka inakasaaki, iokanatarari initiri ikemaĩtxitakinimoni: “Masa kiinirimoni. Iposopekari imakinika nipokori,” itxa.

¹⁸ –Txamari ikemaĩtxitakini kamari ãti sãkiretxi kiinirimoni imasikanina ìkapani. Ininiã kemaĩtxitakori txari: “Nota amotari itixi. Iua ninireka natini. Ininiã !niposotari nisini kiiniriã,” itxa.

19 –Ininiã äti: “Nota amotari tesi kema auïte parïkauatakani. Ininiã nota sari ninoamoni. Ninireka nimarotiniri ninoa parïka. Pauiritano nisini ninoamoni,” itxa.

20 –Ätipekana: “Nota ïtanorouatape. Nïtanoro auano nota. Ininiã kona niposota nisini pikiiniritemoni,” itxa.

21 –Ininiã initiri kanapiriã iauïtemoni. Ikinipoko ikemaïtxitakini säkire isäpireta iuamoni. Ininiã iuasaaki iua auïtetxi naiataua. Ininiã ipaniätari initiri: “Sïtatxi auakari kimaporitiã pisa. Katima pitxako. Piminana kãkiti minakati mauakini, matïpokotakani, mokirini pakini pimina,” itxari. 22 Ininiã katimaritika ikamari ikinika auïtetxi paniätakiti. “Nikamapekari ikinika pipaniätakiti, txamari auapanika nipokori. Apakatapanika kãkiti nikini ïkapani,” itxa.

23 –Ininiã iuaïkana, iua auïtetxi paniätari sitatxi mapara ötako isini. “Iuaã pakiritana kãkiti inini, naapoko kãkiti xãpokini ïkapani. 24 Atãopitikara nitxai: ‘Mitxi nikemaïtxitakini ïnikapaniri nikiena,’ ” itxa.

Xesosi Moianari Pininiua (Mateo 10.37-39)

25 Äti öti itomaneri kãkiti moianatari Xesosi. Ininiã ikirioka säpireta itxana ia säkiretxiti:

26 –Nota kinirão moianataka hinakasaaki, apiata hïtiretanoko nota. Merepanika hïtiretanoko nota, eereka hïtiretanako hïri, hinoro, hïtaniri, hïtanoro, hïtari, hïtaro, hamarite pakini. Hïteka apaka poião hïtiretauako. 27 Nota kinirão moianataka hinakasaaki, notakata hïsa. Himamïteenekakanisaakiri himisiritiko nota ïkapani, ininiã !apakata himoianatinino.

28 –Hinirekiniãri aapokotxi mitari sitatxi auakari atoko hïkamini, merepanika hïxinikaroko txineiro aapokotxi kamiko karone. Atxiïti !apakata hïtxineirote. Atxiïti apakata. Ikara atoko hïxinika merepanika. 29 Ikara maxinikati merepanika !ixinikari, ininiã atxiïti itakari itsota, ininiã eereka txineiro !auaika, ininiã kona apakata imakinika ikamini. Ininiã apanakini napetari iua. 30 Ininiã ninoa txari: “Hätamatariko ikamakiti. Iua kiki potorikamari ïkora aapoko, txamari !iposotari imakinika ikamini.” Ikara atoko itxanako. Ininiã pikamakiti apisapanika iteene hïxinikariko.

31 Ininiã eereka Xesosi säpiretari äti säkiretxi:

–Auïtetxi auari tesi mio sotato. Iua nirekari neenamatzxi ikamini äti auïtetxikata. Txamari äti auïtetxi auari vïtxi mio sotato. Iua tesi mio sotato auakiti merepanika xinikari, atxiïti iposota ineenamauatini vïtxi mio sotatokata? Atxiïti auïtetxi vïtxi mio sotato auakiti xipokari iua? Ininiã apisapanika ixinikari. 32 Imaposotakaniãri, vïtxi mio sotato ötakapanika auakasaaki, iua auïtetxi tesi mio auakiti iokanapireta äti auïtetximoni isãkirauatinina ïkapani, neenamatzxi xipokini ïkapani.

33 –Erekari iua auïtetxi neenamatzxi takanapakari atoko hinini. Ininiã merepanika hãkixinireë hïxinikariko: “Nota nirekatari nimoianatiniri Xesosi, kotxi pasãpaniri?” hïtxa. Atão hinirekiniãri himoianatinino, ininiã imakinika hïtakanapako notakata hïsini ïkapani. Himanirekakaniãri hïtakanapiniri imakinika, ininiã !apakata himoianatinino. Ininiã hïxinikariko merepanika –itxa Xesosi.

Iökira Matxoato Pirena (Mateo 5.13; Marko 9.50)

34 –Iökira peerekaro. Omatxoaniã, !otxaika. Aua kãkiti iökira potxoaro atoko inakani, ininiã erekapitikana ninoa. Apanakini kãkiti iökira matxoato atoko itxana. !Kakamarena ninoa. 35 Iökira matxoato ininiã, !apakata takari sikakienatiko ïkapani. !Apakata hïkoketiniri kipatxikata, pirãtxi tikakata takari sikakienatiko ïkapani. Kona erekaro. Maparamoni ökapeëkaika. Ikara atoko itxa apanakini, kotxi ninoa !kakamarena.

–Kakenakokii hïte, ininiã hïkenakotariko ia nisãkire.

15

Soti Auíte Ereëkokakari (Mateo 18.10-14)

¹ Āti ōti auītetxiakori txineirote apakapakani, apanakini maerekati kamakani apaka apotiitaua Xesosi sākire ikenakotinina ĩkapani. Ninoa kaiāopoko. ² Iuasaaki pariseoakori, kaiōkatsopareriakori pakini misākirepiretari Xesosi. Itxana:

—Iua apakapari maerekani. Maerekanikata inipokota —itxana.

³ Ikara isākirena xika Xesosi sāpiretari ipi, āti pakini sāpirenatxi atāo inakari oerekiko. ⁴ Ia atoko itxa Xesosi:

—Atxiīti pite aua seī soti auíte. Āti pīpinanakiniā, kipa pikama? Pitakanapari apanakini mapara inipokotiniātaā apanakini nīkatini ĩkapani. Ininiā eereka pisari pīpinanakakari pinitini ĩkapani. ⁵ Papokasaakiri iua pīpinanakakari, pipoxokoniua. Piporikiāpotari pipira paapokomoni. ⁶ Papokaāka atoko pakiritana paōkimaneriakori, apanakini kākiti pakini. Pitxana ninoa: “Hīpoxokoniuatoko notakata, kotxi napokapekari nīpira pīpinanakakari,” itxa soti auíte pitikiri.

⁷ —Nisāpiretai hīte, ātika maerekati kamakari takanapakasaakiri imaerekani, iaxiti Teoso auiniātaā auakani poxokoniuatapitikako. Atxiīti novēta novi kākiti iuikakanuia txari: “Peerekaua ate. !Akamari maerekati,” itxana. Txama kona atāo isākirena. Ninoa sākire kona kamari iaxitikini poxokoniuatini —itxa Xesosi.

Ota Pirata Kamakoro Ereëkokakaro

⁸ Apikomoni Xesosi txari:

—Sito aua tesi ota pirata kamakoro. Pakaronero. Āto ereëkokiniā, ininiā onitakasaakiro oiopotokakari tirikapi. Oiatīkaāpotari oaāpoko ota onitaāpotini ĩkapani. ⁹ Oa apokasaakiro, apanakini oākirita: “Hīpoxokonauatoko notakata. Napokapekaro ota ereëkokakaro,” otxa.

¹⁰ —Kākiti poxokoniua ota pirata kamakoro apokikosaaki. Nisāpiretai, iaxiti Teoso nitiriakori apiapoxokoniua, āti maerekati kamakari imaerekani itakanapakasaaki —itxa Xesosi.

Imi Ereëkokakari Pirena

¹¹ Apikomoni Xesosi txari:

—Aua kiki. Ipi imiakori. ¹² Maneri takari amanaāri iri. Itxari: “Ninirekari pitakanapakito pipīkasaaki pisikini notamoni uatxa,” itxa. Ininiā iri xanakari inakiti imiakorimoni. ¹³ Eereka mapaōti inaka atoko, iua ātokori apotiitari iri sikakiti. Ininiā eereka isipeka. Ōtakoxiti āti tixini isa. Iuaā maerekati ikama. Iuaā xipoka itxari iri sikiniri.

¹⁴ —Ikinika ixipoka iuaā. Iuasaaki āparaā !kipa. Natxipokoni auari. Nipokori !auari. Ininiā iuasaaki iua minakati !auari. Imakinika xipope. ¹⁵ Ininiā iuaxiti auakarimoni isa, parīkatxi amanaini ĩkapani. Ininiā ipatrāote paniātari iririakori isikakienatini. ¹⁶ Iririakori isikakienatakasaaki, natxinoka itxa. Iuasaaki iua nirekari iririakori kiena inikini, kotxi iua sikakienatakari !auari.

¹⁷ —Iuasaakiika ixinikari iri aapoko: “Niri nitiriakori aua nipokori. Nipokori itetakori auapitika. Uai natxinoka txapeno nota. ¹⁸ Nikanapiriāko niri aapokomoni. Nitxariko niri: ‘Maerekati nikamapeka Teosomoni, pitemoni apaka. ¹⁹ Kona pamarite na pitx-aikanoko, kotxi !erekano. Pitxīkitakano pinitiri nininiua.’ Ikara atoko nitxariko niri,” itxa. ²⁰ Ininiā iua aiamata, kanapiriā itxa iri aapokomoni. Iuasaaki iri iātapanātari iua ikiniōtika.

—Ininiā iua apokaāpotakasaaki, ōtakopanika, iri atapari iua. Ininiā iri miteēkata iuamoni. Ininiā iteene ipoxokoniua. ²¹ Iuasaaki imi txari iri: “Niri, maerekati nikamapeka Teosomoni, pitemoni apaka. Kona pamarite na pitxaikanoko, kotxi !erekano.”

²² –Iuasaakipeka iri akiritari initiriakori: “Katima hĩtxako, mākaxi ereri himinini. Aneo ereri hĩtakako iuakokimoni. Ikiti mata hĩtakako ikitiã. ²³ Kema auĩte kīiri hōkako. Kiiniri makamako. Manipokota. Mapoxokoniuaata, ²⁴ kotxi ia namarite ipĩkari atokopeka, uatxa iuaĩkana ikanapiripeka. Mitxi pĩpinanakakari atoko itxa, uatxa apokapeẽkaika,” itxa.

–Ininiã iuasaaki ninoamoni ipoxokoniuatini apopeka.

²⁵ Ninoa kiiniritauatakasaaki, imi aneẽkari tokoriã iparĩkauanãta. Ikanapiriãkasaaki aapokomoni, ikenakotari xikari, serẽkatxi ene pakini. ²⁶ Ininiã akiritari iri nitiri: “Kiripa ikara?” itxari. ²⁷ Iri nitiri apakapapireta: “Pitari apoka. Ininiã piri paniãtari kema auĩte okiko, kotxi erekapanikari pitari. Kona monõkari apoka iuamoni. Erekari ikanapiriini,” itxari.

²⁸ –Ininiã ikara ikenakotakasaaki, inaiataua. Kona inirekari ãroini kiiniriã. Ininiã iri iuamoni sa itxa. Akiritari: “Pĩroã,” itxari. ²⁹ Ininiã iua apakapapiretari: “Itori mitaãti niparĩkauatinapekai. Txama kona nota sipikapiretari pisãkire. Iuaritika kona pisikano potxi ãkiri nimoianariakorikata kiiniri nikamini ĩkapani. ³⁰ Iua pamarite xipokari pitxineirote. Sitokata isirĩka. Txama ikanapiriãkasaaki, pokari kema auĩte. Kiiniri pikama iua ĩkapani.” Ikara atoko itxitari iri.

³¹ –Iri apakapapireta: “Namarite, ãtipirika pauapika notakata. Ikinika nota nakiti pite nakiti txaua. ³² Erekapitikari kiiniri nikamini apoxokoniuatini ĩkapani, kotxi pitari ipĩkari atokopeka itxa. Uatxa auapanika. Pĩpinanakakari uatxa apokapeka,” itxari.

16

Nitiritxi Kamisirienereri

¹ Xesosi sãpiretana imoianariakori:

–Kiki ito tiitxi aua. Iua nitiri nĩkatari ikinika ipatrãote nakiti. Apanakini sãpiretari iua kiki, initiri iouanatiniri itxineirote. ² Ikara atoko ininiã, iua akiritari initiri: “Nikenakopiretari pite misirienetinino nota. Ininiã piminari tiitxi piamotiitini tsopa. Ikara pisikasaakino, niokanatai pisini. Kona apikomoni piparĩkauataika nota ĩkapani,” itxa.

³ –Ininiã initiri ãkixinireẽ: “Kipa nikama uatxa, kotxi nipatrãote paĩtiki iokanatano. !Kataparano nota, ininiã !niposotari atokatxi patapi niparĩkauatini. Nipẽtauata txineiro maxikatiĩka namanainiri kãkiti. ⁴ Uatxaika nimarotari nikamakiti tĩkane. Ininiã niparĩka xipokasaaki uai, kãkiti apakapapanikano nota ninoa aapokoã,” itxa.

⁵ –Ininiã akiritana kãkiti ipatrãote maĩkitxitakani. Ininiã ipimaãri ãti: “Kipakinipa ! piĩkitxitapanika nipatrãotemoni?”

⁶ –“Seĩ kopiti iĩtxi auakiti kona niĩkitxitapanika,” itxari.

–Ininiã iua nitiritxi txari: “Pikosekari pimaĩkitxitakinini tsopa. Pitakari sĩkoẽta kopitinoka,” itxari.

⁷ –Ininiã ãti ipatrãote maĩkitxitakari ipimaã: “Kipakinipa kona piĩkitxitapanika nipatrãote?”

–Iua apakapapiretari: “Seĩ atarokiri kotarina,” itxa.

–Itxari iua: “Pimaĩkitxitakinini tsopa pikoseka. Oitẽta kotarinoka pitaka,” itxa. Ikara atoko ikama ninoa ĩkapani, ininiã iparĩka itakanapaka atoko, ninoa apakapari iua ninoa aapokoã.

⁸ –Ininiã iua patrãote ikara imarotakasaaki, itsorĩkaãta: “Ari, ninitiri paimatireri. Maerekati ikama, iuaritika ikamakasaakiri, paimatireri iua,” itxa.

–Teoso sãkire mauiãkani imarotapitikari ixinikinirina parĩkatxi katana ikamak-itina. Atxiĩti Teoso sãkire auiãkani !imarotari ixinikinirina parĩkatxi katana ikamak-itina. ⁹ Nisãpiretai hĩte, ĩkorapokoriti hãuakasaaki, hĩxinikari ikara nitiritxi. Hĩsikari hĩtii, hĩtxineirote pakini Teoso parĩka ĩkapani, Teoso mimarotakani atão inakari imarotinina ĩkapani. Eereka atxiĩti Teoso mimarotakani moianatai. Eereka ninoa apaka imarotari aãri iaxitikiri. Eereka ãti õti haõkitana ninoa iaxiti.

¹⁰ —Axapitiki parĩkatxi atão pikaminiã, ininiã kãkiti auikariko piposotiniri parĩkatxi apiatakarĩ pikamini apaka. Axapitiki piĩtiriuata mitxi, ininiã eereka kaiãori piĩtiriuata. ¹¹ Txineiro uaimonipokoriti auakari himimarotakaniãri hinĩkatini, ininiã kona hĩposotari hinĩkatiniri erekari Teoso sikakiti. ¹² Apanakini tii pimanĩkatakaniã, ininiã kona kãkiti sikai tiitxi pinakiti inini ĩkapani.

¹³ —!Apakata kãkiti parĩkauatini ipi iauĩtena ĩkapani, kotxi atxiĩti ãti omanata, ãti itireta. Atxiĩti ãti apokaerekata, ãti inorita. Iua atokokana kãkiti kona posotari iparĩkauatini tiitxi ikinipoko iamotini ĩkapani, Teoso ĩkapani iparĩkauatakasaaki. !Apakata piauĩtetiniri Teoso, txineiro piauĩtetakasaaki —itxa Xesosi.

Teoso Sãkire Maxipokakani

(Mateo 11.12-13; 5.31-32; Marko 10.11-12)

¹⁴ Pariseoakori ikara ikenakotakasaakina, inapetarina Xesosi, kotxi ninoa iteene potxitaro txineiro. ¹⁵ Ininiã Xesosi sãkirauata ninoamoni:

—Hĩte txa apanakinimoni: “Ate !ikeroka. Peerekaua ate,” hĩtxa hĩsãkire. Txama Teoso imarotari hãkixinire. Kãkiti uãkatari erekari hĩkamini, txama Teoso omanatari hĩkamakiti.

¹⁶ —Kitxakapirĩka kãkiti auikari Teoso sãkire Moisesimoni sikakori, Teoso sãkire sãpiretakani sãkire pakini. Xoão kapatxisareri apoka. Iuasaaki Teoso iokanapirena erekari auĩtetxi ininiãua sãpiretaãka. Itomaneri iteene nirekari isini Teoso auĩtetxi ininiãtaãua ĩroini.

¹⁷ —Teoso sãkire !ixipoka. !ixipoka axapiti. Auapika imakinika isãkire. Itixi, iaxiti pakini xipokapitikako, iuaritika Teoso sãkire !ixipoka.

¹⁸ —Teoso sãkire iõkatakori kitxakapirĩkari auapanika uatxa. Ininiã ĩtanorotxi asikakari ãto itakini ĩkapani inakari, maerekati ikama. Apaka sito takanapakoro takakari maerekatikanera ikama. Ikara Teoso sãkire auapanika. Kona ixipoka ikara —itxa Xesosi.

Katiiri, Arásaro Pakini

¹⁹ Xesosi sãkirauatapanika. Ia atoko itxa:

—Aua kiki katiiri. Peereri imãka. Põkamarari imãka. Apiaerekata imãka. Ikiniõtika peerekari ikiena. Imakinika iua auakiti peerekari. Iua aapoko ikiniõtika kiinirisaaki auakari atoko itxapika ikiena.

²⁰ —Ãti kiki Arásaro inakori. Pamatinaniri. Minakati !auinari iua. Iua sirĩka katiiri aapoko patapi koa. Amianari aua iuamoni. Ininiã iĩto imakinika kakaro. ²¹ Kinirão nika inakasaaki, ixiti okakorinoka inika. Iuaã anãpa amerokari ikaro.

²² —Ikara atoko ininiã, eereka ipĩpe. Ininiã eereka Teoso nitiriakori iaxitikini anikari iua Teoso auinimoni. Kitxakapirĩka Apraão sari iuaã. Iuaã iua Arásaro aõkitari Apraão.

—Eereka iua katiiri apaka ipĩpe. Ikataãka. Isari maerekani misiritikoãtaã. ²³ Iuaã maerekani misiritikoãtaã auakasaaki, õtakoxiti atamatari Apraão, Arásaro pakini.

²⁴ Ininiã akiritari Apraão: “Toti Apraão, piamonĩkano. Pipaniãtariko Arásaro iãkiniri iuakoki iaã, tapikaka itxa ninamamoni. Ia xamina sikatsiitapitipono,” itxa.

²⁵ —Apraão apakapapireta: “Pixinikariko kãkitikata pauakasaaki, kaiãori pitii aua pite-moni. Arásaro auakasaaki, kona minakati auari iua. Arásaro auakasaaki, amianarinani, natxinani pakini auari. Uatxa iua poxokoniuanãtakasaaki, pite atatsitari pimisiritiko.

²⁶ Patamata ereẽ sauana auĩte. Kona ate posotari hĩtemoni asini. Hĩte apaka kona posota uaimoni hãpokini,” itxa Apraão.

²⁷ —Iuaĩkana katiiri: “Toti, pikenakotano. Pipaniãtariko Arásaro niri aapokomoni isini.

²⁸ Iuaã aua sĩko nitiriakori maneripanika inakanuia. Isãpiretanako: ‘Kona erekari uai. Erekari ia misirikaretxi auiniãtaã imĩkanina. Ininiã uatxa ikamarinako Teoso sãkire paniãtakiti,’ itxa katiiri.

²⁹ —Ininiã Apraão: “Ninoamoni auape Teoso sãkire, Moisesini sãpiretakiti, apanakini Teoso sãkire sãpiretakani sãpiretakiti apaka. Ininiã pitariakori posotari ikenakotinirina ninoa sãkire,” itxa Apraão.

³⁰ –Ininiã katiiri txari: “Toti Apraão, ikara atokonani !apakata. Ipĩkari kanapiriiniã ninoamoni, iusaakiikarako itakanaparina imaerekanina.”

³¹ –Ininiã Apraão: “Pitariakori !auikari Moisesini sãkire, apanakini Teoso sãkire sãpiretakani sãkire pakini. Ipĩkari kanapiriiniã ninoamoni, iuaritika ninoa !auikari Teoso sãkire. Ikara atoko ininiã, kona nipaniãtari Arásaro isini ninoamoni,” itxa Apraão.

Ikara atoko itxa Xesosi sãpiretakiti.

17

Maerekati Oerekakari

(Mateo 18.6-7, 21-35; Marko 9.42)

¹ Xesosi txari imoianariakorimoni:

–Aua maerekati oerekakani. Ninoa kãkiti kamari maerekati. Ikara atoko inakani apokapitikako. Ninoa xika kãkiti kamari maerekati. Maerekati oerekakari misir-itaãkapitikako. ² Teoso omanatari kãkiti maerekati oerekakani. Kãkiti txĩkitakiniãri amarini nota sãkire auiaãkari maerekati ikamini !apakata. Erekamariko iua kãkiti maerekati oerekakari kai mitariã iaxirikanokitaãkamako, ipoa apanĩkakiã okaãkamako ipinini ĩkapani. ³ Erepaniko. !Pikamapiriko maerekati. Pitari Xesosi sãkire auiaãkari kaminiãri maerekati pitemoni, põtãkikariko, imaerekani itakanapini ĩkapani. Itakanapiniãri, !pixinikapinikari ikara maerekati ikamakiti. ⁴ Atxiĩti ãti õti iua kamari maerekati pitemoni. Eereka iua pitemoni apoka. “!Erekari nikamakiti pitemoni. Pimaxinĩkaretariko maerekati nikamakiti. !Nikamaikari,” itxa. Ininiã ĩkora õti iuaĩkana maerekati ikama pitemoni. Iuaĩkana amanaãi imaerekani pimaxinĩkaretini tĩkane. Atxiĩti ĩkora õti setxikata ikara atoko ikama pitemoni, ininiã pimaxinĩkaretariko ikinika maerekati ikamakiti –itxa Xesosi.

Xesosi Sãkire Auikiko

⁵ Xesosi iokanatakini txari Xesosi:

–Pitxĩkitakaua ate apikomoni aãuikiniri Teoso sãkire –itxana.

⁶ Ininiã Xesosi txana:

–Mostata iki axapitiki. Mostata iki atokokana nisãkire poião hãuikiniã, iuaritika hĩposotapitikari hĩpaniãtiniri ia uasini aamina: “Pikotsakatika pimaporokauako. Ipoa-moni pitakauako.” Ininiã ikamapitikariko pisãkire iaõka –itxa Xesosi.

Nitiritxi Parĩka Pirena

⁷ Xesosi txari:

–Pinitiri tokoriã parĩkauatakari, pipiraakori inĩkatakari, apokasaaki paapoko, kona pitxa: “Pinipokota, pitomata.” Kona ikaraatoko pitxa. ⁸ Pitxari: “Auapanika parĩkatxi. Nipokori pikaminano. Xipoka atoko pisikakienatano. Piãtapari nota nipokotini, ininiã eereka pite nipokota.” Ikara atoko pitxa pinitiriakorimoni. ⁹ Pipaniãtakitinani ikama, ininiã kona pitxa: “Erekapitikari piparĩka,” kotxi pipaniãtakitinani ikama.

¹⁰ –Ininiã iua atokokanera itxa ikinipoko Teoso paniãtakiti pikamakasaaki. Kona apakata: “Erekapitikano nota,” pinini. Ia atoko atão pinini: “Nitiritxinani nitxaua. Poiãori nitxaua, kotxi niauĩte paniãtakitinani nikama.”

Xesosi Makananitinina Paiaka Matatakani

¹¹ Xerosareẽmoni Xesosi sikasaaki, inapari Samaria tõpa. Ipinimoni auari Kariréia tõpa. ¹² ãti aapokotxi apokaãpotakasaaki, aõkitana tesi kikiakori amianatakani paiaka matatakani. ¹³ Ikira atoko akiritarina:

–Xesosi, koerekareri, piamonĩkaua ate –itxana.

¹⁴ Xesosi atamatakasaakina, ipaniãtana ninoa Moisesini paniãtakiti iaõka ikaminina, sasetotximoni isinina, iĩtona oerekinina ĩkapani.

–Sasetotximoni hĩsako. Hõerekariko hĩto iuamoni –itxa Xesosi.

Iuamoni isaãpotakasaakina, ikinipoko ninoa erekapeka itxana. ¹⁵ Ninoa amianatakani erekapeka, txamari ãtinani kanapiriã Xesosimoni. Itapararitika akirita:

—Peerekari Teoso —itxa iua paiaka matatakari.

¹⁶ Ininiã ikapotoreẽkaua Xesosi apisatoõ.

—Notamoni pikamakiti peerekari —itxa.

Samaria tõpakiri iua kiki. ¹⁷ Ininiã Xesosi txari:

—Nota makananitana tesi kikiakori. Ìtapari apanakini? Auapanika novi kikiakori nimakananitakini. ¹⁸ Ia kiki Samariakiri. Ianokara kanapiriã, “Peerekari Teoso,” inini ìkapani. Ninoa Xoteo iua atoko !itxana —itxa Xesosi sãkire.

¹⁹ Ininiã itxari iua Samariakiri:

—Põkitikauako. Pisako. Pite auikari nisãkire, ininiãkara erekapekai —itxa Xesosi.

Kanatokopa Itxa Teoso Auĩtetxi Ininiãtaãua?

(Mateo 24.23-28, 35-44)

²⁰ Æti õti pariseoakori pimaãri Xesosi:

—Kirisaaakipa Teoso ikinimane auĩte inini õti apokatako? —itxana.

Ininiã Xesosi apakapapiretana:

—Teoso auĩtetxi inakasaakiaua, kãkiti !atamatari iua apokini. Teoso kãkiti auĩte inakasaaki, iua kãkiti ãkixinireẽ apoka. ²¹ Iuasaaki kãkiti !akiritari: “Uaikarari Teoso auĩtetxi ininiãtaãua. Ikiraãrari Teoso auĩtetxi ininiãtaãua.” Ikara atoko !itxana, kotxi hĩxinire ãkirari Teoso auĩtetxi ininiãtaãua —itxa Xesosi.

²² Ininiã itxa imoianariakorimoni:

—Apokako ãti õti nota hĩtari iaxitikiri iteene kinirão hãtamadini. Txamari !hãtamadano.

²³ Apanakini sãpiretaiko hĩte: “Ikiraãrari iua.” Æti sãpiretari: “Uaikarari iua.” Iuasaaki kona himaãkatapiri ikara atoko inakari sãkiretxiti. !Hãuikapiri ikara atoko inakari.

²⁴ Hĩtari iaxitikiri kanapiriãkasaaki, mẽkokari ãtiãtaã potarikini, ãtiãtaã apokini, iua atokokana nikanapiriini. Katimaritika napokako. Mẽkokari atoko nitxako napokini. Iuasaakiika ikinimane kãkiti atamadano. ²⁵ Nikanapiriini apisapanika, nota hĩtari iaxitikiri iteene ninikoriãriko nimisiritiko, kotxi kãkiti uatxa auakani kona nirekano. ²⁶ —Nota hĩtari iaxitikiri kanapiriãkasaaki, Noee auakasaaki atokokana itxapaniko. ²⁷ Noee auakasaaki, ikinimane nipokota. Iãta. Ìtanorouata. Ikara atoko itxapikana. Æti õti Noee, inirimanekata maporo ãki iĩroãna. Eereka imaiãtapakinitipanika ãparaã kipakata. Xãpoãkata. Ininiã xirataãtxi xipopena ikinimane. Ikara atokotxikana itxako nota kanapiriãkasaaki.

²⁸ —Aroo inakori auakasaaki atokokana itxako nota kanapiriãkasaaki. Iuasaaki ikini-
mane nipokota. Iãtana. Iamotiitana. Isikatiitana. Itakarauatana. Aapokona ikamana.

²⁹ Sotoma sitatxiti Aroo potarikini õti, iuasaakipeka xamina ãparaã kipini atoko itxa ikatxakini. Xamina miniki katxaka. Ininiã ikinipoko iuaãtaã ariãkata.

³⁰ —Iuasaaki kãkiti !imarotari xamina katxakini õti. Iua atokokana kãkiti !imaro-
tari nota hĩtari iaxitikiri apokini õti. ³¹ Napokini õti haãpoko mapara hãuiniã, kona hĩkanapiripe haãpokomoni hĩtii hãpini ìkapani. Tokoriã hãuiniã, kona !hĩkanapiripe haãpokomoni. !Apakata hĩkanapiriini iuaã. ³² Hĩxinikaroko Aroo ìtanoro. Kona oa atoko hĩtxape, kotxi oa ipina, kotxi !onirekari otakanapiniri sitatxi maerekani auiniãtaã.

³³ —Pite ãtipirika kaminiãri piteka nireẽkitinoka, ininiã pinireẽkiti xipokapitikako pitekata. Pite nireẽkiti xipokiniã, nota sãkire pauikini xika, pite auapininiika txako Teosokata.

³⁴ —Nikanapiriãkasaaki, ia atoko itxako. Nikanapiriini ìkanõkati atxiĩti ipi kãkiti imakanãta imakiniãtaãna. Iuasaaki Teoso sãkire auĩãkari sari notakata. Teoso sãkire mauĩãkati kaikota.

³⁵ —Iuasaakiko atxiĩti ipi sito kamanãtari atarokiri. Teoso sãkire auĩãkaro sari notakata. Teoso sãkire mauĩãkato kaikota.

³⁶ —Iuasaakiko atxiĩti ipi kiki kikiõ parĩkauata. Æti sa notakata, ãti kaikota —itxa Xesosi.

³⁷ Ininiã imoianariakori pimaãri:

—Namoniparako? —itxana.

Ininiã iua apakapapiretana:

—Aãtamatakasaakiri maiori apotiitiniãtaãua, ikinimane imarotari ipĩkari iuaãtaã auini. Iua atokokana ikinimane atamatariko kãkiti apotiitiniua notakata nikanapiriãkasaaki — itxa Xesosi.

18

Sito, Kãkiti Misiritiko Mereẽkari Pakini

¹ Xesosi misãkiretari imoianariakori ãti sãpirenatxi atão inakari oerekiko, Teoso misãkiretiko pirena. Ikara inakari oerekari kãkiti ãtipirika imisãkiretiniri Teoso, Teoso misãkiretiko imatakanapakani ãkapani. ² Xesosi sãpiretari ia sãkiretxiti:

—Sitatxi auari kãkiti misiritiko mereẽkari. Iua kona paxitari Teoso. Kona ipaxitari kãkiti apaka. ³ Iuaã sito apaka aua. Õtaniri ipĩpe. Tikinitakoro otxaua. Oa nirekari iua atão ikamini oa misiritakarimoni. Txamari iua kãkiti misiritiko mereẽkari !ipotxitari omokaiakari pirena ikenakotini. Osãpiretapikari iuamoni: “Pikenakotariko nisãkire. Pikamariko atão nota misiritakarimoni. !Nimĩteenekaikari nota misiritakari apikomoni misiritinino,” otxa.

⁴ —Isãpakapekari ãtipirika osãkire ikenakotini. Ininiã eereka ixinikari: “Atãopitikara, kona nota paxitari Teoso, kãkiti pakini. Iuaritika nikamariko onirekakiti, kotxi ⁵ ãtipirika oa tikinitakoro amanaãnãtano, ininiã nikamaãkaretxitaro. Ininiã nikamariko onirekakiti, kotxi nisãpakapekaro osãkire. ãtipirika ikara atoko otxanãtapikano. !Nimĩteenekaikari,” itxa kãkiti misiritiko mereẽkari.

⁶ Ininiã Xesosi txana imoianariakori:

—Ikara kãkiti misiritiko mereẽkari kona erekari, iuaritika ikamari osãkire iaõka. ⁷ Teoso apiaerekata. Ininiã ikenakotapitikari imereẽkini sãkire pokamara, ãkanõka. Ninoã amanaãri Teoso imoianatinina. Ininiã apiata Teoso kenakotari isãkirena. Patimari Teoso kenakotiniri imereẽkini amanaãkiti. ⁸ Nisãpiretai, patimari Teoso misiritinina ninoã misiritakani. Ia nipimaãi. Nota hĩtari iaxitikiri iuaĩkana nikanapiriãkasaaki, atxiĩti napokari nisãkire auiãkani ãkorapokoriti? —itxa Xesosi.

Pariseo, Txineiro Apotiitakari Pakini

⁹ Iuikakaniua !apokaerekatari apanakini. Ninoamoni, ninoanokara kamari atão. ãti õti Xesosi sãpiretari ia sãpirenatxi atão inakari oerekiko, kãkiti ikara atoko inakanimoni atão imarotinina ãkapani:

¹⁰ —Ipi kiki sari Teoso misãkiretiko aikitimoni. ãti kiki pariseo itxaua. ãti kiki auĩtetxiakori txineirote apakapakari itxaua. Iteene iua misiritari kãkiti, kotxi kãkitimoni imakatzakaro apikomoni txineiro. Kona atão imakatzaka. Imisiritari kãkiti. ¹¹ Iuaã pariseo tima Teoso imisãkiretini ãkapani. Txama iuaka imisãkiretaua. Ia atoko itxa isãkire: “Teoso, nota poxokopitikano, kotxi nota apanakini atoko kona nitxa. Kiĩtiriri !nitxaua. Kãkiti misiritakari kona nitxaua. Kona nota sirĩka ãti ãtanorokata. Kona nota ia txineiro apakapakari atoko na nitxa. Konapitini. ¹² Ikini semanati, ipi õti nitakanapari ninikini pite nimisãkiretini ãkapani. Txineiro nisikai. Tesi txineirota auiniãno, ãtoka nisikai, ininiã pipaniãtakiti iaõka nikama,” itxa iua pariseo.

¹³ —Iuasaaki txineiro apakapakari ikira atoko itima. Kona ionakaãta iaxiti. Iaritari itorota imaerekani oerekini ãkapani, kotxi maerekati ikamapeka. Itxari Teosomoni: “Teoso, piamoniãkano. Kona erekano nota, kotxi maerekati kamakarino nota,” itxa txineiro apakapakari.

¹⁴ Ininiã Xesosi txari:

—Atãopitikara nisãkire. Ikara inakari kiki Teoso kamaerekata. Isikasaaki iua aapokomoni, erekari itxapekua. Iua pariseopekana, Teoso !ikamaerekatari iua.

—Iuikakariua, poiãori itxauako. Poiãoripekana, apiatakari itxauako —itxa Xesosi.

Amarini Apokini Xesosimoni
(Mateo 19.13-15; Marko 10.13-16)

¹⁵ Āti ōti kākiti minari amarini Xesosimoni erekari ninoamoni itakini ĩkapani. Txamari Xesosi moianariakori atapakasaakiri kākiti imiakori mĩkani, isipikapana.

—Hĩkanapiripeka. Hĩsipeka —itxana.

¹⁶ Txamari Xesosi txari imoianariakori:

—Hāuiritanako amarini notamoni apokini. !Hĩsipikapapena amarini, kotxi nitiretapi-tikana ninoa. Nisākire auĩākani auikari nisākire amarini auikini atoko. Kākiti nisākire amarini auikini atoko inakaninokara apoka Teoso auĩtetxi ininiātaāua. ¹⁷ Amarini auikari iri sākire. Ininiā hĩxinikariko ia: Amarini atoko himinakaniā, Teoso sākire iteene himauikakaniā, ininiā Teoso auĩtetxi ininiātaāua !hĩroā —itxa Xesosi.

Kiki Katiiri Pirena
(Mateo 19.16-30; Marko 10.17-31)

¹⁸ Xoteo auĩte pimaāri Xesosi:

—Koerekareri erekari, kiripa nikama Teosokata ātipirika nauini ĩkapani? —itxa.

¹⁹ Xesosi txari iua:

—Kininiāpa “erekari,” pitxano? Kākiti erekari !auari. Teosonanira erekari. ²⁰ Pite imarotapitikari Teoso paniātakiti: “!Pisirĩkape āti ĩtanorokata. !Pokaniuatape. !Pĩtiriuatape. Apanakini !pimisirienetape. Piri, pinoro pakini pipaxitako.” Ikara atoko pimarotapeka —itxa Xesosi sākire.

²¹ Ininiā iua kiki apakapapiretari:

—Nota axapitipanika ninakasaaki, nikĩpitari ikara atoko inakari sākiretxiti Teoso paniātakiti —itxa.

²² Xesosi kenakotakasaakiri iua kiki sākire, itxari:

—Auapanika ātinoka pikamini tĩkane. Ikinika pitii pivētxitako, eereka oa txineiro pisikanako minakati mauakinimoni. Eereka pisa notakata. Ikara atoko inakari pikaminiā, Teoso tixine papokasaaki ikinipoko erekari auiniiko pite —itxa Xesosi sākire.

²³ Iua kiki ikara ikenakotakasaaki, imatinaniuata, kotxi iua iteene katiiri itxaua.

²⁴ Xesosi atamatakasaakiri iua matinaniuatini, itxari:

—Pamimari katxineiroteri auĩtetiniri Teoso. ²⁵ Atauako kamero napatari ākorike sonakiā? Apia mimari kākiti katxineiroterini auĩtetiniri Teoso —itxa Xesosi.

²⁶ Ikara inakari kenakotakani txari:

—Pamimari pisākire. Ininiā kiripa apoka Teoso auiniātaā? —itxana.

²⁷ Ininiā Xesosi txana:

—Kākiti maposotakinini Teoso posota ikamini —itxa Xesosi.

²⁸ Ininiā Petro txari:

—Ate takanapapekari ikinipoko pitekata asini ĩkapani —itxa.

²⁹ Ininiā Xesosi txari:

—Atāopitikara, ininiā ia atoko nitxai hĩte. Pauini pitakanapiniā, pĩtanoro, pitariakori, piri, pinoro, pamariteakori pakini pitakanapiniā, Teoso auĩtetxi ininiāua pirena pisāpiretini ĩkapani, ³⁰ ininiā ĩkorasaaki apiata erekari papakapa. Ininiā āti ōti pipĩkasaaki iaxiti papokasaaki, pauapininiika pitxako —itxa Xesosi.

Iuaĩkana Xesosi Sāpiretari Ipinini
(Mateo 20.17-19; Marko 10.32-34)

³¹ Āti ōti Xesosi anikari imoianariakori ikira atoko, misākireta itxana:

—Uatxa Xerosareēmoni asa. Kitxakapirĩka Teoso sākire sāpiretakani sāpiretapekari nota hĩtari iaxitikiri pirena. Ninoa sākire iōkatsopatakina paĩtiki apokapitikako, ³² kotxi nisikaākako Xoteo minakonimoni. Ninapetaākako. Nimisākirepiretaākako. Niki-isokaākako. ³³ Niaritaākako. Eereka nokaākako. Ipi, āti pakini ōtisaaki iuaĩkana nōkitikaua —itxa Xesosi.

³⁴ Xesosi moianariakori !imarotari isãkire. Ikara sãkiretxi kipatakori atoko itxa. Ininiã kona ninoa imarotari isãkire.

Mõsiãreti Xesosi Makananitini
(*Mateo 20.29-34; Marko 10.46-52*)

³⁵ Xesosi apokaãpota Xerikoo sitatxiti takote. Mõsiãreti kimapori tiniãpo iitopãkanãta. Amanaãnãtaro txineiro. ³⁶ Ikenakotari kãkiti kimaporiã napakani, ininiã:

—Kiripa ikara? —itxa.

³⁷ —Xesosi Nasaree sitatxitikiri, iuara napaãpota —itxana apanakini.

³⁸ Ininiã iua mõsiãreti akirikata:

—Xesosi, Taviini apika mekanirii, piamonĩkanoko —itxa.

³⁹ Ninoa ĩkiikakani txitari iua:

—!Pakiripoatape —itxana.

Txama iteene iua akirikata iuaĩkana:

—Taviini apika mekaniri, piamonĩkano —itxari.

⁴⁰ Ininiã Xesosi iotoka. Amanaãna kãkiti:

—Ere kiki himina notamoni —itxa Xesosi.

⁴¹ Xesosi takote apokasaaki, Xesosi pimaãri:

—Kipa pinireka nikaminii pitemoni?

—Kõsiãrepeka ninini ninireka —itxari.

⁴² Ininiã Xesosi txari:

—Kõsiãrepekai uatxa, kotxi pauikari nisãkire —itxa.

⁴³ Iuasaakipeka iua kiki kõsiãrepeka itxa. Ininiã iua saãpota Xesosi tikini. Teoso ereka inini pirena isãpireãpota. Ikinimane kãkiti itikasaakiri Xesosi kamakiti iuamoni.

—Peerekari Teoso —itxana.

19

Sakeo Pirena

¹ Xesosi Xerosareẽmoni isikasaaki, Xerikoo sitatxiti apanĩkaki inapaãpota. ² Iuaã aua kiki, Sakeo inakori. Iua katiiri. Iua kãkiti txineirote apotiitakari auĩtetxiakori ĩkapani. Apanakini txineiro apotiitakani auĩte itxaua. Iua misirienetari kãkiti. Imakatzakari txineiro auĩtetxiakori ĩkapani. Txamari apikomoni imakatzaka. Kona atão ikamakiti. ! Erekar iua.

³ Xesosi apokasaaki Xerikoo, iua Sakeo nirekari Xesosi atamatini. !Apakata atamatiniri, kotxi paĩtiri iua. Itomaneri kãkiti Xesosi ĩtinikata auanãta. Ininiã !apakata mõtãnoti atamatiniri iua. ⁴ Ininiã imiteka Xesosi apisa, aaminaã kanĩka itxa. Xesosi iuaã napakasaaki, iposotari itikiniri. ⁵ Xesosi apoka iua aamina patapi. Ionakaãta itxa. Itxari:

—Sakeo pikatzaka, katima pitxa. Uatxa, paapokomoni nisako, nianapokotini ĩkapani —itxa Xesosi.

⁶ Ininiã katzaka katimapeka itxa. Ipoxononiritika iua apakapari Xesosi. ⁷ Ikinimane iuaã auakani misãkirepiretari Xesosi. Itxana:

—Xesosi sari maerekati kamakari aapokomoni. Kininiãpa iua sa iua aapokomoni? —itxana.

⁸ Ininiã iua aapoko apoãka atoko, Sakeo tima isãkirauatini ĩkapani. Ininiã itxari Xesosi: —Ipixini ninakiti nisika matiinimoni. Niĩtirĩkakiti iuaĩkana nisikanako kãkiti. Txineiro niĩtirĩkiniã, ininiã iuaĩkana ipi ipi pakinikata nisikariko nimisiritakinimoni —itxa Sakeo.

⁹ Ininiã Xesosi:

—Ia kiki Apraão apika mekaniri apaka. Uatxa imaerekani makatzakaãka, kotxi itakanapari maerekati ikamakiti. ¹⁰ Kãkiti itari iaxitikiri apoka ĩkorapokoriti kãkiti pĩpinanaãkani inisini, imaerekani imakatzakini ĩkapani —itxa Xesosi.

Nitiritxi Erekar, Nitiritxi Maerekati Pakini
(*Mateo 25.14-30*)

¹¹ Eereka Xesosi sãpiretari ia sãpirenatxi atão inakari oerekiko. Oerekari ia sãpirenatxi, kotxi Xerosareẽ ninoa apokaãpotã. Kãkiti uãkatari paĩtiki Teoso ikinimane auĩte ininiua.

¹² Ia atoko itxa:

–Kiki aiamatapeka õtakoxiti isini, auĩtetxi ininiua ãkapani. Iua nirekari isini, ininiã eereka inirekari ikanapiriini. ¹³ Ininiã isini apisapanika akiritari tesi initiriakori. Isikanapana txineiro tesi ota oro kamakoro. Ætoka isikaãpotana initiriakori. Itxa: “Nota ãtiãtaã nauakasaaki, hiamotari tiitxi. Eereka pivẽtxitari apikomoni txineiro hãpakapini ãkapani. Ikara atoko hĩtxako,” itxa.

¹⁴ –Isipeka atoko kãkiti iuaã auakani !inirekari iua auĩtetxi ininiua, kotxi omanatarina. Ininiã ninoa iokanapireta iuamoni: “Ate !nirekai pite aãuĩte pininiua,” itxana ninoa.

¹⁵ –Iuasaaki iua ãtiãtaã auĩtetxi ipeka itxaua. Ikanapiriãkasaaki akiritana initiriakori, txineiro isikanapakini. Ininiã iua txana ninoa: “Hõerekano txineiro apikomoni hãpakapakito,” itxa. ¹⁶ Æti initiri apoka iuamoni. “Nipatrãote, pite sikanapano ãtoka ota. Uatxa tesipeka ota aua notamoni,” itxa.

¹⁷ –Iuasaaki auĩtetxi txari iua: “Pite kamakiti peerekari. Pite ninitiri erekari. Ætonoka ota nisikapekai, iuaritika piparĩka peerekari. Uatxa tesi pakini sitatxiti auakani auĩte pitxauako,” itxa.

¹⁸ –Ætipekana apoka auĩtetximoni: “Æti ota pisikanapano nota. Uatxa sĩkopeka ota aua notamoni,” itxa initiri.

¹⁹ –Ininiã auĩtetxi txari: “Erekapitikari. Ininiã sĩko pakini sitatxiti auakani auĩte pitxauako,” itxari.

²⁰ –Ætipekana apoka auĩtetximoni: “Oniã pinakito txineiro. Mãkatxi mataã niapirikaro, poteta nitxaro pitxineirote. ²¹ Nota pĩkai pite. Pataparaxinirei. Nimarotari pite amotari ãti kamakiti. Piamotari pikiena ãti kãkiti kiena,” itxa.

²² –Ininiã iua auĩtetxi apakapapiretari: “Pite ninitiri maerekati pitxaua. Pite txano nota kiki kataparaxinireri nitxaua. Pimarotari niamotiniri ãti kamakiti. Pimarotari niamotiniri ãti kãkiti kiena. ²³ Ikara atoko ininiã, pimanirekakaniãri piparĩkauatini, kinirepa kona pisikataro nitxineirote pãkomoni? Pisikaãkamaroko, napakapamaroko apikomoni nitxineirote nikanapiriãkasaaki,” itxa auĩtetxi.

²⁴ –Ininiã iua paniãtana iuaã auakani: “Himakatxakaroko nitxineirote iuamoni nisikakito. Hĩsikaro tesi ota auakitimoni,” itxa.

²⁵ –“Auapeka tesi ota iuamoni,” itxarina.

²⁶ –Ininiã auĩtetxi apakapapiretana: “Piparĩkauatiniã, ininiã pinakiti itori aua, ininiã apikomoni papakapa. Pite iarinouatiniã, ininiã ikara xika pinakito poião. Æti õti piarini xika ikara poiãori makatxakaãkako apaka. ²⁷ Uatxa himinana notamoni nimokaiakariakori, kotxi ninoa !inirekano nota iauĩtena nininiua. Hõkana ninoa nota apisatoõ,” itxa auĩtetxi.

Xesosi Xerosareẽ Apokaãpotini

(Mateo 21.1-11; Marko 11.1-11; Xoão 12.12-19)

²⁸ Ikara inaãka atoko, Xesosi sari imoianariakori apisa Xerosareẽmoni.

²⁹ Xerosareẽmoni isikasaakina, apokaãpotana Petxipaxee, Petãnia pakini aapokotxiti. Ninoa ipi aapokotxi Oriva inakori xirata takote. Iuaã auakasaaki, Xesosi iokanatanã ipi imoianariakori aapokotximoni.

³⁰ –Ikira aapokotximoni hĩsa. Iuaã hãpokariko xomẽta ãkiri, iaxiriãkori. Iua xomẽta ãkiri kãkiti maitopãkakotipanika inakori. Hĩkoxiripatakariko iua. Himinari notamoni.

³¹ Ipitikiri akiritiniã: “Kinirepa hĩte koxiripatakariko nipira?” inakasaakii, ia atoko hĩtxariko: “Apiananiri nirekari iua,” hĩtxako –itxana.

³² Iuaã apokasaakina, ikinika Xesosi sãkire iaõka auapeka. ³³ Ninoa koxiripatakasaakiri xomẽta ãkiri, ipitikiri apoka.

—Kinirepa nipira hīkoxirika? —itxa.

³⁴ Ininiã ninoa:

—Apiananiri nirekari iua —itxana.

³⁵ Ininiã anikarina xomēta ākiri Xesosimoni. Imoianariakori takari imākana xomēta nopini. Imoianatarina Xesosi xomēta nopini iitopākini ĩkapani.

³⁶ Xesosi saāpotakasaaki Xerosareēmoni, apanakini kākiti matameēkari imākana kima-poriāpo Xesosi napini ĩkapani. ³⁷ Ōtanoxiratarī Oriva inakori iokiriītakasaaki, ninoa imakinika ipoxokoniritikana akiripoakatana, kotxi itikapekarina itori Teoso posotiire.

³⁸ —Peerekari auītetxi, Apiananiri iokanatakiti kākitemoni. Teoso takari erekari iua-moni. Ininiã Teoso !omanataikari kākiti. Peerekari Teoso, iaxiti apiko nopinixiti auakari. Apiananiri itxaua —itxanātana ninoa iuasaaki.

³⁹ Iuaã kākiti itomaneri sauaki aua pariseoakori apaka. Ninoa txari Xesosi:

—Koerekareri, piotokakana pimoianariakori ikara isākirena.

⁴⁰ Ininiã Xesosi:

—Atāo ninoa akiritakiti. Ininiã !nipinitana iotokakiniri. Nimauiritakaniãna isākirena nota Apiananiri nininiãua, ininiã Teoso txīkitakari kai soro sākirauatini ikara sākire isāpiretini —itxa Xesosi.

Xesosi Txiapata Xerosareēkini Itiretini

⁴¹ Ninoa apokaāpotakasaaki Xerosareē, Xesosi Xerosareē atamatakasaaki, iua txiapata, kotxi iuaã aua mirikiniti kākiti isākire maukakani. ⁴² Ixinikasaakina Xerosareē auakani itxa:

—! Himarotari hīkamakiti tīkane hāuini ereka inini ĩkapani, neenamatchi mauakani ĩkapani. Ninirekari himarotiniri, txamari uatxa ikara himarotini kipataāka himimarotakaniri ĩkapani. ⁴³ Āti ōti himokaiakarini ākitai hīte. Ininiã kona kākiti pokīka sitatxi, kona ĩroã. Iuasaaki himitekini !auari. Hākitapeēkaikako. ⁴⁴ Himokaiakarini xipokariko ia sitatxi. Ikinimaneko okaākako. Kai āti kai nopini auakari !ikaikotaika. Imakinika xipope. Iua atoko inakari auako, kotxi hīte !apakapari Teoso hītemoni apokasaaki.

Pirātxi Vētxitakani Omitikiko

(Mateo 21.12-17; Marko 11.15-19; Xoão 2.13-22)

⁴⁵ Xesosi apokasaaki Xerosareē, isari Teoso misākiretiko aikotiã. Iuaã auari kākiti tiitxi vētxitakani, ininiã Xesosi omitikana. ⁴⁶ Xesosi txana ninoa:

—Teoso sākire iōkatsopatakori txari:

Ia naapoko, “Teoso misākiretiko aikoti” akiritaākako, itxa. Txamari hīte txīkitakari ia aiko kiītiririni iomaātiniãtaã ininiua —itxa Xesosi.

⁴⁷ Teoso misākiretiko aikoti āki ikiniōtika oerekarauata. Iuasaaki sasetotxi auīteakori, kaiōkatsopareriakori, kākiti auīteakori pakini kinirāo okaka txari Xesosi. ⁴⁸ Txamari ito-maneri kākiti potxitari Xesosi oerekakiti sākiretxiti. Ininiã ninoa kaikotapika Xesosikata ikinika isākire imarotinina ĩkapani. Ikara xika !iposotarina okiniri iua iuasaaki.

20

Xesosi Paniātakari Moerekakoni

(Mateo 21.23-27; Marko 11.27-33)

¹ Xesosi Teoso iokanapirena erekari isāpiretakasaaki Teoso misākiretiko aikoti āki, iuasaaki sasetotxi auīteakori, kaiōkatsopareriakori, kākiti auīteakori pakini apoka. ² Ninoa pimaãri Xesosi:

—Pite omitikana tiitxi sikakani Teoso misākiretiko aikotiã auakani. Kipaniãpa pikamari ĩkora pikamakiti? Kipa paniãtai? —itxana.

³ Ininiã Xesosi txana:

—Nota apaka pimarauatako hītemoni. Ātinoka nipimaãiko hīte. Ininiã hāpakapapiretano.

⁴ “Kipa paniãtari Xoãoni ipatxisarauatini? Teosokani paniãtari Xoão? Kākitikani paniãtari Xoão?” —itxa Xesosi.

⁵ Eereka ninoakakarini isãkirauatana:

—Kanatokopa atxa? “Teosora,” aniniã, ininiã ipaniãtamaua eereka: “Kinirepa kona hãuikatari Xoão sãkire?” itxamaua ate. ⁶ “Kãkitira paniãtari Xoão,” aniniã, ininiã kãkiti kiporonakauako ate kai soroã, kotxi ninoamoni Xoão Teoso sãkire sãpiretakari itxaua. Ininiã kanatokopa atxa? —itxakakauana.

⁷ Ininiã eereka ninoa apakapapiretari Xesosi:

—Kona ate imarotari —itxana.

⁸ Eereka Xesosi txana:

—Ininiã nota apaka kona nisãpiretai nipaniãtakiri uãka —itxa Xesosi.

Parĩkauatakani Maerekani

(Mateo 21.33-46; Marko 12.1-12)

⁹ Eereka Xesosi sãpiretari kãkiti ia sãpirenatxi atão inakari oerekiko. Ia atoko itxa:

—Aua kiki. Itakari amãtiiri ova inakoro. Ovanoka itaka ikikioteẽ. Eereka iĩkitxitana kãkiti itakare nĩkatakani. Eereka isari ãti tixini. Iuaã mapakanani ikaikota. ¹⁰ Oamiko manapi iokanatarini itiri apakapiniri ipixini amãtiiri. Txamari amãtiiri nĩkatakani noropatari iua nitiri. Ininiã eereka iokanatarina iua. Kona axapiti amãtiiri anika ipatrãotemoni. ¹¹ Ininiã iuaĩkana ãti itiri iokanata. Iuaĩkana ninoa noropatari iua itiri. Imisiritarina. Eereka iokanatarini iua. Kona axapiti amãtiiri anika ipatrãotemoni. ¹² Iuaĩkana ãti itiri iokanata ikikiotemoni. Iuaĩkana ikarotarina, iokanata itxarina. Kona anikari axapiti amãtiiri iuamoni. ¹³ Iua katakareri txari: “Kipa nikamaã? Ari, uatxa nimarotapekari. Namarite nitiretakiti niokanatako ninoamoni. Ninoa paxitapitkariko iua,” itxama.

¹⁴ —Amãtiiri nĩkatakani atapari amãtiiri takakari ãkiri apokaãpotini. Ininiã itxana: “Katakareri ãkiri ina. Katakareri ipĩkasaaki, iua ãkiri apakapari ikinika. Ininiã maõkari iua. Ininiã ikinika itakare aua atemoni,” itxana.

¹⁵ —Ininiã ninoa kosekaĩtotari katakareri ãkiri, mapara okaĩtota itxarina. Ininiã okapirina.

Ininiã Xesosi pimaãri kãkiti iuaã auakani:

—Kiripa iua katakareri kamaã? ¹⁶ Iua okanako ikinipoko ninoa. Itakare apanakini-moni sika itxako —itxa Xesosi.

Kãkiti kenakotakasaakiri ikara pirena itxana:

—Ikara atoko inakari !anireka —itxana ninoa.

¹⁷ Ininiã Xesosi iteene atamatana.

—Ininiãkara natokopa itxa Teoso sãkire iõkatsopatakori oerekiniua?

Aapokotxi kamakani kona nirekari ãtika kai soro. Iua kai imanirekakiniti kai apiari itxapekaua. Apanakini kai soro maĩkakarini itxaua.

Itxa Teoso sãkire iõkatsopatakori. ¹⁸ Kãkiti mãkititiniã iõkora kai xika, ikarotaãka. Iõkora kai irikiniã kãkiti nopini, pomoĩpeka itxana. Ininiã eereka aãpani itxaua —itxa Xesosi.

Homano Auĩte Iĩkitxitiko

(Mateo 22.15-22; Marko 12.13-17)

¹⁹ Iuasaaki Xesosi sãkirauatakasaaki, sasetotxi auĩteakori, kaiõkatsopareriakori pakini, nirekari maĩkiniri Xesosi, okinirina iõkapani, kotxi ninoamoni ikara Xesosi sãpiretakiti oerekari kãkiti ninoa nirekiniri okiniri Xesosi. Txamari !imaĩkarina, kotxi ipĩkarina apanakini kãkiti. ²⁰ Ikiniõtika ninoa itikapikarina Xesosi sinimoni imarotinina iõkapani. Ininiã ninoa iĩkitxitari kamĩkapirirerini Xesosi imisãkiretinina iõkapani. Ninoa nirekari Xesosi kerokiniri isãkire. Ikerokiniãri, iposotarina anikiniri auĩtetxiakorimoni okinirina iõkapani. ²¹ Ininiã ninoa kamĩkapirirerini apoka Xesosimoni.

—Koerekareri, ate imarotari atãopitikara pisãkire. Pite oerekari ikinipoko kãkiti atão Teoso nirekiti kamiko. Poerekakiti sãkiretxiti kãkiti apiarinimoni, iuatxikana poerekari kãkiti poiãorini. ²² Atãokani txineiro asikini Homanoakori auĩtemoni, Sesa inakorimoni? Apakata amasikakaniro iuamoni? —itxana ninoa.

²³ Xesosi imarotari ninoa nirekari ikerokiniri isãkire, ininiã iua txana:
—Kinirepa hãtamakaerekatano nota? ²⁴ Poerekano txineiro ota. Kisanõkapa ia? Kiuãkapa aua uai? —itxa.

Ininiã ninoa:

—Sesa sanõka, iuãka apaka aua —itxana.

²⁵ Ininiã Xesosi:

—Hĩsakariko Sesamoni iua nakiti. Hĩsakariko Teosomoni iua nakiti —itxa Xesosi.

²⁶ Ninoa nirekari Xesosi kerokiniri isãkire kãkiti apisatoõ, txamari ! ikerokari. Ininiã ninoa tsorĩkaãta Xesosi apakapapiretakiti ikenakotakasaakina. Apikomoni ! isãkirauataikana.

Ipĩkari Õkitikiniua Mauikakoni

(Mateo 22.23-33; Marko 12.18-27)

²⁷ Ikara inaãka atoko, apoka satoseoakori inakoni. Satoseo kona auikari ipĩkari iuaĩkana õkitikiniua. Ninoa misãkiretari Xesosi. ²⁸ Itxana:

—Koerekareri, kitxakapirĩka Moisesini iõkatsopataria atoko inakari: “Kiki meenetipanika ipininiã, iua itari takaroko tikinitakoro. Iua itari keene ininiã, itakauãkatari amarini iua itarini ipĩpekarini uãka,” itxa Moisesini. ²⁹ Setxi itaritxiakori aua mitxi ĩkorapokoriti. Apia kiomanetakari ĩtaniriuata. Meenetipanika ipina. ³⁰ Itari takaro iuani tikinitakito. Iua apaka ipina meenetipanika. ³¹ Iuaĩkana ãti itari takaro oa. Iuaĩkana ipina meenetipanika. Iua atokotxikana itxana imakinikana itariakori. ³² Eereka oanipekana opĩpe apaka. ³³ Ipĩkani õkitikasaakia, kiripa oĩtaniri? Kotxi ikinikana takapekaro oa —itxana.

³⁴ Ininiã Xesosi:

—Uatxa ĩkorasaaki kãkiti ĩtaniriuata. ³⁵ Teoso nakitiakori iuaĩkana õkitikasaakia, ! ĩtaniriuataikana. ³⁶ Ninoa !ipinaika, kotxi Teoso nitiriakori iaxitikini atoko itxauanako. Iuasaaki Teoso anaakori atoko itxauana, kotxi Teoso õkitikapekana ninoa. ³⁷ Hĩte kerokari hĩsãkire. Hĩte sãkire txari: “Ipĩkani !õkitikaikaua.” Moisesini oerekaua ipĩkani iuaĩkana õkitikapanikaua. Iua iõkatsopatakasaakiri aamina tirinakari pirena, isãpiretari Teoso sãpiretakiti. Ia atoko itxa Teoso iuasaaki: “Nota Apraão Teosone, Isaki Teosone, Xakoo Teosone pakini nitxaua,” itxa Teoso. ³⁸ Ininiã ninoa Apraão, Isaki, Xakoo auapanika, kotxi Teoso !ipĩkani Teosoneni. Auãki inakani Teosonera iua, kotxi iuamoni ikinimane auãkipanika —itxa Xesosi.

³⁹ Eereka ãtikaka kaiõkatsopareriakori txari:

—Koerekareri, atãopitikara pisãkire —itxana.

⁴⁰ Ikara inaãka atoko kãkiti pĩkarauata apikomoni ipimarauatini.

Teoso Mereẽkiti Tavii Apika Mekaniri Itxaua

(Mateo 22.41-46; Marko 12.35-37)

⁴¹ Ininiã Xesosi pimaãna:

—Kinirepa isãpiretaãka Teoso mereẽkiti Taviini apika mekaniri ininiua? ⁴² Kotxi Taviini iõkatsopata Xikari aãtsopateẽ. Itxari:

Apiananiri txari niauĩtemoni: “Nota kikomoni piitopãka.

⁴³ Piitopãkiniritika nixipokariko pimokaiakariakori. Nikamariko ninoa pikiti pitakiniãtaã atoko ininiua.”

Itxa Taviini xikare. ⁴⁴ Taviini akiritari Teoso Mereẽkiti “Niauĩte.” Ininiãkara kanatokopa iua Tavii apika mekaniri? —itxa Xesosi.

Kaiõkatsoparerini Maerekani

(Mateo 23.1-36; Marko 12.38-40)

⁴⁵ Eereka kãkiti apisatoõ Xesosi õtãkikana imoianariakori. ⁴⁶ Ia atoko itxa:

—Erepaniko, kaiõkatsoparerini misirienetini. Ninoa ieretakari mãkatxi ĩtanori, peereri, apanakini atamatinina ĩkapani. Tĩtxi amotikoãtaã ninoa potxitari kãkiti

ninoakata sãkirauatini apanakini atamatinina ìkapani. Ninoa potxitari iitopãkinina auñtetxi topãkiniãtaã aiko ãki Xoteo apotiitiniãtaãua. Kiinirisaaki ninoa nirekari apiari topãkiniãtaã iitopãkinina. ⁴⁷ Kiki ipĩkasaaki, ninoa misiritaro tikinitakoro. Ninoa mixirikari oaãpoko, iuaritika imisãkiretarina Teoso. Teoso imisãkiretakasaakina, kaiãori sãkiretxi isãkiretana. Ininiã apanakini kenakotakasaakiri, ninoa xinikari: “Atão iua imarotari Teosokata isãkirauatini,” itxana. Txamari Teoso kamaãkaretxitana, ininiã apiata imisiritaãkanako.

21

Tikinitakoro Matxineiroto Sikakito (Marko 12.41-44)

¹ Xesosi sãkirauatakasaaki Teoso misãkiretiko aikoti ãki, itikari katiirini takiniro itxineirotena kaixa ãki Teoso ìkapani. ² Iuasaaki oãua tikinitakoro matiito. Õtaniri !auaika. Oa sikaro ipi txineiro ota okinika oamoni auakaro. ³ Ininiã Xesosi txa:

–Atãopitikara, okira sito sikari apiata. ⁴ Kotxi apanakini sikaro itxineirotena itetakito. Okira sikari okinika onakito –itxa Xesosi.

Teoso Misãkiretiko Aikoti Irikiko (Mateo 24.1-2; Marko 13.1-2)

⁵ Æti õti Teoso misãkiretiko aikoti ãki aua Xesosi imoianariakorikata. Aiko ereri pirena isãkirenãtana.

–Uai peereri. Ere kai sorokiniri paretxiã auakari pakaronepokori. Patamatari kãkiti sikakiti Teosomoni –itxana.

⁶ Ininiã Xesosi txana:

–Ari atãopitikara peerekari. Txamari apokapitikako ãti õti ia aiko irikiko ìkapani. Iuasaaki kai ãti kai nopini auakari !auaika. Ikinipoko irikaãkako –itxa Xesosi.

Misirikaretxi Apokaenetini (Mateo 24.3-14; Marko 13.3-13)

⁷ Ininiã ninoa pimaãri:

–Koerekareri, kirisaakipa ikara atoko inakari auapani? Kiãtokopa itxa ia aiko Teoso misãkiretiko irikini õti manapi aimarotini ìkapani –itxana.

⁸ Ininiã Xesosi apakapapiretana:

–Erepaniko, xipokatxi õti apokaãpotakasaaki, kãkiti nirekari imisirienetini hñte. Ito aãpirena auako. Kaiãopokori kiki sãkire: “Teoso mereëkitikarano nota. Nota apokapeka uai,” itxamana. Paxirari ninoa sãkire. !Himaãkatapena ninoa. !Himoianatapena ninoa.

⁹ Neenamatsiene hñkenakoenetakasaaki, !hñpĩkarauatape. Iua atoko inakari merepanika auako. Iuasaaki xipokatxi õti !apokapanika –itxa Xesosi.

¹⁰ –Æti uãka kamari neenamatsi ãti uãkakata. Æti auñtetxi sotatoneakori neenamauata ãti auñtetxi sotatoneakorikata. ¹¹ Iuasaaki xipokatxi õti apisa, nota apokini apisa, itixi iakeëkatoko. Natxi auako. Itori amianari auako. Apaka kãkiti atamatakiti iaxiti kamapĩkaretana.

¹² –Ikara inakari apisa, apanakini maĩkaiko hñte. Himisiritaãkako. Xoteoakori anikaiko aiko Xoteo apotiitiniãtaãua Xoteoakori auñte apisatoõ apoñtiniina ìkapani. Hñtakaãka kateia ãki. Ninoa anikaiko hñte itixi auakani auñteakorimoni hñte apoñtinina ìkapani. Iua atokokanerako hinaãkako nisãkire hñuikini xika. ¹³ Iuasaaki auñtetxiakori apisatoõ hñuakasaaki, hñsãpiretariko Teoso iokanapirena erekari. ¹⁴ Ninoa himisãkiretini apisa, maerekaxiniretika ! hñtxape. Kona hñpĩkarauatape, ¹⁵ kotxi ninoa apisatoõ hñuakasaaki, nota sikaimaroretai hñte, ininiã himokaiakariakori !iposotari apakapapiretiniina hñte. !Iposotarina isãpiretiniina: “Kona atão pisãkire,” !itxana. ¹⁶ Hinoroma, hñrima, hñtariakorima, apanakini hinirimanema, haõkimanerema pakini sikaiko hñte himokaiakariakorimoni. Ætikaka hñte okaãkako iuasaaki. ¹⁷ Ikinimane omanataiko hñte nisãkire hñuikini xika. ¹⁸ Iuaritika Teoso !auiritari ãtika hiãko maporokiko, kotxi Teoso itene

nĭkatapitikaiko hĭte. ¹⁹ Himĭteenekiniāri ikinika himisiritiko, ininiā Teoso txĭkitakaiko ātipirika iuakata hāuapininiika hinini ĭkapani –itxa Xesosi.

Xerosareē Xipokiko Pirena
(Mateo 24.15-28; Marko 13.14-23)

²⁰ Apikomoni Xesosi txari:

–Hātamatakasaakiri sotatoakori ākitiniri Xerosareē, iusaaki himarotariko pakotapaniri sitatxi xipokini. ²¹ Iusaaki hĭte Xotéia tōpa auakani himitekako oxiratarimoni. Sitatxi hāuiniā, ininiā himitekako. Mapara hāuiniā, kona hĭkanapiripe sitatximoni, ²² kotxi iusaaki kākiti misiritiko ōti apoka. Teoso sākire iōkatsopatakori sāpiretapekari ĭkara ōti apokini. ²³ Iusaaki !erekapaniri sito kamixiro ĭkapani, kaxitakarero ĭkapani, kotxi omitekini !apakata. Xoteo auiniātaā auapitikako iteene imisiritikona tĭkane, kotxi iusaaki Teoso oerekari iua omanākare Xoteoakorimoni. ²⁴ Itomaneri kākiti okaākako saasara atoko inakaroā. Apanakini anikaākako ikini uāka tixinemoni. Xoteo minakaniua xipokariko sitatxi Xerosareē. Teoso auritana ninoa kaikotini iuaā. Eereka Teoso xipokariko ninoa tapara. Eereka !auaikana –itxa Xesosi.

Kākiti Itari Iaxitikiri Kanapiriini
(Mateo 24.29-31; Marko 13.24-27)

²⁵ Apikomoni Xesosi txari:

–Nota uai apokini apisa, atokatxi, kasiri, iōriki pakini oerekariko kākiti nota iposope uai napokini. Apaka potxoari uiniti auari tsakati mitari. Iua tsakati miramaneri iene. Ikara xika itixi auakani kamaxirexinirepeka itxanako. ²⁶ Kākiti ākipa iotokako ipĭkare xika. Itixi misiritiko xika ipĭkarauata, kotxi iōriki, ikinika iaxiti auakani iakeĕkatakako. ²⁷ Iusaaki nota, hĭtari iaxitikiri katxakaāpota katxiārikata. Iusaaki ikinimane atapanoko nota. Iusaaki kaposotiireno nota. Niotximerekata napoka uai. ²⁸ Ikara itixi misiritiko apokaāpotakasaaki, haiamatako. Hionakaātako, kotxi paĭtiki nota kanapiriā hĭte napini ĭkapani. Iusaaki nimakatzakai hĭte ikinika maerekati auiniātaā –itxa Xesosi.

Piko Mina Pirena
(Mateo 24.32-35; Marko 13.28-31)

²⁹ Xesosi sāpiretari āti sāpirenatxi atāo inakari oerekiko. Itxari:

–Hĭxinikari aamina piko inakori. Apanakini ātiāo aamina apaka hĭxinika. ³⁰ Pooĭoporipeka onakasaaki, otomorekasaaki, “Kamoĭ apokanapanoka,” hĭtxa. ³¹ Iua atokokana ikara misirikaretxi mixikanani nisāpiretakiti hĭtikasaaki, iusaaki himarotariko paĭtiki Teoso ikinimane auĭte itxauako.

³² –Ia nisākire atāo. Itixi auakani !ixipoka ikinipoko nisāpiretakiti mapokakani apisa.

³³ Iaxiti xipokapitikako. ĭkoraxiti apaka xipokapitikako. Iuaritika nota sākire !ixipoka.

Iātapakori Ōti Pirena

³⁴ –Erepaniko, maerekaxiniretika kona hĭtxape. ! Hĭsarauatape. ! Hĭpoātape. Hĭparĭkanoka ! hĭxinikapeko, kotxi hĭsarauatiniā, hĭpoātiniā, hĭparĭkanoka hĭxinikiniā, ! hĭxinikari nikanapiriini ōti, kotxi ĭkora ōti himimarotakani ōtisaaki, napokako. Erepaniko, kotxi txikatoro atoko itxa napokini. Kākiti !imarotapaniri napokini ōti. ³⁵ Imakinika kākiti itixi auakani imarotariko napokini iusaaki. ³⁶ Hiātapariko nikanapiriini. Ātipirika himisākiretariko Teoso. Hamanaāriko Teoso ikara inakari mamisiritakanii hĭte. Hamanaāriko Teoso himapĕtauatakani ĭkapani hĭtari iaxitikiri apokasaaki iua apisatoō hĭtimakasaaki –itxa Xesosi.

³⁷ Ikiniōtika Xesosi sari Teoso misākiretiko aicotimoni Teoso sākire oerekini ĭkapani. Ikiniōtika mapiānikata Xesosi sari ōtanoxiratarimoni, Oriva inakorimoni. ³⁸ ĭkanōkapanika kākiti apoka Teoso misākiretiko aikotiā Xesosi sākire ikenakotinina ĭkapani.

22

Satanasi Īroã Xotasi Xinireẽ

(Mateo 26.1-5, 14-16; Marko 14.1-2, 10-11; Xoão 11.45-54)

¹ Kaiamapeka Páskoa inakori kiiniriti apokini. Iua kiiniriti Xoteoakori nikari pão matireẽkati. ² Iuasaaki sasetotxi auĩteakori, kaiõkatsopareriakori pakini nirekari Xesosi okinina, txamari, ninoa pĩkari apanakini kãkiti, kotxi ninoa apokaerekatari Xesosi.

³ Iuasaaki Satanasi Īroãtotari Xotasi Isikariotxi inakori. Iua Xotasi Xesosi moianarika-mara, apanakinikata. ⁴ Iuasaaki iua sari sasetotxi auĩteakorimoni, Teoso misãkiretiko aikoti nĩkatakani auĩteakorimoni. Iuasaaki isãkirauata ninoakata Xesosi imĩkapiritini ĩkapani. Iuasaaki ninoa xinikaxitita:

—Kiãtokopa itxatari Xesosi isikini atemoni?

⁵ Sasetotxi auĩteakori enenĩka. Ninoa txari Xotasimoni:

—Pisikasaakiri Xesosi atemoni, aĩkitxitaiko pite —itxana Xotasimoni.

⁶ —Ateeneka —itxa Xotasi.

Ikara atoko inaãka atoko Xotasi iãtapari isikiniri õti manapi. Inirekari kãkiti mauakanisaaki, Xesosi imĩkapiritini.

Páskoa Kiiniriti Kamiko

(Mateo 26.17-25; Marko 14.12-21)

⁷ Iuasaaki kãkiti parĩkauata Páskoa kiiniriti ikaminina ĩkapani. Iua kiiniriti auakasaaki, itotarina pão matireẽkati inikinina. Iuasaaki okarina soti auĩte ãkiri kiinirisaaki iniãkitina ĩkapani. ⁸ Xesosi paniãtana Xoão, Petro pakini:

—Hĩsako. Hãpotiitariko nipokori Páskoa kiiniriti ĩkapani —itxa.

⁹ Ininiã ninoa:

—Namonipa akamatari kiiniri? —itxana.

¹⁰ Ininiã Xesosi:

—Xerosareẽmoni hĩsa. Iuaã hĩtikari kiki kaminiri sito parĩka. Iua apaãnãtari ãparaã. Kopiti ikiiã anikanãta. Iua aõkitaiko hĩte. Iuakata sa hĩtxako. Hĩĩroã aapokotxi iua ĩroiniãtaã. ¹¹ Himisãkiretari kauiniri. Hĩtxariko iua: “Koerekareri nirekari imarotiniri: ‘Namonipa ianapokotakani kaikotiniãtaã iriko? Iuaã inirekari inapiniri Páskoa õti imoianariakorikata,’ hĩtxariko iua.” ¹² Iuasaaki kauiniri oerekai itanokiri koa mitari iuaã kiiniri ĩkapani. Imakinika tiitxi iposope. Iuaãrako hãpotiitari imakinika Páskoa kiiniriti ĩkapani —itxa Xesosi.

¹³ Ininiã sa itxana. Apoka itxarina ikinika Xesosi sãkire iaõka. Ininiã iuaã ninoa maiamatari kiiniri.

Xesosi Īto, Iarẽka Pakini

(Mateo 26.26-30; Marko 14.22-26; 1 Korĩto 11.23-25)

¹⁴ Ininiã Páskoa kiiniriti potarikasaaki, Xesosi imoianariakorikata topãka. ¹⁵ Ininiã Xesosi txana:

—Iteene ninirekari hĩtekata ninikiniri ia nipokori Páskoa kiiniritisaaki, natatsiirauatini apisa. ¹⁶ Ia atoko inakari nipokori !ninkaikariko hĩtekata. Teoso ikinimane auĩte inakasaakiua, iuasaakiikarako ninikapitkariko iuaĩkana.

¹⁷ Eereka iua kosekari iãtatxi koana ovaã iãriãti. Ininiã itxa:

—Niri, erekapitkariki ia pisikakiti —itxari Teoso.

Eereka itxana imoianariakori:

—Ia iãriã hãpakapako. Hĩkinika hiãtariko. ¹⁸ Atão nisãpiretai. !Niãtaikaroko ovaã, Teoso ikinimane auĩte iminakanisaakiua. Teoso ikinimane auĩte inakasaakiua, iuasaakiikarako iuaĩkana niãtariko ovaã —itxa Xesosi.

¹⁹ Eereka ikosekari komiri:

—Erekapitkariki ia komiri pisikakiti atemoni —itxari Teoso.

Eereka imapixinikaãpotari, sikaãpota itxana imoianariakori:

—Ia niĩto okaãka hĩte ĩkapani. Ia komiri hinikasaaki, hĩxinikanoko nota. Hĩxinikari nipinini hĩte ĩkapani.

²⁰ Inikaãkarina atoko, ikosekaro ovaã. Isikana imoianariakori. Ininiã itxa:

—Ia niarêka xiketakari makatxakariko hïte maerekani. Teoso sãpiretapekari kãkiti ikamaenetakiti amaneri kãkiti ïkapani. Ia niarêka oerekari kãkiti, Teoso kamapekari ikamaenetakiti. ²¹ Iua nimïkapiritakiri uatxa uai topãka notakata. ²² Nota hïtari iaxitikiri okaãkako. Teoso sãkire iökatsopatakori sãpiretapekari nipinini tïkane. Nota hïtari iaxitikiri mïkapiritakari iteene misiritaãkako —itxa Xesosi.

²³ Xesosi moianariakori ninoakakarika isãkirauatana:

—Kipa sikatari Xesosi imokaiakariakorimoni? —itxanãtana.

Kiripa Apiatakari?

²⁴ Ikara atoko inaãka atoko Xesosi moianariakori misãkiretakakaua.

—Kiripa apiatakari txatapaniuako ate sauaki? —itxana.

²⁵ Ininiã Xesosi:

—Xoteo minakaniua auïteakori itapasãkireritika ipaniãtana Xoteo minakaniua iauïtena nireëkiti ikaminina ïkapani, iuaritika ninoa sãkire, “Peerekaua ate. Ate moianatari kãkiti,” itxana. ²⁶ Hïte kona ninoa atoko kona hïtxape. Atxiïti apiari pitxaua hïte sauaki, ininiã amarini atoko pitxauako. Auïtetxi pininiãua, nitiritxi atoko pitxauako. ²⁷ Kiripa apiatakari txataua? Auïtetxi nipokori nikakarikani, apiatakari txatauako? Initiri nipokori kamakarikani apiatakari txatauako? Ikinimane kãkiti imarotari nipokori nikakari apiatakari itxaua. Txamari nota auakasaaki kãkiti sauaki, nitiritxi atoko nitxaua, kotxi kãkiti nimoianata.

²⁸ —Xoteoakori misiritakasaakino nota, kona hïte takanapano. Atão nimoianariakori hïtxaua. ²⁹ Niri, auïtetxi txïkitakapekano nota. Ininiã iua atokokana nota txïkitakai hïte auïtetxi hininiua. ³⁰ Nota auïtetxi ninakasaaki, hinipokota, hiãta hïtxako notakata. Auako auïtetxi topãkini hïte ïkapani. Ininiã iuasaaki hïpaniãtana tosi nirimanetxi Isaeo auakani ikamakitina tïkane —itxa Xesosi.

Xesosi Sãpiretari Petro Kipatiniri Iua

(Mateo 26.31-35; Marko 14.27-31; Xoão 13.36-38)

³¹ Xesosi sãkirauata Simão Petromoni:

—Simão, Simão, Satanasi amanaãpekari Teoso pite, apanakini apaka atamakaerekatini ïkapani. Ahoisi misiritiko atoko inirekari imisiritinii pite. ³² Iuaritika, nota misãkiretapekari Teoso isikataparatiniri pixinire Simão, nisãkire atão pauikini ïkapani. Pikerokariko pikamakiti, iuaritika pikanapiriãpitika nota sãkire iteene iuaïkana pauikini ïkapani. Eereka pisikataparaxiniretanako pitariakori nota sãkire auiaãkani —itxa Xesosi sãkire.

³³ Petro txari Xesosi:

—Niauïte, nota iposope nitxa kateiamoni nisini pitekata. Pitekata iposope nitxa nipinini —itxa.

³⁴ Xesosi txari:

—Atão nisãpiretai. Ia ïkanõkati patari sãkirauatini apisapanikako, ipi ãti pakinikata, “! Nimarotari iua,” pitxanoko —itxa Xesosi.

Xesosi Ôtãkikana Imoianariakori

³⁵ Eereka iuaïkana Xesosi sãkirauata imoianariakorikata:

—Mitxi nota iokanatai kãkitimoni. Iuasaaki kona nisikai txineiro. Kona nisikai sako mata. Kona nisikai sapato, iuaritika minakati auinii atxiïti? Erekari hïsini ikinika hinirekakiti mauakanisaaki? —itxa Xesosi

—Minakati !auinaua ate —itxana.

³⁶ Ininiã Xesosi txana:

—Txamari uatxa pitxineirote, sakora pakini auiniãi, panika. Iouata mitaro mauakanisaakii, pimãka inopinikiri pivëtxitako iouata piamotini ïkapani. ³⁷ Teoso sãkire iökatsopatakori kitxakapirïka txari:

Imaïkaãka, kokaniri maïkiko atoko inaãkako.

Ininiã ikara nimaĩkiko apokapitikako. Ikara nota pirena kitxakapirĩka atãopitika –itxa.

³⁸ Imoianariakori txari:

–Apiananiri, patamata. Uai aua ipi iouata aneenamauatini ĩkapani.

Xesosi txari:

–!Apakata ĩkara atoko inakari hĩsãkire –itxa Xesosi.

Xesosi Misãkiretiniri Teoso Xetsémani Inakoriãtaã
(Mateo 26.36-46; Marko 14.32-42)

³⁹ Eereka ixirata auĩte Oriva inakorimoni isa, kotxi itotapekari iuaã isini. Imoianariakori sari iuakata. ⁴⁰ Iuaã apokasaakina, Xesosi txana:

–Satanasi nirekari maerekati hĩkamini. Ininiã himisãkiretariko Teoso, iua sikataparatinii, Satanasi nirekakiti himakamakani ĩkapani –itxa Xesosi.

⁴¹ Ininiã iuaã itakanapana imoianariakori. Apikoxãki axapiti sa itxa. Iuaã ikapotreẽkaua, misãkireta itxari Teoso. ⁴² Itxari:

–Niri, !pauiritapeno paĩtiki natatsiirauatini, iuaritika kona pikamapiri nota nirekaãkiti. Pite nirekaãkiti ninireka nikamini –itxa Xesosi.

⁴³ Iuasaaki Teoso nitiri iaxitikiri apoka iuamoni isikataparaxiniretiniri ĩkapani.

⁴⁴ Iuasaaki Xesosi xinire kamaxirepeka. ãkixinireẽ apokapeka itsii. Ininiã iteene imisãkiretari Teoso. Ininiã iinĩkakare arẽkatxikata tapika ixitimoni.

⁴⁵ Teoso imisãkiretaka atoko, õkitikaua, imoianariakorimoni isa. Iua apoka ninoamoni. Imakapoanãtana, kotxi isãpakapekana imatinaniuatinina xika. ⁴⁶ Ininiã akiritana:

–Kinirepa himakanãta? Hõkitikaua. Himisãkiretari Teoso, Satanasi nireẽkiti himakamakani tĩkane –itxa Xesosi.

Xesosi Maĩkiko Pirena
(Mateo 26.47-56; Marko 14.43-52; Xoão 18.1-11)

⁴⁷ Xesosi sãkirauatakasaaki imoianariakorikata, itomaneri kãkiti Xotasikata apoka. Xotasi mĩkiikana ninoa Xesosi oerekini ĩkapani. Iua Xotasi Xesosi moianarikamara, apanakinikata. Xotasi apokasaaki apitxokari Xesosi. ⁴⁸ Ininiã Xesosi txari iua:

–Xotasi, pimĩkapiritatari pitari iaxitikiri papitxokasaaki? –itxa Xesosi.

⁴⁹ Xesosi moianariakori imarotakasaakiri kãkiti nirekiniri Xesosi imaĩkini, itxana:

–Apiananiri, erekari atxiĩti uatxa aneenamauatini, aiouataneẽ –itxana.

⁵⁰ Ininiã ãti Xesosi moianari sauakari sasetotxi auĩte apiatakari nitiri kĩpita ikikomoni.

⁵¹ Ininiã Xesosi:

–Hĩitoka ĩkara. Iaõpe.

Eereka Xesosi takapiotaua ikĩpitaã. Iuasaaki kakĩpitapeka itxa iuaĩkana. ⁵² Sasetotxi auĩteakori, kiomãtxiakori pakini ina Xesosi imaĩkinina ĩkapani. Xesosi txari ninoamoni:

–Kinirepa himinari iouata, piriri pakini himaĩkinino ĩkapani? ⁵³ Ikiniõtika hĩtekata naua aiko Teoso misãkiretikoã. Iuasaaki kona hĩte maĩkano. ĩkanõka hina, kotxi ipiaã hĩkamari maerekati –itxa Xesosi.

Petro Kipatari Xesosi Imarotini

(Mateo 26.69-75; Marko 14.54, 66-72; Xoão 18.15-18, 25-27)

⁵⁴ Ininiã ninoa maĩkari Xesosi, anika itxarina sasetotxi auĩte apiatakari aapokomoni. ĩroãna aapoko ãki. Ininiã Petro sari ninoa tikini. ⁵⁵ Sasetotxi aapoko takote apoka. Iuasaaki mapara xamina pokitakori aua. Kãkiti topãkanãta xamina takote. Irokanãtana. Ininiã Petro topãka ninoa takote. ⁵⁶ Iuasaaki ãtokoro atamatari iua xamina kamaraã. Ininiã itakote oãpoka. Omixinitari iua:

–Ia kiki Xesosikata auakari –otxa.

⁵⁷ Txamari Petro txari:

–Ãtokoro, kona nimarotari iua –itxa.

⁵⁸ Eereka ãti atamatari iua. Itxari iua:

–Pite Xesosi moianarikalari? –itxari.

Txamari Petro:

—Konapitini —itxa.

⁵⁹ Āti oara napa atoko āti txari:

—Atāopitikara, ikira kiki Xesosi moianaripitikara, kotxi Kariréiakiri itxaua iua —itxa.

⁶⁰ Petro txari:

—Kona nimarotari ikara pisāpiretakiti.

Iuasaaki, isākirauatakasaaki, patari sākirauata. ⁶¹ Iuasaaki Xesosi saporika, atamata itxari Petro. Iuasaaki, Petro xinikari mitxi Xesosi sāpiretakiti: “Patari sākirauatini apisapanikako, ipi āti pakinikata, ‘!Nimarotari iua,’ pitxanoko” ininiri iaōka aua. ⁶² Ininiā eereka Petro sipe. Iteene txiapata itxa.

Sotatoakori Napetiniri Xesosi

(Mateo 26.67-68; Marko 14.65)

⁶³ Xesosi nīkatakani napetari, noropata itxarina Xesosi. ⁶⁴ Iuasaaki iaxirikaokitarina iua, ninoa imatamatakani ĩkapani. Iuasaaki noropata itxarina.

—Kimarorei pite. Kiripa noropatai? —itxana.

⁶⁵ Itomaneri maerekati sākiretxitiā itxitarina Xesosi. Inapetiniri !iotoka.

Xesosi Xoteo Auñteakori Apisatoñ

(Mateo 26.57-68; Marko 14.53-65; Xoño 18.19-24)

⁶⁶ ĩkanōkapanika kiomātxiakori, sasetotxi auñteakori, kaiōkatsopareriakori pakini apoti-itaua. Iuasaaki Xesosi minaāka ninoamoni.

⁶⁷ —Pisāpiretaua ate, Teoso mereēkitikai pite? —itxarina.

Ininiā Xesosi apakapapiretana:

—Nisāpiretiniāi, !hāuikari nisākire. ⁶⁸ Nipimarauatiniā, hīte !apakapapiretano. Apaka ! hāuiritari nisikakiko. ⁶⁹ Pañtiki hñtari iaxitikiri topākako Teoso kaposotiireri kikomoni —itxa Xesosi.

⁷⁰ Ininiā iuañkana ninoa pimañri:

—Teoso ākirikai pite? —itxarina.

Ininiā Xesosi apakapapireta:

—Atāopitikara hñsākire. Iuapitikarano nota —itxa.

⁷¹ —Iaōpekara. Akenakotapekari isākire. Ininiā apikomoni isākire kenakotakani ! anirekaika, kotxi ateka kenakotapekari iua sākire maerekati —itxana.

23

Xesosi Pirato Apisatoñ

(Mateo 27.1-2, 11-14; Marko 15.1-5; Xoño 18.28-38)

¹ Ininiā imakinika ninoa anikari Xesosi Piratomoni. ² Ininiā iuañ ikamarina aāpirena. Apoñtarina Xesosi:

—Ate kenakopiretari oerekiniri kākiti maerekati ikamini, kotxi iua òtākikari kākiti, kākiti miñkitxitakaniri Sesa, Homano auñte apiari. Apaka itxa: “Teoso mereēkitino nota. Auñtetxi apiatakari nitxaua,” itxa iua sākire.

Txamari na atāoni ikara atoko itxana ninoa. Ikara atoko ninoa apoñtari Xesosi. Kona atāo ninoa sāpiretakiti. ³ Ininiā Pirato pimañri Xesosi:

—Pitekani Xoteoakori auñte txataua? —itxari Xesosi.

—Iuapitikarano nota —itxa Xesosi.

⁴ Ininiā Pirato txana sasetotxi auñteakori, kākiti pakini:

—!Napokari maerekati ikamakiti —itxa.

⁵ Iuañkana apoñtarina:

—Iua oerekana kākiti maerekati ikamini auñtetxiakorimoni. Kariréia tōpamonira iporika. Uatxa uaipekarari iua —itxana.

Xesosi Erotxi Apisatoñ

⁶ Pirato kenakotakasaakiri isãkirena, ipimaãna:

—Ia kiki Kariréiakirikani?

⁷ —Ari iuapítikara —itxana.

Ikara Pirato imarotakasaaki, iokanatari Xesosi Erotximoni, kotxi Kariréia tōpa auakani auíte itxaua Erotxi. Iuasaaki iua ianapokota Xerosareẽ. Ininiã Pirato iokanatari Xesosi Erotximoni, kotxi Xesosi Kariréiakiri.

⁸ Erotxi kenakopiretapekari Xesosi pirena. Ininiã iua aõkitakasaakiri Xesosi, poxokope itxakata, kotxi inirekari Xesosi oerekiniri iposotiire. ⁹ Ininiã iteene ipimaãri Xesosi, ikamakiti imarotini ïkapani. Txamari Xesosi !apakapapiretari iua. ¹⁰ Iuasaaki sasetotxi auíteakori, kaiõkatsoparerini pakini iteene apoítari Xesosi. Ikinika ninoa sãkire aãpirenanoka. ¹¹ Eereka Erotxi, isostatoneakori pakini napetari Xesosi. Ieretakarina auítetxi mãka maparakiri apiata inapetinirina ïkapani.

—Hãtamatar ere. Auítetxi itxaua —itxana.

Eereka iuaĩkana iokanatarina Piratomoni. ¹² Mitxi Erotxi, Piratokata omanatakakaua. Ikara õti ninoa apokaerekatakakaua.

Xesosi Okiko Nirekiko

(Mateo 27.15-26, 11-14; Marko 15.6-15; Xoão 18.39-19.16)

¹³ Ininiã eereka Pirato apotiitari sasetotxi auíteakori, Xoteo auíteakori, apanakini kãkiti pakini. ¹⁴ Ininiã itxa:

—Hĩte minari ia kiki notamoni. Hĩte apoítari iua imisirienetiniri kãkiti. Hĩte apisatoõ nipimaãpekari ikamakiti pirena. Notamoni kona maerekati !ikama. ¹⁵ Erotxipekana ! apokari maerekati ikamakiti, ininiã iokanatari iua notamoni iuaĩkana. Inipítikara iua erekari, txamari hĩte nirekari okiko maxikatiĩka. ¹⁶ Ininiã nota paniãtari inoropatiko aãpitsa aamata kamakoriã. Eereka niokanatari isini.

¹⁷ Iuasaaki Pãskoã kiiniritisaaki, auítetxiakori itotari isikakiniri ãtika kateia ãki auakari.

¹⁸ Ikara Pirato sãkire ikenakotakasaakina, ninoa akirikata:

—Hõkariko ere kiki. Hĩsikakariko Pahapasi —itxana.

¹⁹ Pahapasi kateia ãki aua, kotxi iua apanakinikata naiatari auítetxiakori. Kokaniri apaka itxaua.

²⁰ Pirato nirekari Xesosi isikakini, ininiã iuaĩkana isãkirauata kãkitimoni. ²¹ Txamari ninoa akiripoakata:

—Aamina ïpiriãmitakari nopini hĩtokakitariko. Hõkariko aamina ïpiriãmitakari nopini — itxakatana.

²² Pirato mitxi isãkirauata ipikata. Iuaĩkana isãkirauata:

—Kixikapa? Maerekati !ikama. Ixika !auari ipinini ïkapani. Nipaniãtariko inoropatiko, eereka nisikakariko —itxari.

²³ Txamari iuaĩkana akiripoakatana:

—Hõkariko aamina ïpiriãmitakari nopini.

Ninoa akiripoakatini xika Pirato kamari ninoa nirekakiti. ²⁴ Ininiã Pirato:

—Xesosi ipinako hinirekakiti iaõka —itxa Pirato.

²⁵ Iuasaaki isikakari Pahapasi kateia ãki auakari. Neenamãtxi kamakari, kokaniri apaka itxaua Pahapasi. Eereka isikari Xesosi sotatoakorimoni aamina ïpiriãmitakari nopini okiko ïkapani.

Xesosi Tokakitaãka Aamina ïpiriãmitakari Nopini

(Mateo 27.32-44, 11-14; Marko 15.21-32; Xoão 19.17-27)

²⁶ Ininiã sotatoakori anikari Xesosi okiko ïkapanimoni. Iuasaaki kimaporiãpo aõkitarina Simão, Sireni sitatxitikiri. Iuasaaki iua apoka sitatximoni. Sotatoakori mãkari iua. Aamina ïpiriãmitakari itakana Simão tsotere nopini:

—Panika ia aamina ïpiriãmitakari —itxarina.

Xesosi tikini sa itxa Simão. ²⁷ Xesosi tikini isa mirikiniti kãkiti. Ñtokaka sitoakoro sari apaka. Imatinaniuatana, itxiapatana, kotxi imarotarina Xesosi paĩtiki ipinini. ²⁸ Xesosi kirioka ninoa sitoakoromoni. Itxana:

—Sitoãkini Xerosareẽ auakani anaakoro. Kona notani !himariaka. Hĩtekara himariakaua. Hamariteni ĩkapani hĩtxiapata, ²⁹ kotxi ãti õti apokasaaki, kãkiti sãkire: “Api-aerekata sito meeneto oniniua,” kotxi iuasaaki misirikaretxi apokasaaki, pamonõkoniri. ³⁰ Iuasaakiikarako kãkiti akiripoakatako ixirata auĩtemoni: “Ate nopini pirika. Pipataua,” itxanako, kotxi iuasaaki ninoa mokaiakariakori apokaãpota ninoa xipokini ĩkapani. ³¹ Nota aamina amaneri atoko nitxa. Hĩte aamina ĩsasaka atoko hĩtxa. Nota ! ikamari maerekati, iuaritika ia atoko nota ipina. Erepaniko aamina ĩsasaka atoko hĩtxa, ininiã ãti õtirako apiata himisiritiko —itxa Xesosi sãkire.

³² Ninoa anikari ipi maerekati kamakani Xesosikata ipininina ĩkapani. ³³ Apokasaakina “Kiitãtãtxi” inakoriãtaã, itokakitarina Xesosi aamina ĩpiriãmitakari nopini. Iua atokokanera itxana maerekati kamakani. Ñti maerekati kamakari itakana Xesosi kikomoni, ãti isanaremoni.

³⁴ Iuasaaki Xesosi txari:

—Niri !pimisiritapena ninoa, maerekati ikamakitina xika, kotxi !imarotarina ikamakitina —itxa Xesosi.

Iuasaaki sotatoakori kamari sarauatxi. Eereka imakãtxakarina Xesosi mãka. Sarauatxi kãiatakari apakapari imãka. ³⁵ Kãkiti iuaã auakani itikari Xesosi. Sasetotxi auĩteakori napetari iua. Itxana:

—Iua makãtxakapekari apanakini imapinakanina ĩkapani. Teoso mereẽkiti ininiãua, kinirepa iuaka !imakãtxakaua? —itxana.

³⁶ Iuasaaki sotatoakori apaka napetari iua. Katxioãri isikarina Xesosi iãtini ĩkapani, txamari !iãtari. ³⁷ Itxana:

—Pite Xoteo auĩte pininiãua, ininiã aamina ĩpiriãmitakariã pimakãtxakaua. Piteka pimakãtxakauako —itxarina.

³⁸ Iuasaaki iõkatakori takaãka ikii tanomoni:

—Xoteoakori Auĩte —itxa iua iõkatakori. Homano sãkireẽ aua. Kreko sãkireẽ aua. Xoteo sãkireẽ pakini aua iuaã iõkatakori.

³⁹ Maerekati kamakari Xesosi takote tokakitakori akiritari iua. Itxitari. Inapetari:

—Pite Teoso mereẽkiti pininiãua, ĩteroa piposotiire? Piteka pimakãtxakaua. Ate apaka pimakãtxaka —itxa.

⁴⁰ Ñti maerekati kamakari iuaã tokakitakori õtãkikari iua:

—Kona pite pĩkatari Teoso? Ate apaka apinako. ⁴¹ Atãopitikara ate misiritiko, kotxi maerekati akamapeka. Ere kiki !ikamari maerekati —itxa.

⁴² Eereka itxari Xesosi:

—Xesosi, auĩtetxi pininiãtaãua papokasaaki, pixinikano nota, kotxi ninirekari nisini pitekata iuaxiti —itxari.

⁴³ Xesosi apakapapiretari:

—Atãopitikara nitxai, uatxa ia õti, pite sariko notakata iaxiti Erekarĩtaã.

Xesosi Ipinini Pirena

(Mateo 27.45-56; Marko 15.33-41; Xoão 19.28-30)

⁴⁴ Ininiã apaniãxiti takote atokatxi piãkapeka. Ipi ãti pakini oara ipiãka. ⁴⁵ Atokatxi ! iponikaika. Iuasaaki mãkatxi mata mitari Teoso misãkiretiko aikotiã arõkakari matsorakitaãka. Ipi matapeka itxa. ⁴⁶ Iuasaaki Xesosi akirikata:

—Niri, nisikai nixinire pinĩkatini ĩkapani.

Ikara atoko inaãka atoko, ipina. ⁴⁷ Sotato auĩte itikasaakiri, ikenakotakasaakiri, itxa:

—Atãopitikara ikira kiki atão inakarinoka kamakari iua. Maerekati !ikama —itxa sotato auĩte.

⁴⁸ Kākiti iuaã apotiitakaniua ikara atamatakasaakina, itorotana iaritana ipīkarauatini xika. Ininiã isipekana. ⁴⁹ Ikinika Xesosi aōkimanere, sitoakoro Kariréiakini, iua tikini sikani pakini aua iuaã. Ikira atoko itikanātarina Xesosi okiko.

Xesosi Katiko Pirena

(Mateo 27.57-61; Marko 15.42-47; Xoão 19.38-42)

⁵⁰ Iuasaaki iuaã aua Xosee inakori. Xoteo auñteakori òtākikakari iua. Erekaru iua. Erekarinoka ikama. ⁵¹ Arimateia sitatxitikiri iua. Arimateia sitatxiti, Xotéia tōpa aua. Iātapapikari Teoso ikinimane auñte ininiua. Mitxipe apanakini Xoteo auñteakori òtākikakani nirekasaakiri Xesosi okinina, iuasaaki iua Xosee txari:

—Konapitini. !Apakata ikara atoko akamini —itxa.

⁵² Xesosi ipinaka atoko, Xosee sari Piratomoni. Amanaãri Xesosi ìto akauarimoni itakini ìkapani. Ininiã Pirato sikari Xesosi ìto iuamoni. ⁵³ Ininiã iua makatxakari Xesosi ìto itokakitikoãtaã. Iapirikari mākaxi mataã, kai iriko āki taka itxari. Mitxi ipīkari ! auapanika iua iriko āki. ⁵⁴ Ikara òti sesta veira. Ikinika sesta veira, Xoteoakori tomatini òti apisa, Xoteoakori aiamata tomatiko òti ìkapani.

⁵⁵ Sitoakoro Kariréiakini Xesosikata ìkani sari Xosee tikini kai irikomoni. Ninoã nirekari imarotini Xesosi ìto takikoãtaã. ⁵⁶ Eereka ninoã kanapiriã aapokomonina. Kamariãro, aãtsopa ātião pakini apotiitana Xesosi ìtoã itakinina ìkapani. Ininiã tomatiko òti tomatu itxana, kotxi Teoso paniãtakiti iaōka ikamana.

24

Xesosi Iuaĩkana Auãki Inini

(Mateo 28.1-10; Marko 16.1-10; Xoão 20.1-10)

¹ Tomĩkosaaki ìkanōkapanika, sitoakoro sari kai irikomoni, kamariãro Xesosi ìtoã itakinina ìkapani. ² Ninoã apokasaaki iuaã, atamatarina. !Katoreikari kai iriko. Kai tore makatxakapeēkaika. ³ Ininiã ninoã ìroã, txama kona apokarina Xesosi ìto. ⁴ Ininiã sitoakoro:

—Ìtapari Xesosi ìto? Kanatokopa itxa? —itxanãtana.

Iuasaakipeka ipi kiki tokiã. Itimana sitoakoro apisatoõ. Pomēkari mākari ninoã. Mēkokari iotximere atoko itxa ninoã mãka. ⁵ Sitoakoro pīkarauata, ininiã iãkana. Ixitipeka auakiitana. Ininiã ninoã kiki txana:

—Kinirepa hinitanãtari auãki inakari ipīkani sauaki? ⁶ !Uaiikari iua. Òkitikapekaua. Hĩxinikari isãkire Kariréia hñtekata auakasaaki. ⁷ Ia atoko itxa isãkire: “Hñtari iaxitikiri sikaãkako maerekanimoni. Eereka nipinako aamina ìpiriãmitakari nopini. Eereka ipi ãti òtisaaki iuaĩkana nōkitikauako,” itxa Xesosi. Hĩxinikariko isãkire —itxana.

⁸ Ininiã ninoã sitoakoro:

—Ari ikara atokopitikara itxapeka isãkire —itxana.

⁹ Eereka ninoã sipeka. Òsi Xesosi moianariakorimoni isana. Apanakini kãkiti iuaã aua apaka. Iuaã ninoã sãpiretana ikinipoko itikakitina. ¹⁰ Maria Matarenama, Xoanama, Maria Txiako inoroma, apanakini pakini sãpiretari Xesosi moianariakori itikakitina.

¹¹ Txamari Xesosi moianariakori kona auikari ninoã sãkire.

—Paxirari hñsãkire —itxana.

¹² Petronoka auikari ninoã sãkire, ininiã imiteēkata kai irikomoni. Iãka, iriko āki atamatini ìkapani. Mākaxi matanoka, Xesosi ìtoã Xosee iapirikakitinoka atamata. Eereka aapokomoni ikanapiriã. Isikasaaki, itsorĩkaãnãta, Atamatakiti ixinikanãta.

Emaoso Kimaporiti Sikani

(Marko 16.12-13)

¹³ Ikara òti ipi Xesosi sãkire auĩakani iãpota Emaoso inakori aapokotxitimoni. Xerosareē pipotorikasaaki, ipi oara napa atoko papoka Emaoso. ¹⁴ Ninoã ipi sãkiruanãta isaãpotakasaakina. Isãkiretarina, ixinikarina Xesosi ipinini pirena.

¹⁵ Isãkirauanãtakasaakina, iusaaki Xesosi ina ninoa tikini, ininiã iua sa ninoakata.

¹⁶ Txamari ninoa kona imarotari iua Xesosi ininiua. ¹⁷ Ininiã Xesosi:

—Kipa hĩte sãkirenãta? —itxa Xesosi.

Ininiã ninoa iotoka. Iusaaki ninoa toõ oerekari imatinaniuatinina. ¹⁸ Kiropasi inakori apakapapiretari:

—Ikinimane Xerosareẽ auakani imarotari Xesosi okiko pirena. Atxiĩti pite ãtiãtaã ĩkarikai? —itxari.

¹⁹ Ininiã Xesosi txari:

—Natokopa itxa iua? —itxa.

Ininiã ninoa:

—Xesosi Nasaree sitatxitikiri iua. Teoso sãkire sãpiretakari itxaua. Teoso, kãkiti apaka apokaerekatari isãkire, ikamakiti pakini, kotxi paposotiireri isãkire, ikamakiti pakini.

²⁰ Sasetotxi auĩteakori, aãũteakori apaka sikari iua okiko ĩkapani, aamina ĩpiriãmitakari nopini ipinini ĩkapani. ²¹ Ate uãkatari iua kãkiti Isaeo auakani maerekani makatxaãkari ininiua. Kita mitxi iua ipina. ²² Mixikanani sitoakoro iua sãkire auĩãkani sãkirauata atekata. Ininiã atsorĩkaãta. Isãpiretauana ĩkanõkapanika akauarimoni isinina. ²³ Txamari ninoa kona apokaikari Xesosi ĩto. Ninoa sãkire, aõkitana Teoso nitiriakori iaxitikini iuaã. Ninoa sãpiretana sitoakoro Xesosi iuaĩkana õkitikapekava. ²⁴ Eereka ãtikaka imoianariakori sari iuaã atamatinirina ĩkapani. Sitoãkini sãkire atãopitikara. Txamari !aõkitari Xesosi iusaaki —itxa Kiropasi.

²⁵ Ininiã Xesosi txana ninoa:

—Miĩkiteni hĩtxaua. !Hinirekari hãuikiniri Teoso sãkire sãpiretakani sãpiretakiti imakinika Teoso sãkire, ²⁶ kotxi ninoa txari: “Teoso nirekari imereẽkiti atatsiirauatini, Teoso tixine ĩkanapiriĩni apisapanika,” itxa Teoso sãkire —itxa Xesosi.

²⁷ Iãpotakasaakina, Xesosi sãpiretana ninoa Teoso sãkire iuaka pirena. Merepanika iuaka oerekava Moisesi iõkatsopatakitiã, eereka Teoso sãkire sãpiretakani iõkatsopatakitiã. Iuaka oerekava imakinika Teoso sãkire iõkatsopatakoriã auakariã.

²⁸ Iusaaki ninoa apokaãpota Emaoso takote. Ninoamoni Xesosi nirekari apikomoni isini. ²⁹ Ininiã itxana:

—Kona pisipe apikomoni. Mapiãnikata, ininiã atekata pikaikota —itxarina.

Ininiã Xesosi ĩroã aapokotxiã ninoakata ikaikotini ĩkapani. ³⁰ Iitopãka ninoakata inipokotini ĩkapani. Iusaaki Xesosi kosekari komiri.

—Teoso, erekapitikari pisikakiti atemoni —itxa.

Iusaaki imapixinikari komiri, sika itxana ninoamoni. ³¹ Iusaakipeka ninoa imarotari Xesosi ininiua. Iusaakipeka, ereẽkoka itxa. ³² Ininiã ninoa misãkiretakakava:

—Atãopitikara, kimaporiã isãkirauaãpotakasaaki, Teoso sãkire oerekarauaãpotakasaaki, axinire poxokoniuata iusaaki —itxana.

³³ Iusaakipeka ninoa aiamata. Ikanapiriãna Xerosareẽmoni. Iuaã apokana õsi Xesosi moianariakori, apanakinikata. ³⁴ Isãpiretana:

—Xesosi auãki inini pirena atãopitikara. Apiananiri õkitikapekava. Petromoni oerekepekava —itxana ninoa.

³⁵ Ininiã eereka Kiropasi imoianarikata sãpiretana kimapori isinina pirena. Isãpiretana komiri Xesosi mapixinikini pirena, kotxi iusaakiika ninoa imarotari iua Xesosi ininiua.

Xesosi Oerekava Imoianariakorimoni

(Mateo 28.6-20; Marko 16.14-18; Xoão 20.19-23; Átosì 1.6-8)

³⁶ Isãkirauatapanikana inakasaakina, Xesosi tokiã ninoa sauaki.

—Erekaxinire hĩtxako —itxa.

³⁷ Itikoãkatana. Ipĩkarauatana. Kamiri iuãkatarina.

³⁸ —Kinirepa hĩtikoka? Kinirepa kamaxirepeka hĩtxa ĩĩkiteta? ³⁹ Hãtamatariko niuako, nikitì pakini. Iuapitikarano nota. Himaãtakano. Kamiri !kaxiniri. Kamiri kona kapiri. Hãtamatanano. Niĩtokara. Kamiri !nitxaua —itxa Xesosi.

⁴⁰ Ininiã oerekari iuako, ikiti pakini ninoamoni. ⁴¹ Ninoa iteene poxokoniyata, txamari !iteene !auikapanikarina atão Xesosi ininiua. Ininiã iuasaaki Xesosi pimaãna:

—Nipokori aua hĩtemoni? —itxa.

⁴² Ininiã ninoa sikari ipixini ximaki kimitakori. Mapaã apaka isikarina. ⁴³ Ininiã iua nikari ninoa apisatoõ. Iuasaaki ninoa imarotari atão Xesosi ininiua, kotxi kamiri !inikari nipokori. ⁴⁴ Eereka iua misãkiretana ninoa:

—Mitxi hĩtekata nauakasaaki, nisãpiretai ikinipoko nota pirena Teoso sãkire iõkatsopatakoriã. Noerekapekai hĩte Moisesini iõkatsopatakiti, Teoso sãkire sãpiretakani iõkatsopatakiti. Xikari iõkatsopatakori apaka noerekapekai. Imakinika ninoa sãpiretakiti nota pirena apokapeka.

⁴⁵ Iuasaaki isikaimaroretana ninoa Teoso sãkire iõkatsopatakori imarotinina ĩkapani, ininiã iuasaaki ninoa imarotari atão. ⁴⁶ Itxari:

—Kitxakapirĩka iõkatsopatapeẽkaika:

Teoso mereẽkiti atatsiirauatako. Okaãkako. Ipi ãti õtisaaki õkitikauako.

⁴⁷ Kãkiti nisãkire auiãkani iaripiretariko niokanapirena erekari ikini itixiti. Merepanika Xerosareẽ auakanimoni isãpiretaãkako, eereka ikini itixiti auakanimoni isãpiretaãkako. Ninoa oerekariko kãkiti takanapiniri imaerekanina, ininiã iuasaakipeka Teoso makatxakariko maerekati ikamakitina. ⁴⁸ Hĩkinika hĩte itikapekari nipinini. Hãtamatano nota iuaĩkana auãki ninini. Ininiã iteene himarotari nota pirena apanakini hĩsãpiretini ĩkapani.

⁴⁹ Nota iokanatariko niri sikaenetakiti, Erekari Matamatakoti, hĩtemoni. Uai sitatxi hĩkaikotako. Hiãtapariko iua apokini. Ininiã hãpakapariko Teoso posotiire itano ĩkari —itxa Xesosi.

Xesosi Anikaãka Teoso Tixinemoni

(Marko 16.19-20; Átosi 1.9-11)

⁵⁰ Xesosi anikari imoianariakori Petánia sitatxitimoni. Iuaã apokasaakina, Xesosi õkitikauakotaua. Itxari Teoso:

—Niri, naia pinĩkata. Pitakari erekari niamoni —itxa.

⁵¹ Isãkirauatakasaaki, anikaãka Teoso tixinemoni. ⁵² Iuasaaki ninoa:

—Peerekari Xesosi. Iuanoka Apiananiri —itxanãtana.

Eereka Xerosareẽ ikanapiriãna ipoxokoniritikana. ⁵³ Ikiniõtika isana Teoso misãkiretiko aikotimoni. Iuaã ninoa misãkiretari Teoso:

—Peerekai. Erekapitikari pikamakiti ate ĩkapani —itxanãtana ikiniõtika.

Ameẽ.

XOÃO

Xesosi, “Teoso Säkire” Inakori

¹ Itixi kamiko apisa iua “Teoso Säkire” inakori auapeka. Iua Teosokata aua. Iua Teoso txaua. ² Ikinipoko potorikikosaaki Teosokata auari iua “Teoso Säkire” inakori.

³ Teoso paniätari iua ikinipoko ikamini. !Auari iua makamakiniti. ⁴ Xesosi, “Teoso Säkire” inakori, kamari itanapokoka auäki inini. Iuanoka sikari ikinipoko auäki inini, kotxi iuanoka auapika. Iua tirikapi atoko itxa, kotxi iopinikari käkiti xiniremoni Teoso säkire imarotini ïkapani, ätipirika auini ïkapani. ⁵ Iopinikari ipiä. Ipiä kona xipokari iua tirikapi kamara.

⁶ Teoso iokanatarari isäkire säpiretakari tïkane kiki Xoão inakori. Iokanatarari iua käkitimoni, käkiti xinire iopiniäkari isäpiretini ïkapani. ⁷ Isäpirenauata, Teoso säkire ikini-mane imarotini ïkapani, auikapiretinirina ïkapani. ⁸ Kona Xoãoni käkiti xinire iopiniäkari txaua. Xoão iokanataäka käkiti xinire iopiniäkari isäpiretini ïkapani. ⁹ Iua atäo iopinikari käkiti xinire. Apoka ïkoraxiti, ikinipoko käkiti xinire iopinikini ïkapani.

¹⁰ Iua “Teoso Säkire” inakori aua ïkoraxiti. Iua kamari itixi, iuaritika ïkoraxiti auakani kona auikapiretari iua säkire. ¹¹ Iua apoka itixi ikamakitimoni, txamari käkiti ikamakini kona nirekari iua. ¹² Iuaritika apanakini nirekari iua, ininiä auikarina isäkire. Ininiä iua sikaposotiiretana ninoa Teoso anaakori ininiuana ïkapani. ¹³ Aponaniäkasaaki, Teoso anaakori !atxaua. Ateka Teoso anaakori akaminiua !aposota. Kona käkiti txïkitakaua Teoso anaakori aniniäua. Teosora kamari iua anaakori aniniua.

¹⁴ Käkiti itxapekaua iua “Teoso Säkire” inakori. Atekata aua. Ate itikari iua. Peerekari iua. Peerekari iposotiire. Ikinipoko erekari aua iuamoni. Isäkire atäonoka itxa. Ikara atoko itxa, kotxi iri Teoso. Teoso äkiri imatonökari itxaua Xesosi.

¹⁵ Xoão säpiretari Xesosi käkitimoni. Ia atoko isäpirenauata:

—Iua, hïtemoni nisäpiretakiti: “Nota tikinimoni apokakari, apiatako iua. Nota poiäoka, kotxi nota auini apisapanika auapeka iua.”

¹⁶ Ikinipoko erekari aua iuamoni, ininiä amakinika ate apakapari ikinipoko erekari iuamonikiri. Isikaäpotari erekari atemoni. ¹⁷ Aimarotari Teoso paniätakiti säkirextiti, kotxi Moisesini oereapekaua. Apiaerekata Xesosi Kristo oereëkiti, kotxi iua oerekaua Teoso iteene tiretiniua. Ikinipoko erekari isika atemoni. Maerekati kamakani atxaua, iuaritika Teoso tiretaua. Oerekaua atäo inakari aimarotini ïkapani. ¹⁸ Teoso atamatakari !auari. Imatonökari Teoso äkiri, irikata auakari, iuara oerekaua Teoso aimarotini ïkapani, kotxi Teosotxikana iua.

Xoão Kapatxisareri Säpiretakiti

(Mateo 3.1-12; Marko 1.1-8; Arókasi 3.1-18)

¹⁹ Xoteo auïteakori Xerosareë sitatxiti auakani iokanatanana käkiti Xoãomoni. Iokanatanana sasetotxiakori. Iokanatanana sasetotxiakori moianatakani apaka Xoãomoni, ipimainirina ïkapani: “Kinakariparai pite?” ²⁰ Kona Xoão kipatarari isäpiretinina. Atäo isäpiretana:

—Teoso mereëkiti käkiti iätapakiti, kona nitxaua nota —itxa.

²¹ Ininiä ipimaärina:

—Ikara atoko ininiä kiriparai? Eríasikani? —itxana.

—Kona iuano —itxa.

—Teoso säkire säpiretakari aiätapakitikani atxiïti? —itxana.

—Kona iuano —itxa.

²² —Ikara atoko ininiä, natokopa inakariparai pite? Ninoa ate iokanatakani nirekari imarotiniina pite. Natokopa inakaripa pite? —itxana.

²³ Ininiã Xoão:

—Teoso sãkire sãpiretakari Isaía inakori iõkatsopatakiti txari:

Auako kiki ãparaã makipakaniãtaã. Isãpirenauatako. Itxariko: “Hõeretariko kimapori Apiananiri apokini apisapanika. Itikaãpo erekari hĩkamako iua napini ĩkapani,” itxa Isaía. Iua kiki ãparaã makipakaniãtaã kasãpirenari, iuakarano nota. Iua Isaía sãpiretakititarano nota —itxa Xoão.

²⁴ Pariseoakorira iokanatana ninoa kiki Xoãomoni. ²⁵ Ipimaãrina Xoão:

—Iua Teoso mereẽkiti aiãtapakiti piminakanisaakua, Eríasi inakori piminakanisaakua, Teoso sãkire sãpiretakari aiãtapakiti piminakanisaakua, kinirepa pite patxisatari kãkiti? Kipaniãpa pite patxisarauata? —itxarina.

²⁶ —Ãparaañanira nota patxisarauata. Hĩte sauaki aua kiki himimarotakiniti. ²⁷ Iuara, nota tikini apokakari, apiatakari iua. Minakati nitxaua nota, ininiã kona apakata napokini iua takote. Kona apakata ikiti mata tsapitsa nikoxirikini, kotxi minakati nitxaua —itxa Xoão.

²⁸ Ikara atoko Xoão sãpiretana ninoa Xotão ipiniã Petãnia sitatxiti, ipatxisarauatiniãtaã.

Soti Auĩte Ākiri, Teoso Nakiti

²⁹ Katimatinĩkata Xoão atapari Xesosi, iuamoni inini. Xoão sãpiretana apanakini itakote auakani:

—Hãtapari. Erenapani soti auĩte ākiri Teoso nakiti, kotxi ikinimane maerekani makatxaãkari itxaua. ³⁰ Mitxi nisãpiretakitikara ere. “Kiki apokako nota tikini. Apiananiri iua, kotxi nota mauakanisaakipanika iua aua.” ³¹ Mitxi nota apaka kona nimarotari maerekanitxi makatxaãkari uãka. Nota patxisatari kãkiti ãparaaã, kotxi iusaaki nisãpiretari iua pirena Isaeo tixini auakanimoni —Xoão txana ninoa.

³² Xoão sãpiretana apanakini itikakiti:

—Nota itikari iua Erekari Matamatakoti Teoso tixinekiri katxakini. Kamoã katxakini atoko itxa iua. Isari Xesosimoni, kaikota itxa iuakata. ³³ Ikara apisa kona nota imarotari iuãka. Āparaaã nipatxisarauatini paniãtakari sãpiretano: “Pitikariko Erekari Matamatakoti katxakini. Kikimoni apokini pitikariko. Iua kiki patxisarauatini ãtiã, kotxi isikari Erekari Matamatakoti patxisatakonimoni,” itxano. ³⁴ Notakara itikari ikara. Nota sãpiretari nitikakiti, ininiã nimarotapitikari ia kiki Teoso ākiri ininiua —itxa Xoão.

Merepitipanika Xesosi Moianariakori

³⁵ Katimatinĩkata iuaĩkana Xoão auanãta iuaã ipi imoianariakorikata. ³⁶ Iusaaki itikari Xesosi inapaãpotini, ininiã akiritari imoianariakori:

—Hãtapari. Ere kiki, soti auĩte ākiri Teoso nakiti itxaua —itxa.

³⁷ Ikara ikenakotakana atoko ninoa ipi imoianariakori sari Xesosi tikini. ³⁸ Ininiã Xesosi sapotorika, atapana iua tikini ĩkani.

—Kipa hinireka atxiĩti? —itxana ninoa.

—Koerekareri, namonipa paua pite? —itxarina.

³⁹ —Masa, hãtamata —itxa.

Ininiã isana iuakata, atamata itxarina iua auiniãtaã. Iusaaki kikatapeka. Eereka ĩkanõkapeka ikanapiriãna.

⁴⁰ Ninoa Xoão moianariakori, Xesosikata sikani, Ātree, Ātree moianari pakini. Simão Petro itari itxaua iua Ātree. ⁴¹ Eereka Ātree sari katimariã itari Simãomoni.

—Ate aõkitari Teoso mereẽkiti aiãtapakiti —itxa.

⁴² Ininiã Ātree anikari itari Simão Xesosimoni. Xesosi atamatari Simão.

—Pite Simão, Xoão inakori ākiri. Uatxa pite Petro pinaãkako —itxa.

Kai sorotxikana iuãka Petro.

Piripi, Natanaeo Pakini Xesosi Akiritini

⁴³ Katimatinĩkata Xesosi nirekari Kariréa tõpamoni isini. Iuaã aõkitari Piripi inakori.

—Notakata masa. Nimoianari pitxapekauako —itxari.

⁴⁴ Iua Piripi aapoko Petsáita sitatxiti. Iuaã apaka aua Átree, Petro pakini aapoko.

⁴⁵ Iuasaaki Piripi nitari Natanaeo inakori. Apokasaakiri isãpiretari:

—Ate aõkitari kiki. Moisesini iõkatsopatakiti sãpiretakiti iua. Teoso sãkire sãpiretakani iõkatsopatakiti sãpiretakiti aaõkita. Iuakara Xesosi txaua. Nasaree sitatxitikiri iua. Xosee ãkiri iua Xesosi —itxari.

⁴⁶ —Nasaree sitatxitiã !auari erekari —itxa Natanaeo.

—Auapitika. Masa, maãpiãkatari iua —itxa Piripi.

⁴⁷ Xesosi atapari Natanaeo iuamoni inaãpotini.

—Ere kiki atão Xoteopitikara. Atãonoka ikama —itxa Xesosi.

⁴⁸ Ininiã iuasaaki Natanaeo kenakotari Xesosi sãkire. Ipimaãri Xesosi:

—Kiãtokopa ininiãpa pimarotano nota? —itxari.

Xesosi txari iua:

—Piripi akiritinii apisapanikara, nimarotari piko kati patapi piitopãkanãta.

⁴⁹ Ininiã Natanaeo apakapapiretari:

—Koerekareri, Teoso ãkiri pitxaua pite. Kãkiti Isaeo tixini auakani auíte pitxaua —itxari Xesosi.

⁵⁰ Ininiã Xesosi:

—Pite auikari nisãkire, kotxi nimitikakinitika nimarotari piko kati patapi piitopãkanãtini. Pite imarotapanikariko apia posotiiretxi. ⁵¹ Pite itikariko Teoso tixine osereẽkiko. Pitikariko Teoso nitiriakori kanĩkini. Pitikariko ninoa katxakini, pitari iaxitikiri nopini apokinina. Atãopitikara ikara atoko nitxai pite —itxari Natanaeo.

2

Xesosi Inoãkari Áparaã, Iãriãpeka Itxĩkitakini

¹ Ipi õti napaka atoko aua kiiniri tanirauatiko pirena kiiniriti Kanaa sitatxiti Kariréia tõpa. Xesosi inoro aua kiiniriãtaã iuasaaki. ² Kakiiniriteri kemaĩtxitari Xesosi, imoianariakori pakini. ³ Iãriã xipoka atoko Xesosi inoro:

—!Auaika iãriã —otxari Xesosi.

⁴ Ininiã Xesosi:

—Kinirepa ikara atoko pitxano? Niposotiire manapi !apokapanika —itxaro inoro.

⁵ Ininiã Xesosi inoro txana kaapokori nitiriakori:

—Ipaniãtakiti iaõka hĩkamako —otxa.

⁶ Iuaã kopiti aua, seisi pakini, mitari kopititi, kai kamakori. Naia kopiti ãki aua ãparaã Xoteoakori arokiniua ãkapani. Iuaãtaã ninoa arokaua. Kiomãtxiakorini oerekinina atoko ninoa arokaua Teoso imisãkiretinina apisa, ninoa Teoso apakapini ãkapani. Átika iua kopiti maĩkari ãparaã seĩ arítro.

⁷ Xesosi paniãtana kaapokori nitiriakori:

—Hĩxãpokakari naia kopiti ãki ãparaã —itxana ninoa.

Ininiã ninoa xãpokakari kopiti ãki ãparaã. Isonakatapeka apoka ãparaã. ⁸ Ininiã Xesosi:

—Hĩsorokaãtari ãparaã, sika hĩtxari kakiiniriterimoni iãtini ãkapani.

Ininiã ninoa anikari ãparaã kakiiniriterimoni. ⁹ Iua kakiiniriteri iãtari. Iuasaaki iãriãpeka itxapekaua ãparaã.

—Amonipa ina ia iãriã? —itxa.

!Imarotari. Ninoa nitiritxi ãparaã anikakani imarotari iua iãriã. Ininiã kakiiniriteri txari ãtanorouatakari:

¹⁰ —Kinirepa mixikanani ia iãriã apia erekari na pisikaua? Apanakini sikari iãriã apia erekari kiiniri potorikasaaki. Kãkiti kamitope inakasaakiika apanakini sikari iãriã poião erekari. Txamari uatxaika pite sikari apia erekari —itxari.

¹¹ Iuasaaki Xesosi mipotorikari iposotiire Kanaa sitatxiti Kariréia tōpa iua auakasaaki. Iposotiire oerekari Apiananiri ininiua. Ikara atoko ininiã, Xesosi moianariakori auikari Xesosi Teoso mereëkiti kãkiti iãtapakiti ininiua, kotxi ninoa itikari iposotiire.

¹² Ikara atoko inaãka atoko Xesosi, inoro, itariakori, imoianariakori pakini sari Kapanaoõ sitatxitimoni. Iuaã ikaikotana mapaõtipeka.

Pirãtxi Omitikiko Pirena

(Mateo 21.12-13; Marko 11.15-17; Arókasi 19.45-46)

¹³ Xoteoakori kiinirite Páskoa inakori apisapanika, Xesosi sari Xerosareëmoni. ¹⁴ Isa Teoso misãkiretiko aikotimoni. Iuaã pirikeri ãki itikari pirãtxi vëtxitakani, kema auíte, soti auíte, kamoã pakini vëtxitakani. Itikari txineirota sikakani apaka. Amesa takote ninoa topãkanãta. Ivëtxitarona txineirota. Apakaparona ãti uãka txineirote, kotxi oa ãtoiã, ininiã Xoteo txineirote isikana. ¹⁵ Ininiã Xesosi kosekari aãpitsa. Ìpatari. Aãpitsaã omitikenatana ninoa pirãtxi vëtxitakani. Omitikenatana kema auíte, soti auíte Teoso misãkiretiko aikoti takote auakani. Ikakanapiriãri amesa txineirota apakapikoãtaã. Txineirota xikepoakatani. ¹⁶ Ipaniãtana kamoã vëtxitakani:

—Himakatzakariko kamoã. Hanikariko mapara. Niri aapoko ãki hïvëtxirauatini ! apakata. Kona uaini pirãtxi vëtxitiko —itxana ninoa.

¹⁷ Iuasaakipeka imoianariakori xinikari Teoso sãkire iõkatsopatakori: Nota iteene tiretari paapoko pite misãkiretiko aikoti. Iua xika nokaãkako, itxa Teoso sãkire iõkatsopatakori.

¹⁸ Eereka Xoteo auíteakori misãkiretari Xesosi:

—Teoso paniãtiniãi ninoa kãkiti iua misãkiretiko aikotiã auakani pomitikenatini, poerekauã posotiiretxi Teoso paniãtinii aãuikini ìkapani —itxana ninoa.

¹⁹ Xesosi apakapapiretari:

—Hïrikariko ia Teoso aapoko. Ipi ãti pakini õtisaaki iuaãkana nõkitikariko ia Teoso aapoko —itxa Xesosi.

²⁰ Ininiã ninoa:

—Anekani. Koarëta seisi anokanani iua aiko kamiko. Kiãtokopa pitxari ipi ãti pakini õtisaaki põkitikiniri iuaãkana? Kona kïkitei pite pisãkire ikara atoko pinini —itxarina Xesosi.

²¹ Txamari Xesosi sãkire “Teoso aapoko” ixinikari iïto. !Ixinikari Teoso misãkiretiko aikoti. ²² Xesosi ipinaãka atoko, õkitikaãkauã atoko, iuasaakipeka imoianariakori xinikari ikara Xesosi sãkire. Iuasaaki ninoa auikari Xesosi sãkire. Auikarina Teoso sãkire iõkatsopatakori sãpiretiniri Xesosi atão Teoso ãkiri ininiua.

²³ Xesosi Xerosareë auakasaaki, Páskoa kiiniriti auakasaaki, itomaneri kãkiti auikari Xesosi Teoso mereëkiti ninoa iãtapakiti ininiua. Ninoa itikari posotiiretxi ikamakiti, ininiã auikarina Xesosi sãkire. ²⁴ Txamari Xesosi !auikari kãkiti sãkire, kotxi imarotari ikininiane ãkixinire sãkire. ²⁵ Kãkiti ãkixinire sãkire !ipimaãri xatiki, kotxi imarotapekari kãkiti ãkixinire sãkire.

3

Nikotemo Pirena

¹ ãti ìkanõkati Nikotemo inakori motika Xesosimoni. Iua Xoteoakori auíte itxauã. Pariseo itxauã apaka. ² Iua misãkiretari Xesosi:

—Koerekareri, ate imarotari koerekareri, Teoso iokanatakiti pininiua. Teoso pitekata mauakaniã, kona piposotari posotiiretxi pikamini, ininiã ate imarotari Teoso iokanatai pite kãkitimoni —itxa.

³ Ininiã Xesosi:

—Iuaãkana iponaniãkarira sari Teoso auítetxi ininiãtaãua. Iuananira sari iuaxiti. Atãopitikara ikara atoko nitxai pite —itxa.

⁴—Kiätokopa pitxa auapekarikai iuaĩkana piponaniini? Kona piposotari pinoro ãko ãki iuaĩkana piĩroini. Kona piposotari iuaĩkana piponaniini —itxa Nikotemo.

⁵⁻⁶ Ininiã Xesosi:

—Atãopitikara ikara atoko nitxai. Piponaniãkasaaki, piri, pinorokata ãkirinanira pitxaua. Iua Erekarı Matamatakoti iponaniãkitakiniãi, Teoso ãkiri pitxaua. Kãkiti, iua Erekarı Matamatakoti iuaĩkana iponaniãkitaãkitinanira, sari Teoso auĩtetxi ininiãtaãua. ⁷ Koniko pitsorĩkaãtapeko. Piponaniãko ipikata. Ipikata pimiponaniãkaniã, kona pisari Teoso auĩtetxi ininiãtaãua. ⁸ İtima xõkarauata inirekiniãtaã. Pikenakotari ixõkarauatini, iuaritika na pimarotari İtima sinimoni. Na pimarotari İtima ininimoni. Iua atokokana !kimarotikori Erekarı Matamatakoti iuaĩkana iponaniãkitaãkiniri kãkiti —Xesosi txari Nikotemo.

⁹ Nikotemo apakapapiretari:

—Nota !imarotari ikara pisãkire —itxa.

¹⁰ Ininiã Xesosi:

—Koerekareri apiari pitxaua. Kãkiti Isaeo tixini auakani poereka. Txamari pite !imarotari ikara atoko nininii pite. ¹¹ Atãopitikara ikara atoko nitxanãtai pite. Ate sãpiretari aimarotakiti, aĩtiãkiti pakini. Txamari !hinirekarı hãuikapiretiniri asãpiretakiti. ¹² İkorapokoriti pirena nisãpiretakasaakii, !pauikari nisãkire. Atauako pauikatari nisãkire Teoso tixine pirena nisãpiretakasaakii? ¹³ Kona kãkiti sapanika Teoso tixine. ãtinoka sari iuaã, Teoso tixine potorikakarınoka, kãkiti itari iaxitikirinoka sari iuaã.

¹⁴ —Kitxakapirĩka ãparaã makipakaniãtaã Moisesini õkitikari imini metao kamakori aãke mapotõkireẽ. Itano itakari. Kãkiti Teoso sãkire auiãkani imini akatsatakinı atamatarı Moisesini õkitikakiti, ininiã kona ipinana. Iua atokokana kãkiti itari iaxitikiri õkitikaãkako. ¹⁵ Ininiãkara iua sãkire auiãkari kona ipinaika. Auapikako.

¹⁶ —Teoso iteene tıretari ikini itixiti auakani, ininiã iokanatarı imatonõkarı imi kãkitimoni. Ininiã iua sãkire auiãkanırako kona ipinaikako. ãtipirika auapikako. ¹⁷ Teoso iokanatarı imi kãkitimoni ikini itixiti auakanimoni kona imisiritinina İkapanini. Iua iokanatarı imi kãkiti maerekani imaktxakini İkapani, ninoa imapınakani İkapani.

¹⁸ —Teoso ãkiri sãkire auiãkari kona iokanataãka kãkiti misiritikomoni. Iua Teoso ãkiri sãkire mauiãkati, iuarako sako kãkiti misiritikomoni. Teoso ãkiri sãkire imauıãkani xikara ikara atoko inaãkanako. ¹⁹ Teoso ãkiri sãkire mauiãkani misiritaãkako, kotxi atão inakarı oerekakarı kãkiti xinire iopiniãkari apokapeka İkoraxiti. Iua oerekari atão aimarotini İkapani. Tirıkapi atoko itxa, kotxi oerekaua atão. Ninoa mauıkareni kona nirekarı tirıkapi. Inirekarına ipiã, kotxi maerekati ikamanãtana. ²⁰ Maerekati kamakari kona nirekarı tirıkapi. Kona tirıkapi takote kona aua, kotxi ipĩkarı ikamara. Ipĩkarı kãkiti itikiniri maerekati ikamini. ²¹ Teoso sãkire iaõka kamakarıra sari ikamaraã, kotxi ikamara oerekari apanakini iua kamakiti atão inini Teoso nireẽkiti iaõka inini —Xesosi txari Nikotemo.

Xesosi Apiari, Xoão Poiãori Inini

²² Ikara atoko inaka atoko Xesosi imoianariakorıkata sari Xotėia tõpamoni. Mapaõti ikaikota imoianariakorıkata iuaãtaã. Imoianariakori patxisatarı kãkiti iuaã. ²³ Xoão apaka patxisatarı kãkiti Enõ inakoriãtaã, Sarı inakoriãtaã takote. Ipatxisarauata iuaãtaã, kotxi iuaãtaã ãparaã kaiãopokori. İkiniõtika kãkiti sari iuamoni iuaãtaã, ininiã Xoão patxisatana. ²⁴ Iuasaaki Xoão kona takaãkapanika kateia ãki.

²⁵ Iuasaaki Xoão moianariakori sãkirauata apanakinıkata kãkiti arokiniua pirena, Teoso misãkiretiko aikoti ãki İroinına apisa pirena. ²⁶ Apokana Xoãomoni.

—Koerekareri, Xotão ipiniã iua kiki pite patxisatakiti, atemoni pisãpiretakiti, uatxa iua patxisarauatapeka. İkinipoko kãkiti sari iuamoni. Atemoni !erekari ipatxisarauatini —itxana.

²⁷ Xoão apakapapiretana ninoa:

—Erekapitikari ipatxisarauatini, kotxi Teoso paniâtari iua. Teoso masikakaniâri posotiiretxi kâkitimoni, kona xatiki iposotari iparîkauatini Teoso îkapani. ²⁸ Nota kona Teoso mereêkitino. Kâkiti iâtapakiti kona nitxaua nota. Teoso iokanatano nota Teoso mereêkiti apokini apisa. Ikara hîte imarotapeka. Ikara atoko nitxapekai hîte. Hîsâpiretari ikara apanakinimoni.

²⁹ —Maxinikari kiki îtanorouatakasaaki. Sito amanaâkito iua nakiti otxaua. Imoianari topâka iua takote. Ipoxononiuaata îtanorouatakari sâkire ikenakotakasaaki. Iua atokokana nota poxononiuaata. Nota iua moianari atoko nitxaua. Xesosi iua îtanorouatakari atoko itxaua. Kâkiti iua nakiti itxaua. ³⁰ Xesosi apiaâpotako. Nota poiâoâpotako.

³¹ —Iaxiti îkari Apiananiri. Itixi auakani imarore poiâonoka, kotxi itixinoka imarotana. Teoso tixine îkari Apiananiri itxaua. ³² Iua sâpiretari itiâkiti. Ikenakotakiti isâpireta. Txamari kâkiti !auikari isâpirena. ³³ Kâkiti Apiananiri sâpirena auiâkani, imarotari Teoso sâkire atâo inini, ininiâ apanakini apaka imarotari Teoso sâkire atâo inini. ³⁴ Iua Teoso iokanatakiti sâpiretari Teoso sâkire, kotxi Teoso sikari Erekarî Matamatakoti iuamoni, ininiâ ikinipoko Erekarî Matamatakoti posotiire aua iua Teoso iokanatakitimoni. ³⁵ Aîri Teoso tîretari imi. Isikari imi ikinipoko imoiaini îkapani. ³⁶ Teoso âkiri sâkire auiâkani auapikako Teosokata. Teoso âkiri sâkire mauîâkani kona auapanina Teosokata. Teoso omanatapikanako ninoa âtipirika —itxa Xoão ninoamoni.

4

Xesosi Misâkiretaro Samariakero

¹ Kâkiti sâpiretari pariseoakori:

—Xesosi sâkire auiâkani, iua patxisatakini, itomaneri. Xoão patxisatakini poiâoka —itxana.

² (Ari, kona Xesosini patxisarauata. Imoianariakorira patxisatari kâkiti.) ³ Xesosi imarotakasaakiri pariseoakori kenakopiretiniri iua, iusaaki iua osipikari Xotéia tōpa. Kinirâo kanapirikari Kariréia tōpamoni. ⁴ Inirekari Samaria tōpa îpirixititini Kariréia tōpa apokini îkapani.

⁵ Samaria tōpa îpirixititakasaaki, apoka Sikaa sitatxiti takote. Iuaâ aua itixi Xoseeni nakiti, iri Xakooni sikakiti kitxakapirîka. ⁶ Iuaâ aua aariko Xakooni kisakakiti âparaâ apaâtiko. Iuaâ Xesosi apokasaaki, iotoka, kotxi isâpakapeka ôtakori îpirixititini xika. Ininiâ iitopâka aariko takote. Iusaaki apaniâxitipeka.

⁷ Iusaaki sito Samaria auakaro apoka iuaâ, âparaâ apaâtakaro. Oâpokasaaki, Xesosi amanaâro âparaâ:

—Âparaâ pisikano —itxaro.

⁸ Oa apokini apisapanika Xesosi moianariakori sari sitatximoni nipokori iamotinina îkapani.

⁹ Oa sito apakapapiretari:

—Xoteo pitxaua pite. Samaria auakaro nitxaua nota. Kinirepa nâparaâte pamanaâno? —otxa.

Ikara atoko otxa, kotxi Xoteoakori kona sâkirauata Samaria auakanikata.

¹⁰ Ininiâ Xesosi:

—Teoso sikakiti pimarotaâkamako, pitemoni âparaâ amanaâkari pimarotaâkamako, no-tamonimarako pamanaâri âparaâ, kotxi piâtiniâri âparaâ nota sikakiti, pauapika âtipirika —itxaro.

¹¹ —Kona katiui pite. Kiriâpa papaâtari âparaâ, kotxi paîtanoirikori. Namonipa papokatari âparaâ kâkiti âtipirika auini inîkitaâkari? ¹² Kitxakapirîka aâtokirini Xakoo sikaua ate ia aariko. Iua, imiakori, ipiraakori pakini iâtari ia âparaâ ia aarikoâkiri. Pite apiata atxiîti? —otxa.

¹³ Ininiâ Xesosi:

—Kākiti ia irikoākiri āparaā iātakari iuaīkana iposonatapanika. ¹⁴ Kākiti nota siākiti āparaā iātakari apikomoni !iposonataika. Ākixinire amomo atoko itxa āparaā nota siākiti. Iua āparaā txīkitakari iua ātipirika auini Teosokata —itxaro.

¹⁵ —Iua āparaā pisikano nimaposonatakani tīkane, ininiā uai kona ninaika āparaā napaātini —otxa.

¹⁶ —Pakiritari pītaniri. Uai piminari —itxa.

¹⁷ —Kona kītanirino —otxa.

—Atāopitikara, “Kona kītanirino,” pinini. ¹⁸ Sīko pakinipekara pītaniri. Kiki uatxa pitekata auakari na atāo pītanirini. Inipitikara pisākire —itxaro.

¹⁹ Ininiā oa:

—Teoso sākire sāpiretakari pitxaua pite, kotxi pimarotari ikinipoko nikamakiti.

²⁰ Kitxakapirīka ate kiomaneakorini apotiitaua Teoso imisākiretinina īkapani ia oxiratari nopini. Txamari hīte Xoteoakori txari: “Xerosareēnanira aāpotiitauako Teosokata” —otxa.

²¹ Ininiā Xesosi:

—Pauikariko nisākire. Āti ōti apokako. Iuasaaki kona uai oxiratariāni, kona Xerosareēni kākiti apotiitaua aīri Teoso imisākiretinina īkapani. ²² Hīte Samaria tōpa auakani apotiitaua Teoso himisākiretini īkapani. Txamari, kona atāo himarotari iua. Ate Xoteoakori aimarotapitikari Teoso, kotxi Teoso sikakiti kākiti maerekani makatxakakari Xoteo itxaua. ²³ Teoso keto apokapanika, ari apopeka, ininiā aīri Teoso misākiretakani atāo inakani misākiretari iua ākixinireēna. Ninoa sāpiretari atāo inakaranoka iuamoni. Aīri nirekari kākiti ikara atoko inakani misākiretiniri iua. ²⁴ Teoso nirekari amisākiretiniri iua aākixinireē, kotxi Teoso īto !auari. Inirekari kākiti sāpiretiniri atāo inakaranoka iuamoni —itxa Xesosi.

²⁵ Ininiā oa:

—Nimarotapitikari iua Teoso mereēkiti aiātapakiti, Kristo inakori, apokapitikako īkorapokoriti. Iua apokasaaki ikini sereti isāpiretauako —otxari.

²⁶ —Nota pimisākiretakiti Teoso mereēkiti hiātapakitikarano nota —itxaro.

Āti Takarauata, Āti Amarauata Inini Pirena

²⁷ Iuasaakipeka Xesosi moianariakori kanapiriā. Ākixinireēna ninoa tsorīkaānāta:

—Kinirepa Xesosi sākirauata oa sitokata?

Kotxi oa Samaria auakaro. Iuaritika !ipimaārona: “Kiripa īkai?” kona itxarona. Kona ipimaārina Xesosi: “Kinirepa pimisākiretataro oa?” kona itxarina.

²⁸ Iuasaaki oa sito takanapari otii, sitatximoni kanapiriā otxa. Oākiritari kākiti iuaā auakani,

²⁹ —Masa. Maāpiākatari kiki ikinipoko nikamakiti imarotakari. Iua Teoso mereēkiti aiātapakiti atxiīti? —oa txana ninoa.

³⁰ Ininiā iua sitatxi auakani sari Xesosimoni. ³¹ Ninoa apokini apisapanika imoianariakori akiritari Xesosi:

—Koerekareri, pinipokota —itxarina Xesosi.

³² —Nipokori auape nota niākiti tīkane hīte mimarotakiniti —itxa Xesosi.

³³ Ininiā imoianariakori imisākiretakakana:

—Kiripa sikatari nipokori Xesosi nikakiti? —itxana.

³⁴ Ininiā Xesosi:

—Nota kamari iua niokanatakiri nirekaākiti. Ninirekari nikaminiri ikinipoko iua paniātakiti. Ia niparīka. Niparīka nikiena atoko itxa, kotxi niokanatakiri paniātakiti nikamini sikataparatanano, nipokori sikataparatinino atokotxikana. ³⁵ Kākiti txari: “Ipi ipi pakini kasiriti auapanika takari iposope inini tīkane, ininiā uatxa kona niparīkauata.” Ia atoko kona hītxape hīsākire. Himereka. Hātamatariko takari. Nisāpiretai hīte hītakare iposope haāpoko hanikini tīkane. ³⁶ Iua atokotxikana Teoso sākire takaāka kākiti ākixinireē. Katarakereri miparīkatakari apakapari iparīka īki. Iua anikari kākiti Teoso aapokomoni, ātipirika Teosokata auini īkapani. Ininiākara katarakereri, iua miparīkatakari

apaka poxokoniuatako. ³⁷ Aãtokirini txari: “Ãti takarauata, ãtipekana apotiitari takari.”
³⁸ Ia sãkiretxiti atão, kotxi nota paniãtai hïte mitxi himaparïkauatakaniãtaã hamarauatini. Apanakini parïkauatapeka iuaã. Ninoa takapekari Teoso sãkire kãkiti ãkixinireẽ. Pasãpaniri ninoa parïka. Ninoa parïkauata mitxi, ininiã uatxa hïte parïka poião kãkiti Teosomoni hanikini –itxa Xesosi.

Samaria Auakani Auikiniri Xesosi Sãkire

³⁹ Kaiãopokori Samariakini iua sitatxiti auakani auikari Xesosi sãkire, kotxi oa sito mitxi sãpiretana:

–Nikamakiti ikinika isãpiretano –otxana.

⁴⁰ Ininiã ninoa Samaria auakani apoka Xesosimoni.

–Atekata paua –itxarina Xesosi.

Ininiã Xesosi kaikota ipi õti ninoakata. ⁴¹ Xesosi sãkire ikenakotakasaakina, apikomoni ninoa auikapiretari.

⁴² Ninoa misãkiretaro oa sito:

–Uatxa ate auikapiretari Xesosi sãkire, kona pite sãpirenaãnanini, ate auikapiretari. Ateka kenakotapekari iua sãkire, ininiãkara ate auikapiretari iua sãkire. Uatxa ate imarotari atão inini Teoso mereëkiti ininiua Xesosi. Kãkiti itixi auakani maerekani makatxaãkari itxaua iua –itxarona.

Auïtetxi ãkiri Xesosi Makananitini

⁴³ Iuaã ipi õti inapaka atoko Xesosi sipeka. Kariréia tõpa isa. ⁴⁴ Mitxi Xesosi sãkire: “Teoso sãkire sãpiretakari paxitaãka, txamari Teoso sãkire sãpiretakari itixineẽ auakasaaki, kãkiti iuaãtaã kona auikari iua sãkire,” itxapeka Xesosi. ⁴⁵ Iuaritika Kariréia tõpa apokasaaki, kãkiti iuaã auakani ipoxokoniritika apakapari Xesosi, kotxi ninoa apaka sari iua Pãskoã kiiniriti Xerosareẽ sitatxitiã. Iuaãtaã itikarina Xesosi posotiire. Ininiãkara ipoxokoniritikana apakaparina Xesosi.

⁴⁶ Xesosi iuaïkana sari Kanaa sitatxitimoni, Kariréia tõpa. Mitxi Xesosi inoãkapekari ãparaã iãriã ininiua iuaã. Xesosi apokasaaki Kanaa, auïtetxi ãkiri amianata Kapanaoõ sitatxitikiri. ⁴⁷ Iua auïtetxi kenakopiretari Xesosi Kariréia tõpa apokini, Xotéia tõpa osipikini. Inakasaaki Xesosimoni isa, aõkita itxari Xesosi. Aiatari:

–Masa Kapanaoõmoni, naapokomoni. Namarite amianata. Pimakananitari iua. Ipinanapanoka –itxari Xesosi.

⁴⁸ Ininiã Xesosi:

–Nimakamakaniãri posotiiretxi, kona hïte nirekari auikiniri nisãkire. Posotiiretxi hïtikasaakinani, hïte nirekari nisãkire hãuikini. Teoso takaõtxikare hïtikasaakinani, hinirekari nisãkire hãuikini –itxa Xesosi iuamoni.

⁴⁹ –Masapoka naapoko. Pimasikanisaaki, namarite ipinapitikako –itxari.

⁵⁰ –Pisa paapokomoni. Pamarite kona ipina –Xesosi txari iua.

Iua kiki auikari Xesosi sãkire, ininiã isipeka. ⁵¹ Ipixinipokoriti aõkitana initiriakori.

–Pamarite auapitikako –itxarina.

⁵² –Namonikitapa akananita? –itxana.

–Kita apaniãxiti apoomari iotoka –itxana.

⁵³ Iuasaaki iua kiki imarotari kita Xesosi sãkire manapikara: “Pamarite kona ipina,” ininiri manapikara iotoka apoomari. Ikara atoko ininiã, ikinimane iua aapoko auakani, iua pakini auikari Xesosi sãkire.

⁵⁴ Ininiã ipikatapeka Xesosi kamari posotiiretxi Kariréia tõpa auakasaaki, Xotéia tõpa osipikasaaki.

5

Matïpokotakati Xesosi Erekapeka Inïkitakini

¹ Ikara atoko inaãka atoko Xesosi sari Xerosareẽ sitatxitimoni, kotxi Xoteo kiinirite Teoso ïkapani aua iuasaaki. ² Xerosareẽ sitatxiti apanïkaki, soti auïte vëtxitikoãtaã takote

aua ipoa xapitikiri. Siko ãronakiko aua iuaãtaã. Xoteo sãkire Epiráiko. Epiráiko sãkireẽ iua ipoa uãka “Petésita.” ³ Ironakikoãtaã amianatakanipokoni sirĩkanãta. Mõsiãreni, motĩkakani, matĩpokotakani pakini iuaã auanãta. Iãtapanãtarina ãparaã tokĩkaãtini. ⁴ Teoso nitiri apokanaka iuaãtaã. Iua apokasaaki itokĩkaãtakari ãparaã. ãparaã tokĩkaãtakasaaki, ãtika amianatakari ãkiika komokaãtakari erekapeka itxa. ⁵ Matĩpokotakati iuaã auanãtakari amiananãtakari trĩta oito pakini anokanani amianata. ⁶ Xesosi atamatari iua iuaã isirĩkanãtini. Imarotari iua uatxakapokoni amiananãta. Ininiã Xesosi pimaãri:

—Ereka pinini pinireka? —itxari.

⁷ Amianatakari apakapapiretari:

—Ari, ninirekapitikamari, txamari kona kanikikono kãuaãriã ãparaã tokĩkaãtakasaaki. Nikomokaaritakasaaki, ãti komokape napisapanika —itxari Xesosi.

⁸ —Põkitikaua. Pisirimata pikoseka, sipeka pitxa —Xesosi txari.

⁹ Iuasaakipeka erekapeka itxa iua amianatakari. Isirimata ikoseka, tĩpokota itxapeka. Iua õti kãkiti tomatini õti. ¹⁰ Ininiãkara Xoteo auãteakori txitari amianatakari erekapeka inakari:

—Uatxa kãkiti tomatini õtisaaki pite anikanãtari pisirimata. ãkora atoko ininiã, kãkiti ! auiritaãka —itxarina, kotxi ninoamoni iparĩkauata isirimata anikasaaki.

¹¹ Ininiã iua kiki:

—Erekape ninĩkitaãkirira paniãtano: “Pisirimata pikoseka, sipeka pitxa,” itxano.

¹² Ininiã ninoã:

—Kiripa kiki paniãtai pisirimata pikosekini pisini ãkapani?

¹³ —!Nimarotari iuãka —itxa.

Iuaãtaã ipoa xapitikiri takote kaiãopokori kãkiti auanãta, ininiã patimari Xesosi sipeka ninoã sauaki.

¹⁴ Eereka Xesosi aõkitari iua kiki Teoso misãkiretiko aikotiã.

—Uatxa pitĩpokotapeka, ininiã maerekati pitakanapako. Iuaãkana maerekati pika-makasaaki, atxĩiti amianari apiatakari inokai —Xesosi txari iua.

¹⁵ Eereka iua kiki sari Xoteo auãteakorimoni.

—Xesosira erekapeka txĩkitakano nota —itxari.

Xoteo Omanatiniri Xesosi

¹⁶ Tomatiko õtisaaki Xesosi makananitari iua amianatakari. Ikara xika Xoteo auãteakori kinirão okaka txari Xesosi. ¹⁷ Xesosi imarotari Xoteo auãteakori sãkire, ininiã itxana:

—Niri Teoso kamari erekari ikiniõtika. Iua atokotxikana nota. Kona niotoka erekari nikamini tomatiko õtisaaki —itxa Xesosi.

¹⁸ Ikara Xesosi sãkire xika Xoteo auãteakori apiata omanatari Xesosi. Ninoamoni Xesosi kamari maerekati tomatiko õtisaaki amianatakari imakananitini. Xesosi sãkire: “Niri Teoso,” inini xika, apiata omanatarina iua, kotxi iua: “Teosotxikana nota” itxanãta iua Xesosi.

Xesosi Irikata

¹⁹ Ininiãkara Xesosi misãkiretana Xoteo auãteakori:

—Atãopitikara nitxai hĩte. Nota Teoso ãkiri nitxaua. Notanani !kakamareno. Nitikari niri kamanãtakiti, ininiã niri kamakiti iaõka nikama. Iuanokara nikama nota. Niri kamakititxikana nota kama apaka. ²⁰ Niri turetano nota, ininiã ikini sereti ikamanãtakiti oerekano. Oerekapanikariko posotiiretxi apiatapanikako nota kamini ãkapani, ininiãkara hĩte tsorĩkaãtako hĩtikasaakiri. ²¹ Niri õkitikari ipĩkani, iuaãkana aua inini tĩkane. Iua atokotxikana nota txĩkitakana kãkiti ninirekaãkini, iuaãkana auini ãkapani.

²² Teoso kona txari kãkitimoni: “Kona erekai pite, ininiã kãkiti misiritikomoni pisa,” kona itxa Teoso. Apanakinimoni kona Teoso txari: “Erekai pite, ininiã uai pina notakata pauini ãkapani,” kona itxa Teoso. Notakara iua ãkirikara txari ikara atoko inakari kãkitimoni, kotxi Teoso sikaposotiiretano nota ikara atoko inakari nisãpiretini kãkitimoni.

²³ Ikara atoko ininiãkara, kãkiti paxitano nota. Niri nirekari nota paxitiko, iua paxitiko atokotxikana. Nota mapaxitakani kona paxitari niri nota iokanatakari.

²⁴ —Atãoenepitikara nitxai hĩte. Nisãkire kĩpitakari, nota iokanatakari sãkire auĩãkari, auapika Teosokata. Kona Teoso misiritapaniriko iua. Kona ipinaika. Auapika Teosokata. ²⁵ Atãoene nitxai hĩte. Kãkiti xinire ipĩkari atoko itxa maerekati ikamakiti xika. Teoso ãkiri sãkire kãkiti kĩpitini õti apokapanikako. Ari iketo apokapeka. Nota sãkire kĩpitakani auapikako. ²⁶ Aĩri Teosonoka posotari itxĩkitakiniri ikinipoko auãki inini, kotxi iuanoka auapika. Isikaposotiiretano nota apaka ikinipoko nitxĩkitakini auãki inini.

²⁷ —Aĩri Teoso txano nota: “Kãkiti itari iaxitikiri pitxaua, ininiãkara pitxariko nisãkire mauĩãkani: ‘Kona hĩte kĩpitari Teoso sãkire, ininiã kãkiti misiritikomoni hĩsa,’ pitxako. Pitxariko nisãkire auĩãkani: ‘Hĩte kĩpitari Teoso sãkire ininiã uai hina Teosokata hãuini ĩkapani.’ Ikara atoko pitxariko kãkitimoni,” Teoso txano nota.

²⁸ —Kona hĩtsorĩkaãtapeko, ikara sãkiretxiti hĩkenakotakasaaki. ãti õti ipĩkani, katakoni, kenakotariko Teoso ãkiri akiritinina. ²⁹ Iuasaaki õkitikauanako. Ninoa erekari kamakani auapikako Teosokata. Ninoa maerekati kamakani misiritaãkako.

³⁰ —Notanani kona nitxari kãkiti: “Pite sari kãkiti misiritikomoni. Pitepekana inari uai Teosokata pauini ĩkapani.” Notanani kona ikara atoko nitxari kãkiti. Teoso sãpiretakitinokara nitxa kãkitimoni, ininiãkara nisãkire kãkitimoni atãonoka, kotxi kona nota nirekaãkitini nikama. Niri nĩpaniãtakiri nirekaãkitinanira nikama —itxa Xesosi.

Xesosi Sãkire Atãoene Sãpiretakani

³¹ Apikomoni Xesosi sãpirenauata:

—Notaka sãpiretiniãua hĩtemoni, atxiĩti kona kauikikono. ³² ãtipekana nota sãpiretakari aua. Nimarotari atão inini iua sãpiretakiti. ³³ Hĩte iokanatapekari himoianariakori Xoãomoni nota himarotini ĩkapani. Iua sãpiretapekana ninoa atãoene nota sãkire. ³⁴ Kona ninitanãtari kãkiti nisãkire atão inini sãpiretakani. Nota sãpiretai hĩte Xoão sãpiretakiti sãkiretxiti, himaerekani Teoso makatxakini ĩkapani, himapinakani tĩkane.

³⁵ —Xoão tirikapi tirinakari poniãkari atoko itxa. Tirikapi iopinikari ikinipoko, tirikapi takote auakari aãtamadini ĩkapani. Iua atokokana Xoão oerekari kãkiti atão inakari. Mapaõtinokara hĩte poxokiniuata iua sãkire hĩkenakotakasaaki.

³⁶ —Aua ãti nota sãpiretakari. Iua Xoão poiãoka. ãtipekana apiata. Nota kamakitikara apiata. Nikamakiti sãpiretari nota sãkire atão inini. Nikamakiti, niri paniãtakiti kãkiti itikasaaki, imarotari niri uaimoni iokanatinino nota.

³⁷ —Niri, nota iokanatakari kãkitimoni, iua apaka nota sãpiretakari. Kona hĩte kenakotari Teoso sãkiruatini. Kona hĩte atamatari itoõ. ³⁸ Isãkire !auari hãkixinireẽ, kotxi kona hãuikari nota sãkire iua iokanatakiti sãkire.

³⁹ —Hĩte atatsopatapikari Teoso sãkire iõkatsopatakori, hãuini ãtipirika Teosokata himarotini ĩkapani. Ia Teoso sãkire iõkatsopatakori nota sãpiretakari apaka itxaua. ⁴⁰ Txamari kona hinirekari nisãkire hãuikini. Kona hinirekari notamoni hinini, ãtipirika Teosokata hãuini ĩkapani.

⁴¹ —!Ninitari niuikiko. ⁴² Iteene nimarotai hĩte. Kona xapiti hĩtoretari Teoso hãkixinireẽ. ⁴³ Niri iokanatanano nota uaimoni. Txamari kona hĩte apakapano nota Teoso iokanatak-
itino. Teoso maiokanatakinitira hĩte apakapa. ⁴⁴ Hĩte potxitari ãti iuikinii. Txamari kona hĩkamari erekari Teosonoka iuikinii ĩkapani, ininiã kona hãuikari iua sãkire.

⁴⁵ —Kona notani sãpiretapaniri niri hĩte maerekani. Moisesira sãpiretariko himaerekani Teosomoni. Hĩte uãkatari iua sãpiretari hĩte ereka hinini, txamari iua sãpiretariko niri himaerekani. ⁴⁶ Moisesini sãkire iõkatsopatakiti hãuikaãkamako, nota sãkire apaka hãuikamako, kotxi Moisesini nota sãpiretakari apaka. Iua iõkatsopatapekari nota sãkire. ⁴⁷ Hĩte kona auikapiretari Moisesini iõkatsopatakiti. Isãkire iõkatsopatakiti himauikakaniã, kiãtokopa hĩtxa nota sãkire hãuikini? —itxa Xesosi.

6

Sīko Mio Kākiti Xesosi Sikakienatini
(Mateo 14.13-21; Marko 6.30-44; Arókasi 9.10-17)

¹ Eereka āti ōti Xesosi ĩpiriātari Kariréia poa. Ia ipoa uāka apaka Txiperíatxi poa inaāka.
² Kaiāopokori kākiti sari iua tikini, kotxi ninoa itikapekari Xesosi makananirauatini.
³ Xesosi kanīka mitaxiratarimoni. Iuaā iitopāka imoianariakorikata. ⁴ Xoteoakori kiinirite, Páskoa inakori kiinirite apisapanika Xesosi sari iuaātaā. ⁵ Iitopākasaaki, Xesosi atapari itomaneri kākiti apokaāpotini iuamoni. Ininiā ipimaāri Piripi:

—Amonipa aiamotatariko komiri nakira kākiti asikakienatini ĩkapani?

⁶ Xesosi ikara atoko txari Piripi, kotxi inirekari imarotini: “Atauako atxiīti Piripi auikari niposotiire?” Xesosi imarotapekari iuaka ikamakiti tīkane. ⁷ Ininiā Piripi apakapapireta:

—Txineiropokoni, tosētosi txineiro ota, kona apakata komiri aamotini, nakira kākiti asikakienatini ĩkapani. !Apakata —itxari.

⁸ Iuasaaki āti Xesosi moianari Simão Petro itari, Ātree inakori, txari Xesosi:

⁹ —Uai aua amarini. Auari ikiena. Sīko komiri sevata inakori kamakori auari iua. Ipi ximaki axapitiri apaka auari iuamoni. Txamari kākiti itomaneri sikakienatiko !apakata. Ia nipokori poiāoka —itxari.

¹⁰ Xesosi paniātari imoianariakori:

—Nakira hīpaniāta iitopākinina —itxana.

Sotonaiakiperi auari iuaātaā. Iua nopini iitopākana. Sīko mio apikomoni kikiakori aua. ¹¹ Xesosi kosekari komiri amarini nakiti. Iuasaakipeka imisākiretari Teoso:

—Erekapitikari ia komiri auiniua ate.

Iua sikari imoianariakori. Eereka ninoa xanakari kākiti topākakanimoni. Iua atokokanera itxarina ximaki. Ikinikana inirekaka iaōka auana ninoa.

¹² Ikinimane kamitopeka inakasaaki, ipaniātari imoianariakori:

—Itetakori komiri, ximaki pakini hāpotiita. Kona hiomatapiriko —itxa.

¹³ Ininiā apotiitarina komiri itetakori. Tosi kotarina ixāpokakana komiri itetakori.

¹⁴ Xesosi posotiire ninoa kākiti itikasaaki, ninoakakarika isākirauatana:

—Atāopitikara Xesosi aiātapanātakitikara, Teoso sākire sāpiretakari inakorikara ere Xesosi —itxana.

¹⁵ Xesosi imarotapekari ninoa nirekiniri iauītetinirina iua. Iua kona nirekari ninoa auītetiniri iua. Ninoa mamaīkakaniri apisapanika, Xesosi sipeka iuanoka. Apikoxiti oxiratarimoni ikanīka.

Xesosi Ipoa Nopini Inaāpotini
(Mateo 14.22-23; Marko 6.45-52)

¹⁶ Kikatapeka imoianariakori iokiriīta ipoa tiniā. ¹⁷ Iereētauana kanaua āki. ĩpiriāpotarina ipoa Kapanaoō sitatxiti manapi. ĩkanōkapeka inakasaaki kona Xesosi apokapanika ninoamoni. ¹⁸ Kataparari ĩtimati apoka, ininiā tsakatipokoni. ¹⁹ Iuasaaki imekoāpotana. Ipixiniāpeka apokasaakina, ataparina Xesosi ipoa nopini itīpokotini. Kanauamoni isaāpota. Ninoa pīkarauata, kotxi ninoa uākatari kamiri.

²⁰ Xesosi akiritana:

—Notakara. Kona hīpīkarauatape —itxana.

²¹ Ininiā apakaparina Xesosi ipoxokoniritikana. Iua morōkokaua kanauaā. Iereētakasaakiua, iuasaakipeka kanaua apoka imiriīpe Kapanaoō manapi.

Kākiti Nitiniri Xesosi

²² Katimatinīkata ipiniāmoni kaikotakani nitamari Xesosi. Ninoa imarotari ātoka kanaua mitxi iuaā auini. Oa kanaua Xesosi moianariakori anikapeka. Ninoa imarotari Xesosi kona sari imoianariakorikata. Imarotarina ninoanani sini. ²³ Iuasaaki kanuaniri Txiperíatxi sitatxitikini apokita Xesosi merepani Teoso misākiretiniātaā

takote merepani komiri nikikoãtaã. ²⁴ Iuasaaki kona ninoa apokari Xesosi, imoianari-akori apaka. Ininiã ninoa iereẽtaua kanaua ãki. Iuaĩkana ikanapiriãna. Ipoa ĩpiriãtana Kapanaoõ sitatxitimoni, Xesosi initinina ĩkapani.

Komiri Kãkiti Auapininiika Inini Tĩkane

²⁵ Ninoa apokari Xesosi ipoa ipiniã.

—Koerekareri, namonikitapa papoka uai? —itxarina.

²⁶ Ininiã Xesosi:

—Atão nisãpiretai hĩte. Hĩte nikari komiri nisikakiti. Kamitopeka hĩtxa, ininiã nipokori ĩkapaninokara hinitanãtano nota. Kona hãuikari Teoso posotiireẽ nikaminiri iua posotiiretxi.

²⁷ Xesosi pinitana:

—Nipokorinoka !hĩxinikape, kotxi nipokori okanani mauakati itxaua. Hĩxinikariko ãtião nipokori, nota hĩtari iaxitikiri siãkiti, kotxi nota sikari kãkiti, kãkiti auapininiika inini tĩkane. Teoso sikari ikinika iposotiire notamoni ninirekaãkiti nikamini ĩkapani —Xesosi txana ninoa.

²⁸ —Kiãtokopa atxatari Teoso nireẽkiti akamini? —itxana ninoa.

²⁹ —Ianoka Teoso nirekari hĩkamini. Iua nirekari hãuikiniri iua iokanatakiti sãkire —Xesosi txana ninoa.

³⁰ —Iuaĩkana posotiiretxi apiari pikaminiã, ininiãra aãuikari Teoso iokanatakiti pininiãua. Kinakaripa posotiiretxi pikamapanika? ³¹ Anirimaneni kitxakapirĩkarini ãparaã makipakaniãtaã auakasaakina, inikarina komiri iaxiti katxakakari. Teoso sãkire iõkatsopatakoru txari:

Isikari komiri Teoso tixinekiri ninoamoni,

—itxarina Xesosi.

³² Ininiã Xesosi:

—Atão nisãpiretaiko hĩte. Kona Moisesini sikari komiri Teoso tixinekiri. Nirikara sikaãtari atão komiri iua tixinekiri kãkitimoni. ³³ Teoso tixine ĩkari, iua ãkiri, komiri atoko itxa, ikini itixiti auakani ĩkapani, kotxi iua sãkire auiãkani auapininiika Teosokata —itxana.

³⁴ —Ikiniõtika pisikaua ia komiri —itxarina.

³⁵ —Notakara iua komiri Teoso iokanatakiti nitxaua. Notakara sikari kãkiti auini ĩkapani. Iua nisãkire auiãkari !inatxitaika. !Iposonataika.

³⁶ —Hĩte aõkitapekano nota, txamari kona hĩte auikapanikari nisãkire. Ikara atoko nitxapekai hĩte. ³⁷ Imakinika kãkiti notamoni Teoso siãkini inapitikako notamoni. “Hĩsipeka,” kona nitxana notamoni apoãkani. ³⁸ Nitakanapari Teoso tixine. ĩkorapokoriti napoka, nipaniãtakiri nirekaãkitinoka nikamini ĩkapani. Notaka nirekaãkiti na nikama. ³⁹ Niri nipaniãtakiri !inirekari ãtika kãkiti notamoni isiãkini ereẽkokini. Itixi xipokini õtisaaki, inirekari nota õkitikinina ninoa auapininiika inini tĩkane. ⁴⁰ Iua nipaniãtakiri nirekari nota imarotakani, nisãkire auiãkani, auapininiika inini. Itixi xipokini õtisaaki nõkitikana ninoa iuaĩkana auãki inini —itxa Xesosi.

⁴¹ Ninoa Xoteoakori kona apokaerekatari Xesosi sãkire, kotxi iua txari: “Nota iua komiri Teoso tixine ĩkari komiriti nitxaua,” ininiã ninoa tsoata. ⁴² Ininiã ninoa:

—Iua kiki Xesosi Xosee ãkiri. Aaõkitapekari iri, inoro pakini. Kinirepa “Teoso tixine ĩkarirano” itxape iua? —itxana, itsoatinina.

⁴³ Ininiã Xesosi txana:

—Kona himaxirauatape. Kona hĩtsoatape. ⁴⁴ Niri nipaniãtakiri akiritakitinanira posotari inini notamoni. Niri makiritakiniti kona posota inini notamoni. Itixi xipokini õtisaaki nõkitikana notamoni apoãkani iuaĩkana auinina ĩkapani. ⁴⁵ Kitxakapirĩka Teoso sãkire sãpiretakani iõkatsopataru ia Teoso sãkire: Teosorako oerekariko ikinipoko kãkiti.

Niri sãkire kĩpitakani, niri oereẽkini, apoka notamoni. ⁴⁶ Kona aua kãkiti niri atamatakari. Nota Teoso tixine ĩkari, notanokara atamatapekari niri.

⁴⁷ –Nota sãkire auiãkari, iuara auapininiika Teosokata. Ia nisãkire atão. ⁴⁸ Nota iua komiri nitxaua kãkiti auapininiika inĩkitakakarino. ⁴⁹ Hinirimane kitxakapirĩkarini nikari komiri iaxiti katxaãkari ãparaã makipakaniãtaã. Iaxiti katxaãkari inikanimana, txanima ipĩpena. ⁵⁰ Kãkiti nikiniãri atão komiri Teoso tixine ĩkari kona ipina. ⁵¹ Iua komiri, Teoso tixine ĩkari nitxaua nota. Kãkiti auapininiika inĩkitakakarino nota. Ia komiri niãkari auapininiika itxako. Ia komiri nisikakiti ia niĩtokara. Niĩto nisika kãkiti ikini itixiti auakani auapininiika inini tĩkane –itxa Xesosi.

⁵² Ikara atoko ininiã ninoa Xoteoakori taparakienatakakaua:

–Natokopa itxa ia kiki iĩto isikiniua ate, anikiniri ĩkapani? –itxana.

⁵³ Ininiã Xesosi:

–Atãoenepitikara ikara atoko nitxai hĩte. Hĩtari iaxitikiri ĩto himanikakanisaaki, iarẽka himiãtakanisaaki, kona hĩxinire auapani ãtipirika. ⁵⁴ Iua niĩto niãkari, niarẽka iãtakari, auapikako Teosokata. Xipokatxi õtisaaki nõkitikariko iua iuaĩkana auini ĩkapani. ⁵⁵ Niĩto atão komiri itxaua. Niarẽka atão iãriã itxaua. ⁵⁶ Niĩto niãkari, niarẽka iãtakari, aua nãkixinireẽ. Nota aua iua ãkixinireẽ. ⁵⁷ Niri, ãtipirika auapika inakari, iokanatano nota ĩkorapokoriti. Iuara sikano nota ãtipirika nauini ĩkapani. Iua atokotxikana nota sikari nota niãkari ãtipirika auini ĩkapani. ⁵⁸ Nota iua komiri Teoso tixine ĩkari nitxaua. Komiri hĩkiomaneakorini nikakiti ãtião. Iua komiri nikakari ipĩpe. Nota siãkiti komiriti niãkani, nisãkire auiãkani auapininiika Teosokata itxanako.

⁵⁹ Ikara atoko itxa Xesosi sãkire aiko ãki Xoteo apotiitiniãtaãua Kapanaoõ sitatxiti oerekarauatakasaaki.

Apanakini Takanapiniri Xesosi

⁶⁰ Xesosikata sikani isãkire potxitakani, ikara isãkire ikenakotakasaakina, ipimarau-atakakana:

–Pamimari ikara isãkire. Kipa imarotari ikara atoko inakari sãkiretxiti? –itxana.

⁶¹ Masãpiretakotika Xesosi imarotari ikara atoko itsoatinina. Ininiã iua:

–Hinirekatari hĩtakanapinino nota ia nisãkire xika? ⁶² Kiãtokopa hĩxinikakiti hĩtikiniãno nota hĩtari iaxitikirino kanĩkini mitxi nauiniãtaã? Atxiĩti iuasaaki hãuikatari nisãkire? ⁶³ Iua Erekaru Matamatakotinokara sikari kãkiti auini tĩkane. Kãkiti ĩto tapara !auari. Ikara sãkiretxi hĩtemoni nisãpiretakiti, iua Erekaru Matamatakoti sãkiretxikana. Nisãkire auikiko auãkitakari kãkiti, ãtipirika Teosokata auini ĩkapani. ⁶⁴ Txamari auapitika hĩte sauaki nisãkire mauĩãkani –itxa Xesosi.

Merepitipanika Xesosi imarotapekari iua sãkire mauĩãkani tĩkane. Xesosi imarotari apaka imĩkapiritakiri tĩkane.

⁶⁵ –Niri Teoso masikaposotiiretakiniti kona iposota apokini notamoni –itxa Xesosi.

⁶⁶ Ikara isãkire xika itori Xesosikata sikani takanapari iua. Kona inirekaikarina iuakata isinina. ⁶⁷ Ininiã Xesosi pimaãna imoianariakori tosi:

–Hĩtepekana, hĩte apaka nirekatari hĩtakanapinino? –itxa Xesosi.

⁶⁸ Ininiã Simão Petro apakapapiretari:

–Apiananiri, krimonipa asa atxiĩti? Pitenanira sãpiretari kãkiti auapininiika inini.

⁶⁹ Ate imarotari Teoso mereẽkiti pininiua. Teoso ãkiri, auapika inakari ãkiri pitxaua pite –Petro txari Xesosi.

⁷⁰ Ininiã Xesosi:

–Nota mereẽi hĩte tosi kikiakori. Txamari hĩte sauaki aua Satanasi nitiri –itxa Xesosi.

⁷¹ Iuasaaki Xesosi xinikari Xotasi Isikariotxi inakori, Simão inakori ãkiri. Xesosi moianarikamara iua, txamari imĩkapiritariko Xesosi.

¹ Eereka Xesosi kaikotapanika Kariréia tōpa. Kona Xotéia tōpa likaikota iuasaaki, kotxi iuaã Xoteo auñteakori nirekari okiniri. ² Iuasaaki Xoteo kiinirite Papiri inakori kaiama atokopekari. ³ Ininiã Xesosi itariakori misãkiretari iua:

—Posipika uai. Pisãkire auñkanimoni Xotéia auakanimoni pisa. Ninoa apaka nirekari itikiniri pikamakiti. ⁴ Kãkiti nirekiniãri iteene imarotaãka, !ikipatari ikamakiti. Pite kamanãtari posotiiretxi uai Kariréia tōpa. Pisa Xotéiamoni. Iuaã poerekari piposotiire ikinimane imarotiniã ãkapani —itxana.

⁵ Ikara atoko itxarina Xesosi, kotxi itariakori apaka iuasaaki kona auikapanikari isãkire.

⁶ Ininiã Xesosi apakapapiretana:

—Iuaã nisini keto kona apokapanika. Apakata ikiniõtika Xotéia tōpamoni hñte sini, ⁷ kotxi kãkiti !omanatai hñte. Notananira omanataãka, kotxi nisãpiretari maerekati kãkiti kamakiti. ⁸ Erekari hñte sini kiinirimoni. Kona nota sapani uatxa. Nisini manapi apokasaaki nisa —itxa Xesosi.

⁹ Itariakorimoni ikara inaka atoko, ikaikotapanika Kariréia tōpa.

Xesosi Sari Papiri Kiiniritimoni

¹⁰ Itariakori kiinirimoni ãkiikapeka. Ninoa tikinimoni isa Xesosi. Iuasaaki !kasãpirenari kiinirimoni isini tãkane. Ininiã kãkiti mimarotakinitika isa.

¹¹ Xoteo auñteakori nitapiimari Xesosi kiinirisaaki. Ipimaãri kãkiti:

—Itapari Xesosi?

¹² Kãkiti iuaã auakani sãkirauata Xesosi pirena. Apanakini txari:

—Peerekari Xesosi.

Apanakinipekana:

—Kona erekari. Imisirienetari kãkiti —itxana.

¹³ Kona kãkiti sãkirauata Xesosi uãka Xoteo auñteakori takote, kotxi ipãkana.

¹⁴ Mapaõtinoka kiiniri xipokini apisapanika, Xesosi sari Xotéia tōpamoni. Isari Teoso misãkiretiko aicotimoni. Iuaã oerekarauata. ¹⁵ Xoteoakori tsorãkaãnãta Xesosi sãkire ikenakotakasaakina:

—Kininiãpa ere kiki paimatireri. Kona apaiaõkarauata —itxanãtana.

¹⁶ Ininiã Xesosi apakapapiretana:

—Na nota imaroreni noerekai hñte. Iua niokanatakiri imarorera noerekai hñte. ¹⁷ Kãkiti Teoso nirekaãkiti nirekaãkani imarotari noerekiniri Teoso imarorenoka. Ninoa imarotari nimoerekakaniri notaka nimarore. ¹⁸ Kãkiti iuaka isãkire sãpiretakari nirekari apanakini iuikiniri iua. Kãkiti Teoso sãkirenoka sãpiretakari nirekari iuikiniri Teoso ipaniãtakiri. Ikara atoko inakari kãkiti sãkire atãonoka. !Ikamari maerekati. ¹⁹ Moisesini oerekai hñte Teoso sãkire, ipaniãtakiti iõkatsopatakori. Txamari kona hñte kamari Teoso paniãtakiti. Kona ãtika hñte kamari ipaniãtakiti, kotxi hinirekari hõkinino nota —itxana ninoa.

²⁰ Ininiã ninoa apakapapiretari:

—Maerekati matamatakoti auañtotai pite. Kiripa kinirão okaka txai pite? Iua maerekati matamatakoti xika ikara atoko pitxa pisãkire —itxarina.

²¹ Ininiã Xesosi:

—Nota kamari posotiiretxi tomatikoõtixitisaaki, iua kiki matipokotakati nimakanani-takasaaki, ininiãkara hñte tsorãkaãta. Hñuãkatari niparãkauatini. ²² Txamari hñte apaka parãkauata tomatiko õtisaaki, kotxi hñkamari Teoso takaõtixikare hamarite ãtoã tomatiko õtisaaki. Moisesini paniãtai Teoso takaõtixikare hñkamini hamarite ãtoã oito õti iua auakasaaki. Ari hinirimane kitxakapirãkarini, Moisesini apisapanika, oerekepekari ikara atoko inakari hñkamini. ²³ Ininiã hñte kamari Moisesi paniãtakiti tomatikoõtixitisaaki. Ikara atoko ininiã, kinirepa hñte omanatano nota, iua kiki erekepeka nitxãkitakini xika tomatikoõtixitisaaki? ²⁴ Iteene pimimarotakanisaakiri ãti kamakiti, kona pakiritapiri:

“Iua kamari maerekati,” kona pitxape. !Papoĩtapiri āti. Atāo inakarínoka pinita, atāo pimarotini ĩkapani –itxa Xesosi.

Xesosikani Teoso Mereēkiti Txataua?

²⁵ Apanakini kākiti Xerosareē auakani txanātari:

–Ere kikikani ninoa kinirāo okaenetakitikani? ²⁶ Hātamatari. Iua sākiraúanāta kākiti apisatoō. Kona kapīkareri iua. Auĩtetxiakori !kasākirena. Atauako aauĩteakori auikatarisākire atxiĩti? Atxiĩti auikatarina Xesosi Teoso mereēkiti aiātapanātakiti ininiāua? ²⁷ Atāo Teoso mereēkiti aiātapanātakiti apokasaaki, kona kimarotikori iua ininimoni. Ate amakinika imarotapitikari iua Xesosi ininimoni. Kariréiakiri iua, ininiā Xesosi Teoso mereēkiti aiātapakiti litxaua –itxanātana.

²⁸ Teoso misākiretiko aikotiā Xesosi oerekarauanātakasaaki, itaparasākireritika ipimaāna kākiti iuaā auakani:

–Atauako hĩte imarotatanota? Atauako himarotatari notaininimoni? Kona notaka iokanataua kākitimoni. Niokanataāka. Notapaniātakari atāonoka isākire. Kona hĩte imarotari iua. ²⁹ Notaimarotari iua, kotxi iua auiniātaākirikarano nota. Iuara iokanatanokākitimoni –itxa Xesosi.

³⁰ Iuasaaki auĩtetxiakori nirekamari imaĩkinirina. Kona kamaĩkikori, kotxi imaĩkiko manapi kona apokapanika. ³¹ Ninoa auĩtetxiakori kona auikari Xesosi sākire, iuaritika itomaneri kākiti auikari Xesosi Teoso mereēkiti kākiti iātapakiti ininiua.

–Iua kiki inipitikara Teoso mereēkiti aiātapakiti itxaua, kotxi āti posotiiretxi apiarikamakari !auari –itxanātana.

Sotatoakori Iokanatiko Xesosimoni

³² Pariseoakori kenakotakasaakiri kākiti sākire ikara atoko inakari, ninoa, sasetotxi auĩteakori pakini iokanatarisotatoakori Xesosi imaĩkinina ĩkapani.

³³ Sotatoakori apokasaaki iuamoni, Xesosi txari kākiti iuaātaā:

–Mapaōtinoka hĩtekata nauako. Eereka nisa nipaniātakirimoni. ³⁴ Hinitapiikamano, !hāpokapanino. Nisinimoni kona hĩte posotari hĩsini –itxa Xesosi.

³⁵ Auĩtetxiakori ninoakakarika isākirauatana:

–Amonipa isa atxiĩti, ate mapokakaniāri iua? Atauako ōtakoxiti isatako Xoteoakori iarikakanimoni, āti uāka sauaki Xoteoakorimoni? Atauako oerekatari Xoteo minakaniua? ³⁶ Kotxi iua sākire: “Hinitanoko. !Hāpokano nota. Kona hĩte posotari nota sinimoni hĩsini,” itxa sākireta. Ate !imarotari isākire –itxanātakakana.

Āparaā Kākiti Auākitaākari

³⁷ Kiiniri mapotōkire ōti apiapoxokonita. Iua ōti Xesosi tima kākiti sauaki. Itaparasākireritika isāpirenauata ĩkinimane kenakotiniri ĩkapani:

–Piposonatakasaaki, notamoni pinako piātini ĩkapani. ³⁸ Teoso sākire iōkatsopatakori txari:

Nota sākire auiākari ākixinireē aua amomo atoko inakari. Iua āparaā txĩkitakari kākiti auāki inini.

–itxa Xesosi.

³⁹ Iua Erekarimatamatakoti amomo atoko itxa. Xesosi sākire auiākari apakapariko iua Erekarimatamatakoti. Iuasaaki Xesosi sākirauatakasaaki, iua Erekarimatamatakoti kona siākapanika kākitimoni, kotxi Xesosi kona kanapiriāpanika Teoso tixinemoni.

⁴⁰ Ikara Xesosi sākire ikenakotakasaaki itori kākiti txari:

–Atāopitikara ikira kiki Teoso sākire sāpiretakari aiātapakiti itxaua.

⁴¹ Apanakini txari:

–Iua Teoso mereēkiti aiātapakiti itxaua.

Apanakinipekana:

–Teoso mereēkiti aiātapakiti, Kariréiakiri !itxaua. ⁴² Teoso sākire iōkatsopatakori sāpiretari Teoso mereēkiti aiātapakiti, Taviini apika mekaniri itxaua. Iua iponaniāko Pereē sitatxiti Taviini auiniātaā –itxana.

Ikara atoko itxanãtana, kotxi kona imarotarina Xesosi iponaniiniãtaã Pereẽ sitatxiti.

⁴³ Iuasaaki apanakini auikari Xesosi sãkire. Apanakinipekana !auikari Xesosi sãkire.

⁴⁴ Apanakini nirekamari imaĩkiniri Xesosi iuasaaki, iuaritika iua maĩkakari !auari.

Sotatoakori Kanapiriã Xoteo Auĩteakorimoni

⁴⁵ Ininiã sotatoakori kanapiriã sasetotxi auĩteakorimoni, pariseoakori pakinimoni. Ininiã ipimaãna:

—Kinirepa kona himinari Xesosi uaimoni?

⁴⁶ —A pia imatiresãkireta iua. !Auari kãkiti iua atoko ina sãkiretakari, ininiãkara !apakata amaĩkiniri iua —itxana sotatoakori.

⁴⁷ Ininiã pariseoakori omanãkarauata.

—Atauako iua misirienetai hĩte apaka? Iua txĩkitakai hĩte isãkire hãuikini. ⁴⁸ !Auari auĩtetxi iua sãkire auiãkari. !Auari pariseo iua sãkire auiãkari. ⁴⁹ Kãkiti miĩkitetinanira auikari Xesosi sãkire. Xesosi sãkire auiãkari kona imarotari Moisesini paniãtakiti. Ininiãkara Teoso misiritanako ninoa —itxa pariseoakori sãkire.

⁵⁰ Iuasaaki Nikotemo inakori iuaãtaã aua. Pariseo itxaua. Iua õti apisapanika iuara sari Xesosimoni ĩkanõka imisãkiretiniri ĩkapani. Ninoa ikara atoko isãkirauatakasaaki, Nikotemo misãkiretana ninoa:

⁵¹ —Kãkiti kamakiti isãpiretini apisapanika, “maerekati ikamakiti,” kona hĩtxape. Ikara atoko itxa Moisesini oerekasaakia ate —itxana.

⁵² Ininiã ninoa pariseoakori:

—Atxiĩti pite Karirėiakirikai apaka, Xesosi atoko? Iteene patatsopatariko Teoso sãkire iõkatsopatakori. Iua iteene patatsopatakasaaki, iuasaakiikarako pimarotariko !auari Teoso sãkire sãpiretakari, Karirėia tõpakiri —itxarina iua.

⁵³ Eereka ikinimane sari aapokomonina.

8

Sito Őtaniri Minakotikatika Sirĩkakarõ

¹ Iuasaaki Xesosi sari Orivanape Xiratamoni. Oriva txipokori. ² Katimatinĩkata ikanapiriã Teoso misãkiretiko aicotimoni. Iuasaaki ikinipoko kãkiti apotiitaua iuamoni. Ininiã Xesosi topãka, Teoso sãkire isãpiretini ĩkapani. ³ Iuasaaki kaiõkatsopareriakori, pariseoakori pakini minaro sito iuamoni. Ninoa apokaro oa sito õtaniri minakotikatika osirĩkini. Itakaronã oa ikinimane apisatoõ.

⁴ —Koerekareri, aãpokaro oia sito õtaniri minakotikatika osirĩkini. ⁵ Moisesini sãkire iõkatsopatakori paniãtaua ikara atoko inakaro kai soroã oõkaãka. Pitepekana, kiãtokopa atxataro oa? —itxana Xesosimoni.

⁶ Ikara atoko ipimaãrina Xesosi, kotxi inirekarina Xesosi kerokiniri isãkire. Inirekarina Moisesini paniãtakiti iaõka imakamakaniã, ininiã maerekati ikamapeka. Txamari !kasãkireri Xesosi. Iokirita, iõkata itxari kipatxi iuakokiã. Imakenakotakiniti atoko itxa.

⁷ Ipimarauatapanikana, ininiã Xesosi õkaõkitaua.

—Maerekati makamakaturako ĩkiika kiporonakiniro aroa kai soroã —itxa Xesosi.

⁸ Eereka Xesosi iuaĩkana iokirita, iõkata itxari kipatxi. ⁹ Ninoa ikaraene ikenakotakasaakina, iua apiata kiomãtxi inakariua sipeka. Eereka iua tikini auakari apaka sipeka. Ikara atoko itxaãpotana ikinikana isinina. Eereka Xesosinoka kaikota oa sitokata. ¹⁰ Xesosi õkaõkitaua, atamata itxaro oa sito. Oanoka kaikota iuaã.

—Ītapari pimaerekani sãpiretakani? —itxaro.

¹¹ —Apiananiri, isipekana nimaerekani sãpiretakani —otxari.

—Nota apaka kona sãpiretari pimaerekani. Pisipeka. Maerekati kona pikamapinikako —itxaro.

Kãkiti Xinire Iopiniãkari

¹² Eereka Xesosi iuaĩkana oerekari kãkiti.

—Nota ikini itixiti auakani tirikapite atoko nitxaua, kotxi noerekari Teoso sãkire notakata sikani. Teoso mimarotakani ipiaã sikani itxauana. Notakata sikanipekana ! it̃pokota ipiaã. Nota sikana ninoa at̃tipirika auinina ikapani —itxa Xesosi.

¹³ Ininiã pariseoakori misãkiretari Xesosi:

—Kona ate auikapiretari pisãkire, kotxi pitenani sãpiretari pisãkire. Ikara atoko ininiã, kona aimarotari atãoene inini pisãkire. At̃i sãpiretiniãri pite sãkire iaõka, aãuikari atxiĩti —itxarina Xesosi.

¹⁴ Ininiã Xesosi:

—Nota sãkirekara ikara atoko nitxai h̃ite, iuaritika atãoenekara ikara atoko nitxai h̃ite, kotxi nota imarotari nininimoni, nimarotari nisinimoni. Kona h̃ite imarotari nota ininimoni. Kona h̃ite imarotari nota sinimoni. ¹⁵ Kãkiti h̃itxaua, ininiã hãpoĩrauata, kotxi !himarotari atão. Kona nota txari kãkitimoni: “Pite, peerekai pite. Pitepekana, !erekai pite.” !Ikara atoko !nitxari kãkiti. ¹⁶ Iuaritika nisãpiretakasaakiri kãkiti kamakiti, atãonoka nitxa nisãkire, kotxi kona notananini sãpirenauata. Niri niokanatakiri sãpiretakitixikana nisãpireta. ¹⁷ Kitxakapir̃ka h̃iteka kiomaneakorini sãkire iõkatsopatakori txari:

Kãkiti itikakitixikana at̃i itikakiti. Ninoa ipi sãkire at̃inoka auiniã, ininiã ninoa sãkire atãonoka itxa, itxa h̃ikiomane sãkire. ¹⁸ Nota sãpiretari nota pirena. Niri niokanatakiri apaka sãpiretari nota pirena nisãkiretxikana, ininiã ipi auape —itxa.

¹⁹ —Naniparari piri? —itxarina.

—Kona himarotano nota. Niri apaka kona himarota. Nota himarotaãkamako, niri apaka himarotamako.

²⁰ Ikara atoko Xesosi sãkirauata. Txineiro Teoso ikapani sikikoãtaã takote Xesosi oerekarauata Teoso misãkiretiko aikotiã. Xesosi ikara atoko isãpirenauata, iuaritika kona kamaĩkikori, kotxi imaĩkiko manapi kona apokapanika.

Xesosi Sinimoni Kãkiti Masikani

²¹ Iuaĩkana Xesosi misãkiretari kãkiti:

—Nisipiriko. Eereka hinitapiimano. Nota sinimoni !hãuiritaãka h̃isini. H̃ipinakasaaki, himaerekanikatika h̃ipinako —itxa Xesosi.

²² Xoteo auĩteakori napetari:

—Atauako iuaka okatauako? Kotxi iua txari: “Nota sinimoni kona hãuiritaãka h̃isini” —itxana ninoa.

²³ Iuaĩkana Xesosi sãkirauata ninoamoni:

—Ik̃oraxitikinirai h̃ite. Nota itanokiri. H̃ite ik̃ora itixikinirai h̃ite. !Ik̃oraxitikirino nota.

²⁴ Ikara atoko ininiãkara, nota txai h̃ite: “H̃ipinakasaaki himaerekanikatika h̃ipinako,” nitxai. Himauikakanisaakiri nisãkire nota pirena, h̃ipinakasaaki himaerekanikatika h̃ipinako. Kona Teoso makatxakinii himaerekani —Xesosi txana ninoa.

²⁵ —Kiriparai pite? —itxarina Xesosi.

—Merepitipanika nisãpiretakitikara iuakarano nota. ²⁶ Nisãpiretakiti t̃ikane h̃ite maerekani nisãpiretini t̃ikane kaiãopokori. Nota iokanatakari atãoenenekara isãkire. Iua sãpiretakitinokara nisãpiretari kãkiti itixi auakani —itxa Xesosi.

²⁷ Ninoa !imarotari Xesosi iokanatakari aĩri Teoso. ²⁸ Ininiã Xesosi txana:

—Nota h̃itari iaxitikiri hõkasaaki, niĩto itano hõkitikasaaki, iuasaakiikarako himarotano kinakaripa nota. Iuasaaki himarotariko notaka sãkire !nisãpireta. Niri oereẽkitinokara nisãpireta. ²⁹ Iua niokanatakiri notakata aua. Niri !itakanapano nota, kotxi inireẽkitinoka nikama —itxa Xesosi sãkire.

³⁰ Xesosi ikara atoko ina sãkiretakasaaki, itomaneri kãkiti auikari isãkire.

Õpoĩkakoni Pirena

³¹ Ininiã Xesosi sãkirauata Xoteoakorimoni iua sãkire auiãkanimoni.

—Nisäkire iaõka hĩkamakasaaki, atão nimoianariakori hĩtxauako. ³² Atão nimoianariakori hinakasaakiua, himarotari atãonoka inakari. Atãonoka inakari himarotakasaaki, õpoĩkakoni atoko hĩtxaua.

³³ Ninoa apakapapireta:

—Apraõoni apika mekanirireua ate, ininiã anirekinimoni asa. Nitiritxi iamotakoni ! atxaua. Kinirepa õpoĩkakoni atoko pitxĩkitakaua? —itxana.

³⁴ Ininiã Xesosi:

—Atãonoka nitxai hĩte. Maerekanitxi nitiri atoko itxa kãkiti maerekati kamakari. ³⁵ Nitiritxi iamotakori ãtipirika !auari ipatrãote aapoko. Patrão ãkiri auapika ãtipirika iri aapoko. ³⁶ Nota Teoso ãkiri txĩkitakasaakiri kãkiti õpoĩkakori atoko ininiua, maerekanitxi nitiri !itxaikauako. Iuasaaki iposotari erekari ikamini.

Apraõoni Apika Mekaniriakori

³⁷ —Nimarotari Apraõoni apika mekaniriakori hininiua, txamari hinirekari hõkinino. Nisäkire himauiãkani xika hinirekari hõkinino. ³⁸ Nota sãpiretai hĩte nota iri oerekakiti. Hĩte kamari hĩte iri paniãtakiti —itxa Xesosi.

³⁹ —Apraõoni ate iri —itxana ninoa.

Ininiã Xesosi:

—Apraõoni apika mekaniriakori hininiãua, Apraõoni kamakiti atoko hĩkamamako. ⁴⁰ Atãonoka nisãpiretai hĩte. Teoso sãpiretakinokara nisãpiretai, iuaritika hinirekari hõkinino. Apraõoni !ikamari ikara atoko inakari. ⁴¹ Hĩte kamari hĩte iri kamakiti atoko inakari —itxa Xesosi.

—Teosonanira ate iri. Ate atãopitika iua anaakori atxaua —itxana.

⁴² —Teoso atão hĩri ininiãua, nota hĩtiretamako, kotxi Teoso auiniãtaã nota ina uaimoni. Kona notaka iokanataua. Teosora iokanatanano nota uaimoni. ⁴³ Kininiãpa !hiĩkitetatarikara atoko nininii? !Himarotari nisäkire, kotxi kona xatiki hinirekari nisäkire iaõka hĩkamini. ⁴⁴ Satanasira hĩri. Hĩte nirekari maerekati, Satanasi nireẽkiti iaõka hĩkamini. Kitxakapirĩka itixi kamiko atokopanika kokaniri itxaua Satanasi. Iua !inirekari atãoene isãpiretini. !Iposotari atãoene isãpiretini. Aãpirenanokara iua imarota, kotxi aãpirenaãri itxaua iua. Aãpirenaãri iri itxaua iua Satanasi. ⁴⁵ Nisäkire atão, ininiãkara hĩte !auikari nisäkire. ⁴⁶ Hĩte ãtika itikatari maerekati nikamini? ãtika !itikari maerekati nikamini, kotxi kona maerekati kona nikama. Ininiã kinirepa kona hĩte auikari nisäkire? ⁴⁷ Teoso anaakori kĩpitari iua sãkire. Hĩte kona kĩpitari iua sãkire, kotxi iua anaakori !hĩtxaua hĩte —Xesosi txana ninoa.

Xesosi Apraõo Apisapanika Auini

⁴⁸ Ininiã Xoteoakori txari Xesosi:

—Ate sãkire atão. Samariakiri pitxaua pite. Maerekati Matamatakoti auaĩtotai pite —itxana.

Ninoa akiriuãkatari Xesosi “Samariakiri,” kotxi Xoteoakori omanatana Samariakini.

⁴⁹ Ininiã Xesosi:

—Maerekati Matamatakoti kona auaĩtotano nota. Nota paxitari niri, txamari hĩte kona paxitano nota. ⁵⁰ Kona notani nitari kãkiti nota iuikakani tĩkane. Nirira nirekari kãkiti iuikinino nota. Nirira imarotari nisäkire atãonoka inini. ⁵¹ Nota sãkire iaõka kamakari ! ipina. Ikara atãoene.

⁵² Xoteoakori apakapapiretari:

—Uatxa aimarotari maerekati matamatakoti auaĩtotai pite, kotxi Apraõoni ipĩpe. Teoso sãkire sãpiretakanini apaka ipĩpe. Kinirepa pite sãkire: “Nota sãkire iaõka kamakari !ipina,” pitxa? ⁵³ Aĩrini Apraõoni ipĩpe. Pite apiata atxiĩti? Teoso sãkire sãpiretakanini apaka ipĩpe. Kiriparai pite? —itxarina Xesosi.

⁵⁴ Ininiã Xesosi:

—Notaka niuikiniua !apakata. Nirira iuikano nota. Hĩte sãkire: “Ateosone iua,” txamari nota irira iua. ⁵⁵ Kona himarotari Teoso. Notananira imarotari Teoso. Nota “kona

Teoso nimarota,” nininiã, hĩte atokokamarako nitxamako. Aãpirenaãri nitxamauako. Nota imarotapitikari iua. Nota kĩpitari isãkire. ⁵⁶ Hĩri Apraão poxokoniuata, nota uai apokini ikenakoenetakasaaki. Iua itikari nota uai apokini, ininiã iua poxokoniuata.

⁵⁷ Ininiã ninoa Xoteoakori: —Pite sĩkoõta anokanani ! apokapanika, iuaritika paõkitatari Apraão? Paxirari pisãkire —itxarina.

⁵⁸ —Apraão apisapanikara nota aua. Ikara atãoene nitxai hĩte —itxa Xesosi.

⁵⁹ Ikara isãkire ikenakotakasaakina, ikosekarina kai soro Xesosi ikiporonakinina ĩkapani, okinina ĩkapani. Xesosi kipataua. Osipikari Teoso misãkiretiko aikoti. Inapaãpota ninoa sauaki.

9

Mõsiãreti Xesosi Erekapeka Inĩkitakini

¹ Xesosi tĩpokotakasaaki, itikari mõsiãreti. Iua ponaniãkasaaki, mõsiãreti itxapekaua.

² Xesosi moianariakori pimaãri iua:

—Koerekareri, kiripa kamari maerekati iua mõsiãreti inini? Iuakani? Irikani? Inorokani?

³ Ininiã Xesosi:

—Kona iua maerekani xikani mõsiãreti itxaua. Kona iri maerekani xikani, kona inoro maerekani xikani mõsiãreti itxaua. Kona maerekanitxi xikani mõsiãreti itxaua. Iua mõsiãreti Teoso posotiire kãkiti imarotini ĩkapanira. ⁴ Kãkiti parĩkauata pokamara. Mapiãpeka inakasaaki, kona kãkiti posotaikari iparĩkauatini. Iua atokokana akamariko niokanatakiri paniãtakiti aãuapanika anakasaaki. Apinaka atoko kona akamaikari Teoso paniãtakiti ĩkorapokoriti. ⁵ ĩkorapokoriti nauakasaaki, niopinikana ikinimane ãkixinire Teoso imarotininina ĩkapani —itxa Xesosi.

⁶ Ikara inaãka atoko ienemaã ixiti oakaka Xesosi. Ikamari ãkape, minapa itxari mõsiãreti oki nopini. ⁷ Iokanatarari:

—Parokari poki Siroee poamoni —itxari mõsiãreti.

Iuaã auari ipoa xapitikiri kãkiti kamakiti. Iua ipoa uãka “Siroee.” Iua uãkatxikana “Iokanatakori” itxaua. Iua sari Siroeemoni. Arokatoõtaua. Iuasaakipeka kõiãrepeka itxa.

⁸ Aapoko takote auakani, kãkiti mitxi mõsiãreti itikakani pakini, ninoa misãkiretakakaua:

—Ikira kiki mitxi iitopãkanãtapika inakarikani, kãkiti txineirote amanaãnãtapika inakarikani, ikira kiki? —itxana.

⁹ Apanakini apakapapiretari:

—Ari, iuapitikara.

Apanakinipekana apakapapiretari:

—Kona. Kona iuani. ãti kiki iua mõsiãreti atoko inakarira.

Iua mitxi mõsiãreti apakapapiretari:

—Ari, iuapitikarano nota —itxa.

¹⁰ Ininiã ninoa:

—Kiãtokopa pitxa uatxa kõiãrepeka pitxapeka? —itxarina.

¹¹ —Iua Xesosi inakori kamari ãkape, nokiã minapa itxari. Ipaniãtano: “ãparaã Siroee inakorimoni pisa. Iuaã parokatoõtaua,” itxano nota. Ininiã nisa. Narokatoõtaua. Iuasaakipeka nota kõiãrepekano —itxa.

¹² —Namoniparari iua? —itxarina.

—A, meta —itxa iua mitxi mõsiãreti.

Pariseoakori Mitxi Mõsiãreti Inakarikata

¹³ Ninoa anikari iua mitxi mõsiãreti pariseoakorimoni. ¹⁴ Iua õti Xesosi kamakasaakiri ãkape mõsiãreti kõiãrepeka inĩkitakini ĩkapani tomatiko õtisaaki iuasaaki. ¹⁵ Ninoa

anikasaakiri iua mitxi mōsiāreti inakari pariseoakorimoni, pariseoakori apaka pimaāri iua:

—Kininiāpa uatxa kōsiārepeka pitxa? —itxana.

—Ākapeēra noki nopini iminapa. Eereka narokatoōtaua. Uatxa kōsiārepeka nitxa —itxa.

¹⁶ Pariseoakori ātikaka txari:

—Iua kiki, ākape mōsiāreti oki nopini minapakari, kona iua kamari Teoso paniātakiti, kotxi iparīkauata tomatiko ōtisaaki. !Apakata ikamakiti.

Pariseoakori ātikakapekana sākirauata:

—Maerekati kamakari kona kamari ikara atoko inakari posotiiretxi, mōsiāreti kōsiārepeka inīkitakini.

Ininiā pariseoakori taparakienatakakaua ikara xika. ¹⁷ Iuaīkana pariseoakori misākiretari iua kiki:

—Kiātokopa inakaripa iua kiki pite makananitikari? —itxarina iua.

—Teoso sākire sāpiretakari itxaua iua.

¹⁸ Xoteo auīteakori kona auikari isākire, mitxi mōsiāreti eereka kōsiārepeka inakari sākire. Ininiā ninoa akiritari iri, inoro pakini.

¹⁹ —Hīte sākire hamarite auakasaaki mōsiāreti itxapekaua. Hamaritekani ere? Kiātokopa uatxa kōsiārepeka itxa? —itxana.

²⁰ —Ari, ate ākiripitikara. Iponaniākasaaki, mōsiārepeka itxaua. ²¹ Kona ate imarotari kiriāpareuako uatxa kōsiārepeka itxa. Kona ate imarotari kiriuako kamari kōsiārepeka inini. Hīpimaāri iua, kotxi mitapekari iua. Iuaka apakapapiretai hīte —iri, inoro pakini txana ninoa.

²² Iri, inoro pakini ikara atoko itxana Xoteo auīteakori ipīkinina xika. Xoteo auīteakori sāpiretpekari kākiti: “Kākiti Xesosi sākire auīākani, Teoso mereēkiti ininiua auīākani, kākiti iātapakiti ininiua auīākani, kona auiritaākaikana ĩroinina aiko Xoteo apotiitiniātaāua.”

²³ Ininiā pīkaretxi xika iri, inoro pakini txari: “Hīpimaāri iua. Mitapekari iua,” itxana ninoa.

²⁴ Ininiā iuaīkana pariseoakori akiritari iua kiki mitxi mōsiāreti inakari.

—Atāonanira pisāpiretako Teoso apisatoō. Ate imarotari maerekatnoka ikamini Xesosi, kotxi imakananirauata tomatiko ōtisaaki —itxarina.

²⁵ Ininiā iua:

—Kona nimarotari maerekati ikamini. Kona nimarotari erekari ikamini. Mitxipeka mōsiāreti nitxaua. Uatxa kōsiārepeka nitxaua. Ikaranoka nimarota —itxana ninoa.

²⁶ —Kiātokopa itxai kōsiārepeka inīkitakiniāi?

²⁷ Iua mitxi mōsiāreti inakari apakapapiretari:

—Nisāpiretpekai hīte mixikanani, txamari !hāuikari nisākire. Kinirepa hinirekatari iuaīkana nisāpiretiniī? Atauako hīte apaka nirekari iua sākire hāuikini? —itxana.

²⁸ Ininiā itxitarina:

—Pitera auikari iua sākire. Ate auikari Moisesini sākire. ²⁹ Aimarotari Teoso misākiretari Moisesini. Iua Xesosi kamari maerekati. !Aimarotari amonikiripa iua ina —itxana.

³⁰ Iua kiki apakapapiretari:

—Anekani. Kona hīte imarotari amonikiriuko iua ina. Iuara kamaōsiāretano nota. ³¹ Teoso kona maākatari maerekati kamakari amanaākiti. Teoso teosone-takani amanaākiti imaākatapitika. Iua nirekaākiti kamakari amanaākiti imaākatapitika.

³² Mitxipeka mōsiāreti kōsiārepeka inīkitaākari kona auari. Itixi kamikosaakipanika ! auari kōsiārepeka inīkitaākari. Uatxaikara auape. ³³ Xesosi Teoso iokanatakiti iminakan-imauko, !ikamamariko posotiiretxi —itxa iua.

³⁴ Ininiā pariseoakori:

—Pite maerekatipeka auakarikai. Ātipirika pite kamari maerekati. Maerekatnoka piīkiteta. Iuaritika pinirekatari ate poerekini? Konapitini. Kona ate nirekari ikara

pisäkire. Pisipiniikaua. Kona uai pikanapiripinika. Ate kona nirekari pite uai kãkiti apotiitiniãtaãua aikoti pinini –ninoa txari iua.

Ininiã aiko porikiti iokanatarina.

Mitxi Mõsiãreti Inakari Auikiniri Xesosi Sãkire

³⁵ Xesosi kenakopiretari iporikiti iokanatiko mitxi mõsiãreti inakari, ininiã Xesosi nitari iua. Apokasaakiri, itxari:

–Atauako pauikatari Teoso ãkiri sãkire? –itxari.

³⁶ –Kipa iua? Nimarotiniãri, nauikapitikariko –itxa.

³⁷ –Pite aõkitapekari Teoso ãkiri. Iuapitikara misãkirenãtai pite uatxa –itxa.

³⁸ –Apiananiri, nota aukari pite Teoso ãkiri pininiua.

Ininiã iua kapotoreëkua Xesosi apisatoõ.

³⁹ –Ïkorapokoriti napoka Teoso sãkire auiaãkani ipinimoni nitakinina ïkapani. Isãkire mauiaãkani ipinimoni nitakinina ïkapani napoka ïkorapokoriti. Apanakini nisikaposoti-ireta, Teoso sãkire auikinina ïkapani. Mitxi ninoa mõsiãreti atoko itxauana, kotxi mitxi !imarotarina Teoso. Ninoa auikapiretakasaakiri Teoso sãkire, kõsiãreri atoko itxapekauana. Apanakinipekana atão minakati isãkirena: “Nimarotapitikari Teoso.” Ninoa uãkatari kõsiãreri atoko ininiuana. Txamari kona atão ninoa nirekari imarotini Teoso. !Nisikari posotiiretxi ninoamoni, Teoso sãkire auikinina ïkapani. Kãkiti iua atoko inakari mõsiãreti atoko itxaua –itxa Xesosi.

⁴⁰ Ætikaka pariseoakori Xesosi takote auakani kenakotari.

–Atauako atekani apaka mõsiãreti atoko atxaua? –itxana.

⁴¹ –“Mõsiãreni atoko atxaua,” hininiã hãsãkire, ininiã atão hãsãkire. Txamari hãte txari: “Kõsiãreua ate,” hãtxama. Iua atoko hininiã hãkamapitikari maerekati, kotxi kona hãuikari Teoso sãkire –Xesosi txana ninoa.

10

Soti Auãte Pitikiri

¹ Xesosi sãkirauatakasaaki, ia atoko itxa isãpirena:

–Atãopitikara ia atoko nitxapaniiko hãte. Soti auãte ïroã pirikeri itoremoni. Itoremoni mĩroãkani kiãtiriri itxauana, kotxi ãtiãtaã ikanãka ïroini ïkapani. ² Pirikeri toremoni ïroãkari soti auãte pitikiri. ³ Initiri osereëri pirikeri tore iua ïkapani. Soti auãte kenakotari ipitikiri sãkire. Ipitikiri imarotari ikinipoko ipiraakori uãka akiritinina ïkapani. Iuara anikana inipokotinina ïkapani. ⁴ Porikiti auakasaakina, iua saãpota ninoa apisa. Iua tikini isana ninoa. Ninoa imarotari iua sãkire ene. ⁵ Ninoa kona sari kãkiti imimarotakininitina tikini. Ipitikiri minakotika akiritakasaakina, imitekana. Kona imarotarina imapitikiritakininitina sãkire.

⁶ Ikara sãpirenatxi atão inakari oerekiko Xesosi sãpiretari pariseoakori. Txamari ninoa kona imarotari Xesosi ikara atoko inakari isãpirena.

Xesosi Soti Auãte Pitikiri Erekaritxaua

⁷ Xesosi iuaãkana sãkirauata.

–Inipitikara nota pirikeri tore nitxaua, soti auãte ïroini ïkapani. ⁸ Nota apisa apoãkani, atão minasãkiretakani kiãtiririni itxauana. Soti auãte kona maãkatari ninoa sãkire. ⁹ Nota itore nitxaua. Kãkiti ïroiniãtaã tore nitxaua. Nota makatxakari uai ïroãkari maerekani, auapininiika inini ïkapani. Ïroã, ipokãka itxapika. Kona kapãkareri. Natxi !auari. ¹⁰ Kiãtiriri apoka iãtiriuatini ïkapani, okaniuatini ïkapani, imisirikarauatini ïkapani. No-tapekana apoka kãkiti auapininiika inini ïkapani, kãkiti auini ereka inini ïkapani.

¹¹ Pitikiritxi erekari nitxaua nota. Pitikiritxi erekari ipina ipiraakori mapinakani ïkapani. ¹² Nitiritxi soti auãteakori pitikiri !itxaua. Anãpa auãte kaneenamari apokasaaki, iua miteka. Itakanapanako soti auãteakori. Ininiã anãpa maãkari soti auãte, õikepoata itxana. ¹³ Iua nitiritxi mitekako, kotxi txineiro ïkapaninokara iparãkauata. Kona atão itiretari soti auãte.

¹⁴—Soti auíte pitikiri erekari nitxaua nota. Atão nimarotari nipiraakori. Ninoa apaka atão imarotano nota. ¹⁵ Iua atokokana niri imarotano nota. Nota apaka imarotari niri. Nota ipinako soti auíteakori nota nakiti mapinakani ìkapani. ¹⁶ Nota aua apanakini soti auíteakori apaka. Uatxa ia pirikeri ãki !auapanikana. Niminanako ninoa apaka ia pirikeri ãki auinina ìkapani. Ninoa auikariko nisãkire. Ininiã ninoa imakinika aua ãtika pirikeri ãki. Ætikarako ninoa pitikiri.

¹⁷ —Niri taretano, kotxi nauiritari nipinini, iuaĩkana nõkitikiniua ìkapani. ¹⁸ Kãkiti ! iposotari okinino nota nimanirekasaakiri nokiko. Nota sikariko niĩto nokiko ìkapani. Ninirekasaaki manapi nipina. Ninirekasaaki manapi nõkitikaua. Ikara atoko niri paniãtano nota —itxa Xesosi.

¹⁹ Ikara Xesosi sãkire Xoteoakori kenakotakasaaki, itaparakienatakakauana. Apanakini potxitari Xesosi sãkire. Apanakini kona potxitari.

²⁰ Apanakini txari:

—Satanasi nitiri auaĩtotari iua.

Ætipekana txari:

—Imapitxirita. Kinirepa hĩkenakotatari mapitxiritakari sãkire? —itxana ninoa.

²¹ Apanakini txari:

—Satanasi nitiri auaĩtotakiti !ikara atoko itxa sãkireta. Satanasi nitiri kona kõsiãrepeka txĩkitakari mõiãreti —itxana.

Xoteoakori !Auikari Xesosi Sãkire

²² Mitaãsaaki Xoteoakori kamari kiiniri Xerosareẽ. Iuasaaki ixinikarina Teoso misãkiretiko aikoti merepaniko kamiko. ²³ Iuasaaki Xesosi tĩpokota aiko Teoso misãkiretikoãtaã, Saromãoni inakoriãtaã. ²⁴ Iuaã Xoteoakori apotiitaua iuamoni. Iuasaaki ninoa txari iua:

—Pite Teoso mereẽkiti pininiãua, pisãpiretaua. Akokaxiti anirekari aimarotiniri ikara —itxarina.

²⁵ Xesosi apakapapiretana:

—Nisãpiretapekai hĩte. Kona hãuikari nota sãkire. Niposotiire nikamakiti niri uãkaã oerekapekai hĩte. ²⁶ Nisãpiretapekai hĩte, txamari kona hãuikari nota sãkire, kotxi nisoti auĩtene kona hĩtxaua. ²⁷ Nisoti auĩtene imarotari nisãkire. Nota imarotana ninoa. Ninoa kapokitano nota. ²⁸ Nitxĩkitakana ninoa ãtipirika auinina. Nota kamari ninoa imipĩkanina tĩkane. Kona kamakatzakikona nota nĩkatakini. ²⁹ Niri sikana ninoa notamoni. Api-atakari itxaua iua. Ininiã ãti kona posotari imakatzakinina niri nĩkatakini. ³⁰ Niri, nota pakini ãtika atxaua.

³¹ Ikara atoko Xesosi inakasaaki, Xoteoakori morõkari kai soro ikiporonakinirina ìkapani. ³² Xesosi sãkirauata ninoamoni:

—Kaiãopokori erekari niri nakiti noerekapekai hĩte. Kinakarixikapa hinireka hĩkiporonakinino nota? —itxa Xesosi.

³³ Xoteoakori apakapapireta:

—Kona akiporonakai erekari pikaminiã. Akiporonakai, “Teosorano nota” pinini xikara. Pite kiki, iuaritika “Teosorano,” pitxa. Ininiã maerekati pikamapeka Teosomonikari.

³⁴ Xesosi apakapapiretana:

—Kitxakapirĩka Teoso sãkire iõkatsopatakori txari:

Nitxai: “Teosoakori hĩtxaua hĩte.”

³⁵ Aimarotari Teoso sãkire iõkatsopatakori ãtipirika atão inini. Teoso akiriuãkatana ninoa isãkire apakapakani “teosoakori.” ³⁶ Ininiã kinirepa hĩte kamaãkaretxitano. Niri mereẽno nota inireẽkiti nikamini ìkapani. Iokanatano ìkorapokoritimoni. Ininiã kinirepa hãpoĩtano Teoso nimisãkirepiretini, “Teoso ãkirirano” ninakasaaki? ³⁷ Nimakamakaniãri niri nirekaãkiti, iuasaaki kona hãuikari nota sãkire. ³⁸ Nikaminiãri inirekaãkiti, iuaritika

himauikakaniãri nisãkire, hãuikariko niposotiire. Hĩtikakiti hãuika. Ininiã himarotariko, hãuikariko, niri, nota pakini ãtika aniniua –itxa Xesosi.

³⁹ Iuasaakipeka pariseoakori omanãkarauata. Iuaĩkana inirekarina imaĩkinirina Xesosi. Txamari iuasaakipe isipe.

⁴⁰ Iuaĩkana Xesosi kanapiriã Xotão ipiniãmoni. Iuaã ikaikota Xoão kapatxisarerini patxisarauatiniãtaã. ⁴¹ Itomaneri kãkiti sari iuamoni. Ininiã ninoa txa:

–Xoão kona kamari posotiiretxi, iuaritika ikinika isãpiretakiti Xesosi pirena atão inakaranoka isãpireta.

⁴² Ininiã itori kãkiti iuaãtaã auikari Xesosi sãkire.

11

Arásaro Ipinini

¹ Kiki Arásaro inakori aua ipi itaro, Maria, Mata pakini. Ninoa aua Petânia aapokotxiti. Iuasaaki Arásaro amianata. ² Xesosi ipinini apisa, oa Maria arokari Xesosi kiti kamariãroã, oiãkoã kaxipota otxari. Oa Maria itari Arásaro amianata. ³ Iua amianatakasaaki, Maria, Mata pakini iokanapireta Xesosimoni:

–Apiananiri, pitiretakiti amianata –otxari.

⁴ Ninoa iokanapirena ikenakotakasaaki, iua txa:

–Amianari inokari Arásaro kona ipinini ĩkapanini. Teoso posotiire oerekini ĩkapanira iua amianari inokari iua. Kãkiti: “Teoso ãkiri peerekari” iniko ĩkapanira iua amianata.

⁵ Xesosi tiretari Mata, oĩtaro Maria, Arásaro pakini. ⁶ Ikenakotakasaakiri Arásaro amianatini, iua napapanikari ipi õti iuaxiti. ⁷ Eereka itxana imoianariakori:

–Iuaĩkana Xotéia tãpa masa.

⁸ Ininiã imoianariakori:

–Koerekareri, kitapani iuaã Xoteoakori nirekari kai soroã ikiporonakinii pite. Iuaritika pisatapanikako iuaãtaã? –itxarina.

⁹ Ininiã Xesosi:

–Pokamara tosi oara aua kãkiti parĩkauatini ĩkapani. Pokamara tĩpokotakari kona mãkitita, kotxi atokatxi iopinikari ikinipoko. ¹⁰ Txamari ĩkanõka tĩpokotakari mãkitita, kotxi atokatxi kamara !auari.

¹¹ Ininiã Xesosi:

–Amoianari Arásaro imakanãta. Nota õpirĩkariko iua –itxa Xesosi.

¹² Ininiã Xesosi moianariakori txa:

–Imakanãtiniã, erekaãpopekari uatxa –itxana.

¹³ Xesosi imarotari Arásaro ipinini, txamari imoianariakori uãkatari Arásaro atão imakini.

¹⁴ Ininiã Xesosi txana ninoa atão imarotinina ĩkapani:

–Arásaro ipĩpe. ¹⁵ Erekapitikari iuaã nimauakani, kotxi eereka hĩte auikariko nota sãkire. Masa iuaxiti. Maõkitari iua –itxa Xesosi.

¹⁶ Tomee Txítximo inakori misãkiretana apanakini Xesosi moianariakori:

–Masa iuakata apinini tĩkane.

Ikara atoko itxa isãkire, kotxi iuaxiti Xoteoakori nirekari okiniri Xesosi.

Kãkiti Auãki Inĩkitaãkari

¹⁷ Xesosi apokasaaki iuaxiti ipi ipi pakini õti napapeka. Ininiã iuasaaki Arásaroni katapeẽkaika. ¹⁸ Petânia Xerosareẽ takote. ¹⁹ Apanakini kãkiti apoka Mata, Maria pakinimoni. Ninoa moianatana, kotxi itarina !auaika.

²⁰ Mata kenakopiretari Xesosi apokaãpotini. Ininiã oa sari oaõkitiniri ĩkapani. Maria kaikota oaãpoko ãki.

²¹ Xesosimoni Mata apokasaaki, otxari iua:

–Apiananiri, pite uai auaãkamako, kona nitari ipinamako. ²² Iuaritika nimarotapitikari, pamanaãkiti Teoso sikapitikai –otxa.

²³ Ininiã Xesosi txaro:

—Pitari iuaĩkana auapanikako.

²⁴ Ininiã Mata:

—Nimarotari itixi xipokini õti nitari iuaĩkana auapanikako. Ipĩkani õkitikiniua õti, iua õkitikaua —otxa Mata.

²⁵ Ininiã Xesosi sãkirauata:

—Nota ipĩkari õkitikakarirano nota. Kãkiti auãki inĩkitaãkarirano nota. Nota sãkire auiãkari ipininiã, iuaritika iuaĩkana auapanikako. Kona ipinaika. ²⁶ Nota sãkire auiãkari auapanikako iuaĩkana. !Ipinaikako. Pauikatari ikara atoko nininii? —itxa Xesosi.

²⁷ Ininiã Mata:

—Apiananiri, nauikapitikari. Teoso mereẽkiti pitxaua. Teoso ãkiri pitxaua. Teoso iokanatakiti itiximoni ĩkari pitxaua. Ikara nauikapitika —oa txari iua.

Xesosi Txiapatini

²⁸ Eereka Mata sari oĩtaromoni. Oãkiritaro oa, mapara omisãkiretini ĩkapani.

—Koerekareri apope. Iua akiritai —otxa Mata.

²⁹ Maria kenakotari ikara inakasaaki, katimariã õkitikaua, iuamoni sa otxa oa.

³⁰ Iuasaaki Xesosi !apokapanika aapokotxiãtaã. Ikaikotapanika mitxi Mata apokiniãtaã.

³¹ Maria katimaritika õkitikasaakia, Xesosimoni osini ĩkapani, Xoteoakori, oaãpoko ãki auakani, oa mĩkapiritakani, sari oa tikini. Ninoa uãkatari akauarimoni osini otxiapatini ĩkapani.

³² Maria apoka Xesosimoni. Oãtamatakasaakiri iua, iua apisatoõ okapotoreẽkaua.

Otxari:

—Uai pauaãkamako, kona nitari ipinamako —otxa.

³³ Xesosi atamataro otxiapatini. Xoteoakori oakata apokakani txiapata apaka, ininiã Xesosi iteene matinaniuata ãkixinireẽ. ³⁴ Iua pimaãna:

—Nanipa hĩkatatari? —itxa.

Ininiã ninoa:

—Apiananiri, masa. Patariko iuaã —itxana.

³⁵ Iuasaaki Xesosi txiapata.

³⁶ —Hãtamataro Xesosi. Iua tiretapitikari Arásaroni —itxa Xoteoakori.

³⁷ ãtikaka Xoteoakori txa:

—Mõsiãreti kõsiãrepeka itxĩkitakapeka. Atxiĩti iua uai apokaãkamako, kona Arásaro ipinamako —itxana.

Xesosi Õkitikiniri Arásaroni

³⁸ Ininiã Xesosi iteene matinaniuata ãkixinireẽ. Iuasaaki isa akauarimoni. Ninoa takari ipĩkari kai auĩte ãki. Kai auĩte itotaãka.

³⁹ Ininiã Xesosi txari:

—Himakãtxakari akauari tore —itxa.

Mata, Arásaroni itaro txari Xesosi:

—Apiananiri, ipiakapeka. Ipi ipi õti pakinipeka ikatiko, ininiã patapasakari —otxari Xesosi.

⁴⁰ Ininiã Xesosi:

—Nota sãpiretpekai: “Nota sãkire pauikiniã, pitikariko Teoso posotiire” —itxaro.

⁴¹ Ininiã imakãtxakarina kai. Iuasaakipeka Xesosi ionakaãta iaxiti.

—Niri. Erekai, kotxi pikenakotari nisãkire. ⁴² Nimarotari ãtipirika pikenakotiniri nisãkire. Ikara atoko nitxa sãkireta kãkiti uai auakani kenakotiniri ĩkapani, kotxi ninirekari ninoa auikiniri pite iokanatinino nota uaimoni —itxa.

⁴³ Ikara atoko inaãka atoko akirikatari:

—Arásaro, põkitikaua. Pipokĩka.

⁴⁴ Ininiã iuasaakipeka Arásaro pokĩka. Imakinika iĩto mãkatxi mataã iapirikaãka. Itoõ apaka iapirikaãka mãkatxi mataã.

Ininiã Xesosi:

–Himakatxakari iapirikiko.

Xesosi Okaenëtiko Pirena
(*Mateo 26.1-5; Marko 14.1-2; Arókasi 22.1-2*)

⁴⁵ Xoteoakori Mariamoni ïkani itikari ikara atoko inakari, ininiã auikarina Xesosi Teoso äkiri ininiua. ⁴⁶ Ätikaka Xesosi kamakiti itikakani kanapiriã pariseoakorimoni. Isäpiretana Xesosi ökitikiniri Arásaro. ⁴⁷ Ininiã pariseoakori, sasetotxi auïteakori pakini apotiitaua. Imisäkiretakakana:

–Kiripa ate kama? Ia kiki kamari itori posotiiretxi. ⁴⁸ Aäuiritiniãri iua ikara atoko ikamini, ikinipoko kãkiti aukari iua säkire. Ininiã iua tikini isana. Ikara atoko ininiã, Homanoakori xipokari Teoso misäkiretiko aikoti ate nakiti, ate tixine apaka –itxana.

⁴⁹ Iuasaaki Kaipasi inakori sasetotxiakori auïte apiatakari inakari iua. Itxana:

–Hïte kona kimarorepanikai. ⁵⁰ Erekari äti kiki ipinini ikinimane mapinakani ïkapani. Ikara atoko ininiã, kona ikinipoko anirimane ipinako –itxa Kaipasi.

⁵¹ ïkorakanani sasetotxi auïte apiatakari itxaua Kaipasi. Ia atoko itxa: “Xesosi ipinako Xoteoakori mapinakani ïkapani. ⁵² Kona ninoa ïkapaninanini ipinako. Teoso anaakori iarikakani ïkapani apaka ipinako. Ininiã iuasaakirako iua apotiitari ikinipoko ninoa. Ininiã Teoso anaakori itxauanako,” itxa Kaipasi säkire.

⁵³ Iuasaaki eereka imapapiretarina Xesosi okinina tïkane. ⁵⁴ Ikara atoko ininiã, Xesosi kona saika Xotéia töpamoni. Isari Eparaiï sitatxitimoni, äparaã makipakaniãtaã takote. Iuaã ikaikota imoianariakorikata.

⁵⁵ Iuasaaki imatokoäpotarina Páskoa kiiniriti. Iuasaaki itomaneri Xoteoakori Xerosareë tōpa auakani sari Xerosareë sitatxitimoni. Iua kiiniri apisapanika, isana iuaã oerexiniretiniuana ïkapani. Iuasaaki amanaãrina Teoso imakatzakiniri maerekati ikamakitina. ⁵⁶ Iuaã Xoteoakori nitari Xesosi. Ninoakakarika ipimaãkakana:

–Atauako kiinirimoni inapani atxiïti?

⁵⁷ Sasetotxi auïteakori, pariseoakori pakini paniãtapekari kãkiti:

–Himarotakasaakiri Xesosi auiniãtaã, hïsäpiretauako ate, ininiã amaïkariko iua.

12

Maria Takari Kamariãro Xesosi Kitiã
(*Mateo 26.6-13; Marko 14.3-9*)

¹ Seisi öti Páskoa kiiniriti apisa, Xesosi sari Petánia sitatxitimoni. Iuaã aua Arásaro, Xesosi ökitikakiti Arásaro ipïkasaaki. ² Iuaã ikamaãka nipokori Xesosi ïkapani. Mata sikari nipokori kãkitimoni. Iuasaaki Arásaro apanakinikata topãka Xesosikata. ³ Iuasaaki Maria kosekaro kamariãro koana. Oia atão nato kamakoro. Ipixini kiro ominani aua. Kona koketakoroni. Natonokara. Pakaronero, iuaritika okitakaro Xesosi kitimoni. Oiãkoã okaxipokari. Iuasaaki aapokotxi äki omarinokara itxaua.

⁴ Txamari Xotasi Isikariotxi inakori !apokaerekatari kamariãro Xesosi kitiã okitakini. Iua Xotasi Simão äkiri. Xesosi moianari itxaua, txamari imïkapiritariko Xesosi.

⁵ Ininiã Xotasi txari:

–Kãkiti parïkauata tresëtosi pakini öti oia atoko inakaro kamariãro iamotiko ïkapani. Kinirepa kona ovëtixitaãka? Kinirepa txineiro mauakinitimoni !osika? –itxa Xotasi.

⁶ Ikara atoko itxa, kotxi kiïtiriri itxaua. Iua nïkataro ninoa txineirote. Iua itotapekari txineiro iïtirïkini. Iua !imaãkatana txineiro mauakiniti.

⁷ Xesosi apakapapiretari:

–Kona hïtxitapero Mariapani. Onïkataro kamariãro ia öti notamoni otakini ïkapani, kotxi oxinikari nikatiko öti ïkapani. ⁸ Minakati mauinakini auapikako hïtekata. Txama nota !auaikako hïtekata –itxa Xesosi.

Xoteo Auïteakori Nirekari Okiniri Arásaro

⁹ Itomaneri Xoteoakori kenakopiretakasaakiri Xesosi Petánia sitatxitiã auini, ininiã iuaã isana Xesosi aõkitinina ïkapani. Kona iuananini ninoa nireka aõkitinina. Arásaro Xesosi õkitikakiti apaka ninoa nirekari atamatinina. ¹⁰ Ininiã sasetotxi auñteakori nirekari Arásaro apaka okinina, kotxi kaiãopokori kãkiti auikari Xesosi sãkire Arásaro sãpiretakiti ikenakotakasaakina. Itakanaparina sasetotxiakori sãkire auikinina. ¹¹ Arásaro iuaïkana auiniã, ininiã itomaneri Xoteoakori asikaãpotari iauñtena, Xesosi sãkire auikinina ïkapani.

Xesosi Xerosareẽ Apokaãpotini

(Mateo 21.1-11; Marko 11.1-11; Arókasi 19.28-40)

¹² Katimatinïkata, itomaneri kãkiti Páskoa kiiniritimoni sikani, kenakopiretari Xesosi apokaãpotini Xerosareẽmoni. ¹³ Ininiã Xerosareẽkini sari aõkitinirina iua. Kinari tape anikana, Xesosi apiãkatakasaakina. Akirikatana:

—Peerekari Teoso. Teoso takari erekari Isaeo auakani auñtemoni, Apiananiri uãkaã ïkarimoni —itxana.

¹⁴ Mitxipe Xesosi iokanatarari imoianariakori xomẽta ãkiri initinina. Ninoa apokasaakiri, iminarina Xesosimoni. Ininiã Xesosi topãka iua nopini. Iua nopini Xesosi sari Xerosareẽmonikari. Kitxakapirïka Teoso sãkire iõkatsopatakorari txari:

¹⁵ Kãkiti Xerosareẽkini kona hïpïkarauatape. Erepani hñauñte. Xomẽta nopini iitopãkako, itxa Teoso sãkire kitxakapirïka. Ikara iaõka apokapeka, kotxi Xesosi apoka xomẽta nopini.

¹⁶ Iuasaaki imoianariakori kona xinikari Teoso sãpiretakiti kitxakapirïka auakari. Xesosi ipinaka atoko, õkitikaãkaua atoko, iuasaakiika ninoa xinikari ikara Teoso sãkire. Ininiã iuasaakiika imarotarina Teoso sãpiretakiti.

¹⁷ Mitxi kãkiti akauari takote auakani, ninoa itikari Xesosi õkitikiniri Arásaro. Ninoa iaripiretari Xesosi kamakiti. ¹⁸ Ininiã kãkiti apiãkatari Xesosi, kotxi ninoa kenakoene-tapekari Arásaro õkitikini. ¹⁹ Ininiã pariseoakori misãkiretakakaua:

—Hãtamata. Kiripa aposota akamini? Ikinimane kãkiti nirekari iua.

Ininiã pariseoakori xikotari Xesosi.

Ãtikaka Krekoakori Nitari Xesosi

²⁰ Ãtikaka Krekoakori apoka Xerosareẽmoni Páskoa kiiniriti ïkapani, kotxi ninoa nirekari Teoso imisãkiretinina. ²¹ Apokasaakina iuaãtaã, isana Piripimoni. Iua Petsáita aapokotxitikiri, Kariréia tõpa auakari. Ininiã apokasaakina Piripimoni, ipimaãrina:

—Ate nirekari Xesosi aaõkitini.

²² Ininiã Piripi sari ãtreemoni, isãpiretiniri ïkapani. Eereka isana Xesosimoni. ²³ Ininiã apokasaakina, Xesosi txana ninoa:

—Kaiamapekari nota hñtari iaxitikiri sini niri tixinemoni ikinipoko erekari napakapini ïkapani. ²⁴ Atão nisãpiretai. Nota kimi oki atoko. Kãkiti matakakaniãro oa, ãtika okinoka auapika. Pitakiniãro, opitxaka. Ininiã kaiãori oki aua. Ikara atoko nota. Nimapïkaniã, ininiã notanokara auari. Nipininiã, ininiã itomaneri kãkiti sari niri tixinemoni. ²⁵ Pite ãtipirika kaminiãri piteka nireẽkitinoka, ininiã pinireẽkiti xipokapitikako pitekata. Pite nireẽkiti xipokiniã, nota sãkire pauikini xika, pite auapininiika txako Teosokata. ²⁶ Kãkiti nirekiniãri iparïkauatini nota ïkapani, imoianatanoko. Iua atoko ininiã, nota auiniãtaã iua apaka auako. Kãkiti parïkauatiniã nota ïkapani, ininiã niri paxitariko iua.

Xesosi Sãpiretari Ipinini

²⁷ Xesosi misãkiretari Teoso:

—Uatxa kona erekaxinireno, ininiã kiãtokopa nitxa nisãkire pitemoni? Atxñiti nipaniãtai: “Niri, pimakatzakinanoko nimapinakani ïkapani.” Ikara atoko !nipaniãtai, kotxi nipinini ïkapanira napoka ïkorapokoritimoni. ²⁸ Ininiã niri, poerekari kãkiti ikini-mané auñte pininiãua —itxa Xesosi.

Iuasaakipeka iaxitikiri txari:

—Noerekapekari kākiti ikinimane auñte nininiãua. Eereka iuaĩkana noereka-panikariko ikara —itxa Teoso.

²⁹ Kākiti iuaãtaã auakani kenakotari iaxitikiri sākire. Txamari itxana:

—Ikarokirauata.

Apanakini txari:

—Teoso nitirira sākirauata iuakata —itxana.

³⁰ Xesosi txana ninoa:

—Ikara sākirauata kona nota ĩkapanini. Hñte ĩkapanira isākirauata. ³¹ Iposope ikini itixiti auakani misiritiko imaerekanina xika. Iposope ikini itixiti auakani auñte Satanasi inakori xipokiko. ³² Nota aamina ĩpiriãmitakari nopini nōkitikikosaaki, iuasaaki nikosekanako kākiti notamonikari.

³³ Ikara atoko itxa, kākiti imarotiniri aamina ĩpiriãmitakari nopini ipinini.

³⁴ Apanakini kākiti apakapapiretari:

—Teoso sākire kitxakapirĩka iōkatsopatakori oerekaua Teoso mereẽkiti ãtipirika auini. !Ipina. Txamari pite sãpiretaua ipinini aamina ĩpiriãmitakari nopini? Kipa iua añtari iaxitikiri pisãpiretakiti? —itxana ninoa.

³⁵ Ininiã Xesosi:

—Tirikapi kamara atoko nitxa. Hñtekata nauakasaaki, noerekai hñte atão inakari. Uatxa tirikapi kamara hñtekata auapanika. Pañtiki nota sipe. Tirikapi auakasaaki, pauapikako tirikapi kamaraã. Ininiã ipiã kona apoka hñtemoni. Kākiti mauikakaniãri nota sākire, ĩkanõka tñpokotakani atoko itxana. !Imarotarina isininomina. ³⁶ Tirikapi hñtemoni auakasaaki, hãuikariko iua sākire. Ikara atoko ininiã, “pokamarari anaakori” hñtxaua —itxa Xesosi.

Ikara atoko inaka atoko isipeka. !Isãpiretari isininomoni.

Xoteoakori Kona Auikari Xesosi Sākire

³⁷ Xoteoakori itikari ikinipoko posotiiretxi Xesosi kamakiti. Iuaritika kona ninoa auikari iua sākire. ³⁸ Ikara atoko ininiã, kitxakapirĩka Teoso sākire sãpiretakari Isaía inakori iōkatsopatakiti, iuasaaki apopeka. Isaía txari:

Apiananiri, kākiti !auikapiretari asãkire ninoamoni asãpiretakiti. !Auikari piposotiire poereẽkiti ninoamoni,

itxa Isaía. ³⁹ Iua atoko ininiã, Xoteoakori kona posotari auikiniri Xesosi sākire, kotxi iuaĩkana Isaía txari:

⁴⁰ Teoso mōsiãretakana ninoa. Kaikokii itxĩkitakana. Itikakitina kona ĩkitetana ninoa. Ikiĩãna kona ĩmarotarina. Ininiã ninoa kona apokapaniko notamoni erekapeka ininina nitxĩkitakini ĩkapani,

itxa Teoso Isaía iōkatsopatakitiã.

⁴¹ Kitxakapirĩka Xesosi uai apokini apisa Isaía iōkatsopataria ia sãkiretxiti. Iuasaaki Teoso oerekari Isaía Xesosi posotiire, apaka ĩkinika Xesosi kamakiti tñkane.

⁴² Iuaritika itomaneri Xoteo auñteakori auikari Xesosi sākire. Txamari !isãpiretarina apanakini, kotxi ninoa pñkari pariseoakori. Pariseoakori imarotakasaakiri Xesosi sākire auĩãkani ininiuana, !auiritaikana ninoa ĩroini aiko Xoteoakori apotiitiniãtaãua. ⁴³ Iua atoko ininiã, ninoa apia nirekari kākiti iuikinina. Poiãoka ninoa nirekari Teoso iuikinina.

Xesosi Iuaĩkana Sākirauata Xoteoakorimoni

⁴⁴ Xesosi itaparasãkireritika txari:

—Kākiti auikiniãri nota sākire, kona nota sãkirenanini ninoa auika. Niri sākire apaka auikana, kotxi iua iokanatano nota uaimoni. ⁴⁵ Natamatakiri apaka atamatari niri.

⁴⁶ Tirikapi atoko nitxa nĩkasaaki kãkitimoni. Nota sākire auĩãkani kona kaikota ipiãã.

⁴⁷ Kākiti nisãkire kenakotakani mauikakaniãri nisãkire, kona nimisiritari iua imaerekani

xika. Kona kãkiti nimisiritini ãkapanini nina uaimoni. Nina kãkiti maerekani nimakatzakini ãkapanira.

⁴⁸—Nota manirekakati, nisãkire manirekakati apaka, auapeka imisiritiko mereẽkari. Nisãpiretakiti, iuarako itixi xipokini õtisaaki sãpiretari imisiritiko.

⁴⁹—Notaka sãkire !nisãpiretai. Niri sãkirera nisãpiretai. Niri iokanatano nota uaimoni. Iua paniãtakiti isãpiretakiti nisãpiretai hõte. ⁵⁰ Nimarotari kãkiti auikiniãri niri paniãtakiti auapininiika itxako. Nota sãpiretari niri sikapiretinino iaõka.

13

Xesosi Arokari Imoianariakori Kiti

¹ Pãskoa inakori kiiniriti apisapanika, Xesosi imarotari paõtiki itixi itakanapini irimoni isini ãkapani. Iua tiretapikana kãkiti iua nakiti. Ninoa itiretiniritika ipinako Xesosi.

² Xesosi imoianariakorikata inipokotini apisapanika Satanasi sikanireõtapekari Xotasi Isikariotxi Xesosi imãkapiritini ãkapani. Iua Xotasi, Simão ãkiri. Eereka inirekari isikiniri Xesosi imokaiakarimoni. ³ Xesosi imarotapekari iri sikiniri ikinipoko posotiiretxi Xesosimoni. Imarotapekari Teosomoni ipotorikini. Imarotapekari iuamoni ikanapiriini.

⁴ Iuaritika inipokotaka atoko, õkitikaua. Imakatzakari imãka inopini auakari. Eereka ipomakitari mãkatxi mata nitiritxi parãka atoko ikamini ãkapani. ⁵ Eereka itakari ãparaã tiitxi ãki. Ininiã arokana imoianariakori kiti. Eereka mãkatxi mataã ikaxipokaãpotana.

⁶ Simão Petro takote apokasaaki, Petro txari:

—Konapitini, Apiananiri. Ninitiri !pitxaua. Ininiã kona parokapiri nikiti —itxari.

⁷ Ininiã Xesosi:

—Uatxa kona pimarotari nikamakiti. Pimarotariko ãti õti.

⁸—Koniko pite arokapaniri nota kiti —itxa Petro.

Ininiã Xesosi:

—Pimaunitakaniãno pikiti narokini, ininiã kona nimoianari pitxauka —itxa Xesosi.

⁹—Ikara atoko ininiã, kona nikitinani paroka. Niuako, nikii, imakinika paroka —itxa Petro.

¹⁰ Ininiã Xesosi:

—Kãkiti kipaãtakaniua poirepe itxana. Itãpokotakasaaki, iuaãkana itxiko apoka iuamoni. Iuasaaki ikitinokara arokaãka. Hõte himakinika poirepeka, kotxi nimakatzakapekari himaerekani. ãtinokara kona poireri, kotxi imaerekani auapanika.

¹¹ Xesosi imarotapekari iua mãkapiritakari, ininiã itxa: “Himakinika poirepeka. ãtinokara kona poireri,” itxana.

¹² Ninoa kiti arokaãka atoko, ieretakari imãka inopinikiri. Ikanapiriã amesamoni. Iprimaãna:

—Kinirepa narokatari hãkiti? ¹³ Hõte akiriuãkatano nota “koerekareri.” Apaka hãkiriuãkatano “Apiananiri.” Atãopitikara hãsãkire, kotxi ikara inakari nitxaua. ¹⁴ Hãuõte, hõereẽkiri nitxaua. Iuaritika narokari hãkiti. Hinitiri atoko nipaãkauata. Ininiã hãrokakititakakauako, kãkiti nitiri atoko hininiua. ¹⁵ Noerekapekai hõte erekari hãkamini. Uatxa hãkamariko nota kamakiti atokokana. ¹⁶ Atão inakari nitxai. Nitiritxi iamotakori poiãori. Iauõte apiari. Apaka kãkiti iokanatakari apiata. Iokanatakiti poiãori. ¹⁷ Uatxa hõte imarotari atão inakari hãkamini. Hãkaminiãri, hãpoxokoniuata.

¹⁸—Kona himakinikani ikara atoko nitxai. Nimarotari nimereẽkini, txamari ia Teoso sãkire iõkatsopatakori iaõka apokapitikako. Itxari:

Notakata komiri nikakari, iuakarako kamari maerekati notamoni. ¹⁹ Uatxa iua himarotini apisapanika nisãpiretai hõte. Ininiã nisãkire iaõka apokasaaki, himarotariko Teoso ãkiri nininiua nota. ²⁰ Atão inakari nisãpiretai. Kãkiti nota iokanatakiti hõtemoni hãpakapiniã, nota apaka hãpakapa. Hãpakapiniãno nota, hãpakapari apaka nota iokanatakari hõtemoni —itxa Xesosi.

*Xotasi Mīkapiritiniri Xesosi**(Mateo 26.20-25; Marko 14.17-21; Arókasi 22.21-23)*²¹ Xesosi ikara isāpiretaāka atoko, ākixinireē imatinaniuata. Itxana:

—Ari, ātikara hīte sauaki mīkapiritano nota.

²² Ininiā imoianariakori atamatakakaua.

—Kiripa ikara atoko txatako? —itxana.

²³ Iuasaaki Xesosi moianari itiretakiti papīkaītota iuamoni. ²⁴ Ininiā iuasaaki Simão Petro ieki itxa isona iuamoni. Ininiā Petro:

—Pipimaāri iua: “Īkiripa ikara atoko txatariko iua?” —itxari.

²⁵ Ininiā Xesosi tiretakiti pimaāri Xesosi:

—Kiripa ikara atoko txatai? —itxari.

²⁶ Ininiā Xesosi:

—Komiri niākakiti nisikakitikarako ikara atoko txanoko.

Ininiā iuasaaki iākari komiri. Eereka isikari Xotasi Isikariotximoni. Iua Xotasi Simão ākiri. ²⁷ Xotasi komiri inikasaaki, Satanasi ĩroā ixiniremoni. Ininiā Xesosi txari Xotasi:

—Kinirāo kamaka pinakiti pikamapoka —itxari.

²⁸ Iuaā auakani ākixinireē:

—Kinirepa ikara atoko itxatari Xotasi?

²⁹ Xotasi nīkataro ninoa txineirote. Ininiā ninoa ākixinireē:

—Atxiīti iokanataro iua komiri iamotini ĩkapani.

Ātipekana:

—Atxiīti iokanataro iua matiinimoni txineiro isikini ĩkapani —itxanātana ākixinireēna.

³⁰ Komiri apakapaāka atoko, inikaāka atoko isipe Xotasi. Mapiāpe inakasaaki.³¹ Xotasi sipeka inaāka atoko, Xesosi txana ninoa:—Uatxa kākiti itikariko kākiti itari iaxitikiri posotiire. ³² Kākiti atamatariko Teoso posotiire imimoni auakari. Ininiā Teoso txari: “Erekapitikari namarite.” Iuasaaki Teoso oerekari kākiti iua apokaerekatiniri imi. Ikara atoko ininiā, oerekari imi ereka inini.³³ —Nitiretakini, paītikinoka nauini hītekata. Eereka hinitapiimano nota, txamari nota sinimoni kona hīposotari hīsini. Ikara atoko nitxapekana Xoteoakori. Iuatxikana uatxa nisāpiretai hīte. ³⁴ Ininiā uatxa nisāpiretaiko hīte Teoso paniātakiti amaneri: “Hītiretakakaua, nota hīte nitiretini atokokana.” ³⁵ Ikara atoko hīkaminiā, ikinimane imarotariko nota moianariakori atāo hininiāua.*Xesosi Sāpiretari Petro Kipatiniri Iua**(Mateo 26.31-35; Marko 14.27-31; Arókasi 22.31-34)*³⁶ Simão Petro pimaāri:

—Koerekareri, nanipa pisatako?

Xesosi apakapapiretari:

—Nota sinimoni kona uatxa apakata hīsini. Āti ōtirako hīsa hīte.

³⁷ Iuaīkana Petro:

—Apiananiri, kinirepa kona pitekata nisa uatxa? Nipinapitikamako pitekata —itxa Petro.

³⁸ —Atāopitikani notakata pipinini pinirekaka? —itxari.

—Atāo nisāpiretai. Ia ĩkanōkati patari sākirauatini apisapanikako, “!Nimarotarero iua,” pitxanoko ipi āti pakinikata —itxa Xesosi.

14*Xesosi Pinitari Imoianariakori*¹ —Kona himatinaniuatape. Kona himaākapeua. Hāuikariko Teoso sākire. Apaka hāuikariko nota sākire. ² Niri auiniātaā aua kaiāopokori aapokotxi. Ikara atoko iminakanimako, nisāpiretapiimaiko hīte. Iuaā nisa hāuiniātaā nikamini ĩkapani. ³ Iuaā nisa hāapoko

nikamini ìkapani. Eereka nikanapiriã. Nanikai hîte notakata hãuini ìkapani. Ininiã hîte apaka aua nota auiniãtaã. ⁴ Hîte ìmarotari nota sini kimaporiti —itxa Xesosi.

Teoso Kimapore Itxaua Xesosi

⁵ —Kona aimarotari pisinimoni. Natokopa ininiãpa aimarotatari pite sini kimaporiti? —itxa Tomee.

⁶ Ininiã Xesosi txari:

—Teosomoni sikari kimaporiti nitxaua. Atãonoka nisãkire. Atãonoka nikamakiti. Nitxìkitakari kãkiti auapininiika inini. Notamoni apokakarinarira sari nirimoni.

⁷ Atão nota himarotiniã, ininiã himarotariko niri apaka. Uatxa himarotapekari iua. Hãtamatapekari iua —itxa Xesosi.

⁸ —Apiananiri, poerekari piri atemoni. Ikaranoka anireka —itxa Piripi.

⁹ Ininiã Xesosi:

—Piripi, kona mixaikani hîtekata nauama nota, iuaritika kona himarotapanikano nota? Nota aõkitakari, aõkitapekari niri. Kinirepa, “Piri poerekaua,” pitxa? ¹⁰ Kona pite auikapanikari niri auini nota ãki? Nota apaka aua niri ãki.

—Hîtemoni nisãpiretakiti kona nota sãkirenanini. Niri paniãtakitira. Niri nota ãki auakari iuara kamari ìkinipoko nikamakiti. ¹¹ Hãuikariko nisãkire niri ãki nauini. Niri nota ãki auini apaka hãuika. Himauikakaniãri nisãkire, ininiã hãuikari nikamakiti. ¹² Atão nisãpiretai. Nota sãkire auiaãkani kamariko nota kamakiti atokokana. Apaka ninoa kamakiti apiata, kotxi nirimoni nisako. ¹³ Nota uãkaã hamanaãkiti nota sikai hîte. Ikara atoko ininiã, oerekaãka niri ereka ininiua. ¹⁴ Ìkinipoko nota uãkaã hamanaãkiti, nota sikapitikai hîte. ¹⁵ Nota hîtiretiniã, hãkamariko nipaniãtakiti —itxa Xesosi.

Erekari Matamatakoti Apokaenetini

¹⁶ —Namanaãriko niri ãti kõtãkikareri iokanatini hîtemoni. Iuakara auapininiika txako hîtekata. ¹⁷ Iua Erekari Matamatakoti atãonani ina sãkiretakari. Kãkiti Teoso sãkire mauiãkani kona apakapari iua, kotxi kona atamatarina iua. Apaka kona ìmarotarina iua. Hîtepekana ìmarotari iua, kotxi hîtekata aua. Iua aua hîte ãkixinireẽ.

¹⁸ —Ininiã kona nitakanapai hîte. Nikanapiriãpanikako hîtekata nauini ìkapani. ¹⁹ Paõtiki atoko kãkiti ìkoraxiti auakani kona atamataikanoko nota. Hîte atamatanoko. Hîte auapanikako, kotxi nota apaka auapanikako. ²⁰ Iuaãkana auapanika ninakasaaki, himarotariko niri ãki nauini. Hîte apaka auako nota ãkixinireẽ. Nota aua hîte ãkixinireẽ apaka. Txapaniko.

²¹ —Iua nisãkire auiaãkarira nipaniãtakiti kamakarira taretano nota. Nota taretakari niri tirta. Nota apaka tirtari iua nitirtakiri. Ikara atoko ininiã, noerekariko apikomoni nisãkire iuamoni.

²² ãti Xotasi, kona Xotasi Isikariotxi inakorini, txari Xesosi:

—Kinirepa atenani poerekari Teoso ãkiri pininiua? Kinirepa kona poerekari ikara apanakinimoni? —itxa.

²³ Xesosi apakapapiretari:

—Kãkiti tirtetiniãno, ikamari nisãkire iaõka. Niri tirtetariko iua. Niri, nota pakini apokako iuamoni. Iuakata aãuako. ²⁴ Nota matirtetani kona nãkatari nisãkire. Nisãkire hãkenakotakiti kona nota sãkireni. Niri niokanatakiri sãkirera.

²⁵ —Hîtekata nauakasaaki, ikara sãkiretxi nisãpiretai. ²⁶ Niri iokanatariko kõtãkikareri, Erekari Matamatakoti inakori hîtemoni. Erekari Matamatakoti oerekaiko hîte ìkinipoko niuãkaã. Himaxinãkaretakiti iuaãkanako iua oerekaiko. Ìkinipoko nisãpiretakiti oerekaiko.

²⁷ —Nisini apisapanika nikamaerekaxiniretai. Nota xinire ereka inini atokotxikana nikamaerekaxiniretai. Nisãkire mauiãkani kona posotari kamaerekaxiniretiniri ãti nota kamaerekaxiniretini atoko. Kona himaãkapeua. Kona hãpãkarauatape. ²⁸ Hîte kenakotapekari nisãkire ia atoko nininii hîte: “Nisapitikako, iuaritika nikanapiriãpanikako hîtekata nauini ìkapani.” Hîtiretiniãno, hãpoxokoniua nirimoni nisini ìkapani, kotxi poiãori

nitxaua nota. Apiatakari itxaua niri. ²⁹ Ikara nisāpiretakiti apokini apisa nisāpiretai hīte. Ikara nisāpiretakiti iaōka apokasaaki, hīte auikari nisākire. ³⁰ Apikomoni iteene nisāpiretiniī ! apakata. Īkorapokoriti auakani auīte Satanasi inakori paītiki apokako notamoni, iuaritika ! iposotari itxīkitakinino ipaniātakiti nikamini. ³¹ Iteene ninirekari imakinika kākiti imarotiniri nitiretiniri niri. Apaka nikamari ikinipoko niri paniātakiti –itxa Xesosi.

Eereka Xesosi txari:
–Maōkitikaua. Masipeka.

15

Xesosi Atāo Itīkaretsa Itxaua

¹ Ininiā eereka Xesosi txari:

–Atāo itīkaretsa nitxaua nota. Itīkaretsa nīkatakari itxaua niri. ² Isauakaro otsa marito, kotxi kona kariro oa. Otsa iriuataropekana iua kisauakaro omapotōkirenoka, iteene oriuatini īkapani. ³ Hīte poirepeka hītxa. Nisākirenanira oeretai hīte. ⁴ Okanotsa atokokana hīttxaua. Nota itīkaretsa atoko nitxaua. Ininiā hīpitzaka notamoni. Ikara atoko hininiā, hīkaikota notakata. Ininiā nota kaikotapika hītekata. Ikara atoko hininiā, hīriuatapitika. Ikara atoko hininiā, erekarinanira hīkama. Hīriuatiniā, ininiā erekari hīkama. Notamoni himapitxakakaniā, kona hīposotari hīkaminiri erekari. Kona hīriuata, kotxi nota tapara ! apokari hītemoni. !Karii hīte. Okanotsanoka auiniā, kona kariro. Notakata hāuapininiika hininiā, amātiiri auapitika.

⁵ –Nota itīkaretsa nitxaua. Hīte nikanotsa hīttxaua. Notamoni pitakakari ātipaniriko oripaniko. Notakata himauakaniā, kona xapitiki kona hīposota hīkamini. ⁶ Nota sākire mauīākati okanotsa ipinakari atoko itxa. Txiarokakari atoko itxa. Kākiti apotiitari okanotsa ipinakari. Eereka okari xaminaā arikini īkapani. Iua atokokana aīri Teoso misiritari isākire mauīākani. ⁷ Notamoni hīpitzakiniā, hīkenakotiniāri nipaniātakiti, hinirekaākiti hamanainiāno, ininiā nisikapitikai hīte. ⁸ Ito hīriuatiniā, kākiti txariko niri: “Peerekai.” Hīte iriuatiniā, ininiā hīte atāo oerekariko apanakinimoni atāo nimoianariakori hininiua.

Hītiretakakiniua Pirena

⁹ –Niri tiretinino atokotxikana, nitiretai hīte. Kona hītakanapapiri nitiraōki. ¹⁰ Hīkīpitiniāri nisākire, ininiā nitiraōki kaikotapika hītekata. Nota atokokanerako hīttxako. Nota kīpitari niri sākire, ininiā niri tiraōki kaikotapika notakata.

¹¹ –Ikara atoko nitxai hīte, nipoxokoni hītemoni kaikotini īkapani. Ikara atoko ininiā, poxokonitxi xāpokako hīxiniremoni. ¹² Ia nipaniātakiti: “Nota tiretinii atokotxikana, hītiretakakauako.” ¹³ Pipininiā pimoianariakori mapinakani īkapani, ininiākara iteene pitiretana ninoa. Ikara tiraōkitxi apiatakari. ¹⁴ Nipaniātakiti hīkaminiā, atāo nimoianariakori hīttxaua. ¹⁵ Uatxa !nixinikaikari nitiritxi hininiua, kotxi nitiritxi kona imarotari iauīte xinikakiti. Uatxa atāo nimoianariakori hīttxaua, kotxi ikinipoko niri oerekakiti nisāpiretapekai hīte. ¹⁶ Kona hīteni mereēno nota. Notara mereēi hīte hīriuatini īkapani. Ninirekari hīriuatini. Ninirekari kākiti nota sākire hīsāpiretakini txipokori maxipokakati atoko ininina. Ikara atoko ininiā, hamanaāriko niri hinirekakiti nota uākaā, ininiā niri sikapitikai hīte. ¹⁷ Ia nipaniātai hīte hītiretakakiniua.

Xesosi Moianariakori Omanatakani

¹⁸ Iuaīkana Xesosi pinitari imoianariakori:

–Apanakini omanataiko hīte. Ininiā hīxinikariko ia nisākire. Merepitipanika ninoa omanatano nota. ¹⁹ Teoso sākire himauikakaniā, Teoso sākire mauīākani tiretapitikai hīte, kotxi ninoa atoko hīttxa. Txamari ninoa nakiti !hīttxaua. Hīte kona īkoraxiti auakani !hīttxaikaua. Nimereēpekai hīte. Nimakatxakapekai ātiāo parīkatxi hīkamini īkapani. Iua xika Teoso sākire mauīākani omanatai. ²⁰ Hīxinikariko ia nisāpiretakiti. Nitiritxi poiāoka

itxaua. Iauñte apiatakari itxaua. Kãkiti misiritiniãno nota, nota atokokanerako imisiritai hñte apaka. Nisãpiretapekai hñte. Nota sãkire apamonĩkiniãna, ininiã hñte sãkirekanera ninoa apamonĩka apaka. ²¹ Imisiritaina, kotxi hñte auikari nota sãkire. Himisiritaãkako, kotxi kona imarotarina niokanatakiri. ²² Nota uai mapokakaniã, nimasãkirauatakaniã, kona imarotarina maerekati ikamakitina. ²³ Nota omanatakani apaka omanatari niri. ²⁴ Niposotiire nikamakiti apanakini kona posotari ikamini. Noerekari ninoa niposotiire, ininiã uatxa maerekati auari ninoamoni, kotxi !auikari nota sãkire. Ikinika itikapekari posotiiretxi nikamakiti, iuaritika ninoa omanatano nota, niri apaka.

²⁵ —Uatxa apopeka Teoso sãkire iaõka. Teoso sãkire iõkatsopatakori txari:

Maxikatiika ninoa omanatano.

²⁶ Kõtãkikareri kona apokapanika. Niokanatariko nirikata auakari, Erekari Mata-matakoti. Iua potorika niri auiniãtaã. Atão ene sãkiretakari itxaua. Isãpiretariko nota sãpiretakiti, nikamakiti pakini. ²⁷ Ininiã hñte apaka sãpiretariko nota kamakiti, nisãpiretakiti pakini apanakinimoni, kotxi merepitipanika nipotorikasaaki hñte auapika notakata. Ininiã himarotapitikano nota.

16

¹ Xesosi sãkirauatapanika:

—Ikara atoko nitxai hñte atão himarotini ãkapani, ininiã kona hñtakanapari nisãkire.

² ãti õti Xoteo auñteakori omitikenataiko hñte aiko Xoteo apotiitiniãtaãua. ãti õti apokapanikako ia nisãpiretakiti. Iuasaaki ninoa xinikariko hñte okiko ereka inini. Ninoamoni hñte okiko Teoso paniãtakiti iaõka. Txamari kona Teoso paniãtari ikara atoko inakari.

³ Ikara atoko inakari ikamanako, kotxi kona imarotano nota, niri pakini. ⁴ Ikara atoko nitxai hñte, kotxi ikara atoko inakari apokasaaki, hñxinikariko nisãkire. Merepanika nimoianatakasaakii, kona ikara atokoni !nitxai hñte, kotxi nota auapanika hñtekata —itxa Xesosi.

Erekari Matamatakoti Parĩka

⁵ Xesosi sãkirauatapanika:

—Paĩtiki nisipekako niokanatakirimoni. Kona hñpimaãpeno: “Nanipa pisa?” Kona hñtxapeno. ⁶ Ikara atoko nisãpiretapekai, ininiã uatxa kona erekaxinirei hñte. ⁷ Iuaritika nitxai hñte atão nisãkire. Apiaerekata nota sini. Nota masikaniã, iua Kõtãkikareri kona apoka hñtemoni. Nisiniã, niokanatariko iua hñtemoni. ⁸ Iua Kõtãkikareri apokasaaki, oerekariko ãkorapokoriti auakani maerekani. Oerekariko Teosonoka txĩkitakiniri kãkiti atão inakari ikamini. Oerekariko kãkiti misiritiko imaerekani xika. Iua Erekari Mata-matakoti oerekariko ikara atoko inakari. ⁹ Iua oerekariko maerekati kãkiti kamakiti, kotxi ninoa !auikarina nisãkire. ¹⁰ Iua oerekariko Teosonoka txĩkitakiniri kãkiti atão inakarínoka ikamini, kotxi nota sipekako nirimoni. Nota !auaika uai noerekarauatini ãkapani. Paĩtiki kona hñte atamataikanoko nota. ¹¹ Iua Erekari Matamatakoti oerekariko maerekati kamakani misiritiko, kotxi ãkorapokoriti auakani auñte Satanasi inakori misiritiko mereeãkapeka.

¹² —Auapanika apikomoni nisãpiretakiti tĩkane hñtemoni. Txamari !apakata apikomoni nisãpiretini, kotxi !himñteenekari apikomoni nisãpiretini. ¹³ Iua Erekari Matamatakoti, atãoene sãpiretakari, iua ãkasaaki, iua oerekaiko ikinipoko atão sãkiretxiti. Kona iua sãkireni isãpiretaiko hñte. Iaxiti auakari sãkirera, niri sãkirera, isãpiretaiko. Isãpiretaiko hñte katana Teoso kamakiti tĩkane apaka. ¹⁴ Erekari Matamatakoti oerekaiko ereka ninini, kotxi iua apakapariko nisãkire, eereka isãpiretaiko hñtemoni. ¹⁵ Ikini sereti niri nakiti nota nakiti apaka. Ininiã nota txai hñte, “Erekari Matamatakoti apakapariko nota nakiti. Ininiã eereka isikai hñtemoni himarotini ãkapani.”

Matinanitxi, Eereka Poxokonitxi Apoka Inini

¹⁶ –Paĩtiki kona hãtamataikanoko nota. Eereka iuaĩkana hãtamatanoko, kotxi nirimoni nisako –itxa Xesosi.

¹⁷ Imoianariakori txanãta:

–Kiripa itxanãta Xesosi? “Paĩtiki kona hãtamatanoko. Eereka iuaĩkana hãtamatanoko nota, kotxi nirimoni nisako.” Kiripitipa itxanãta Xesosi? –itxana imoianariakori.

¹⁸ –Kirisaakipa apokatako ikara inaãtakiti? Kiripa ikara isãkire: “Paĩtiki,” Xesosi sãkire atemoni? Ikara isãkire kona ate imarotari xatiki –itxanãtana.

¹⁹ Xesosi imarotari ninoa nirekari ipimainiri iua. Ininiã Xesosi txana:

–Hĩte nirekari hĩpimainino nota, kotxi nisãpiretai paĩtiki kona hãtamatinino, eereka iuaĩkana hãtamatanoko. ²⁰ Atãopitikara ia atoko nitxai hĩte. Hĩtxiapatako. Himatinaniuatako. Iuasaaki apanakini kãkiti ĩkorapokoriti auakani poxokoniuatako. Himatinaniuatako, eereka hĩpoxokoni apokapitikako.

²¹ –Hĩte sito atoko hĩtxauako. Sito oãuaenetanapanoka onakasaaki, oa omaãkapekaua. Imi auaka atoko, kona oxinikaikari otsii. Poxokope otxa, kotxi auapeka amarini. ²² Ikara atoko itxako hĩtemoni apaka. Uatxa kona erekaxinirei hĩte. Iuaĩkana naõkitapanikaiko hĩte. Iuasaakirako hĩpoxokoniuatako. Iuasaaki kãkiti kona posotari ixipokiniri hĩpoxokoni.

²³ ĩkora õti apokasaaki, kona hĩpimaãikano nota. Iuasaaki hamanaãri niri hinirekakiti nota uãkaã, ininiã iua sikai hamanaãkiti. ²⁴ Uatxapiima kona hamanaãpanikari hinirekakiti nota uãkaã. Hamanainiãri, hãpakapapitikariko. Ininiã hĩpoxokoni apokapitikako hĩtemoni.

Imoianariakori Auikari Xesosi Sãkire

²⁵ –Mĩtxi niomaãtari ipixini nisãkire, kãkiti mimarotakaniri ĩkapani. Āti õti kona niomaãtaikari atão. Nisãpiretaiko niri iteene himarotini ĩkapani. ²⁶ Iuasaaki hinirekakiti hamanaãno nota uãkaã. Kona nota amanaãri niri hinirekakiti isikinii. Hĩte amanainiãri, isikapitikai. ²⁷ Niri tiretai hĩte, kotxi hĩte tiretano nota. Hĩte auikari iua iokanatinino nota uaimoni. Ininiã iua tiretapitikai hĩte. ²⁸ Niri iokanatanano ĩkorapokoriti. Paĩtiki nitakanapari ĩkorapokoriti nirimoni nisini ĩkapani –itxa Xesosi.

²⁹ Imoianariakori txari:

–Uatxa pisãkire atãoenepitika. Sãkiretxi piomaãtakiti kona auaiika, kotxi uatxa aimarotari pisãkire. ³⁰ Uatxa aimarotari pite imarotiniiri imakinika. Kona apakata apikomoni apimarauatini, kotxi uatxa aãuikari Teoso auinimoni ĩkari pininiua pite –itxarina Xesosi.

³¹ Xesosi apakapapiretana:

–Uatxa hãuikari nisãkire –itxa Xesosi.

³² –Uatxa Teoso ketotiniiri manapi apope hĩarikini ĩkapani. Imakinika hĩte takanapanoko. Notanani kaikota. Iuaritika kona notananini kaikota, kotxi niri aua notakata. ³³ Ikara atoko nisãpiretai, kotxi ninirekari erekaxinirepeka hinini. ĩkorapokoriti hãuakasaaki, kãkiti misiritapitikai hĩte. Iuaritika hĩpoxokoniuatako, kotxi nota tapara apiata. Maerekanitxi tapara poiãoka –itxa Xesosi.

17

Xesosi Misãkiretari Teoso Iuaka ĩkapani

¹ Xesosi ionakaãta iaxiti. Iuasaaki isãpiretari ia isãkire Teosomoni:

–Niri, piketotini manapi apopeka. Pisikariko piotximere iuaĩkana nota pamaritemoni, ininiãkara nota oerekari kãkiti pite iotximere, ² kotxi pite sikano nota piposotire ikinimane auĩte nininiua ĩkapani. Ininiã nikamari ikinimane kãkiti pite sikakini auapininiika ininina ĩkapani. ³ Kãkiti imarotiniãri pite, imarotiniãno nota Xesosi Kristo piokanatakiti, ninoa auapininiika, kotxi pite atão Teoso pitxaua. Pitenanira atão Teoso pitxaua. ⁴ Noerekari ĩkorapokoriti auakani pite Apiananiri pininiua, kotxi nikamapekari parĩkatxi pipaniãtakiti. ⁵ Ininiã niri, uatxa piotximere pisikano, pitemoni napokasaaki.

Itixi kamiko apisapanika pitekata nauakasaaki, niotximere aua. Iua niotximeretxikana pisikano iuaĩkana —itxa Xesosi.

Xesosi Misãkiretari Teoso Imoianariakori Īkapani

⁶ Xesosi sãkirauatapanika irimoni:

—Nota sãpiretari piuãka kãkitimoni, ninoa itixi auakani notamoni pisikakini. Mitxi pite nakitiakori itxauana. Pite sikana ninoa notamoni, ininiã ninoa kamari pisãkire iaõka. ⁷ Uatxa imarotarina ikinika napakapakiti pite sikinino. ⁸ Nisãpiretapekana ninoa pisãkire, ininiã auikarina pisãkire. Imarotapitikarina pitemoni nipotorikini. Ininiã auikarina pite iokanatinino nota kãkitimoni.

⁹ —Nimisãkiretai pite ninoa ĩkapani. Kona nimisãkiretai nota sãkire mauĩãkani ĩkapani. Nimisãkiretai ninoa notamoni pisikakini ĩkapaninoka, kotxi pite nakitiakori itxauana. ¹⁰ Ikinika nota nakiti pite nakiti itxaua apaka. Ikinika pite nakiti nota nakiti itxaua. Ninoa pisikakini oerekari apanakini Apiananiri nininiuua. Ininiã iusaaki apanakini txari: “Peerekari Xesosi.” ¹¹ Uatxa !nikaikotaikako ĩkorapokoriti. Txamari ninoa kaikotapanika uai. Nota sipekako pitemoni, ininiãkara pinĩkatana ninoa notamoni pisikakini, kotxi pite niri pitxaua, erekarinoka kamakarii pite, kaposotiirei pite. Pite sikaposotiiretano nota. Ninirekari ninoa ãtika atoko ininiuana, nota pitekata ãtika atoko aniniuua atokokana. ¹² Itixi ninoakata nauakasaaki, ninĩkatana ninoa pite uãkaã, piposotiireẽ. Ninoa notamoni pisikakini ninĩkatapitika. Kona ãtika nomaiãta. Xotasinoka pĩpinanaka, kotxi pĩpinanakakani ãkiri itxaua iua. Ipĩpinanaka, kotxi kitxakapirĩka Teoso sãkire iõkatsopatakoriti sãpiretapekari ikara apokini apisapanika.

¹³ —Uatxa nota sipeka pitemoni. Ikara atoko itxa nisãkire kãkitikata nauapanika ninakasaaki, nota poxokoni ninoa ãkixinire auini ĩkapani. ¹⁴ Nisikapekari pisãkire ninoamoni, ininiãkara nisãkire mauĩãkani omanatana ninoa, kotxi nisãkire auĩãkani ĩkorapokoriti auakani !itxaikauana ninoa. Iua atokotxikana kona ĩkorapokoriti auakarino nota. ¹⁵ Nimisãkiretai pinĩkatatinina ninoa, Satanasi mamaĩkakanina ĩkapani. Kona ninirekari mauikareni sauaki auakasaakina pimakatxakinina. ¹⁶ ĩkorapokoriti auakani !itxauana. Nota iua atokotxikana. ¹⁷ Pimakatxakana ninoa pite nakitiakori ĩkapani. Pisãkireẽ pimakatxakana, kotxi pisãkire atão. ¹⁸ Nota pisãkire mauĩãkanimoni piokanatinini atokokana, niokanatanana ninoa pisãkire mauĩãkanimoni. ¹⁹ Ninoa ĩkapani notaka nisikaua pitemoni pinirekakiti nikamini ĩkapani. Ininiãkara ninoaka apaka sikaua pitemoni pinirekakiti ikaminina ĩkapani.

Xesosi Misãkiretari Teoso Isãkire Auiãkani Īkapani.

²⁰ —Kona nimoianariakorinani ĩkapanini nimisãkiretai pite. Apaka nimisãkiretai imakinika nisãkire auiãkani ĩkapani, katana nimoianariakori sãkire auiãkani ĩkapani apaka. ²¹ Nota amanaãi ninoa xinire ãtika atoko ininina ĩkapani. Nota aua pite ãkixinireẽ. Pitepekana aua nota ãkixinireẽ. Iua atokotxikana ate aua ninoa ãkixinireẽ. Ikara atoko ininiã, nota sãkire mauĩãkani ĩkorapokoriti auikapanikariko pite iokanatinino nota. ²² Ininiã erekari notamoni pisikakiti, piotximere, nisikapekana ninoa. Ininiã ninoa xinire ãtika atoko itxauana, ate ãtika aniniuua atokokana itxana ninoa. ²³ Nota aua ninoa ãkixinireẽ. Pite aua nota ãkixinireẽ. Ikara atoko ininiã peerekari, kotxi ãtika itxaua ixinirena. Ikara atoko ininiã nisãkire mauĩãkani imarotariko pite iokanatinino nota. Apaka ninoa imarotari nota pitiretini atokotxikana, pitiretinina ninoa apaka.

²⁴ —Niri, ninirekari ninoa notamoni pisikakini notakata auini ĩkapani. Ninirekari ninoa atamatiniri ikinipoko erekari notamoni pisikakiti, niotximere pisikakiti, kotxi pite tiretano nota itixi kamiko apisa. ²⁵ Niri, atão inakarinnoka kamakarii pite. Kãkiti ĩkorapokoriti auakani kona imarotai pite. Iuaritika nota imarotai pite. Ninoa imarotari pite iokanatinino nota kãkitimoni. ²⁶ Nisãpiretapekai pite kãkitimoni. Apikomoni

nisãpiretapanikariko pisãkire. Ininiã pitiraõki notamoni auakari ninoamoni auako. Ininiãkara nota aua ninoa ãkixinireẽ.

18

Xesosi Maĩkiko Pirena

(Mateo 26.47-56; Marko 14.43-50; Arókasi 22.47-53)

¹ Teoso imisãkiretaka atoko, Xesosi ĩpiriãtari sõtõãri Setorõ inakori. Iuaã aua amãtiirinape. Ininiã Xesosi sari iuaã imoianariakorikata. ² Xotasi, Xesosi mĩkapiritakari, imarotari Xesosi imoianariakorikata itotiniri iuaãtaã isinina. ³ Ininiã Xotasi sari amãtiirinapemoni ãtikaka sotatoakorikata, Teoso misãkiretiko aikoti nĩkatakanikata. Sasetotxi auĩteakori, pariseoakorikata sari iuaãtaã apaka. Ikeekotxi, tirikapi pakini anikana. ⁴ Xesosi imarotari ikinika iuamoni ikamakitina tĩkane. Imarotapekari ninoa nirekakari okinirina iua. Iuaritika isari ninoamoni. Ipimaãna:

–Kiripa hinitanãta?

⁵ Ininiã ninoa:

–Xesosi Nasareekirira anita –itxana.

Ininiã Xesosi:

–Iuakarano nota.

Iuasaaki Xotasi, Xesosi mĩkapiritakari, aua ninoakata. ⁶ Xesosi “iuakarano nota” inakasaaki, osipikana, ixitipe irika itxana.

⁷ Iuaĩkana Xesosi pimaãna:

–Kipa hinitanãta?

–Xesosi Nasareekirira –itxana.

⁸ –Nitxapekai, iuakarano nota. Nota hinitiniã, hãuiritana nimoianariakori sini –itxa Xesosi.

⁹ Ikara atoko itxa, mitxi isãkire apokini ĩkapani. Mitxi itxari Teosomoni: “Kona nomaiãtana nimoianariakori notamoni pisikakini. Kona ãtika !nomaiãta.”

¹⁰ Eereka Simão Petro inakori kosekari iouata auĩte. Isauakari Maoko inakori ikikomoni ikĩpita. Iua sasetotxi auĩte apiatakari nitiri.

¹¹ Xesosi txari Petro:

–Pitakarõ iouata auĩte omata ãki. Apakatapitika nota kaminiri niri paniãtakiti. Niri nirekapitikari natatsiitiniri nipinini kãkiti ĩkapani –itxa Xesosi.

Xesosi Anasi Apisatoõ

¹² Eereka sotatoakori, apaka sotatoakori auĩte, Teoso aikote nĩkatakani pakini maĩkari Xesosi. Iaxirika itxarina. ¹³ Merepanika anikarina Xesosi Anasi inakorimoni. Iua Anasi Kaipasi imatikiri. Iuasaaki iua Kaipasi sasetotxi auĩte apiatakari itxaua. ¹⁴ Iua Kaipasi õtãkikapekana Xoteo auĩteakori. Ia atoko itxa isãkire: “Apiaerekata ãti kiki ipinini ĩkinimane mapĩkani ĩkapani,” itxa Kaipasi õtãkikare.

Petro Kipatari Xesosi Imarotini

(Mateo 26.69-75; Marko 14.54, 66-72; Arókasi 22.54-62)

¹⁵ Simão Petro, ãti Xesosi moianari pakini asikatikinitari Xesosi Anasi aapokomoni anikikosaaki. Mitxipeka sasetotxiakori auĩte apiatakari aõkitapekari iua ãti Xesosi moianari. Ininiã iua ĩroã sasetotxiakori auĩte apiatakari aapoko Xesosikata. ¹⁶ Petro kaikota iporikiti itore takote. Eereka imoianari sari iporikiti. Imisãkiretaro ĩronakikoãtaã tore nĩkatakaro. Ininiã oãuiritari Petro ĩroini.

¹⁷ Oa txari Petro:

–Pite ikira Xesosi moianarikai? –otxari.

–Kona –itxaro.

¹⁸ Iuasaaki katxĩkareri aua, ininiã nitiritxiakori, Teoso misãkiretiko aikoti nĩkatakani pakini kamari xamina. Xamina ĩtinipoki irokanãtauana. Petro ninoakata aua iuasaaki.

*Xesosi Sasetotxiakori Auíte Apisatoõ**(Mateo 26.57-68; Marko 14.53-65; Arókasi 22.54, 66-71)*

¹⁹ Iroko äki Xesosi sasetotxi auíteakorikata aua. Ininiã sasetotxiakori auíte apiatakari misäkiretari Xesosi:

—Pisäpiretano pimoianariakori, pisäkire poerekakiti pakini —itxari.

²⁰ Xesosi apakapapiretari:

—Ätipirika nisäpiretapikai hïte. Nitotari noerekarauatini aiko Xoteo apotiitiniãtaãua, Teoso misäkiretiko aikotiã apaka. Kona nikipatari nisäkire. Ikinipoko kenakotari noereëkiti. ²¹ Ininiã kinirepa hïpimaãno? Hïpimaãna nisäkire kenakotakani. Ninoara imarotari noereëkiti —itxa Xesosi.

²² Xesosi ikara atoko isäkirauataksaaki, Teoso misäkiretiko aikoti nïkatakari aritoõtari Xesosi.

—Atokope. Kona ikara atoko pitxape sasetotxi auíte apiatakarimoni —itxari.

²³ Ininiã Xesosi:

—Nikerokiniãri nisäkire, pisäpiretano nikerokakiti, txamari kona nikerokari. Atão nisäkire, ininiã kinirepa piaritano? —itxa Xesosi.

²⁴ Eereka Anasi iokanatarari Xesosi iaxirikiko. Eereka anikarina sasetotxi auíte apiatakarimoni, Kaipasi inakorimoni.

*Iuaïkana Petro Kipatarari Xesosi Imarotini**(Mateo 26.71-75; Marko 14.69-72; Arókasi 22.58-62)*

²⁵ Petro iporikiti aua iuasaaki. Ininiã apanakini pimaãri:

—Ikira kiki moianarikai pite? —itxarina.

Ininiã iua:

—Kona —itxa.

²⁶ Äti sasetotxi auíte apiatakari nitiri, Petro kisauakakïpitatakiti nirimane iua. Iua pimaãri Petro:

—Pitekani amätiirinapeãtaã nitika iuakata? —itxari.

Iuaïkana Petro txari:

—Kona notani.

²⁷ Iuasaakipeka patari säkirauata. Iuasaakipeka mitxi Xesosi säpiretakiti iaõka auape.

*Xesosi Pirato Apisatoõ**(Mateo 27.1-2; Marko 15.1-5; Arókasi 23.1-5)*

²⁸ Ìkanõkapanika ninoa takanapari Kaipasi aapoko, Anikarina Xesosi Homano auíte auinimoni, kãkiti misiritiko imarotiko pakitamoni. Xoteo auíteakori kona nirekari aiko äki ïroinina. Kona inirekarina äti uãka takote iitopãkinina. Äti uãka takote iitopãkiniãna, kona apakata nipokori inikinina Pãskoã kiiniritiã. ²⁹ Ininiã Pirato pokïka porikiti Xoteo imisäkiretini ïkapani. Ininiã Pirato txana ninoa:

—Kixikapa himinatari ikira kiki notamoni? —itxana.

³⁰ Ininiã ninoa txari:

—Maerekati imakamakaniã, kona ate minari iua pitemoni.

³¹ Ininiã Pirato:

—Hïteka xinikari maerekati ikamakiti, ininiã ixika auiniã hïteka misiritari iua. Hïkiomaneakorini säkire iaõka himisiritari iua —itxa Pirato.

Xoteoakori apakapapiretari:

—Kona apakata aõkiniri iua, kotxi hïte Homanoakori ! auiritaua aõkiniri kãkiti. Pitenokara apakata okiniri iua —itxana.

³² Ikara atoko inaãka, mitxi Xesosi säkire iaõka apokini ïkapani, kotxi mitxi isäpiretapekari aamina ïpiriãmitakari nopini ipinini.

³³ Pirato ïroã kãkiti misiritiko imarotiko pakita äki iuaïkana. Ipïkapiretari Xesosi. Ipimaãri:

—Pitekani Xoteoakori auíte txataua? —itxari.

³⁴ Ininiã Xesosi txari: –Piteka sãkirekani ikara? Atxiĩti apanakini sãkire atokotxikana pipimaãno atxiĩti? –itxa Xesosi.

³⁵ Pirato apakapapiretari:

–Xoteokani nitxataua? Konapitini. Piteka nirimane, pinirimane auĩteakori pakini sikai pite notamoni pimisiritiko tĩkane. Kixikapa? Kipa maerekati pikamakiti? –itxa Pirato.

³⁶ Ininiã Xesosi:

–Auĩtetxi nininiãtaãua kona ĩkorapokoritini. Nitixine ĩkorapokoriti inaãkamako, ninitiriakori neenamauatamako, ininiã Xoteoakori kona maĩkamanoko. Auĩtetxi nininiãtaãua aĩtiãtaãra –itxa Xesosi.

³⁷ Pirato txari Xesosi:

–Ininiã auĩtetxikani pitxataua?

Ininiã Xesosi: –Atãopitikara pisãkire auĩtetxi nininiua. Niponaniã ĩkorapokoriti auĩtetxi nininiua ĩkapani. Itixi napoka atãoene nisãpiretini ĩkapani. Atãoene nirekakani auikari nisãkire –itxa Xesosi.

³⁸ Ininiã Pirato:

–Kiripa atãoene txaua?

Xesosi Okiko Nirekiko

(Mateo 27.15-31; Marko 15.6-20; Arókasi 23.13-25)

Eereka Pirato iuaĩkana mapara isa Xoteoakori imisãkiretini ĩkapani. Itxari:

–Kona nota apokari maerekati ikamakiti. ³⁹ Hĩte itotari maerekati kamakari kateia āki auakari nisikakini Páskoa kiiniritisaaki. Hĩte nirekatari nisikakiniri ikira Xoteoakori auĩte? –itxa Pirato.

⁴⁰ Ikinimanekana akiripoakatana:

–Kona iuani. Pahapasira anireka.

Txamari iua Pahapasi kokaniri. Iua naiatapekari Homanoakori.

19

¹ Ininiã Pirato paniãtari sotatoakori noropatiniri Xesosi. ² Ininiã sotatoakori kamari saporieĩta atoko inakari, kotipiaro kamakori. Ieretakari Xesosi kiiã. Auĩtetxi mãka poporeri itakana Xesosi nopini. Ikara atoko ininiã, inapetarina Xesosi. ³ Ikara atoko itxana inapetinirina:

–Aãuĩte –itxarina Xesosi inapetinina.

–Xoteo auĩtekai pite –itxarina.

Ininiã iuasaaki ĩaritarina itoõ.

⁴ Iuaĩkana Pirato sari mapara iuaĩkana Xoteoakori imisãkiretini ĩkapani.

–Hĩtakaõtxikari. Hĩtemoni nimirari iua, kotxi ninirekari himarotiniiri, !napokari maerekati ikamakiti. ⁵ Ininiã Xesosi apoka mapara. Saporieĩta kotipiaro kamakori ikiiã, auĩtetxi mãka pakini aua iuamoni. Ininiã Pirato txari:

–Hãtamatarari iua.

⁶ Sasetotxi auĩteakori, Teoso misãkiretiko aikoti nĩkatakani pakini atamatakasaakiri, ninoakiripoakata:

–Hõkariko iua. Hõkariko iua. Aamina ĩpiriãmitakari nopini hĩtokakitariko –itxana.

Ininiã Pirato:

–Hĩteka anikari. Hĩteka okari iua aamina ĩpiriãmitakari nopini, kotxi kona napokari maerekati ikamakiti.

⁷ Ininiã Xoteoakori:

–Akiomane sãkire paniãtari kãkiti iua atoko inakari okiko, kotxi iua sãkire: “Teoso ākirirano nota,” itxa –itxana Xoteoakori Piratomoni.

⁸ Xoteoakori sãkire ikenakotakasaaki, apia pĩkareta Pirato. ⁹ Ininiã iuaĩkana ĩroã kãkiti misiritiko imarotiko pakita āki. Ipimaãri Xesosi:

–Nanipa pina?

Txamari !kasãkireri Xesosi.

¹⁰ Ininiã Pirato:

—Kona pinirekatari pimisäkiretinino? Pixinikariko ia nisäkire. Nota posotari nisikakini. Apaka nota posotari nokinii aamina ñpiriãmitakari nopini —itxa Pirato sãkire.

¹¹ Xesosi apakapapiretari:

—Kona pite auari posotiiretxi pokinino ñkapani. Ikara inakari piposotiire auiniã, Teosonanira sikai ikara posotiiretxi. Nota sikanapakani pitemoni kamari apiata maerekati.

¹² Pirato ikara atoko inakari ene ikenakotakasaaki, iua ãkixinireẽ ixinikari:

—Kiatokopa atxiĩti nisikakari Xesosi?

Inirekari Xesosi isikakini. Txamari Xoteoakori akiripoakata:

—Pisikakiniãri ikira kiki, kona Sesa moianari !pitxaikauako. Iua sãkire: “Auĩtetxi apiananiri nitxaua.” Sesanoka auĩtetxi apiananiri —itxana Xoteoakori.

¹³ Pirato ikara atoko inakariene ikenakotakasaaki, iminari Xesosi iporikitimoni. Ininiã Pirato topãka. Iuaã kãkiti misiritiko isãpiretiniãtaã. Kãkiti takauãkatari iuaã “Kimapori kai kamakori” inaãka. Xoteo sãkireẽ “Kapataa.” Iuaã auĩtetxi iokanatarari maerekati kamakari imisiritikomoni. ¹⁴ Iuasaaki apaniãxiti takote. Iua õti Páskoa kiiniriti potarikini õti apisa. Iuasaaki Pirato txari Xoteoakorimoni:

—Hãtamata, hãauĩte.

¹⁵ Ininiã iuaĩkana ninoa akiripoakata:

—Piokanatariko ere. Piokanatariko ere. Hõkariko aamina ñpiriãmitakari nopini —itxana sasetotxi auĩteakori.

Ininiã Pirato:

—Hinirekatari nokiniri hãauĩte aamina ñpiriãmitakari nopini?

Ininiã ninoa:

—Ãtikara ate auĩte. Sesanokara ate auĩte —itxana ninoa.

¹⁶ Ininiã Pirato sikari Xesosi sotatoakorimoni aamina ñpiriãmitakari nopini okiko tĩkane.

Xesosi Tokakitaãka Aamina Ñpiriãmitakari Nopini

(Mateo 27.32-44; Marko 15.21-32; Arókasi 23.26-43)

Ininiã anikarina Xesosi. ¹⁷ Xesosi anikari aamina ñpiriãmitakari iuaka okiko ñkapani. Isana ixirata “Kiitãtatxi” inakorimoni. Xoteo sãkireẽ, “Kóokota,” inakori.

¹⁸ Iuaã aamina ñpiriãmitakari nopini itokakitaãka Xesosi. Apaka ipi kiki tokakitaãka iua takote. Ãti Xesosi kikomoni. Ãti isanaremoni. ¹⁹ Pirato paniãtari iõkatsopari aamina ñpiriãmitakari nopini tokakitiko. Ia atoko itxa iõkatakiti: “Xesosi Nasareekiri, Xoteoakori Auĩte.” ²⁰ Itomaneri Xoteoakori atatsopatarari iua, kotxi Xesosi okikoãtaã sitatxi takote. Sitatxi sikani napaãpotakasaaki, atamatarina iua iõkatsopari. Ia iõkataãka Xoteo sãkireẽ, Kreko sãkireẽ, Homano sãkireẽ pakini ikinimane imarotiniri ñkapani. ²¹ Ininiã sasetotxi auĩteakori txari Pirato:

—Kona piõkatsopatarari, “Xoteoakori auĩte.” Piõkatsopatariko iuanoka uãkatari Xoteoakori auĩte ininiua —itxana.

²² Ininiã Pirato:

—Auape niõkatsopatakiti. Kona iuaĩkana niõkatsopatarari —itxa Pirato.

²³ Xesosi itokakitakana atoko, sotatoakori kosekari Xesosi mãka. Imatsorakitarina. Imãka mata imatsorakitana ninoa ipi ipi pakini apakapini ñkapani. Ãti sotato apakapari ipixini, ãti sotato apakapari ipixini, itxaãpota. Xesosi mãka, ãti imãka patapi auakari, ! imatsorakitana, kotxi iotsare !auari. Peerekari. ²⁴ Sotatoakori itxakakana:

—Kona amatsorakitari ia. Sarauatxi atoko makama, imãka anikakari aimarotini ñkapani.

Ininiã iuasaaki Teoso sãkire iõkatsopatarari kitxakapirĩka iaõka apoka. Iua txari:

Ninoa xanakari nimãka. Isarauatana nimãka anikakari imarotinina ñkapani.

Teoso sãkire iaõka sotatoakori kama.

²⁵ Iuasaaki aamina ñpiriãmitakari takote oãua Maria, Xesosi inoro oĩtarokata. Iuaã apaka oãua Maria Matarena inakoro. Iuaã apaka oãua ãto Maria, Krópasi inakori ñtanoro.

²⁶ Xesosi atamatakasaakiro inoro iua takote, atamatakasaakiri imoianari itiretakiti apaka, itxaro inoro:

—Nitiretakito, ere Xoão, pamarite itxaua.

²⁷ Imoianaripekana itxa:

—Aroa pinoro otxaua.

Ininiã eereka iua anikaro oa aapokomoni iuakata oãuini tĩkane.

Xesosi Ipinini Pirena

(Mateo 27.45-56; Marko 15.33-41; Arókasi 23.44-49)

²⁸ Eereka Xesosi imarotari iparĩka xipope. Ikinika Teoso sãkire iõkatsopatakori iaõka apokini ĩkapani, itxari:

—Niposonata.

²⁹ Iuaãtaã aua tiitxi. Iua tiitxi ãki aua iãriã katxioãri. Ininiã iuasaaki iokomokarina mapoa atoko inakari iãriãmoni. Aãkeẽ itakarina, Xesosi namaã taka itxarina. Iua aãke isopo inakorike. ³⁰ Iãtaka atoko itxari:

—Ikinika niparĩka uatxapeka ixipopeka.

Inaãka atoko iokirikiita, iokanata itxari ixinire irimoni. Iuasaakipeka ipina itxa.

Sotato Iorotari Xesosi Iomĩtiã

³¹ Iua õti sesta veira, kãkiti tomatiko õti apisa. Xoteo auĩteakori paniãtari Pirato aamina ĩpiriãmitakariã auakani tapike kapatakiko, katima ipĩka ininina ĩkapani, iĩtona makatxakiko ĩkapani apaka. Tomatiko õtisaaki kona ninoa nirekari ipĩkari ĩto kaikotini iuaã.

³² Ininiã sotatoakori sari iuaã. Ikapatakarina Xesosi takote auakani tapike. ³³ Txamari sotato atamatakasaakiri Xesosi, !auaika. Ipĩpeka. Ininiãkara kona ikapatakarari itapike.

³⁴ Sotato iorotari Xesosi itanapitaã iomĩtiã. Iuasaaki iarẽka, ãparaã pakini xiketa.

³⁵ Notara itikari Xesosi ipinini, ininiã atãopitikara nisãpiretakiti. Nisãpiretari ikinika nitikakiti. Nimarotari nisãkire atão inini, ininiã nisãpiretai ia atatsopatakani, hĩte apaka auikiniri ĩkapani. ³⁶ Teoso sãkire iõkatsopatakori kitxakapirĩka txari:

Kona ãtika iua api !kapatakaãka.

Ininiãkara kona Xesosi api kapatakaãka, Teoso sãkire iõkatsopatakori iaõka apokini ĩkapani.

³⁷ Æti Teoso sãkire iõkatsopatakori txari:

Ninoa atamatariko iorotakitina.

Xesosi Katiko Pirena

(Mateo 27.57-61; Marko 15.42-47; Arókasi 23.50-56)

³⁸ Eereka Xosee, Arimateia sitatxitikiri, amanaãri Xesosi ĩto Piratomoni. Iua Xosee auikari Xesosi sãkire, txamari ikipatarari Xesosi sãkire auikini, kotxi ipĩkari Xoteo auĩteakori. Amanaãkasaakiri Xesosi ĩto, Pirato txari:

—Ari, panikari iua.

Ininiã Xosee anikari Xesosi ĩto. ³⁹ Iuasaaki imoianari Nikotemo inakori. Iua Nikotemo mitxipeka sari Xesosimoni ĩkanõka imisãkiretiniri ĩkapani. Iua moianatarari Xosee, Xesosi ĩto apakapakasaaki. Nikotemo anikari aãtsopa aroesi inakori, miha inakori pakini ikoke Xesosi ĩtoã taãkori tĩkane. Trĩta sĩko kiro pakini iua ikoke anika. ⁴⁰ Ninoa ipi iapirikari Xesosi ĩto mãkatxi mataã ikokekata. Ikarã atoko Xoteo kamari ipĩkari ĩtoã ikatiko apisa.

⁴¹ Xesosi aamina ĩpiriãmitakari nopini takikoãtaã, iuaã takote aua amãtiirinape. Amãtiirinapeãtaã aua akauari amanepanika inakari. Kona ipĩkari ĩto takaãkapanika iuaã.

⁴² Iua akauari kona õtakori, ininiã itakarina Xesosi ĩto iuaã, kotxi Xoteo tomatini õti apokanapanoka.

20

Akauariã Xesosi ĩto Mauakani

(Mateo 28.1-8; Marko 16.1-8; Arókasi 24.1-12)

¹ Tomiño ïkanõkapanika, Maria Matarena sari akauarimoni. Oãpokasaaki, oãtamatarì akauari tore kai auite kamakori makatxakapeẽkaika. ² Ininiã omiteka Simão Petromoni. Xesosi moianari itiretakitimoni apaka osa. Oãkiritana:

—Apiananiri ïto makatxakaãka akauariã. Kona aimarotari namonireuako itakapirina —otxana.

³ Ininiã Petro, ãti Xesosi moianarikata sari akauarimoni. ⁴ Imitekana. Iua ãti Xesosi moianari miteka katimaritika, ininiã inapari Petro. Ininiã iua apoka Petro apisa. ⁵ Iãka aariko ãki atamatini ïkapani. Atamatari mãkatxi mata, ipiãkari iapirikiko. Kona iãroã. ⁶ Iuasaaki Petro apoka iua tikini. Iãroã aariko ãki. Atamatari mãkatxi mata. ⁷ Atamatari mãkatxi mata, mitxi Xesosi kiiã iapirikiko. Iporiĩmatataãka. Ikikomoni aua ãti mãkatxi mata. Isanaremoni aua ãti mata. ⁸ Ininiã iua mitxi apoãkari iãroã, atamata itxari. Ininiã auikari Maria sãkire. Iuasaakiã auikari Xesosi õkitikiniua. ⁹ Iuasaaki ninoa kona iteene imarotapanikari Teoso sãkire iõkatsopatakori kitxakapiriãkari, kotxi Teoso sãkire sãpiretpekari Xesosi ipinini, eereka õkitikiniua. ¹⁰ Eereka Petro ãti Xesosi moianarikata kanapiriã aapokomonina.

Xesosi Oerekaua Maria Matarenamoni
(Mateo 28.9-10; Marko 16.9-11)

¹¹ Maria Matarena kaikota aariko iriko takote. Otxiapanãtakasaaki, amaãtiki opapiãkakiita oiãkakiita aariko iriko ãki oãtamatinì ïkapani. ¹² Oãtamatana ipi Teoso nitiriakori iaxitikini. Imãkana kasarori. Iitopãkana mitxi Xesosi ïto auiniãtaã. ãti mitxi Xesosi kii auiniãtaã, ãti mitxi ikiti auiniãtaã. ¹³ Itxarona:

—Kinirepa pitxiapanãta? —itxana.

Ininiã oa:

—Imakatxakaãka niauĩte ïto. Kona nimarotari iĩto takikoãtaã —otxana.

¹⁴ Iuasaaki oporikimoni osapotorika. Oãtamatarì Xesosi, txamari !oimarotari.

¹⁵ Ininiã Xesosi:

—Kinirepa pitxiapanãta? Kiripa pinita? —itxaro.

Ouãkatari Xesosi amãtiirinape nĩkatakari ininiua. Ininiã otxari:

—Pite makatxakiniãri iua ïto, ininiã pisãpiretano iĩto pitakiniãtaã. Ininiã nanikariko ãtiãtaã —otxari.

¹⁶ Ininiã Xesosi txaro:

—Maria.

Ininiã okirioka iuamoni. Otxari osãkireẽ:

—Haponii.

Popiãkari sãkireẽ, “Noereẽkiri,” otxa.

¹⁷ Ininiã Xesosi txaro:

—Kona pimaãtakapeno, kotxi nirimoni kona nisapanika. Pisa nitariakorimoni. Pitxanako: “Nota sariko nirimoni, hĩte iritxikana apaka. Nisariko niTeosonemoni, hĩTeosonetxikana apaka,” itxa.

¹⁸ Ininiã Maria Matarena sari Xesosi moianariakorimoni:

—Natamatapekari aãuĩte —otxana.

Ininiã osãpiretana ikinika Xesosi sãkire.

Xesosi Oerekaua Imoianariakorimoni
(Mateo 28.16-20; Marko 16.14-18; Arõkasi 24.36-49)

¹⁹ Iua Tomiño ïkanõkati Xesosi moianariakori apotiitaua. Iuasaaki itotarina ikinika aapokotxi tore, kotxi ipiãkana Xoteo auĩteakori. Iuasaaki Xesosi tokiã aapokotxi ãki ninoa sauaki.

—Erekaxinire hĩtxako —itxana ninoa.

²⁰ Ikara inaka atoko oerekari iuako karo. Oerekari itanapita karo. Ininiã Xesosi atamatakasaakina, imoianariakori iteene poxokoniua. ²¹ Iuaãkana Xesosi txana:

—Erekaxinire hĩtxako. Niri iokanatinino atokotxikana, niokanatai hĩte niri nireẽkiti hĩkamini ïkapani.

²² Iuasaaki ixōkana. Itxana:
 —Hāpakapariko Erekarī Matamatakoti. ²³ Apakata pisāpiretiniri nota sākire auiākari, imaerekani makatxakaākapeka. Apakata pisāpiretiniri nota sākire mauīākani, imaerekani !imakatxakaāka —itxa Xesosi.

Xesosi Oerekaua Tomeemoni

²⁴ Xesosi imoianariakorimoni oerekasaakiua, Tomee Txítximo inakori kona aua ninoakata. ²⁵ Ininiā apanakini sāpiretari Tomee:

—Ate aōkitari Xesosi —itxana.

Ininiā iua:

—Iuako karo nimatamatakaniā, iuako karo nimakaaiakakaniā niuakokiā, kona nauikari hīte sākire. Itanapita karo nimakaaiakakaniā, kona nauikari hīsākire —itxa Tomee.

²⁶ Āti semanati napaka atoko, Xesosi moianariakori apotiitaua iuaīkana aapokotxi āki. Iuasaakiika Tomee aua ninoakata. Aapokotxi tore itotaāka, iuaritika Xesosi tokiā ninoamoni:

—Erekaxinire hītxako —itxana ninoa.

²⁷ Iuasaaki itxari Tomee:

—Patamata niuako. Pikaaiakariko piuakokiā nitokakitiko karoā. Nitanapita iorotikomoni pitakari piuakoki. Kona mauikaretika !pitzape. Pauikariko nisākire —itxari.

²⁸ Ininiā:

—Niauīte, niTeosone —itxa Tomee.

²⁹ Ininiā Xesosi:

—Uatxa pite auikari auāki ninini, kotxi patamatano. Kākiti nota maōkitakani auikiniāri nisākire, apakapariko apiata erekari Teoso sikakiti —itxa Xesosi.

³⁰ Xesosi kamari apikomoni iposotiire imoianariakori sauaki. Iposotiire ikamakiti imakinika kona iōkatsopataāka ia iōkatsopariā. ³¹ Ia niōkatsopata Xesosi Teoso mereēkiti, Teoso ākiri ininiua hāuikini ĩkapani. Ikara atoko hāuikiniā, hāuapininiika hītxako Xesosi posotiireē.

21

Xesosi Oerekaua Setxi Imoianariakorimoni

¹ Āti ōti Xesosi oerekaua iuaīkana imoianariakorimoni ipoa Txiperiatxi inakori tiniā. Ia atoko iua oerekaua:

² Iuaā aua Simāo Petro. Iuakata aua Tomee Txítximo inakori. Natanaeo, Kanaa aapokotxitikiri, Karirēia tōpa auakari apaka aua iuakata. Sepeteo anaakori apaka aua iuakata. Apikomoni ipi Xesosi moianariakori apaka aua iuaā. ³ Simāo Petro txana:

—Nota okatsaātako —itxa.

Ininiā apanakini:

—Ari, ate apaka okatsaātako pitekata —itxana. Ininiā isana. Kanauaā iereētauana. ĩkanōka okatsaātana, txamari !imaīkarina ximaki. ⁴ ĩkanōkapanika Xesosi ikipatxitemoni tīpokonāta, txamari !imarotarina Xesosi iuaā auini.

⁵ Xesosi akiritana:

—Namariteakori, kaiomaāi ereē? —itxana.

—Kona kaiomaāua —itxarina.

⁶ Ininiā Xesosi paniātana:

—Hītakariko hetxi hīkikomoni. Ereē hāpokariko ximaki —itxa Xesosi.

Ininiā ninoa okari hetxi ikikomoni. Eereka kona iposotaikarina ikosekinirina hetxi kanaua āki, ximaki itori imaīkinina xika. ⁷ Xesosi moianari itiretakiti txari Petromoni:

—Aāuītekara.

Ikara inakari sākiretxiti ikenakotakasaaki, Petro ieretakari imāka, mitxi imakatxakakiti, oka itxaua ipoamoni Xesosimoni isini ĩkapani. ⁸ Apanakini kanauaā ina. Ikosekaāpotarina hetxi. Iuasaaki ximaki xāpoka hetxiā. Itakoā !ītakori, atxiīti seī

metronoka. ⁹ Ikanĩkĩtakasaakina, atamatarina xamina. Ximaki iropike nopini auape. Apaka auari komiri.

¹⁰ Xesosi txana:

—Himinari ximaki himaĩkakiti mapake.

¹¹ Ininiã Petro kosekari hetxi imiriĩ. Xãpoãkata ximaki. Sẽtosĩkoẽta tres ximaki mitapoakari aua. Kaiãopokori ximaki, iuaritika hetxi kona tsorakita. ¹² Xesosi akiritana:

—Uai hina. Manipokota.

Kona ãtika imoianari kona kataparaxinire ipimainiri iua: “Kiriparai” ininiri iua, kotxi ninoa imarotari iua Apiananiri ininiua. ¹³ Ininiã Xesosi apoka ninoamoni. Ixanakari komiri, ximaki pakini, sika itxana ninoamoni.

¹⁴ Ikara õti apisapanika, Xesosi ipinaka atoko, õkitikaua atoko, oerekapekaua ipikata imoianariakorimoni.

Xesosi Misãkiretari Petro

¹⁵ Inipokotaka atoko Xesosi pimaãri Simão Petro:

—Simão, Xonasi ãkiri, kipa apiata turetano nota, pitekani, nakirakani? —itxa Xesosi.

Ininiã Petro txari:

—Ari, Apiananiri, pimarotari nota apokaerekatini —itxa Petro.

Ininiã Xesosi:

—Poerekari nisãkire soti auĩte anaakorimoni, ninakitiakorimoni.

¹⁶ Iuaĩkana ipimaãri:

—Simão, Xonasi ãkiri, atão pitiretatano nota? —itxa Xesosi.

—Ari, Apiananiri, pimarotari napokaerekatini —itxa Petro.

Ininiã Xesosi:

—Pinĩkatana soti auĩte, ninakitiakori —itxa Xesosi.

¹⁷ Iuaĩkana ipimaãri:

—Simão, Xonasi ãkiri, pitiretatano nota?

Ininiã Petro matinaniuata ixinireẽ, kotxi Xesosi pimaãri ipi ãti pakinikata “Pitiretatano nota.”

Ininiã Petro:

—Apiananiri, pite imarotari ikinipoko. Pimarotapitikari nitiretinii pite.

Ininiã Xesosi:

—Poerekari nisãkire soti auĩte ninakitiakorimoni. ¹⁸ Atão nitxai. ãtokoripanika pinakasaaki, piteka pieremãkataua. Pisari pinirekinimoni. Kiomãtxi pinakasaaki, pitamẽkakanoketauako, ininiã ãti ieremãkatai. Eereka anikai pimanirekakanimoni —itxa Xesosi.

¹⁹ Ikara atoko Xesosi sãkire, kotxi ikara atoko itxako Petro ipinini. Petro ipinini iteene paxitariko Teoso, ininiã kãkiti txariko: “Peerekari Teoso.” Ininiã Xesosi:

—Pikapokitano nota. Ninireẽkiti pikamako —itxa Xesosi Petromoni.

Xesosi Iteene Tiretakiti

²⁰ Petro kirioka. Atapari Xesosi moianari, itiretakiti ninoa tikini inini. Iuakara mitxi Xesosikata iitopãka Pãskoa kiiniritisaaki. Iuasaaki ipimaãri Xesosi: “Niauĩte, kiripa mĩkapiritai?” ²¹ Petro atapakasaakiri Xesosi tiretakiti ninoa tikini inini, ipimaãri Xesosi:

—Natokopa itxatako ere ipinini?

²² Ininiã Xesosi:

—Nota nirekiniãri iua auapanika inini nikanapiriãkasaaki, kona nisãpiretai pite. Kona pixinikapiri iua. Pixinikari piteka kaminiri nota nireẽkiti —itxa Xesosi.

²³ Ininiã iaripireta Xesosi sãkire auĩãkanimoni, iua imoianari itiretakiti imapinakani Xesosi kanapiriini apisa. Txamari Xesosi !isãpiretari imapinakani. Iua txari: “Nota nirekiniãri iua auapanika inini nikanapiriãkasaaki, kona nisãpiretai,” itxa Xesosi.

²⁴ Nota ikara Xesosi moianari itiretakiti nitxaua. Nota itikari imakinika Xesosi kamakiti. Ininiã nota iõkatsopatarari ikamakiti, isãkire pakini. Ininiã aimarotari atão nisãpiretakiti.

²⁵ Auapanika itori Xesosi kamakiti. Ikinika ikamakiti !kaiõkatikopanikari. Ikinika niõkatsopatiniã, !apakata, kotxi itixi kona apakata kaiãopokori aãtsopa auini.

ÁTOSI Xesosi Iokanatakini Kamakiti Pirena

Xesosi Kanapiriini Iaxiti

¹ Ereëkai Teópiro, Teoso tiretakari. Merepitipanika niõkatsopatakiti aãtsopaã txari ikinipoko Xesosi kamakiti, isãpiretakiti pakini. ² Niõkatsopatakiti mapotõkire auari Xesosi iaxiti sini pirena. Isini apisa isãpiretana iokanatakini Erekarí Matamatakoti paniãtakiti.

³ Ipinaãka atoko iuaĩkana iuaka oerekaua ninoamoni, ininiã imarotarina atãopitika iua õkitikapekaua. Koarêta pakini õti iua auanãta ninoakata. Iuasaaki isãpiretana Teoso auĩtetxi ininiãua pirena. ⁴ Imakinika apotiitakasaakia itxana ninoa:

—Kona hĩtakanapiri Xerosareẽ sitatxiti. Aĩri iaxitikiri iokanaenetakiti hiãtapako. Iua mitxi hĩtemoni nisãpiretakiti. ⁵ Atãopitikara Xoãoni patxisatai hĩte ãparaaã. Mapaõti napaka atoko, Erekarí Matamatakoti apokako hĩtemoni. Iuasaaki hĩpatxisataãkako Erekarí Matamatakotiã —itxa Xesosi sãkire.

⁶ Ininiã imoianariakori apotiitakasaakia Xesosikata, ipimaãrina iua:

—Aãuĩte, uatxa iuaĩkana pisikatari atixine atemoni, Isaeo apika mekaniriakorimoni? —itxarina.

⁷ Ininiã Xesosi txana ninoa:

—Kona hĩte imarotiniri ĩkapanini. Aĩrinanira imarotapaniri hĩte tixine hĩtemoni isikini õti. ⁸ Erekarí Matamatakoti apokasaakirako hĩtemoni, hãpakapariko posotiiretxi. Ininiã hĩte nota kamakiti atamatakani hĩtxauako. Hĩsãpiretariko hĩtiãkiti, himarotakiti pakini Xerosareẽ sitatxiti auakanimoni, imakinika Xotéia tõpa auakanimoni, Samaria tõpa auakanimoni, ikini itixiti auakanimoni pakini hĩsãpireãpotariko —itxa Xesosi ninoamoni.

⁹ Ikara atoko inaãka atoko, ninoa okiã atamatari iua anikiko iaxiti. Katxiãri ãki isa, ininiã kona ninoa itikaikari. ¹⁰ Iaxiti ionakaãtakasaakina, apoka ipi kiki katsopiri mãkatakani ninoa takote. ¹¹ Ninoa txana:

—Kiki Kariréiakini, kinirepa hionakanãta iaxiti? ĩkora Xesosi iaxiti sikari, isini atokotxikana ikanapiriini —itxana ninoa.

Itanokiri Koaã Apotiitakaniua

¹² Ininiã Oriva xirataãtaã ipotorikana. Ikanapiriãna. Xerosareẽmoni isana. Oriva kona õtakori. Kãkiti Oriva xirata potoricakani sini Xerosareẽmoni tako atokokanera Xoteo kiomaneakorini auitari kãkiti sini tomatiko õtisaaki.

¹³ Xerosareẽ sitatxiti apokasaakina, iĩroãna aapokotxi ãki. Ininiã isana itanokiri koaã. Petroma, Xoãoma, Txiakoma, ãtreema, Piripima, Tomeema, Patoromeoma, Mateoma, Txiakoma (Aopeo ãkiri), Simãoma (Homano omanatakari), Xotasima (ãti Txiako itari) pakini aua iuaãtaã. ¹⁴ ãtipirika ninoa apotiitaua Teoso imisãkiretinina ĩkapani. Apaka sitoakoro Xesosi sãkire auiãkani, Maria Xesosi inoro, Xesosi itariakori pakini apotiitaua ninoakata. Ninoa misãkiretakasaakiri Teoso, ãtika kãkiti xinirenoka atoko itxana. Ininiã erekarinoka auana ninoamoni. Kona omanatakakauana.

Matxia Mereĩko Pirena

¹⁵ Iuasaaki sětovĩtxi pakini Xesosi sãkire auiãkani aua. Petro õkitikaua ninoa sauaki.

¹⁶ Ininiã itxa:

—Nĩtariakori, hĩtakaõtxikari Teoso sãkire kitxakapirĩka Taviimoni isãpiretakiti. Tavii iõkatsopatarí Xotasini pirena, Xesosi mãĩkakani oerekakari pirena, kotxi Erekarí Matamatakoti kamaimaroretari iua Tavii. Atão ikara Teoso sãkire kitxakapirĩkari apokapeka uatxa. ¹⁷ Iua Xotasini atekata auakari iua. Ate parĩka atoko ikama.

¹⁸ —Iuaritika isikari Xesosi imokaiakariakorimoni. Txineiro apakapakitoã iamotaãka itixi. Iuaã ipĩpe. Itano okaua. Ixiti apokasaaki, iokirikiita. Ixoreka itikako. Iuasaaki

itikapitsa poãpekatani. ¹⁹ Imakinika Xerosareë auakani kenakopiretari Xotasini ipinini. Ininiã ninoa akiritari iuaãtaã itixi uãka “Aseotama.” Popïkari akiritari “Arëkatxi Tixini.”

²⁰ –Xikari iõkatsopatakoriã iõkatsopatapeëkaika ia Xotasi pirena:
Iua aapoko takanapaãkako. Kona auiritaãka kãkiti auini iuaãtaã. Iparïka sikaãkako
ãtimoni,
itxa Teoso sãkire.

²¹ –Ininiã amereëriko ãti kiki atekata sikari tïkane. Amereëriko kiki mitxi Xesosikata sikari, mitxi amoianari ikiniõtika Xesosikata aãuakasaaki. ²² Amereëriko kiki Xoãoni patxisarauatini itiãkari, imakinika Xesosi kamakiti itiãkari, iaxiti isini itiãkari, kotxi anirekari iua amereëkiti Xesosi õkitikiniua imarotakari ate atoko inakari –itxa Petro.

²³ Ininiã imereërina ipi kiki, Xosee Pasapasi inakori. Apanakini akiritari iua Xósite. Æti kiki uãka Matxia inakori. ²⁴ Iposo atoko imisãkiretarina Teoso:

–Pite imarotari ikinimane kãkiti ãkixinire. Poerekaua ïkiripa naia kiki pimereëkiti
²⁵ atekata parïkauatakari tïkane, Xesosi iokanatakiti tïkane, kotxi Xotasini takanapari ikara parïkatxi imaerekani xika, maerekani misiritikoãtaã isini ïkapani –itxana Teosomoni.

²⁶ Iposo atoko ikamarina sarauatxi atoko inakari imoianarina imarotinina ïkapani. Ikara atoko ininiã, imereërina Matxia. Ininiã Xesosi iokanatakiti itxaua. Ikara õti atoko, iua moianatari apanakini õsi Xesosi iokanatakini.

2

Pëtekósitxi Kiiniriti Ôti

¹ Pëtekósitxi kiiniriti õti (takari merepitipanika nikiko õti) apokasaaki, Xesosi sãkire auiaãkani ãtika kãkiti xinire atoko itxauana. Imakinika apotiitauana. ² Katimaritika iaxiti ïkari kataparari ïtimati atoko inakari xãpoka aapokotxi ãki Xesosi moianariakori topãkiniãtaã. ³ Ininiã iusaaki xamina tirika atoko inakari tokiã. Imakinikana ikiiãna apoka. ⁴ Erekari Matamatakoti ïroã ikinika ãkixinireë. Iusaakipeka ninoa sãkirauata ãti uãka sãkireë, kotxi Erekari Matamatakoti kamaimaroretana.

⁵ Iusaaki Xerosareë sitatxitiã auanãta ikini uãkati kãkiti Xoteoakori. Ninoa Teoso sãkire kïpitakani. ⁶ Ikenakotakasaakirina iaxiti ïkari ïtima atoko inakari, apotiitauana mirikiniti kãkiti. Ininiã itikokitatana, kotxi ikenakotarina apanakini sãkirauatini isãkireëna. ⁷ Itsorïkaãtana:

–Kiãtokopa ininiãpa imarotatarina ate sãkire. Hãtamataana, Kariréiaknikara sãkirauanãta ateka sãkireë. ⁸ Kiãtokopa itxa akenakotiniri ateka sãkire? –itxana ninoa.

⁹ Iuaãtaã auari kaiãopokori kãkiti ãti uãka. Auari Patxiakinima, Métxiakinima, Erãokinima, Mesopotãmiakinima, Xotéiakinima, Kapatósiakinima, Põtokinima, Ásiakinima, ¹⁰ Piríxiakinima, Pãpíriakinima, Exitokinima, Arípiakinima, Sireni takotekinima, Homakinima pakini aua. Apanakini Homakini atão Xoteoakori. Apanakini mamakaua, ininiã Xoteo itxapekauana. ¹¹ Kretakinima, Arápiakinima pakini aua iuaã.

Ininiã ninoa txa:

–Ate kenakotari Kariréiakini sãkirauatini ateka sãkireë. Isãpiretarina ikinipoko erekari Teoso Apiananiri kamakiti –itxana.

¹² Ininiã ninoa tsorïkaãta. !Imarotarina.

–Natokopa itxana imarotinarina ate sãkire? –itxana.

¹³ Apanakini kãkiti napetana:

–Poãtakanira ninoa –itxana.

Petro Apakapapiretakiti Kãkitimoni

¹⁴ Iusaaki Petro, õsi Xesosi iokanatakinikata misãkiretana iuaã apotiitakaniua. Itxari:
–Xotéia auakanii, ikinika Xerosareë sitatxiti auakanii, hïtakaõtxikariko nisãkire hi-marotini ïkapani. ¹⁵ Hïuãkatana naia kikiakori poãtini. Kona ipoãtana, kotxi atokatxi inaãpotapanika. ¹⁶ Ia uatxa hãtamatakiti kitxakapirïka Teoso sãpiretapekari Xoeomoni. Iua Xoeo Teoso sãkire sãpiretakari sãpiretapekaua. Iua txari:

17 Teoso txari: “Xipokatxi òti iatokopeka inakasaaki, niokanatarì Erekarì Matamatakoti ikini kãkitimoni. Pamariteakori sãpiretariko nisãkire apanakinimoni. Átokoriakori atamatariko itapone atoko inakari Teoso sikakiti pokamarasaaki. Iuasaaki nisãkire nisãpiretana. Kiomãtxiakori taponetariko nota oerekakiti. Iuasaaki nisãpiretariko nisãkire ninoamoni.

18 Ìkora òtisaaki ninitiriakori, niniteroakoro pakinimoni niokanatarì Erekarì Matamatakoti. Ninoa sãpiretariko nisãkire.

19 Iaxiti noerekariko niposotiire kãkiti mimarotakinìti. Ìkorapokoriti apaka noerekariko niposotiire Apiananiri nininiua imarotinina Ìkapani. Arëkatxi, xamina, katxiãri pakini apokako.

20 Atokatxi piãkako. Kasiri arëkatxi atoko itxako. Apiananiri apokini apisapanikarako auako ikara atoko inakari. Peerekapaniri Apiananiri apokini òti. Ìkora òti apiatakari, kotxi iuasaaki Apiananiri oerekauako kãkitimoni.

21 Ininiã Apiananiri akiritakani makatxakaãkako imapinakani Ìkapani,” itxa Apiananiri Xoeomoni.

22 Petro sãkirauatapanika:

–Kãkiti, Isaeokini, hìkenakotariko nisãkire. Hìte apisatoõ Teoso oerekepekari Xesosi, Nasaree sitatxitikiri. Teoso mereëkiti itxaua, kotxi ikamari Teoso posotiire kãkiti mimarotakinìti Teoso himarotini Ìkapani. Himarotapekari ikara. 23 Xesosi sikaãka imokaiakariakorimoni, kotxi Teoso nirekari ikara atoko iniko. Teoso imarotapekari ikara atoko inakari apokini òti. Hìtekara, apanakini maerekati kamakanikata maìkari Xesosi. Aamina Ìpiriãmitakari nopini hìtokakitari, oka hìtxapiri iuani. 24 Iuaritika ipinaka atoko, iuaìkana Teoso òkitikari iua. Teoso sikakari iua ipìkitxi mamisiritakaniri Ìkapani. Ipìkitxi liposotari ixipokiniri iua, kotxi Apiananiri itxaua.

25 –Kitxakapirìka Tavii sãpiretari Xesosi pirena. Itxari:

Nota itikapikari Apiananiri nota apisatoõ. Iua aua nikikomoni. Ininiã !nimakatxaãka.

26 Ininiã nixinire poxokoniuatpeka itxa. Nisãkire poxokoni apaka aua. Niìto auãki inakasaaki, iãtapari Teoso sikaenetakiti.

27 Apiananiri kona takanapano nota ipìkani auiniãtaã. Apiananiri !auiritano Erekarì Kamakari paiakini.

28 Apiananiri oerekepekano mapìkani kimaporite. Iua notakata aua, ininiã nipoxokoni-uata, itxa Xesosi Taviimoni kitxakapirìka.

29 Ininiã Petro sãkirauatapanika:

–Kikiakori, hãuiritano nisãpiretiniri Tavii pirena. Tavii anirimane kitxakapirìka auakari. Iuani ipìpe, ikatapeëka. Uatxa atemoni auapanika iua akauare. 30 Iua Teoso sãkire sãpiretakari. Atão iua imarotari Teoso sãkire. Teoso sãpiretpekari iua apika mekani Teoso mereëkiti itxauako. Tavii imarotari Teoso mereëkiti òkitikaãkapanikako auìtetxi ininiua tìkane. Teoso sãpiretari imereëkiti topãka auìtetxi itopanere nopini. Ininiã atão auìtetxi itxaua.

31 –Tavii imarotari ikara atoko inakari Xesosi apokini apisapanika, kotxi iòkatsopatari Xesosi ipinini pirena, iuaìkana òkitikiniua pirena apaka. Iua txari:

Ipìkani auiniãtaã !ikaikota. Iìto !lipaiaka, itxa Tavii kitxakapirìka.

32 –Iua Xesosi ipinaka atoko, Teoso òkitikari iua. Ate amakinika Xesosi òkitikiniua itikakani atxaua. 33 Ininiã uatxaika Xesosi topãka Teoso kikomoni. Ikara atoko Xesosi Apiananiri itxaua. Apakapari Erekarì Matamatakoti, Teoso sikaenetakiti. Iposo atoko, iokanatarì Erekarì Matamatakoti atemoni. Iuakara uatxa hãtamata ikamakiti. Hìkenakotari iua sãkire uatxa.

34 –Tavii !isari iaxiti auìtetxi ininiua Ìkapani, iuaritika iòkatsopatari:

Apiananiri misākiretari niauīte: “Nota kikomoni piitopākiniritika³⁵ nixipokariko pimokaiakariakori. Nikamariko ninoa pikiti pitakiniātaã atoko ininiua,” Apiananiri txari niauīte.

³⁶ —Ininiã Isaeo auakanii, himarotariko ia. Hīte okari Xesosi, iuaritika Teoso kamari iua auītetxi ininiua. Teoso mereēkiti itxaua —itxa Petro.

³⁷ Iuasaaki Petro sākire ikenakotakasaakina, ākixinireēna tsiītxi apoka iouata iorotiniri tsii atoko itxa. Maerekaxiniretinoka itxana. Eereka itxana ninoa:

—Kiripa akama? —itxana.

³⁸ Petro apakapapiretana:

—Himaerekani hītakanapa. Hīte imakinika hīpatxisataãkako Xesosi Kristo uãkaã, ininiã Teoso makatxakari himaerekani. Iuasaakiko hāpakapari Erekari Matamatakoti Teoso sikakiti. ³⁹ Kotxi ikara Teoso sikaenetakiti hīte ĩkapani, hamarite ĩkapani, apanakini ōtako auakani apaka ĩkapani. Ikara Teoso sikaenetakiti ikinimane kākiti Teoso akiritakini ĩkapani —itxa Petro.

⁴⁰ Petro iteene ōtākikana ninoa, kotxi inirekari atão ikaminina, ininiã itokata ōtākikana ia atoko:

—Īkorapokoriti auakani maerekati kamakani itxauana. Himakatxakaua. Hītakanapariko himaerekani. Hāuikariko Xesosi sākire —Petro txana ninoa.

⁴¹ Īkora ōti, tres mio kākiti ipoxokoniritikana auikari Petro sāpiretakiti. Iuasaaki ipatxisataãkana.

Xesosi Sākire Auiākani Moianatakakiniua

⁴² Eereka ikiniōtika apaiaōkarina Xesosi iokanatakini oerekakiti. Ātipirika itiretakakauana. Ātipirika ikamarina kiiniri komiri imapixinikinina Xesosi ipinini ixinikinina ĩkapani. Ātipirika imisākiretarina Teoso. ⁴³ Ikinimane tsorīkaãnãta, kotxi Xesosi iokanatakini kamari ito posotiiretxi kākiti mimarotakiniti, apanakini Teoso imarotini ĩkapani.

⁴⁴ Teoso sākire auiākani apotiitapikaua. Ninoa xanakari ikinika inakitina. ⁴⁵ Ivētxitarina itiina, ininiã tiitxi ĩki isikana matxineirotenimoni. ⁴⁶ Ikiniōtika aiko āki Teoso misākiretikoãtaã apotiitapikauana. Ninoa aapoko āki ikamarina komiri mapixinikiko kiiniriti. Ātipirika ninoa apotiitaua ipoxokoniritikana nipokori inikinina ĩkapani. Ākixinirena erekapitikari. ⁴⁷ Ixikarauatana Teoso ĩkapani. Imakinika kākiti apokaerekatana ninoa. Ininiã ikiniōtika Teoso makatxakari kākiti maerekani. Ininiã Teoso sākire auiākani apiaãpota.

3

Petro, Matīpokotakati Pakini

¹ Āti ōti mapiātiki Petro, Xoão pakini sari Teoso misākiretiko aikotimoni Teoso imisākiretinina ĩkapani. ² Iuasaaki ikiniōtika kākiti anikari matīpokotakati Teoso misākiretiko aikoti toremoni. Itore uãka “Peereri.” Iuaã matīpokotakati amanaãri txineiro iuaã napakanimoni. Iponaniākasaaki matīpokotakati itxaua iua. ³ Ininiã Petro, Xoão pakini ĩroãkasaaki, iua amanaãri txineiro:

—Txineiro hīsikano —itxa.

⁴ Ininiã Petro, Xoão apaka atamatari iua. Ininiã Petro txari:

—Patamataua.

⁵ Ininiã iua matīkati atamatana ninoa. Iuãkatari txineiro isikinina iuamoni. ⁶ Ininiã Petro:

—Kona auari txineiro atemoni. Kona pirata aua atemoni. Oro apaka !auari. Iuaritika nota auakiti nisikapitikai. Xesosi, Teoso mereēkiti, Nasareekiri, iua uãkaã pōkitikauako. Pitīpokotako —Petro txari iuamoni.

⁷ Ininiã Petro maĩkari iuako ikikomoni kiki ōkitikiniua ĩkapani. Iuasaakipeka ikiti, ikitinota pakini kataparapeka itxa. ⁸ Ininiã okakataua, tĩpokota itxa. Īroã Petro, Xoão pakinikata Teoso misãkiretiko aikoti ãki. Iroãkasaaki, okaãpokataua. Itĩpokoãpokata.

—Ari, peerekari Teoso —itxanãta.

⁹ Ikinimane itikari iua tĩpokotini. Ikenakotari ixikarauatini Teosomoni. ¹⁰ Ikinimane imarotari iua kiki aiko ĩronakikoãtaã “Peereri” inakoriãtaã topãkanãtakari, txineiro amanaãnãtakari iua. Ininiã ninoã:

—Anekani. Kiripa atxiĩti? Mitxi matĩpokotakati. Uatxa itĩpokotape. Kanatokopa itxa? —itxana.

Petro Sãpiretakiti Kãkitimoni

¹¹ Apanakini kenakopiretana ninoã, ininiã imitekana ninoamoni matĩpokotakati pirena imarotinina ĩkapani. Iuasaaki ninoã auiniãtaã akiritaãka “Saromão pakita.” Iuaã Petro, Xoão pakini aua mitxi matĩpokotakatikata. Iua maĩkakanokeãpotana Petro, Xoão pakini. ¹² Iua Petro atapana kãkiti ninoamoni ĩkani. Itxana:

—Isaero auakanii, kinirepa hĩte tikoka ere kiki tĩpokotini hãtamatakasaaki? Kinirepa hĩte itikaua ate? Na ate posotiireẽni kamari iua tĩpokotini. Ate ereka anini kona kamari iua tĩpokotini. ¹³ Apraãoni, Isakini, Xakooni pakini Teosone, aĩriakorini kitxakapirĩkarini Teosone, iuara oerekapekua imi Xesosi ereka inini. Teoso ãkiripitikara itxaua. Iua posotiire auapitika. Iuakara hĩsika okiko ĩkapani. Eereka Pirato inakori nirekasaakiri isikakiniri. Hĩte !inirekari iua sikakiniri Xesosi. ¹⁴ Iuasaaki hĩte kona nirekari erekari-noka kamakari. !Hinirekari iua atão inakarinnoka kamakari. Hĩte amanaãri Pirato isikakiniri kokaniri hĩtemoni. ¹⁵ Ininiãkara hĩte okapiri kãkiti auãki inini kamakari. Iuaritika ipĩkani sauaki Teoso ōkitikari iua. Ate itikari atãopitikara iua ōkitikiniri.

¹⁶ —Ia kiki hĩtikakiti himarotakiti kataparapeka itxa, kotxi iua aukari Xesosi posotiire. Iua aukari Xesosi sãkire erekapeka inini ĩkapani. Hãtamatarari hĩte apisatoõ iua ereka inini.

¹⁷ —Ininiã uatxa nitariakori, nimarotari hĩte, hĩte auĩteakori pakini okapiri Xesosi atão himimarotakani xika. ¹⁸ Kitxakapirĩka Teoso sãkire sãpiretakani oerekapekua Kristo misiritiko. Ikara imisiritiko auapeka. ¹⁹ Ikara atoko ininiã, hĩtakanapariko himaerekani. Erekari kimaporiti hinitako, ininiã Teoso makatxakari himaerekani. ²⁰ Iuasaaki Apiananiri kamapoxokonitai. Isikataparatai. Iuasaaki iua iokanatarari Xesosi imereẽkiti hĩtemoni. ²¹ Merepanika iua Xesosi kaikota iaxiti. Teoso kamariko imakinika amaneri. Iuasaaki Xesosi apoka iuaĩkana. Iua atokokana itxana Teoso sãkire sãpiretakani kitxakapirĩka. ²² Kitxakapirĩka Moisesi txari:

Apiananiri hĩTeosone iokanatariko isãkire sãpiretakari hĩtemoni nota iokanatinini atokokana. Hinirimane itxaua iua. Hĩkenakotariko ikinika isãpiretakiti hĩtemoni.

²³ Ikinimane iua sãkire makenakotakati xipokaãkako.

²⁴ —Teoso sãkire sãpiretakari Samoeo inakori, eereka ikinikana Teoso sãkire sãpiretakani pakini sãpiretaperari Teoso iokanatiniri imereẽkiti kãkitimoni ĩkorsaaki. ²⁵ Teoso sãkire sãpiretakani anaakorirai hĩte, ininiãkara isãkire ninoamoni, iuatxikana isãkire hĩtemoni uatxa. Itxari Apraãoni:

Ãti pimekaniri sikariko erekari ikini itixiti auakanimoni, itxa Teoso. Ininiã ikara Teoso sikaenetakiti hĩkiomanekorinimoni, hĩtemoni apaka isikaeneta. ²⁶ Ininiã Teoso iokanatarari iua ãkiri Xesosi hĩtemoni merepitipanika. Iokanatarari iua hĩtemoni erekari hĩtemoni isikini ĩkapani, himaerekani hĩtakanapini ĩkapani —itxa Petro.

4

Petro, Xoão Pakini Xoteo Auĩteakori Apisatoõ

¹ Petro, Xoão pakini sãkirauatapanika kãkitimoni inakasaaki, sasetotxiakori, Teoso misãkiretiko aikoti nĩkatakari, satoseoakori pakini apoka ninoamoni. ² Ininiã ninoã

naiataua, kotxi Petro, Xoão pakini sãpiretari kãkiti ipĩkani õkitikiniua pirena, kotxi ninoa txari:

—Xesosi ipinaka atoko, iuaĩkana iua õkitikaua, ininiã ipĩkani õkitikauako.

³ Ininiãkara ninoa maĩkana Xoão, Petro pakini. Iuasaaki mapiãnikata, ininiã itakana kateia ãki ĩkanõka iuaã inapinina ĩkapani. ⁴ Iuaritika itomaneri Petro sãkire kenakotakani auikapiretari iua sãkire. Sĩko mio kikiakori auikari Teoso sãkire Petro sãpiretakiti.

⁵ Katimatinĩkata Xoteo auĩteakori, kiomãtxiakori, kaiõkatsopareriakori pakini apoti-
imanetaua Xerosareẽ. ⁶ Sasetotxiakori auĩte apiatakari Anasi inakori iuaã aua. Iniri-
mane Kaipasi inakori, Xoão inakori, Arexãtri inakori pakini aua iuaã apanakini sase-
totxiakori auĩte nirimanekata. ⁷ Xoão, Petro pakini minaãka ninoa apisatoõ. Ipimaãrina:

—Kiposotiireẽpa hõkitikari matĩpokotakati? —itxana.

⁸ Erekarı Matamatakoti moianatari Petro. Ininiã iua txana ninoa:

—Aãuĩteakori, akiomaneakori, ⁹ hinirekari asãpiretinii uatxa erekari akamakiti matĩkatimoni. Hinirekari himarotıniri erekapeka inini. ¹⁰ Ininiã ikinika hĩte, ikinika Isaeo tixini auakani apaka, himarotariko ia. Xesosi Nasareekiri posotiireẽra ia kiki hĩte apisatoõ timakari makananitaãka. Iuara hĩte oka aamina ĩpiriãmitakari nopini. Iuara Teoso õkitika iuaĩkana ipĩkani sauaki. ¹¹ Kitxakapirĩka Teoso sãkire iõkatsopatakori sãpiretari Xesosi hĩte manirekakani, kotxi itxari:

Kai aapokotxi kamakanii, !hinirekari ãti kai soro. Iua kai himanirekakiniti apiari ĩtxapekaua. Apanakini kai soro maĩkakari itxaua.

¹² —Xesosinokara makatxakari kãkiti maerekani. Kona ãti maerekanitxi makatx-
akakari !auari ikini itixiti. Teoso sikari iuanokara kãkitimoni imaerekani imakatxakini
ĩkapani —itxa Petro.

¹³ Ninoa tsorĩkaãnãtana Petro sãkire ikenakotakasaakina, kotxi Petro, Xoão pakini sãkirauata itaparaxinireritika. Mitxi kona ninoa apaiaõkarauata, iuaritika ninoa ĩmaro-
tari atão isãkirauatini. Ninoa xinikari:

—Ixi. Ninoa minakani. Iuaritika kiĩkitena, kotxi Xesosi moianariakori itxauana —
itxana.

¹⁴ Ininiã !kasãkirena, kotxi matĩkati tĩpokotapeka ninoa apisatoõ. ¹⁵ Ininiã ipaniãtana
Petro, Xoão pakini mapara isinina, ninoa auĩtetxiakori ininimoniuana isãkirauatinina
ĩkapani. ¹⁶ Ininiã auĩtetxiakori txari:

—Kanatokopa atxatana ninoa? Kotxi ikinimane Xerosareẽ auakani imarotari
itxĩkitakinirina matĩkati erekape inini. Atãopitikara ninoa kamari posotiiretxi. !Aposotari
akipatiniri ia sãkiretxiti, kotxi ikinipoko imarotapekari matĩkati tĩpokotini. ¹⁷ Kona
anirekari ikara pirena apikomoni iaripiretini kãkiti sauaki. Ininiã atxanako ninoa: “Na
apikomoni Xesosi pirena hĩsãpiretapinikariko.”

¹⁸ Ininiã iuaĩkana akiritana. Eereka itxana:

—Kona hĩsãpiretapinikariko apikomoni Xesosi pirena. Kona hõerekapiriko iuaĩkana
Xesosi pirena —itxana.

¹⁹ Ininiã Petro, Xoão pakini apakapapiretana:

—Kiripa atão akĩpitini? Hĩtekani? Teosokani? Kipa erekari? Hĩte mereẽri. ²⁰ Kona
aposotari atakanapiniri asãpiretiniri aĩtikakiti, akenakotakiti pakini —itxana.

²¹ Ininiã iuaĩkana auĩtetxiakori txitana. Iposo atoko auiritana isinina, kotxi maerekati
!ikamana. !Imisiritana, kotxi ipĩkarina kãkiti. Ikinimane kãkiti txari:

—Peerekari Teoso kamakiti matĩkati ĩkapani —itxana.

²² ĩkora kiki makananitakori koarẽta anope iuasaaki.

Xesosi Sãkire Auiãkani Misãkiretiniri Teoso

²³ Xoão, Petro pakini sikakikosaaki, ninoa kanapiriã imoianariakorimoni. Ikinika
sasetotxi auĩteakori sãkire, kiomãtxiakori sãkire pakini ikinika isãpiretana. ²⁴ Ikara ike-
nakotakasaakina, ikinikana misãkiretari Teoso. Ininiã itxana:

—Apiananiri, ikinika posotiiretxi auari pitemoni. Pitenanira Teoso pitxaua. Pite kamari iaxiti, itixi, potxoari uiniti pakini. Imakinika iaxiti auakani, itixi auakani, potxoari uiniti auakani pakini pikama. ²⁵ Kitxakapirika Erekar Matamatakoti kamaimaroretari pinitiri aãtokiri Tavii. Ininiã itxari:

Kinirepa kãkiti Teoso manirekaãkani omanãkarauata? Kinirepa kãkiti maxikatiika xinikari maerekati ikamini ãtimoni?

²⁶ Auãtetxiakori apotiitaua neenamatzixi ikaminina ãkapani. Ninoa apotiitaua Apiananiri inaiatinina ãkapani, imereẽkiti apaka inaiatinina ãkapani, itxa Tavii.

²⁷ —Atãopitikara Erotxi, Põsio Pirato pakini apotiitaua Xoteo minakonikata, Xoteoakori pakinikata. Ninoa apotiitaua uai ia sitatxitiã. Isãkirauatana pamarite Xesosi okinina ãkapani. Txamari pite mereẽri iua erekarinoka kamakari. ²⁸ Mitxi pite imarotari imakinika ninoa kamakiti ãkane. Kãkiti kamari pinirekakiti, kotxi kaposotiirei. ²⁹ Ininiã aãũte, pixinikariko ikara maerekapirenati. Pisikataparaxiniretaua ate pinitiriakoria pisãkire asãpiretini ãkapani. ³⁰ Pamarite erekar kamakari Xesosi posotiireẽ pimakananitanako amianatakani. Kãkiti maposotakinini pikamako. Posotiiretxi pikamako pisãkire aõerekini ãkapani. Ikara pikamako pamarite Xesosi posotiireẽ —itxana ninoa Teosomoni.

³¹ Teoso imisãkiretaãkana atoko, ninoa apotiitiniãtaãua iakeka. Erekar Matamatakoti apoka ikinimanemoni. Ininiã itaparaxinireritikana isãpiretarina Teoso sãkire kãkitimoni.

Teoso Sãkire Auiãkani Moianatari Itariakori

³² Ikinika Teoso sãkire auiãkani ãtika kãkiti xinire atoko itxauana. Kona itxana: “Nota nakitira ia,” kona itxana. Kapotxinaniri !auari. Ninoa xanakari ikinika itiina. ³³ Xesosi iokanatakini itaparaxinireritikana txari ikinimanemoni:

—Xesosi Apiananiri iuaãkana õkitikaua ipinaka atoko. Ate imarotari, kotxi ate aõkitari iua ipinaka atoko —itxana kãkitimoni.

Ininiãkara Teoso sikari ikinika erekar ninoamoni. ³⁴ Ninoa sauaki tiitxi amonitakari !auari. Kikio ipi auiniãri, kakikioteri vëtxitari ãtika. Aapokotxi ipi auiniãri, kaapokori vëtxitari ãtika. Oa txineiro ninoa sika ³⁵ Xesosi iokanatakinimoni. Eereka ninoa xanako o txineiro matiitinimoni.

³⁶ Iuasaaki aua Xosee. Sasetotxi, Arevii apika mekaniri itxaua. Xipri inakori pokomiriãtikiri iua. Xesosi iokanatakini takauãkatari iua Panapee inaãka. Popãkari sãkireẽ iuãka: “Kasikapoxokoniri,” kotxi ãtipirika isikapoxokonitari kãkiti. ³⁷ Iua vëtxitari ãtika ikikiote. Iua kikio ãki isika Xesosi iokanatakinimoni.

5

Ananíasi, Sapira Pakini

¹ Iuasaaki auari Ananíasi inakori, ãtanoro Sapira inakoro pakini. Iua vëtxitari kikio. ² Ikaikotakaro ipixini kikio ãki. Ipixininoka isika Xesosi iokanatakinimoni. Sapira imarotari õtaniri kamakiti. Txamari iua sikasaakiro oa txineiro Xesosi iokanatakini-moni, itxari:

—Ikinika kikio ãki asika Teosomoni —itxa.

³ Iuasaaki Petro txari:

—Ananíasi, kinirepa pauiritari Satanasi misirienetini maerekati pikamini ãkapani? Erekar Matamatakotira pimisirieneta, kotxi ipixini kikio ãki kaikota pitekata. Kinirepa pisãpiretari ikinika txineiro pisikini Teosomoni? ⁴ Kikio pivëtxitini apisapanika, ãkora kikio pite nakiti. Eereka pivëtxitakasaakiri, õkora txineiro pite nakito. Ininiã kinirepa pitxari: “Ikinika nisika Teosomoni?” Kona kãkitini pimisirieneta. Teosora pimisirieneta —Petro txari.

⁵ Iuasaakipeka Ananíasi iripe. Ipãpe. Ininiã ikara kenakotakani pãkarauakata. ⁶ Iuasaaki ãtokoriakori iapirikari Ananíasini ãto mãkatxi mataã ikatinirina ãkapani. Eereka anikarina, kata itxarina iuani.

⁷ Ipi oara, áti oara pakini napaka atoko iua ñtanoro apoka. Kona oimarotapanikari oñtanirini ipinini. ⁸ Ininiã Petro txaro:

—Pisãpiretano. Oia txineironokani hñkikiote ñki hãpakapakito aua? Atão pisãpiretano? — itxaro.

Ininiã oa:

—Ari aroanokara ate apakapakito aua —otxari.

⁹ Ininiã Petro:

—Hñte uãkatatari Erekari Matamatakoti auiritai himisirienetiniri iua? Uatxaika ñronakikoãtaã pñtanirini katakani apokapeka. Ininiã ninoa anikapitikai pite apaka — itxaro.

¹⁰ Iuasaakipeka oñripe, pñpe otxa. Iuañkana ninoa ãtokoriakori ñroã. Apokarona oani, ininiã anikarona. Ikatarona ðtanirini takote. ¹¹ Ininiã ikinipoko Xesosi sãkire auñkani, apanakini ikara kenakoenetakani pakini pñkarauata.

Amianatakani Makananitiko

¹² Iuasaaki Xesosi iokanatakini kamanãtari posotiiretxi, kãkiti mimarotakiniti pakini kãkiti sauaki. Ikiniðtika Xesosi sãkire auñkani apotiitaua Teoso misãkiretikoãtaã, “Saromão pakita” akiritakori. ¹³ Xesosi sãkire mauñkani apokaerekatana ninoa, txamari ipñkarena xika !inirekarina imoianatinina. ¹⁴ Iuaritika apikomoni kãkiti apotiñpotaua ninoakata, kotxi kikiakori, sitoakoro pakini auikari Apiananiri sãkire. ¹⁵ Iuasaaki Xesosi iokanatakini makananitana amianatakani, ininiãkara kãkiti anikana amianatakani kimaporimoni. Sirimatatxi nopini itakana ninoa kimaporiãtaã. Ininiã kãkiti xinikari: “Petro napakasaaki, isanðka amianatanimoni apokiniã, imakananitaãkana.” ¹⁶ Ininiã kaiãopokori kãkiti Xerosareẽ takotekini apoka. Ninoa minana amianatakani, apaka kãkiti maerekani matamatakoni misiritakini pakini. Ininiã Xesosi iokanatakini makananitana imakinikana.

Xesosi Iokanatakini Misiritiko

¹⁷ Iuasaaki sasetotxi auñte apiatakari, imoianariakorikata, satoseoakorikata xikotana Xesosi iokanatakini. ¹⁸ Ininiã ninoa mañkana. Eereka kateia ãki taka itxapena ninoa. ¹⁹ Iua ñkanðkati Teoso nitiri iaxitikiri matakakari kateia tore. Eereka anika itxana iporikiti. Itxana:

²⁰ —Hñsa Teoso misãkiretiko aikotimoni. Iuaã hñsãpiretariko Teoso sãkire kãkitimoni kãkiti auini amaneri inini ñkapani —itxa Teoso nitiri.

²¹ Ininiã ñkanðkapanika ninoa sari Teoso misãkiretiko aikotimoni. Teoso nitiri sãkire iaðka ikamana. Iuaã isãpiretarina Teoso sãkire kãkitimoni.

Iuasaaki sasetotxi auñte apiatakari, imoianariakorikata pñkapiretana Xoteoakori kõtãkikarerini, Xoteo kiomaneakori pakini, ininiã imakinika ninoa apakñtakana Xesosi iokanatakini. ²² Ininiã apanakini sari kateiamoni apinina ñkapani. Txamari apokasaakina iuaã, !auaikana Xesosi iokanatakini. Ininiã ikanapiriãna auñtetxiakorimoni isãpiretinina ñkapani. ²³ Ininiã itxana:

—Ate apokasaaki kateia tore, itotaãkapanika. Kateia nñkatakani auanãta itore takote. Txamari itore amatakakasaaki, kãkiti !auaika iriko ãki —itxana.

²⁴ Ininiã sasetotxi auñte apiatakari, Teoso aikote nñkatakani auñte, sasetotxiakori pakini kenakoenetakasaakiri ikara sãkiretxiti:

—Anekani? Nãpa ninoa atxiñti? Kiripa apikomoni auatako? —itxana.

²⁵ Iuasaakipeka kiki apoka. Isãpiretana:

—Hñkenakotariko nisãkire. Ninoa kikiakori kateia ãki hñtakakini Teoso misãkiretiko aikoti ãki aua. Oerekanãtarina Teoso sãkire kãkitimoni —itxana.

²⁶ Ininiã Teoso misãkiretiko aikoti nñkatakani auñte, initiriakorikata sari iuaã. Ninoa minana Xesosi iokanatakini iuañkana auñtetxiakorimoni. Imañkasaakina, kona iaritatana, kotxi ipñkarina kãkiti kai soroã kiporonakinina. ²⁷ Ninoa apokasaaki, ipaniãtana Xesosi iokanatakini Xoteoakori kõtãkikarerini apisatoð itiminina. Sasetotxi auñte apiatakari txana:

²⁸ —Mitxi ate paniãtai Xesosi sãkire himasãpiretakani kãkitimoni. Txamari hõerekapanikari iua sãkire ikinimane Xerosareẽ auakanimoni. Ate xika Xesosi ipina, hĩtxanãta ikinimanemoni —itxa sasetotxi auĩte.

²⁹ Ininiã Petro, apanakini Xesosi iokanatakinikata apakapapiretari:

—Ate kĩpitari Teoso paniãtakiti. Kona kãkiti paniãtakitini akĩpita. ³⁰ Teoso, akiomaneakorini Teosone, õkitikari Xesosi iuaĩkana auini ĩkapani. Hĩtera okari iua Xesosi aamina ĩpiriãmitakari nopini. ³¹ Iuaritika Teoso takari Xesosi ikikomoni. Itxĩkitakari iua auĩtetxi ininiua. Kãkiti maerekani makatxaãkari itxaua. Ininiã Isaeo auakani takanapiniãri imaerekani, Xesosi makatxakari ninoa maerekani. ³² Ikara ate imarota. Apaka Erekar Matamatakoti imarotari ikara. Teoso sikari iua Erekar Matamatakoti isãkire kĩpitakanimoni —itxa Petro ninoamoni.

³³ Ikara ikenakotakasaakina, iteene omanãkarauatana. Ininiã ninoa:

—Mãokana —itxana.

³⁴ Iuasaaki Kamarieo inakori õkitikaua kõtãkikarerini sauaki. Pariseo itxaua. Teoso paniãtakiti oerekakari itxaua. Ikinimane paxitari iua. Ininiã iua txari:

—Hanikana naia mapara atenoka asãkirauatini ĩkapani —itxa.

³⁵ Ininiã eereka itxana:

—Isaeo tixini auakanii, hĩkitetariko hĩkamakiti ninoa Xesosi moianariakorimoni.

³⁶ Akokaxiti auari Teota inakori. Iua txari: “Auĩtetxi apiatakari nitxaua nota,” itxa. Iuasaaki koatrosẽtosi kikiakori moianatari iua. Auikarina iua sãkire. Txamari okapeẽka iuani. Eereka iuakata sikani iarikape. Iua auĩtetxi ininiua xipope. Isãkire !auikaãkaika.

³⁷ —Teotani ipinaka atoko Xotasi Kariréiakiri apoka. Iuasaaki auĩtetxiakori iaõtari ikinimane kãkiti. Kaiãopokori kãkiti auikari iua Xotasi sãkire, ininiã ninoa moianatari iua. Iua Xotasi imoianariakorikata nirekari ixipokinina auĩtetxiakori. Txamari iua apaka okapeẽka, ininiã imoianariakori iarikape.

³⁸ —Ininiã uatxaikara nõtãkikai hĩte: “Hĩtakanapanako ninoa Xesosi iokanatakini. Hĩsikanakano ninoa, kotxi atxiĩti ninoa !ikamari Teoso paniãtakiti, ininiã paĩtiki ninoa sãkire apaka !auaika. ³⁹ Txamari, ninoa kaminiãri Teoso paniãtakiti, erepaniko, kotxi atxiĩti hinaiatari Teoso” —itxa Kamarieo.

Iuasaaki ninoa Xoteo õtãkikakani kĩpitari Kamarieo sãkire. ⁴⁰ Akiritana Xesosi iokanatakini iuaĩkana ĩĩroinina. Ipaniãtari ninoa xirokitatiko. Ininiã ninoa:

—Xesosi sãkire kona hĩsãpiretapinikako —itxana.

Eereka sikaka itxana isinina ĩkapani. ⁴¹ Isikasaakina, ipoxokoniuatana.

—Teoso apokaerekataua ate, kotxi auiritari amisiritiko Xesosi sãkire aãuikini xika —itxana.

⁴² Ininiã ikiniõtika oerekarauatana Teoso misãkiretiko aikoti ãki, kãkiti aapoko ãki apaka. Isãpiretarina erekari pirena Xesosi Teoso mereẽkiti ininiua pirena.

6

Setxi Kikiakori Mereĩko

¹ Xesosi sãkire auĩãkani apiaãpota. Iuasaaki Xoteoakori Kreko sãkire imarotakani taparakienatana apanakini Xoteoakori. Itxana:

—Atekata auakani sitoakoro tikinitakoni kona apakapari nipokori ikiniõtika apanakini tikinitakoni apakapiniri atoko —itxana ninoa.

² Ininiã Xesosi iokanatakini tosi pakini pĩkapiretana ikinimane Xesosi sãkire auĩãkani. Itxana:

—Kona erekari ate takanapiniri Teoso sãkire aõerekini asikakienarauatini ĩkapani.

³ Ininiã setxi kikiakori himereẽko, ikara parĩkatxi ikaminina ĩkapani. Himereẽna Erekar Matamatakoti paniãtakitinoka kamakani. Himereẽna kimarorerini. Ininiã asikana ia parĩkatxi ikaminina, sitoakoro tikinitakoni isikakienatinina ĩkapani. ⁴ Ininiã atepekana, Teoso amisãkireta. Isãkire aõereka. Ikaranoka akamako ikiniõtika —itxana.

⁵ Ikinimane Xesosi sãkire auiãkani apokaerekatari Xesosi iokanatakini sãkire, ininiã ninoa mereëri Estevão. Iua iteene auikari Teoso sãkire. Erekaru Matamatakoti paniãtakitinokara ikama. Apaka imereëna Piripima, Porókoroma, Nikanooma, Tximoma, Pamenama, Nikoraoma pakini. Iua Nikorao Átxiokiakiri itxaua. Mitxi Xoteo minakatiua iua, eereka imamakaua. Xoteopeka itxapekaua. ⁶ Xesosi sãkire auiãkani minana ninoa Xesosi iokanakinimoni. Ininiã Xesosi iokanatakini misãkiretari Teoso. Iuakona itakana ninoa nopini, ikara Teoso paríka ikaminina tĩkane.

⁷ Ikara atoko ininiã, Teoso sãkire iaripireta apikoxiti. Ininiã mokatanitika kaiãori Xerosareë auakani auikari Xesosi sãkire. Ito sasetotxiakori apaka kĩpitari Xesosi sãkire.

Estevão Maĩkiko

⁸ Estevão iteene auikari Xesosi sãkire. Teoso posotiire aua iuamoni. Kaposotiireri iua, ininiã ikamari kãkiti mimarotakiniti. Ikamari posotiiretxi, Teoso posotiire oerekini ĩkapani. ⁹ Txamari átikaka kikiakori !inirekaru iua. Ninoa áti Xoteo apotiitiniãtaãua aikoti sikani. Ninoa “Ninoaka nireëkiti kamakani” akiritaãkana. Ninoa Sireni sitatxitikini, Arexãtria sitatxitikini, Sirísia tixinikini, Ásia tixinikini pakini. Ninoa iteene misãkiretakakaua Estevãokata, kotxi !auikarina iua sãkire. ¹⁰ Txamari Estevão sãkirauataka atoko, !kasãkireikana, kotxi Erekaru Matamatakoti sikaimaroretari iua Estevão. ¹¹ Ininiã ninoa sikari txineiro apanakini kikiakorimoni Estevão apoĩtinina ĩkapani. Ininiã ninoa txineiro apakapakani txari:

—Ate kenakotari iua, Moisesini imisãkirepiretini, Teoso apaka imisãkirepiretini —itxana.

Txamari na atãoni isãkirena. ¹² Ikara isãkirena xika, kiomãtxiakori, kaiõkatsopareriakori, apanakini kãkiti pakini naiataua, ininiãkara imaĩkarina Estevão, kõtãkikarerinimoni anika itxarina iua.

¹³ Eereka iminana apanakini, Estevão imisãkirepiretinina ĩkapani. Ninoa txari:

—Ia kiki misãkirepiretapikari Teoso misãkiretiko aikoti. Apaka kona inirekaru Moisesi paniãtakiti. ¹⁴ Ate kenakotari iua sãkire: “Xesosi Nasareekiri xipokariko Teoso misãkiretiko aikoti. Ixipokariko akiomaneakorini sãkire Moisesini paniãtakiti.”

Ikara atoko aãpirena ikamana ninoa. ¹⁵ Ikinimane ninoa kãkiti õtãkikakani atamatari Estevão toõ. Teoso nitiri iaxitikiri toõ atokokana itxa Estevão toõ.

7

Estevão Sãkirauata Kõtãkikarerimoni

¹ Ininiã sasetotxiakori auĩte apiatakari txari Estevão:

—Atãokani ninoa sãkire?

² Estevão txari:

—Nikiomaneakori, nitariakori pakini, hĩkenakotanoko. Teoso iaxitikiri oerekaua aãtokirini Apraõnimoni. Mesopotámia tixini auakasaaki, Araã tixini auini apisapanika, Teoso motika iuamoni. ³ Iuasaaki Teoso txari iua: “Pitapanapariko pitixine, pinirimane pakini. Áti tixinimoni pisako. Noerekinimoni pisako,” itxa Teoso. ⁴ Ininiã sipe itxa Apraõ. Itapanapari Kaotéia inakori tixini. Araã tixinimoni iua sipe. Araã auakasaaki irini ipĩpe. Irini ipinaka atoko, Teoso mĩpiri iua uaimoni uatxa aãuiniãtaã. ⁵ Apraõ auakasaaki, Teoso !isikari uai tõpa iuamoni iua nakiti inini ĩkapani. Kona ipixini metro isika iuamoni inakiti inini ĩkapani. Isikaenetari uai tõpa iua, imekaniriakori pakinimoni. Txamari !keeneri iua iuasaaki. ⁶ Teoso txari Apraõmomi: “Pamariteni, pimekaniriakori, papika mekaniriakori auako áti kãkiti tixine. Iuaãrako imisiritapeẽkanako koatrosẽtosi anokanani. Iparĩkauatana apanakini ĩkapani maxikatiĩka. Ininiã iteene imisiritiko aua.”

⁷ —“Ininiãkara nimisiritariko ninoa misiritakani. Eereka Apraõ apika mekaniriakori takanapariko iuaã, uaimoni kanapiriã itxanako. Ininiã ĩkorapokoriti ninoa parĩkauatako nota ĩkapani,” itxa Teoso. ⁸ Ininiã Teoso txari: “Hĩte kitsotakariko ikini hamariteni tsiki mata. Ikara nitakaõtxikare hãtamatakasaaki, hĩxinikariko nisikaenetakiti,” itxa Teoso. Eereka Apraõ ãkiri aua, Isaki inakori. Oito õtipeka auini õti inakasaaki, Apraõ

kitsotakari itsiki mata. Isaki aneëkasaaki, imi Xakoo inakori aua. Eereka Xakoo anaakori auapeka tosi pakini. Ikara tosi imiakori aätokiriakorini iriakori itxauana.

Xosee Pirena

⁹ –Xakoo anaakori xikotari itarina Xosee inakori. Ininiã itariakori vētxitari iua Exito sikanimoni. Iuaritika Teoso auapika iuakata. ¹⁰ Imisiritiko auakasaaki, Teoso moianatari iua imapinakani ñkapani. Iuasaaki Exito auakani auñte Paraoo inakori. Teoso sikaimaroretari Xosee, ininiã Paraoo potxitari iua, ininiã Paraoo txari iua: “Exito auakani auñte pitxauako. Naapoko auakani pinñkata apaka,” itxa Paraoo Xoseemoni.

¹¹ –Eereka makienanitxi aua Exito tixiniã, Kanaaã tixiniã apaka, ininiã ikinimane natxita. Aätokiriakorini apaka !auari nipokori. !Apokari nipokori. ¹² Ininiã Xakoo kenakoenetari triko auini Exito tixini. Ininiã ipaniãtana tesa imiakori Exito tixinimoni isinina. Mitxi lisana Exitomoni.

¹³ –Ininiã iuañkana ãti õti isana Exitomoni, kienatxi iamotinina ñkapani. Iuasaaki Xosee oerekaua ninoamoni. Iuasaaki Paraoo imarotari Xosee nirimane. ¹⁴ Ininiã Xosee pñkapiretari iri Xakoo, itariakorikata, inirimanekata. Setëta sñko pakini kãkiti sari Exito tixinimoni, kotxi aua ikinipoko nipokori iuaã.

¹⁵ –Ininiã Xakoo apanakinikata sari Exitomoni. Iuaã mapakanani atoko Xakooni ipñpe. Eereka aätokiriakorini ipina iuaãtaã apaka. ¹⁶ Ninoa ipñkasaakina, iñtona anikapeëka Sikeë tixinimoni. Iuañkiri akauaritiã ikata inapeëkana. Apraãoni auapanika inakasaaki, iamotari iua akauari Emoo ãkiriakorimoni.

Moisesi Pirena

¹⁷ –Itixi Teoso sikaenetakiti Apraãomoni kaimapeka Xoteoakorimoni inakasaaki, kãkiti Isaeokini kaiñopokoikana Exito tixiniã. ¹⁸ Itokanani napaka atoko, ãti Exito auakani auñte Xoseeni mñmarotakati aua. ¹⁹ Iua auñtetxi misiritari anirimaneakorini. Ininiã sotatoakori mixirika itxapena amarini xapitiri. Eereka oka itxapena.

²⁰ –Iuasaakiikara Moisesi iponaniã. Moisesi amarinipanika inakasaakia peerepatikiri. Ipi, ãti pakini kasiriti iri, inoro pakini nñkatari iua ninoa aapoko. ²¹ Eereka ninoa takanapari iua Paraoo ãkero kipaãtiniãtaãua takote. Ininiã oa apokari iua amarini. Oanikari oañpokomoni. ²² Exito auakani imarore ikinipoko oerekaãka iuamoni. Kasãkireri iua. Kakamareri iua.

²³ –Koarëta anokanani inakasaaki, inirekari inirimane Isaeokini aõkitini. ²⁴ Inirimanemone isikasaaki, itikari Exito auakari xirokitatiniri kiki Isaeokiri, ininiã ixikatxitari. Iua aritapiri Exito auakari, oka itxapiri iuani. ²⁵ Iuasaaki Moisesi uãkatari inirimane Isaeokini imarotiniri Teoso nirekari Moisesi makatxakinina ninoa, Exito auakani mamisiritakanina ñkapani. Txamari ninoa !imarotari ikara. ²⁶ Apikomoni ãti õti, iua sari inirimanemone. Iuaã iua apokana ninoa neenamauanãtini, inaiapoatakakauana. Ininiã Moisesi õtãkikana ninoa. Itxana: “Kikiakori hñtaritakakaua. Kinirepa himisiritakakaua?”

²⁷ –Inirimane misiritakari katika txari Moisesi: “Kipa txai pite ate auñte pininiua? Kipa txai pite ate õtãkikakari pininiua? ²⁸ Kita Exitokirini pokini atokokana pokatanoko nota?” itxa. ²⁹ Ikara sãkiretxiti ikenakotakasaaki, Moisesi takanapari Exito tixini. Mitxiaã tixinimoni isa. Iuaã ñtanorouata. Ipi imiakori aua iuamoni.

³⁰ –Koarëta anokanani ãparaã makipakaniãtaã iua aua iuasaaki. Teoso nitiri iax-itikiri motika Moisesimoni ixirata Sinai inakoriãtaã. Iuasaaki iua atamatari aanaia tirinini, txama !arika. !Ixipoka. ³¹ Ikara itikasaaki, Moisesi tsorñkaãta, ininiã aanaia takote isa iteene atamatini ñkapani. Iuasaakipeka ikenakotari Apiananiri sãkirauatini: ³² “Pikiomaneakori Teosonekarano nota. Apraão, Isaki, Xakoo pakini Teosonekarano nota,” itxa Teoso. Iuasaaki Moisesi kikinana ipñkare xika. Ipñkari Teoso sãkirauatini manapi atamatini.

³³ –Ininiã Apiananiri txari iua: “Pikitimata pimakatxaka, kotxi uai pitiminiãtaã nota auanãta. ³⁴ Nitikana ninakitiakori Exito tixiniã. Exito auakani misiritapena ninoani.

Nikenakotari oõkinina. Nota inari nisikakinina ìkapani. Ininiãkarako Exito tixinimoni niokanatai pite,” Apiananiri txari Moisesi.

³⁵ –Iua Moisesi Isaeokini manirekakiniti, kotxi ninoa txari: “Kipa txai pite ate auõte pininiua? Kipa txai pite ate õtãkikakari pininiua?” itxarina. Iuakara Teoso iokanatakiti ninoamoni ninoa auõte ininiua ìkapani, ninoa imakatzakini ìkapani, kotxi Teoso nitiri aanaiaã tirinakariã auakari iokanataru iua ninoamoni.

³⁶ –Eereka iua makatzakana ninoa Exito tixini. Oerekari Teoso posotiire kãkiti maposotakiniti Exito tixiniã. Oerekari Teoso posotiire potxoari uiniti, Põkamarari inakoriã. Æparaã makipakaniãtaã apaka oerekari Teoso posotiire koarõta anokanani iuaãtaã.

³⁷ –Ia Moisesikara sãpiretana Isaeokini: “Teoso iokanatariko isãkire sãpiretakari hõtemoni nota iokanatini atokokana. Hõte nirimanekara iua. Hõkenakotariko iua sãkire,” itxa Moisesi. ³⁸ Moisesi aua Teoso nakitiakorikata Æparaã makipakaniãtaã. Aãtokiriakorini aua iuakata. Apaka Teoso nitiri iaxitikiri aua iuakata. Iua Teoso nitiri misãkiretari Moisesi ixirata Sinai inakoriãtaã auakasaaki. Iua apakapari Teoso sãkire, atemoni isikini ìkapani. Iua Teoso sãkire txõkitakari iua sãkire auõãkani Ætipirika auini Teosokata.

³⁹ –Aãtokiriakorini kona nirekari inõkaenetinirina Moisesi sãkire. !Inirekarina iua. Inirekarina Exitomoni ikanapiriinina. ⁴⁰ Iuasaaki ninoa paniãtari Arõo: “Teosoakori kamakoni pikaminaua, ate mõkiikakani tãkane. Ækora Moisesi Exito tixini amakatzakakiri, Ætapari iua? !Aimarotari iua auiniãtaã,” itxarina Arõomoni. ⁴¹ Ininiã ninoa kamari kema auõte Ækiri atoko inakari oro kamakori iteosonetinina ìkapani. Eereka okarina soti auõte teoso ikamakitina isikinina ìkapani. Kiiniri ikamana. Ipoxokoniuatana, kotxi ninoaka kamari iteosonena. ⁴² Txamari Teoso atão inakari takanapana ninoa. Ininiã iteosonetarina iaxiti auakani iõriki, kasiri, atokatxi pakini. Teoso sãkire sãpiretakani kitxakapirõka iõkatsopatari ia sãkiretxiti:

Hõte Isaeokini, koarõta anokanani Æparaã makipakaniãtaã hãuakasaaki, !hõkari pirãtxi nota ìkapani.

⁴³ Iuasaaki hõte anikari papiri aamata kamakori hõteosone Moroki inakori ìkapani. Apaka iõriki atoko inakari hõteosone Hõpaã inakori hõkamakiti hanika hõtekata iuasaaki. Hõte kamari Moroki, Hõpaã pakini hõteosonetini ìkapani. Ikara xika nota iokanataiko hõte Æti kãkiti tixinemoni. Papirõnia sitatxiti apikoxiti niokanatai hõte.

Teoso Papire Pirena

⁴⁴ –Aãtokiriakorini auari papiri aamata kamakori Teoso misãkiretiko papire Æparaã makipakaniãtaã auakasaakina. Moisesi kamari iua papiri Teoso paniãtakiti iaõka, kotxi Teoso oerekari Moisesi iua papiri kamiko. ⁴⁵ Moisesi ipinaka atoko apanakini aãtokiriakorini apakapari iua papiri irina sikakiti. Ininiã iuasaaki ninoa anikari iua papiri, Xosoeekata isikasaakina, Æti uãka tixine imixirikasaakina, kotxi Teoso omitikana ninoa Æti uãka, aãtokiriakorini apokasaaki iuaã. Iua papiri kaikota iuaã. Auapanika iuaã Tavii aãtokiriakorini auõte inakasaakiua. ⁴⁶ Teoso apokaerekatari Tavii, ininiã Tavii nirekari Xakoo Teosone misãkiretiko aikoti ikamini. ⁴⁷ Txama Teoso !auiritari Tavii kaminiri. Ininiã Saromão, iua Ækiri kamari Teoso misãkiretiko aikoti.

⁴⁸ –Teoso Apiananiri kona aua aapokotxi kãkiti kamakiti Æki, kotxi Teoso sãkire sãpiretakari kitxakapirõka txari:

⁴⁹ Apiananiri txari: “Niitopãkiniãtaã iaxiti itxa. Itixi nikiti nitakiniãtaã. Ininiã kanatokopa itxa aapokotxi hõkamini nota ìkapani? Namonipa nauiniãtaã?

⁵⁰ Kotxi notakara kamari ikinipoko,” itxa.

Erekari Matamatakoti Manirekakani

⁵¹ Estevão sãkirauatapanika:

–Hõte kona kinirõo kenakotaka txari Teoso sãkire. Hõtsiki mata kisauakaãkapitika, txamari kona hõkenakotari Teoso sãkire hãkixinireẽ. Ætipirika kona hinirekari Erekari

Matamatakoti paniätakiti hīkamini. Hātokiriakorini kitxakapirīka atokotxikana hīte. ⁵² Hātokiriakorini misiritana ikinimane Teoso sākire sāpiretakani. Ninoa okana iua sākire sāpiretakani, Erekarinoka Kamakari sāpiretakani. Ninoa Teoso sākire sāpiretakani sāpiretari Erekarinoka Kamakari āti ōti uai apokini. Īkorasaaki hītera mīkapiritari iua. Hītera okari iua Erekarinoka Kamakari. ⁵³ Hītekara apakapapekari Teoso sākire Teoso nitiriakori mīkiti. Iuaritika !hīkamari ipaniätakiti —itxa Estevão.

Estevão Kiporonakiko

⁵⁴ Xoteoakori kenakotakasaakiri Estevão sākire, omanākarauatana. Akat-sakatsiriūtaua omanākarena xika. ⁵⁵ Iuaritika Erekarī Matamatakoti iteene sikataparaxiniretari Estevão. Iuasaaki iua ionakaāta iaxiti. Atamatari Teoso iotximere. Atamatari Xesosi timini Teoso kikomoni. ⁵⁶ Ininiā itxa:

—Hātamata. Natamatari iaxiti xorekini. Aītari iaxitikiri tima Teoso kikomoni —itxa Estevão.

⁵⁷ Iuasaaki Xoteoakori totari ikenakokina iuakoāna. Iteene ninoa akiripoakata. Eereka ninoa ikinika miteka iuamoni. ⁵⁸ Imaīkarina. Ikosekaāpotarina sitatxi mapotōkire. Iuaātaā ipotorikana ikiporonakinirina iua kai soroā. Iuasaaki itikarauatakani takari imākana Saoro inakori kiti takote inīkatini ĩkapani. ⁵⁹ Ikiporonakasaakirina, Estevão akiritari Teoso. Itxari:

—Apiananiri Xesosi, papakapariko nixinire.

⁶⁰ Iuasaaki ikapotoreēkaua. Itaparasākireritika akiritari Teoso:

—Apiananiri, pimaxinīkaretariko ia maerekati ninoa kamakiti —itxa.

Iuasaakipeka ipīpe.

8

Xesosi Sākire Auiākani Misiritiko

¹ Estevão ipīkasaaki Saoro aua iuaā.

—Ari erekapitikari ipinini —itxa Saoro.

Estevão ipinini ōtisaakipeka ipotorika Xesosi sākire auiākani misiritiko Xerosareē. Ninoa iteene misiritaāka, ininiā ikinimane Xesosi sākire auiākani Xerosareē auakani iarika itxapena. Xotéia tōpamoni, Samaria tōpamoni pakini iarikana. Xesosi iokanatakininoka kaikota Xerosareē. ² Estevão ipinaka atoko kikiakori Teoso sākire auiākani katari iuani. Iteene itxiapatana. ³ Iuasaaki Saoro potorika ixipokinina Xesosi sākire auiākani. Ninoa aapokomoni isaāpota. Kikiākini, sitoakoro apaka ikosekaītota, taka itxana kateia āki.

Piripi Samariamoni Sini

⁴ Teoso sākire auiākani iarikasaaki, isāpiretarina Teoso sākire ikini aapokotxitiā. ⁵ Piripi sari Samaria sitatxitimoni. Iuaā iua sāpiretari kākiti Xesosi Teoso mereēkiti ininiua. ⁶ Isākire ikenakotakasaakina, posotiiretxi ikamakiti itikasaakina, iteene ikenakotarina isākire. Imixinikarina isāpiretakiti. ⁷ Maerekani matamatakoni kākiti auaītotakini takanapari kākiti. Akiripoakatana ipokīkasaakina. Kaiāopokori matīpokotakani apaka makananitaāka. ⁸ Ininiā Samaria auakani iteene poxokoniua.

Mīti Simão Inakori

⁹ Iuasaaki Samaria sitatxitiā aua kiki Simão inakori. Mīti itxaua iua. Imisirienetana kākiti Samaria auakani. Ininiā ikinimane tsorīkaāta, ikamakiti atamatakasaaki. Iua iuikaua.

—Kimaroreno nota —itxa.

¹⁰ Ininiā ikinimane kīpitari iua sākire. Auītetxiakori, poiāorini pakini kīpitari isākire. Ininiā itxana:

—Iua Simão auari Teoso posotiire. Kaposotiireri iua —itxana.

¹¹ Ininiā ikīpitarina isākire, kotxi itokatapeka itikarina ikamakiti kākiti mimarotakiniti.

¹² Ninoa auikasaakiri Piripi sāpiretakiti erekari pirena, Teoso auītetxi ininiāua pirena, Xesosi Kristo posotiire pirena pakini, kikiakori, sitoakoro apaka patxisataāka. ¹³ Iuasaaki

Simão apaka auikari. Ipatxisataãka. Ininiã isari Piripi sinimoni, kotxi itsorïkaãta, posotiiretxi kãkiti mimarotakiniti itikasaaki.

¹⁴ Xesosi iokanatakini Xerosareẽ auakani kenakopiretari Samaria auakani auikiniri Teoso sãkire. Ininiã ninoa iokanataro Petro, Xoão pakini Samariamoni. ¹⁵ Iuaã apokasaakina, imisãkiretarina Teoso, Erekaro Matamatakoti isãkire auiaãkani apakapini ïkapani. ¹⁶ Erekaro Matamatakoti kona apokapanika ninoamoni iuasaaki. Apiananiri Xesosi uãkaãnanira ipatxisataãkana. ¹⁷ Ininiã Petro, Xoão pakini takari iuakona ninoa nopini. Iuasaakipeka apakaparina Erekaro Matamatakoti.

¹⁸ Simão itikasaakiri Erekaro Matamatakoti apokini kãkitimoni, kinirão sikaka itxaro txineiro Petro, Xoão pakinimoni. ¹⁹ Ininiã itxa:

—Ïkora hïposotiire hïsikano, niuako kãkiti nopini nitakasaaki, Erekaro Matamatakoti ninoamoni apokini ïkapani —itxa.

²⁰ Txamari Petro txari:

—Pite, pitxineirotekata samakauako, kotxi pite uãkatari pitxineirote iamotiniri Teoso posotiire. ²¹ Kona xapiti pitemoni auapani ia parïkatxi, kotxi pãkixinire na atão Teoso apisatoõ. ²² Ininiã pitakanapariko ïkara pimaerekani. Pamanaãri Apiananiri pimaerekani imakatzakini ïkapani. Atxiiti iua maxinïkaretari pixinikakiti pãkixinireẽ. ²³ Nota imarotai pite. Pãkixinireẽ xãpoãkata maerekatinoka. Pimaerekani maïkai. ! Auiritai pisini pinirekinimoni —itxa Petro.

²⁴ Ininiã Simão apakapiretari:

—Pimisãkiretariko Teoso nota ïkapani. Ikara atoko pisãpiretakiti na ninireka —itxa Simão.

²⁵ Petro, Xoão pakini sãpiretari Xesosi kamakiti ninoa ïkapani. Isãpiretarina Apiananiri sãkire. Eereka ikanapiriãna Xerosareẽmoni. Ikanapiriaãpotakasaakina, isãpiretarina Teoso iokanapirena erekaro kaiãopokori aapokotxi auakanimoni Samaria tãpa.

Piripi Etxiõpiakirikata

²⁶ Eereka Apiananiri nitiri iaxitikiri misãkiretari Piripi:

—Paiamatako. Atokatxi pokïkinimoni pikikomoni pisako. Pisa kimaporimoni, ãparaã makipakaniãtaã. Iua kimapori Xerosareẽ Kasa tixinimoni sikari.

²⁷ Ininiã aiamata, sipe itxari. Ipixinipokoriti aõkitari Etxiõpia tixinikiri. Etxiõpia auakani auite õtãkikakari itxaua. Paimatireri iua. Ikinimane kamari iua paniãtakiti. Etxiõpia auakani auite sito Kãtasi inakoro. Kaiãopokoro otxineirote, otii pakini. Iua kiki parïka ikinipoko oa nakiti inïkata oa ïkapani. Mitxi iua sari Xerosareẽmoni Teoso imisãkiretini ïkapani. ²⁸ Ikanapiriãkasaaki, mitekaï ãki iitopãkasaaki, atatsopataro Isaía iõkatsopatakiti. Isaía Teoso sãkire sãpiretakari kitxakapirïka. ²⁹ Iuasaaki Erekaro Matamatakoti txari Piripi:

—Pisa okira mitekaïmoni. Pikaikota oa takote.

³⁰ Ininiã Piripi miteka iuamoni. Ikenakotakasaakiri Isaía iõkatsopatakiti atatsopatini, Piripi pimaãri:

—Pimarotataro ere patatsopatakiti? —itxari.

³¹ Ininiã iua:

—Natokopa ininiãpa nimarotari? Kipa oerekano? —itxari.

Ininiã aiataro Piripi mitekaï ãki iuakata iitopãkini ïkapani. ³² Iua iõkatsopataro ia Teoso sãkire:

Soti auite okikomoni anikiko atoko itxa iua. Soti auite ãkiri piti kisauakikosaaki, ! kasãkireri iua. Iua soti auite ãkiri atoko itxa iua, kotxi iua apaka !kasãkireri.

³³ Inapetaãka iua. !Atãoni kãkiti kama iuamoni. Okaãkape. !Auari iua ãkiri. Ikara atoko itxa Teoso sãkire, Isaía iõkatsopatakiti.

³⁴ Ininiã iua Etxiõpiakiri pimaãri Piripi:

—Pisāpiretano, natokopa itxa Teoso sākire sāpiretakari sākire? Kipa soti auīte atoko inakari? Kipa okaāka? Iuakani? Ātikani?

³⁵ Ininiā Piripi oerekari ikara Teoso sākire iōkatsopatakori.

—Xesosira ikara atoko inaāka —itxa.

Ininiā apikomoni isāpiretari Teoso iokanapirena erekari, Xesosi pirena.

³⁶ Isaāpotakasaakina, apokana āparaā auiniātaā. Ininiā iua kiki txari:

—Uai aua āparaā. Apakata nipatxisatiko?

³⁷ Ininiā Piripi txari iua:

—Apakatapitika pipatxisatiko iteene pauikiniāri Xesosi sākire pākixinireē.

Ininiā iua apakapapireta:

—Nota aukapitikari Xesosi Teoso mereēkiti, Teoso ākiri ininiāua.

³⁸ Ininiā iua Etxiópiakiri paniātari mitekaī anikakari iotokini. Iuasaaki Piripi, iua Etxiópiakiri apaka katzaka, imaāta itxana. Ininiā Piripi patxisatari iua kiki.

³⁹ Ikanīkiītakasaakina, Erekari Matamatakoti anikari Piripi. Ininiā iua kiki kona atamataikari Piripi. Ininiā iāpotapitipo. Ipoxononoka itxa. ⁴⁰ Iuasaaki Asoto sitatxitipeka itokiā Piripi. Isaāpotakasaaki, ikinika aapokotxitiā isāpiretari Teoso sākire. Teoso sākire isāpiretiniritika Sesaréia sitatxitimoni apokako.

9

Saoro Auikiniri Xesosi Sākire

(Átosi 22.6-16; 26.12-18)

¹ Iuasaaki Saoro okaenetapikana Apiananiri sākire auīākani. Ininiā iua sari sasetotxi auīte apiatakarimoni. ² Amanaāri aātsopa Saoro parīka sāpiretiko aātsopati. Iua nirekari sasetotxi auīte iōkatsopatiniri ikara, Saoro anikini īkapani. Inirekari isikiniri iua aātsopa ikinika aiko Xoteo apotiitiniātaāua nīkatakanimoni Tamásiko sitatxiti, kotxi Saoro nirekari imaīkinina Xesosi sākire auīākani, kikiakori, sitoakoro pakini, Tamásiko sitatxitiā apokakini. Inirekari anikinina Xerosareēmoni.

³ Iua apokaāpotakasaaki Tamásiko sitatxitimoni, katimaritika iotximeretxi iaxitikiri ākitari. ⁴ Irika xitipe. Ininiā ikenakotari sākiretxi:

—Saoro, Saoro, kinirepa pimisiritano? —itxa ikenakotakiti.

⁵ Ininiā iua:

—Kiriparai Apiananiri?

Ininiā:

—Xesosira nota. Pimisiritakitikarano —itxa Xesosi.

⁶ Ikikinanaka, iteene ipīkarauatiniā.

—Apiananiri, kipa pinireka nikaminii? —itxa.

Ininiā Apiananiri:

—Pōkitikaua, sitatxi pisa. Iuaā āti sāpiretai pikamakiti tīkane —itxa Xesosi.

⁷ Imoianariakori iotoka. Ipīkarauatana. Masākireninoka itxana. Ninoa kenakotari iaxitikiri sākire, txamari !atamatarina.

⁸ Eereka Saoro ōkitikaua, xorekaāta itxa, txamari imosiāretapeka iua. Ininiā imoianariakori anikari iua. Ikanōpiāpotarina Tamásikomoni. ⁹ Ipi, āti pakini ōti mōsiāretika itxa. Iuasaaki !inipokota. !Iāta.

Ananíasi Makananitiniri Saoro

¹⁰ Tamásiko sitatxiti aua kiki Xesosi sākire auīākari, Ananíasi inakori. Iuasaaki Teoso sākiraauata Ananíasikata itaponemoni. Itaponeē Apiananiri akiritari iua:

—Ereēkai Ananíasi —itxa.

Ininiā:

—Uaikarano nota, Apiananiri —itxari Teoso.

¹¹ Apiananiri txari:

—Paiamatako. Kimapori Eretîka ãpori kimaporitimoni pisako. Xotasi aapokomoni pisa. Iuaã pinitari Taaso sitatxitikiri Saoro inakori. Uatxiikara isãkirauanãta notakata. ¹² Saoro taponetai pite. Iua atamatai pite apokini iuamoni, piuako inopini pitakini ïkapani iuaïkana kõiãrepeka inini ïkapani —itxa Teoso.

¹³ Ininiã Ananíasi:

—Apiananiri, kãkitipokoni sãpiretano ikara kiki pirena. Pamõnõkoniri iua. Imisiri-tapekana pite nakitiakori Xerosareẽ sitatxiti auakani. ¹⁴ Sasetotxiakori auïte paniãtari iua imaïkinina piuãka akiritakani uai Tamásiko sitatxiti auakani —itxa Ananíasi.

¹⁵ Ininiã Apiananiri txari:

—Pisako iuamoni. Nota mereẽpekari iua kiki, nota parïka ikamini ïkapani. Iua sãpiretariko nota sãkire Xoteo minakonimoni, auïtetxiakorimoni, Isaeo tixini auakanimoni pakini. ¹⁶ Noerekariko Saoro iteene atatsiirauatini nota sãkire auikini xika —itxa Teoso.

¹⁷ Ininiã Ananíasi sari Xotasi aapokomoni. Ìroã. Eereka iuako itaka Saoro nopini.

—Nitari Saoro, Apiananiri Xesosi, paõkitakitira kimaporiã, iuara iokanatanano nota pitemoni kõiãrepeka iuaïkana pinini ïkapani. Iokanatanano nota pitemoni Erekari Mata-matakoti papakapini ïkapani —itxa.

¹⁸ Iuasaakipeka oki nopini auakari katxaka. Ximaki tãta atoko itxa. Kõiãrepeka itxa. Eereka õkitikaua. Iuasaaki ipatxisataãka. ¹⁹ Inipokotaka atoko, itapara auapeka.

Saoro Tamásiko Sitatxiti Auakasaaki

Saoro kaikota Tamásiko mapaõti Xesosi sãkire auïãkanikata. ²⁰ Iua sari aiko Xoteo apotiitiniãtaãua. Iuaã oerekarauata. Oerekari Xesosi Teoso ãkiri ininiãua. ²¹ Isãkire kenakotakani tsorïkaãta.

—Iua Saoro okana Xesosi uãka akiritakani Xerosareẽ auakani. Iua ina uaimoni Xesosi uãka akiritakani imaïkini ïkapani, sasetotxi auïteakorimoni anikinina ïkapani —itxana.

²² Saoro oerekarauatakasaaki, imaroãpotari Teoso imarore. Teoso sikaposoti-ireãpotari iua. Ininiã iteene imarotari Teoso sãkire, apanakini oerekini ïkapani. Iua atoko ininiã, itaparaxinireritika oerekari Xoteoakori Tamásiko sitatxiti auakani Xesosi Teoso Mereëkiti ininiãua. Ininiã ninoa ìmarotari apakapapiretinirina iua.

²³ Mapaõti atoko Xoteoakori sãkirauatakaka Saoro okinina ïkapani. ²⁴ Saoro sãpiretaãka Xoteo aiamatapeka okinirina iua. Ninoa iãtapapikari sitatxi ïronakikoãtaã okinirina tïkane. Ìkanõka, pokamara iãtaparina iua.

²⁵ Iuasaaki ïkanõka Xesosi sãkire auïãkani anikari iua sitatxi pirikeremoni. Iuaã Saoro ieretakaua kotari ãki. Pirikeri sonaã iokatxakarina Saoro kotari ãki sitatxi mapara. Iposo atoko imiteka Xerosareẽmoni.

Saoro Xerosareẽ Apokini

²⁶ Saoro apokasaaki Xerosareẽ, inirekari Xesosi moianariakori imoianatini. Txama ìkinikana pïkari iua. Kona !auiritarina iua moianatinina ninoa, kotxi !auikarina iua atão auikiniri Xesosi sãkire. ²⁷ Iuaritika Panapee anikari iua Xesosi iokanatakinimoni. Isãpiretana ninoa:

—Kimaporiã isikasaaki, Saoro aõkitari Apiananiri. Apiananiri misãkiretari iua. Tamásiko sitatxiti auakasaaki, itaparaxinireritika isãpiretari Xesosi sãkire kãkitimoni —itxa Panapee.

²⁸ Panapee sãkire ìkenakotakasaakina, auikarina Saoro sãpiretakiti. Ininiã Saoro kaikota Xerosareẽ Xesosi sãkire auïãkanikata. Inirekinimoni isa Xerosareẽ. Isinimoni itaparaxinireritika isãpiretari Apiananiri Xesosi sãkire. ²⁹ Isãkirauata Xoteoakorikata, Kreko sãkire ìmarotakanikata. Inirekarina ninoa ìmarotiniri Xesosi sãkire. Txamari inirekarina okinirina iua. ³⁰ Iuasaaki Xesosi sãkire auïãkani ìmaropiretari ninoa okaen-tiniri Saoro, ininiã anikarina sitatxi Sesaréia inakorimoni. Eereka iokanatarina iua Taaso inakori sitatxitimoni.

³¹ Iuasaaki Xesosi sãkire auiãkani !imisiritaãkaika. Xotéia tõpa, Kariréia tõpa, Samaria tõpa pakini !auaika Xesosi sãkire auiãkani misiritiko iuasaaki. Erekaru Matamatakoti sikataparaxiniretana ninoa. Kãkiti itoãpotari auikiniri Xesosi sãkire. !Ikamarina maerekati, kotxi iteene ipĩkarina Apiananiri.

Enéiasu, Tókasi Pakini

³² Petro ianaxititakasaaki, iua sari Teoso sãkire auiãkanimoni Arita sitatxiti auakanimoni. ³³ Iuaã aõkitari kiki Enéiasu inakori. Iua matĩpokotakati itxaua. Oito anokananipeka !õkitikaua. ³⁴ Petro txari iua:

—Enéiasu, Xesosi Kristo makananitai. Põkitikaua. Piapirikari pisirimata —itxari matĩpokotakati.

Iuasaakipeka õkitikaua. ³⁵ Ikinipoko Arita sitatxiti auakani, Sarõ sitatxiti auakani pakini atamatari iua Enéiasu, ininiã itakanaparina imaerekanina. Inĩkapiretarina Api-ananiri sãkire.

³⁶ Áti sitatxiti Xopi inakoriã oãua sito Teoso sãkire auiãkaro, Tapita inakoro. Kreko sãkireẽ ouãka Tókasi otxaua. Oa kamapikari erekari. Omoianatana matxineiroteni.

³⁷ Arita auakani auikasaakiri Apiananiri sãkire, oa Tókasi amianata. Eereka oani opĩpe. Opĩpeka atoko, arokaĩtotarona, taka itxarina oĩto itanokiri koaã. ³⁸ Xopi sitatxiti Arita sitatxiti takote, ininiã Xesosi sãkire auiãkani Xopi sitatxiti auakani kenakoenetari Petro Arita sitatxiti auiniã, iokanatana ipi kiki Petromoni, apinirina ĩkapani. Iokanapiretana:

—Pinapokako uai. Katima pitxako —itxana.

³⁹ Ininiã Petro aiamata. Ninoakata isa. Iua apokasaaki, anikarina itanokiri koaã. Ikinipoko tikinitakoni txiapanãta Petro takote. Ninoa oerekari Petro mãkatxi Tókasini kamakiti ninoa ĩkapani oãuakasaaki. ⁴⁰ Ininiã Petro iokanatana ninoa mapara. Eereka ikapotoreẽkaua. Isãkirauata Teosokata. Eereka oamoni ikirioka. Itxaro:

—Tapita põkitikaua.

Iuasaakipeka xorekaãta otxa. Oãtamatakasaakiri Petro, oitopãka. ⁴¹ Ininiã imaĩkaro ouako oõkitikiniua ĩkapani. Eereka iua akiritana Xesosi sãkire auiãkani, tikinitakoni pakini, oa auãki onini oerekini ĩkapani.

⁴² Ikini Xopi auakani imaropiretari Tókasi iuaĩkana auãki onini, ininiãra itomaneri kãkiti aukari Apiananiri sãkire. ⁴³ Petro kaikota iuaã Xopi sitatxiti mapaõti. Iua kaikota Simão inakorikata. Iua Simão aamata kamakari.

10

Konério Tapone Pirena

¹ Iuasaaki Sesaréia sitatxiti aua kiki Konério inakori. Áti uãka iua. Homano itxaua. Seĩ pakini sotato auĩte iua. Kãkiti akiritana ninoa sotatoakori Itáriakini. ² Iua Konério kamari Teoso sãkire iaõka. Iua, ikinipoko aapoko auakanikata paxitari Teoso. Imisãkiretapikari Teoso. Isikana matiitimoni inirekakitina. ³ Áti õti kikatapeka inakasaaki itaponeuata. Itaponeẽ itikari Teoso nitiri apokini iuamoni. Itxari:

—Konério —itxa.

⁴ Teoso nitiri atamatakasaaki, ipĩkarauata.

—Apiananiri, kipa pinireka? —itxa Konério.

Ininiã Teoso nitiri txari:

—Teoso kenakotapekari pisãkire iuamoni. Itikapekari pisikarauatini matiinimoni. Teoso xinikapitikai. ⁵ Ininiãkara átikaka kikiakori piokanata Xopimoni Simão Petro uaimoni imininina ĩkapani. ⁶ Iua kaikota áti Simãokata, aamata kamakarikata. Iua aapoko potxoari uiniti takote aua. Iua Simão Petro sãpiretaiko pikamakiti tĩkane —itxa Teoso nitiri.

⁷ Eereka iua Teoso nitiri sipe. Iposo atoko Konério akiritana ipi initiriakori, átika isotatone pakini. Iua sotato kamari Teoso sãkire iaõka. Iua auapika Konériokata, inireẽkiti

ikamini tĭkane. ⁸ Ininiã Konério sãpiretana ninoa ikinipoko Teoso nitiri sãpiretakiti. Iposo atoko iokanatana Xopimoni.

Petro Tapone Pirena

⁹ Katimatinĭkata Konério iokanatakini potorika. Apaniãxiti inakasaaki ninoa apokaãpota sitatxi Petro auiniãtaã. Iuasaaki Petro kanikauata aapokotxi nopini Teoso imisãkiretini ĭkapani.

¹⁰ Iuasaaki Petro natxita. Inirekari inipokotini. Nipokori kamikosaaki, itaponeuata. ¹¹ Itaponeẽ atamatar iaxiti xorekini. Aamata mitamatar katxakaãpota iuamoni. Imapotomatare ipi ipi pakini iaxirikaãka. Iua aamata katxaka xitimoni. ¹² Iua aamata ãki aua ikini sereti kaxipirini. Aua pirãtxi. Aua ĭtopa auakani. Aua imini. Aua araãkani.

¹³ Ininiã Petro kenakotari itanokiri sãkirauatini:

—Petro, põkitikaua. Pokari ia, pinikini ĭkapani —itxari Petro.

¹⁴ Petro Xoteo itxaua, ininiã kona ikinika ĭnika. Ininiã Petro txari:
—Konapitini Apiananiri. Kona ninikari ikinipoko naia kaxipirini. Manaiatini. Pamininiri —itxa.

¹⁵ Iuaĭkana itanokiri sãkirauata:

—Nota oeretakiti kona kamininiri kona pitxape —itxa.

¹⁶ Ipi, ãti pakinikata iua aamata katxaka ikara atoko. Iposo atoko ikanĭkaxitita Teoso tixinemoni.

¹⁷ Ininiã Petro ãkixinireẽ ixinikaxitita:

—Kanatokopa itxa ikara nitapone?

Iuasaakipeka Konério iokanatakini apokapekari Simão aapoko. Apokana Simão aapoko toremoni. ¹⁸ Akiritana:

—Ereẽkai. Simão Petro uai aua atxiĩti? —itxana.

¹⁹ Iuasaaki Petro xinikapanikari itapone. Erekar Matamatakoti txari:

—Ikiraãkarana ipi, ãti pakini kãkiti nitanãtai. ²⁰ Põkitikaua. Pikatxaka xitimoni. Pisa ninoakata, kotxi niokanatana ninoa uaimoni —itxa Erekar Matamatakoti.

²¹ Ininiã Petro sari Konério iokanakinimoni:

—Notakara hĭte nitanãta. Kipa ĭkai hĭte?

²² Ninoa apakapapiretari iua:

—Konério, aãũte iokanataua ate. Erekar iua. Ikamari Teoso sãkire iaõka. Ikinipoko Xoteo apokaerekatar iua. Teoso nitiri iaxitikiri paniãtari iua pite akiritini, pisãkire ikenakotini ĭkapani —itxana.

²³ Ininiã Petro:

—Hiĩroã. Uai himaka —itxa.

Konério Aapoko Auakasaakina

Katimatinĭkata Petro sari ninoakata. Apanakini Xesosi sãkire auiãkani Xopikini sari apaka. ²⁴ Katimatinĭkata apokana Sesaréia sitatxiti, Konério auiniãtaã. Iua Konério apotiitapekana inirimane, aõkimanere pakini Petro iãtapinina ĭkapani. ²⁵ Petro ĭroãkasaaki Konério aapoko, iua aõkitari Konério. Iuasaaki Konério kapotoreẽkaua Petro apisatoõ.

²⁶ Txamari Petro txari iua:

—Põkitikaua. Kiki pite atoko inakarikarano nota.

²⁷ Isãkirauatakasaakina, Petro ĭroã. Aõkitari ito kãkiti apotiitakaniua. ²⁸ Ininiã itxana:

—Hĭte imarotari ate kiomanekorini !auritari Xoteo moianatiniri ãti uãka. !Auiritaãka ate ĭroini hĭte atoko inakari aapoko. Iuaritika Teoso txano nota: “Na pakiritapiri ãti uãka kanaiari,” itxano. ²⁹ Ininiã hĭte pĭkapiretakasaakino nota, nimarotari atão nisini hĭtemoni. Ininiã, kinirepa hĭte apakĭtakano nota? —Petro txari Konériomoni.

³⁰ Konério apakapapiretari:

—Ipi, ipi pakini õti apisapanika nauanãta naapoko. Iuasaaki kona ninikari nipokori, Teoso nimisãkiretini ĭkapani. Kikatapeka inakasaaki, nimisãkiretakasaakiri Teoso, kataritika kiki tokiã nota apisatoõ. Pomẽkoriri imãka. ³¹ Itxano: “Konério, Teoso

kenakotapekari pamanaãkiti. Ixinikari pisikarauatini matiinimoni. ³² Átikaka kiki piokanata Xopi sitatxitimoni Simão Petro inakori uaimoni imininina ïkapani. Iua aua ãti Simão kata, aamata kamakarikata. Simão aapoko potxoari uiniti takote.” ³³ Iuasaaki nota apakítakai pite. Peerekari papokini atemoni. Uatxa ate uai aua Teoso apisatoõ Teoso paniãtakiti pitemonikiri akenakotini ïkapani. Ininiã pisãpiretauako –itxa Petromoni.

³⁴ Ininiã Petro txari:

–Uatxa nimarotari atão inakari. Teoso sikari erekari ikininapemoni. Inirekari ikini uãka apokini iuamoni, inakitiakori ininiuana ïkapani. ³⁵ Teoso apakapari ikini itixiti auakani, iua paxitakani, atão inakari kamakani. Apakapari Xoteoakori. Apakapari Xoteo minakaniua apaka. ³⁶ Himarotari Teoso iokanapirena Isaeo auakanimoni. Ikara erekari pirena sãpiretau Xesosi Kristo xipokari Teoso omanatiniri kãkiti imaerekani xika, kãkiti erekaxinire inini ïkapani. Ikinimane auíte itxaua Xesosi. ³⁷ Ikara Teoso iokanapirena himarota, kotxi iaripireta ikini Xotéia tõpa. Merepitipanika iaripireta Kariréia tõpa, Xoão patxisarauataka atoko. ³⁸ Himarotari Xesosi Nasareekiri pirena. Himarotari Teoso sikari Erekari Matamatakoti iuamoni. Itene isikaposotiiretari iua. Ikini tõpati isa erekari ikamini ïkapani. Imakananitana Satanasi misiritakini, kotxi Teoso aua iuakata. ³⁹ Ateka itikari ikinipoko ikamakiti Xoteoakori tixine iua auakasaaki, Xerosareẽ sitatxiti auakasaaki apaka. Eereka aamina ïpiriãmitakari nopini ninoa okari iuani.

⁴⁰ –Iuaritika ipi ãti pakini õtisaaki Teoso õkitikari iua. Iuaka oerekaua kãkitimoni ipïpekariika iuaïkana aua inini. ⁴¹ Kona ikinipokoni atamatari iua. Teoso mereëkininanira atamatari iua. Iuaritika kaiãori iua atamatakani. Ininiã ate atamatari iua. Iua õkitikaua atoko ate nipokota, iãriã aãta iuakata. ⁴² Iokanataua ate Teoso sãkire asãpiretini ikini kãkitimoni. Teoso mereëri iua, kãkiti misiritiko mereëkari ininiuana ïkapani. Auãkipanika inakani, ipïkani pakini misiritiko mereëkari itxaua. ⁴³ Ikinipoko Teoso sãkire sãpiretakani sãpiretari iua pirena. Ninoa txari: “Iua sãkire auïãkani maerekani makatxakaãka” –itxa Petro.

Xoteo Minakaniua Patxisatiko

⁴⁴ Petro sãkirauatapanika inakasaaki, Erekari Matamatakoti apoka ikinika Petro sãkire kenakotakanimoni. ⁴⁵ Ininiã Petro moianariakori Xesosi sãkire auïãkani kisauakatsikimatatakoni tsoriãkaãta, kotxi Teoso sikari Erekari Matamatakoti Xoteo minakonimoni apaka. Ninoa tsiki mata !ikisauakaãka, iuaritika Erekari Matamatakoti apoka ninoamoni. ⁴⁶ Ikenakotarina Xoteo minakaniua sãkirauanãta ãti uãka sãkireẽ.

–Peerekari Teoso. Apiananiri itxaua –itxanãtana Xoteo minakaniua.

⁴⁷ Ininiã Petro txari:

–Ninoa Xoteo minakaniua apakapapekari Erekari Matamatakoti ate apakapiniri atokokana. Ininiã apakatapitika ninoa patxisatiko ãparaaã. Kona kãkitini iotokakana ipatxisatikona.

⁴⁸ Ininiã iua paniãtana ninoa patxisatiko Xesosi Kristo uãkaã. Iuasaaki ninoa aiataro Petro:

–Atekata mapaõti pikaikota –itxarina.

Ininiã Petro kaikota ninoakata.

11

Petro Sãpiretakiti

¹ Xesosi iokanatakini, Teoso sãkire auïãkani Xotéia tõpa auakani apaka kenakotari Xoteo minakaniua auikinirina Teoso sãkire. ² Ininiã Petro kanapiriãkasaaki Xerosareẽmoni, kisauakatsikimatatakoni apoõtari iua.

³ –Pite imaka itsiki mata makisauakakoni aapoko ãki. Ninoakata pinipokota pitxa. ! Apakata pikamakiti –itxarina.

⁴ Ininiã Petro sãpiretari ikinipoko itiãkiti, ikenakotakiti pakini.

⁵ —Xopi sitatxiti nauakasaaki, Teoso nimisākiretakasaaki, nitaponemoni natapari mākaxi mata atoko inakari iaxiti katxakaāpotini. Ipi, ipi pakini imapotomatare iaxirikaāka. Iua apoka nota takote. ⁶ Iteene nimixinitari mākaxi mata āki auakani. Natamatari ikini sereti kaxipirini. Aua pirātxi. Aua ĩtopa auakani. Aua imini, araākani pakini. ⁷ Iuasaaki nikenakotari sākiretxi iaxitikiri: “Pōkitikaua. Oka, nika pitxako,” itxa. ⁸ Txamari nitxari iua: “Apiananiri, konapitini. !Ninikari nipokori mauritakoti ia atoko inakari, kotxi pamininiri,” nitxari.

⁹ —Iuaĭkana iaxitikiri sākirauata: “Teoso oeretakiti kona kamininiri kona pitxape.” ¹⁰ Ipi āti pakinikata iua aamata katxaka ikara atoko. Eereka ikinika kosekaāka iaxiti.

¹¹ —Iusaakipeka ipi, āti pakini kikiakori Sesaréiakini apoka aapokotxi nikaikotiniātaā. Iokanataākana notamoni. ¹² Ininiā Erekar Matamatakoti paniātano: “Pisa ninoakata. Kona pipĭkarauatape,” itxa. Naia seisi aĭtariakori Xopikini moianatano nota iusaaki. Ininiā ate ĩroā Konério aapoko. ¹³ Ininiā iua sāpiretaua ate, Teoso nitiri iaxitikiri apoka iuamoni aapoko āki. Iua Teoso nitiri txari iua: “Piokanatar kikiakori Xopimoni Simão Petro inakori apinina ĩkapani. ¹⁴ Iua sāpiretaiko pite maerekani makatxakiko, paapoko auakani maerekani makatxakiko apaka.”

¹⁵ —Nipotorikasaaki nisākirauatini, Erekar Matamatakoti apoka ninoamoni merepanika atemoni apokini atokotxikana. ¹⁶ Iusaaki nixinikari Apiananiri sākire. Iua txari: “Xoāo patxisarauata āparaaā. Hĭte patxisataākako Erekar Matamatakotiā.” ¹⁷ Ininiā Teoso sikari Erekar Matamatakoti ninoamoni, atemoni isikini atokotxikana Xesosi Kristo Apiananiri sākire aāuikasaaki. Ikara atoko ininiā, !apakata Teoso ninaiatini —itxa Petro.

¹⁸ Petro sākire ikenakotakana atoko, ĩtsoataikana.

—Peerekari Teoso —itxana.

—Ininiā Teoso auiritari Xoteo minakanuia apaka imaerekanina itakanapinina, Teosokata ātipirika auinina ĩkapani —itxana.

Teoso Auiākani Ātxiokia Sitatxiti Auakani

¹⁹ Estevão ipinaāka atoko, Xesosi sākire auiākani misiritaāka, ininiā ninoa iarika. Iariākani sari maioakari. Penísia tixinima, Xipri pokomiriĭtima, Ātxiokia sitatxitima pakinimoni isana. Ninoa oerekari Teoso sākire Xoteomoninani. ²⁰ Ninoa ātikaka Xiprikini, Sirenikini pakini sari Ātxiokia sitatxitimoni. Iuaā isāpiretarina Teoso iokanapirena erekari, Xesosi Apiananiri pirena, Xoteo minakonimoni ninoa apaka imarotini ĩkapani. ²¹ Apiananiri sikaposotiiretana ninoa. Ininiākara itomaneri kākiti auikari Apiananiri sākire. Maerekati itakanapana. Ikamarina Apiananiri nireĕkiti.

²² Ikara apopireta Xesosi sākire auiākanimoni Xerosareĕ sitatxitiā. Ininiā ninoa iokanatar Panapee Ātxiokia sitatxitimoni. ²³ Iuaā iua apokasaaki, imarotakasaakiri ninoa apakapiniri erekari Teoso sikakiti, ipoxokoniuata. Isikataparaxiniretana. Ōtākikana Apiananiri paniātakitinoka ikaminina ikini itaparaxinireritikana. ²⁴ Erekar Panapee. Ikinika Erekar Matamatakoti paniātakiti ikama. Auikari Xesosi sākire ikini ixinireritika. Ikara atoko ininiā, itomaneri kākiti auikari Apiananiri sākire.

²⁵ Eereka Panapee sari Taaso sitatxitimoni, Saoro initini ĩkapani. ²⁶ Itaōkitakasaakiri, iminari iua Ātxiokia sitatxitimoni. Āti anokanani ikaikotana iuaā Xesosi sākire auiākanikata. Oerekarina Teoso sākire itomaneri kākitimoni. Xesosi sākire auiākani Ātxiokia sitatxiti auakani merepitipanika takauākataāka, “Kristopiki.”

²⁷ Iuasaaki ātikaka Teoso sākire sāpiretakani Xerosareĕkini sari Ātxiokia sitatxitimoni.

²⁸ Ninoa ātika Ákapo inakori ōkitikaua. Erekar Matamatakoti sākire isāpireta:

—Natxinoka auako ikini itixiti —itxa.

Ikara isākire apokapeka Kráotxio Homano auĭte inakasaaki.

²⁹ Ininiā ikinika Xesosi sākire auiākani nirekar txineiro iokanadini itariakorimoni Xotéia tōpa auakanimoni. Ito auinina, ito iokanatanana. Poiāonoka auinina, poiāonoka

iokanatana. ³⁰ Panapee, Saoro pakini anikari isikakitina. Isikaro oa txineiro Xotéia tōpa auakani òtā́kikakanimoni.

12

Xesosi Sā́kire Auiā́kani Misiritiko Iuaī́kana Apokini

¹ Iuasaaki auītetxi, Erotxi inakori, misiritana Xesosi sā́kire auiā́kani. Ā́tikaka itaka kateia ā́ki. ² Iua okapiri Txiako iouata mitaroā́. Iua Txiako Xoā́o itari. ³ Erotxi imarotakasaakiri Xoteoakori apokaerekatini Txiakoni okiko, ipaniātari Petro maī́kiko. Imaī́kari Petro Xoteoakori kiiniritesaaki, pā́o miā́tiā́kati kiiniritisaaki. ⁴ Petro imaī́ka atoko itakari iua kateia ā́ki. Ipaniātari tesiseisi sotatoakori nī́katini iua. Kiiniri xipoka atoko Erotxi nirekari imereiniri imisiritiko ikinimane apisatoṓ. ⁵ Ininiā́ Petro kateia ā́ki kaikota. Iuasaaki Xesosi sā́kire auiā́kani ā́tipirika misā́kiretari Teoso Petro ī́kapani.

Petro Sikakaā́ka

⁶ Ī́kanṓka, imisiritiko imarotini ò́ti apisapanika, kateia ā́ki Petro imakanā́ta ipi sotato apanī́kaki. Iaxirikiko tsapi metao kamakori ipi. Aua apaka apikomoni sotatoakori kateia toreā́taā́, Petro mamitekakani ī́kapani. ⁷ Patimari Teoso nitiri tokiini. Tirikapī́ ponika kateia ā́ki. Iuasaakipeka Teoso nitiri ò́pirī́kari Petro.

—Pṓkitikaua. Katima pitxako —itxari.

Iuasaakipeka itsapi iaxirikiko iuakoā́kiri katzaka. ⁸ Teoso nitiri paniātari:

—Pimā́ka pieretaka. Pikiti mata pitaka, ininiā́ Petro takari. Pimā́ka pinopinikiri apaka pitaka, eereka pisa notakata —itxa.

⁹ Ininiā́ Petro sari iua tikini. Kateia ipokī́kana. Iuasaaki Petro uā́katari itaponeuatini. ! Imarotari atā́o Teoso nitiri mipokī́kiniri iua. ¹⁰ Eereka inapari ipi sotatoakori auiniā́taā́, apoka itxana itore maparakiri metao kamakori. Iuaā́taā́ napakari sari sitatximoni. Ikara itore iuaka matakakaua. Ininiā́ ninoa pokī́ka. Iua ahoa mapotṓkire apokasaakina, katimaritika Teoso nitiri takanapari iua. ¹¹ Iuasaaki Petro imarotapekari:

—Na nitaponeni itxa. Atā́opitikara Apiananiri iokanatari initiri itixinekiri nota imakatzakini ī́kapani. Pataparari Erotxi, iuaritika Apiananiri makatzakano. Xoteoakori nirekari okinino, iuaritika Apiananiri makatzakano —itxa.

¹² Ikara ixinika atoko, isari Maria aapokomoni. Xoā́o Marko inakori inoro oa Maria. Iuaā́ itomaneri kā́kiti apotiitapekaua, Teoso imisā́kiretinina ī́kapani. ¹³ Maria aapoko apokasaaki, akirita. Ā́tokoro Hotxi inakoro sari itoremoni. Okenakotari Petro sā́kire. ¹⁴ Oimarotakasaakiri Petro mapara apokini, omiteka iriko ā́ki aapokotxi ā́ki auakanimoni. Opoxoniuata, txamari omaxiñkaretari itore omatakakini Petro ī́kapani. Ininiā́ otxari apanakinimoni:

—Aapokotxi toreā́taā́pekari Petro —otxa.

¹⁵ Ininiā́ ninoa:

—Pimapitxirita.

—Atā́opitikara nisā́kire —otxa oa.

Ininiā́ ninoa:

—Petro kamiritekara.

¹⁶ Ninoa ikara atoko inaā́takasaaki, Petro mapara akirinā́tapanikana ninoa. Eereka ninoa matakakari itore, atamata itxarina.

—Kanatokopa pitakanapari kateia? —itxarina.

¹⁷ Ininiā́ iuakoā́ ipinitana:

—Hī́kenakotari nisā́kire —itxana.

Eereka isā́piretana:

—Apiananiri makatzakano nota kateia ā́ki. Ikinika ikara hīsā́piretariko Txiako, apanakini aītariakori pakini —itxa.

Iuasaaki isipe. Ā́tiā́taā́ isa.

¹⁸ Katimatinĩkata sotatoakori kateia nĩkatakani tsorĩkaãta:
—Ĩteri iua Petro? Kanatokopa itxa Petro pokĩkini? —itxana.

Initapiimarina Petro. ¹⁹ Ininiã Erotxi paniãtana initiko, txamari !apokarina. Erotxi pimaãna sotatoakori Petro nĩkatakani, Petro sinimoni imarotinina ĩkapani, txamari ninoa !imarotari Petro sinimoni. Ininiã eereka ipaniãtari ninoa sotatoakori okiko Petro mitekini xika.

Ikara atoko inaãka atoko Erotxi sipeka. Xotéia tōpa ipotorika. Sesaréia sitatxitimoni isa.

Erotxi Ipinini Pirena

²⁰ Erotxi omanatana Txiro sitatxiti auakani, Sitoõ sitatxiti auakani pakini. Ninoa nirekari iua omanatinina xipokini, kotxi ninoa apakapari nipokori Erotxi tixinekiri. Ininiã ninoa sãkirauata Parásito inakorikata. Iua Parásito nĩkatari Erotxi aapoko, itii pakini. Paimatireri iua. Ninoa sãkirauatakasaaki iuakata, iua auikari ninoa sãkire. Eereka Erotximoni isana neenamati xipokini ĩkapani. ²¹ Erotxi ketotari ikinimane kãkiti imisãkiretini ĩkapani. Iketo õti apokasaaki ieretakari imãka ereri inakari, auĩtetxi mãka. Eereka iitopãka auĩtetxi itopanere nopini. Iuaã iua misãkiretana kãkiti. ²² Ininiã kãkiti txari:

—Teosora sãkirauanãta. Na kãkitini —itxana.

²³ Iuasaakipeka Teoso nitiri iaxitikiri okari Erotxi, kotxi iua auiritari kãkiti iteosone-tiniri iua. Ininiã tsoni sotakiperi nika txari ĩto. Ikara atoko inikoã ipĩpe.

²⁴ Iuasaaki Teoso sãkire iarĩpireta. Ininiã itomaneri kãkiti auikari Teoso sãkire.

²⁵ Panapee, Paoro pakini parĩka Xerosareẽ sitatxitiã xipokaãka atoko, Ātxiokia sitatxitimoni kanapiriã itxana. Anikarina Xoão Marko ninoakata.

13

Panapee, Saoro Pakini Mereĩko

¹ Xesosi sãkire auiãkani sauaki Ātxiokia sitatxitiã aua Teoso sãkire sãpiretakani, Teoso sãkire oerekakani pakini. Aua Panapee. Aua Simão “Pomamari.” Aua Arósio Sirenikiri. Aua Manaeẽ. Auĩtetxi Erotxi inakori xapitipanika inakasaaki, iua Manaeẽ xapitipanika inakasaaki, imakananitaãka Erotxikata. Apaka Saoro aua Ātxiokia sitatxitiã. ² Āti õti Xesosi sãkire auiãkani iuaãtaã takanapari inipokotinina Apiananiri imisãkiretinina ĩkapani. Iuasaaki Erekar Matamatakoti txana ninoa:

—Himakatxakana Panapee, Saoro pakini parĩkatxi ikaminina nota ĩkapani —itxa Erekar Matamatakoti.

³ Ininiã ninoa takanapari inikini Teoso imisãkiretini ĩkapani. Iposo atoko itakarina iuakona Panapee, Saoro pakini nopini. Iokanatana ninoa Erekar Matamatakoti paniãtakiti ikaminina ĩkapani.

Xipri Pokomiriĩti Pirena

⁴ Erekar Matamatakoti iokanatana Panapee, Saoro pakini, ininiã ninoa sari Sereósia sitatxitimoni. Iuaã ninoa iereẽtaua maporo ãki. Isana Xipri pokomiriĩtimoni. ⁵ Saramina sitatxitiã apokasaakina, isãpiretarina Teoso sãkire aiko ãki Xoteo apotiitiniãtaãua. Xoão Marko inakori moianatana ninoa iuasaaki.

⁶ Xipri pokomiriĩti ĩpirixititana. Paposi sitatxitimoni isana. Iuaã itaõkitarina kiki Xoteo. Miĩti itxaua. Iuãka Paxesosi. Āti iuãka Erimasi.

—Teoso sãkire sãpiretakarikarano nota —itxa iua.

Txamari na atão isãkire. ⁷ Iua moianatari Xipri auakani auĩte Séxio Paoro inakori. Paimatireri iua Séxio Paoro. Iua akiritana Panapee, Saoro pakini iuamoni Teoso sãkire ikenakotini ĩkapani. ⁸ Txamari Erimasi !inirekana ninoa. !Inirekari Séxio Paoro auikiniri atão Teoso sãkire.

⁹ Iuasaaki Erekaru Matamatakoti iteene sikaimaroretari Saoro (ãti iuãka Paoro,) ininiã iteene atamataru iua miãti. ¹⁰ Itxaru iua:

—Pite Satanasi ãkiri pitxaua. Pite atão kamakaru mokaiakaru pitxaua. Pite kamaru ikini sereti maerekati. Ìkara atoko ininiã, pimisirienetaru kãkiti. Atão inakaru Apiananiru sãkire pite nirekaru pimamakini. ¹¹ Ìkara pimaerekani xika Teoso misiritaiko pite uatxa. Mõsiãreti pitxauako. Kona patamatapaniru atokatxi mapaõti.

Iuasaakipeka katxiãri atoko inakaru, ipiã apaka apoka Erimasimoni. Ininiã iua nitaru ãti anikakiru Ìkapanu. ¹² Séxio Paoro atamatakasaakiru Erimasi misiritiko, iua auikaru Teoso sãkire. Itsorãkaãta:

—Peerekaru Paoro oerekakiti sãkiretxiti Apiananiru pirena isãpiretakiti —itxa.

Ãtxiokia Sitatxiti Pisítxia Tixini

¹³ Iposo atoko Paoro imoianariakorikata iereẽtaua maporo ãki. Paposi itakanapana. Pexi sitatxitimoni, Pãpãria tixini isana. Pexi sitatxiti auakasaakina, Xoão Marko takanapana ninoa, Xerosareẽmoni ikanapirini Ìkapanu. ¹⁴ Eereka iuaãkana maporo ãki iereẽtauana. Isana Ãtxiokia sitatxitimoni, Pisítxia tixinimoni. Ãtxiokia sitatxiti auakasaakina tomatiko õtisaaki Ìroãna aiko Xoteo apotiitiniãtaãua. Iuaã iitopãkana. ¹⁵ Teoso paniãtakiti aãtsopateẽ, Teoso sãkire sãpiretakani iõkatsopatakiti aãtsopateẽ pakini atatsopataãka atoko auãtetxiakoru iuaãtaã auakani txana ninoa:

—Aãtariakoru, ate nirekaru hãsãkirauatini, hãsãkire auiniã, naia kãkiti hãsikataraxiniretini Ìkapanu —itxana.

¹⁶ Ininiã Paoro õkitikaua. Õkataru iuako ninoa sãkirauatini iotokakinina Ìkapanu. Ininiã itxa:

—Nitariakoru Isaeo auakanii, apaka hãte Xoteo minakanuia Teoso paniãtakiti kamakanii, hãkenakotariko nisãkire. ¹⁷ Isaeo auakani Teosone mereẽna aãtokiriakorini Exito tixini auakasaakina, ãti uãkakata auakasaakina. Itxãkitakana ninoa itomane ininina. Iuasaaki Exito auakani misiritana. Ininiã eereka Teoso makatxakana iposotiireẽ, ininiã itakanaparina Exito tixini.

¹⁸ —Eereka, koarẽta ano Teoso miãteenekana ninoa ãparaã makipakaniãtaã, kotxi ikamapikarina maerekati iuaã. ¹⁹ Eereka ixipokana setxi pakini ãti uãka Kanaãã tixini auakani. Eereka isikaru iua itixi ninoamoni ãtipirika iuaã auinina Ìkapanu. ²⁰ Eereka Teoso sikana kõtãkikarerini Isaeo auakani auãteakoru tãkane. ãti kõtãkikarerini aua. Eereka iua ipina. Eereka ãtipekana kõtãkikarerini aua. Eereka iua ipina. Itxaãpotana koatrosẽtosi sãkoẽta anokanani. Imapotõkire, Samoeo inakoru Teoso sãkire sãpiretakaru ninoa õtãkikakaru itxaua.

²¹ —Eereka ninoa nirekaru auãtetxi apiatakaru ninoa auãte ininiua Ìkapanu. Ininiã Teoso sikana ninoa Saoo inakoru, Kixi ãkiri. Iua atokiru kitxakapirãka Pẽxamiã inakoru. Iua Saoo ninoa auãte apiatakaru koarẽta anokanani. ²² Eereka Teoso makatxakaru Saoo. Itxãkitakaru Tavii ninoa auãte apiatakaru ininiua. Teoso sãpiretari Tavii pirena: “Kãkiti Tavii Xesee ãkiri atoko inakaru ninireka, kotxi iua kamaru ikinika ninireẽkiti,” itxa Teoso.

²³ —Teoso sikaenetaru ãti, Tavii apika mekanu Isaeo auakanimoni. Isaeo auakani maerekani makatxaãkaru itxauako. Iua Xesosikaru. Iua kãkiti maerekani makatxaãkaru txaua. ²⁴ Xesosi parãka ipotorikini apisapanika, Xoão sãpiretari ikinimane Isaeokini imaerekanina itakanapinina, eereka ipatxisataãkana. ²⁵ Xoão parãka ixipokasaaki, ipimaãna ninoa: “Kipa hãuãkatatano nota? Nota kona iua hiãtapakitini. Iuaritika iua ina nota tikini. Nota poiãori, ininiã !apakata iua takote napokini ikiti mata nimakatxakini Ìkapanu, kotxi iua Apiananiru,” itxa Xoão.

²⁶ Paoro sãkirauatapanika:

—Nitariakoru, Aprão apika mekanirikorii, apaka hãte Xoteo minakanuia Teoso paniãtakiti kamakanii, hãkenakota. Hãtemonikaru Teoso iokanataru iokanapirena kãkiti maerekani makatxakiko pirena. ²⁷ Xerosareẽ auakani, ninoa auãteakoru pakini kona imarotaru Xesosi Teoso ãkiri ininiua. Ninoa atatsopataru Teoso sãkire sãpiretakani

sãkire ikini tomatiko òti, iuaritika !imarotarina ninoa sãkire. ²⁸ Ninoa kona apokari ixika Xesosi okiko ìkapani, iuaritika ipaniãtari Pirato okiniri. ²⁹ Ninoa kamari Xesosi-moni ikinipoko mitxi Teoso sãkire iòkatsopatakori iaõka. Iposo atoko imakatzakarina iua aamina Ìpiriãmitakariã. Ikata itxarina kai iriko ãki. ³⁰ Iuaritika Teoso òkitikari iua ipìkitximoniþeka auakaripeka. ³¹ Òkitikaãka atoko, ito òti kãkiti atamataru iua. Kariréiakini, iuakata Xerosareëmoni sikani aõkitari iua. Ininiã Xesosi iuaïkana auini pirena sãpiretakani itxauana ninoa Xesosi aõkitakani. Isãpiretarina apanakini Isaeo auakani.

³² —Ininiã uatxa ate sãpiretari Teoso iokanapirena erekari hïtemoni. Ikara sãkiretxiti Teoso kamaenetakiti aãtokiriakorinimoni kitxakapirïka. ³³ Ìkorasaaki Teoso kamapekari ikara ikamaenetakiti ate ìkapani, ninoani apika mekaniriakori ìkapani, kotxi iua òkitikari Xesosi ipïkasaaki, iuaïkana auãki inini ìkapani. Kitxakapirïka Teoso sãkire iòkatsopatakori Xikari ipiãtaã sãpiretari Xesosi òkitikiniua òti, kotxi itxari:

Pite namarite. Ia òti noerekari kãkiti pite iri nininiua nota.

³⁴ —Kitxakapirïka Teoso sãpiretapekari iua òkitikiniri Xesosi ipïkasaaki, iuaïkana imap-inakani òtkane, kotxi isãkire iòkatsopatakori txari:

Nikamaenetakiti Taviimoni pitemonikara nikama. Ikara erekari nikamapitikako pitemoni.

³⁵ Teoso sãkire iòkatsopatakori Xikari tesiseisiãtaã txari:

Teoso kona auiritari Erekaru Kamakari ìto paiakini.

³⁶ —Kitxakapirïka Tavii auakasaaki, ikamari Teoso nireëkiti, kotxi inirimane auïte itxaua. Eereka ipïþe. Ikatapeëka. Inirimane kata ikatapeëka, ininiã ìto paiaka.

³⁷ Xesosiþekana, Teoso òkitikari iua. Iua ìto kona paiaka. ³⁸ Ininiãkara nitariakori himarotariko ia. ³⁹ Xesosi sãkire auiaãkani maerekani makatzakaãka. Erekarini ninoa. Moisesi paniãtakiti kamiko kona makatzakari kãkiti maerekani. ⁴⁰ Erepaniko. Kitxakapirïka Teoso sãkire sãpiretakani sãkire iaõka atxiïti apoka hïtemoni, kotxi ⁴¹ ia atoko itxana:

Hïkenakota, hïte Teoso sãkire napetakani. Hãtamatariko niposotiire, iuaritika hïpinako, kotxi !hãuikari nïparïka hïte sauaki. Æti sãpiretiniãri nïparïka, iuaritika !hãuikari.

Ikara atoko itxa Paoro sãkire ninoamoni.

⁴² Xoteoakori pokïkasaaki Xoteo apotiitiniua aapokotxiti, iusaaki Xoteo minakaniua aiatana Paoro, Panapee pakini iuaïkana tomatiko òti ìkari Teoso sãkire isãpiretinina ìkapani.

⁴³ Kãkiti apotiitakaniua potorika atoko, itomaneri Xoteo, Xoteo minakaniua Teoso sãkire auiaãkani pakini sari Paoro, Panapee pakinikata. Paoro, Panapee pakini misãkiretana ninoa. Òtãkikana ninoa, ikiniõtika atão ikaminina, kotxi Teoso iteene tiretana ninoa.

⁴⁴ Ininiã ãti tomatiko òtisaaki ikinimane iua sitatxiti auakani apoka Apiananiri sãkire ikenakotinina ìkapani. ⁴⁵ Xoteoakori atapari itomaneri kãkiti apokaãpotini Paoro, Panapee pakini sãpiretakiti ikenakotinina ìkapani. Ininiãkara ninoa xikotana Paoro, Panapee pakini. Imisãkirepiretana ninoa:

—Na atão Paoro sãkire. !Apakata isãkire —itxanãtana.

⁴⁶ Iusaaki Paoro, Panapee pakini itaparaxinireritikana isãkirauatana.

—Ate sãpiretari Teoso sãkire hïte Xoteoakorimoni merepitipanika. Ikara atão. Txamari hïte !nïrekari. Hïte atxiïti !nïrekari ãtipirika auãki hinini? Ikara atoko ininiã, ate sariko Xoteo minakonimoni, ⁴⁷ kotxi Apiananiri paniãtaua ate ia atoko:

Tirikapi atoko inakari hïtxauako Xoteo minakaniua ìkapani nisãkire atão ninoa imarotini ìkapani, ninoa maerekani nimakatzakini ìkapani, ikini itixiti auakani ikara imarotini ìkapani,

—itxa Paoro.

⁴⁸ Xoteo minakaniua kenakotakasaakiri ikara Paoro sãkire, ipoxokoniuatana. Ininiã ninoa:

—Peerekari Apiananiri sãkire —itxanãtana.

Teoso mereëri kãkiti ãtipirika iuakata auini ïkapani, ininiã iuasaaki kãkiti kenakotakasaakiri Paoro sãkire, ninoa Teoso mereëkini auikari iua sãkire.

⁴⁹ Iuasaaki Teoso sãkire iaripireta ikinipoko iua tixini. ⁵⁰ Txamari Xoteoakori ! apokaerekatari Xoteo minakaniua auikiniri Xesosi sãkire. Ininiã isãpiretarina aãpirena sitoakoro apiatakani Teoso paxitakanimoni, sitatxi auakani auïteakorimoni pakini. Ininiã ikara xika ninoa omanatana Paoro, Panapee pakini. Ininiã iokanataka ãtiãtaã isinina. ⁵¹ Ininiã Paoro, Panapee pakini takanapari iuaã. Itakanaparina kipatxi ikiti mataã auakari apaka, kotxi kona ninoa nirekaikari Teoso sãkire. Ininiã isana Ikónio sitatxitimoni. ⁵² Átxiokia sitatxiti auakani Xesosi sãkire auïãkani poxokoniuata. Iteene ikamarina Erekar Matamatakoti nireëkiti.

14

Ikónio Pirena

¹ Paoro, Panapee pakini auakasaaki Ikónio sitatxitiã, isana aiko Xoteo apotiitiniãtaãua. Isãpiretarina Teoso sãkire kãkitimoni, ininiã kaiãopokori Xoteoakori, Xoteo minakaniua pakini auikapiretari Teoso sãkire. ² Txamari apanakini Xoteoakori Teoso sãkire mauïãkani kamaomanãkaretana Xoteo minakaniua. Ininiã ninoa omanatana Teoso sãkire auïãkani. ³ Xesosi iokanatakini Paoro, Panapee pakini okanani auana Ikónio sitatxiti. Ninoa sãpiretari Apiananiri pirena itaparaxinireritikana. Isãpiretarina Apiananiri sikiniri ikinipoko erekari maerekanimoni. Apiananiri oerekari isãkirena atão inini, kotxi isikaposotiiretana ninoa, posotiiretxi, kãkiti mimarotakiniti pakini ikaminina. ⁴ Kãkiti sitatxi auakani omanatakakana. Apanakini auikari Xoteoakori sãkire. Apanakini auikari Xesosi iokanatakini sãkire.

⁵ Ininiã Xoteo minakaniua, Xoteoakori pakini, ninoa auïteakorikata imisãkiretakakaua Xesosi iokanatakini imisiritinina ïkapani, kai soroã ikiporonakinina ïkapani. ⁶ Paoro, Panapee pakini kenakotakasaakiri ikiporonakikona pirena, imitekana. Arisitara sitatxitimoni, Tepi sitatxitimoni, Arikaónia tixini isana. ⁷ Iuaã isãpiretarina Teoso iokanapirena erekari kãkitimoni.

Arisitara Pirena

⁸ Arisitara sitatxiti aua kiki petokakititakari iuasaaki. Matïpokotakati. Iponaniãkasaaki, ipetokakititapeka. ⁹ Ikenakotakasaakiri Paoro sãkire, Paoro atamatarì iua. Iuasaaki Paoro imarotari iua kiki auikapiretiniri Xesosi sãkire erekape inini ïkapani. Ininiã iteene atamatarì iua. ¹⁰ Itapasãkিরeritika Paoro txari iua:

—Põkitikaua. Pitima —itxari.

Ininiã iuasaakipeka õkitikaua, tïpokota itxa. ¹¹ Iuasaaki kãkiti itikari Paoro kamakiti. Ininiã ninoa akirikata isãkireña, Arikaónia tixini auakani sãkireë:

—Teosoakori apoka atemoni. Kikiakori atoko itxana ninoa.

¹² Ninoa takauãkatari Panapee, Xópite ininiua. Itakauãkatari Paoro Mekório ininiua, kotxi apiata isãkirauata. Panapee poiãoka isãkirauata. Xópite, Mekório pakini teosoakori kamakoni uãka. ¹³ Sitatxi ïronakikoãtaã takote aua Xópite misãkiretiko aikoti. Xópite misãkiretakani auïte iuasaaki minari kema auïteakori, aãui kaiãori pakini sitatxi ïronakikoãtaãmoni. Iuaã iua apanakini kãkitikata nirekari kema auïte okinina Paoro, Panapee pakini ïkapani, iteosone ïkapani okinirina atokotxikana. ¹⁴ Panapee, Paoro pakini imarotakasaakiri ikamakitina tïkane, imatsorakitarina ninoaka mãka, kotxi Teoso litxauana.

Ninoa kãkiti itomanerimoni imitekana. Itapasãkিরeritika itxana:

¹⁵ —Kãkiti, kinirepa ïkora atoko hïtxa? Hïte kikiãkini atokokanera atxa ate. Ate uai apoka teoso kãkiti kamakiti hïtakanapini ïkapani, atão Teoso himarotini ïkapani, kotxi atão Teoso auapininiika inakari itxaua. Iua kamari iaxiti, iaxiti auakani, itixi, itixi auakani, potxoari uiniti, potxoari uiniti ãki auakani pakini. ¹⁶ Kitxakapirïka Teoso auiritana ikinipoko kãkiti inirekaãkitina ikaminina. ¹⁷ Iua Teoso ininiua sãpiretakari kaiãopokori

auapika, kotxi erekari Teoso sikakiti kãkitimoni oerekari iua Teoso ininiua. Teoso sikari ãparaã iaxitikiri kãkitimoni. Iua ãparaã oerekari iua Teoso ininiua. Takari kikiu auakari iua sikakiti erekari apaka oerekari kãkiti iua Teoso ininiua. Teoso sikari nipokori ikini sereti kãkitimoni. Ikara oerekari iua Teoso ininiua. Iua sikapoxokonitari aãkixinire. Ikara apaka oerekari iua Teoso ininiua.

¹⁸ Ikara atoko itxana Paoro, Panapee pakini, iuaritika kãkiti nirekapanikari okiniri kema auite Paoro, Panapee pakini ãkapani. Itapararitika Paoro, Panapee pinitana ninoa, ininiã !ikamarina. ¹⁹ Eereka Xoteoakori Ætxiokia sitatxitikini, Ikõnio sitatxitikini pakini apoka Arisitara sitatxitimoni. Ninoa kãkiti misãkiretana Arisitara auakani. Imisãkireporetana Paoro, Panapee pakini, ininiã Arisitara auakani auikari ninoa sãkire. Ininiã ikiporonakarina Paoro kai soroã. Eereka ikosekaïtotarina iua sitatxi mapotõkire. Ninoa uãkatari iua ipiãpe. ²⁰ Iuaritika Xesosi sãkire auiãkani apotiitakasaakiua iuakata, Paoro õkitikaua. Sitatximoni kanapiriã itxa. Katimatinikata Paoro, Panapeekata sari Tepi sitatxitimoni.

Ikanapiriãna Ætxiokiamoni, Síria Tixiniã

²¹ Paoro, Panapee pakini sãpiretari Teoso iokanapirena erekari Tepi sitatxiti auakanimoni. Ninoa oerekari kaiãopokori kãkiti. Eereka Arisitara, Ikõnio, Ætxiokia pakini sitatxitimoni ikanapiriãna. ²² Iuaã oerekana kãkiti Teoso sãkire iteene imarotina ãkapani. Õtãkikana ninoa Teoso sãkire iaõka ãtipirika ikaminina. Ia atoko Paoro, Panapee pakini oerekana ninoa: “Teoso aãuïtetakasaaki, amisiritiko kaiãopokori amïteenekako.”

²³ Ikinipoko Xesosi sãkire auiãkani apotiitiniãtaãua Paoro, Panapee pakini mereẽna ninoa õtãkikakani. Ninoa kõtãkikarerini iteene auikari Apiananiri sãkire. Paoro, Panapee pakini misãkiretari Teoso ninoa ãkapani. Nipokori itakanapa Teosokata isãkirauatini ãkapani iuasaaki.

²⁴ Eereka isipekana. Æpirixitarina Pisítxia tixini. Eereka Pãpíria tixinimoni isana. ²⁵ Isãpiretarina Teoso iokanapirena erekari Pexi sitatxiti auakanimoni. Eereka isana Atária tixinimoni. ²⁶ Iuaã iereẽtaua maporo ãki Ætxiokia sitatxitimoni isinina ãkapani. Iuaã Ætxiokia sitatxitiã mitxipeka ninoa iokanataãka Teoso parika ikaminina ãkapani. Iuaãtaã Xesosi sãkire auiãkani misãkiretari Teoso ninoa ãkapani, Teoso iteene nãkatinina ãkapani. Ikara parikatxi iposope ninoa kamini.

²⁷ Ætxiokia sitatxiti apokasaakina, Xesosi sãkire auiãkani imakinika apotiitaua ni-noakata. Ininiã Paoro, Panapee pakini sãpiretari ikinika Teoso kamakiti. Isãpiretarina Teoso auiritinina Xoteo minakaniua apaka auikiniri Xesosi sãkire. ²⁸ Paoro, Panapee pakini auapokota iuaã Ætxiokia sitatxitiã Xesosi sãkire auiãkanikata.

15

Teoso Takaõtxikare Pirena

¹ Ætikaka kikiakori Xotéia tõpakini apoka Ætxiokia sitatxitimoni. Ninoa oerekana Xesosi sãkire auiãkani:

—Moisesini paniãtaua Teoso takaõtxikare aïtoã atakini. Txamari hïte !hïtakari, ininiã Teoso limakatzakari himaerekani —itxana ninoa.

² Paoro, Panapee pakini txana ninoa:

—Na atão hïte sãkire. Teoso takaõtxikare ninoa ãtoã !auari, iuaritika Teoso makatzakapekari ninoa maerekani —itxana.

Ininiã itaparakienatakauana ikara sãkiretxiti xika, ininiã ninoa mereẽna Paoro, Panapee, ãtikaka Xesosi sãkire auiãkani Ætxiokia auakani apaka Xerosareẽmoni isinina ãkapani.

—Iuaã hïspiretariko ikara sãkiretxiti Xesosi iokanatakinimoni, kiomãtxiakori pakini-moni. Ninoa sãpiretaua atão —itxana.

³ Iuasaaki Xesosi sãkire auiãkani takapiretanapana ninoa, ininiã Paoro, Panapee, apanakini pakini potorika. Ninoa Ìpirixititakasaakiri Penísia tixini, Samaria tãpa pakini, Paoro sãpiretana ikinimanemoni:

–Xoteo minakaniuua takanapapekari imaerekani. Inirekarina Teoso paniãtakitinoka ikaminina.

Ininiã Xesosi sãkire auiãkani poxokoniuata ikara pirena ikenakotakasaakina.

⁴ Eereka Paoro apanakinikata apoka Xerosareẽmoni. Xesosi iokanatakini, kiomãtxiakori, apanakini Xesosi sãkire auiãkani pakini apakapana ninoa. Paoro, Panapee pakini sãpiretari Teoso kamakiti Xoteo minakonimoni. ⁵ Iuasaakipeka ãtikaka pariseoakori, Xesosi sãkire auiãkani, apakapapiretana:

–Ninoa Xoteo minakaniuua apakapapitikariko Teoso takaõtxikare. Ninoa kamapitikariko Moisesini paniãtakiti. Hĩsãpiretanako –itxana.

Xesosi Iokanatakini Kiomãtxiakorikata

⁶ Ininiã ninoa Xesosi iokanatakini, kiomãtxiakorikata apotiitaua, Xoteo minakaniuua Ìtoã Teoso takaõtxikare takiko pirena isãkiretinina Ìkapani. ⁷ Ninoa iteene sãkirauataka atoko, iua Petro õkitikaua, misãkireta itxana ninoa:

–Nitariakori hĩte imarotari Teoso mereẽno nota. Hĩte sauaki uatxakapokoikani iua mereẽno nota, iua iokanapirena erekari nisãpiretini Ìkapani Xoteo minakonimoni, ikenakotinina Ìkapani, auikinirina Ìkapani. ⁸ Teoso imarotari kãkiti ãkixinire sãkire. Iua sikari Erekari Matamatakoti Xoteo minakonimoni. Ininiãkara aimarotari Teoso apakapari Xoteo minakaniuua, kotxi isikari Erekari Matamatakoti ninoamoni, atemoni isikini atokotxikana. ⁹ Amaerekani ate ãkixinireẽ Teoso makatxakini atokokanera, Teoso makatxakari imaerekanina ãkixinireẽna, kotxi ninoa auikari Xesosi sãkire. ¹⁰ Hĩte txĩkitakari Teoso omanãkarauatini. !Erekari hĩkamakiti. Hĩte nirekari Xesosi sãkire auiãkani kaminiri ikinika Moisesi paniãtakiti, txamari akiomaneakorini kitxakapirĩka ! iposotari ikaminirina Moisesi paniãtakiti. Ate apaka !aposotari. ¹¹ Moisesini paniãtakiti kamiko !imakatxakari kãkiti maerekani. Amaerekani makatxakaãka, kotxi Xesosi Api-ananiri iteene tiretaua ate, ininiã aãuikari isãkire. Ikara atokokana Xoteo minakaniuua maerekani makatxakaãka apaka –itxa Petro.

¹² Panapee, Paoro pakini sãpiretana ninoa Teoso kamakiti Xoteo minakonikata auakasaakina, Teoso kamakiti kãkiti maposotakinini, posotiiretxi. Ikara isãpiretakasaakina, ikinimane iuaã apotiitakaniuua tsorĩkaãnãta. Masãkireninoka itxana.

¹³ Panapee, Paoro pakini sãkirauataka atoko, Txiako txari:

–Nitariakori hĩkenakotari nota sãkire. ¹⁴ Simão Petro uatxananira isãpiretaua Teoso tiretinina Xoteo minakaniuua, kotxi ninoa sauaki imereẽna kãkiti inakitiakori Ìkapani. ¹⁵ Teoso sãkire sãpiretakani kitxakapirĩkarini iõkatsopatapekari ikara atoko inakari sãkiretxiti. Ninoa iõkatsopatapekari:

¹⁶ Apiananiri txari: “Eereka nikanapiriã. Noerekai nisãpirena amaneri, notamoni hãpokini Ìkapani. Hĩauĩte Taviini auakasaaki, pamimari hãpokini notamoni. Ikara atoko inakari uatxa xipope, aapokotxi irikakari xipokakari atoko itxa. Aapokotxi amaneri atoko nikamakõ, ininiã apakatapitika kãkiti apokini notamoni.

¹⁷ Ininiã ikini uãkati nitanoko nota. Xoteo minakaniuua nota akiritakini ninakitiakori nitanoko nota.”

¹⁸ Ikara atoko itxa Apiananiri kitxakapirĩka kãkiti imarotini Ìkapani, itxa Teoso sãkire iõkatsopatakori.

¹⁹ –Ininiã notamoni, !erekari apaniãtinina ninoa Xoteo minakaniuua, Teoso sãkire auiãkani, ate kiomaneakorini paniãtakiti ikaminina. Ikara atoko inakari pamimari.

²⁰ Maõtãkikana ninoa. Maiõkatsopata ninoamoni: “!Hinikapiri nipokori teoso kamakorimoni siãkari. Hĩtanoro minakotokatika !hĩsirĩkape. Hĩtaniri minakotikatika hĩsirĩkape. !Hinikapiri nipokori manotsãtakori xini. Arẽkatxi !hiãtape, !hinikape.” Ikara-nokara maiõkatsopata ninoamoni. ²¹ Ikaranoka aiõkatsopata, kotxi apikomoni Moisesini

paniãtakiti atatsopataãka aiko ãki Xoteoakori apotiitiniãtaãua ikini õti tomatiko õtisaaki. Moisesini sãkire sãpiretaãka ãtipirika ikininape sitatxiti, ninoa iteene imarotini ãkapani – itxa Txiako ninoamoni.

Iokanatsopatakitina Xoteo Minakonimoni

²² Ninoa Xesosi iokanatakini, kiomãtxiakori apaka, ikinimane Xesosi sãkire auiãkani apaka, ninoa apokaerekatari ãtikaka kiki imereinina ãtxiokia sitatxitimoni Paoro, Panapee pakinikata isinina ãkapani. Ninoa mereẽri Xotasi inakori, Sírası inakori pakini. Iua Xotasi uãka Pasapasi inaãka. Xesosi sãkire auiãkani iteene paxitana ninoa ipi. ²³ Xesosi iokanatakini, apanakini pakini iokanataritari aãtsopa iõkatsopatakitina Xotasi, Sírası pakini anikiniri. Ia atoko itxa iua iõkatsopari:

Ate hõtariakori, Xesosi iokanatakini, kiomãtxiakori apaka, aiokanatsopata hõte aõtariakorimoni Xoteo minakonimoni, ãtxiokia sitatxiti auakanimoni, Síra tixini auakanimoni, Sirísia tixini auakani pakinimoni aiokanatsopata. Ereẽkai hõte.

²⁴ Ate kenakoenetari Xesosi sãkire auiãkani uai auakani sari hõtemoni. Ninoa txai hõte: “Hõtakariko Teoso takaõtxikare hõtoã. Hõkamariko Moisesini paniãtakiti. Ikara himakamakanisaaki, Teoso !imakatxakapaniri himaerekani.” Ikara atokora itxaina hõte. Ininiã hõte kamaxirexinirenoka hõtxa. Uatxa kona hõte imarotari atão hõkamini. Kona ateni paniãtana ninoa ikara atoko inakari isãpiretiniina hõte. ²⁵ Ininiãkara ate apotiitaua. Akinika ate apokaerekatari kikiakori amereẽkini hõtemoni aiokanatinini Panapee, Paoro pakinikata. Panapee, Paoro pakini ate tiretakini. ²⁶ Ninoa kikiakori amereẽkini sipeka monõkoriaãtaã Apiananiri Xesosi Kristo paniãtakiti ikaminina ãkapani.

²⁷ Ate iokanataritari Xotasi, Sírası pakini ninoakata hõtemoni. Hãpisatoõ ninoa sãpiretaiko ate iokanatsopatakititxikana. ²⁸ Erekaritari Matamatakoti apokaerekatakiti sãkiretxiti, ate apokaerekatakiti sãkiretxiti apaka asãpiretai hõte uatxa. Paniãtakori apia mimari !apaniãtai hõte. Ianokara apaniãtakiti sãkiretxiti hõkamako: ²⁹ “!Hinikapiri nipokori teoso kamakorimoni sikakori. Arẽkatxi !hiãtape, !hinikape. !Hinikapiri nipokori manotsaãtakori xini. !Hõsirĩkape sitokata põtano minakotokatika. !Hõsirĩkape kikikata põtaniiri minakotikatika.” Iuanokara himakamakaniã, peerekari. Ereẽpiko, itxa ninoa iõkatsopatakiti.

³⁰ Paoroma, Panapeema, Xotasima, Sírasima pakini iokanataãka ãtxiokia sitatxitimoni. Ninoa iuaã apokana. Apotiitana ikinimane Xesosi sãkire auiãkani, ninoamoni sika itxarina iua iõkatsopari. ³¹ Atatsopatakana atoko ipoxokoniuatana, kotxi erekapirenari ninoa iokanapirena. ³² Xotasi, Sírası pakini Teoso sãkire sãpiretakani itxauana. Ninoa iteene sãkirauata ninoa Xoteo minakaniua isikataparaxiniretinina ãkapani. Ininiã ninoa Xoteo minakaniua apikomoni auikarina Xesosi sãkire. ³³ Xotasi, Sírası pakini kaikota iuaãtaã mapaõti. Eereka Xesosi sãkire auiãkani takanapapiretana, Xesosi iokanatakini-imoni ikanapiriinina ãkapani.

–Hõsipiniikaua erekaxinire hinini –itxana.

³⁴ Iuaritika Sírası apokaerekatari iuaã ikaikotini. ³⁵ Paoro, Panapee pakini kaikotapanika ãtxiokia sitatxiti. Ninoa apanakinikata oerekari Apiananiri sãkire iua sãkire auiãkanimoni. Isãpiretarina iua sãkire isãkire mimarotakanimoni apaka.

Paoro, Panapee Pakini Iarikini

³⁶ Eereka mapaõtipeka inapaka atoko, Paoro misãkiretari Panapee:

–Makanapiriã ikininape aapokotxitimoni mitxi Apiananiri sãkire asãpiretinimoni. Mamotikaẽtana aõtariakori atauako erekana atxiiti –itxari Panapee.

³⁷ Panapee nirekari Xoão Marko inakori anikini ninoakata. ³⁸ Txamari Paoro !inirekari anikiniri iua.

–Pãpiria tixini aãuakasaaki, iua Xoão Marko asikaua. !Inirekaikari atekata iparĩkauatini –itxa.

³⁹ Ikara xika itaparakienatakakauana. Eereka iarikana. Panapee anikari Xoño Marko. Maporo áki iereētauana Xipri inakori pokomiriitimoni isinina íkapani. ⁴⁰ Paoro mereēri Sírsi, iuakata isini íkapani. Iuaātaā Xesosi sākire auiākani misākiretari Teoso, Paoro, Sírsi pakini íkapani, Teoso iníkatina íkapani. Eereka Paoro potorika Sírsikata. ⁴¹ Ípirixititarina Síria tixini, Sirísia tixini pakini. Aapokotxi apokasaakina, isāpiretari Xesosi sākire iuaātaā auakanimoni. Isikataparaxiniretana Xesosi sākire auiākani. Ininiā ninoa apia auikari Xesosi sākire.

16

Tximótxio Moianatana Paoro, Sírsi Pakini

¹ Paoro sari Tepi sitatxiti. Eereka Arisitara sitatxiti isa. Iuaā aua kiki, Xesosi sākire auiākari, Tximótxio inakori. Inoro Xoteo otxaua. Oa apaka auikari Xesosi sākire. Iri kona Xoteoni. Áti uāka Kreko itxaua. ² Xesosi sākire auiākani, Arisitara auakani, Ikónio auakani apaka sākire: “Peerekari Tximótxio.” ³ Paoro nirekari anikiniri Tximótxio iuakata imoianari íkapani. Ininiā iua takari Teoso takaōtxikare Tximótxio ítoā, kotxi Xoteoakori iuaātaā auakani imarotari Tximótxio iri Kreko ininiua. ⁴ Paoro imoianariakorikata saāpota íkininape sitatxitimoni. Kākiti aapoko apokaāpotakasaakina, isāpiretarina ninoa Xesosi iokanatakini sākire, kiomātxiakori sākire pakini. Isāpiretarina íkinimane kākitimoni. Ninoa sākire aātsopaā iōkatsopatakori sākiretxiti isāpiretana ninoa. Paoro imoianariakorikata otākikana ninoa ikara isākirena auikinina íkapani. ⁵ Ininiā ikiniōtika kākiti apiaāpotape auikiniri Xesosi sākire. Itomanepoka auikari Xesosi sākire.

Paoro Taponetari Masetónia Auakari

⁶ Paoro imoianariakorikata ípirixitiāpotari Piríxia tixini, Karásia tixini pakini. Iuasaaki Erekar Matamatakoti !auiritana ninoa Xesosi sākire isāpiretinina Ásia tixiniā. ⁷ Ninoa apokasaaki Mísia tixini takote, inirekamarina Pítxinia tixini isinina. Erekar Matamatakoti !auiritana isinina Pítxinia tixinimoni. ⁸ Ininiā ninoa ípirixititari Mísia tixini. Apokana Tóatxi sitatxiti.

⁹ Iua íkanōkati Paoro taponeuata. Itaponetari kiki Masetónia tixini auakari. Itimanāta. Amanaanātari:

—Uaimoni pina Masetónia tixini. Pimoianataua ate —itxari.

¹⁰ Ininiā Paoro taponeuataka atoko, ate xinikari:

—Masapoka Masetónia tixinimoni, kotxi atāoka Apiananiri akiritaua ate Teoso iokanapirena erekari kākiti ikiraākinimoni asāpiretini íkapani.

Ininiā aiamata Masetóniamoni asini íkapani.

Arítxia Auikari Xesosi Sākire

¹¹ Tóatxi ioporokote ate iereētaua maporo áki. Asapitipo Samotirásia ipokomiriíti. Pokatimari ōti ate sari Niápori sitatxiti. ¹² Iuaā apotorika. Asari Piriposi sitatxitimoni, Masetónia tixiniā. Masetónia tixiniā iua sitatxi mitari. Piriposi atoko inakari !auari. Iuaā auana kaiāopokori kākiti Homa sitatxitikini. Ate napari mapaōti iuaā.

¹³ Tomatiko ōtisaaki sitatxi ítinikata ate sari uini ítinikata. Ate uākatari uini ítinikata Xoteoakori apotiitiniāua Teoso imisākiretinina íkapani. Ininiā ate apoka iuaā. Atāopitika ate uākatakiti. Aāpokaro Xoteoakoro. Iuaā apotiitauana Teoso imisākiretinina íkapani, ininiā aītopāka, ninoakata asākirauatini íkapani. ¹⁴ Sito Arítxia inakoro aua ninoa sitokata. Oa txíta poporeri vētxitakaro otxaua oa. Txiatxira sitatxitikero oa. Teoso misākiretakaro oa. Iuasaakipekara okenakotari asākire. Iuasaaki Apiananiri iteene kamaimaroretaro oa Paoro sāpiretakiti, ininiā oa auikari isāpiretakiti. ¹⁵ Ininiākara oa, oaāpoko auakani apaka, patxisataāka. Eereka oa aiataua oaāpoko áki akaikotini:

—Masa naapoko, hīkaikotini íkapani. Hītemoni atāo nauikiniāri Apiananiri sākire, ininiā notakata hīkaikota —otxa.

Ikara atoko oa aiataua oakata akaikotini, ininiākara akaikota oaāpoko.

Paoro, Sírsi Pakini Kateia Āki Auini

¹⁶ Āti ōti Teoso misākiretiko aikotimoni asikasaaki, ataōkitaro ātokoro iamotakoro. Maerekaŋi matamatakoti auāŋtotaro oa. Iua maerekaŋi matamatakoti imarotari kākiti kamakiti apisapanika. Oa amotakani apakaparo ito txineiro oimarore ĩki. ¹⁷ Oa ātokoro osapika Paoro tikini, ate tikini apaka. Oākiritaŋi:

—Naia kikiakori Teoso nitiriakori. Apiananiri nitiriakori itxauana naia. Oerekauana amaerekani makatxakiko, Teosomoni asini ĩkapani —otxaāpokata.

¹⁸ Itanaōtika ikara atoko oākirināta. Ininiā Paoro maerekaxiniretinoka itxa oākiritaŋi xika. Āti ōti isapotorika, paniāta itxari maerekaŋi matamatakoti:

—Xesosi Kristo uākaā nota paniātai, pitakanapiniro aroa ātokoro —itxa.

Iuasaakipeka maerekaŋi matamatakoti takanaparo. ¹⁹ Oa amotakani ikara imarotakasaaki, otsopa imapakapapekaniika oimarore ĩki, ininiā imaŋkarina Paoro, Sírsi pakini. Ikosekaŋitotana, anikana sitatxi apanĳkaki auĳtetxiakorimoni. ²⁰ Iuaā apokana. Isāpiretarina Homanoakori:

—Naia kikiakori Xoteo itxauana. !Erekari ninoa oerekapiretakiti, ininiā sitatxi auakani omanākarauata ninoa sāpiretakiti xika. ²¹ Ate amakinika Homano atxaua. Aimarotapekari aāuiākiti aāuĳte paniātakiti. Txamari naia oerekaua ipinimonipo inakari akamini ĩkapani. Naia oerekaua āti uāka auĳākiti sākiretxiti. !Auiritaāka aāuĳkiniāri naia oerekapiretakiti. !Auiritaāka akaminiri —itxana.

²² Iuasaaki kākitiŋokoni iuaā apotiitakaniua nirekari Paoro, Sírsi pakini iāsokinina. Ninoa auĳtetxiakori matsorakitari Paoro māka, Sírsi māka apaka, imakatxakinina ĩkapani. Ipaniātarina apanakini aāpitsaā ixirokitatiko. ²³ Ixirokitatapeēkana atoko, kateia āki okaākana Paoroni, Sírsini pakini. Auĳtetxiakori paniātari iua kateia nĳkatakari, inapokopiretiniri imasikakakoni tĳkane. ²⁴ Ininiākara kateia nĳkatakari okaraŋtotana Paoro, Sírsi pakini kateia irikoākixiti. Ieretakari ninoa kiti isĳkatatxi taopata kamapakotatakori āki, imakatxakakanina ĩkapani.

²⁵ ĩkanōka Paoro, Sírsi pakini misākirenātari Teoso. Ixikarauanātana Teoso ĩkapani. Apanakini kateia āki auakani kenakonātari. ²⁶ Iuasaaki katimaritika itixi iakeēkata iteene. Kateia patapi apaka iakeēkata. Iuasaakipeka kateia tore takaka. Iĳtxikikona metao kamakori, pirikeri āki auakani ĳtxikikona, karakitakata, katxaka itxa metao. ²⁷ Iuasaaki kateia nĳkatakari mereka. Iua atamatari kateia tore takakapeka, ininiā iuākatari ikinimane kākiti inĳkatakini mitekapeka. Ninoa mitekaākamako, iua auĳte okamariko iua, iparĳka imakamakani xika. Ininiā ikosekaro iouata mitaro iuaka iorotiniua ĩkapani. ²⁸ Okaaritakasaakiua, Paoro akirikata:

—Kona pokapeua. Uaikareua ate amakinika —itxa.

²⁹ Iua kateia nĳkatakari amanaāri tirikapi. Katimaritika ĳroā. Ipamaka Paoro, Sírsi pakini apisatoō. Ikikinanaākata. ³⁰ Eereka imipokĳkana ninoa. Iua:

—Kiatokopa nikama, nimaerekani Teoso makatxakini ĩkapani? —itxana ninoa.

³¹ Ninoa:

—Pauikariko Apiananiri Xesosi sākire, ininiākara Teoso makatxakari pimaerekani, paapoko auakani maerekani apaka —itxari.

³² Eereka Paoro, Sírsi pakini sāpiretari Apiananiri sākire iuamoni, iua aapoko āki auakanimoni apaka. ³³ Iuasaaki imaropirĳkata kateia nĳkatakari arokari ninoa karo. Eereka iua imiakorikata, ĳtanorokata patxisataāka. ³⁴ Eereka anikana Paoro, Sírsi pakini aapoko āki. Isikakienatana. Iua imiakorikata, ĳtanorokata poxokoniua, kotxi iuasaaki ninoa auikari Teoso sākire.

³⁵ Katimatiniĳkata auĳtetxiakori iokanatana initiriakori kateiamoni, Paoro, Sírsi pakini isikakini ĩkapani. Ninoa apokasaaki, itxana kateia nĳkatarimoni:

—Pauiritana Paoro, Sírsi pakini isinina.

³⁶ Ininiā iua kateia nĳkatakari sāpiretari Paoro:

—Niauñteakori iokanapireta notamoni hñte nisikakini ñkapani. Ininiãkara hñsipiniikaua erekaxinirepeka hinini —itxana.

³⁷ Txamari Paoro txari auñtetxiakori nitiriakorimoni:

—Ari, Homanoakorikareua ate, iuaritika auñtetxiakori Homanoakori iaritataua ate ikinimane apisatoõ. Maxikatĩka ninoa iaritataua ate. !Akamari maerekati. Eereka kateia ãki ninoa okaua ateni. Uatxa ninoa nirekari iokanatinuua ate ikinimane mimarotakinitipanika. Konapitini. Ninoapitikarako inari uai. Ninoa makatxakaua ate uai —itxa Paoro ninoamoni.

³⁸ Ninoa kikiakori kanapiriã iauñteakorimoni. Isãpiretarina Paoro iokanapirena. Ninoa auñteakori imaropiretakasaakiri Paoro, Sírası pakini Homano ininiuana, ninoa pĩkarauata, kotxi ninoa maxikatĩka misiritana Paoro, Sírası pakini. ³⁹ Ininiãkara ninoa sari Paoromoni, Sírası pakinimoni. Ninoa:

—Ate !imarotari hñte Homano hininiuua. Aimarotaãkamariko !amisiritamaiko —itxana. Eereka ninoa auñtetxiakori mipokĩkana Paoro, Sírası pakini.

—Sitatxi hñtakanapako —itxana.

⁴⁰ Ininiã Paoro, Sírası pakini takanapari kateia. Arítxia inakoro aapokomoni isana. Iuaã aõkitana kãkiti Xesosi sãkire auñãkani. Paoro, Sírası pakini sikataparaxiniretana ninoa. Eereka isipekana, iua sitatxiti itakanapinina.

17

Tesarónika Sitatxiti Pirena

¹ Paoro, Sírası pakini napari ãpĩpori sitatxiti. Apikomoni inaparina Aporónia sitatxiti. Eereka apokana Tesarónika sitatxiti. Iuaã aua aiko Xoteo apotiitiniãtaãua. ² Paoro itotapekari Xoteo apotiitiniãtaãua aikotimoni isini. Ininiãkara iua sari iuaã. Ipi ãti pakini õti tomatiko õti, isari iuamoni. Iuasaaki Teoso sãkire iõkatsopatakori isãpireta kãkitimoni iuaãtaã auakanimoni. Ninoa pimarauata, ininiã iua sãpirenauata. ³ Ininiã Paoro txari:

—Teoso sãkire iõkatsopatakori oerekaua ate: Teoso mereẽkiti misiritaãkapitikako, okaãkapitikako. Eereka õkitikapitikauako, iuaĩkana auãki inini ñkapani. Ia Xesosi hñtemoni uatxa nisãpirenãtakiti Teoso mereẽkitipitikara iua —Paoro txana ninoa.

⁴ Ætikaka Xoteoakori auikari Paoro sãkire, ininiã Paoro, Sírası pakini moianariakori itxapekauana. Kaiãopokori Akaia tixini auakani Teoso sãkire auñãkani, auikari Paoro sãkire apaka. Kaiãopokoro sitoakoro, auñtetxiakori ñtanoroakoro, auikari Paoro sãkire apaka.

⁵ Xoteoakori, Paoro sãkire mauñãkani, xikotari Paoro. Ininiã ninoa apotiitana kãkiti kaneenamarini, maparĩkauatakani ahoaãtaã auakani. Apotiitana kãkitipokoni. Ininiã ninoa akiripoakata, imiteẽkatana. Ikinimane sitatxi auakani kenakotari. Neenamatzixi atoko itxakatana. Imitekana Xasão inakori aapokomoni. Ñroãkatana itapararitikana, Paoro, Sírası pakini initinina. Inirekarina imipokĩkinirina ninoa kãkiti apotiitakanimoni apisatoõ. ⁶ Txamari Paoro, Sírası pakini !auari iuaã. Ininiã ikosekañtotarina Xasão. Apanakini Xesosi sãkire auñãkani apaka ikosekañtotana. Iauñteakorimoni anikana. Isãpiretarina iauñteakorimoni:

—Paoro, Sírası pakini kamari maerekati. Ikini itixiti ikamarina maerekati. Ininiã ninoa uai ate sitatxineẽpekarana uatxa. ⁷ Ia Xasão apakapana ninoa. Iua aapoko ikaikotana ninoa. !Ikamarina aauñte Sesa inakori paniãtakiti, kotxi ninoa oerekari kãkiti ãti auñtetxi ininiãua, Xesosi inakori —itxana iauñteakorimoni.

⁸ Ikara sãkiretxiti ikenakotakasaakina, kãkiti apotiitakaniua akiripoakata. Auñtetxiakori !imarotari ikamakitina tĩkane. ⁹ Eereka auñtetxiakori misãkiretana Xasão, apanakinikata:

—Hiĩkitxitana hñsikakiko ñkapani. Eereka auiritaina hñsini. Ininiã eereka auiritana isinina.

Peréia Sitatxiti Pirena

¹⁰ Kikatapeka inakasaaki, Xesosi sãkire auiãkani iokanatana Paoro, Sírsi pakini Peréia sitatxitimoni. Iuaã Peréia sitatxiti ninoa apoka atoko, ñroãna aikoã Xoteo apotiitiniãtaãua. ¹¹ Kãkiti iuaã auakani iteene nirekari Paoro sãpirena ikenakotinina. Tesarónika auakani !atokoni itxana ninoa. Ikiniõtika ninoa atatsopatari Teoso sãkire iõkatsopatakorì, kotxi inirekarina imarotininina:

—Paoro sãkire atão atxiĩti? —itxana.

¹² Ininiã kaiãopokori Xoteoakori auikari Xesosi sãkire. Kaiãopokoro sitoakoro Akaia tixini auakani apaka auikari Xesosi sãkire. Naia sitoakoro auĩtetxiakori ñtanoroakorokara. Kaiãopokori kikiakori Akaia tixini auakani apaka auikari Xesosi sãkire. ¹³ Eereka Xoteoakori Tesarónika sitatxiti auakani kenakopiretari Paoro sãpiretiniri Xesosi sãkire Peréia sitatxitiã. Ininiã ninoa sari Peréia sitatxitimoni. Apokaãkana atoko, itxĩkitakarina kãkiti ahoaãtaã apotiitakaniua Paoro omanatinina ñkapani. ¹⁴ Ikara atoko ininiã, Xesosi sãkire auiãkani iokanatari Paoro potxoari uinitimoni. Sírsi, Tximótxio pakini kaikotapanika Peréia sitatxiti. ¹⁵ Paoro moianatakani anikari iua Atena sitatxitimoni. Eereka ninoa kanapiriã Peréia sitatxitimoni. Paoro iokanapireta Sírsi, Tximótxio pakinimoni:

—Katimariã hinako —itxa.

Atena Sitatxiti Pirena

¹⁶ Ininiã Atena sitatxitiã Paoro iãtapari Sírsi, Tximótxio pakini apokini. Iuasaaki Paoro itikari kaiãopokori teoso kãkiti kamakiti. Sitatxi xãpoka kãkiti teosonenoka. Ia xika Paoro matinaniuata. ¹⁷ Ininiãkara Paoro oerekari Teoso sãkire Xoteoakorimoni aiko ãki Xoteo apotiitiniãtaãua. Xoteo minakaniua, Teoso sãkire auiãkani apaka, Paoro oerekari Teoso sãkire iuaãtaã. Ninoa pimarauata, ininiã imisãkiretakakana Teoso sãkire ixinikinina ñkapani. Ikiniõtika Paoro oerekari Teoso sãkire kãkitimoni, nipokori iamotikoãtaã sikanimoni. ¹⁸ Kãkiti kaxinikaxitirerini, Epikoreo inakoni, Esitóiko inakoni apaka sãkirauata Paorokata. Paoro sãpiretana ninoa Xesosi pirena. Isãpiretana Xesosi ipinini, eereka õkitikiniua, iuaãkana auãki inini pirena. Ininiã ãtikaka:

—Natokopa itxa ikara inakari sãkiretxiti? Uuato sãkire atoko itxa. !Kiĩkiteri iua —itxana.

Apanakinipekana txari:

—Isãpiretari ãti itixiti auakani teosone pirena.

Paoro Sãpirenauata Ariópako Inakoriãtaã

¹⁹ Eereka ninoa kaxinikaxitirerini anikari Paoro aiko kãkiti apotiitiniãtaãua, imiriĩ nopini Ariópako inakoriãtaã. Iuaã ninoa txari:

—Ate nirekari aimarotininiri poerekakiti sãkiretxiti. Mitxi kona ate kenakotari ikara atoko inakari sãkiretxiti. ²⁰ Ipixini poerekakiti sãkiretxiti !aimarotapanika. Ipinimonipo itxa poerekakiti. Ininiã pisãpiretaua. Poerekaua, aimarotini ñkapani —itxarina Paoro.

²¹ Ikara atoko itxana, kotxi ikiniõtika Atena sitatxiti auakani, apaka ãti itixiti ñkani Atena kaikotakani nirekari ãtiãtaãkiri sãpiretakiti imarotininina ñkapani, ininiã ikiniõtika amaneri sãkiretxiti ikenakonãtana.

²² Paoro ikinimane apisatoõ itima, imiriĩ Ariópako inakoriãtaã. Iua txana ninoa:

—Kikiakori, Atena sitatxiti auakanii, nitikapekari hĩteosone kaiãopokori, ininiã nimarotari iteene hĩpaxitiniri hĩteosone. ²³ Ahoaãtaã ninapaãpotakasaaki, natamatari kaiãopokori hĩteosone misãkiretikoãtaã. Iuasaaki natamatari ãti hĩteosonemoni sikakori takikoãtaã. Iuaã natatsopatari iõkatakori: “Uai Teoso mimarotakoti misãkiretikoãtaã.” Iua hĩteosonetakiti, himimarotakiniti, iuapitikara uatxa nota sãpiretai hĩte.

²⁴ —Iua Teoso kamari itixi. Ikinipoko itixi nopini auakari apaka ikama. Iua Api-ananiri. Iua itixi auakani auĩte itxaua iua. Iaxiti auakani auĩte apaka itxaua iua. ! Ikaikota kãkiti kamakiti aikotiã. ²⁵ Ikinipokokara auapeka Teosomoni, ininiã !inirekari kãkiti kamakiti iua auini ñkapani. Teosopitikara txĩkitakari kãkiti auãki inini. Iuakara sikaxiniretari kãkiti. Teosokara sikari ikinipoko kãkiti auakiti. ²⁶ Merepitipanika kãkiti

!auari, eereka Teoso kamari kiki Atão inakori. Ikini uākati kākítiti atokiri itxaua iua Atão. Teoso iokanatanana ninoa ikini itixitiã auinina. Kākíti mauakani apisapanikara, imereēri kākíti iponaniini ōti tīkane. Iaōtari kākíti auiniãtaã tīkane. ²⁷ Ikara atokora itxa Teoso kamakíti. Teoso txīkitakari kākíti nitiniri Teoso. Initaãpotakasaakirina, atxiīti ninoa apokari Teoso, kotxi kona ōtakoni aua Teoso. ²⁸ Āti txapekari: “Teoso txīkitakaua auāki anini, atīpokotini īkapani. Iua matxīkitakakaniãua auāki anini, !aãuari.” Kaxikarerini hīte sauaki auakani txapekari: “Teoso anaakori ate apaka txaua.” ²⁹ Teoso anaakori aniniãua, ininiãkara aimarotari kona kākíti kamakíti atoko inakarini !itxaua Teoso. Kona oro kamakorini !itxaua. Kona pirata kamakorini !itxaua. Kona kai kamakorini !itxaua Teoso. Konapítini. ³⁰ Mitxipe kākíti !imarotari atão inakari. Iuasaaki Teoso !imisiritana kākíti imimarotakanisaakina. Txamari uatxaika ipaniātari ikininape kākíti ikini itixiti auakani imaerekanina itakanapinina īkapani. ³¹ Ikara atoko Teoso txari ikinimane kākíti, kotxi iua ketotapekari āti ōti kākíti misiritiko ōti. Xesosi Teoso mereēkiti iuakarako sãpiretariko kākíti misiritiko ikara ōti apokasaaki, kotxi iua imarotari atão inakari. Aimarotari Xesosi Teoso mereēkiti ininiãua, kotxi Teoso ōkitikari iua, iuaīkana auāki inini īkapani —Paoro txana ninoa.

³² Xesosi iuaīkana auāki inini pirena ikenakotakasaakina, ātikaka napetari Paoro. Apanakini:

—Ate nirekari pisãpirena iuaīkana akenakotini —itxarina Paoro.

³³ Ininiã Paoro sipe. ³⁴ Apanakinipekana auikapítikari Paoro sãkire. Txionísio inakori, Atena sitatxiti auakani auīte, auikari isãkire. Apaka sito Tamari inakoro auikari isãkire.

18

Korīto Sitatxiti Pirena

¹ Eereka Paoro takanapari Atena sitatxiti. Korīto sitatxitimoni isa. Iuamoni apoka. ² Iuaã aōkitari kiki Ákira inakori. Iua Xoteo. Pōto inakoriãtaã iua iponaniã. Itária tixini īkari. !Okanani apoka Korīto sitatxiti. Apoka ĩtanorokata, Pirisira inakorokata. Ninoa takanapari Itária tixini, kotxi Itária auakani auīte Kráotxio inakori paniãtana ikinimane Xoteoakori, Homa sitatxiti itakanapinina. Paoro ianapokota Ákira, Pirisira pakinimoni. ³ Eereka ikaikota ninoakata, kotxi ninoa parīka iua Paoro parīkatxikana. Papiri aamata kamakori kamakani ninoa. Ininiã Paoro kaikota Ákirakata, iuakata iparīkauatini īkapani. ⁴ Ikiniōtika tomatiko ōti, Paoro sari aiko Xoteo apotiitiniãtaãua. Iuaã Xoteoakori, Krekoakori pakini apotiitaua. Paoro oerepiretana ninoa Xesosi sãkire, isãkire auikinina īkapani.

⁵ Síراس, Tximótxio pakini takanapari Masetónia tixini. Korīto sitatxiti apoākana atoko, Paoro takanapari iparīka papiri aamata kamakori ikamini, Teoso sãkire kākítimoni ikiniōtika isãpiretini īkapani. Iua oerekana Xoteoakori Teoso mereēkitipitikara iua Xesosi.

⁶ Txamari ninoa Xoteoakori omanatari Paoro. Ninoa misãkirepiretari Xesosi, ininiã Paoro kamaãkaretxitana ninoa Xesosi imisãkirepiretinina xika. Iōkokari imãka ninoa apisatoō aãpani katxakini īkapani, omanãkare oerekini īkapani. Ininiã Paoro txana:

—Teoso !apakapai hīte Xesosi sãkire himauikakani xika. Kona nota xikani, kotxi nisãpiretapekamai hīte. Ininiã uatxaika nisãpiretariko Xesosi sãkire Xoteo minakonimoni. Xoteoakorimoni !nisãpiretaikariko —itxa Paoro.

⁷ Ininiãkara Paoro takanapana ninoa. Isari Txísio Xósito inakorimoni iua aapoko ikaikotini īkapani. Xoteo minakatiua iua. Teoso misãkiretakari iua. Iua aapoko aiko Xoteo apotiitiniãtaãua takote aua. ⁸ Aiko Xoteo apotiitiniãtaãua sikani auīte Krispo inakori auikari Apiananiri Xesosi sãkire. ĩtanoro, imiakori apaka, auikari Xesosi sãkire. Kaiãopokori kākíti Korīto auakani kenakotari Paoro sãpirena, ininiã eereka ninoa auikapiretari. Ipatxisataãkana.

⁹ Áti íkanõkati Teoso txíkitakari Paoro itaponeuatini. Itaponemoni Apiananiri misãkiretari iua:

—!Pipíkarauatape. Nisãkire pisãpiretapitipo kãkitimoni. !Piotokape. ¹⁰ Kotxi nota auapika pitekata. Pikarotakiri !auari, kotxi kaiãopokori kãkiti nota nakitiakori íkorapokoriti auari —itxa Paoromoni.

¹¹ Ininiã Paoro kaikota iuaã áti ano, ipixini ano pakinikanani Teoso sãkire oerekini íkapani.

Xoteoakori Anikari Paoro Káriomoni

¹² Eereka iuaã Akaia tixini auakani auíte áti íroã, Káριο inakori. Iua Homano itxaua. Homanoakori auítetari iua. Iuasaaki Xoteoakori apotiitaua. Ninoa maĩkari Paoro. Anikarina aiko kãkiti misiritiko sãpiretikoãtaã. ¹³ Iuaã ninoa txari Káriomoni:

—Ia kiki na atão oerekari kãkiti Teoso paniãtakiti kamiko. Ipinimonipo itxa iua oerekakiti. Na aãtokiriakorini oerekakiti atokoni itxa. !Auiritaãka Paoro oerekapiretakiti —itxana.

¹⁴ Paoro sãkirauatini apisapanika, Káριο txana Xoteoakori:

—Nisãpiretai híte Xoteoakori. Paoro kamaãkamariko maerekati, nota kenakotamariko apikomoni hĩsãkiremako. ¹⁵ Txamari !ikamari maerekati. Híte taparakienatakakaua hãuikapiretakiti xika, hãtokiriakorini oerekapiretakiti xika. Híte Xoteoakori. Nota áti uãka nitxaua, ininiã hítekara xinikari atão inakari. Kona notani sãpiretai híte auiãkiti —itxa Káριο.

¹⁶ Ininiã omitikana ninoa, aiko kãkiti misiritiko sãpiretikoãtaã õpõkikinina íkapani. ¹⁷ Iuasaaki Krekoakori maĩkari Sóseni inakori. Iuani Xoteoakori apotiitiniãtaãua sikani auíte. Krekoakori xirokitatari aãkeẽ aiko kãkiti misiritiko sãpiretikoãtaã apisatoõ. Txamari Káριο !imaãkatari.

Paoro Kanapiriã Átxiokia Sitatxitimoni

¹⁸ Eereka Paoro kaikotapanika mapaõti iuaã Korĩto sitatxiti Xesosi sãkire auiãkanikata. Eereka iua takapiretanapana ninoa. Isipe Pirisira, Ákira pakinikata. Iereẽtauana maporo áki, Síria tixinimoni isinina íkapani. Sẽkireia sitatxiti apokana. Iuaã Paoro sãpiretari Teoso ikamaenetakiti Teoso íkapani. Eereka ikixatari ikii ikamaenetakiti ixinikini íkapani.

¹⁹ Ninoa apoka Épeso sitatxiti. Iuaã Paoro takanapana Pirisira, Ákira pakini. Paoro íroã aiko áki Xoteo apotiitiniãtaãua. Iuaã apakapapiretakakaua Xoteoakorikata Teoso sãkire isãpiretinina. ²⁰ Ninoa misãkiretari Paoro ninoakata apikomoni ikaikotini íkapani. Txamari Paoro !inirekari ikaikotini.

²¹ —Nisariko kiiniri Teoso misãkiretiko aikotiã Xerosareẽ. Eereka Teoso nirekiniãri, uai nikanapiriã hitemoni —itxa Paoro.

Eereka isipe. Iereẽtaua maporo áki. Épeso sitatxiti itakanapa. ²² Sesaréia sitatxiti apoka Paoro. Eereka isa Xerosareẽmoni. Iuaã apokasaaki, ianapokota Xesosi sãkire auiãkanimoni. Eereka isa Átxiokia sitatxitimoni. ²³ Iuaã ikaikota mapaõti. Eereka isipe. Karásia tixini, Piríxia tixini apaka ípirixitiãpota. Aapokotxi apokaãpotakasaaki, isikapoxokonitana ikinimane Xesosi sãkire auiãkani.

Aporo Pirena

²⁴ Iuasaaki Xoteo Aporo inakori sari Épeso sitatxitimoni. Iua iponaniã Arexãtria sitatxitiã. Paimatireri iua. Imarotari Teoso sãkire iõkatsopatakori imakinika. ²⁵ Iua oerekapeẽkaika Xesosi sãkire, ininiã atão Xesosi sãkire isãpireta kãkitimoni. Ipoxokoniritika isãpirenauata. Txamari kãkiti patxisatiko pirena !iteene imarotapanika. Xoão kapatxisareri oerekapiretakitanira imarota. ²⁶ Iua Aporo sãpirenauata itaparaxiniritika aiko áki Xoteo apotiitiniãtaãua. Iuasaaki Pirisira, Ákira pakini kenakotari isãkire. Eereka anikarina aapokomonina. Oerekarina apikomoni Teoso sãkire imarotini íkapani.

²⁷ Eereka Aporo:

–Ninirekari Akaia tixinimoni nisini –itxa.

Ininiã Xesosi sãkire auiãkani:

–Ari, erekapitikari pisini.

Ininiã Xesosi sãkire auiãkani, Épeso auakani, iokanatsopataritari itariakorimoni Akaia tixini auakanimoni. Itxana iõkatsopariã: “Hãpakapariko aĩtari Aporo inakori.” Aporo apokasaaki Akaia tixini, iteene imoianatana Xesosi sãkire auiãkani. Ninoa auikari Xesosi sãkire, kotxi Teoso iteene turetana ninoa. ²⁸ Ikinimane apisatoõ Aporo oerekana Xoteoakori, Xesosi sãkire mauĩãkani, Xesosi atãopitika Teoso mereẽkiti ininiua. Teoso sãkire iõkatsopatakoriã iua oerekana Xesosi Teoso mereẽkiti ininiãua. Ininiã Xoteoakori !kasãkirena.

19

Paoro Épeso Sitatxiti Auakasaaki

¹ Aporo Korĩto sitatxiti auakasaaki, Paoro ĩpirixititari Épeso tõpa Épeso sitatxiti apokini ĩkapani. Iuaã aõkitana kãkiti Xesosi sãkire auiãkani. ² Paoro pimaãna ninoa:

–Xesosi sãkire hãuikasaaki, hãpakapatari Erekaritari Matamatakoti? –Paoro txana ninoa.

Ininiã ninoa:

–Kiripitipa iua Erekaritari Matamatakoti? !Aimarotari –itxana.

³ Ininiã Paoro:

–Kanatokopa inakariãpa hĩte patxisataãka, Erekaritari Matamatakoti himimarotakani?

Ininiã ninoa:

–Ari, Xoão patxisarauatini atoko inakarikanera ate patxisataãka –itxarina Paoro.

⁴ Ininiã Paoro:

–Xoão patxisatana kãkiti maerekati takanapakani. Itxana ninoa: “Hĩteko iteene auikapiretariko nitikini apokakari, Kristo Xesosi inakori,” Xoão txari kãkiti –itxa Paoro.

⁵ Ikara ikenakotaãkana atoko, ninoa patxisataãka Xesosi Apiananiri uãkaã. ⁶ Iuasaaki Paoro takari imakinika iuako ninoa nopini. Iuasaakipeka ninoa apakapari Erekaritari Matamatakoti. Iuasaaki ninoa sãkirauata kãkiti ãti uãka sãkireẽ. Isãpiretarina Teoso sãkire kãkitimoni. ⁷ Ninoa kikiakori atxiĩti tosi pakini.

⁸ Ipi ãti pakini kasiriti ikiniõtika aiko Xoteo apotiitiniãtaãua Paoro sãpirenauata itaparaxinireritika. Apanakinikata imisãkirenãtakauana. Paoro nirekana ninoa auikinirina Teoso sãkire, Teoso auĩtetxi ininiãua pirena. ⁹ Txamari ãtikaka ninoa ! inirekari auikapiretinirina, kotxi !inirekarina ikara atoko inakari sãkiretxiti. Ninoa misãkirepiretari Xesosi sãkire ikinimane kãkiti apisatoõ. Ininiãkara Paoro takanapana ninoa. Anikana Xesosi sãkire auiãkani iuakata. Ikiniõtika Txirano inakori oerekarauatiniãtaã Paoro oerekari Teoso sãkire kãkitimoni. Ninoa pimaããpotakakaua Teoso sãkire imarotininina ĩkapani. Apakapapireãpotakakauana. ¹⁰ Iuaã Paoro oerekarauata ĩpikanani, ininiã ikinimane kãkiti Ásia tixini auakani kenakotari Xesosi Apiananiri sãkire. Xoteoakori, Krekoakori pakini kenakotari.

Sepa Anaakori Pirena

¹¹ Teoso sikaposotiiretari Paoro posotiiretxi ipinimonipo inakari ikamini. ¹² Ikara atoko ininiã ikii mata, imãka iparĩkauatini ĩkapani apaka anikaãka amianatakanimoni, ininiã Teoso txĩkitakana amianatakani erekape ininina. Maerekani matamatakoni auaĩtotiniãri kãkiti, Paoro mãka ninoa kãkiti apakapakasaaki, maerekani matamatakoni sipe.

¹³ Iuasaaki apanakini Xoteoakori, miĩtiakori, maerekani matamatakoni omitiãkani, sari kãkitimoni maerekani matamatakoni omitikinina ĩkapani. Xesosi pirena ikenakotana. Ininiã eereka ninoa txari maerekani matamatakoni:

–Apaniãtai hĩsipiniikaua Xesosi uãkaã, Paoro sãpiretakiti Xesosi uãkaã –itxana ninoa.

¹⁴ Iuasaaki aua kiki Xoteo, Sepa inakori. Sasetotxiakori auíte itxaua. Iua anaakori kiki setxi pakini. Sepa anaakori paniātana maerekani matamatakoni sini Xesosi uākaā.

¹⁵ Txamari āti ōti maerekati matamatakoti apakapapiretana ninoa:

—Nota imarotari Xesosi. Nimarotari Paoro. Hīte !nimarota. Kiniparai hīte? —itxa maerekati matamatakoti.

¹⁶ Iuasaakipeka kiki maerekati auaītotakiti okakataua ninoa nopini. Apiataparata iua maerekati. Iuasaaki iua āsokitakatapena ninoani. Ininiā ninoa miteēkata, kasarapekana, kakaropekana itxapena.

¹⁷ Ikinimane kākiti Épeso sitatxiti auakani kenakopiretari ikara ene. Xoteoakori, Krekoakori apaka kenakopiretari ikara ene, ininiākara ipīkarauatana. Ikara atoko ininiākara Xesosi uāka apiata ipaxitaāka. ¹⁸ Kaiāopokori Xesosi sākire auiākani apotiitaua. Ikinimane apisatoō isāpiretarina maerekati mitxi ikamakitina. ¹⁹ Apanakini kasikapōererini apaka apoka iuaā. Iminarina sikapōerexi apaiaōkiko tsopa. Ikinimane apisatoō iotikarina. !Inirekaikarina maerekati ikaminina. Iaōtarina ikara aātsopa īki. Iīki sīkoēta mio txineiro ota pirata kamakoro. Kaiāopokoro txineiro. ²⁰ Ikara atoko ininiāpanirako Apiananiri sākire iaripiretako ikini itixiti. Kaiāopokori kākiti apiata auikaāpotari Apiananiri sākire.

²¹ Eereka Paoro ākixinire txari:

—Nīpirixititariko Masetónia tixini, Akaia tixini pakini. Iposo atoko Xerosareēmoni nisako. Iposo atoko Homa sitatxitimoni nisako —itxa ākixinireē.

²² Iokanatanana imoianariakori, Tximótxio, Erásito inakori pakini Masetónia tixinimoni. Paoro kaikotapanika Ásia tixiniā.

Neenamatzī Épeso Sitatxiti Auini

²³ Iuasaaki Paoro Épeso sitatxiti auakasaaki, kākiti Xesosi oerekapiretakiti manirekakani misākirepireāpotari Paoro, kotxi !inirekarina Xesosi oerekapiretakiti.

²⁴ Iuasaaki kiki Temétxio inakori aua iuaā. Ikamari aiko axapitipikiri inakari. Krekoakori teosone Txiana inakoro misākiretiko aikoti atoko inakari ikama. Kaiāopokori ikama pirata kamakori ivētxitini īkapani. Iua, initiriakori apaka apakaparo txineiropokoni iparīkana īki. ²⁵ Iua Temétxio pīkapiretana ikinimane initiriakori, ninoa kamakitikana kamakani apaka. Temétxio txana:

—Kikiakori, hīte imarotari kaiāopokori txineiro aāpakapa aparīka īki. ²⁶ Hīte kenakotapekari Paoro sāpirenātakiti. Paoro txanāta: “Kākiti kamakiti kona teoso !itxaua.”

Kona ia tōpananini, kona Épesonanini, ikara atoko itxa. Ikini itixiti Ásia tixini auakanimoni ikara atoko itxa. Kaiāopokori kākiti Paoro sākire auiākani auapeka. Kaiāopokori kākiti !inirekaikari teoso ate kamakiti. ²⁷ Atxiīti kākiti misākirepiretari ate kamakiti. Atxiīti !inirekaikari aparīka. !Ikarananini. Atxiīti kākiti !ipaxitaikari ateosone Txiana misākiretiko aikoti. Ininiā atxiīti kākiti misākirepiretaro oa Txiana. Ikinimane Ásia tixini auakani teosonetaro oa. Ikini itixiti auakani teosonetaro oa —itxa Temétxio ninoamoni.

²⁸ Ninoa kenakotakasaakiri ikara sākiretxiti, omanākarauatana. Ninoa akirikata:

—Txiana, Épeso auakani teosone. Apiananiro oa —itxanātana ninoa.

²⁹ Ikinimane kākiti sitatxi auakani miteēkata, akiriāpokatana. Imaīkarina Paoro moianariakori, Kaio inakori, Arisitako inakori pakini. Ninoa Masetónia tixinikini. Ikosekaītokatana. Imimiteēkatana. Kākiti apotiitiniātaāua aicotimoni anikaākana, mīroā itxana. ³⁰ Ikara Paoro imarotakasaaki, inirekari ĩroini kākitekata isākirauatini īkapani, txamari Xesosi sākire auiākani !auiritari iua ĩroini. ³¹ Ātikaka Ásia tixini auakani auíteakori, Paoro tirketani, iokanapireta Paoromoni:

—Kona pīroāpeko kākiti apotiitiniātaāua aikoti āki —itxarina iokanapirena.

³² Aiko āki ikinimane akiripoananikata. Apanakini akirikatakiti ipinimonipo. Apanakinipekana akirikatakiti ipinimonipo itxanātana, kotxi kaiāopokori kākiti txari:

—Kixikapa aãpotiitaua?

!Imarotarina ixika. ³³ Xoteoakori iuaã apotiitakaniua katikari Arexãtri inakori ikini-mane apisatoõ, isãkirauatini ïkapani. Iuasaaki õkitikari iuako kãkiti iotokini ïkapani, isãkire ikenakotinina ïkapani. ³⁴ Txamari ninoa imarotakasaakiri Arexãtri Xoteo ininiãua, akiripoakatana ipi oara:

—Txiana, Épeso auakani teosone, Apiananiro —itxanãtapikana.

³⁵ Eereka auñtetxi inakariua apoka ninoa apisatoõ. Iua posotari ninoa iotokakini. Itxarina:

—Ikini itixiti auakani imarotari atenokara Épeso auakaninokara nĩkatiniri ateosone Txiana misãkiretiko aikoti. Apiananiro oa. Ninoa imarotari atenokara nĩkatiniri kai oa ïto atoko inakari iaxiti katxakakaro. ³⁶ Ikinimane imarotapekari ikara inakari, ininiãkara hĩotokako. Iteene hĩxinikariko hĩkamakiti tĩkane. Maxikatĩka !hãkirinãtape. ³⁷ Kotxi hĩte minana naia kikiakori uaimoni, txamari !ĩtirĩkarina tiitxi ateosone misãkiretiko aikoti ãki auakari. !Imisãkirepiretarona ateosone. ³⁸ Temétxio, iuakata parĩkauatakani pakini, nirekiniãri naia kateiamoni isinina, auapitika aiko kãkiti misir-ítiko sãpiretikoãtaã. Auapitika aãuñteakori. Iuaã erekari isãpiretinirina maerekati naia kamakiti. ³⁹ Iuaĩkana hĩtsoatiniã, sitatxi auakani auñteakori apotiitakasaak-
iua, hĩsãpiretana ninoa himapokaerekatakiniti ninoa õtãkikinii ïkapani. ⁴⁰ !Apakata mixikanani himitekini, hãkiripoakatini atoko hĩkamini. Maxikatĩka hãkiripoanãta. Ixika !
auari. Atxiñti Homanoakori auñte txitaua maerekati akamakiti xika —itxana ninoamoni.

⁴¹ Eereka ipaniãtana ninoa sini.

20

Masetónia Tixini, Akaia Tixini Pakini

¹ Ninoa kãkiti apotiitakaniua aapokomonina ikanapiriãka atoko, Paoro pĩkapiretana Xesosi sãkire auiãkani. Imisãkiretana. Ikamapoxokonitana. Iposo atoko itakana-papiretana. Isipe Masetónia tixinimoni. ² Ìpirixititari Masetónia tixini. Aapokotxi apokaãpotakasaaki, isãpireãpotari Xesosi sãkire kãkitimoni. Isikataparaxiniretana. Eereka Akaia tixinimoni apoka. ³ Iuaã ikaikota ipi ãti pakini kasiriti. Eereka Paoro ka-iamapeka maporo ãki iereẽtiniua Síria tixinimoni isini ïkapani. Iuasaaki, ikenakopiretari Xoteoakori okaenetiniri iua. Ininiãkara Paoro:

—Masetónia tixinimonikanerako nikanapiriãko —itxa Paoro.

⁴ Sópato inakori Peréia sitatxitikiri sari iuakata. Piho inakori ãkiri itxaua. Arisitako inakori, Sekõto inakori, Tesarónika sitatxitikini, ninoa apaka sari Paorokata. Kaio inakori Tepi sitatxitikiri apaka sari Paorokata. Txíkiko inakori, Tópimo inakori Ásia tixinikini, Tximótxio inakori pakini moianatari Paoro.

⁵ Iuasaaki nota Arókasi inakori iuakata naua. Paoro imoianariakorikata ïkiika isinina. Nota, nimoianariakorikata sari Paoro tikini. Tóatxi sitatxiti Paoro iãtapaua ate. ⁶ Pão miãtiãkati nikiko õti napaka atoko, Piriposi sitatxiti aiereẽtaua maporo ãki Tóatxi sitatxiti asini ïkapani. Sĩko pakini õti napaka atoko Tóatxi aãpoka. Iuaã aaõkitana Paoro imoianari-
akorikata. Iuaã anapari ãti semanati.

Paoro Txĩkitakari Ipĩkari Iuaĩkana Auãki Inini

⁷ Tomatiko õtisaaki Xesosi sãkire auiãkani apotiitaua komiri ixanakinina ïkapani, Xesosi ipinini ixinikinina ïkapani. Iuasaaki Paoro oerekanãtari Teoso sãkire. Apaĩkanõkapeka isãpirenauatapanika, kotxi katimatinĩkata isipe. ⁸ Ate apotiitiniãtaãua aiko inopinita auakari iriko ãki. Iuaã auari kaiãopokori tirikapi poniãkari, ininiãkara papatakari. ⁹ Iuasaaki ãtokori Etxiko inakori topãkanãta inopinita auakari sonaã. Paoro sãpirenauanãtapika, ininiãkara itapo inokaãpotari iua Etxiko. Eereka imaka. Iuasaaki ixipotorika. Xitipeka apoãkata. Ninoa miteẽkata iuamoni isinina, txamari !auaika. ¹⁰ Ininiã Paoro katxaka, sa itxa iuamoni. Isirĩka iua ipĩkari nopini, imaarata itxari.

—Hĩpĩkarauatape. Auãkipanikari —itxana ninoa.

Ininiã iuaĩkana iua ãtokori auãkipeka itxa. ¹¹ Iposo atoko Paoro kanĩka iuaĩkana inopinita irikomoni. Komiri inika. Iposo atoko iuaĩkana ninoakata isãkirauanãtiniritika katimata itxa. Ikatimataãka atoko isipe Paoro. ¹² Eereka anikarina iua ãtokori aapokomoni. Ninoa iteene poxokoniuata iua auãkipanika inini.

Miretomoni Sikiko Pirena

¹³ Iuasaaki Paoro paniãtaua ate:

—Hĩte sari maporoã Asosi sitatxitimoni. Imiriĩrako nota sari. Iuaã nota iereẽtaua hĩtekata —itxaua ate.

Ininiã ate sari iua apisa. ¹⁴ Asosi sitatxiti Paoro aõkitaua ate. Iereẽtaua maporo ãki. Iposo atoko asa Mitxireni sitatxitimoni. ¹⁵ Iuaãtaã aãpokasaaki, iuaĩkana apotorika. ãti õti napaka atoko, anapari Kio inakori takote pokomiriĩ. ãti õti napaka atoko, Samosi inakori pokomiriĩ aãpoka. Iuaĩkana ãti õti napaka atoko, aãpoka Mireto sitatxiti. ¹⁶ Iuasaaki Paoro !inirekari Épeso ioporokoti apokitini, kotxi !inirekari auapokotini Ásia tixiniã. Ikatimaritaua, kotxi iposotiniãri, inirekari Xerosareẽ apokini. Pẽtekósitxi kiiniriti apisapanika apokini inireka.

Xesosi Sãkire Auiãkani Auĩteakori Ôtãkikiko

¹⁷ Ininiã Paoro Mireto sitatxiti auakasaaki, iokanapireta Épeso sitatxitimoni. Ipĩkapiretana Xesosi sãkire auiãkani auĩteakori. ¹⁸ Ninoa apokasaaki, Paoro misãkiretana ninoa:

—Himarotari merepitipanika Ásia tixini napokasaaki, eereka hĩtekata nauakasaaki, himarotari ikiniõtika nauini hĩtekata. ¹⁹ Iuasaaki niparĩkauata Apiananiri nirekakiti nikamini. Na niuikaua. Iteene nitxiapata. Xoteoakori nirekari okinino, ininiã nimaxirexinire auapitika iuasaaki, iuaritika nikamari Apiananiri paniãtakiti. ²⁰ Himarotari na nikipatari ipixini Teoso sãkire. Nisãpiretapekai hĩte imakinika Teoso sãkire hĩte ereka hinini ĩkapani. Kãkiti apotiitiniãtaãua noerekai Teoso sãkire. Apaka nisari ãti haãpokomoni, eereka ãti haãpokomoni, eereka ãti haãpokomoni, nitxaãpota Teoso sãkire noerekini. ²¹ Xoteoakori, Xoteo minakanuia apaka nisãpiretari nimarotakiti Teoso oerekakiti maerekanitxi itakanapinina ĩkapani, Teoso paniãtakiti ikaminina ĩkapani. Nisãpiretari nimarotakiti Teoso oerekakiti, Xesosi Apiananiri sãkire auikinina ĩkapani.

²² —Ininiã nota sariko Xerosareẽ, kotxi Erekar Matamatakoti paniãtano nota iuaã nisini. !Nimarotari kiatokouako ninaãkapaniko iuaã. ²³ Ikini sitatxiti nauakasaaki, Erekar Matamatakoti pinitano: “Piteniko takapeẽkako kateia ãki iuaã. Iuaã pimisiritiko auapitikako,” itxano. Iuananira nimarota Xerosareẽ napokasaaki. ²⁴ Ikara nimisir-itiko sãkiretxiti kona mamakari nixinikakiti, kotxi kona nitiretari nauini ĩkorapokoriti. Xesosi Apiananiri paniãtakiti parĩkatxiti ninireka nikamini. Nipoxokoniritika nauini mapotõkirepe nitxako. Xesosi paniãtano Teoso iokanapirena erekar Teoso tiraõki nisãpiretini kãkiti.

²⁵ —Nisãpiretapekari Teoso auĩtetxi ininiãua pirena hĩte sauaki nauakasaaki. Uatxa nimarotari hĩte hĩkinika kona hãtamataikanoko nota. ²⁶ Ininiã hĩxinikapikariko nisãkire iaõka uatxa nisãpiretakiti. Kãkiti hĩte sauaki auakari pĩpianakiniã, Teoso kimapore imimarotakaniã, kona nota xikani. ²⁷ Kotxi nisãpiretapekai hĩtemoni imakinika Teoso iokanapirena. ²⁸ Erepaniko, katokinani hĩtxako maerekati apokini hĩtemoni. Erekar Matamatakoti sikapekari kãkiti hĩtemoni Xesosi sãkire hõerekini ĩkapani, ininiãkara hinĩkatana ninoa. Soti auĩte nĩkatakani atokokana hĩtxauako. Ninoa hĩpiraakori atoko. Ininiã hĩtiretanako ninoa kãkiti, kotxi Teoso nakitiakori itxauana. Teoso ãkiri ipina ninoa ĩkapani, iua nakitiakori ininiuana ĩkapani. ²⁹ Nimarotari kãkiti apokapitikako hĩtemoni nota sini tikini. Ninoa nirekari ixipokinirina hĩparĩka Teoso ĩkapani. Xapakori patari

imaĩkini monõkoni atoko itxako ninoa hĩte sauaki imonõkoni apokini. Ininiã erepaniko. Katokinani hĩtxako. ³⁰ Āti õti kãkiti hĩte oereẽkini sãpiretakiti na atãoni. Koketakori sãkiretxiti isãpiretana apanakini Xesosi sãkire auiãkani. Ikara xika apanakini auikari ninoa sãkire, ininiãkara isanako ninoakata. !Auikaikarina hĩte sãkire. ³¹ Ininiãkara erepaniko. Hĩxinikariko ipi anokanani āti anokanani pakini nota õtãkikanãtai hĩte. Noerekanãtai hĩte Teoso sãkire ĩkanõka, pokamara pakini. Ikiniõtika noerekai hĩte. Nitxiapata nõtãkikasaakii, kotxi nitiretai.

³² –Uatxa nisikai hĩte Teosomoni, iua nĩkatiniĩ ĩkapani. Nitakanapari Teoso sãpirena hĩtekata, kotxi iua sãpiretari isikiniĩ ikinipoko erekari. Iuara sikaposotiiretai hĩte. Iuara sikai hĩte erekari inĩkatakiti, inakitiakorimoni isikini ĩkapani. ³³ !Nixikotari apanakini. !Nimaãkatari itxineirote, imãkana pakini. ³⁴ Hĩte imarotapitikari notaka parĩkauata imakinika ninireẽkiti, nimoianariakori nireẽkiti apaka niamotini ĩkapani. ³⁵ Ikara atoko aparĩkauatiniã, atiretana kãkiti maposotakaniua. Nota parĩka oerekapekai hĩte ikara atoko hĩkamini. Maxinikari Xesosi Apiananiri sãkire. Iua txari: “Teoso takari erekari kãkitimoni iua amonitakiti apakapakasaaki. Teoso takari apia erekari sikarauatakari-moni,” –Paoro txana ninoa Ēpesokinimoni, Teoso sãkire auiãkani auĩteakorimoni.

³⁶ Iuasaaki Paoro kapotoreẽkaua ninoakata. Imisãkiretarina Teoso. ³⁷ Ninoa ikinimane txiapakata. Imaarãkarina Paoro, apitxoka itxarina. Itakapiretanaparina. ³⁸ Apiata imatinanina, kotxi Paoro sãpiretana ninoa, !aõkitaikarina iua. Isana iuakata maporomoni.

21

Paoro Sari Xerosareẽmoni

¹ Maporo aãpokasaaki, ate takapiretanapana ninoa Ēpesokini. Eereka asipeka. Kosi pokomiriĩtimoni asakatapitipo. Iuaã aãpoka. Katimatinĩkata asa Hotxi ioporokotemoni. Eereka Pátara sitatxitimoni asa. ² Iuaã aãpokaro āto maporo Penísia tixinimoni sikaro, ininiã aiereẽtaua atoko ate potorika asini. ³ Apaniãxiti apokasaaki, aãtamatarari Xipri pokomiriĩti. Anapari Xipri pokomiriĩti asanaremoni. Asari Síria tixinimoni. Aãpokita Txiro sitatxiti, kotxi iuaã tiĩtxi maporo āki auakari kaikota. ⁴ Iuaã ate aõkitari kãkiti Xesosi sãkire auiãkani, ininiã akaikota ninoakata āti semanati. Ninoa txari Paoro:

–Xerosareẽmoni !pisipe, kotxi Erekarari Matamatakoti sãpiretapekaua ate pimisiritiko tĩkane aua iuaãtaã –itxarina.

⁵ Apotorikini õti apokasaaki, ate sipe iuaĩkana maporomoni. Ninoa ikinika, ĩtanoroakorokata, imiakorikata, isana atekata sitatxi ĩtiniã ioporokomoni. Akinika akapotoreẽkaua ikipatxiteẽ, misãkireta atxari Teoso. ⁶ Atakapiretanapana iposo atoko, ate iereẽtaua maporo āki. Ninoa kanapiriã aapokomonina.

⁷ Ininiã Txiro sitatxiti atakanapa. Iuaĩkana apotorika. Eereka aãpoka Pitoremaita sitatxiti. Iuaã ate misãkiretana kãkiti Xesosi sãkire auiãkani. Akaikota āti õti ninoakata. ⁸ Katimatinĩkata iuaĩkana apotorika asini. Eereka aãpoka Sesaréia sitatxiti. Iuaã Piripi inakori aapokomoni asa. Teoso sãkire sãpiretakari itxaua Piripi. Xesosi moianariakori Xerosareẽ auakasaakina, ninoa mereẽri iua Piripi, apikomoni kikiakori seisi pakini, ninoa imoianatinina ĩkapani. Ate kaikota Piripi aapoko. ⁹ Piripi auari ipi ipi pakini imiakoro ātokoropanika. Ninoa apaka sãpiretari Teoso iokanapirena kãkitimoni. ¹⁰ Ate auanapa iuaã mapaõti. Iuasaaki Teoso sãkire sãpiretakari Ákapo inakori Xotéia tõpa potorikakari apoka Piripi aapoko. ¹¹ Ikosekari Paoro makiomatere. Iĩtxikari iuako ĩkitikata. Itxari:

–Erekarari Matamatakoti txari: “Xoteoakori Xerosareẽ auakani iaxirikapiriko ia makiomataretxi nakititakari ia atokokanerako iaxirikiko. Eereka isikarina Xoteo minakonimoni” –Ákapo txaua ate.

¹² Ikara akenakotakasaaki, ate apanakini iuaã auakanikata txari Paoro:

–Paoro koniko !pisipe Xerosareẽmoni –atxari.

¹³ Txamari Paoro:

—Kinirepa h̄txiapanāta? H̄ite kamamatinanitano nota. !Nimaākatari niaxirikiko Xerosareē. !Nimaākatari nokiko apaka Apiananiri Xesosi nauikini xika —itxaua ate.

¹⁴ !Ik̄ipitari asākire. Ininiā ate:

—Iaōpe. Ikara atoko ininiā, ate nirekari Teoso nireēkiti kamiko —atxa.

¹⁵ Mapaōti inapaka atoko, aāiamata Xerosareēmoni asini ĩkapani. Eereka apotorika asini. ¹⁶ Apanakini Xesosi sākire auiākani Sesaréiakini sari atekata apaka. Menasō inakori aapoko ninoa anikaua ate, kotxi iuaā anirekari akaikotini. Menasō Xipri pokomiriītikiri. Okananipeka iua auikari Xesosi sākire.

Paoro Apoka Xerosareē

¹⁷ Xerosareē aāpokasaaki, Xesosi sākire auiākani apakapaua ate ipoxokoniritikana.

¹⁸ Katimatinīkata Paoro sari atekata Txiakomoni aianapokotini ĩkapani. Ikinimane Xesosi sākire auiākani auñteakori aua iuaātaā. ¹⁹ Paoro misākiretana. Isāpiretana imakinika Teoso kamakiti Paoro parīkaā Xoteo minakaniu sauaiki iparīkauatakasaaki. ²⁰ Ikara ikenakotakana atoko, ninoa txari:

—Peerekari Apiananiri —itxana.

Eereka itxarina Paoro:

—Aītari, pimarotari kaiāopokori Xoteoakori auikiniri Xesosi sākire. Ninoa auikari Moisesini oerekakiti sākiretxiti apaka. ²¹ Apanakini sāpiretapekana ninoa: “Paoro oerekanātana Xoteoakori, Xoteo minakaniu sauaiki auakani, Moisesini oerekakiti itakanapinina ĩkapani. Oerekanātana ninoa Teoso takaōtxikare imiakori ĩtoā imatakakani ĩkapani. Oerekanātana ninoa aātokiriakorini oerekakiti itakanapinina ĩkapani.” Ikara atoko itxanātana ninoa. ²² Ninoa !imarotapanikari pite uai apokini, ininiākara natokopa atxatari akaminiri, kotxi anirekari ninoa imarotini apanakini sāpiretakiti poxiene inini. Anirekari ninoa imarotini pite aukapitiki Moisesini oerekakiti. ²³ Ininiākara ia pikama. Naia ipi ipi pakini kikiakori misākiretari Teoso. Isāpiretarina Teosomonikari ikamaenetakitina tīkane. ²⁴ Ininiā pisa naiakata Moisesini oerekakiti iaōka h̄kamini ĩkapani, ininiākara h̄kipaātaua Teoso ĩkapani. Pite ĩkitxitari naia kii kixatiko ĩkapani. Ikara atoko ininiā, ikinimane imarotariko poxienetapa apanakini sāpiretakiti. Ninoa imarotariko Moisesini paniātakiti pikamini. ²⁵ Ninoapekana, Xoteo minakaniu Xesosi sākire auiākanipekana, ate iokanatsopatapeka ninoamoni. Asāpiretana ate xinikakiti: —!Hinikapiriko nipokori teoso kākiti kamakitimoni sikakori. !Hinikapiri arēkatxi. Manotsaātakori xini !hinikape. !H̄sirīkape pītano minakotokatika. !H̄sirīkape pītaniri minakotokatika. Ikara atoko atxa ate ninoamoni aiokanatsopatini —itxarina Paoro.

²⁶ Ininiā Paoro anikana ninoa kikiakori. Katimatinīkata ninoa kipaātaua Teoso ĩkapani Moisesini oerekakiti iaōka ikaminina ĩkapani. Eereka Paoro ĩroā Teoso misākiretiko aikotiā. Isāpiretari sasetotxi ninoa keto ĩfona arokiko xipokini ōti, kotxi iusaakiko sasetotxi apakapari ninoa sikakiti Teosomoni.

Paoro Maīkiko

²⁷ Iua semanati kaiamapeka ixipokini inakasaaki, ātikaka Xoteoakori Ásia tixinikini atamatarini Paoro Teoso misākiretiko aikoti āki. Ninoa misākirepiretari Paoro ikinimane kākiti iuaā apotiitakanimoni, ininiā ninoa sākire xika ikinimane omanatarini Paoro. Eereka imaīkarina Paoroni. ²⁸ Ásia tixinikini akiripoata:

—H̄ite Xoteoakori himoianataua ate. Ia kikira oerekari ikini itixitikini omanatinina Xoteoakori. Iara oerekari kākiti Moisesi paniātakiti imakamakani. Oerekari kākiti mapaxitakaniri ia Teoso misākiretiko aikoti. Ĩkorasaaki !ipaxitari ia aiko, kotxi imīroāna Xoteo minakaniu aiko āki, ininiākara itxikotari ia aiko Teoso nakiti —itxanātana ninoa.

²⁹ Ikara itxana, kotxi mitxi itikarina kiki Xoteo minakatiua Tópimo inakori Épeso sitatx-itikiri Paorokata tīpokotini sitatxi apanīkaki. Txamari Paoro !anikari iua aiko āki. Ininiā iuākatarina Paoro anikapekari iua aiko āki. ³⁰ Ininiā iua Paoro maīkiko pirena iaripireta.

Ikininape sitatxi auakani kenakoenetakasaakiri ikara, imitekana aikomoni. Imaĩkarina Paoro. Ikosekaĩtotarina. Teoso misãkiretiko aikotiã imipokiãkatarina Paoro. Iuasaakipeka aiko tore totaãkapeka. ³¹ Kãkiti iuaã apotiitakaniuua nirekari okiniri Paoro. Sotatoakori Homano inakaniuua ninoa auĩte kenakoenetari ikinimane Xerosareẽ auakani neenamauatini. ³² Iuasaakipeka sotatoakori auĩte anikana sotatoakori. Imitekana Paoromoni. Kãkiti atapakasaakina sotatoakori auĩte sotatoakorikata, iuasaakiika iotoka Paoro iaritatinina.

³³ Ininiã sotatoakori auĩte maĩkari Paoro. Ipaniãtana sotatoakori Paoro iaxirikini ipi kohẽtxiã. Iposo atoko ipimaãna kãkiti itakote auakani:

—Kiripa ia kiki? Kixikapa ia atoko inaãka? —itxana ninoa.

³⁴ Ininiã ãtikaka iuaã auakani, ia xikara. Apanakinipekana ãti xikara, itxaãponãtana isãkirena. Sãkiretxi kaiãopokori ininiã, iua !imarotari atão ixika. Ikara atoko ininiã, sotatoakori auĩte paniãtana sotatoakori, ninoa aapokomoni anikinirina Paoro. ³⁵ Sotato aapokokiri kanikoatxiã apokasaakina, sotatoakori õtanõkari Paoro ãto, kãkiti ma-maĩkakaniri ãkapani. ³⁶ Kotxi kaiãopokori kãkiti itikini ãkani akiripoakata:

—Hõkariko. Hõkariko —itxanãtana.

³⁷ Paoro sotatoakori aapoko ãki iĩroãnapanoka inakasaaki, Paoro txari sotatoakori auĩte:

—Apakata pite nimisãkiretini?

Ininiã sotato auĩte tikoka.

—Pite imarotari Krekoakori sãkire —itxari Paoro.

³⁸ —Kona piteni Exito tixinikiri pitxataua? Kona piteni kitatiki kamanãtari neenamtxi auĩtetxiakori pomanatini? Kona piteni anikatana ipi ipi pakini mio kokanirini iexaminatekatana ãparaã makipakaniãtaã? —ipimaãri Paoro.

³⁹ Ininiã Paoro:

—Kona notani. Xoteo nitxaua. Nota Taaso sitatxitikirirano nota. Taaso sitatxiti, sitatxi apiari inakari, Sirísia tixinikiri. Pauiritano nakira kãkiti nimisãkiretini —itxari iua.

⁴⁰ Ininiã sotatoakori auĩte:

—Ari, pimisãkiretana.

Inakasaakiri Paoro tima kanikoatxiã. Iuasaaki õkitikari iuako kãkiti akiritini iotokini ãkapani, isãkire ãkenakotinina ãkapani. Ikinipoko iotokasaaki, iua sãkirauata ninoakata Xoteo sãkireẽ, Epiráiko sãkireẽ.

22

Paoro Misãkiretari Xerosareẽ Auakani

¹ Ininiã Paoro:

—Nitariakori, niriakori, hĩkenakotariko nisãkire. Na maerekati na nikama. Erekari-nokara nikama —itxa.

² Ninoa kenakotakasaakiri ninoaka sãkireẽ, Epiráiko sãkireẽ isãkirauatini, !akiritaikana. Itsorĩkaãtana.

³ Ininiã Paoro:

—Xoteopitikanano nota. Niponaniã Taaso sitatxiti, Sirísia tixiniã. Eereka uai Xerosareẽ sitatxiti napoka. Uaikara naneẽ. Iuasaaki koerekareri kimatireri Kamarieo inakori oerekano imakinika. Iua oerekano akiomaneakorini kitxakapirĩkarini paniãtakiti imakinika. Nota parĩkauata Teoso ãkapaninokara, hĩte parĩkauatini atokotxikana. ⁴ Mitxipeka nota kapokotana kãkiti Xesosi sãkire auiãkani, Xesosi kimaporeẽ sikani. Nimaĩkana, kateia ãki oka nitxana. Kiki, sito pakini nimaĩka. Nota xika ninoani ipĩpe. ⁵ Sasetotxiakori auĩte apiatakari, Xoteo auĩteakori pakini imarotari atãopitika nisãkire. Ninoakara sikano aãtsopa iõkatsopatakitina auĩtetxiakorimoni Tamásiko sitatxiti auakanimoni nanikini ãkapani. Iua aãtsopa auiritano Xesosi sãkire auiãkani nimaĩkani. Ininiã nota sari iuaã Xesosi sãkire auiãkani nimaĩkani ãkapani, Xerosareẽmoni nimikanapiriinina ãkapani imisiritikona tĩkane.

⁶ –Apianiãxiti Tamásiko sitatxiti takote napokaãpotakasaaki, patimari iotximere iax-itikiri apoka notamoni. ⁷ Xiti nirika. Nikenakotari nakiriuãkatiko: “Saoro, Saoro, kinirepa pite misiritano nota?” itxano.

⁸ –Ininiã nota: “Apiananiri, kiriparai pite?” nitxari.

–Ininiã iua: “Nota Xesosi Nasaree sitatxitikirikarano nota. Pimisiritakitikarano nota,” itxano.

⁹ –Nimoianariakori atamatari iua iotximere, ininiã ipĩkarauatana. Na ikenakotarina nota misãkiretakari. ¹⁰ Ininiã nota: “Apiananiri, kipa pinireka pitemoni nikamini?” nitxari.

–Ininiã Apiananiri: “Ereẽ pitima. Tamásikomoni pisa. Iuaãtaã pisãpiretaãkako imakinika Teoso nireẽkiti pikamini ïkapani,” itxa Apiananiri notamoni.

¹¹ –Iua iotximere xika mõsiãreti nitxaua. Ininiã nimoianariakori kanõpiãpotano. Anikanona Tamásikomoni. ¹² Iuaãtaã aua kiki Ananíasi inakori. Iua kamapikari akiomaneakorini kitxakapirĩkarini paniãtakiti. Ikinimane Xoteoakori Tamásiko auakani iteene paxitari iua. ¹³ Iua ina notamoni. Nota takote apoka itxa. Itxano: “Nitari Saoro, kõiãre pitxako,” itxano nota.

–Iusaakipeka nota kõiãrepeka nitxa. Natamatari iua. ¹⁴ Iua: “Akiomaneakorini Teosone mereẽi pite inirekakiti pimarotini ïkapani. Teoso mereẽi pite Erekarinoka Kamakari patamatini ïkapani. Teoso mereẽi pite Erekarinoka Kamakari sãkire pikenakotini ïkapani. ¹⁵ Pitekarako sãpiretariko itanapoko kãkitimoni atão Xesosi pirena, patamatakiti, pikenakotakiti pakini. ¹⁶ Ininiã kona okanani pitxape. Põkitikaua. Pipatxisataãkako. Pakiritariko Apiananiri uãka, ininiã iua makatxakari pimaerekani,” Ananíasi txano nota.

¹⁷ Eereka nikanapiriã Xerosareẽmoni. Teoso misãkiretiko aicotimoni nisa. Iuaã Teoso nimisãkirenãtakasaaki, nitaponetari Apiananiri. ¹⁸ Natamatari iua. Itxano nota: “Katima pitxako. Xerosareẽ posipika uatxapeka. Uai auakani !auikapaniri nota pirena pisãpiretakiti,” itxa.

¹⁹ Ininiã nota: “Apiananiri, nota nitapekana kãkiti pisãkire auiãkani ikini aikoti Xoteo apotiitiniãtaãua. Niãsokapekana. Kateia ãki nitakapekana. Ninoa imarotapitikari ikara nikamakiti. ²⁰ Pite sãkire sãpiretakari Estevão inakori okikosaaki, nota aua iuaã. Iusaaki ninĩkatari kokanirini mãka inopinikiri. Nota apokaerekatari okinirina iuani.”

²¹ –Ininiã Apiananiri: “Pisipeka. Ôtakoxiti niokanatai Xoteo minakonimoni,” itxano –itxa Paoro kãkitimoni.

Paoro Homanõ Itxaua

²² Iusaakipeka Xoteo minakonimoni isini xika, kãkiti iuaã apotiitakaniua ! inirekaikarina Paoro sãkire ikenakotinina. Omanãkarauata. Akiripoakatana:

–Hõkariko. !Erekari auapanika inini –itxana.

²³ Akiripoakatana. Iõkokarina imãkana inopinikiri. Kipatxi okarapekatana apaka, kotxi omanãkarauata. ²⁴ Ininiã sotatoakori auĩte paniãtana sotatoakori anikiniri Paoro aiko kaikori ãki, sotatoakori aapoko ãki. Ipaniãtana Paoro ixirokitatiko tĩkane, kotxi inirekari imarotiniri Paoro omanatiko xika. ²⁵ Paoroni iĩtxikasaakina ixirokitatiko ïkapani, Paoro pimaãri sotato itakote timakari:

–Erekari atxiĩti hĩte xirokitatiniri kiki Homanõ inakori maxikatĩĩka? Homanõ nitxaua. Kixikapa hĩte nirekari hĩxirokitatinino? –Paoro txari iua.

²⁶ Ininiãkara sotato sari iauĩtemoni.

–Iua kiki amaĩkakiti Homanõ itxaua iua, ininiãkara erepaniko iuamoni pikamakiti tĩkane –itxari.

²⁷ Ininiã sotatoakori auĩte sari Paoromoni.

–Pisãpiretano. Homanokani pitxataua? –itxari Paoro.

Ininiã Paoro:

–Iuapitikarano nota.

²⁸ Sotatoakori auĩte txari:

—Nota Homano nitxaua, kotxi niñkitxitari aãtsopa ïki Homano nininiua ïkapani. Pakaroneri.

Ininiã Paoro:

—Niponaniãkasaaki Homano nitxapekaua —itxa.

²⁹ Iuasaaki Paoro xirokaaritakani patimari isinina. Sotatoakori auñte pïkarauata, Paoro Homano ininiua imarotakasaaki, kotxi iua paniãtana sotatoakori iñtxikiniri Paoro.

Paoro Xoteo Auñteakori Apisatoõ

³⁰ Katimatinikata sotatoakori auñte koxirikari Paoro. Inirekari imarotiniri Xoteo apoñtiniri, ininiã ipïkapiretana sasetotxi auñteakori, Xoteo auñteakorikata. Ipaniãtari Paoro itimini ninoa apisatoõ.

23

¹ Ininiã Paoro iteene mixinitoõtana Xoteo auñteakori.

—Nitariakori, erekari nikaminiritika, uatxa uai naua. Teoso nireẽkitinoka ninireka nikamini. Teoso imarotari ikara, kotxi imarotari nixinikakiti nãkixinireẽ —itxa.

² Sasetotxiakori auñte apiatakari Ananias inakori !ipotxitari Paoro sãkire, ininiã ipaniãtari Paoro takote auakani aritiniri Paoro sona. ³ Ininiã Paoro:

—Teosokarako aritaiko pite. Aapokotxi tare txñtatakori atoko pitxa pite, kotxi mapara peerekai, txamari pãkixinireẽ maerekatinoka. Pite topãkanãta ereẽ nota pikenakotini ïkapani akiomaneakorini paniãtakiti iaõka pikamini ïkapani, txamari pipaniãtari niar-itiko. Akiomaneakorini na paniãtari ikara atoko inakari. Pite kona kamari ninoa paniãtakiti —Paoro txari iua auñtetxi.

⁴ Paoro takote auakani txitari Paoro:

—!Erekari pimisãkirepiretiniri sasetotxi auñte apiatakari Teoso nakiti —itxana.

⁵ Ininiã Paoro:

—Nitariakori, !nimarotari iua sasetotxi auñte apiatakari ininiua, kotxi Teoso sãkire iõkatsopatakori txari: “Kona pimisãkirepiretapiri hñauñte.”

⁶ Paoro atamatana kãkiti iuaã apotiitakaniua. Apanakini satoseoakori itxauana. Apanakini pariseoakori itxauana. Ininiã itapararitika isãpiretana:

—Nitariakori, pariseokarano nota. Pariseo ãkirikarano nota. Uai nota minaãka hñte apisatoõ, kotxi nota auikari ipïkanipeka õkitikiniua, iuañkana auãki ininina ïkapani —itxana ninoa.

⁷ Iuasaakipeka pariseoakori, satoseoakori pakini taparakienatakakaua, kotxi pariseoakori auikari Paoro sãkire. Satoseakori !auikari Paoro sãkire. ⁸ Kotxi satoseoakori !auikari ipïkari õkitikiniua, iuañkana auãki inini ïkapani. Kona auikarina Teoso nitiriakori iaxitikini auini. Kona auikarina matamatakoni auini. Pariseoakori auikari ipïkari õkitikiniua, iuañkana auãki inini ïkapani. Auikarina Teoso nitiriakori auini. Auikarina matamatakoni auini apaka. ⁹ Iuasaaki ikinimane apia akiripoakata. Itaparakenatakakauana. Pariseoakori, kaiõkatsoparerini inakoni, õkitikaua. Itapararitika itxana:

—Atemoni ia kiki !ikamari maerekati. Atxiñti matamatakoti, atxiñti Teoso nitiri iaxitikiri sãkirauata iuakata. Ininiãkara !apakata anaiatiniri Teoso —itxana.

¹⁰ Ninoa iteene taparakienatakakauana, ininiã ineenamauaaritana. Sotatoakori auñte pïkari ninoa okiniri Paoro, ininiã ipaniãtana sotatoakori:

—Hñsako kãkiti sauaki apanñkaki. Iuaã himakatzakariko Paoro. Hanikariko sotatoakori aapokomoni —itxana.

Ininiã anikarina iuaã.

¹¹ Æti ïkanõkati Apiananiri apoka Paoromoni. Paoro takote itima. Itxari:

—Kataparaxinire pitxako. Pisãpiretapekari nota pirena uai Xerosareẽ. Apaka pisãpiretariko nota pirena Homa sitatxiti —itxari.

Xoteoakori Nirekari Okinirina Paoro

¹² Katimatinĩkata apanakini Xoteoakori apotiitaua. Ixinikarina Paoro okini ĩkapani. Ninoa txari:

—!Anipokotapani, !aãtapani, Paoro aõkini apisa —itxana.

¹³ Ninoa Xoteoakori koarẽta apikomoni. ¹⁴ Eereka ninoa sari sasetotxi auĩteakorimoni, kiomãtxiakori pakinimoni. Ninoa txana:

—Ate okaenetari Paoro. !Anipokotapani iua aõkini apisa. ¹⁵ Ininiã hĩte aãuĩteakori amanaãriko sotatoakori auĩte, imininiri Paoro uai. Hĩsãpiretariko sotato auĩte, hinirekari apikomoni hĩpimainiri Paoro. Iuasaaki ate iãtapariko kimaporiã aõkiniri ĩkapani —itxana ninoa.

¹⁶ Paoro itaro ãkiri kenakoenetari Paoro okaenetiko, ininiãkara ĩroã sotatoakori aapoko, sãpireta itxari iritanirimoni. ¹⁷ Ininiã Paoro misãkiretari sotato auĩte poiãori.

—Panikari ia ãtokori hãuĩtemoni. Iminapiretakiti inireka isãpiretiniri iua —itxa.

¹⁸ Ininiã sotato auĩte poiãori anikari iua auĩtemoni.

—Ate maĩkakiti Paoro misãkiretano nota, ia ãtokori pitemoni niminini, kotxi inirekari isãkirauatini pitekata —itxari.

¹⁹ Ininiã apiari anikari iuakoã ninoanani auiniãtaã. Ininiã iua:

—Kipa pinireka pisãpiretinino? —itxari.

²⁰ Ininiã iua ãtokori apakapapiretari:

—Xoteo auĩteakori nirekari amanainii katana pokamara Paoro panikini ninoamoni. Isãpiretainako pite, inirekapanikarina apikomoni Paoro sãkire ikenakotinina. Txamari paxirari ninoa sãkire. ²¹ !Pauikapena, kotxi koarẽta apikomoni kikiakori kipatauako kimaporiã Paoro iãtapinina, okinirina ĩkapani. Ninoa kikiakori txapeka !inipokotaikana, !iãtaikana, Paoro imokakinina apisa. Ninoa iposopeka kimaporiã iãtapinirina Paoro. Ninoa iãtapari ninoa nirekakiti pikamini —itxari sotato auĩte.

²² Ininiã sotato auĩte:

—!Pisãpiretapiri notamoni pisãpiretakiti apanakinimoni.

Ininiã iokanatarari ãtokori ikanapiriini aapokomoni.

Paoro Iokanataãka Périsi Inakorimoni

²³ Iposo atoko sotato auĩte pĩkapiretana ipi sotatoakori auĩtetxi poiãoni inakanuia. Imisãkiretana:

—Hãpotiitana tosẽtosi sotatoakori ikitiã sikani, setẽta sotatoakori kavaro nopini sikani, tosẽtosi sotatoakori meretaua anikakani pakini. Iposope hĩtxako ia ĩkanõkati novi oara hĩpotorikini Sesaréia sitatxitimoni hĩsini ĩkapani. ²⁴ Kavaroakoro hĩsikari Paoro, oa nopini isini ĩkapani. !Hãuiritapiri Paoro okiko. Hanikari Paoro Homanoakori auĩtemoni Périsi inakorimoni —itxana ninoa.

²⁵ Iposo atoko sotato auĩte iõkatsopata:

²⁶ Nota Kráotxio Arísia inakorino iõkatsopata apiarimoni, pite Périsi aãuĩtemoni. Ereẽkai. ²⁷ Ia kiki Paoro inakori Xoteoakori maĩkakiti. Ninoa nirekari okiniri. Nota, nisotatoneakorikata makatxakari iua, kotxi Homano itxaua. ²⁸ Ninirekari nimarotini kixikapa ninoa nirekari okiniri Paoro, ininiãkara nanikari iua Xoteoakori auĩteakori apotiitiniãtaãua. ²⁹ Iuaã nimarotari ixika !auari kateia ãki ikaikotini ĩkapani. Ixika !auari ipinini ĩkapani. Ninoa apoĩtari iua ninoa atokiriakorini paniãtakiti imakamamani xika. ³⁰ Nikenakopiretari Xoteoakori okaenetiniri Paoro, ininiã niokanatarari iua pitemoni. Nipaniãtana Paoro apoĩtakani isãpiretiniina Paoro kamakiti. Iananirako niõkatsopata. Ereẽpiko,

itxa sotato auĩte sãkire Périsimoni.

³¹ Sotatoakori auĩte paniãtiniri atokokana sotatoakori anikari Paoro. ĩkanõka anikarina ãtxipatiritxi sitatxitimoni. ³² Katimatinĩkata sotatoakori ikitiãna sikaninanira kanapiriã sotato aapokomoni. Kavaro nopini sikani anikari Paoro apikomoni.

³³ Anikarina Sesaréia sitatxitimoni. Isikarina Paoro iõkatsoparikata auĩtetximoni, Périsi inakorimoni. ³⁴ Ininiã iua atatsopatarari iua iõkatsopari. Iposo atoko ipimaãri Paoro:

—Kitixinepa paua? —itxari iua.

Ininiã Paoro:

—Sirísia tixinikirirano —itxa.

³⁵ Ininiã Périsi txari:

—Pikamapiretakini apokasaaki, nikemariko pisãkire —itxa.

Ininiã ipaniãtana sotatoakori:

—Erotxini kamakiti aikoti ãki hinĩkatariko Paoro.

24

Paoro Apoĩtiko Pirena

¹ Sĩko õti auakasaaki, sasetotxiakori auĩte apiatakari Ananíasi inakori sari Sesaréia sitatxitimoni. Apoka iuaã kiomãtxiakorikata, kiki Tétoro inakorikata apaka. Iua Tétoro kãkiti ĩkapani kasãkireri kãkiti misiritiko mereẽkari apisatoõ. Ninoa apoka Périsi apisatoõ Paoro apoĩtinina ĩkapani. ² Ninoa apokasaaki, sotato minari Paoro Périsi apisatoõ. Iposo atoko Tétoro akiritaãka isãkirauatini ĩkapani. Ininiã Tétoro apoĩtari Paoro:

—Périsi, apiari pitxaua. Auĩtetxi kimatireri pitxaua, kotxi mapakanani atixine neenamtxi !auari. Mitxi kaiãopokori maerekati kamakori. Uatxa maerekati poiãõãpota, kotxi pite kamari erekari kãkiti ĩkapani. ³ Erekapitikari pikamakiti ate ĩkapani. Ate apokaerekatari. ⁴ Kona ninirekari niomakotetinii pite, ininiãkara nisãkire poiãõka apikomoni nisãpiretai, ininiã pikenakotari nisãkire.

⁵ —Ia kiki !erekari. Pamõõkoniri. Itxĩkitakari Xoteoakori neenamauatini ikini itixiti. Kiki Nasaree sitatxitikiri sãkire auĩãkani auĩte itxaua iua Paoro. ⁶ Teoso misãkiretiko aikoti imapaxitakanisaaki, ate maĩkari iua. Akiomaneakorini oerekini atoko atxamariko Paoro. ⁷ Txamari iusaakipeka sotatoakori auĩte Arísia inakori apoka iuaã. Imaktxakari Paoro itapararitika ate sauaki. ⁸ Eereka Arísia paniãtaua pitemoni ainini. Pite pimaãriko Paoro, ininiã pimarotari asãpiretakiti inipitika inini —Tétoro txari Périsi.

⁹ Iusaaki Xoteoakori iuaã auakani:

—Ari, inipitikara isãkire —itxarina Périsi.

Paoro Sãkire Périsi Apisatoõ

¹⁰ Iposo atoko Périsi paniãtari Paoro isãpirenauatini. Ininiã Paoro: —Nimarotapitikari kona uatxakani ate tixine auakani misiritiko mereẽkari pitxaua. Ininiãkara nota apokaerekatari pitemoni nisãpiretiniri nikamakiti. ¹¹ Tosi õti pakini napakari nisa Xerosareẽmoni Teoso nimisãkiretini ĩkapani. Pipimaãri apanakini atãokani nisãkire. ¹² Nanera !ikenakotari nota txitiniri ãti Teoso misãkiretiko aikoti ãki. Ikininape Xoteo apotiitiniãtaãua aikoti ãki !atamatarina neenamtxi nikamãkitakini. ãtiãtaã apaka !atamatarina nitxĩkitakiniri kãkiti neenamtxi ikaminina. ¹³ Nanera maxikatiĩka kamapiretano nota. !Itikanona nota maerekati nikamini. ¹⁴ Nota auikari Xesosi sãkire. Ia atão. Naneramoni Xesosi sãkire na atão. Nota parĩkauata ate atokiriakorini Teosone ĩkapani Xesosi sãkire nikĩpitakasaaki. Moisesini paniãtakiti apaka nauika. Teoso sãkire sãpiretakanini iõkatsopatakiti apaka nauika. ¹⁵ Nanera auikari Teoso õkitikinina ikininape kãkiti ipĩkani. Erekarini, maerekani apaka õkitikauako iuaĩkana auãki ininina ĩkapani. Nota apaka auikari ikara. ¹⁶ Ikiniõtika ninirekari atãonoka nikamini Teoso ĩkapani, kãkiti ĩkapani apaka.

¹⁷ —Ninapapekari mapakanani ãtiãtaã, eereka nikanapiriã Xerosareẽmoni. Iuaã nisa txineiro ninirimanemoni matxineirotenimoni nanikini ĩkapani. Apaka iuaã ninirekari nisikaenetakiti Teosomoni nisikini. ¹⁸ Nisikaenetakiti Teosomoni nisikasaaki Teoso misãkiretiko aikoti ãki, nikipaãtaua Moisesini oerekakiti iaõka. Iusaaki Xoteoakori Ásia tixinikini itikano nota. Kãkiti apotiitakaniua !auari notakata iusaaki. Neenamtxi !auari iusaaki. ¹⁹ Ninoa itikano. Maerekati nikamaãkamako, kinirepa kona ninoa apoka uai uatxa pite isãpiretinina ĩkapani? ²⁰ Ninoa uai mapokakanisaaki, pipimaãna nanera ikenakotakitina, itikakitina nota Xoteo auĩteakori apisatoõ nauakasaaki. Kipa

atxiíti nimaerekani iuasaaki? Iuasaaki kona nikamari maerekati. ²¹ Atxiíti iuasaaki nanera !apokaerekatari nisãkire, kotxi nitxana: “Nota auikari ipĩkani õkitikiniua, iuaĩkana auãki inini ĩkapani. Ikara nauikakiti sãkiretxiti xika hĩte maĩkano nota.” Atxiíti nanera ! apokaerekatari ikara nisãkire –itxa Paoro sãkire Pėrisimoni.

²² Pėrisi iteene imarotapekari Xesosi oerekakiti sãkiretxiti. Iua misãkiretana ninoa:

–Sotatoakori auĩte Arísia inakori apokapanikako uai. Iuasaakiko nisãpiretari kiãtokopa nitxatari Paoro. Uatxa xipope asãkire –itxa Pėrisi.

²³ Ipaniãtari sotato auĩte poiãori inakari Paoro nĩkatakari tĩkane:

–Pinĩkatariko Paoro. Pauiritariko inirekiniãtaã isini. Pauiritariko inirimane apokini iuamoni. Pauiritariko inirekakiti isikinirina –itxa Pėrisi.

Paoro Sãkirauata Pėrisi, Tosira Pakinikata

²⁴ Mapaõti napa atoko Pėrisi ĩtanorokata Tosira inakorokata apoka Paoro auiniãtaã. Xoteo oa. Pėrisi pĩkapiretari Paoro. Iua apokasaaki, Paoro sãpiretana ninoa Kristo Xesosi sãkire auikiko, ininiã ninoa kenakotari. ²⁵ Paoro sãpiretari Teoso sãkire atão inakari kamiko pirena. Isãpiretari Teoso sãkire ĩtotxi nireẽkiti amakamakani. Isãpiretari kãkiti misiritiko itixi xipokini õti apokasaaki. Ininiãkara Pėrisi pĩkarauata.

–Iaõpe. Pisipe. ãti õti niparĩka mauakanisaaki, iuaĩkana nipĩkapiretai –itxari.

²⁶ Pėrisi nirekari Paoro sikiniri txineiro iuamoni, isikakiniri ĩkapani. Ininiãkara itokata ipĩkapiretari Paoro iuakata isãkirauatini.

²⁷ Ipikanani napa atoko Pó시오 Pėsito inakori auĩtetxi txapekaua, ininiã Pėrisi sipe. Pėrisi nirekari Xoteoakori apokaerekatiniri iua, ininiã isini apisa !isikakari Paoro, ininiã Paoro kaikotapanika kateia ãki.

25

Paoro Amanaãri Sesakata Isãkirauatini

¹ Pėsito aua Sesarėia sitatxiti ipi ãti pakini õti, eereka isari Xerosareẽmoni. ² Iuaã sasetotxi auĩteakori, Xoteo auĩteakori pakini kamapiretari Paoro Pėsitomoni. ³ Ninoa iteene amanaãri Pėsito:

–Pikamariko ate nireẽkiti. Piminariko Paoro uai Xerosareẽmoni –itxana.

Ikara ninoa nireka, kotxi okaenatarina Paoro ipixinipokoriti. ⁴ Txamari Pėsito apakapapiretana:

–Kona, Sesarėia sitatxitikarako aua Paoro. Mapaõti napa atoko nota kanapiriã iuamoni. ⁵ Hinirekiniãri, ãtikaka hĩte sari iuamoni notakata. Iuaã hĩsãpiretari Paoro kamakiti maerekati –Pėsito txana ninoa.

⁶ Pėsito napari ipi semanati Xerosareẽ. Eereka ikanapiriã Sesarėiamoni. Katimat-inĩkata ĩroã aiko kãkiti misiritiko sãpiretikoãtaã. Iuaã ipĩkapiretari Paoro. ⁷ Paoro apokasaaki, Xoteo Xerosareẽkini ãkitari iua. Apoĩtarina iua maerekati kaiãopokori ikamakiti, txamari imaerekani itikakari !auari, kotxi likamari maerekati. ⁸ Eereka Paoro:

–Maerekati na nikama. Xoteoakori aãtokiriakorini paniãtakiti nikamapitika. Teoso misãkiretiko aikoti nipaxitapitika. Homano auĩte paniãtakiti, Sesa inakori paniãtakiti nikamapitika –itxa.

⁹ Pėsito nirekari Xoteoakori apokaerekatiniri iuaka, ininiã ipimaãri Paoro:

–Pinirekatari Xerosareẽ pisini? Iuaãrako nota kenakotariko nanera sãkire, pite sãkire apaka –itxa.

¹⁰ Txamari Paoro:

–Konapitini. Homano nitxaua. !Apakata Xerosareẽ Xoteoakori apisatoõ nisãkire kenakotiko. Uaikara Homanoakori auĩte Sesa nirekari Homano sãkirauatini kãkiti misiritiko sãpiretakani apisatoõ. Erekari uai pikenakotiniri nisãkire. Pite iteene imarotari kona xatiki maerekati nikama Xoteoakorimoni. ¹¹ Ixika auiniã nipinini ĩkapani, maerekati nikaminiã, ininiã apakata nipinini. Txamari nanera na atão apoĩtano nota, ininiã naneramoni nisikanapakiri !auari. Ninirekari Sesamoni nisini –itxa Paoro sãkire.

¹² Ininiã Pésito sãkirauata iua õtãkikakanikata Paoro Sesamoni isini ìkapani. Eereka apakapapiretari Paoro:

–Pite nirekari Sesamoni pisini, ininiãrako iuamonirako pisa –itxari Paoro.

Pésito Sãkirauata Akiripakata

¹³ Mapaõti napa atoko auñtetxi Akiripa inakori apoka Sesaréia itaro Perenisi inakorokata. Ninoa ianapokota Pésitomoni. ¹⁴ Mapaõti napa atoko Pésito sãpiretari Paoro Akiripamoni:

–Uai aua kiki kateia ãki Périsi takakiti Paoro inakori. ¹⁵ Xerosareë napokasaaki, sasetotxi auñteakori, Xoteo auñteakori apaka apoñtari iua. Inirekarina nota paniãtiniri iua okiko. ¹⁶ Txamari nisãpiretana: “Homanoakori kona okari kãkiti ãti apoñtakiti, iua apoñtakiti sãkire imakenakotakani apisa. Merepanika erekari iua apokini iua apoñtakanikata kãkiti misiritiko mereëkari apisatoõ, ninoa sãkire kãkiti misiritiko mereëkari kenakotini ìkapani,” nitxana.

¹⁷ –Paoro omanatakani uai apokasaaki, katimatinìkata niñroã kãkiti misiritiko sãpiretikoãtaã. Iuaã nipìkapiretari Paoro, ininiã iua apoka iua omanatakani apisatoõ. ¹⁸ Ninoa sãkirauata. Apoñtarina Paoro. Niuãkatari ninoa sãpiretiniri maerekati Paoro kamakiti. ¹⁹ Txamari ninoa auiãkiti sãkiretxiti xika ninoa omanatari Paoro. Kiki ipìkari Xesosi inakori xikara apoñtarina. Paoro auikari Xesosi iuaìkana auãki inini. Ninoa ! auikari Xesosi õkitikiniua.

²⁰ –Iusaaki na nimarotari nikamakiti tìkane. Ininiã nipimaãri Paoro: “Na pinirekatari Xerosareë pisini? Iuaã pite apoñtakani, pite pakini kenakotaãkako,” nitxari Paoro. ²¹ Txamari iua apakapapiretano: “Kona. Sesamonira ninireka nisini,” itxano nota. Ininiã notara paniãtari iua kateia ãki ikaikotiniritika niokanatariko Sesamoni – itxa Pésito.

²² Ininiã Akiripa:

–Nota nirekari nikenakotiniri iua kiki sãkire –itxa.

Ininiã Pésito:

–Katanarako pikenakotari iua sãkire –itxa.

Akiripa, Perenisi Pakini Apoka Pésitomoni

²³ Katimatinìkata Akiripa, Perenisi pakini apoka, itomaneri initiriakorikata. Peeremãkapokona. Iñroãna kãkiti apotiitiniãtaãua. Sotato auñteakori, sitatxi auakani auñteakori pakini ìroã. Eereka Pésito pìkapiretari Paoro, ininiã Paoro minaãka. ²⁴ Ininiã Pésito:

–Pite, Akiripa, hñte atekata apotiitakaniua apaka, hãtamataria ia kiki. Ikinimane Xoteoakori uai auakani, Xerosareë auakani apaka !apokaerekataria ia. Isãpiretanona ia maerekati ininiua. Ninoa amanaãno ia okiko. ²⁵ Notamoni maerekati !ikama ia. Notamoni ixika !auari ipinini ìkapani. Eereka ia amanaãno apiari Sesamoni isini, ininiã nota auiritari isini. ²⁶ Txamari !nimarotari ixika niõkatsopatini Sesamoni. Ininiãkara nimirari Paoro hñte apisatoõ isãkire hñkenakotini ìkapani. Akiripa, apiari pitxaua pite, ininiã ninirekari pite sãpiretinino nota niõkatsopatakiti tìkane. Ia hñkenakotaka atoko hñsãpiretano Sesamoni niõkatsopatini ìkapani. ²⁷ !Apakata kateia ãkikiri Sesamoni niokanatinini ixika nimasãpiretakaniã, kotxi Sesa nirekari imarotiniri ikamakiti xika.

26

Paoro Sãkirauatini Akiripa Apisatoõ

¹ Eereka Akiripa paniãtari Paoro:

–Nauiritai pisãpiretiniua pimaìkiko xika.

Ininiã Paoro õkatari iuako isãkire isãpiretini ìkapani. Iposo atoko Paoro sãkirauata, maerekati imakamakani ninoa imarotini ìkapani.

²—Aãuïte Akiripa, notamoni erekari pite apisatoõ nisãpiretiniri Xoteoakori apoïtinino. ³Kotxi pite iteene imarotari ate atokiriakorini oereëkiti, Xoteoakori paniãtakiti. Ininiã namanaã pikenakotiniri nisãkire imakinika.

⁴—Xoteoakori imarotano nota ãtokoripanika ninakasaakia, nitixine nauakasaaki. Eereka Xerosareë nauakasaaki ninoa imarotano. Imarotarina ikiniõtika nauini. ⁵Mixakapokoni ninoa imarotano nota. Imarotarina pariseo nininiãua. Ikara isãpiretaina, inirekiniãna. Kãkiti pariseo inakari iteene auikari ate atokiriakorini oereëkiti sãkiretxiti.

⁶—Xoteoakori uatxa omanatano nota, kotxi nauikari Teoso sikaenetakiti ate atokiriakorimoni apokapeka uatxa. ⁷Ate nirimane, tosi pakini nirimanetxi, iãtapari ikara Teoso sikaenetakiti apokini õti. Ninoa parĩkauata Teoso ãkapani ãkanõka, pokamara pakini. Niauïte Akiripa, ikara Teoso sikaenetakiti xika Xoteoakori maïkano nota. ⁸Kinirepa hïte !auikari Teoso posotiniri ipĩkari õkitikini, iuaïkana auãki inini ãkapani?

⁹—Mitxipeka nota omanatari Xesosi Nasareekiri, hïte omanatiniri atokokana, ininiã nikapokotari isãkire auïãkani. ¹⁰Xerosareë nauakasaaki, nikapokotari isãkire auïãkani. Sasetotxi auïteakori auiritano kãkiti Teoso nakitiakori kateia ãki nitakini. Kaiãopokori nitaka kateia ãki. Xoteo auïteakori nirekasaakiri okinina, nota apaka nirekari. ¹¹Nisari Xoteo apotiitiniua aikotimoni ikininape Xesosi sãkire auïãkani nimisiritini ãkapani. Ninirekari Xesosi sãkire auikiko xipokini. Itene nomanatana, ininiãkara nisari apanakini sitatxitimoni ninoa nikapokotini ãkapani.

¹²—Ikara xika nisari Tamásiko sitatxitimoni. Sasetotxi auïteakori auiritano nisini. Ipaniãtanona Xesosi sãkire auïãkani nimaïkini. ¹³Ipixinipokoriti, apaniãxiti iotximere iaxitikiri apoka notamoni. Atokatxi iotximere poiãoka. Ikara iotximere apiata. Iua iotximere ãki nota nimoianariakorikata aua. ¹⁴Ate iriãkata xitipe. Iuasaakipeka nikenakotari nakiritiko: “Saoro, Saoro,” itxano Epiráiko inakori sãkiretxitiã. “Kixikapa pimisiritano nota? Piteka pimisiritaua, nota pimisiritakasaaki. Atxiïti kema auïteka karotaua ipitikiri aãketeë. Iua kema auïte atoko pitxa,” itxano.

¹⁵—Ininiã nota: “Apiananiri, kiriparai pite?” nitxari.

—Ininiã iua: “Xesosira nota, pimisiritakitikarano nota. ¹⁶Pitima. Nota oerekaua pitemoni, pite nimereini ãkapani, ninitiri pininiua ãkapani. Uatxa pitikakiti pisãpiretako apanakinimoni. Pisãpiretapanikariko ikinimane kãkiti apikomoni noerekakiti tĩkane. ¹⁷Ninĩkataiko pite Xoteo sauaki pauakasaaki, Xoteo minakaniua sauaki pauakasaaki apaka. Xoteo minakonimoni niokanatai pisini. ¹⁸Kãkiti ipiaã sikani atoko itxana, kotxi !imarotarina Teoso sãkire. Mõsiãreni atoko ninoa, kotxi !atamatarina Teoso kimapore. Ininiãkara pitekara oerekanako Teoso sãkire ikimapore imarotinina ãkapani, ipiã itakanapinina, ikamaramoni isinina ãkapani. Ininiãkara !ikamaikari Satanasi paniãtakiti. Teoso paniãtakinoka ikamana eereka. Ininiã ninoa auikariko nisãkire, ininiãkara nota makatxakariko ninoa maerekani. Ininiã Teoso nakitiakori ninoa apaka txauana,” Xesosi txano nota.

¹⁹—Niauïte Akiripa, ikara atoko ininiãra, nikamapekari imakinika Xesosi paniãtakiti, iaxiti iotximere apokasaaki nikenakotakiti. ²⁰Nisãpiretari Xesosi sãkire merepitipanika kãkiti Tamásiko sitatxiti auakanimoni, eereka nisãpiretari Xerosareë auakanimoni. Eereka nisãpiretari ikinimane Xotéia tõpa auakanimoni. Eereka nisãpiretari kãkiti Xoteo minakonimoni. Nisinimoni nisãpireãpotana ninoa: “Himaerekani hïtakanapako. Hãuikariko Teoso sãkire. Erekarinoka hĩkamako, ininiãkara aimarotapitikari maerekati hïtakanapini,” nitxana. ²¹Ikara atoko nitxana ikinimane nisãpiretini. Ikara nisãkire xika Xoteoakori maïkano nota Teoso misãkiretiko aikoti ãki nauakasaaki. Kinirão okaka itxanona. ²²Uatxa nauapanika, kotxi Teoso nĩkatano nota. Ininiã ia õti Xesosi sãkire nisãpireta hïte apiarinimoni, hïte poiãorinimoni apaka. Moisesini sãpiretakiti iaõka nisãpireta. Teoso sãkire sãpiretakani sãpiretakiti iaõka nisãpireta. Ninoa sãpiretari Teoso mereëkiti apokini. ²³Ninoa txari: “Teoso Mereëkiti apokako. Iua misiritaãkako.

Iuakarako ōkitikaua ipinaka atoko. Iuaīkana auāki itxako. Mitxi ipinakari !ōkitikaua. Merepanika iua ōkitikaua. Iuara sāpiretariko Xoteoakori maerekani makatxakiko, Xoteo minakaniua maerekani makatxakiko apaka,” itxana Teoso sākire sāpiretakani. Ninoa sāpiretakiti iaōka nota sāpiretai apaka –itxa Paoro.

²⁴ Paoro ikara atoko inakasaaki, Pésito akiritari:

—Paoro, !kiīkitei. Pimapitxiriāpota iteene papaiaōkarauatini xika –itxa.

²⁵ Ininiā Paoro:

—Niauīte Pésito, kona nimapitxirita nota. Atāopitikara nisākire nikama. Erekarī nisākire. ²⁶ Niauīte Akiripa, pimarotapekari nota sāpiretakiti, ininiā kataparaxinireno nimisākiretinii. Pimarotari Xesosi pirena, kotxi Xesosi ipīkasaaki, kona kipatakoriātaāni ipina. ²⁷ Niauīte Akiripa, pite auikatari Teoso sākire sāpiretakani sākire? Nota imarotari pite auikiniri.

²⁸ Ininiā Akiripa:

—Pite sākire txīkitakaaritano nota Xesosi sākire nauikini –itxari.

²⁹ Ininiā Paoro:

—Teoso imarotari. Ninirekarī pite, hīte hīkinika uatxa nisākire kenakotakani pakini iteene hāuikiniri Xesosi sākire nota auikiniri atokotxikana. Txamari kona nota nirekai hīte kateia āki hāuini nota atoko –itxa Paoro sākire.

³⁰ Paoro sākirauataka atoko auītetxi Akiripa, itaro Perenisi, Pésito, ikinimane ninoakata īkani pakini, itimana. ³¹ Iporikiti ipokīkasaakina, imisākiretakakana:

—!Auari ikira kiki okiko xika. !Auari kateia āki itakiko xika.

³² Ininiā Akiripa txari Pésito:

—Ikira kiki mamanaākaniāri Sesamoni isini, isikakaākapiimako.

27

Paoro Potorika Homamoni Isini

¹ Eereka Pésito sāpiretaua ate iketo apope Itária tixinimoni aīpiriātini. Paoro apanakini maīkakoni apaka sikaāka Xório inakorimoni. Iua Xório seī pakini sotato auīte itxaua. Sesa sotatone itxaua. ² Ate iereētaua maporo āki, Ataramítxio sitatxitikero āki. Ásia tixinimoni sikaro oa maporo. Kiki, Arisitako inakori sari atekata. Iua Tesarónika sitatxitikiri, Masetónia tixinikiri iua Arisitako. Ininiā ate sipe. ³ Katimatinīkata ate apoka Sitoō ioporokoti. Xório tiretari Paoro, ininiā auiritari iua aōkimaneremoni isini iuaā, inirekakiti apakapini īkapani. ⁴ Eereka ate potorika iuaā. Iuasaaki ītima inataparata aāpisamoni, ininiā maporo iopiriāri Xipri pokomiriīti ītima manapakaniātaā. ⁵ Ate īpiriātari potxoari uiniti. Sirísia tixini takote anapa. Pāpíría tixini takote anapa. Ate apoka Miha sitatxiti, Arísia tixiniā. ⁶ Iuaā sotato auīte apokaro maporo Arexātria sitatxitikero, Itária tixinimoni sikaro. Iua iereētakaua ate oa maporo āki.

⁷ Iuaīkana apotorika. Iuasaaki ītima inataparata aāpisatoō, ininiā ianaritika asaāpota mapaōtipeka, ininiā eereka aāpoka Sinito sitatxiti apisatoō. Ītima tapara xika !aposa-taika apikomoni asini anirekinimoni, ininiā aiopiriāri Kreta pokomiriīti ītima manapakaniātaā. Iuaā anapari Saomona pokomiriīti. ⁸ Ianaritika asaāpota imiriī takote. Aāpoka ioporoko “Ioporoko Erekarī” akiritikoātaā, Araséa sitatxiti takote.

⁹ Iuaā aūapokota. Pamonoōkoniri apikomoni asini. Kiiniri Teoso īkapani kākiti manipokotakani inapapeka, ininiā imarotaāka ītima kataparari kaiamapeka apokini. Ininiā Paoro ōtākkikana ninoa:

¹⁰ —Apikomoni asiniā, pamonoōkoniri. Ītima kataparari kasaikamaro maporo atiikata. Kākiti ipinako –itxa Paoro.

¹¹ Txamari sotatoakori auīte !auikari Paoro sākire. Iua auikapiretari kamaporoteri sākire, maporo nīkatakari pakini sākire. ¹² Kaiāopokori maporo āki parīkauatakani txari:

—Ia ioporoko kona erekari mitaā anapini. Masa apikomoni. Atxiīti aposota Penisī sitatxitimoni aāpokini. Iuaā manapakakari mitaā –itxana.

Penisi sitatxiti Kreta inakori pokomiriĩti ioporokoti. Atokatxi ereẽkokini manapi aua Penisi sitatxiti.

Ītima Kataparari Pirena

¹³ Iuasaaki Ītima poiãoka apokaãpota ate tikinimoni, ininiã ninoa uãkatari:

—Uatxaika erekapekari Penisi sitatxitimoni asini —itxana.

Ininiã õtanõkarina kai, maporo maĩkiko, ininiã poterika atxa. Kreta miriĩti takote anapaãpota. !Anirekari potxoari uiniti apanĩkakiã asini, kotxi pamonõkoniri iuaã.

¹⁴ Txamari patimari Ītima iteene inataparata Kreta pokomiriĩtikiri. Ītima uãka “Atokatxi Pokĩkinimonikiri.” ¹⁵ Ininiã Ītima apoka maporomoni. Pataparari. !Aposotari Ītima ininimoni asini, ininiãkara aãuiritari Ītima anikiniro maporo Ītima sinimoni. ¹⁶ Aiopiriãri Kaota inakori pokomiriĩti. Iua pokomiriĩ xapitiri. Iua pokomiriĩti Ītima kimaporeẽ aua, ininiã iuasaaki pokomiriĩ anapakasaaki Ītima poião taparata, ininiãkara aõtanõkaro kanaua maporo kapokiãmonikiri. ¹⁷ Akosekaãpotari kanaua maporo ãki aeretakini ĩkapani. Ininiã ninoa iapiripoataro maporo aãpitsaã Ītima katakakitapetiniri monõkoni. Ninoa pĩkari Ītima anikiniro maporo ĩkipatxite apanĩkakiãkirimoni. Iua ĩkipatxite Arĩpia tixini takote. Ininiã ikaxitkarina mãkatxi mata maporo aniãkari. Mãkatxi mata kaikotiniã maporo nopini, patimaua Ītima anikiniua. Ikara atoko ininiã, auiritarina Ītima anikiniua. ¹⁸ Ītima inataparatanpanika, ininiã katimatinĩkata ninoa okaãpotari tiitxi maporo ãki auakari potxoari uinitimoni maporo sakikini monõkoni. ¹⁹ Katimatinĩkata okarina maporo tii potxoari uinitimoni.

²⁰ Mapaõti !aãtamataikari atokatxi. !Aãtamataikari iõriki. Ītima inataparatanpanika, ininiã auãkatari apinini.

²¹ Mapaõtipeka maporo ãki parĩkauatakani kona inikaikana. Ininiã Paoro misãkiretana:

—Kinirepa hĩte kona kĩpitari nisãkire? Kinirepa hĩte takanapari Kreta pokomiriĩti? Hĩkĩpitaãkamariko nõtãkikini, tiitxi kona hõkamako. ²² Iuaritika kataparaxinire hĩtxako. Nisãpiretai, kona kãkiti !ipina. Maporonanira sakika. ²³ Nota Teoso nakiti nitxaua. Iua ĩkapani niparĩkauata. Minipani iua nitiri iaxitikiri oerekaua notamoni. ²⁴ Teoso nitiri akiritano: “Paoro, !pipĩkarauatape. Pite apokapitikako Sesa apisatoõ. Peerekari Teoso. Itiretai pite, ininiãkara ninoa pitekata sikani !ipinapani,” itxano. ²⁵ Ininiã kataparaxinire hĩtxako, kotxi nota auikari Teoso sãkire. Ikamapitikariko nisãpiretinii iaõka. ²⁶ Ītima okaroko maporo ipokomiriĩ —itxa Paoro sãkire ninoamoni.

²⁷ Ipi semanati Ītima inataparata. Anikaro maporo potxoari uiniti Metxiteháneo inakori ĩpiriãtini. Eereka apanĩkanõka maporo ãki parĩkauatakani uãkatari imiriĩ takotepeka aãpokini. ²⁸ Ininiã ninoa okari kai iokaritsaã ĩpanaã imarotinina ĩkapani. Trĩta seisi metro ĩpanaã. Eereka apikomoni iaõtarina ĩpanaã, vĩtxi setxi metronoka. ²⁹ Ininiã ĩpĩkarauatana maporo kai mitarimoni oãpokini monõkoni. Ininiã maporo kapokiãmoni ikaxitkarina ĩpi ĩpi pakini kai iokaritsaã maporo maĩkiko. Eereka imisãkiretarina Teoso paĩtiki ikatimatini ĩkapani. ³⁰ Maporo ãki parĩkauatakani nirekari maporo itakanapinina. Iokatxakarina kanaua potxoari uinitimoni. Ninoa txaua:

—Iuaĩkana kai aiokatxaka uai maporo ĩkiinaã.

Txamari na atão isãkirena. Inirekarina maporo itakanapinina kanaua ãki. ³¹ Iuasaaki Paoro txana sotato auĩte, sotatoakori pakini:

—Nakira kikiakori maporo ãki makaikotakaniã, hĩte ĩpinako —itxa.

³² Ininiã sotatoakori tsotakari aãpitsa kanaua maĩkakari, ininiã Ītima anikari iua kanaua.

³³ Iuasaaki imaropirĩkata. Paoro õtãkikana ĩkinimane ĩpokotini ĩkapani:

—Ipi semanati hiãtapanãtari Ītima napini. Ipi semanati hĩteni kona xatiki hinipokota.

³⁴ Ininiã hinipokotako uatxa, hĩtapara apokini ĩkapani himapinakanani ĩkapani. Hĩkarotiko ! auapani. Hiãko ãtika kona katxakapani —itxa.

³⁵ Eereka Paoro kosekari komiri. Ikinimane apisatoõ isãkirauata Teosokata. Iposo atoko imapixinikari komiri poriĩ, nika itxari. ³⁶ Ininiã ikinimane kataparaxinirepe itxana, ininiã inipokotana. ³⁷ Tosẽtosĩ setẽta seisi pakini kãkiti maporo ãki auakani iusaaki. ³⁸ Iteene inipokotakana atoko, okarina triko potxoari uinitimoni maporo poana onini ìkapani.

Maporo Sakikini Pirena

³⁹ Katimatinĩkata maporo ãki parĩkauatakani atamatarĩ imiriĩ, txamari !imarotarina itixi uãka. Atamatarina ikipatxite, ininiã ninoa:

—Iuaã kipatxi nopini maanikaro maporo, aposotiniã —itxana.

⁴⁰ Ininiã itsotakarina aãpitsa maporo tsapi. Kai kaikota ipatapiã. Ikoxirikarona aãpitsa mekotxi maĩkiko, maporo oerekaãtiko. Iposo atoko õkitikarina mãkatxi mata maporo ìkiiãtinimoni auakari, ikipatxitemoni maporo ìtima anikini ìkapani. Ininiã ikipatxitemoni asaãpota. ⁴¹ Txamari ipixinipokoriti maporo atxapaã ikipatxite nopini. Maporo ìkiiãtinimoni atxapaã. !Osaika. Tsakati kataparari xika maporo kapokiãtinimoni txirakiãpota.

⁴² Sotatoakori kinirão okaka txana ikinimane maĩkakoni. !Inirekarina ninoa mitekini imiriĩmoni anokinina. ⁴³ Sotatoakori auĩte !inirekari Paoro okiko, ininiã !auritana. Ipaniãtana ikinimane:

—Himarotiniãri hanokini, ininiã hĩte merepanika hĩkomokako. Hanoka ikipatxitemoni. ⁴⁴ Eereka, hĩte mimataanoreni hĩkomokako. Himaĩkariko maporo txirata, ininiã hanoka ikipatxitemoni —itxana.

Ikara atoko aniniã, amakinika aãpoka ikipatxitemoni.

28

Máota Pokomiriĩti Pirena

¹ Imiriĩpekaua amakinika, eereka aimarotari Máota inakori pokomiriĩti aãpokini. ² Iuaã auakani apakapaua ipoxokoniritikana. Iusaaki ãparaã potorika ikipini. Áparaã kipini xika patxĩkareri, ininiã iuaã auakani kamari xamina, ate irokini ìkapani. ³ Iusaaki Paoro apaka apotiitari xamina. Xamina pokiã itakasaakiri, xamina pataka õpõkikari imini xamina iriko ãki auakari. Akatsatari Paoro uako. ⁴ Ninoa ipokomiriĩ auakani atamatarĩ imini Paoro uakoã iarõkini. Ininiã imisãkiretakakana:

—Ikira kiki kokaniri atxiĩti. !Ipina potxoari uiniti, iuaritika inapakakiniri !auari. Uatxaika ipinapitikako —itxakakana.

⁵ Paoro ìkokari imini xamina pokimoni arikini ìkapani. !Katsiiri iuamoni. ⁶ Ninoa iãtapanãtari iuako ananapoatini. Iãtaparina iua mokatanitika ipinini. Mapa oara napa atoko !ipina, ininiã ninoa:

—Kona kokaniri ikira. Teoso itxaua —itxanãtana.

⁷ Iuaãtaã takote aua kikio Pópirio inakori nakiti. Máota pokomiriĩti auakani auĩte itxaua. Iua apakapaua ate ipoxokoniritika. Akaikota iua aapoko ipi ãti pakini õti.

⁸ Iusaaki iri sirĩkanãta. Apoomata. Itikanãta. Ininiã Paoro sari iuamoni. Akiritari Teoso iua ereka inini ìkapani. Itakari iuako inopini. Iusaakipeka erekapeka itxa iua. ⁹ Eereka amianatakani iua pokomiriĩti auakani sari Paoromoni, ininiã iua makananitana ninoa.

¹⁰ Ninoa sikaua tiitxipokoni. Apotorikasaaki ãto maporo ãki, isikauana imakinika anireẽkiti.

Paoro Homa Sitatxiti Isini

¹¹ Ate napari ipi ãti pakini kasiriti iuaã. Eereka aiereẽtaua maporo ãki, Arexãtria sitatxitikero ãki. “Itaritxi Ipi” akiritaãka maporo uãka. Mitaãsaaki oa maporo kaikota Máota pokomiriĩti. ¹² Apotorika iuaã. Eereka aãpoka Sirakosa inakori sitatxiti. Iuaã akaikota ipi ãti pakini õti.

¹³ Eereka iuaĩkana maporo potorika. Aãpoka Héxio sitatxiti. Katimatinĩkata ĩtima atikinimonikari ina, ininiã patimari asini. Katimatinĩkata aãpoka Posoori sitatxiti. ¹⁴ Iuaã aõkitana kãkiti, Xesosi sãkire auiãkani. Ninoa amanaãua ãti semanati anapini ninoakata. Eereka iuaĩkana aiereẽtaua maporo ãki. Iuaĩkana apotorika. Homa sitatxiti aãpoka.

¹⁵ Xesosi sãkire auiãkani, Homa auakani, kenakoenetari aãpokaenetini, ininiã inana ate aõkitinina ĩkapani. Apanakini aõkitaua ate kienatxi amotikoãtaã takote, Ápio inakoriãtaã takote. Apanakini aõkitaua ate kãkiti imakiniãtaã, “Ipi ãti Aapokotxiti” inakoriãtaã. Paoro aõkitakasaakina ninoa, ipoxokoniuta.

—Peerekari Teoso, kotxi naia inari notamoni —itxa Paoro.

Homa Sitatxiti Paoro Apokini

¹⁶ Homa sitatxiti aãpoka atoko, Paoro auiritaãka inirekiniãtaã auini. ãtika sotato kaikotapika iuakata isinimoni imarotini ĩkapani.

¹⁷ Ipi ãti pakini õti napaka atoko, Paoro pĩkapiretana Xoteoakori auĩteakori. Ninoa apotiitakasaakia, Paoro misãkiretana ninoa.

—Nitariakori, !nikamari maerekati Xoteoakorimoni. Nauikapitikari akiomaneakorini oerekakiti sãkiretxiti. Iuaritika nimaĩkaãka Xerosareẽ. Nisikanapaãka Homanoakorimoni. ¹⁸ Homanoakori pimaãno nimaĩkiko xika. Eereka inirekarina isikakinino, kotxi ninoa imarotari ixika !auari nipinini ĩkapani. ¹⁹ Txamari Xoteoakori !inirekari Homano sikakinino, ininiãkara nakiritari Sesa nisãkire ikenakotini ĩkapani. !Ninirekari nimisãkirepiretiniri ninirimane Xoteoakori. ²⁰ Ikara atoko ininiã, nipĩkapiretai hĩte nimisãkiretini ĩkapani. Teoso mereẽkiti sãkire, Xoteoakori iãtapakiti sãkire nauikini xika, nota maĩkaãka.

²¹ Ininiã ninoa:

—Ate !apakapari iõkatsopari Xotéia tõpakiri pite maerekani pirena. Aĩtariakori iuaã ĩkani !iminapiretari maerekati pikamakiti pirena. ²² Ate nirekari akenakotiniri pite auiãkiti sãkiretxiti, kotxi akenakoenetapekari apanakini sãkire: “Xesosi sãkire na atão” —itxana ninoa.

²³ Ininiã ninoa ketotari ãti õti Paorokata aõkitakakinuana. Iketotiniri manapi ito-maneri kãkiti sari Paoro auinimoni. Paoro ĩkanõkapanika sãkirauatapitipo. ĩkanõkapeka auakapanika isãpirenauatini. Isãpiretana Teoso auĩtetxi ininiãua.

—Atão Teoso ãkiripitikara Xesosi —itxa Paoro sãkire.

Isãpiretana ninoa Moisesi iõkatsopatakiti, Teoso sãkire sãpiretakani iõkatsopatakiti apaka, atão Teoso ãkiripitikara Xesosi ininiua ninoa imarotini ĩkapani. ²⁴ Apanakini auikari Paoro sãkire. Apanakini !inirekari auikinirina Paoro sãkire. ²⁵ Ininiã ninoa taparakien-atakakaua Xesosi sãkire auikakani mauikarenikata. Ipotorikinina apisa, iuaĩkana Paoro misãkiretana ninoa:

—Erekari Matamatakoti sãkirauata atão hinirimanekata kitxakapirĩka. Ipaniãtari Teoso sãkire sãpiretakari Isaía inakori isãpiretiniri Teoso sãkire hinirimanemoni. ²⁶ Itxari: Hĩsa kãkitimoni. Hĩsãpiretanako ninoa: “Hĩkenakotari nisãkire ãtipirika, txamari !hinirekari himarotiniri nisãkire. ãtipirika hĩtikari nikamakiti, txamari !hinirekari hãuikiniri nota kaminiri ia atoko inakari.”

²⁷ Kotxi kãkiti ãkixinireẽ !inirekarina imarotinirina nisãkire. !Inirekarina ikenakotinirina nisãkire. !Inirekarina itikinirina nikamakiti. Inirekiniãrina, itikapitakarina nota kamakiti. Inirekiniãrina, atão ikenakotarina nisãkire. ãkixinireẽna imarotaãkamariko nota sãkire, inamanako notamoni, ininiã nota txĩkitakamanako ninoa ereka ininina,

itxa Teoso sãkire.

²⁸ Paoro sãkirauata iuaĩkana ninoakata:

—Ninirekari himarotiniri Teoso iokanapirena erekari kãkiti maerekani makatxakiko pirena iokanapiretaãkapeka Xoteo minakonimoni. Ninoakara auikapitikariko Teoso sãkire.

²⁹ Ikara Paoro sãpiretaãka atoko, ninoa Xoteoakori sipeka. Isikasaakina, iteene itaparakienatakakauana Paoro sãkire ikenakotinina xika.

³⁰ Paoro kaikota iuaã ipi anokanani. Iikitxitari kaapokori iua aapoko Paoronoka auini ïkapani. Paoro ipoxokoniritika apakapana ikinimane iuamoni sikani. ³¹ Isãpiretana ninoa Teoso auñtetxi ininiãua. Oerekana ninoa Xesosi, Teoso mereẽkiti ininiãua, Apiananiri ininiãua. Isãkirauata itaparaxinireritika kãkitimoni. Auiritaãka ikinipoko imarotakiti isãpiretini.

HOMANO Paoro Iokanatsopatakiti Homa Auakanimoni

¹ Nota Paoro iokanatsopata hĭtemoni. Xesosi Kristo nitirikarano nota. Teoso mereĕno nota iua iokanatakiti kăkitimoni nininiua ĭkapani. Iua akiritano nota, Teoso iokanapirena erekari kăkitimoni nisăpiretini ĭkapani. Ikara parĭkatxinoka inireka nikamini. ² Kitxakapirĭka Teoso săkire săpiretakani săpiretaua Teoso sikaenetakiti, iua iokanapirena erekari. Teoso săkire iōkatsopatakoriă ikara atatsopataăka.

³ Ia Teoso iokanapirena erekari săpiretaua aăuĭte Xesosi Kristo Teoso ākiri ininiua. Kăkiti itxapekaua. Iuasaaki Tavii apika mekaniri itxaua. ⁴ Iuaritika Teoso ākiri itxaua. Erekari Matamatakoti oerekari kăkiti Teoso ākiri ininiua Xesosi, kotxi ōkitikari Xesosi ipĭkaripeka. Iuaĭkana aua itxa. Ikara posotiiretxi apiari oerekari kăkiti Xesosi Teoso ākiri ininiua. ⁵ Xesosi Kristo sikaua ikinipoko erekari. Ininiă iokanataua ikini itixitimoni, kăkiti isăkire asăpiretini ĭkapani, isăkire auikinina ĭkapani, isăkire iaōka ikaminina ĭkapani. Ikara atoko aparĭkauata Kristo ĭkapani.

⁶ Hĭtepekana, Teoso akiritai hĭte apaka Xesosi Kristo nakitiakori hininiua ĭkapani. ⁷ Ininiă nota iokanatsopata hĭtemoni Teoso tirketakinimoni, Homa sitatxiti auakanimoni. Teoso akiritai hĭte iua nakitiakori hininiua ĭkapani. Aĭri Teoso, Apiananiri Xesosi Kristo apaka sikari ikinipoko erekari hĭtemoni. Ikamaerekaxiniretai hĭte.

Paoro Nirekari Isini Homa Auakanimoni

⁸ Merepanika nitxari niTeosone: “Erekapitikai, kotxi Homa auakani iteene auikari pisăkire. Ikini tōpati auakani kenakopiretari ninoa auikiniri pisăkire,” nitxari Teoso Xesosi Kristo uăkaă. ⁹ Nisăkirauatakasaaki Teosokata, nimisăkiretari Teoso hĭte ĭkapani. Ātipirika nimisăkiretari Teoso hĭte ĭkapani. Teoso imarotari ikara nisăkire atăo inini. Nota parĭkauata Teoso ĭkapani. Iuanoka ninireka nikamini. Nisăpiretari iua iokanapirena erekari imi pirena kăkitimoni. ¹⁰ Nimisăkiretakasaakiri Teoso, nitxari: “Pauiritiniăno, ninirekari paĭtiki Homa auakanimoni nisini. Mitxi ! apakata ninoamoni nisini. Pinirekiniări iuaă nisini, pimoianatano ninoamoni napokini ĭkapani,” nitxari. ¹¹ Iteene ninirekari naōkitinii hĭte, kotxi ninirekari Teoso kamataparatiniri hăkixinire nisăkireĕ. ¹² Ininiă nota kamataparaxiniretaiko hĭte, kotxi himarotari nota iteene auikiniri Xesosi săkire. Apaka hĭte kamataparaxiniretano nota, kotxi hĭte apaka iteene auikari Xesosi săkire.

¹³ Nitariakori, ninirekari himarotiniri itokatapiĭma naiamatama hĭtemoni nisini ĭkapani, txamari iuasaaki ! apakata nisini. Itomaneri kăkiti Xoteo minakaniua ātiătaă auakani auikari Xesosi săkire. Ininiă iua atokotxikana ninirekari kaiăopokori kăkiti hĭte sauaki auakani apaka auikiniri Xesosi săkire. ¹⁴ Nisăpiretari Teoso săkire ikininapemoni. Nisăpiretari sitatxi auakanimoni. Nisăpiretari ĭtopa auakanimoni apaka. Nisăpiretari iōkatsopari imarotakanimoni. Nisăpiretari iōkatsopari mimarotakanimoni apaka. Ikara niparĭka. ¹⁵ Ininiă iposope nitxa nisăpiretiniri Teoso iokanapirena erekari hĭte Homa sitatxiti auakanimoni apaka. Ikinika nitaparaă nisăpiretai.

¹⁶ Na nipĕtauata Kristo iokanapirena erekari nisăpiretinii, kotxi iua iokanapirena oerekaua Teoso posotiire iua săkire auĭăkani maerekani imakatzakini ĭkapani. Kaposoti-ireri iua, ininiă imakatzakari ikinimane maerekani, iua săkire auĭăkani maerekani. Ikara ikaminana Xoteoakori merepanika. Eereka ikaminana Xoteo minakaniua apaka.

¹⁷ Teoso iokanapirena erekari săpiretaua Teoso txĭkitakiniri kăkiti atăo inakaranoka ikamini. Teoso săkire auikikoănokara, kăkiti txĭkitakaăka atăo inakaranoka ikamini. Teoso săkire iōkatsopatakori txari:

Kăkiti atăo inakaranoka kamakani auini erekari, kotxi ninoa auikari Teoso săkire.

Kākiti Kamakiti Maerekati

¹⁸ Teoso iaxiti auakari oerekaua iua omanākarauatini kākiti maerekani xika, ininiākara iua misiritariko kākiti, kotxi kākiti !inirekari Teoso paniātakiti ikamini. Ikamarina maerekatinoka. Maerekati ikamakasaakina, ikipatarina atāo inakari. ¹⁹ Kākiti ikara atoko inakani Teoso misiritanako ninoa, kotxi apakata ninoa atamatiniri iua kamakiti. Teosora oerekapekari ikamakiti kākitemoni iua imarotinina ikapani. ²⁰ Teoso kamari itixi, ininiā kākiti atamatakasaakiri Teoso kamakiti, imarotari kiātokopa itxa Teoso. Matamatakoti itxaua Teoso, iuaritika kākiti atamatakasaakiri ikamakiti, imarotari iua posotiire auapika inini. Imarotari iua Teoso ininiua. Kākiti imarotari ikara atoko inakari itxaua Teoso, iua kamakiti atamatakasaakina. Ininiākara kākiti imarotapitikari Teoso auini. Ininiākara na atāo kākiti sākire: “Na nimarotari Teoso auini inini.”

²¹ Kākiti imarotari Teoso auini, iuaritika !isāpiretarina Teoso: “Atāo Teoso pitxaua,” !itxarina. !Isāpiretarina Teoso: “Erekapitikari pikamakiti ate ikapani,” !itxarina. !Kiikitena. !Imarotaikarina atāo inakari, kotxi ākixinireēna maerekatinoka aua. ²² Ninoa sākire: “Kimaroreua ate,” txamari !kiikitena. ²³ Teoso mapinakatimoni !itxana: “Pitenokara Teoso txaua,” !itxarina. Kākiti ipinapitika, iuaritika kamakori kākiti atoko inakari imisākiretana: “Pite ateosone,” itxana. Kamakori kotipiriki atoko inakari, kamakori pirātxi atoko inakari, kamakori imini atoko inakari pakini ninoa misākireta: “Hīte ateosone,” itxana.

²⁴ Ininiākara Teoso takanapana ninoa. Auiritana maerekati ikaminina ākixinirena nirekaākiti. Itxiko atoko itxa imaerekanina iītona nireēkiti. Ninoaka na paxitauana iītona, kotxi āti sirīka ātikata. ²⁵ !Inirekarina auikinirina atāo inakari Teoso sākire. Inirekarina auikinirina atāo minakati. Teoso kamakitimoni itxana: “Pite ateosone. Aparīkauata pite ikapani,” itxana. Ikinipoko kamakarimoni !itxana: “Pite aTeosone. Aparīkauata pite ikapani,” !itxana. Atāo inakari kamakani ātipirika txari ikinipoko kamakari: “Peerekai pite.” Ameē.

²⁶ Ikara kākiti maerekani xika, Teoso takanapana ninoa. Auiritana maerekati kākiti kapēta txīkitaākari, iītona nireēkiti ikaminina. Ininiā sito na nirekaikari kikikata osirīkini. Sito nirekari āto sitokata osirīkini. !Apakata. Ikara maerekati itxaua. ²⁷ Iua atokokana kiki !inirekaikari sitokata isirīkini. Kiki nirekari āti kikikata isirīkini. !Apakata. Ikara maerekati itxaua. Ininiākara iītona misiritaākako imaerekanina xika.

²⁸ Ninoa imaroreē !inirekarina imarotinirina Teoso, ininiā Teoso takanapana. Auiritana ixinikinirina atāo minakati. Maerekatinoka ixinikakitina, ininiā ikamarina atāo minakati. ²⁹ Ākixinireēna aua ikini sereti maerekati. Iītona nireēkitinoka ikamana. Ātipirika ikamapikarina maerekati. Apanakini nakiti tiitxi atamatakasaakina, inirekarina. Ikamarina maerekati apanakinimoni. Ākixinireēna ixikotarina āti. Kokaniri itxauana. Ineenamauatapikana. Apanakini imisirienetana. Ixinikarina apanakini kamakiti maerekatinoka. Aāpirena ikamana. ³⁰ Imisākirepiretarina āti. Omanatarina Teoso. !Ipaxitarina apanakini imisākiretakasaakina. Iuikauana. Ātipirika: “Paimatireua ate,” itxanātana. Ixinikapikarina: “Natokopa itxa apikomoni maerekati akamini.” !Ikīpitarina iri paniātakiti, inoro paniātakiti pakini. ³¹ !Kiikitena. !Ikamarina ikamaenetakitina. !Itiretarina inirimane. !Inirekarina neenamati ixipokinina. !Iamonīkana apanakini. ³² Teoso sākire txari: “Kākiti ikara atoko inakani ipinapitikako. Ninoa ipinini atāo.” Ikara Teoso sākire imarotapiikamana, iuaritika ikamapanikarina ikara maerekati. Apaka apokaerekatarina apanakini, maerekati ikamakasaaki.

2*Teoso Misiritari Maerekati Kamakani*

¹ Atxiīti hīte txari: “!Erekana ninoa, kotxi ninoa kamari maerekati,” hītxa. !Apakata ikara atoko hinini, kotxi hīte apaka kamari maerekati ninoa kamakiti atokotxikana. Ininiā !apakata kākiti akiritiniri āti kākiti maerekati kamakari ininiua. ² Apakatapitika

Teoso akiritiniri kākiti maerekati kamakari ininiua, kotxi iua imarotari atāo. Ininiā maerekati kamakari apakapari atāo imisiritiko imaerekani iaōka. ³ “Ninoa maerekati kamakani misiritaākako,” hinakasaaki, hīxinikari hīte apaka kamari maerekati ninoa kamakiti atokotxikana. Ininiā hīte apaka !hinapakapaniri Teoso misiritinini hīte. ⁴ Atxiīti na hīte maākatari Teoso, kotxi hīte txari: “Teoso katiraōkiri itxaua,” hītxa. Atxiīti na himaākatari Teoso, kotxi iusaaki !imisiritapanikai hīte. Atxiīti na himaākatari Teoso, kotxi Teoso ātipirika mīteenekai hīte. Teoso nirekari hītakanapiniri maerekati hīkamakiti, erekarinoka hīkamini iġapani. Ininiā iua tiretai hīte. Ikara hīte imarotamako.

⁵ Txamari hīte paikoxinirei. Na hinirekari himaerekani hītakanapini. Ininiā himisiritiko apiaāpotako. Kākiti misiritiko ōti apokasaaki, Teoso misiritapitikaiko hīte. Iusaaki kākiti imarotariko Teoso omanākare imaerekani xika, kotxi Teoso atāo imarotari kākiti kamakiti. ⁶ Ikamakiti erekari ininiāua, Teoso sikari erekari iuamoni. Txamari ikamakiti maerekati ininiāua, Teoso misiritariko iua. ⁷ Aua kākiti ātipirika erekari kamakani. ! Isāpaka erekari ikamini. Inirekarina Teoso: “Erekapitikai,” ininina. Inirekarina Teoso paxitinina. Inirekarina auinina ātipirika. Kākiti ikara atoko inakani Teoso txīkitakana ātipirika auinina iġapani. ⁸ Apanakinipekana kamari inireēkitinoka. !Inirekarina atāo imarotinina. Maerekatnoka inirekana ikaminina. Teoso omanatana kākiti ikara atoko inakani. Teoso misiritanako ninoa. ⁹ Ikinipoko kākiti maerekati kamakani maxikaākako. Atatsiirauatako. Merepanika Xoteo misiritaākako, eereka Xoteo minakaniua apaka misiritaākako. ¹⁰ Teoso txanako kākiti erekari kamakani: “Erekapitikai hīte.” Ikara atoko itxanako merepanika Xoteoakori, eereka Xoteo minakaniua apaka. Teoso paxitanako ninoa. Ikamaerekaxiniretanako. ¹¹ Teoso misiritana ikini kākiti maerekati kamakani. ! Auiritari apanakini maerekati kamakani napakakiniri imisiritikona. Apanakini maerekati kamakani imisiritini atokokana, imisiritari ikinipoko maerekati kamakani.

¹² Xoteo minakaniua !auari Moisesi sākire Teoso paniātakiti iōkatsopatakori. Ninoa kamari maerekati, ininiā Teoso paniātakiti imimarotakanisaaki ipinana. Xoteoakori aua Teoso paniātakiti iōkatsopatakori. Ninoa apaka kamari maerekati. Ininiā Teoso misiritana ninoa, isākire iōkatsopatakori iaōka imakamakani xika. ¹³ Teoso kamaerekatari isākire iaōka kamakani. Pikenakotakasaakiri Teoso sākire, txamari !pikamari isākire iaōka, iusaaki Teoso !ikamaerekatai pite. ¹⁴ Xoteo minakaniua !auari Teoso sākire iōkatsopatakori. Iuaritika atxiīti ikamarina Teoso paniātakiti iōkatsopatakori iaōka, kotxi ikamarina ākixinirena sākire iaōka. !Auari Teoso sākire iōkatsopatakori ninoamoni, iuaritika Teoso paniātakiti auape ākixinireña. ¹⁵ Teoso paniātakiti iaōka ikamakasaakina, oerekarina imarotirinina atāo inakari ākixinireña. Ākixinirena sākire sāpiretana atāo. Ātikata itxana: “Pite kamari maerekati. !Apakata.” Ātikata erekari ikamakasaakina, “Pite kamari erekari. Erekapitikari.” Itxa ākixinirena sākire. ¹⁶ Kākiti kamakiti imarotiko ōti apokako. Iusaaki Teoso paniātariko Xesosi Kristo sāpiretiniri kākiti kamakiti. Kākiti kamakiti apanakini mimarotakinini apaka isāpireta. Iusaaki isāpiretari kākiti misiritiko imaerekani xika. Teoso iokanapirena erekari nisāpiretakiti oerekapekari ikara atoko inakari.

Xoteoakori Auari Teoso Paniātakiti Iōkatsopatakori

¹⁷ Hītepekana, hīte txari: “Ate Xoteo atxaua. Teoso apakapapitikaua ate, kotxi isikari ipaniātakiti iōkatsopatakori atemoni. Atenoka Teoso anaakori atxaua,” hītxa. Ininiā hīteka iuikaua. ¹⁸ Hīte imarotari Teoso nireēkiti hīkamini. Himarotari Teoso paniātakiti iōkatsopatakori, ininiā himarotari erekari apiari hīkamini. ¹⁹ Hītxari: “Atera oerekari Teoso kimapore, ikimapore mimarotakanimoni. Mōsiāreni atoko itxana ninoa,” hītxa. “Ate imarotari Teoso sākire, ininiā ate imarotari apanakini aōerekini. Ininiā ate tirikapi atoko atxaua. Apanakini ipiā sikani atoko itxana ninoa.” Ikara atoko hītxa hīte. ²⁰ Hītxari: “Koerekarerini atxaua. Kākiti miīkiteni oereēkani atxaua. Ate oerekari

kākiti poiāo imarotakani. Ate imarotari ikinipoko. Aimarotari atāo, kotxi Teoso sākire iōkatsopatakori aua atemoni.” Ikara atoko hītxa hīte. ²¹ Hīte Xoteo inakaniua oerekari apanakini. Kinirepa kona hīteka oerekaua apaka? Hīte ōtākikari apanakini: “!Pīitiriuatape”. Kinirepa hīte na takanapari hīitiriuatini? ²² Hīte ōtākikari apanakini: “!Pisirīkape pītanoro minakotokatika.” Kinirepa hīte apaka sirīka hītanoro minakotokatika? Hīte omanatari teoso kamakori, ininiā kinirepa hītirīkari ninoa teosone aikoti tii? ²³ Hīte iuikaua, kotxi Teoso sākire iōkatsopatakori aua hītemoni, txamari apanakini na paxitari Teoso hīte xika, kotxi kona hīte kamari Teoso sākire iaōka. ²⁴ Teoso sākire iōkatsopatakori txari:

Hīte Xoteo xika, Xoteo minakaniua misākirepiretari Teoso, itxa Teoso sākire iōkatsopatakori.

²⁵ Teoso takaōtxikare aua hītoā. Teoso paniātakiti hīkaminiā, erekapitikari Teoso takaōtxikare hītoā auini. Teoso paniātakiti iōkatsopatakori himakamakaniā, Teoso takaōtxikare mauakiniti atoko hītchaua. ²⁶ Xoteo minakatiua, Teoso takaōtxikare iītoā mauakini, Teoso sākire iaōka ikaminiā, Teoso txariko: “Iua Xoteo atokotxikana itxa. Nitakaōtxikare iītoā auakiti atokotxikana itxaua.” ²⁷ Hīte Xoteoakorimoni aua Teoso paniātakiti iōkatsopatakori, iuaritika !hīkīpitari Teoso sākire. Teoso takaōtxikare auapitikama hītoā, iuaritika !hīkīpitari Teoso sākire. Xoteo minakaniua !auari Teoso takaōtxikare iītoāna, iuaritika ninoa kamari Teoso paniātakiti iōkatsopatakori. Ikara atoko ininiā, ninoa oerekai himaerekani.

²⁸ Kiripa atāo Xoteo? Kiripa Teoso nakiti txataua? Kirimonipa aua Teoso takaōtxikare atāo inakari? Teoso takaōtxikare iītoā auakini, na ikinikani atāo Xoteo itxauana. ²⁹ Teoso paniātakiti iōkatsopatakori !oerekaua Teoso nakiti aniniua. Xoteo atāo inakariua, Teoso nakiti itxaua ākixinireē. Teoso takaōtxikare aua iua ākixinireē. Erekari Matamatakoti takari Teoso takaōtxikare iua ākixinireē. !Inirekari kākiti iuikiniri. Inirekari Teoso iuikiniri.

3

Teoso Kamari Ikamaenetakiti

¹ Atxiīti hīte txano nota: “Teoso apakapari Xoteo. Teoso apakapari Xoteo minakaniua apaka, ininiā !apiaerekata Xoteo aniniua. !Apiaerekata Teoso takaōtxikare aītoā auini.” Atxiīti ikara atoko hītcha. Txamari na atāo. ² Apiaerekatapitika Xoteo aniniua, kotxi Teoso merepitipanika sāpiretari iuaka sākire Xoteomoni, ninoa iōkatsopatiniri īkapani, inīkatinirina īkapani. ³ Iuaritika apanakini Xoteo !auikari Teoso sākire. Ikara xika atxiīti Teoso !ikamari ikamaenetakiti? ⁴ Ikamapitikari. Atxiīti paxirari ikinimane sākire. Iuaritika Teoso sākire atāonoka. Teoso sākire iōkatsopatakori txari:

Teoso sākirauatakasaaki, ikinimane imarotari isākire atāo ininiua. Isāpiretakasaakiri kākiti imisiritiko imaerekani xika, iusaaki imarotaākako Teoso kamakiti atāo inini.

⁵ Atxiīti kākiti txano nota: “Atāo minakati akamakasaaki, apanakini apia imarotari Teosonoka kaminiri atāo inakari. Ininiā erekari akaminiri atāo minakati apanakini imarotiniri Teosonoka kaminiri atāo inakari. Ininiā !apakata Teoso misiritiniua ate, maerekati akamini xika.” Atxiīti aua kākiti ikara atoko ina sākiretakani. ⁶ Apakatapitika Teoso misiritiniri maerekati kamakari. Iua kamari atāonoka, ininiā apakatapitika imisiritiniri ikinimane maerekati kamakani.

⁷ Atxiīti kākiti txaua: “Atāo minakati asāpiretakasaaki, apanakini imarotari Teoso sākirenoka atāo ininiua. Atāo aminasākiretakaniā, apanakini kākiti txari: ‘Teosonoka ereka,’ itxana. Ininiā !apakata Teoso misiritiniua amaerekani xika.” Atxiīti aua kākiti ikara atoko ina sākiretakani. ⁸ Ikara atāo ininiā, maerekati makama erekari apokini īkapani. Txamari ikara sākiretxiti na atāo. Iuaritika apanakini apoītapekaua ate ikara atoko asāpiretini. Ininiā atāopitika ninoa misiritiko, isākirena xika.

!Auari Kākiti Erekari

⁹ Hīxinikariko ikinika ikara nisāpiretakiti. Atauako Xoteo apiaerekata? Atauako Xoteo minakaniua poiāo ereka? Kona ikara atokoni itxa. Noerekapekai hīte, Xoteo minakaniua atokokana itxa Xoteo, kotxi ikinimane kamari maerekati. Akinika !aposotari atakanapiniri maerekati akamini. ¹⁰ Teoso sākire iōkatsopatakori txari:

!Auari atāo inakari kamakari. Ātika !auari.

¹¹ Teoso nireēkiti imarotakari !auari. Teoso nirekakari !auari.

¹² Ikinimane kaporīkikari Teoso. Ikinimane kerokari ikamakiti. Erekarī kamakari !auari. Ātika !auari.

¹³ Kākiti sākire maerekati, ĩtotxi arakakari saka atoko itxa. Itotarina imisirienetinirina apanakini. Kākiti sākire imini tsiā atoko itxa.

¹⁴ Ātipirika imisākipireretarina āti, kotxi inīkatarina omanākaretxi ākixinireēna.

¹⁵ Maxikatiika inirekarina okinirina āti.

¹⁶ Isinimonina imaxikana apanakini. Maerekaxinireninoka itxīkitakana apanakini.

¹⁷ !Imarotarina neenamtxi itakanapinina.

¹⁸ !Ipaxitarina Teoso. !Ipīkarina iua.

Itxa Teoso sākire iōkatsopatakori.

¹⁹ Aimarotari Teoso sikari ikinika ipaniātakiti iōkatsopatakori atemoni Xoteoakorimoni, inireēkiti aimarotini ĩkapani. Ininiā !apakata ate, Xoteo minakaniua pakini: “!Nimarotari Teoso nireēkiti,” anini, kotxi isāpiretapekari inireēkiti akamini tīkane. Ininiā atāopitikara Teoso misiritinina ikinimane maerekati kamakani. ²⁰ Ikinika Teoso paniātakiti iōkatsopatakori !aposota akamini, ininiā Teoso kona kamaerekataua. Teoso paniātakiti iōkatsopatakori oerekaua maerekati kamakani aniniua.

Natokopa Itxa Teoso Kamaerekatiniri Kākiti?

²¹ Uatxa Teoso oerekapekua itxīkitakiniri kākiti atāo inakari kamakani ininiua. Teoso paniātakiti ikinika !ikama kākiti, iuaritika itxīkitakaākana atāo inakari kamakani ininiuana. Kitxakapirīka Moisesi, Teoso sākire sāpiretakani apaka sāpiretari ikara. ²² Teoso txīkitakari kākiti atāo inakari kamakani ininiuana, Xesosi Kristo sākire auikasaakina. Itxīkitakari Xoteo, Xoteo minakaniua pakini atāo inakari kamakani ininiuana, Xesosi sākire auikasaakina. Xoteo minakatiua Teosomoni, Xoteotxikana itxaua. ²³ Kotxi ikinimane kamari maerekati, ininiā !aposota aāpokini Teoso iotximeremoni. ²⁴ Maerekati kamakaniua ate, iuaritika Teoso sikari ikinipoko erekarī maxikatiika atemoni, ininiā Teoso kamaerekataua ate, kotxi Kristo Xesosi ĩkitxirauata ate ĩkapani ipīkasaaki. Ininiā Teoso !imisiritaikaua amaerekani xika. ²⁵ Teoso sikari Xesosi ipinini kākiti ĩkapani. Xesosi ipīkasaaki, Teoso makatxakari maerekati akamakiti. !Imisiritaikaua ate, kotxi aāuikari Xesosi ipinini ĩkitxitari Teoso, maerekati akamakiti. Teoso sikari Xesosi ipinini ate ĩkapani. Ikara oerekaua atāo inakarīnoka ikamini. Mitxipitipanika Teoso !imisiritana kākiti imaerekanina xika. Iātapari iketo manapī apokini, kotxi iamoniākarī kākiti.

²⁶ Teoso sikari Xesosi, ininiā ipīpe kākiti ĩkapani, ininiā uatxa Teoso misiritari kākiti maerekati ikamini xika, ininiā aimarotari Teoso atāo inakarīnoka kamakari itxaua iua, kotxi !auiritari maerekati kamakari inapakakini. Erekarī Teoso, ininiā iua posotari ikamaerekatiniri kākiti Xesosi sākire auīākani.

²⁷ Ininiā !apakata aāuikiniua, kotxi !auari aparīka akamaerekatakiri, ininiā !apakata aāuikiniua Teoso paniātakiti iōkatsopatakori akamakasaaki. Teosora kamaerekataua, Xesosi sākire aāuikasaaki. ²⁸ Teoso paniātakiti iōkatsopatakori kamakari atxiīti !ikamaerekataāka, kotxi !auikari Xesosi sākire. Xesosi sākire auikakarīnoka ikamaerekataāka. ²⁹ Atauako Teoso Xoteo Teosonenanini itxataua? Konapitini. Xoteo minakaniua Teosonekanera apaka itxaua Teoso. ³⁰ Teoso ātinoka aua. Iua kamaerekatana Xoteo, Xesosi sākire auīākani. Iua kamaerekatana Xoteo minakaniua apaka, Xesosi sākire auikasaakina. ³¹ Ikara atoko ininiā, atxiīti kākiti txari: “Teoso kamaerekataua ate, kotxi aāuikari Xesosi sākire, ininiā Teoso paniātakiti iōkatsopatakori

!itxaika. Ininiã !akamaikari,” itxa kãkiti sãkire atxiïti. Konapitini. Xesosi sãkire aũuikasaaki, anirekari iteene akaminiri Teoso sãkire paniãtakiti iõkatsopatakori.

4

Atão Inakari Kamakari Apraão

¹ Maxinikari Apraão aïri kitxakapirĩkari. Natokopa itxa iua imarotakiti, Teoso kamaerekatiniri kãkiti? ² Apraão kamakiti erekari kamaerekataãkamariko iua, ininiã iua iuikamauako. Txamari iua iuikiniua !auari Teoso apisatoõ. ³ Teoso sãkire iõkatsopatakori txari:

Apraão auikari Teoso sãkire, ininiãkara Teoso txĩkitakari iua atão inakari kamakari ininiua.

⁴ Parĩkauatakari ipatrãote sikari iparĩka ñki iuamoni. Maxikatiĩka !iĩkitxitari iua. Isikari, kotxi iparĩkauata. ⁵ Kãkiti auikiniãri Teoso kamaerekatiniri maerekati kamakari, iua kãkiti !iuikari iuaka parĩka. Imarotari iparĩka !ikamaerekatari iua. Teoso txĩkitakari ikara atoko inakari kãkiti atão inakari kamakari ininiua, kotxi iua auikari Teoso sãkire.

⁶ Kitxakapirĩka Tavii txari ikara atoko. Iua sãpiretari kãkiti Teoso sikakiti erekari apakapakani. Teoso txĩkitakari iua atão inakari kamakari ininiua. Na iparĩkani txĩkitakari iua atão inakari kamakari ininiua. ⁷ Tavii txari:

Teoso makatzakasaakiri kãkiti maerekani, !atamataikari maerekati ikamakiti. Teoso takari ikinipoko erekari kãkiti ikara atoko inakarimoni.

⁸ Teoso !iaõtari iua kamakiti maerekati. Teoso takari ikinipoko erekari iuamoni. Itxa Tavii kitxakapirĩka.

⁹ Atxiïti pite txari: “Atauako ia erekari Teoso sikakiti, Tavii sãpiretakiti, kãkiti Teoso takaõtxikare auaitotakiti ñkapaninanini?” Konapitini. Ia erekari Teoso sikakiti Teoso takaõtxikare mauaitotakini ñkapani apaka. Nisãpiretapekai ia Teoso sãkire iõkatsopatakori:

Apraão auikari Teoso sãkire, ininiãkara Teoso txĩkitakari iua atão inakari kamakari ininiua,

itxa Teoso sãkire iõkatsopatakori. ¹⁰ Kirisaakipa Teoso txĩkitakari Apraão atão inakari kamakari ininiua? Atauako Teoso takaõtxikare Apraão ñtoã auakasaakiikani? Konapitini. Takaõtxikari Apraão ñtoã takiko apisapanikara, itxĩkitakari Apraão atão inakari kamakari ininiua. ¹¹ Merepanika Teoso txĩkitakari Apraão atão inakari kamakari ininiua, eerekaikara itakari itakaõtxikare iĩtoã. Ikara Teoso takaõtxikare oerekari, mitxipeka Teoso txĩkitakari Apraão atão inakari kamakari ininiua, kotxi iua auikari Teoso sãkire.

Apraão auikari Teoso sãkire, Teoso takaõtxikare iĩtoã auini apisapanika. Ininiã Apraão ikini Teoso sãkire auiaãkani iri atoko itxaua. Atxiïti Teoso takaõtxikare iĩtoãna ! auari. Iuaritika ninoa iri atoko itxaua Apraão. Teoso txĩkitakari ikinimane iua sãkire auiaãkani atão inakari kamakani ininiuana. ¹² Apraão Teoso takaõtxikare auaitotakini iri atoko itxaua, ninoa auikiniãri Apraão sãkire Apraão auikiniri atokotxikana, kotxi Teoso auikari Teoso sãkire Teoso takaõtxikare iĩtoã auini apisapanika.

¹³ Teoso sikaenetari itixi Apraãomoni, imekaniriakori pakinimoni. Ikara atoko Teoso sãkire, kotxi Apraão auikari Teoso sãkire. Iua auikari Teoso sãkire, ininiã Teoso txĩkitakari iua atão inakari kamakari ininiua. Apraão kamakiti erekari !itxĩkitakari Teoso sikaenetiniri itixi Apraãomoni. ¹⁴ Kãkiti erekari kamakari Teoso sãkire mauiaãkati !apakapari Teoso sikaenetakiti, kotxi !auikari Teoso sãkire. Teoso sikari isikaenetakiti iua sãkire auiaãkanimoninani. ¹⁵ Teoso paniãtakiti iõkatsopatakori makamakati misiritaãkako. Teoso paniãtakiti iõkatsopatakori mauakaniã, maerekati ! auari. Txamari auapitika Teoso paniãtakiti iõkatsopatakori.

¹⁶ Ininiã kãkiti auikasaakiri Xesosi sãkire, apakapari Teoso sikaenetakiti. Maerekati kamakani kãkiti, iuaritika apakaparina Teoso sikaenetakiti, kotxi Teoso nirekari ikinipoko erekari isikini kãkitimoni. Ininiã ikinimane Apraão apika mekaniriakori apakapapitikari Teoso sikaenetakiti. Xoteoakori Teoso paniãtakiti iõkatsopatakori

auakini apakapari. Xoteo minakaniu Teoso sãkire Apraão auikini atoko inakani apaka apakapari. Ate amakinika iri atoko itxaua Apraão. ¹⁷ Teoso sãkire iõkatsopatakori txari: Teoso txari Apraão: “Nota txĩkitakaiko pite itori ãti uãka iri pininiua.”

Ininiã Teosomoni iua aĩri atoko itxaua, kotxi Apraão auikari Teoso sãkire. Teoso txĩkitakana ipĩkani iuaĩkana auãki inini. Iua kamari mitxi mauakati auini.

¹⁸ Apraão kiomãtxipeka inakasaaki, kona keeneri. Iuaritika auikari Teoso sãkire. Iãtapari Teoso sikaenetakiti apokini. Ininiã apanakini ãti uãka iri atoko itxapekaua Teoso sãkire iaõka. Teoso sãkire iõkatsopatakori txari:

Papika mekaniriakori kaiãopokopaniriko.

¹⁹ Apraão seĩ anokanani inakasaaki, imarotari iĩto ipinanapanoka inini. Imarotari Sara ! oposotaikari keene onini. Iuaritika iteene auikari Teoso sãkire. ²⁰ !Iotoka auikiniri Teoso sikiniri isikaenetakiti iuamoni. Iua auikari Teoso sãkire itaparaxinireritika. “Teoso posotari ikinipoko ikamini,” itxa. ²¹ Iua iteene imarotari Teoso posotiniri isikiniri isikaenetakiti. ²² Apraão auikari Teoso sãkire, ininiãkara Teoso txĩkitakari iua atão inakari kamakari ininiua. ²³ Na Apraãonanini Teoso txĩkitaka atão inakari kamakari ininiua.

²⁴ Iua txĩkitakaua ate apaka atão inakari kamakani aniniua, aãuikiniãri Teoso sãkire. Aãuĩte Xesosi ipĩkasaaki, Teoso õkitikari iua iuaĩkana auini ĩkapani. ²⁵ Teoso sikari Xesosi kãkitimoni ipinini ĩkapani maerekati akamakiti xika. Teoso õkitikari iua iuaĩkana auãki inini ĩkapani, ate ikamaerekatini ĩkapani.

5

Teoso !Omanataikaua Ate

¹ Ininiã Teoso kamaerekataua, kotxi aãuikari isãkire, ininiãkara aãuĩte Xesosi Kristo iotokakari Teoso omanatiniua ate. Teoso !omanataikaua ate. Uatxa apakapaua ate. ² Aãuikasaakiri Xesosi sãkire, iuasaaki aimarotari ikinipoko erekari Teoso sikakiti atemoni ikiniõtika. Itene apoxokoniua, kotxi aiãtapari Teoso aaõkitini, iua iotximere aãtamadini ĩkapani. ³ Apanakini misiritakasaakia, apoxokoniua apaka, kotxi Teoso oerekaua amĩteenekiniri amisiritiko. ⁴ Amisiritiko amĩteenekiniã, aimarore apiaãpota. Aimarore apiaãpotakasaaki, aiãtapariko erekari apokini atemoni. ⁵ Erekari apokini aiãtapiniã, aãpakapapitikariko erekari, kotxi aãkixinireẽ aimarotari Teoso iteene turetiniua. Erekari Matamatakoti Teoso sikakiti atemoni, oerekaua Teoso tiraõki aãkixinireẽ.

⁶ Erekari akamini amaposotakanisaaki, Teoso amanirekakanisaaki, Kristo ipina ate ĩkapani. Iua ipina iketo õti manapi. ⁷ Atxiĩti kãkiti ipina atão inakari kamakari ĩkapani iua mapinakani ĩkapani? Atxiĩti !ipina iua ĩkapani. Atxiĩti kãkiti ipina ãti erekari kamakari ĩkapani, iua mapinakani ĩkapani? Atxiĩti ipina iua ĩkapani. ⁸ Teoso oerekaua ate, iua iteene turetiniua ate, kotxi Kristo ipina ate ĩkapani maerekati akamapanika anakasaaki.

⁹ Kristo ipinini kamaerekataua ate, ininiã uatxa Teoso apakapaua ate. Apikomoni Kristo kaminua, kotxi Teoso !omanataikaua. !Imisiritaikaua. ¹⁰ Ate Teoso omanatani anakasaakia, Teoso ãkiri ipina ate ĩkapani. Ininiã Teoso mokaiakari ! atxaikaua. Iua apakapaua. Iua apakapaua, ininiã amaerekani imaktxaka, ininiã aãuapininiika, kotxi iua õkitikaua auapininiika anini ĩkapani Teosokata, kotxi Kristo auini auapika. ¹¹ Teoso kamari ikara ate ĩkapani. Apikomoni iua kaminapanikauako ate, kotxi iua kamapoxokonitaua, kotxi aãuĩte Xesosi Kristo mikanapiriãua ate Teosomoni.

¹² Maerekanitxi apoka itixi kiki ãtika xika, Adão inakori xika. Maerekati ikamakiti xika ipina. Ininiã ikinimane kãkiti ipina, kotxi ikinimane kãkiti kamari maerekati. ¹³ Teoso paniãtakiti iõkatsopatakori apokini apisapanika, kãkiti kamari maerekati, iuaritika Teoso !imisiritana ninoa maerekati ikamakitina xika, kotxi iuasaaki !isãpiretapanikari ipaniãtakiti. ¹⁴ Adão auakasaaki atoko, Moisesi auakasaaki manapi, iuasaaki Teoso paniãtakiti iõkatsopatakori !apokapanika, iuaritika ikinimane

Adão, Kristo Pakini

¹² Maerekanitxi apoka itixi kiki ãtika xika, Adão inakori xika. Maerekati ikamakiti xika ipina. Ininiã ikinimane kãkiti ipina, kotxi ikinimane kãkiti kamari maerekati. ¹³ Teoso paniãtakiti iõkatsopatakori apokini apisapanika, kãkiti kamari maerekati, iuaritika Teoso !imisiritana ninoa maerekati ikamakitina xika, kotxi iuasaaki !isãpiretapanikari ipaniãtakiti. ¹⁴ Adão auakasaaki atoko, Moisesi auakasaaki manapi, iuasaaki Teoso paniãtakiti iõkatsopatakori !apokapanika, iuaritika ikinimane

ipina. Atxiiti kãkiti !ikamari maerekati Adão maerekani atoko, kotxi iua !ikamari Teoso paniãtakiti, iuaritika ikinimane ipina. Kiki Adão inakori axinikasaaki, aimarotari iua Xesosi atoko ininiua.

¹⁵ Txamari aimarotari iua na Xesosi !atokoni itxaua, kotxi ãtika kiki maerekani xika, itori kãkiti ipina. Iua sikari ipĩkitxi kãkitimoni. Kiki ãtipekana, Xesosi Kristopekana, iua sikari erekari Teoso siãkiti itori kãkitimoni imapinakanina ïkapani. Teoso siãkiti ïki !auari. !Erekari Adão sikakiti. Peerekari Xesosi Kristo siãkiti. ¹⁶ Kiki ãtika Adão inakori kamari maerekati. Átinoka maerekati ikama, ininiã eereka Teoso sãpiretari imaerekani. Eereka Teoso misiritari iua. Teoso siãkiti !ikara atokoni itxa. Kãkiti maerekati itori ikamakasaaki, kiki ãtipekana Xesosi sikari Teoso siãkiti kãkitimoni, ininiã ikamaerekatana kãkiti. Iuasaaki imakatzakari ninoa maerekani. ¹⁷ Kiki ãtika, Adão inakori maerekani xika, Teoso txĩkitakari ikinimane ipinini. !Erekari iua kiki kamakiti. Æti kiki, Xesosi Kristo inakori kamakiti peerekari. Iua txĩkitakari kãkiti ãkixinire katapara inini maerekati imakamakani ïkapani. Kãkiti ikara atoko inakari Teoso sikari ikinipoko erekari. Itori isika. Itxĩkitakari iua atão inakari kamakari ininiua. Ia iparĩka ïki !auari.

¹⁸ Adão kamari ãtinoka maerekati, iuaritika iua maerekati txĩkitakari Teoso misiritinina ikinika kãkiti. Iua atokokana Xesosi kamakiti ãtika txĩkitakari Teoso kamaerekatina kãkiti ninoa ãtipirika auini ïkapani. Iuasaaki atãonoka ikamakiti. ¹⁹ Kiki ãtika Adão inakori na kamari Teoso sãkire iaõka, ininiã itxĩkitakari kãkiti itomaneri maerekati ikaminina. Kiki ãtipekana Xesosi inakori kamari Teoso sãkire iaõka, ininiã itxĩkitakari kãkiti itomaneri atão inakari kamakani ininiuana.

²⁰ Teoso sikari ipaniãtakiti iõkatsopatakori Moisesimoni. Iuasaaki kãkiti imarotari maerekati itori ikamakitina, ininiã maerekanitxi apiaãpota, kotxi Teoso paniãtakiti iõkatsopatakori auape. Maerekanitxi apiaãpota, iuaritika erekari Teoso sikakiti kãkitimoni apiata. ²¹ Maerekanitxi txĩkitakari kãkiti ipinini. Erekari Teoso sikakiti kãkitimoni txĩkitakari kãkiti auini ãtipirika imaxipokakani tĩkane, kotxi aãuĩte Xesosi Kristo txĩkitakari kãkiti atão inakari kamakari ininiua. Ininiãkara kãkiti auapininiika, kotxi Xesosi Kristo kamaerekatana.

6

!Anirekaikari Maerekati Akamini

¹ Ininiã erekari atxiiti apikomoni maerekati akamini, ikinipoko erekari Teoso sikakiti apiata auini ïkapani? ² Konapitini. Teoso makatzakapekari amaerekani, kotxi iuasaaki !anirekaikari apikomoni maerekati akamini. Anireẽkiti maerekati akamini xipope, kãkiti ipinini atoko itxa ixipokini. Ininiã !apakata apikomoni maerekati akamini. ³ Apatxisatiko oerekari Kristo Xesosi nakitiakori aniniua. Iuakata apinini atoko itxa apatxisatiko. Himarotapekari ikara. ⁴ Apatxisatiko oerekari Kristokata ikatakoni atoko aniniua, ininiã !anirekari apikomoni maerekati akamini. Kristo iri Teoso posotiire õkitikari imi, iuaĩkana auãki inini ïkapani. Peerekari iposotiire. Ininiã apatxisatiko oerekari Xesosi õkitikiko atokokana Teoso õkitikaua ate aãuini amaneri inini ïkapani.

⁵ Aãuapika Kristokata, ininiã ãtika atoko atxaua iuakata aãuini, ininiã Kristo ipinini atokokana mitxi aãuini xipope. Kristo iuaĩkana auini atokokana, aãuini amaneri. Peerekari, kotxi aãuapika Kristokata, ãtika atoko aniniua iuakata. ⁶ Mitxi anireẽkiti xipope, kotxi Kristo makatzakari amaerekani aamina ïpiriãmitakari nopini ipĩkasaaki ate ïkapani. Ininiã mitxi anireẽkiti posotiire !auaika. Ixipokaãkapeka, kotxi mitxi anireẽkiti maerekatina. Ininiã maerekanitxi nitiriakori atoko !atxaikaua. Aimarotari ikara. ⁷ Maerekanitxi na paniãtaikari kãkiti ipĩkari.

⁸ Kristokata ipĩkani atoko aniniã, aimarotari iuakata aãuini apaka. ⁹ Ipĩkasaaki õkitikaãka, ininiã !lipinaika. Aimarotari ikara. Ipĩkitxi na kaposotiireikari iuaĩkana Kristo ipinini ïkapani. ¹⁰ Iua ipina maerekanitxi posotiire ixipokini ïkapani. Iuasaakipeka maerekanitxi posotiire xipoka. Uatxa Kristo auapininiika Teosokata, iri nireẽkitinoka ikamini ïkapani. ¹¹ Iua atokotxikana anireẽkiti maerekati xipope. Uatxa !anirekaikari

maerekati akamini. Uatxa aãuapininiika Teosokata, iua nireëkitinoka akamini ïkapani, kotxi Kristo Xesosikata aãuapika.

¹² Ininiã na hãuiritapiri hiïto paniãtinii maerekati hïkamini. Na hïkamapiri maerekati hiïto nireëkiti. ¹³ Na hãuiritapiri hiïto kaminiri maerekati. Na hãuiritapiri hõki kaminiri maerekati. Na hãuiritapiri hinama kaminiri maerekati. Na hãuiritapiri hïuako kaminiri maerekati. Na hïkamapiri maerekati hiïto nireëkiti. Hïteka hïsikauako Teosomoni, kotxi mitxi ipïkani atoko hïtxaua, eereka Teoso txïkitakai auãki iuaïkana hinini, ininiã hïsikari hiïto ikinika Teosomoni. Atão inakarínoka hïkamako hõkiã, hinamaã, hïuakoã, imakinika hiïtoã. ¹⁴ Uatxa maerekanitxi apatrãote atoko !itxaikauako. Uatxa amisiritiko !auaika, Teoso paniãtakiti iõkatsopatakori amakamakaniã, kotxi ikinipoko erekari Teoso sikakiti aãpakapakasaaki, iuasaaki imakatzakari amisiritiko.

Atão Inakari Nitiriakori

¹⁵ Ininiã atxiïti hïtxano nota: “Maerekati makama, kotxi amisiritiko ! auaika Teoso paniãtakiti iõkatsopatakori amakamakaniã, kotxi ikinipoko erekari Teoso sikakiti aãpakapakasaaki, imakatzakari amisiritiko. Ininiã makamari maerekati,” atxa atxiïti. Konapitini. ¹⁶ Himarotari, hãuritiniãri kãkiti paniãtinii iua nireëkiti hïkamini, ininiã iua hïpatrãote atoko itxaua. Iua nitiriakori atoko hïtxaua, kotxi hïkamari iua paniãtakiti. Maerekanitxi hïpatrãote ininiãua, hïkamari maerekati, ininiã hïpina. Ininiã kona hãua Teosokata ãtipirika. Teoso hïpatrãote ininiãua, iua paniãtakiti hïkama, ininiã atão inakarínoka hïkama. ¹⁷ Nitxari Teoso: “Erekapitikari atemoni pikamakiti.” Ikara atoko nitxari Teoso, kotxi mitxi maerekanitxi nitiriakori atoko hïtxaua. Uatxa maerekanitxi nitiriakori !hïtxaikaua, kotxi iteene hïkïpitari hõerekiko. ¹⁸ Teoso makatzakapekai hïte, ininiã uatxa maerekanitxi nitiriakori !hïtxaikaua. Uatxa Teoso nitiriakori hïtxaua, ininiã atão inakarínoka hïkama. ¹⁹ Ikara atoko nitxa sãkireta hïtemoni, kotxi himarotari nitiritxi, patrão pakini pirena. Himarotakiti poiãoka. Mitxi hãuiritari hiïto kaminiri maerekati inireëkiti. Hãuiritari hiïto apikomoni maerekati ikamaãpotini. Apiaãpota maerekati hïkamakiti. Iuasaaki hiïto maerekanitxi nitiri atoko itxaua. Uatxa hïsikari hiïto Teosomoni atão inakari nitiri ininiua ïkapani, ininiã hïkamariko atão inakarínoka. Ininiã Teoso nakitiakorínoka hïtxaua.

²⁰ Maerekanitxi nitiriakori hinakasaakiua, atão inakari nitiriakori na hïtxaua, ininiã atão inakari na paniãtai hïte atão inakarínoka hïkamini. ²¹ ïkiripa erekari hãpakapa, maerekati mitxi hïkamakasaaki? Kona kapakaparei. Uatxa hïpëtauata maerekati mitxi hïkamakiti xika. Maerekati kamiko xika kãkiti ipina, ininiã kona aua Teosokata ãtipirika. ²² Uatxa maerekanitxi na paniãtaikai hïte. Uatxa Teoso nitiriakori hïtxapekua, ininiã hïkamari ikinipoko Teoso ïkapani. Ininiã hãuapininiika hïtxako Teosokata ãtipirika. ²³ Maerekanitxi kãkiti patrãote atoko itxa. Iïkitxitari kãkiti parïkatxi ïki, txamari ipïkitxi itxaua parïkatxi ïki. Teoso sikakiti atemoni ãtião. !Aparïkauata Teoso sikakiti aãpakapini ïkapani, iuaritika isikaua aãuini ãtipirika inini ïkapani, kotxi aãuïte Xesosi Kristo ipina ate ïkapani.

7

Tanirauatakaro Atoko Atxa

¹ Nitariakori, hïte hïkinika imarotari paniãtakori iõkatsopatakori, ininiã himarotari nisãkire. Kãkiti auapanika inakasaaki, ikïpitariko paniãtakori iõkatsopatakori. ² Noerekaiko hïte. Paniãtakori iõkatsopatakori paniãtaro sito okaikotini oïtanirikata iua auapanika inakasaaki. Iua ipininiã, iua paniãtakori na paniãtaikaro oa. ³ Ôtaniri auapanika inakasaaki, ãtikata oãuiniã, kanokarero otxaua. Ôtaniri ipininiã, paniãtakori iõkatsopatakori na paniãtaikaro oa, ininiã apakata ãtikata oïtaniriuatini. Ikara atoko oniniã, kanokarero ! otxaua.

⁴ Nitariakori, oa sito atokotxikana ate amakinika. Kristo ipina ate ïkapani, ininiã Moisesi paniãtakiti iõkatsopatakori kona paniãtaikaua, kotxi uatxa Kristo nakitiakori

atxaua. Uatxa Teoso õkitikakiti Kristo nakitiakori atxaua. Iua nakitiakori atxaua, ininiã erekari akama Teoso ïkapani. ⁵ Mitxi anireëkiti maerekati paniãtaua maerekati akamini. Aïto nirekari maerekatinoka ikamini, kotxi paniãtakori iõkatsopatakori txari: “Kona hïkamapiri maerekati.” Ininiã iusaaki apiata anirekari maerekati akamini, kotxi maerekatinoka kamakani atxaua. Ininiã apina, ininiã kona aãuapika Teosokata. ⁶ Mitxi paniãtakori iõkatsopatakori nirekari ipaniãtiniua. Uatxa paniãtakori iõkatsopatakori na paniãtaikaua. Ikara kitxakari. Uatxa amaneri, kotxi uatxa aparïkauata Teoso ïkapani. Erekari Matamatakoti oerekaua aparïkauatini Teoso ïkapani.

Teoso Paniãtakiti Iõkatsopatakori

⁷ Ininiã natokopa itxa uatxa axinikakiti? Teoso paniãtakiti iõkatsopatakori maerekati itxaua atxiïti? Konapitini. Maerekati !itxaua. Teoso paniãtakiti iõkatsopatakori mauakanimako, nota !imarotamariko maerekati nikamini. Teoso paniãtakiti iõkatsopatakori txari: Kona pinirekapiri ãti nakiti, ininiã ãti nakiti ninirekiniã, nimarotari nikaminiri maerekati. ⁸ Maerekati xika na nota nirekari ikara Teoso paniãtakiti nikamini. Ininiã iteene ninirekari apanakini nakiti. Ninirekari apanakini nakiti, kotxi Teoso paniãtakiti iõkatsopatakori txari: Kona pinirekapiri ãti nakiti.

Teoso paniãtakiti iõkatsopatakori mauakaniã, iusaaki maerekati !auari. ⁹ Teoso paniãtakiti iõkatsopatakori nimimarotakanisaaki, na nimarotari maerekati nikamini. Niuãkatari nãkixinire auãki inini. Teoso paniãtakiti iõkatsopatakori nimarotakasaaki, nimarotari maerekati nikamini. Iusaaki nimarotari nipinini nimaerekani xika. ¹⁰ Iusaakipeka nimarotari nãkixinire ipïkari atoko inini. Teoso paniãtakiti iõkatsopatakori oerekari kãkiti erekari ikamini, iua auini ïkapani. Txamari Teoso paniãtakiti iõkatsopatakori oerekano nota nipinini nimaerekani xika. ¹¹ Maerekati ninireëkiti misirienetano. Imisirienetano, ininiã na nikamari Teoso paniãtakiti iõkatsopatakori iaõka. Ininiã nikamari maerekati. Ininiã maerekati xika nipina.

¹² Teoso paniãtakiti iõkatsopatakori !auari maerekati, kotxi Teoso kamari. Atãonoka itxa Teoso paniãtakiti. Erekari. ¹³ Atxiïti erekari txïkitakano nipinini? Konapitini. Maerekanitxi txïkitakano nipinini. Maerekanitxi txïkitakano Teoso paniãtakiti iõkatsopatakori erekari nimakamakani, ininiã nikamari maerekati, ininiã iua maerekanitxi txïkitakano nipinini. Ininiã aimarotari maerekanitxi kona xatiki apakata. Maerekatinoka, kotxi maerekanitxi txïkitakano nipinini. Teoso paniãtakiti iõkatsopatakori oerekaua ikara atoko inakari.

¹⁴ Aimarotari Teoso paniãtakiti iõkatsopatakori iaxiti ïkari ininiua. Txamari nota uaikirino. Maerekanitximoni vëtxitakori atoko nitxaua, maerekanitxi nitiri atoko nininiua ïkapani. ¹⁵ Na nimarotari nikamakiti, kotxi na nikamari notaka nireëkiti. Nikamari nimanirekakiniti, nomanatakiti. ¹⁶ Ininiã maerekati nimanirekakiniti nika-makasaaki, iusaaki nimarotari Teoso paniãtakiti iõkatsopatakori ereka inini. ¹⁷ Ininiã na notani kamari maerekati. Maerekati nãkixinireë auakarira txïkitakari nikaminiri iua maerekati. ¹⁸ Nimarotari erekari !auari nãkixinireë. Maerekatinoka aua nãkixinireë, kotxi ninirekari erekari nikamini, txamari !niposotari. ¹⁹ Na nikamari erekari ninireëkiti. Nikamapikari maerekati nimanirekakiniti. ²⁰ Ininiã nimanirekakiniti nikaminiã, kona notani kamari. Maerekati nãkixinireë auakarira txïkitakano iua maerekati nikamini.

²¹ Ininiã ia sãkiretxiti atão: Ninirekasaakiri erekari nikamini, maerekatinoka niposota nikamini. ²² Nãkixinireë iteene ninirekari Teoso paniãtakiti iõkatsopatakori iaõka nikamini. ²³ Txamari aua ãti ninireëkiti niïto ãki. Iua niïto nireëkiti nirekari ixipokiniri nãkixinire nireëkiti. Iua niïto nireëkiti xika nikamari maerekati nireëkitinoka. !Niposotari erekari nikamini. Kateia ãki iaxirikakoni atoko nitxa. ²⁴ !Erekano nota. Maerekati kamakarino nota. Kipa makatxakano, maerekati niïto nireëkiti nimakamakani ïkapani? Niïto txïkitakano nipinini. Kipa moianatano? ²⁵ Aãuïte Xesosi Kristokara moianatano.

Iuara makatxakano nimapinakani ĩkapani. Peerekari Teoso, kotxi iua kamari ikara atoko nota ĩkapani.

Ininiã uatxa ia atoko inakari nisãpiretai. Nãkixinireẽ ninirekari Teoso paniãtakiti iõkatsopatakori nikamini. Txamari niĩtoã maerekanitxi nireẽkitinoka niposota nikamini.

8

Erekari Matamatakoti Txĩkitakari Aãkixinire Auãki Inini

¹ Ininiã uatxa Teoso !itxaikaua ate: “Maerekati hĩkamakiti xika nimisiritaiko hĩte,” !itxaikaua ate, kotxi Kristo Xesosi nakitiakori atxapekaua. !Akamaikari aĩto nireẽkiti. Erekari Matamatakoti sikaposotiiretaua iua nireẽkiti akamini. ² Erekari Matamatakoti nireẽkiti akama, ininiã iua txĩkitakari aãkixinire auãki inini, kotxi Xesosi Kristo nakitiakori atxaua. Erekari Matamatakoti makatxakano maerekanitxi nireẽkiti nikamini, ininiã na nipina. ³ Aĩto maerekani xika Teoso paniãtakiti iõkatsopatakori !iposotari imakatzakiniri amaerekani, kotxi !aposotari akaminiri iua paniãtakiti. Iuaritika Teoso makatzakari amaerekani, kotxi iua iokanatarari imi atemoni. Imi ĩto ate ĩto atoko, maerekati kamakari ĩto atoko itxa. Teoso iokanatarari imi atemoni ipinini ĩkapani, amaerekani imakatzakini ĩkapani. Ininiã ixipokari maerekati posotiire aĩtoã auakari. ⁴ Teoso kamari ikara, ininiã Xesosi kamari ikinika Teoso paniãtakiti iõkatsopatakori iaõka ate ĩkapani, kotxi ipaniãtakiti atão inakarinnoka. Ininiã !akamaikari maerekati aĩto nireẽkiti. Akamari Erekari Matamatakoti nireẽkiti.

⁵ ĩtotxi nireẽkiti kamakani xinikapikari ĩtona nireẽkitinoka. Erekari Matamatakoti nireẽkiti kamakani xinikapikari Erekari Matamatakoti nireẽkitinoka. ⁶ Kãkiti xinikiniãri ĩto nireẽkitinoka, ixinikakiti txĩkitakari iua ipinini, ininiãkara kona auapika Teosokata. Kãkiti auiritiniãri Erekari Matamatakoti txĩkitakiniri ixinikiniri Erekari Matamatakoti nireẽkitinoka, iua auapininiika Teosokata. Erekaxinireri iua. ⁷ Kãkiti xinikiniãri ĩto nireẽkitinoka, Teoso mokaiakariakori itxauana, kotxi !inirekarina Teoso paniãtakiti iaõka ikaminina. !Iposotarina Teoso paniãtakiti iaõka ikaminina. ⁸ ĩtotxi nireẽkitinoka kamakani liposotari ikamapoxokonitinnirina Teoso.

⁹ Hĩtepekana, Erekari Matamatakoti hãkixinire auiniã, hĩkamari iua paniãtakiti. !Hĩkamari maerekati hĩto paniãtakiti. Erekari Matamatakoti kãkiti aãkixinireẽ mauakanisaaki, na Kristo nakitiakori !itxauana, kotxi Erekari Matamatakoti Kristo nakiti itxaua. ¹⁰ Hĩto ipinapitikako maerekati xika, iuaritika hĩxinire auãkiri itxaua Kristo hãkixinireẽ auiniã. Hĩxinire auãkiri itxaua, kotxi Kristo kamari atão inakarinnoka ate ĩkapani. ¹¹ Teoso õkitikari Xesosi, iua ipĩkasaaki. Erekari Matamatakoti Teoso nakiti hãkixinireẽ auiniã, Teoso Kristo õkitikakari, txĩkitakariko hĩto ipinakari iuaĩkana auãki inini, kotxi Erekari Matamatakoti Teoso nakiti aua hãkixinireẽ.

¹² Ininiã nitariakori, auapitika akamakiti tĩkane Teoso ĩkapani. !Auari akamakiti tĩkane aĩto nireẽkiti akamini ĩkapani. ¹³ Hĩto nireẽkiti hĩkaminiã, hĩxinire ipĩkari atoko itxa, ininiã atipirika kona hãua Teosokata. Hamanainiãri Erekari Matamatakoti maerekati hĩto kamakiti ixipokini, iusaaki hãuapika atipirika Teosokata.

¹⁴ Erekari Matamatakoti nireẽkiti kamakani, Teoso anaakori itxauana, kotxi Erekari Matamatakoti Teoso nakiti. ¹⁵ Iua Erekari Matamatakoti Teoso sikakiti hĩtemoni. !Itxĩkitakai nitiritxi kapĩkareri hininiua. Itxĩkitakai Teoso anaakori hininiua. Erekari Matamatakoti posotiireẽ aãkiritari aĩri Teoso: “Papai, niri,” atxari. ¹⁶ Erekari Matamatakoti sãpiretaua aãkixinireẽ Teoso anaakori aniniua. ¹⁷ Teoso anaakori aniniãua, aãpakapariko erekari Teoso nĩkatakiti ate ĩkapani. Kristo apakapari erekari Teoso nĩkatakiti iua ĩkapani, ininiã ate apakapari iuakata. Kristo misiritaãkapeka. Ate misiritiko apaka auiniã Kristo sãkire aãuikini xika, Kristo ikinimane auĩte inakasaakiua, ate apaka aua iuakata iusaaki. Aãtamatarari iua iotximere. Peerekari iusaaki iuakata aũini.

Aãpakapariko Ikinipoko Erekari

¹⁸ Uai itixi aãuakasaaki, aãtatsiirauata. Eereka !axinikaikari mitxi aãtatsiirauatini, kotxi Teoso oerekauako ikinipoko erekari. Iuasaaki peerekari. ¹⁹ Ikinipoko Teoso kamakiti iãtapari ipoxokoniritika Teoso keto õti. Iuasaaki aimarotari Teoso anaakori. ²⁰ Kotxi ikinipoko Teoso kamakiti misiritaãkapeka, ixipokaãpotini tãkane. Ikinipoko Teoso kamakiti ixinireka !ixipokaãpota. Teoso txĩkitakari ikinipoko xipokaãpotini. Iuaritika aimarotari, ipĩkitxi xipokini õti apokapitikako. ²¹ Ikinika Teoso kamakiti iãtapari iua õti. Iuasaakiko itixi amaneri itxauako. !Ixipokaika. Iuasaaki ikinika amaneri. !Ixipokaika. Teoso anaakori misiritiko !auaika. Peerekari iuasaakiko.

²² Aimarotari uatxapiikama ikinika Teoso kamakiti atatsiirauata, amarini tsii sito atatsiitini atokokana. ²³ Na itixi Teoso kamakitinanini atatsiirauata. Aãkixinire apaka akiripireta, kotxi anirekari Teoso keto apokini. Iuasaaki iua apakapaua ate iua anaakori. Iuasaakiko aïto amaneri isikaua. Iuasaakiko aïto !kaxiporeikari. Merepanika Teoso sikakiti auapeka atemoni, kotxi iua sikapekari Erekar Mata-matakoti atemoni. ²⁴ Teoso makatzakapekari amaerekani, aãuikasaakiri isãkire. Ininiã aiãtapari apikomoni isikaenetakiti atemoni. !Aãtamapanikari isikaenetakiti, ininiã aiãtapapanikari. Aãuikapitikari isikaenetakiti isikiniua, ininiã atão aãuikiniri. ²⁵ Aiãtapari aãpakapakiti tãkane. !Aãpakapapanikari, iuaritika aiãtapari apoxokoniritika, kotxi aimarotapitikari ikara apokini.

²⁶ Erekar Matamatakoti moianataua, kotxi na kataparaxinireua. !Aimarotari aamanaãkiti tãkane, Teoso amisãkiretakasaaki. Iuaritika, Erekar Matamatakoti misãkiretari Teoso ate ãkapani. Asãkireẽ !aposotari asãpiretiniri Teoso ikinika anireẽkiti, ininiã Erekar Matamatakoti misãkiretari Teoso ate ãkapani. Ipinimoni itxa isãpiretiniri Teoso. Kãkiti sãkireẽ !isãkirauata Teosokata. ²⁷ Teoso imarotari kãkiti ãkixinire, ininiã iua imarotari Erekar Matamatakoti xinikakiti, kotxi Erekar Matamatakoti misãkiretari Teoso, Teoso nakitiakori ãkapani. Erekar Matamatakoti amanaãri Teoso, Teoso nireẽkiti ikaminana inakitiakori.

Teoso Iteene Tiretiniua

²⁸ Aimarotari ikiniõtika erekari ikaminaua ate, kotxi iua tiretakani, iua mereẽkini atxaua ate. Iuaritika aãtatsiirauatini auapitika. Iuaritika iuasaaki apaka erekari ikaminaua. Iua mereẽua, kotxi inirekari imereiniua. ²⁹ Itixi kamiko apisapanika Teoso imarotapekua ate. Iua mereẽpekua ate, iua anaakori kaiãopokori aniniua ãkapani. Imereẽpekua, imi Xesosi atoko aniniua ãkapani. Ininiã Xesosi aïtari apiari. ³⁰ Teoso akiritana imereẽkini. Apaka ikamaerekatana iua mereẽkini. Apaka itanapoko erekari isika ninoa ikamaerekatakinimoni.

³¹ Teoso kamari ikinipoko ikara erekari ate ãkapani, ininiã natokopa itxa axinikakiti? Teoso kataparari moianatapitikaua, ininiã ate omanatakani tapara poiãoka. ³² Teoso sikari ikinipoko atemoni. Imi apaka isika atemoni, kotxi ipina ate akinika ãkapani. Isikari imi atemoni, ininiã aua atxiïti iua masakakiniti atemoni? !Auari. Ikinipoko erekari isikapitikaua atemoni. Ikarone !auari. ³³ Aua atxiïti Teoso mereẽkini maerekani sãpiretakari? !Auari. Teosora sãpiretari ninoa maerekani mauakani, kotxi iua kamaerekatapekana ninoa. ³⁴ Aua atxiïti Teoso mereẽkini misiritiko sãpiretakari? !Auari. Kotxi Kristora misãkiretari Teoso ate ãkapani, kotxi Teoso ikikomoni auakari itxaua. Iua ipina ate ãkapani, ininiã eereka Teoso õkitikari iua, auapika inini ãkapani. Iuara misãkiretari Teoso ate ãkapani. ³⁵ Ininiã kipa atxiïti iotokakatari Kristo tiretiniua? !Auari, kotxi amaxikikosaaki, Kristo tiretapanikaua. Amauarenisaaki, Kristo tiretapanikaua. Amisiritikosaaki, Kristo tiretapanikaua. Natxi auakasaaki, Kristo tiretapanikaua. Amamãkanisaaki, Kristo tiretapanikaua. Monõkori auakasaaki, Kristo tiretapanikaua. Neenamtxi auakasaaki, Kristo tiretapanikaua. ³⁶ Teoso sãkire iõkatsopatakori txari: Pisãkire aãuikini xika, pamonõkoniri ikiniõtika. Aõkiko monõkoni auapika. Soti auïte apanakini okini atoko, apanakini nirekari okiniua ate,

itxa Teoso sãkire iõkatsopatakori. ³⁷ Maerekati ikara atoko aua, iuaritika iteene akãiata, kotxi atiretakiri sikataparataua. ³⁸ Ia nimarota. Kristo tiretiniua iotokakakari !auari. Apĩkasaaki, itiretapanikaua. Aãuapanika inakasaaki, itiretapanikaua. Teoso nitiriakori iaxitikini !iotokakari itiretiniua. Satanasi nitiriakori !iotokakari itiretiniua. Īkorasaaki auakani, katana auakani apaka !iotokakari Kristo tiretiniua. !Auari posotiiiretxi, Kristo tiretiniua iotokakakari. ³⁹ Iaxiti apiko nopinixiti auakani, iaxiti patapi auakani apaka, !iotokakari Kristo tiretiniua. Hinitiniãri Teoso tiretiniua iotokakakari, !hãpokari. Hinitiniãri ikinika Teoso kamakiti auiniãtaã, iuaritika kona hãpokari Teoso tiretiniua iotokakakari. !Auari. Aãuĩte Kristo Xesosi oerekaua Teoso iteene tiretiniua.

9

Teoso Mereẽna Xoteoakori Inakitiakori Īkapani

¹ Atão nisãkire. Kristo nakiti nitxaua, ininiã na nisãpiretari misirieneretxi. Nãkixinireẽ nimarotari nisãkire atão inini, kotxi Erekar Matamatakoti oerekari nisãkire atão inini.

² Ia nisãkire atão. Iteene nimatinaniuatapika. Nãkixinireẽ maerekaxiniretinoka nitxa, ninirimane Kristo sãkire mauikakani xika. ³ Ninirekamari Teoso misiritinino nota, ninoa nitariakori imamisiritakani ĩkapani. Ninirekamari Kristo manirekakanino nota, ninirimane Kristo nakitiakori ininiua ĩkapani. Niposotiniãri ikara atoko nikamini, nikamari ninirimane ĩkapani. Txamari !niposotari. ⁴ Ninirimane Isaeo apika mekaniriakori itxauana. Teoso nirekana ninoa iua anaakori ininiuana. Teoso oerekari iposotiiire ninoamoni. Isãpiretana ninoa ikamaenetakiti ninoa ĩkapani. Isikari ipaniãtakiti iõkatsopatakori ninoamoni. Oerekana ninoa kiiniri atão ikaminina, iuakata isãkirauatakasaakina. Teoso sãpiretana ninoa ikamakiti tĩkane ikinimane kãkiti ĩkapani. ⁵ Ninirimane apika atokiriakorini Apraãoma, Isakima, Isaeoma pakini. Kristo uaimoni iponaniãkasaaki, ninoa apiko mekaniri itxaua, iuaritika Teoso itxaua. Ikinimane auĩte itxaua. “Peerekai,” matxari iua ãtipirika. Ameẽ.

⁶ Atxiĩti Teoso kona kamari ikamaenetakiti Isaeo apika mekaniriakori ĩkapani? Ikamapitikariko. Txamari kona ikinikani Isaeo apika mekaniriakori Teoso nakiti ! itxauana. ⁷ Kona ikinikani Apraão apika mekaniriakori atão Teoso anaakori !itxauana, kotxi Teoso txari Apraão:

Papika mekaniriakori atão inakani Isaki mekaniriakori itxauana.

⁸ Teoso sãpiretari Isaki auini, iua auini apisapanika. !Isãpiretari ãti Apraão ãkiri Isimaeo inakori auini, iua auini apisapanika. Isimaeo iponaniã, kotxi Apraão sirĩka Isimaeo inorokata. Ininiã kãkiti Isimaeo atoko, Teoso anaakori !itxauana. Teoso sãpiretari Apraão iua keene inini, ininiã isikaenetakininoka atão Apraão apika mekaniriakori itxauana. ⁹ Teoso sikaenetari Apraão keene inini. Itxari:

Niketo manapi nikanapiriãko. Iuasaaki Sara keeneroko. Kiki oenetako.

¹⁰ Apikomoni nisãpiretai. Hepeka anaakori iri ãtika. Aãpika atokirini itxaua Isaki inakori. ¹¹⁻¹² Oa anaakori iponaniã ipipe. Iponaniinina apisapanika, maerekati ikaminina apisapanika, erekari ikaminina apisapanika, Teoso sãpiretaro oa:

Merepanika iponaniãkari eereka iponaniãkari nitiri itxauako.

Ininiã Teoso mereẽri iua eereka iponaniãkari Xakoo inakori apiari inini ĩkapani, iua auini apisapanika. Ininiã na Xakoo kamakitini txĩkitakari Teoso mereiniri iua. Teoso mereẽri iua, kotxi inirekari ikara atoko inini. ¹³ Teoso sãkire iõkatsopatakori txari:

Xakoo nitireta. Isaoo nomanata.

¹⁴ Ikara atoko ininiã, kanatokopa itxa axinikakiti? Atauako Teoso na kamari erekari? Ikamapitikari erekari. ãtipirika Teoso kamari erekari. ¹⁵ Teoso txari Moisesi:

Ninirekiniãri ãti niamonĩkini, niamonĩkari. Ninirekiniãri ãti nimoianatini, nimoianatari.

¹⁶ Ikara atoko ininiã, anireẽkiti !itxĩkitakari Teoso mereiniua. Akamakiti !itxĩkitakari Teoso mereiniua. Imereẽua, kotxi iamoniãkua. ¹⁷ Teoso txari Parao isãkire iõkatsopatakoriã:

Nota txīkitakai auñtetxi pininiua, niposotiire noerekini ĩkapani, niuāka ikini itixiti auakani imarotini ĩkapani, itxa Teoso sākire iōkatsopatakori. ¹⁸ Ininiā Teoso nirekiniāri iamoniĩkiniri āti, iua amoniĩkari iua. Apaka inirekiniāri, itxīkitakari āti ākixinire kaikoxinire inini, Teoso nireēkiti imanirekakani tīkane.

Teoso Omanākare, Iamonīkare Pakini

¹⁹ Atxiīti hīte txano nota: “Teoso ikara atoko ininiā, na ate xikani kaikoxinireua ate. ! Aposotari akaminiri Teoso manirekakiniti,” atxiīti hītxano. ²⁰ Txamari !apakata ia atoko hinini. Kiriparai hīte ikara atoko ina sākiretakani Teosomoni? Kākiti hītxaua. Teoso kamakiti pitxaua. Atauako kamakori posotatari ikamakirimoni: “Kinirepa pikamano nota ia atoko ninini?” !Apakata ikara atoko hinini hīkamakirimoni. ²¹ Hīxinikari kiki tiitxi kamakari. Ikamari inireēkiti. Atxiīti āti porīĩ katsariā, ikamari ipi kopiti. Atxiīti ianaka ikamari āti kopiti, peereri inini, kiiniri ĩkapani. Atxiīti ātipekana ikama patimari poiāo ereri, ikiniōtika iāriā iātiko ĩkapani.

²² Ikara atoko itxa Teoso kaminiri kākiti. Teoso kamari apanakini kākiti Teoso omanākare imarotinina ĩkapani imaerekanina xika. Iuasaaki oerekana iposotiire imarotirinina ĩkapani. Teoso omanatana ninoa, iuaritika imīteenekana. Kona uatxa ixipokana ninoa. Txamari iketo manapi ixipokanako ninoa. Uatxa imīteenekapanikari ninoa maerekani. ²³ Apaka ikamari apanakini iua amoniĩkakini. Uatxa imīteenekari iua omanatakini maerekani, kotxi inirekari iua amoniĩkakini imarotini iua ereka inini, kotxi peerekari iua. Iteene itiretari iamoniĩkakini. Ikamana ninoa erekari isikakiti apakapinina ĩkapani. ²⁴ Hīte, ate pakini, iua amoniĩkakini atxaua. Iua akiritakini atxaua. Na Xoteonanini akirita. Akiritana Xoteo minakaniua apaka. ²⁵ Teoso sākire iōkatsopatakori, Oséia iōkatsopatakitiā, Teoso sāpiretari ikara. Itxari:

Kākiti mitxi nota nakitiakori minakonimoni nitxako: “Uatxa nota nakitiakori hītxapekauako.” Ninoa mitxi nimatiretakinitimoni nitxako: “Uatxa nota tiretakini hītxapekauako,” nitxako.

²⁶ Mitxi Teoso txana ninoa: “Na nota nakitiakorini !hītxaua.” Ikara Teoso sākiretiniātaā, iuaātaātxikana: “Teoso ātipirika auāki inakari anaakori hītxaua,” inaāka ninoamoni, itxa Teoso sākire iōkatsopatakori.

²⁷ Apaka Teoso sākire iōkatsopatakoriā, Isaía txari:

Isaéo apika mekaniriakori kaiāopokori, potxoari uiniti kipatxite atoko itxana, txamari poiāonoka makatxakaāka imapinakani ĩkapani.

²⁸ Patimari Teoso xipokiniri iparīka imisiritiniri kākiti imaerekani xika, itxa Isaía. ²⁹ Mitxipeka Isaía txari:

Apiananiri kaposotiireri nīkatari apanakini aāpika mekaniriakori imapinakani ĩkapani. Ininiā atenape auapanika. Teoso manīkatakanimauako, axipokapiimako kākiti Sotoma sitatxiti auakani xipokini atoko, kākiti Komoha sitatxiti auakani xipokini atoko atxapiimako,

itxa Isaía sākire.

Xoteo Mauikakaniri Teoso Sākire

³⁰ Ininiākara aimarotari ia: Xoteo minakaniua manitakanisaakiri Teoso txīkitakinina atāo inakari kamakani ininiuana, iuasaaki Teoso txīkitakana atāo inakari kamakani ininiuana, kotxi auikarina Teoso sākire. ³¹ Txamari Xoteoakori nitaāpotari paniātakori ninoa atāo inakari kamakani txīkitakakari, txamari !apokarina. ³² Kinirepa !apokarina ikara? Kinirepa Teoso na txīkitakana ninoa atāo inakari kamakani ininiuana? Kotxi ! auikarina isākire. Inirekarina iparīkana txīkitakinina atāo inakari kamakani ininiuana. ! Inirekarina auikinirina Xesosi sākire. Ninoamoni Xesosi kai kimapori nopini auakari atoko itxa, kotxi kai xika kākiti mākitita. ³³ Teoso sākire iōkatsopatakori kitxakapirīkari sāpiretari ia kai pirena. Itxari:

Pikenakotariko ia: Nota iokanatakiti kãkitimoni kai atoko itxa. Nitakari iua kai Sião sitatxitiã Xoteoakori kimaporeẽ. Iua kai xika kãkiti mãkitita. Iua kai xika kãkiti irika. Iuaritika iua sãkire auiãkani !ipẽtauata nota apisatoõ.

10

¹ Nitariakori, nãkixinireẽ iteene ninirekari Teoso makatxakiniri ninirimane maerekani, Isaeo apika mekaniriakori maerekani. Nimisãkiretari Teoso ninoa maerekani makatxakiko ïkapani. ² Nimarotari ninirimane iteene nirekiniri iparïkauatini Teoso ïkapani. Txamari ninoa kerokari, kotxi !imarotarina atão iparïkauatini Teoso ïkapani. ³ !Imarotarina Teoso txïkitakiniri kãkiti atão inakari ikamini. Ninoaka nirekamari atão inakari ikaminina, Teoso apakapinina ïkapani. Ininiã !auritarina Teoso txïkitakinina ninoa atão inakari ikaminina. ⁴ Kristo kamari ikinipoko Teoso paniãtakiti iõkatsopatakori iaõka, ininiã iuanoka txïkitakari ikinimane kãkiti iua sãkire auiãkani atão inakari ikaminina.

Apiananiri Akiritakani

⁵ Kitxakapirïka Moisesi sãpiretari atão inakari akamini Teoso paniãtakiti. Iuasaaki itxari:

Ikiniika Teoso paniãtakiti iõkatsopatakori ikiniõtika pikaminiã, pauapininiika pitxako, itxa Moisesi sãkire. ⁶ Txamari !aposotari ikara atoko akamini. Aãuikasaakiri Xesosi sãkire, iua txïkitakaua atão inakari akamini. Ininiãkara !apakata pãkixinireẽ pixinikiniri: “Kipa atxiïti posotari iaxiti apiko nopinixitimoni isini, Kristo notamoni iminini ïkapani?” ⁷ !Apakata pãkixinireẽ pixinikiniri: “Kipa atxiïti posotari ipïkani auiniãtaã isini, Kristo notamoni iminini ïkapani?” ⁸ Xesosi sãkire auape hïtemoni. Na hïsa ãtiãtaã iua sãkire himarotini ïkapani. Hinamaãpekari. Hãkixinireẽpekari. Xesosi sãkire auikiko asãpiretapikari kãkiti. Ia atoko asãpiretari kãkiti: ⁹ Pinamaã, “Xesosi niauïte” pininiã, pãkixinireẽ pauikiniãri Xesosi ipinini Teoso õkitikiniri iua, iuasaaki pimaerekani makatxakaãkako. ¹⁰ Kotxi aãkixinireẽ Xesosi sãkire aãuikiniã, ikamaerekataua. Anamaã “Maerekati kamakarino nota,” aniniã, iua makatxakari amaerekani. ¹¹ Teoso sãkire iõkatsopatakori txari: Iua sãkire auiãkari pẽtauatini !uari.

¹² Iua Kristo sãkire auiãkari atxiïti Xoteo itxaua. Atxiïti Xoteo minakatiua itxaua. Xoteo auïte itxaua Kristo. Xoteo minakaniua auïte apaka itxaua. Ikinimane auïte itxaua Kristo Apiananiri. Isikari itanapoko erekari ikinimane iua akiritakanimoni. ¹³ Teoso sãkire iõkatsopatakori txari:

Ikinimane akiritiniãri Apiananiri uãka imaerekanina imakatxakini ïkapani, iuasaaki imakatxakaãkako imaerekanina.

¹⁴ Kiãtokopa itxa ninoa akiritiniri iua, isãkire imauikakanisaaki? Kiãtokopa itxa ninoa auikiniri isãkire, imakenakotakanisaakirina? Kiãtokopa itxa ninoa kenakotiniri isãkire, imasãpiretakonisaakina? ¹⁵ Kiãtokopa itxa Teoso iokanapirena sãpiretiko, ate maiokanatakaniãri iua sãkire sãpiretakani kãkitimoni? Teoso sãkire iõkatsopatakori txari:

Erekapitikari Teoso iokanapirena erekari sãpiretakani apokini kãkitimoni, kotxi isãpiretarina Teoso kamaerekaxiniretiniri kãkiti. Isãpiretarina erekari Teoso sikakiti kãkitimoni. Ikara iminapiretakitina kamapoxokonitari kãkiti.

¹⁶ Txamari na ikinimane kãkitini auikari Teoso iokanapirena erekari. Kotxi kitxakapirïka Isaía txari:

Apiananiri, asãpiretamari piokanapirena kãkitimoni, txamari !auikarina, itxa Isaía. ¹⁷ Kãkiti kenakotakasaakiri Teoso iokanapirena, Teoso txïkitakari kãkiti auikiniri isãkire. Kristo sãkire akenakotakasaaki, akenakotari Teoso iokanapirena.

¹⁸ Txamari nota pimaã: “Atauako Xoteo kona kenakotari Teoso iokanapirena?” Ikenakotapitikarina, kotxi Teoso sãkire iõkatsopatakori txari:

Iaxiti apiko nopinixiti auakari oerekari Teoso ikini itixiti auakani. Teoso sãkire atoko itxa iaxiti apiko nopinixiti auakari oerekakiti.

¹⁹ Iuaĩkana nipimaãi: “Atauako Xoteo !imarotari Teoso iokanapirena?” Imarotapitikarina. Moisesi sãpiretapekari Teoso sãkire. Itxari:

Nimakatxakari Xoteo minakaniua maerekani, ininiã nitxĩkitakaiko hĩte hĩxikotinina nino mitxi nota nakitiakori minakaniua. Nitxĩkitakai hĩte homanãkarauatini, nino mitxi mimaroreni xika.

²⁰ Isalapekana sãpiretari Xoteo minakaniua pirena. Isãpiretari Teoso sãkire itaparaxinireritika:

Teoso txari: “Nino nota manitakani aõkitano nota. Nimotika nota makiritakanimoni.”

²¹ Apikomoni isãpiretari Teoso sãkire Xoteo kamakiti:

Teoso txari: “Ikiniõtika namanaãri nino kanapiriini notamoni, txamari !ikĩpitarina nisãkire. !Ikamarina nisãkire iaõka. Inireẽkitinoka ikamana.”

11

Xoteo, Teoso Sãkire Auiãkani

¹ Ininiã nipimaãi: “Atauako Teoso !inirekaikari Xoteoakori?” Inirekapitikana. Nota apaka Xoteo nitxaua. Apraão apika mekaniri nitxaua. Pẽxamiĩ apika mekaniri nitxaua.

² Teoso !itakanapari Xoteoakori. Iua mereẽna nino itixi kamiko apisapanika. Himarotari Teoso sãkire iõkatsopatakori, Eríasi tsoatakasaaki Teosomoni Xoteo maerekani isãpiretakasaaki. ³ Iuasaaki Eríasi txari:

Apiananiri, nino okapekari kãkiti pisãkire sãpiretakani. Ikapirinikarina amesa pinakiti pitemoni sikakori takikoãtaã. Notanoka pisãkire sãpiretakarino auapanika. Nino asikatikinitano nota okinino ĩkapani,

itxa Eríasi. ⁴ Kanatokopa Teoso apakapapiretari Eríasi? Teoso txari:

Kona pitenanini auikari nisãkire. Nota nĩkatari setxi mio kikiakori nota nakitiakori. Nino kona teosonetari kãkiti kamakiti Paa inakori. Kona ikapotoreẽkauana iua apisatoõ,

Teoso txari Eríasi. ⁵ Ikara atokotxikana uatxa. Aua apanakini kãkiti Teoso mereẽkini. Imereẽna nino, kotxi iua nirekari ikinipoko erekari ikaminina nino. ⁶ Maerekati kamakani kãkiti, iuaritika Teoso mereẽua ate. Isikari ikinipoko erekari ate ĩkapani maxikatĩka. Aparĩka !itxĩkitakari iua sikiniri ikinipoko erekari atemoni. Aparĩka txĩkitakiniãri ikinipoko erekari isikiniua, ininiã kona maxikatĩka isikarauata atemoni.

⁷ Ininiã kanatokopa atxa asãkire apikomoni? Xoteoakori kona apakapari inireẽkitina. Inirekarina Teoso apakapinina nino erekarini ininiuana. Teoso mereẽkininoka apakapari ikara inakari. Apanakinipekana Teoso !aurita atão imarotinina. Mõsiãreni atoko itxana. ⁸ Teoso sãkire iõkatsopatakori txari:

Teoso txĩkitakari nino aĩkixinire imakakari atoko inini, iua sãkire imimarotakanina ĩkapani. Kokipitikamana, iuaritika !atamatarina Teoso kimapore. Kakenakokipitikamana, iuaritika !inirekarina Teoso sãkire ikĩpitinina. Uatxapiima ikara atoko itxapanika,

itxa Teoso sãkire iõkatsopatakori. ⁹ Kitxakapirĩka Tavii txari Teosomoni:

Nino kiena kaiãopokori. Inipokotakasaakina, iuãkatarina pite apokaerekatina nino, kotxi kaiãopokori ikienana. Ikienana takapiri atoko itxa imaĩkinina nino. Itxĩkitakana ikerokinina. Ikara xika ninirekari pimisiritinina.

¹⁰ Ninirekari nino mõsiãreni atoko ininiuana, ininiã na atão atamatarina pikimapore. Kãkiti tiitxi minari porikitakani atoko pitxĩkitakanako nino aĩtipirika,

itxa Tavii sãkire.

Xoteo Minakaniua Maerekani Makatxakiko

¹¹ Iuaĩkana nipimarauata: “Atauako Xoteoakori maerekani xika Teoso xipokana nino?” Konapitini. Xoteoakori kamari maerekati, ininiãkara Teoso sãpiretari Xoteo minakaniua imaerekanina imakatzakini, Xoteo xikotinina ĩkapani, iuaĩkana Teosomoni ikanapiriinina ĩkapani. ¹² Xoteoakori kamari maerekati, ininiãkara Teoso sikari erekari

kiikiri apanakini itixi auakanimoni. Xoteo mapakapakiniti Xoteo minakaniua apakapa erekari kiikiri. Ininiã Xoteo kanapiriãkasaaki Teosomoni, iusaaki apiaerekata Teoso sikakiti kãkitimoni.

¹³ Uatxa nota misãkiretai hïte Xoteo minakaniua, kotxi Teoso iokanatano nota hïtemoni isãkire nisãpiretini ïkapani. Niuikari hïtemoni niokanatiko. ¹⁴ Ikara atoko ininiã, atxiïti ninirimane Xoteo xikotai hïte, ininiã atxiïti apanakini ninoa kanapiriã Teosomoni, imaerekanina Teoso makatxakini ïkapani. ¹⁵ Teoso takanapakasaakiri Xoteo, iua apakapari Xoteo minakaniua, ininiã ninoa Xoteo minakaniua kanapiriã Teosomoni. Teoso iuaïkana apakapakasaakiri Xoteoakori, iusaakiko peerekari. Ipïkani iuaïkana auãki inini atoko itxako.

¹⁶ Komiri akamakasaaki, ipixini Teosomoni asikasaaki, aimarotari ikinipoko iua komiri iua nakiti ininiua. Aamina kotsa Teoso nakiti ininiã, imina pori apaka iua nakiti. ¹⁷ Xoteoakori oriva mina takakori atoko itxa, takakori Teoso nakiti. Ætikaka ipori kapatakaãka. Oriva ïtopakiri pori apaãka. Iapitaka inaãka ikapatakikoãtaã. Aneë takari katiã. Takari sikakienatari ïtopakiri pori. Hïte Xoteo minakaniua iua oriva ïtopakiri pori atoko hïtxaua. Hãpakapari Teoso sikakiti, kotxi hïte apotiitaua Xoteoakorikata, Teoso nakitiakorikata. ¹⁸ Hïte Xoteo minakaniua, kona hïuikapeua Teoso apakapini hïte. “Iua aãpori kapatakiko atoko, Teoso takanapana Xoteoakori, ate apakapini ïkapani,” kona hïtxape, kotxi aãpori atoko hïtxaua. Na aãpori sikataparatarari aãkotsa. Aãkotsa sikataparatarari aãpori. Ininiã hïte apakapari Teoso sikakiti, kotxi hãpotiitaua Xoteokata.

¹⁹ Atxiïti hïte Xoteo minakaniua txano nota: “Iua aãpori kapatakaãkori atoko Teoso takanapari Xoteoakori. Æti aãpori iapitakiko atoko, Teoso apakapaua ate,” hïtxano atxiïti. ²⁰ Atãopitikara. Teoso takanapari Xoteoakori, kotxi ninoa !auikari isãkire. Iua apakapai hïte, kotxi hïte auikari iua sãkire. Iuaritika !hïuikapeua ikara atoko hinakasaaki. Erepaniko. ²¹ Teoso takanapari Xoteoakori, takari pori sauakakori atoko. Ininiã erepaniko, kotxi ïtopakiri aãpori atoko hïtxaua. Atxiïti ãti õti okanapai hïte apaka.

²² Aimarotari katiraõkiri ininiua Teoso. Aimarotari apaka kataparaxinireri ininiua. Kataparaxinireri iua, kãkiti kamakasaakiri maerekati. Katiraõkiri iua, itiraõki hinirekasaaki. Itiraõki himanirekakaniã, hïte apaka mapara hõkaãka, iua aãpori sauakakori atokokana. ²³ Xoteo takanapiniãri imauikakaniri Xesosi sãkire, auikiniãri iuaïkana isãkire, Teoso iuaïkana mikanapiriãna, kotxi Teoso kaposotiireri ikara atoko ikamini. ²⁴ Hïte ïtopakiri pori sauakakori takarimoni iapitaãkori atoko hïtxaua. Kona ixinireka auã ikara atoko. Pamimari ikara atoko. Xoteo atão oriva takakori atoko itxauana. Ininiã na kamimari mitxi auiniãtaã iuaïkana Teoso takinina ninoa, iuaïkana imikanapiriinina ninoa iuamoni.

Xoteo Maerekani Makatxakaãkapanikako

²⁵ Nitariakori ninirekari himarotiniri apanakini mimarotakiniti, ininiã na hïuikaua. Xoteo !inirekari auikiniri Teoso sãkire uatxa, iuaritika na ikara atoko !itxapani ãtipirika. Ikini itixiti auakani Teoso nireëkini Xoteo minakaniua kanapiriãkasaaki Teosomoni, iusaakiko Xoteo kanapiriãko Teosomoni. ²⁶ Ininiã iusaaki ïkinimane Xoteo kanapiriãko Teosomoni. Iusaaki Teoso makatxakari ninoa maerekani. Teoso sãkire iõkatsopatakori kitxakapirïka auakari ikara atoko itxa. Itxari:

Xoteo itxauako maerekanitxi makatxakakari. Imakatxakariko ïkinika maerekati Xoteoakori kamakiti, Teoso manirekakiniti. Iusaaki Teoso nireëkitinoka inirekanako.

²⁷ Nimakatxakariko maerekati ninoa kamakiti, kotxi kitxakapirïka nikamaenetari ikara atoko inakari, itxa Teoso sãkire iõkatsopatakori.

²⁸ Xoteoakori linirekari Teoso iokanapirena erekari, ininiã Teoso takanapana ninoa. Ininiã Teoso iokanapirena erekari sãpiretaãka hïte Xoteo minakonimoni. Uatxa Teoso mokaiakariakori atoko itxauana Xoteoakori, iuaritika Teoso mereëna ninoa. Aprão,

Isaki, Xakoo pakini apika mekaniriakori itxauana, ininiākara Teoso tirtapanikana ninoa. ²⁹ Teoso kona mamakari isākire. Kākiti iua mereēkini ātipirika iua mereēkini itxauana. Isiākiti erekari kākitemoni !imakatzaka iuaīkana. ³⁰ Hīte Xoteo minakaniua kitxakapirika !hīkīpitari Teoso sākire, iuaritika uatxa Teoso amonīkai hīte, kotxi Xoteo kona kīpitari Teoso sākire uatxa. ³¹ Uatxa Xoteoakori kona kīpitari Teoso sākire. Teoso amonīkapekai hīte Xoteo minakaniua, ininiā Teoso iuaīkana amonīkanako Xoteoakori apaka. ³² Ikinimane kākiti na kīpitari Teoso sākire. Kona aposotari akīpitiniri Teoso sākire. Teoso txīkitakaua ikara atoko anini, kotxi inirekari aimarotiniri maerekati kamakani aniniua, iuaritika !imisiritaua. Iamonīkaua.

Peerekari Teoso

³³ Peerekari Teoso. Atāonoka ikama. Paimatireri iua. Kākiti !imarotari ikamakiti tīkane. Kākiti !imarotari inireēkiti tīkane. ³⁴ !Kimarotikori Teoso xinikakiti. !Kōtākikikori Teoso. ³⁵ Teosomoni ikinipoko aua, ininiā kipa asika atxiīti iuamoni? Asikiniri !auari. Ininiā !auari ate nakiti, iuaīkana Teoso sikiniua īkapani. ³⁶ Kotxi Teosokara kamari ikinipoko. Ikinipoko aua Teoso posotiireē. Ikamari ikinipoko iua īkapani. Ātipirika matxariko Teoso: “Peerekai pite.” Ameē.

12

Teosomoni Sikakori Auākiri

¹ Ininiā nitariakori Teoso amonīkapitikaua. Ininiā nota iteene ōtākikai hīte. Hīteka hīsikaua Teosomoni. Teosomoni sikakori auākiri atoko hītxauako. Ininiā iua nakitinoka hītxaua. Ikara atoko hīkaminiā, Teoso apokaerekatari. Ikara atoko inakari akaminari Teoso, ikara atāo. ² !Hīkamapinikariko Teoso sākire mauīākani kamakiti atoko. Hāuiritariko Teoso txīkitakiniri hīxiniākiti ereka inini, ininiākara ipinipo hītxako. Iuasaakiko himarotari Teoso nireēkiti. Himarotari Teoso nireēkiti ereka inini. Himarotari hīkamakiti tīkane iua apokaerekatini. Himarotari atāo hīkamini.

³ Teoso sikari ikinipoko erekari notamoni, ininiā nisāpiretari iua sākire hītemoni. Ininiā nota ōtākikai hīte hīkinika. Na hīuikapeua. Hīteka atāo himarotauako. Hīteka hātamakauako. Teoso txīkitakai hāuikiniri isākire. Iteene hāuikiniāri iua sākire, iteene hīteka himarotaua. ⁴ Kākiti ito ātika, iuaritika itotxiā auakari kaiāopokori. Aua ikanoke, itapike, oki, ikenakoki txaāpota. Ikinika iparīka aua. Ikanoke parīka ātiāo. Oki parīka ātiāo. Itxaāpota. ⁵ Iua atokokana atxa. Itotxi ātika atoko atxa, iuaritika itoua ate. Kanoketxi, tapiketxi, okītxi, kenakokitxi, itotxiā auakari atoko ate. Kristokata aāpotiitaua. Anakititakakaua. ⁶ Nota parīka Teoso īkapani ātiāo. Āti parīka Teoso īkapani ātiāo. Āti parīka Teoso īkapani ātiāo, itxaāpota. Teoso sikari erekari ikininapemoni, ikara iparīka ikamini īkapani. Atxiīti Teoso sikaimaroretai iua sākire apanakinimoni pisāpiretini īkapani, ininiākara Teoso sākire pauikini iaōka pisāpiretari Teoso sākire kākitemoni. ⁷ Teoso sikaimaroretiniāi apanakini pimiparīkatini, ininiā pimiparīkatariko apanakini. Teoso sikaimaroretiniāi isākire poerekini, ininiā poerekarauatako. ⁸ Teoso sikaimaroretiniāi āti pisikataparaxiniretini, ininiā pisikataparaxiniretariko āti. Teoso nirekiniāri pisikiniri apanakini amonitakiti ninoamoni, ininiā ito pisikako pipoxokoniritika. Teoso sikaimaroretiniāi auītetxi pininiua, ininiā auītetxi erekari pitxauako. Teoso nirekiniāi apanakini piamonīkini, ininiā pipoxokoniritika piamonīkanako.

Tiraōkitxi

⁹ Atāo pitiretariko apanakini pākixinireē. Pomanatariko maerekanitxi. Na piotokakapiri erekari pikamini. ¹⁰ Iteene hītiretakakauako, kotxi Kristo txīkitakapekua aītaritakakiniua. Pitēka pipaxitiniua atokokana, apiata pipaxitariko āti. ¹¹ Pitaparaxinireritika piparīkauatako. Na piarinouatape. Piparīkauatako Teoso īkapani pipoxokoniritika pākixinireē. ¹² Pipoxokoniuatako, kotxi pimarotari Teoso kaminiri ikamaenetakiti. Pimītekenariko pimisiritiko. Ātipirika pimisākiretariko Teoso.

13 Nipokori kaamatiniã pitariakorimoni, tiitxi kaamatiniã pitariakorimoni, auiniã pitemoni, pisikanako. Papakapanako pipoxokoniritika ikinimane Xesosi sãkire auiãkani paapoko apoãkani, ãtiãtaã ãkani.

14 Pamanaãri Teoso erekari ikaminina pite misiritakani. Ari, pamanaãri Teoso erekari ikaminina ninoa. Na pamanaãpiri Teoso maerekati isikinina ninoa.

15 Pipoxokoniuatako poxokorinikata. Pitxiapata kamataniririnikata. 16 ãti pitiretini atokotxikana, ikinimane pitiretako. Na piuikapeua. Pisãkirauatako kãkiti matxineirotenikata, katxineiroteni pimisãkiretini atokotxikana. “Kimaroreno nota,” na pitxape.

17 Kãkiti kaminiãri maerekati pitemoni, na pikamapiri maerekati iuamoni. Atãonoka pikama ikinimane ãkapani. 18 Pinirekariko pauini kãkiti sauaki ereka inini, ininiã maxikatiïka kona pitxitapiri ãti. 19 Nitiretakini, na hãxikatxitapiri ãti. Teosora xikatxitariko, kotxi Teoso sãkire iõkatsopatakori txari:

Nota parïka ãti nixikatxitini. Notara misiritari maerekati kamakari, itxa Apiananiri sãkire. 20 Ari, kona pixikatxitapiri ãti. Pikamariko ãtimoni ia Teoso sãkire iõkatsopatakori iaõka:

Pomanatakiri natxitiniã, pisikakienatari iua. Iposonatinã, pisikari iãtini. Ikara atoko pikaminiã, ipẽtauata maerekati pitemoni ikamini, itxa Teoso sãkire iõkatsopatakori. 21 Na pauiritapiri maerekati piauïte atoko ininiu. Erekari pikamakasaaki, maerekati iokanatapeëkaika.

13

Aãuïteakori Nirekakiti Akïpitini

1 Akïpitariko aãuïteakori nirekakiti, kotxi Teosora auiritana ninoa auïtetxiakori ininiuana. Teosora takari ninoa auïtetxiakori aãuïteakori ininiuana ãkapani. 2 Aãuïteakori nirekakiti amakamakaniã, Teoso nirekakiti apaka !akama, kotxi Teoso txïkitakana ninoa aãuïteakori ininiuana. Ninoa paniãtakiti amakamakaniã, amisiritaãkako. 3 Erekari kamakani !ipïkari iauïtena. Maerekati kamakaninani pïkana ninoa. Pinirekatari pimapïkakaniri piauïte? Ininiã erekari pikamako, ininiã iua txaiko: “Erekai pite.” 4 Teoso nitiri itxaua piauïte, erekari pitemoni ikamini ãkapani. Txamari maerekati pikaminiã, erepaniko. Pipïkariko iua, kotxi iposotari imisiritinii. Iua Teoso nitiri itxaua kãkiti maerekati kamakani imisiritini ãkapani. 5 Ininiãkara pikamariko piauïteakori nirekakiti, kotxi pimakamakanisaakiri, pimisiritiko auapitika. Apaka pikamariko ninoa nirekakiti, kotxi pimarotari pãkixinireë ikara atoko atão pikamini.

6 Piauïteakori Teoso nitiriakori itxauana, ininiã erekari apaka pisikiniri txineiro ninoamoni iparïkana ikaminina ãkapani. 7 Ininiãkara piïkitxitana ninoa amanaãkiti, sitatxi pauini ãkapani, pitii papakapini ãkapani. Pipaxitanako ninoa. Pikamariko ninoa nirekakiti.

Hïtiretakiniua ãkapani

8 Piïkitxitariko ikinika piamotakiti. !Erekari pimaïkitxitakaniri ãti. ãtinoka tãpito erekari. Ia tãpito na txineironi. Ia tãpito atiraõki. Ia atoko inakari tãpito xipokini kona erekari. ãtipirika hïtiretakauako. !Erekari pixipokiniri pitiretiniri ãti. ãti tiretakari kïpitapekari Teoso paniãtakiti iõkatsopatakori. 9 Teoso paniãtakiti iõkatsopatakori txari: “!Pisirïkape pïtanoro minakotokatika. Na pokaniuatape. Na piïtiriuatape. Na pinirekapiri apanakini tii.” Akïpitari ikara Teoso paniãtakiti iõkatsopatakori, apanakini ipaniãtakiti apaka, ia Teoso paniãtakiti ãtika akïpitiniã. Ia Teoso paniãtakiti paniãtaua: “Piteka pitiretiniua atokotxikana, pitiretariko ãti.” 10 Pitiretiniãri ãti, maerekati !pikaminiri iua. Ininiã ãti pitiretiniã, pikamari Teoso paniãtakiti iõkatsopatakori ikinika.

¹¹ Matiretari āti, kotxi aimarotari kaiamapekari Kristo kanapiriini. Ininiā pimerekako. Kona pimakapeko. Piparīkauatako Teoso ikapani, kotxi itixine Xesosi anikiniua ōti apokaāpotanapanoka. Akokaxiti aāuikari Xesosi sākire. Uatxa paītiki ikanapiriā. ¹² İkanōkari xipokaāpotanapanoka. Pokamara apokaāpotanapanoka Kristo kanapiriākasaaki. Maerekati ipiākasaaki kamakori atoko itxa, ininiā maiotokakari ikara akamini. Matakanapari maerekati. Makamari erekari, kotxi erekari akamakiti kapakaua, ininiā maerekati !imaīkaua. Pokamarari atoko itxa erekari akamakiti. ¹³ Pokamara kākiti kamari atāo inakarınoka apanakini apisatoō. Makamari ikara atoko inakari ātipirika. !Erekari kiiniri maerekati akamini. !Erekari apoātini. !Erekari asirīkini sito aītanoro minakotokatika. !Erekari akaminiri maerekati aīto nireēkiti. !Erekari aneenamauatini. !Erekari axikotiniri āti. ¹⁴ İkara atoko inakari akamini !erekari. Makamari ia atoko inakari: Maamanaāri Apiananiri Xesosi Kristo kapakiniua, sotato māka paikori sotato İto kapakini atoko. !Hīxinikapiri: “Kanatokopa nitxa nikaminiri niıto nireēkiti?” Kotxi maerekatınoka aīto nireēkiti.

14

Kona Hītaparakienatakapeua

¹ Hāuiritariko Xesosi sākire poiāonoka auīākari hītekata apotiitiniua. Na hītxitapiri iua, ixinikakiti na hīte xinikakiti atoko iminakanisaaki. ² Kākiti iteene auikiniāri Xesosi sākire, atxiīti inikari itanapoko nipokori. Āti kākiti poiāonoka auikiniāri Xesosi sākire, atxiīti inikari takarinoka. ³ !Erekari ikinipoko niākari sāpiretiniri takarinoka niākarimoni: “Pikerokari” ininiri. Apaka !erekari takarinoka niākari sāpiretiniri ikinipoko niākarimoni: “Pikerokari” ininiri, kotxi Teoso apakapapekari iua. ⁴ Kinakariparai pite āti nitiri pinitakarii: “Pikerokari” ātimoni inakarii. İkerokiniāri, iua patrāote pinitamariko. Maerekati !ikama, kotxi Apiananiri moianatari iua.

⁵ Atxiīti āti sākire: “İa ōti erekari iteene axinikiniri Teoso.” Atxiīti ātipekana: “İkiniōtika erekari iteene axinikiniri Teoso.” Hākixinireē hīxinikariko: “Natokopa itxa atāo nikamini?” ininiā eereka atāo hīkamini tīkane himarotape. ⁶ Hīte: “İa ōti api-aerekata iteene axinikiniri Teoso,” hininiā, ininiā ikara atoko hīxinika Teoso hīpaxitini ikapani, ininiā erekapitikari. İkinipoko niākari nikari ikinipoko, Teoso ipaxitini ikapani, kotxi apisapanika itxari Teoso: “Erekapitikai ia nipokori pisikinino niniākiti ikapani,” itxari. İkinipoko maniākati apaka auikari Teoso nirekiniri iua nikiniri takarinoka. İua apaka txari Teoso inipokotini apisapanika: “Erekapitikai ia kienatxi pisikinino niniākiti ikapani,” itxari. Ininiā iua apaka paxitari Apiananiri. ⁷ Kona ateka auītetaua. Kona aāua ateka ikapaninanini. Kona apina ateka ikapaninanini. ⁸ Auapanika anakasaaki, aparīkauata Apiananiri ikapani. Apīkasaaki, apina Apiananiri ikapani. Ininiā auapanika anakasaaki, apīkasaaki apaka, Apiananiri nakiti atxaua. ⁹ Kristo ipina, eereka ōkitikaua iuaīkana, auapanika inakani auīte ininiua ikapani, ipīkani auīte apaka ininiua ikapani. ¹⁰ Ininiā !apakata pitxitiniri pitari. “!Kiīkitei,” kona pitxapiri, kotxi akinika aāpokako Teoso apisatoō. İuasaaki iua sāpiretariko akamakiti, erekari inini atxiīti, maerekati inini atxiīti. ¹¹ Teoso sākire iōkatsopatakori txari:

Nota Apiananiri, ātipirika auakari nitxaua. İkinimane kākiti kapotoreēkauako nota apisatoō. İkinimane txanoko nota Teoso nininiua.

¹² Ininiā iuasaakiikarako akinika asāpiretari Teoso ikinika akamakiti İkorapokoriti aāuakasaaki.

Masikataparaxiniretakaua

¹³ Ininiā hīotokakariko hītaparakienatakakiniua. Hākixinireē hītxako: “!Nitxīkitakapaniri nitari kerokiniri ikamakiti. !Nitxīkitakapaniriko nitari kaminiri maerekati,” hītxako. ¹⁴ Xesosi Apiananiri nakiti nitxaua, ininiākara nimarotari, apakatapitika Teoso sākire auīākari nikiniri ikinipoko nipokori, kotxi nipokori maerekati !auari. İuaritika kākiti

auikiniãri iua nipokori maerekati inini, !apakata inikiniri. ¹⁵ Hinikiniãri ikinipoko nipokori, atxiïti hītari ākixinire maxirauata, ininiã na atāo hītiretari iua. Kristo ipina iua hītari ĩkapani, ininiã hītakanapariko iua nipokori hinikini, kotxi atxiïti iua !auikaikari Xesosi sākire, iua nipokori hinikini xika. ¹⁶ Erekaru auakasaaki, !hāuiritapiri āti sāpiretinii ikara erekari maerekati inini. ¹⁷ Teoso aāuīte ininiãua, kona nipokorinanini, kona iātakorinanini, axinika. Teoso aāuīte ininiãua, axinikari Erekaru Matamatakoti sikakiti atemoni. Iua txīkitakaua atāonoka akamini. Ikamaerekaxiniretaua. Isikapoxokonitaua. Teoso aāuīte ininiãua, ikara atoko itxa aāuini. ¹⁸ Ikara atoko aparīkauatiniã Kristo ĩkapani, Teoso apokaerekataua. Kākiti apaka apokaerekataua.

¹⁹ Ininiãkara manirekaru kākiti auini ereka inini, neenamatchi mauakani ĩkapani. Masikataparaxiniretakakaua. ²⁰ Na himisiritapiri Teoso parīka nipokori xika. Ikinipoko nipokori erekari hinikini, txamari hīte nikakiti txīkitakiniãri āti takanapiniri Kristo, hīkerokari. ²¹ Hītari kerokiniãri ikamakiti hīte niākiti xika, apiaerekata himanikakaniri iua nipokori. Hītari kerokiniãri ikamakiti hīte iātakiti xika, apiaerekata iua iāriã himiātakani. Na xatiki hītxīkitakapiri hītari kaminiri maerekati. ²² Hītemoni ikinipoko nipokori nikiko erekari, txamari na hīsāpiretapiri apanakini. Erekaru Teosonoka imarotiniri. Hīxinikasaakiri hīkamakiti atāo inini, hākixinireē himarotakasaakiri hīkamakiti atāo inini, iuasaaki hīpoxokoniuata. Ininiã kona hīteka apoītaua. ²³ Hinikasaakiri nipokori, hākixinireē: “Erekaru atxiïti ia nipokori ninikini?” hinakasaaki, iuasaaki Teoso txai: “Maerekati pikama,” kotxi kona pauikari pikaminiri erekari. Himauikakaniãri hīkamakiti ereka inini, ininiã maerekati itxaua hīkamakiti.

15

Āti Nireēkiti Kamiko Pirena

¹ Atxiïti ikinipoko Teoso sākire aāuika, ininiã amoiatariko Teoso sākire poiāonoka auīākari, imaposotakiniti ikamini ĩkapani. !Erekaru ateka nireēkitinoka akamini. ² Erekaru akaminiri aītari nireēkiti, iua amoiatanini ĩkapani, Teoso sākire iteene auikini ĩkapani. ³ Kristo apaka !kamari iuaka nireēkiti. Iua kamari Teoso nireēkiti, kotxi Teoso sākire iōkatsopatakoriã Kristo txari iri:

Kākiti misākirepiretakasaakii pite, notara ninoa misākirepireta.

⁴ Ikinika Teoso sākire iōkatsopatakori iōkatsopataāka ate oerekiko ĩkapani. Teoso sākire iōkatsopatakori aāuikasaaki, aiātapani apoxokoniritika erekari apokini. Aimarotari erekari apokapitikako. Teoso sākire iōkatsopatakori sikataparaxiniretaua.

⁵ Teoso sikataparataua, ininiã apoxokoniritika aiātapani erekari apokini. Isikataparaxiniretaua. Ninirekaru Teoso txīkitakiniri hīte nireēkiti ātinoka inini, Kristo Xesosi nireēkiti iaōka hīkamini. ⁶ Erekaru hinireēkiti hākixinireē ātinoka inini. Erekaru hīsākire ātinoka inini. Ikara atoko hininiã, hīkinika txari Teoso: “Peerekai pite,” kotxi iua aāuīte Xesosi Kristo iri itxaua.

Xoteo Minakaniua Poxokoniuatini

⁷ Hāpakapariko āti, Kristo apakapinii atokokana, ininiã kākiti txari Teoso: “Peerekai pite,” txariko. ⁸ Nisāpiretai. Kristo Xoteoakori nitiri atoko itxapekaua. Ikara oerekari Teoso sikiniri isikaenetakiti. Teoso sikaenetakiti Apraāomoni, Isakimoni, Xakoo pakinimoni, isikaenetakiti apokapeka Xesosi ĩkorapokoriti apokasaaki. ⁹ Kristo Xoteoakori nitiri atoko itxapekaua, ininiã Xoteo minakaniua txari: “Kaamonīkareri Teoso. Peerekari iua,” itxana. Teoso sākire iōkatsopatakori txari:

Xoteo minakaniua auiniātaã nitxariko Teoso: “Peerekai pite.” Nixikarauata pite ĩkapani, kotxi peerekai pite.

¹⁰ Iuaīkana Teoso sākire iōkatsopatakori txari:

Hīte Xoteo minakaniua hīpoxokoniuatako Xoteoakorikata, Teoso nakitiakorikata.

¹¹ Iuaīkana Teoso sākire iōkatsopatakori txari:

Híte hĩkinika Xoteo minakaniua, “Peerekari Apiananiri” hĩtxako. Hĩkinika itixi auakanii hĩxikarauatako Teoso ĩkapani.

¹² Iuaĩkana Teoso sãkire iõkatsopatakoriã Isaía txari:

Auako Xesee apika mekaniri. Xoteo minakaniua auĩte itxauako. Ninoa imarotariko isãkire iaõka ikamini, itxa Teoso sãkire iõkatsopatakori.

¹³ Teosora txĩkitakai himarotiniri isãkire iaõka ikamini. Ninirekari iua iteene kamapox-okonitinii hĩte. Ninirekari ikamaerekaxiniretinii hĩte, kotxi hãuikari iua sãkire. Ininiã himarotari hãpakapapitikariko Teoso sãkire iaõka. Erekarı Matamatakoti posotiireẽ himarotari ikara.

Paoro Teoso Iokanapirena Erekarı Sãpiretakari Xoteo Minakonimoni

¹⁴ Nitariakori, nota imarotari ereka hinini. Nimarotari hĩte iteene kimarore hinini hõerekakakiniua ĩkapani. ¹⁵ Iuaritika ia niõkatsopatakitiã nõtãkikapekai hĩte nitaparax-inireritika. Himarotakiti, iuaĩkana nisãpiretai, iuaĩkana hĩxinikiniri ĩkapani. Teoso sikari erekarı notamoni, ininiã ikara atoko niõkatsopata hĩtemoni. ¹⁶ Teoso sikari erekarı notamoni, kotxi itxĩkitakano Xesosi Kristo nitiri nininiua. Ipaniãtano niparĩkauatini Xoteo minakaniua ĩkapani. Sasetotxi apakapari kãkiti mĩkiti, ininiã sika itxari Teosomoni. Ikara atoko itxa sasetotxi parĩka. Nota sasetotxi atoko nitxaua. Nisãpiretari Teoso iokanapirena erekarı Xoteo minakonimoni, ininiã ninoaka sikaua Teosomoni inireẽkiti ikaminina ĩkapani. Teoso apakapari ikara atoko inakari ninoaka iuamoni sikakanıua. Erekarı Matamatakoti kamaerekatari kãkiti Teoso apakapinina ĩkapani.

¹⁷ Ininiã Teoso ĩkapani niparĩkauatakasaaki, niuikari Xesosi Kristo. ¹⁸ Nota kona iuikaua, kotxi Kristo posotiireẽ Xoteo minakaniua kamari Teoso nireẽkiti. Kristo paniãtano nota iua sãkire nisãpiretinina Xoteo minakaniua. Ipaniãtano inireẽkiti nikamini Xoteo minakonikata nauakasaaki, ininiãkara ninoa auikari nisãkire. Ininiã ikamarina Teoso nireẽkiti. ¹⁹ Erekarı Matamatakoti posotiireẽ noerekari Teoso takaõtxikare ninoamoni. Noerekari posotiiretxi kãkiti maposotakiniti ninoamoni. Ininiãkara ninoa kamari Teoso sãkire iaõka. Kristo iokanapirena erekarı ikinika nisãpiretapekarı kãkiti Xerosareẽ sitatxiti auakani. Eereka kãkiti apikoxiti auakani nisãpireta. Eereka kãkiti apikoxiti auakani nisãpireta. Nitxaãpota kãkiti nisãpiretini. Imapotõkire Irıria tixinipeka napoka, Kristo iokanapirena erekarı nisãpiretini ĩkapani. ²⁰ Ātipirika ninirekarı nisãpiretiniri Kristo iokanapirena erekarı Kristo mimarotakoniãtaã. Ininiã kona niparĩkauata Teoso ĩkapani ãti parĩkauatiniãtaã, kotxi ãti sãpiretapekarı Kristo iokanapirena kãkiti iuaãtaã. ²¹ Kotxi Teoso sãkire iõkatsopatakori txari:

Mitxi iua masãpiretakoni imarotariko iua sãkire. Mitxi iua sãkire makenakotakani imarotariko iua sãkire, itxa Teoso sãkire iõkatsopatakori.

²² Kaiãokataikani ninirekamari nisini hĩtemoni, txamari kona apakata, kotxi iusaaki nisãpiretari Kristo sãkire Kristo sãkire mimarotakanimoni.

Paoro Seenetini Homamoni

²³ Itokanani ninirekamari naõkitinii hĩte. Uatxaika apakata nisini hĩtemoni, kotxi nixipokapekarı niparĩka ĩkorapokoriti. ²⁴ Nirekarı Espãnia tixinimoni nisini. Iuaã nisikasaaki, ninirekarı naõkitinii hĩte. Ninirekarı mapaõti nikaikotini hĩtekata, kotxi nipotxitari hĩtekata nauini. Ninirekarı hĩte moianatinino Espãniamoni nisini ĩkapani, ininiã eereka Espãnia tixinimoni nisa. ²⁵ Uatxa hĩtemoni nisini apisapanika, nisa Xerosareẽmoni, kotxi ninirekarı nanikiniro txineiro kãkiti Teoso nakitiakori iuaã auakani nisikini ĩkapani. ²⁶ Kristo sãkire auiãkani, Xoteo minakaniua Masetõnia tixini auakani, Akaia tixini auakani pakini sikaro oa txineiro. Inirekarina nisikiniro Teoso nakitiakorimoni, matxineirotenimoni, Xerosareẽ sitatxitiã. ²⁷ Ninoa poxokoniua oa txineiro isikinina Xerosareẽ auakanimoni. Erekarı oa txineiro isikinina, kotxi Xoteoakori Kristo

sākire auiākani sikari Teoso sikakiti Teoso iokanapirena erekari Xoteo minakonimoni. Ininiā erekari Xoteo minakaniua sikiniri ipixini itxineirotena Teoso sikakito, Xoteoakorimoni. ²⁸ Ininiā oa txineiro nanika Xerosareē auakanimoni. Ninoamoni txineiro nisika atoko, ininiā eereka nipotorika Espániamoni nisini. Espánia napokini apisapanika nisako hītemoni. ²⁹ Ereē napokasaaki, nisāpiretai ikini sereti erekari Kristo sikakiti hītemoni.

³⁰ Nitariakori nota amanaāi hīte, himisākiretiniri Teoso nota ĩkapani. Hīkenakotatari namanaākiti? Himisākiretariko Teoso nota ĩkapani. Xesosi Kristo aāuīte itxaua, ininiā namanaāi himisākiretiniri Teoso nota ĩkapani. Erekar Matamatakoti txīkitakaua atiraōkiuatini, ininiā himisākiretari Teoso nota ĩkapani. Ikara atoko hīkaminiā, Teoso sikataparatanō nimisiritiko auakasaaki. ³¹ Kristo sākire mauīākani Xotēia tōpa auakani nirekari imisiritinino nota. Himisākiretari Teoso ninoa mamisiritakanino ĩkapani. Himisākiretari Teoso, Teoso nakitiakori Xerosareē auakani apokaerekatiniro txineiro Xoteo minakaniua iokanatakito. ³² Ininiā Teoso nirekiniāri, napoka hītemoni nipoxokoniritika. Ininiā asikapoxokonitakakaua. ³³ Teoso akamaerekaxiniretakiri aua hītekata. Ameē.

16

Paoro Akiriuākaāpotana Ixinikakini

¹ Niokanataro aītarō Pepi inakoro hītemoni. Peerekaro oa. Omoianatana Xesosi sākire auiākani Sēkireia sitatxiti auakani. ² Apiananiri nakito otxaua, ininiā hāpakaparoko hīpoxokoniritika, kotxi iua nakitiakori apaka hītxaua. Onirekiniāri himoianatiniro, himoianataroko, kotxi omoianatapekana itomaneri kākiti. Omoianatapekano nota apaka.

³ Hīsāpiretanako Pirisira, oītaniri Ákira pakini nixinikamanapitinina ninoa. Ninoa parīkauatapeka Kristo Xesosi ĩkapani notakata. ⁴ Okaākanapanokana nota imoianatinina xika. Peerekana, kotxi erekari ikaminanona. Xoteo minakaniua, ikini Teoso misākiretikoātaā apotiitakaniua apaka imarotari erekari Pirisira, Ákira pakini kamakiti nota ĩkapani. ⁵ Xesosi sākire auiākani apotiitaua ninoa aapoko Teoso imisākiretinina ĩkapani, ininiā hīsāpiretanako nixinikamanapitinina ninoa.

Hīsāpiretariko nitiretakiti Epeneto inakori nixinikamanapitiniri iua. Ásia tixiniā iua merepitipanika auikari Kristo sākire. ⁶ Hīsāpiretaroko Maria nixinikamanapitiniro oa. Oa iteene parīkauata ate ĩkapani. ⁷ Hīsāpiretanako ninirimane Ātoróniko, Xónia pakini nixinikamanapitinina ninoa. Mitxipe ninoa aua notakata kateia āki. Teoso kākitimoni iokanatakini iteene imarotana Ātoróniko, Xónia pakini. Ninoa ipi auikari Kristo sākire, iua sākire nauikini apisapanika.

⁸ Hīsāpiretariko Āpirato nixinikamanapitiniri iua. Nitiretari iua. Nitari itxaua, kotxi Apiananiri anaakori atxaua. ⁹ Hīsāpiretariko Opano nixinikamanapitiniri iua. Iua parīkauata Kristo ĩkapani atekata. Hīsāpiretariko nitiretakiti Esitaki nixinikamanapitiniri iua. ¹⁰ Hīsāpiretariko Aperi nixinikamanapitiniri iua. Imisiritiko sauaki iua !ikipatari Kristo sākire auikini. Hīsāpiretanako Arisitóporo aapoko auakani nixinikamanapitinina ninoa. ¹¹ Hīsāpiretariko ninirimane Erotxiāo nixinikamanapitiniri iua. Hīsāpiretanako Apiananiri nakitiakori Nasiso aapoko auakani nixinikamanapitinina ninoa.

¹² Hīsāpiretanako sitoakoro Tipena, Tiposa pakini nixinikamanapitinina ninoa. Ninoa parīkauatapitipo Apiananiri ĩkapani. Hīsāpiretaroko nitiretakito Pesitxi nixinikamanapitiniro oa. Oa apaka parīkauatapitipo Apiananiri ĩkapani. ¹³ Hīsāpiretanako Hopo, inoro pakini nixinikamanapitinina ninoa. Apiananiri mereēri iua. Iua inoro taretano nota, ninoro taretinino atokotxikana. ¹⁴ Hīsāpiretanako Asīkiritō, Pirekōtxi, Émisi, Pataropa, Émasi, ikinika aītariakori ninoakata apotiitakaniua pakini nixinikamanapitinina ninoa.

¹⁵ Hīsāpiretanako Piróroko, Xória, Nereo, Nereo itaro, Orīpa, ikinika Teoso nakitiakori ninoakata apotiitakaniua pakini nixinikamanapitinina ninoa.

¹⁶ Himaaratakakauako, kotxi aītaritakakaua. Kristo nakitiakori ikini Teoso misākiretikoātaā apotiitakaniua xinikamanapitai hīte.

Paoro Ōtākikare Mapotōkire

¹⁷ Nitariakori iteene nōtākikai hīte. Erepaniko kākiti neenamatzxi nireēkani. Ninoa nirekari Kristo sākire auiākani omanatinina apanakini Kristo sākire auiākani. Na atāo ninoa oerekakiti sākiretxiti, ininiā atxiīti kākiti takanapari Kristo sākire auikini ninoa oerekakiti xika. Kristo sākire nota oerekakiti hītemoni atāo. Ninoa oerekakiti koketakori sākiretxiti. Ninoa moianariakori kona hītxapeua. ¹⁸ Kākiti ikara atoko inakani kona parīkauata aāuīte Kristo īkapani. Ninoa parīkauata iītona nireēkiti īkapani. Imisirienetarina kākiti sākire auiākani. Imisirienetarina kākiti ikara atoko inakani, kotxi kākiti potxitari isākirena. Kākitimoni peerekari ninoa sākire. ¹⁹ Ikinika kākiti imarotari hīte kaminiri Kristo sākire iaōka, ininiā nota iteene poxokoniuata hīte ikara atoko hininiā. Ninirekari kiīkite hinini erekari hīkamini īkapani. Ninirekari himimarotakaniri maerekati hīkamini. ²⁰ Teoso akamaerekaxiniretakiri, paītiki xipokariko Satanasi posotiire, ininiā hīposotari hīokanatiniri Satanasi isini.

Aāuīte Xesosi Kristo ātipirika sikari ikinipoko erekari hītemoni.

²¹ Tximótxio, notakata parīkauatakari, xinikamanapitai hīte. Ninirimane Arósio, Xasão, Sosipato pakini xinikamanapitai hīte apaka.

²² Nota Tésio inakori iōkatsopataria ia iōkatsopari Paoro īkapani. Nota apaka xinikamanapitai hīte, kotxi Apiananiri nakiti nitxaua.

²³ Nota Paoro aua Kaio aapoko. Kristo sākire auiākani apotiitaua iua aapoko Teosokata isākirauatinina īkapani. Iua nirekari himarotini iua xinikamanapitini hīte. Erásito inakori apaka xinikamanapitai. Txineiro nīkatakari iua. Sitatxi auakani sikakito inīkata iua. Aītari Koato inakori xinikamanapitai hīte apaka.

²⁴ Aāuīte Xesosi Kristo ātipirika sikari ikinipoko erekari hītemoni. Ameē.

²⁵ “Peerekari Teoso,” matxako. Iua posotari ikamataparaxiniretinii hīte, ininiā kona hīotokakari hāuikiniri Kristo sākire. Teoso iokanapirena erekari nota sāpiretakiti, Xesosi Kristo sākire pakini sāpiretari ikara atoko inakari. Ikara Teoso sākire kitxakapirīka ! kimarotikori. Uatxa imarotapeēkaika. ²⁶ Īkorasaaki asāpiretapekari ikara Teoso sākire, Teoso sākire sāpiretakani iōkatsopatakiti kitxakapirīka. Uatxa aimarotari ninoa sāpiretakiti. Teoso auapika inakari paniātari isākire sāpiretiko ikini itixiti auakanimoni. Ininiā apakata ikinimane auikiniri isākire. Apakata ikinimane kaminiri inireēkiti iaōka.

²⁷ Iuanani Teoso txaua. Iuanokara imarotari atāo ikinipoko. Ātipirika matxariko iua: “Peerekai pite, kotxi peerekari Xesosi Kristo.” Ameē.

1 KORĪTO

Merepanika Paoro Iokanatsopatakiti Korīto Auakanimoni

¹ Nota Paoro, Xesosi Kristo iokanatakitalo. Teoso akiritano iua iokanatakiti nininiua ĩkapani, kotxi inirekari iokanatinino kăkitimoni isăkire nisăpiretini ĩkapani. Aĭtari Soseni inakori aua notakata uai. ² Niokanatsopata hĭtemoni, kăkiti Xesosi săkire auĭăkani Korĭto sitatxiti auakanimoni. Kristo Xesosi makatxakakini hĭtxaua Teoso ĩkapani. Teoso akiritai hĭte iua nakitiakori hininiua ĩkapani. Apaka niokanatsopata ikini tŏpati auakanimoni, aăuĭte Xesosi Kristo uăka akiritakanimoni. Ate auĭte Xesosi, ninoa auĭte apaka itxaua. ³ Aĭri Teoso, Apiananiri Xesosi Kristo pakini sikari ikinipoko erekari hĭtemoni. Ninoa kamaerekaxiniretai hĭte.

Paoro Misăkiretari Teoso Korĭto Auakani ĩkapani

⁴ Ătipirika nimisăkiretari Teoso ia atoko: “Peerekai pite, kotxi Xesosi Kristo sikari ikinipoko erekari Korĭto auakanimoni. Ikara erekari pite sikakiti. ⁵ Peerekai pite, kotxi pite kamaerekatari ninoa auini. Pite oerekana ninoa săkire atăo inini ĩkapani. Pite kamaimaroretana. Ininiă ninoa săkire apiaerekata. Ninoa imarore apiaăpota.” Ia atoko nimisăkiretari Teoso.

⁶ Hĭtemoni asăpiretakiti Kristo pirena auapeka hăkixinireē. Ininiă iteene hăuikari Kristo săkire. ⁷ Ininiă hiătapakasaakiri aăuĭte Xesosi Kristo kanapiriini, ikini sereti erekari Teoso sikakiti aua hĭtemoni iua parĭka hĭkamini ĩkapani. ⁸ Hĭte isikataparaxiniretiniritika ikanapiriini ōti apokako. Ininiă maerekati hĭtemoni !auari aăuĭte Xesosi Kristo apokasaaki. ⁹ Teoso kamariko ikara hĭtemoni, kotxi ikinika isăkire iaōka ikamako. Iuakara akiritai hĭte, himoianatiniri imi aăuĭte Xesosi Kristo.

!Homanatakakapeua

¹⁰ Nitariakori, aăuĭte Xesosi Kristo posotiireē nŏtăkikai. Hĭsăkire Ătinoka hĭtxako. !Ninirekari homanatakakiniua. Ninirekari Ătika hĭxinikakiti auini. Ninirekari Ătika hinirekakiti auini. ¹¹ Nitariakori, Kroee aapoko auakani săpiretano hĭtekarika hina-iatakakiniua. ¹² Kotxi apanakini hĭte txari: “Paoro săkirera nota kĭpita.” Ătipekana: “Aporo săkirera nota kĭpita.” Ătipekana: “Petro săkirera nota kĭpita.” Ătipekana: “Kristo săkirera nota kĭpita.” ¹³ !Apakata ikara atoko hĭkamini. Kristo !ikaiarikaăka. Kona Paoro ipina aamina ĩpiriămitakari nopini hĭte ĩkapani. Kona Paoro uăkaă hĭpatxisataăka.

¹⁴ Nisăpiretari Teoso ereka inini, kotxi kona notani patxisatai hĭte. Krispo, Kaio pakininanira nipatxisata. Apikomoni !nipatxisatari kăkiti. ¹⁵ Ininiă kona kăkiti săpiretari nipatxisatiniri kăkiti nota uăkaă. ¹⁶ Ii. Nimaxinĭkaretari. Nipatxisatari Es-itėpana, iua aapoko auakani pakini. Apikomoni nipatxisatakini !nixinikaika. ¹⁷ Kristo kona iokanatanano nipatxisarauatini ĩkapani. Iokanatanano Teoso iokanapirena erekari nisăpiretini ĩkapani. !Inirekari kăkiti săkireē, kăkiti imaroreē nisăpirenauatini, kotxi kăkiti imarore !isăpiretari Kristo ipinini aamina ĩpiriămitakari nopini amaerekani imaktxakini ĩkapani.

Teoso Imarore

¹⁸ Teoso săkire mauĭăkani uăkatari !kiĭkiteri kăkiti Kristo ipinini aamina ĩpiriămitakari nopini săpiretakani. Atepekana, Kristo ipinini săpiretiko oerekari Teoso posotiire, kotxi Kristo ipinini makatxakari amaerekani. ¹⁹ Teoso săkire iōkatsopatakori kitxakapirĭka txari:

Nixipokariko ĩkorapokoriti kimarorerini imarore. Nixipokariko kiĭkiterini ĭkĭte.

Itxa Teoso kitxakapirĭka. ²⁰ Ĩtapari kimaroreri? Ĩtapari apaiaōkarauatakari? Naniparari kaxinikareri ĩkorapokoritikiri? Teoso oerekapekari ĩkorapokoritikiri imarore mĭĭkiteti

imarore atokotxikana inini. ²¹ Paimatireri Teoso, kotxi !auiritari ĩkorapokoriti auakani imarotini iua ninoaka imaroreē. Apanakinimoni Kristo sākire sãpiretiko !kiĩkiteri, iuaritika Teoso apokaerekatari imakatzakiniri kãkiti maerekani, Kristo sākire sãpiretiko auikasaakina.

²² Xoteoakori nirekari atamatiniri Teoso takaõtxikare, isãkire auikinina ĩkapani. Krekoakoripekana nirekari imaroretxi apiari imarotini. ²³ Iuaritika ate sãpiretari Kristo ipinini ĩpiriãmitakari nopini amaerekani imakatzakini ĩkapani. Xoteoakori !inirekari ĩkara asãkire auikinina. Krekoakoripekana uãkatari ĩkara asãkire miĩkiteti sãkire inini. ²⁴ Iuaritika Teoso akiritakini aua Xoteoakori, Krekoakori pakini. Ninoamoni Kristo parĩka oerekari Teoso posotiire. Iua parĩka oerekari Teoso imarore. ²⁵ Kãkiti uãkatari Teoso imarore !kiĩkiteri, iuaritika axapitiki Teoso imarore apiata. Ikinipoko kãkiti imarore poiãoka. Axapitiki Teoso tapara apiata. Ikinipoko kãkiti tapara poiãoka.

²⁶ Nitariakori, Teoso akiritakasaakii, hĩxinikari kãkiti xinikakiti atokokana. Natokopa itxa hĩte iusaaki? Iusaaki !kimarorei. !Kaposotiirei iusaaki. Auĩtetxi !hĩtxaua iusaaki. Itori hĩte ĩkara atoko inakani iusaaki. ²⁷ Teoso mereēri kãkiti. ĩkorapokoriti auakani uãkatari ninoa kãkiti Teoso mereēkini miĩkiteni ininiua. Imereēna ninoa, kimaroreni ĩkorapokoriti auakani pẽtauatini ĩkapani. ĩkorapokoriti auakani uãkatari ninoa kãkiti Teoso mereēkini iõkapetakani ininiua. Imereēna ninoa, katapararini ĩkorapokoriti auakani pẽtauatini ĩkapani. ²⁸ Iua mereēri kãkiti. ĩkorapokoriti auakani uãkatana ninoa Teoso mereēkini minakani ininiuana. Imereēri apanakini manirekakini. Imereēri kãkiti omanatakoni. Kinirepa Teoso mereēri kãkiti ĩkara atoko inakani? Teoso oerekari kãkiti, kãkiti uãkatakiti apiari inini na atão. ²⁹ ĩkara atoko ininiã, kãkiti !iposotari iuikiniua Teoso apisatoõ. ³⁰ Teosora txĩkitakaua Xesosi Kristo nakitiakori aniniua. Kristo nakiti aniniãua, aimarotari imaroretxi atão inakari. Kristo txĩkitakaua atão inakari akamini Teoso apakapiniua ĩkapani. Iua txĩkitakaua Teoso nakitiakori aniniua ĩkapani. Iĩkitxirauata ate ĩkapani ipĩkasaaki.

³¹ Teoso sãkire iõkatsopatakori txari:
!Apakata piuikiniua. Apakatapitika piuikiniri Apiananiri.

2

Xesosi ĩpinini ĩpiriãmitakari Nopini

¹ Nitariakori, napokasaaki hĩtemoni, nisãpiretai Teoso sãpiretakiti. Kona nisãpiretai notaka sãkire nimatire. Iusaaki kona noerekai notaka imarore. Teoso sãkirenoka nisãpiretai hĩte. ² Hĩtekata nauakasaaki, na ninirekari ãti imaroretxi nimarotini. Ninirekari Xesosi Kristonoka nisãpiretinii. Apiata ninirekari nisãpiretinii iua ipinini kãkiti ĩkapani ĩpiriãmitakari nopini. ³ Hĩtekata nauakasaaki kona kataparaxinireno. Nikikinanaka nipĩkarauatini xika. ⁴ Iusaaki kona kãkiti imaroreēni nisãkirauata. Kona kãkiti imaroreēni ninirekari hãuikiniri Teoso iokanapirena nisãpiretakiti iusaaki. Teoso iokanapirena nisãpiretakasaaki, kãkiti imarotari Erekari Matamatakoti posotiireē nisãkirauata. ⁵ Ininiã kona kãkiti imaroreēni hãuikari Teoso iokanapirena. Hãuikari Teoso iokanapirena Teoso posotiireē.

Erekari Matamatakoti Imarore

⁶ Teoso sãkire auĩãkani iteene ãkixinireē aneēkani imarotari Teoso iokanapirena asãpiretakiti kimatireri inini. ĩkara imaroretxi kona ĩkorapokoriti auakani imaroreni. Kona auĩtetxiakori imaroreni ĩkara imaroretxi. Kotxi ninoa imarore paĩtiki !auaika. ⁷ Asãpiretari Teoso imarore mitxi kãkiti mimarotakiniti, kotxi Teoso kipatari. Itixi kamiko apisa Teoso nirekaua asãpiretiniri ĩkara imarore kãkitimoni ate iotximere aãpakapini ĩkapani. ⁸ Auĩtetxiakori ĩkorapokoriti auakani !imarotari ĩkara Teoso imarore. Ninoa imarotaãkamariko, ininiã !okamarinako Apiananiri kaiotximereri aamina ĩpiriãmitakari nopini. ⁹ Kitxakapirĩka Teoso sãkire iõkatsopatakori txari:

Kākiti oki !atamatapanikari Teoso kamakiti tīkane iua tīretakani īkapani. Kākiti kenakoki !ikenakotapanikari Teoso kamakiti tīkane iua tīretakani īkapani. Kākiti !ixinika-panikari Teoso kamakiti tīkane iua tīretakani īkapani.

¹⁰ Iuaritika Teoso oerekapekaua Erekarī Matamatakotiā. Ikinipoko imarotakari itxaua Erekarī Matamatakoti. Ikinipoko kipatakori Teoso imarore imarota. ¹¹ Kākiti ākixinirenoka imarotari iuaka ixiniākiti. Āti !imarotari iua xiniākiti. Iua atokokanera Erekarī Matamatakotinoka imarotari Teoso xiniākiti, kotxi Teoso itxaua iua. ¹² Kona ate apakapari ātiāo matamatakoti īkorapokoritikiri. Ate apakapari Erekarī Matamatakoti, Teoso iokanatakiti atemoni, ininiākara aposotari aimarotiniri Teoso sikakiti atemoni. Itori isikakiti.

¹³ Atemoni isikakiti asāpireta. Kona kākiti imaroreēni asāpiretari kākiti. Erekarī Matamatakoti oerekaua asāpirenauatini. Ate atamatari Teoso oerekakiti isākire iōkatsopatakoriā, eereka ātiātaā isākire iōkatsopatakoriā aātamari iua oerekakiti, ininiā iuasaaki aimarotari atāo. Ikara atoko aōerekai hīte. ¹⁴ Erekarī Matamatakoti mauakiniti !apakapari Erekarī Matamatakoti oerekakiti, kotxi iuamoni ikara sākiretxi miīkiteti sākire. !Iposotari imarotiniri Erekarī Matamatakoti sāpiretakiti, kotxi Erekarī Matamatakoti !auari iuamoni. ¹⁵ Erekarī Matamatakoti auakasaakiri kākiti, iuasaaki iposotari ataerekatiniri imakinika, ininiā kākiti Erekarī Matamatakoti mauakiniti !iposotari apoītiniri iua.

¹⁶ Teoso sākire iōkatsopatakori txari:
Kiripa imarotatari Apiananiri xiniākiti iua oerekini īkapani?
Iuaritika Kristo oerekaua iuaka xiniākiti.

3

Teoso Nitiriakori Atxaua

¹ Nitiriakori, hīte !ikamari ikinipoko Erekarī Matamatakoti nireēkiti. Hīkamari hīteka nireēkiti īkorapokoriti auakani kamini atokokana. Ininiākara nisākirauata hītekata amarinikata nisākirauatini atoko, kotxi poiāonoka hāuikari Kristo sākire. ² Tinitxiā atoko inakari nisākire nisikai. Xinitxi atoko inakari nisākire kona nisikai, kotxi !himīteenekari nisākire kamimari. Uatxapiima hīte !iposopanika noerekakiti kamimari himarotini. ³ Īkorapokoriti auakani xinikini atoko hīxinikapanika. Ikara xika hīxikotakakaua. Hina-iatakakaua. Homanatakakaua. Hīteka nireēkiti hīkama, īkorapokoriti auakani kamini atokokana. ⁴ Kotxi ātikaka hīte txari: “Paoro sākire nikīpita.” Apanakini txari: “Aporo sākire nikīpita.” Ikara atoko hininiā, kākiti īkorapokoritikini sākire atoko hīsākirauata. ! Kīikitepanikai.

⁵ Kiripa Paoro? Kiripa Aporo? Kristo nitiriakorinoka atxaua. Iua sākire sāpiretakaninoka atxaua. Hīte auikapekari Kristo sākire asāpiretakasaakii. Apiananiri sikari parīkatxi ikininapemoni akamini īkapani. ⁶ Ia atoko itxa parīkatxi Teoso sikakiti: Merepanika nota sāpiretari Teoso sākire kākitimoni, takariki nitakini atokokana. Eereka Aporo oerekari ninoa kākiti apikomoni Teoso sākire. Āparaā takari nireēkiti atoko itxa apikomoni Teoso sākire isāpiretakiti. Nota, Aporo pakini parīkauata ikara atoko, iuaritika Teosonoka aneēkakari takari. Iuanokara txīkitakari kākiti auikiniri isākire. ⁷ Takariki taākari, āparaā siākari pakini minakati ninoa, kotxi Teosonoka aneēkakari takari. ⁸ Teoso sākire merepanika sāpiretakari nirekari iparīkauatini Teoso īkapani. Teoso sākire apikomoni sāpiretakari apaka nirekari iparīkauatini Teoso īkapani. Ininiā Teoso sikariko ninoa parīka īki ninoamoni iparīkana iaōka. ⁹ Teosokata parīkauatakani atxaua. Teoso kikiote atoko hītxaua. Apaka Teoso aapoko atoko hītxaua.

¹⁰ Teoso sikapekano ikinipoko erekarī niparīka iua īkapani nikamini. Aapokotxi kamiko apisa aapokotxi kamakari kimaroreri takari kaikori, inopini aapokotxi ikamini īkapani. Iua aapokotxi kamakari kimaroreri atoko nitxaua. Merepanika nota parīkauata Kristo sākire nisāpiretini. Kaikori aapokotxi kamakari takakiti atoko itxa ikara iua sākire.

Eereka apanakini oerekarauata apikomoni. Ninoa parīka aapokotxi kamiko kaikori nopini atokokana itxa. Erepaniko akamakasaakiri ikara parīkatxi. ¹¹ Kaikori, aapokotxi kamakari takakiti atoko itxa Xesosi Kristo sākire. Āti kaikori kākiti sākire !auari. Auape kaikori Xesosi Kristo sākire, kotxi kataparari. ¹² Xesosi Kristo sākire aāuikasaaki, kaikori aāuini ĩkapani iposope. Aapokotxi iua kaikori nopini atoko itxa aparīka. Aparīka atxiīti oro atoko itxa. Atxiīti pirata atoko itxa. Atxiīti kai erekari atoko itxa. Atxiīti aamina atoko itxa. Atxiīti aātsopa atoko itxa. Atxiīti katsotati atoko itxa aparīka.

¹³ Itixi xipokini ōti kākiti imarotariko natokopa itxa iparīka, kotxi iuasaakiko arikatxi ataerekatari iparīka. ¹⁴ Iparīka marikakaniā, apakapari iparīka ĩki. ¹⁵ Iparīka arikiniā, ! apakapari iparīka ĩki. Iuaritika Teoso auiritari iua auini ātipirika Teosokata, txamari iua xipokaarita.

¹⁶ Kona hīte imarotapanikari Teoso misākiretiko aikoti hininiua? Kona hīte imarotapanikari Erekarī Matamatakoti auini hīto āki? ¹⁷ Kākiti xipokiniāri Teoso misākiretiko aikoti, Teoso xipokariko iua. Teoso misākiretiko aikoti iua nakiti. Hītera Teoso misākiretiko aikoti hītxaua.

¹⁸ Kona hīteka misirienetapeuako. Atxiīti ātikaka kākiti hīte sauaki uākatari kimaroreni ininiua, kotxi imarotarina ĩkorapokoriti auakani imarore. ĩkorapokoriti auakani uākatari Kristo sākire auīākari miikiteti ininiua. Ininiā erekape kākiti ĩkorapokoriti auakani akiritinii miikiteti hininiua, kotxi iuasaaki kimaroreri atāo inakari hītxaua. ¹⁹ Teosomoni ! kiikiteri ĩkorapokoriti auakani imarore. Teoso sākire iōkatsopatakori txari:

Teoso maīkari kimarorerini ĩkorapokoriti auakani ninoaka imaroreē.

²⁰ Apaka Teoso sākire iōkatsopatakori txari:

Apiananiri imarotari ĩkorapokoriti kimarorerini imarore !itxapō.

²¹ Ininiā !apakata kākiti iuikiniua imarore xika. Ikinika aua hītemoni. ²² Paoro aua hītemoni. Aporo aua hītemoni. Petro aua hītemoni. Itixi aua hītemoni. Hāuini, hīpinini apaka aua hītemoni. Uatxa auakari, katana auakari apaka aua hītemoni. Ikinipoko aua hītemoni. ²³ Kotxi hīte Kristo nakiti hītxaua. Kristo, Teoso nakiti itxaua.

4

Kristo Iokanatakini Kākitimoni

¹ Erekarī kākiti imarotiniri auītetxiakori aminakanua. Kristo nitiriakori atxaua. Teoso iokanapirena nīkatakani atxaua. Iua sikari iokanapirena atemoni apanakini asāpiretini ĩkapani. Iua Teoso iokanapirena !imarotaāka mitxi. ² Nitiritxi atāo inakari ātipirika kamari iauīte paniātakiti. ³ !Nimaākatari hīte ataerekatinino nota. !Nimaākatari apanakini ataerekatinino apaka. Kona notaka ataerekataua apaka. ⁴ Nāxixinireē maerekati ! auari, iuaritika nikamapekari maerekati. Apiananirinokara ataerekatano. ⁵ Ininiā ! hīsāpiretapiri: “Kona erekari iua parīka. Peerekari ikara parīka,” kona hītxape Apiananiri apokini apisa. Apiananiri apokini hiātapako. Iua oerekariko ipiāmoni iomaātakori. Oerekariko kākiti nirekakiti ākixinireēna iparīkauatakasaakina. Iuasaaki Teoso txariko kākiti: “Erekapitikari pikamakiti,” itxa.

⁶ Nitiriakori, ikara nota pirena, Aporo pirena pakini nisāpiretai atāo inakari himarotini ĩkapani, āti apiata himiuiakani ĩkapani. Ininiā hīkamariko Teoso sākire iōkatsopatakori iaōka, kotxi !apakata kākiti iteene iuikiniri āti, ātipekana imanirekakani inini. ⁷ Pite apiananitakari !auari. Himapakapakinini !auari. Kapakapare hininiā, kinirepa mapakapareni sākirauatini atoko hītxa? ⁸ Ikinipoko hinireēkiti auapeka hītemoni atxiīti? Katiipekai hīte. Ate ereē mauakanisaaki, atxiīti hīteka kamari auītetxi hininiua. Ninirekari auītetxi atāo hininiua, ininiā ate auītetxi atxaua hītekata. ⁹ ĩkorasaaki neenamtxi xipoka atoko, auītetxi kāiatakari kanapiriā isotatonekata. Ninoa mapotōkire kākiti auītetxi maīkakini minaāka apanakini atamatinina ĩkapani, inapetinina ĩkapani. Eereka okaākana ninoa kākiti. Nota xinikari Teoso nirekari ate iua iokanatakini

ikara kākiti maīkakoni atoko aniniua. Ikinimane atamataua. Kākiti, Teoso nitiriakori iaxitikini apaka atamataua apininimoni asini. ¹⁰ Hītemoni, miīkiteni ate txaua, Kristo īkapani aparīkauatakasaaki. Hītemoni, kimarorei hīte, Kristo īkapani hīparīkauatakasaaki. Hītemoni, !kaposotiireua ate. Hītemoni kaposotiirei hīte. Hīte paxitaāka, txamari ate omanataāka. ¹¹ Uatxapiima Kristo sākire ate auikini xika anatxita. Aposonata. ! Kamākaua. Amisiritaāka. !Kaapokoua. ¹² Iteene aparīkauata anireēkiti aamotini īkapani. Kākiti takasaakiri maerekati atemoni, ate amanaāri Teoso erekari ninoamoni itakini īkapani. Amisiritikosaaki, iusaaki amīteenekari. ¹³ Apanakini misākipireretakasaakiua, erekari ate apakapapiretana ninoa. Uatxapiima apanakinimoni īkorapokoriti txiko atoko atxaua. Kasakari atoko atxaua ninoamoni.

¹⁴ Kona niōkatsopata ikara hīpētauatini īkapani. Niōkatsopata ikara nipinitinii īkapani monōkori apokini apisa, kotxi namariteni nota tirketakini atoko hītxaua. ¹⁵ Hītemoni tesi mio Teoso sākire oereēkani auaākamako, iuaritika poiāo hīri atoko inakari aua. Notara hīri atoko nitxapekaua, kotxi hāuikari Teoso iokanapirena erekari noerekasaakii Kristo Xesosi posotiireē. ¹⁶ Ininiā nōtākikai: Nota kamakiti atokotxikana hīkamako. ¹⁷ Ikara īkapani niokanatarī Tximōtxio hītemoni. Iua namarite nitiretakiti atoko. Iua kamari Apiananiri paniātakiti iaōka. Iua txīkitakai hīxinikiniri nikamakiti ikiniōtika Kristo posotiireē. Ikinī tōpati Kristo sākire auīākani apotiitiniātaāua, noerekari kākiti erekari īkamini ikiniōtika, erekari nota kamini atokotxikana.

¹⁸ Ātikaka hīte iuikaua, kotxi hūākatari nota mapokakani hītemoni. ¹⁹ Txamari Teoso auiritiniāno, paītiki napokako hītemoni. Iusaakiko !nirekari nimarotiniri ninoa iuikakaniua sākire. Napokasaaki ereē, nirekari nimarotiniri Teoso posotiire. ²⁰ Teoso auītetxi ininiātaāua kona sākiretxinani aua. Iposotiire apaka aua. ²¹ Kiripa hīte nireka? Hinirekatari ninoropatinii aīkeē, ereē napokasaaki? Hinirekatari nitiretinii, nimatxitananii, ereē napokasaaki?

5

Maerekati Xesosi Sākire Auiākani Sauaki

¹ Isāpiretaāka kākiti ereē kaminiri maerekati itotxi nireēkiti āti kākitekata. Iua kākiti maerekani apiari, kotxi iua sirīka iri itanorokata. Teoso sākire mauīākani kamari maerekati, iuaritika ninoa !ikamari ikara atoko inakari maerekati, kiki hīte sauaki auakari kamakiti atoko. Ninoa !nirekari isākiretinirina ikara atoko inakari maerekati. ² Iuaritika hīte iuikaua. !Himatinaniuata himaerekani xika. Apiaerekata īkora iri itanorokata sirīkakari hīokanatinī itakanapiniī. ³ Niīto kona ereē aua, iuaritika nixinikakiti auapitika ereē hītekata, ininiā nota ereē hītekata nauini atokokana, nimereēpekari iua maerekati kamakari misiritiko. ⁴ Aāuīte Xesosi Kristo uākaā hāpotiitakasaakiua, nota aua hītekata nixinikakitiā. Iusaaki himarotakasaakiri Xesosi Kristo posotiire, ⁵ hīsikariko iua Satanasimoni iua ito ipinini īkapani, ixinire ereka inini Xesosi kanapiriākasaaki.

⁶ !Apakata hūikiniua. Himarotari axapiti pāo tireēkari tirekakari itori pāo. Iua atokokana ātika maerekati kamakari txīkitakari kaiāopokori kākiti kaminiri maerekati. ⁷ Ininiā hōkanapariko maerekati mitxi hīkamakiti, amaneri hinini īkapani. Ininiā pāo miātiākati atoko hītxaua, kotxi ikeke !auari. Kitxakapirīka kākiti okari ipira soti auīte, ininiā Teoso nitiri napaāpotakasaaki ninoa nopini, kona okana ninoa. Kristo, apira soti auīte atoko itxa. Iua ipina ate mapinakani īkapani. ⁸ Pāscoa kiiniritisaaki, Teoso !auiritari pāo ātikakari nikiko, kotxi maerekati pāo tirekakari atoko itxa. Ininiā maōkanapari maerekati mitxi akamakiti. Pāo miātiākati atoko matxaua, ininiā makamari erekari. Masākiretari atāo inakarīnoka. ⁹ Niokanatsopatapeka hītemoni himapotiitakaniua maerekati kamakanikata, itotxi nireēkiti kamakanikata. ¹⁰ Na nixinikari īkorapokoriti maerekati kamakani. Maerekati itotxi nireēkiti kamakani, kamanagerini, kamisirienererini, kamakori teosonetakani pakini īkorapokoriti auakani na nixinikanāta. !Hīposota hītakanapinina ninoa, kotxi auapikana. Hīpīkasaakinokara,

hītakanapana ninoa. ¹¹ Uatxa niokanatsopata hītemoni, himapotiitakania maerekati kamakanikata, “Xesosi sākire auiākarirano” inakanikata. Ītanoro minakotokatika sirīkakani, kamanarerini, kamakori teosonetakani, āti misākirepiretakani, ipoātakani, kamisirienereri pakini hītakanapako. Kona hinipokotape ikara atoko inakanikata.

¹² Kona nota parīkani Xesosi sākire mauīākani misiritiko nisāpiretini. Hīte parīkakara Xesosi sākire auiākani misiritiko hīsāpiretini. ¹³ Teosokara sāpiretariko Xesosi sākire mauīākani misiritiko. Hīte iokanatariko maerekati kamakari hīte sauaki auakari isini.

6

Āti Naiatakasaakiri Āti

¹ Xesosi sākire auiākari naiatiniāri āti Xesosi sākire auiākari, !apakata Xesosi sākire mauīākani apisatoō anikiko. Hanikana ninoa Xesosi sākire auiākanimoni maerekati kamakari misiritiko himarotini īkapani. ² Kona himarotapanikari Xesosi sākire auiākani mereēriko Xesosi sākire mauīākani misiritiko āti ōti? Hīkamariko ikara atoko inakari xipokatxi ōtisaaki, ininiā hīposotapitikari uatxa himereiniri kākiti misiritiko, āti naiatakasaakiri āti. ³ Atxiīti hīte kona imarotapanikari himereiniri Satanasi nitiriakori misiritiko āti ōti? Ininiā hīposotapitikari himereiniri kākiti misiritiko īkorapokoriti uatxa.

⁴ Txamari neenamatchi hīte sauaki auiniā, hanikatari kākiti Teoso sākire auiākani mapaxitakanimoni? !Apakata, kotxi ninoa !imarotari Teoso paniātakiti. ⁵ Ikara atoko nītxai nikamapētatinii īkapani. Atxiīti kona hīposotatari hāpokiniri kimaroreri hīte sauaki neenamatchi xipokini īkapani? Atxiīti kona ātika aua? ⁶ Txamari āti Xesosi sākire auiākari anikari āti Xesosi sākire auiākari Xesosi sākire mauīākani apisatoō maerekati kamakari misiritiko himarotini īkapani. Ikara atoko !apakata.

⁷ Ininiā iteene hīkerokari, kotxi hanikari hītari kākiti misiritiko mereēkarimoni. Erekafe hāuiritiniri hītari kaminiri maerekati hītemoni. Erekafe hāuiritiniri hītari ĩtirīkiniri hītii.

⁸ Txamari hītiriuata. Hīkamari maerekati. Hītariakorimonira hīkamari ikara. !Apakata.

⁹ Kona himarotapanikari atāo minakati kamakani !isari Teoso auītetxi ininiātaāua? Kona hīteka himisirienetapeua. Ia atoko inakari kākiti !isari Teoso auītetxi ininiātaāua: maerekati ĩtotxi nireēkiti kamakani, kamakori teosonetakani, ĩtanoro minakotokatika sirīkakari, kiki sito ininiua nirekakari, kiki āti kikikata sirīkakari. Ninoa !isari Teoso auītetxi ininiātaāua. ¹⁰ Kītiririni, kamanarerini, poātakani, āti misākirepiretakani, kamisirienererini pakini !isari Teoso auītetxi ininiātaāua. ¹¹ Ikara atoko mitxi hītxaua hīte apanakini. Iuaritika himaerekani makatxakaākapeka. Teoso kamai hīte inakitiakori hinini. Apiananiri Xesosi kamaerekatai. Erekarī Matamatakoti, aTeosone nakiti, iua apaka txīkitakai hīte atāo inakari kamakani hininiua.

Maerekati ĩtotxi Nireēkiti

¹² Nota posotari ikinipoko nikamini, txamari kona erekarī ikinipoko nikamini. Nota posotari ikinipoko nikamini, txamari kona ninirekarī nikamakiti niauīte ininiua.

¹³ Nipokori kamaāka tikakotxi īkapani. Tikakotxi nirekarī nipokori. Txamari Teoso xipokariko nipokori, tikakotxi pakini. Teoso !inirekarī akaminiri maerekati aīto nireēkiti āti kākiti ĩtokata. Apiananiri kamari aīto iua nireēkiti akamini īkapani. Aīto Apiananiri nakiti.

¹⁴ Teoso ōkitikari Apiananiri ipīkani sauaki. Iua atokokana iua ōkitikaua ate iposotiireē.

¹⁵ Ininiā !apakata Kristo ĩto hīsikini sito kanokareromoni. !Apakata. ¹⁶ Kiki sirīkasaaki kanokarerokata, iusaaki ātinoka ĩtotxi atoko itxauana ninoa. Teoso sākire iōkatsopatakorī sāpiretaua:

Kiki sirīkini sitokata, ātika ĩtotxi atoko itxauana.

¹⁷ Kākiti moianatakasaakiri Apiananiri, ātika xiniretxi atoko itxauana ninoa xinire.

¹⁸ Ātokata hīsirīkini hinirekasaaki, himitekako. Kona hīkaikotape iuaā. Apanakini maerekati kākiti kamakiti !imisiritari hīto. Imisiritari hākixinire. Hīkamakasaakiri

maerekati hiīto nireēkiti sitokata, himisiritari hiīto, hākixinire pakini. ¹⁹ Kona himarotapanikari hiīto Erekarī Matamatakoti misākiretiko aikoti atoko ininiua? Hīte iōākarari iua. Teoso sikari iua hītemoni, ininiā hiīto kona hīte nakiti. ²⁰ Teoso iamotapekai hīte Xesosi ipīkasaaki, ininiā hiīto īki auapitika. Ininiā uatxa iua nakiti hītxaua. Ininiā uatxa hiītoā hīpaxitariko Teoso.

7

Ītanorouatiko Sākiretxiti

¹ Uatxa napakapapiretariko mitxi hiōkatsopatakiti notamoni. !Erekari kiki kaxiro-tiniro sito. ² Txamari inirekasaakiri sitokata isirīkini, erekari kiki auini iuaka ĩtanorokata. Erekarī sito auini oaka ōtanirikata. ³ Ininiā erekari kiki sikiniri iīto ĩtanoromoni. Erekarī sito sikiniri oīto oītanirimoni. ⁴ ĩtanorotxi iōto kona oa nakītinanini. ōtaniri nakiti apaka oīto. Apaka ĩtaniritxi iōto kona iua nakītinanini. ĩtanoro nakiti apaka iōto. ⁵ Kona hītxape: “Kona ninirekarī nisirīkini pītekata,” kona hītxape. Hinirekasaakiri nipokori himanikakani Teoso himisākiretini ĩkapani, atxiīti iuasaaki !hinirekarī hīsirīkini hītanorokata. Hītanoro apaka kona nirekarī osirīkini hītekata iuasaaki, Teosonoka hīxinikini ĩkapani. Ininiā ikara atoko hīkaminiā erekari, txamari paītiki eereka iuaīkana hīsirīkako hītanorokata. Ininiā ikara atoko Satanasi kona sikanireōtai maerekati hiīto nireēkiti hīkamini āto sitokata hīsirīkini. ⁶ Ikara nota ōtākikai hīte. Kona nipaniātai ikara hīkamini. ⁷ Notamoni erekari nota atoko hinini. Iuaritika ikinimane aua Teoso siākiti iparīka kamini ĩkapani. Teoso sikari āti isikakiti ātimoni. Ātiāo isikakiti isika ātimoni.

⁸ Uatxa nimisākiretanako mītanirini, mītanoroni, tikinitakoni pakini. Erekarī himītaniriuatakani, himītanorouatakani nota atoko hinini. ⁹ Txamari himaposotakaniāri hītakanapiniri hiīto nireēkiti, erekari hītanorouatini, erekari hītaniriuatini, kotxi kapatakari atoko itxa hiīto nireēkiti.

Hīkamari Atāo Hītaniriuatakasaaki

¹⁰ Ia nipaniātana kākiti ĩtaniriuatakani: !Apakata sito takanapiniri oītaniri. Kona notani paniātai. Apiananirira paniātai. ¹¹ Otakanapiniāri oītaniri, !apakata iuaīkana oītaniriuatini. Erekarī oītanirimoni iuaīkana okanapiriini. Iua atokotxikana !apakata kiki takanapiniro ĩtanoro. ¹² Nōtākikari apanakini. Apiananiri paniātakiti apanakini ĩkapani !auari, ininiā nota ōtākikana ninoa ia atoko: Xesosi sākire auīākari auiniā ĩtanoro Xesosi sākire mauīākato, oa nirekiniāri okaikotini iuakata, !apakata iua iokanatiniro oa otakanapiniri iua. ¹³ Iua atokotxikana, Xesosi sākire auīākaro auiniā oītaniri Xesosi sākire mauīākati, iua nirekiniāri ikaikotini oakata, !apakata otakanapiniri iua. ¹⁴ Iuasaaki ĩtaniritxi Xesosi sākire mauīākati apakapari Teoso sākire ĩtanoro kamakiti ereka atamatakasaaki. Iua atokotxikana, ĩtanorotxi Xesosi sākire mauīākato apakapari Teoso sākire ōtaniri kamakiti ereka oātamatakasaaki. Imakamakaniārina ikara atoko, !erekana imiakori. Irītxi, inorotxi pakini kaminiāri nōtākikakiti iaōka, erekana imiakori. ¹⁵ Xesosi sākire mauīākati nirekiniāri itakanapiniri ĩtanoro, oa auiritariko isini. Xesosi sākire mauīākato nirekiniāri otakanapiniri oītaniri, iua auiritaroko osini. Ikara atoko ininiā, ninoa sikakapeēkaika. Ikara atoko ininiā erekari, kotxi Teoso linirekarī aneena-mauatini ikara xika. ¹⁶ Pite ĩtanorotxi, pimarotatari? Atxiīti pītaniri auikari Xesosi sākire imaerekani makatxakiko ĩkapani, Xesosi sākire pisāpiretakasaakiri iua. Pite ĩtaniritxi, pimarotatari? Atxiīti pītanoro auikari Xesosi sākire omaerekani makatxakiko, Xesosi sākire pisāpiretakasaakiro oa.

Teoso Akiritakasaakiri Kākiti

¹⁷ Ininiā ikininape kamariko iparīka Teoso sikakiti iuamoni, kotxi Apiananiri akir-itaua ikara parīkatxi akamini. Ikara nipaniātari ikinimane Teoso mereēkini apoti-itiniātaāua. ¹⁸ Teoso akiritakasaakiri kiki, Teoso takaōtxikare iītoā auiniā, !apakata Teoso takaōtxikare makatxakiko. Teoso akiritakasaakiri kiki, Teoso takaōtxikare iītoā

mauakaniā, !apakata Teoso takaōtxikare iītoā takiko. ¹⁹ Teoso takaōtxikare hiītoā auiniā, ikara kona txīkitakai Teoso anaakori hininiua. Teoso takaōtxikare hiītoā mauakaniā, ikara apaka kona txīkitakai Teoso anaakori hininiua. Teoso nireēkiti iaōka kamiko txīkitakai Teoso anaakori hininiua. ²⁰ Teoso akiritakasaakii, iusaaki mitxi hīparīka hīkamapanikako. ²¹ Teoso akiritakasaakii, nitiritxi amotakori hininiāua, ininiā kona maerekaxinireti hītxapeua nitiritxi hininiua xika. Iuaritika hīauīte sikakiniāi, ininiā hīsako. ²² Apiananiri akiritiniāri nitiritxi amotakori, Apiananiri sikakakiti itxaua iua. Apiananiri akiritiniāri nitiritxi minakatiua, Apiananiri nitiri iamotakiti itxaua iua. ²³ Xesosi amotakini hītxaua, ininiā iuaīkana kākiti nitiri iamotakoni !hītxapeuako. ²⁴ Nitariakori, Teoso akiritakasaakii, iusaaki mitxi hīparīka hīkamapanikako.

Mitxitakani, Tikinitakoni Pakini

²⁵ Uatxa nōtākikai hīte mitxitakani. Apiananiri kona sāpiretano ipaniātakiti hīte īkapani, iuaritika nisāpiretai nixinikakiti, kotxi Apiananiri amonīkapekano, ininiā kākiti posota auikiniri nisākire. ²⁶ Īkorasaaki pamonōkoniri Xesosi sākire auīākanimoni, ininiā notamoni apiaerekata kākiti mītanorouatakani. ²⁷ Hītanorouatapeka hininiā, kona hītakanapapero hītanoro. Mītanorouatakatipanika hininiā, kona hinitapero hītanoro. ²⁸ Iuaritika hītanorouatiniā, maerekati !hīkama. Kākiti ĩtanorouatiniā, apokapitikako ninoa maxikiko. Kona ninirekari ikara atoko hīte īkapani.

²⁹ Nitariakori, poiāo ōtinoka aua aparīkauatini Apiananiri īkapani. Ininiā hīte kītanororini parīkauatako Teoso īkapani mītanoroni parīkauatini atokotxikana. ³⁰ Txiapatakari parīkauatako Teoso īkapani, kākiti matxiapatakati parīkauatini atokokana. Poxokori parīkauatako mapoxokoniti parīkauatini atokokana. Tiitxi amotakari parīkauatako Teoso īkapani, tiitxi mauakiniti parīkauatini atokokana. ³¹ Īkorapokoriti tiitxi auakini !ix-inikapiriko itiina, kotxi ĩkorapokoriti kākiti potxitakiti xipokaāpota.

³² Ninirekari erekaxinire hinini. Kiki mītanoroti posotari ixinikiniri kanatokopa iparīkauatini Apiananiri ikamapoxokonitini īkapani. ³³ Txamari kiki kītanorori xinikari parīkatxi ĩkorapokoritikiri, kotxi inirekari ikamapoxokonitiniro ĩtanoro. ³⁴ Mītanirito, mitxitakaro pakini nirekari oparīkauatini Apiananiri īkapani, kotxi onirekari oīto, oxinire pakini osikini iuamoni. Txamari sito kītaniriro xinikari parīkatxi ĩkorapokoriti auakari, kotxi onirekari ōtaniri okamapoxokonitini. ³⁵ Ikara atoko nisāpiretai hīte, hīte ereka hinini īkapani. Kona ninirekari nimauiritakani erekari hāpakapini. Ninirekari atāonoka hīkamini. Ninirekari hīparīkauatini Apiananirinoka īkapani.

³⁶ Ātokoro iri atxiīti !auiritapanikaro oa ĩtaniriuatini, txamari oaneēpeka. Ātokori nirekiniāri itakiniro oa, erekari iua auiritiniri iua. !Ikamari maerekati. Erekari iua auiritinina ninoa ĩtaniriuatini. ³⁷ Atxiīti ātokoro iri ākixinireē !inirekaro oa ĩtaniriuatini. Atxiīti !isikaenetaro oa ātimoni. Iua xinikakiti omītaniriuatakani īkapani pataparari ininiā, ākixinireē imarotiniāri inireēkiti oa mītaniriuatakani, ininiā iua kiki kamari erekari. ³⁸ Oa sikakari oītaniriuatini īkapani kamari erekari. Iuaritika oa masikakati oītaniriuatini īkapani kamari apiaerekata.

³⁹ Teoso paniātakiti iōkatsopatakori paniātaro sito kaikotini oītanirikata iua auapanika inakasaaki. Iua ipininiā, apakata oītaniriuatini onirekakitikata. Txamari Apiananiri sākire auīākarikatanoka apakata oītaniriuatini. ⁴⁰ Notamoni oa apia poxokoniua omītaniriuatakaniā iuaīkana. Ikara atoko inakari nōtākikaro sito, kotxi nimarotari Erekari Matamatakoti Teoso nakiti aua notamoni.

8

Nipokori Teoso Kamakori Sikiko

¹ Uatxa nisāpiretai nipokori sikiko teoso kākiti kamakitimoni. Amakinika aimarotari ikara. Ikara inakari aimarotapeka ate. Kākiti imaroretxi auiniā iuikaua. Apiaerekata kākiti auini tiraōkitxi, kotxi isikataparataru kākiti xinire. ² “Kimaroreno nota” inakari

! auari imaroretxi. Kaiāopokori imaroretxi imimarotakinīti aua. ³ Iuaritika kākiti tīretiniāri Teoso, Teoso imarotari iua.

⁴ Maxinikari nipokori teoso kamakorimoni sikakori. Aimarotari teoso kākiti kamakiti !kakamareri. Aimarotari ātika Teoso atāo inakari aua. ⁵ Aua kākiti kamakiti. Kākiti takauākatari “teoso” itxaua. Kākiti takauākatari teoso iaxiti auakani, ĩkorapokoriti auakani apaka. Kaiāopokori ikara atoko inakari teosoakori aua. Kaiāopokori ikara atoko inakari auītetxiakori aua. ⁶ Atemoni ātika Teoso aua. Iua aīri iaxitikiri. Iua kamari ikinipoko. Aparīkauata iuanoka ĩkapani. Ātika aāuīte aua, Xesosi Kristo. Ikinī sereti kamakari iua. Iua posotiireē aāuini aua.

⁷ Apanakini !imarotapanikari kākiti kamakiti teoso minakaniua, kotxi mitxi iteene itotarina teoso kākiti kamakiti. Ininiā inikasaakirina nipokori teoso kamakorimoni siākori, iuākatarina ikara nipokori teoso atāo inakarimoni siākori. Iuasaaki ninoa uākatari maerekati ikaminina, kotxi ākixinireēna !iteene imarotarina atāo inakari. ⁸ Txamari nipokori !itxīkitakaua Teosomoni asini. Ikara nipokori anikini !imisiritaua. Apaka ! ikamari ereka anini.

⁹ Iuaritika erepaniko. Hinirekiniāri ikara nipokori hinikini, hīxinikariko apanakini Teoso sākire poiāonoka auiākani. Ninoa imarotiniāri hīte nikiniri ikara nipokori, ininiā ninoa apaka nikari, txamari iuasaaki ninoa kamari ākixinirena manirekakiniti. ¹⁰ Teoso sākire poiāonoka auiākari atamatiniāi Teoso sākire iteene imarotakari nikiniri nipokori teoso kamakori misākiretiko aikotiā, isikataparaxiniretari iua apaka nikiniri nipokori teoso kamakorimoni siākori. ¹¹ Ininiā pimarore xika, atxīiti pitari Teoso sākire poiāonoka auiākari sari imisiritikomoni. Kristo ipina iua ĩkapani apaka. ¹² Ikara maerekati hītarimoni hīkaminiā, hīkarotari ākixinire. Hītari ākixinire hīkarotakasaaki, hīkamari maerekati Kristomoni. ¹³ Ininiā nipokori ninikini txīkitakiniāri nitari kaminiri maerekati, itixi auapanika inakasaaki kona ninikaikari iua nipokori, kotxi kona ninirekari nitari kaminiri maerekati.

9

Teoso Iokanatakini Kākitimoni

¹ Teoso iokanatakiti nitxaua. Ninireēkiti niposota nikamini. Naōkitapekari Xesosi Kristo aāuīte. Iparīka nikamakasaaki, hīte auikari Apiananiri sākire. ² Atxīiti apanakini !auikari Teoso iokanatakiti nininiua. Hītera auikari Teoso iokanatakiti nininiua. Hītera oerekari Apiananiri iokanatakiti nininiua, kotxi hīte auikari Apiananiri sākire, nota sāpiretakasaakii hīte.

³ Kākiti mauikakaniāri Teoso iokanatakiti nininiua, napakapapiretana ninoa ia atoko: ⁴ Apakata atxīiti aāpakapiniri nipokori, iāriā pakini aparīkauatini ĩkapani? ⁵ Apakata atxīiti ate anikiniro ātanoro Teoso sākire auiākaro atekata, apanakini Teoso iokanatakini, Apiananiri itariakori, Petro pakini anikinina ninoa ĩtanoro atokotxikana? ⁶ Atxīiti apakata Panapee, nota pakininoka parīkauatini anikakiti aāpakapini ĩkapani?

⁷ Sotato sikasaaki ineenamauatini ĩkapani, iuaka !iamotari anikakitina. Aua atxīiti ova takakari. Ova itakakiti matximakati aua? !Auari. Kona auari kema auīte piratakari ĩpira tiniā miātakati.

⁸ Ikara nisākire kona kākiti sākirenanini. Iua atokotxikana Teoso sākire. ⁹ Moisesi iōkatsopatapekari Teoso paniātakiti. Ia atoko itxa:

Kona hīitxikari kema auīte nama trikapani ikamakasaaki. Hāuiritariko inikini. Teoso tīretatari kema auīte? Itiretapitikari. ¹⁰ Apiata isāpiretari ikara kākiti parīkauatakani ĩkapani. Ininiā takarauatakari takarauata, kotxi inirekari ikiena inikini. Kienatxi apakari aparī ikiena, kotxi inirekari ikiena inikini. ¹¹ Katarareri takarauatini atokokana, ate takari Teoso sākire hākixinireē. Katarareri nikari ikiena itakakiti, ininiā atxīiti apakata ate apakapiniri kienatxi hīte sikakiti? Kotxi ate parīkauata hīte ĩkapani. ¹² Apakatinīā apanakini apakapiniri iparīkana ĩki hīte sikakiti, ininiā apiata

apakata ate apakapiniri ate parīka īki, iuaritika kona aamanaāri hīsikiniāua ate parīka īki. Amīteenekari ikinipoko, kotxi !anirekari aiotokakiniri Kristo iokanapirena erekari hīkenakotini. ¹³ Himarotari Teoso misākiretiko aikoti āki parīkauatakani iuaātaā apakapari ikiena. Teosomoni sikakori takikoātaā parīkauatakani apaka apakapari ipixini iuaātaā siākori inikinina īkapani. ¹⁴ Iua atokotxikana Apiananiri paniātari iua iokanapirena erekari sāpiretakani apaka apakapiniri iparīkana īki.

¹⁵ Ikara atāopitikara, iuaritika kona nipaniātari ikara atoko hīkamini. Kona niōkatsopatarī ikara, nīparīka īki notamoni hīsikini īkapani. Nīparīka īki namanainii apisa erekape nipinini. Nīuikari nīparīkauatini hīte īkapani hītxineirote nīmapakapakanisaaki. ¹⁶ Teoso iokanapirena erekari noereka, iuaritika !apakata nīuikiniua, kotxi Teoso sikari ia parīkatxi notamoni. Nīmisiritiko auapitika, Teoso iokanapirena erekari nīmasāpiretakaniā. ¹⁷ Teoso iokanapirena erekari nīsāpiretiniāri kākiti, nākixinireē iteene nīnīrekiniāri ikara nīkamini, ininiā napakapapitīkariko nīparīka īki. Nīmanīrekakaniāri ikara nīkamini, iuaritika nīkamari, kotxi Teoso sikari ikara parīkatxi notamoni nīkamini īkapani. ¹⁸ Ia atoko nīkitxitiko: Teoso iokanapirena erekari nīsāpiretakasaaki, kona minakati napakapa. Ikara atoko kamapoxokonitari nākixinire, kotxi mākitika nīsāpiretai Teoso sākire. Teoso iokanapirena erekari sāpiretakari nītxaua, ininiā nīposotiire auapitika hīkitxitinino nota nīpaniātiniāi hīte, iuaritika !nīnīrekari ikara atoko nīkamini nota nīreēkiti napakapini īkapani.

Parīkatxi Ikinimane Īkapani

¹⁹ Nīnīreēkiti nīkama. Kākiti nitiri iamotakori !nītxaua. Iuaritika notaka nītxīkitakaua ikinimane nitiri nīnīniua, Teoso sākire apikomoni kākiti auikini īkapani. ²⁰ Xoteoakori sauaki nīparīkauatakasaaki, Xoteo auini atoko nītxa nota auini. Ikara atoko ininiā, Xoteoakori auikari Xesosi sākire. Moisesi paniātakiti iaōka kamakani sauaki nauakasaaki, nīnoa auini atokokana nītxa nota auini, kotxi nīnīrekari Moisesi sākire auīākani auikiniri Xesosi sākire. ²¹ Xoteo minakaniua !imarotari Moisesi paniātakiti. Ininiā nīnoakata nauakasaaki, kona nīpaniātari Moisesi paniātakiti ikaminina, Xesosi sākire auikinina īkapani. Iuaritika nīkamari Teoso paniātakiti, kotxi iuatxikana Kristo paniātakiti nīkamini. ²² Kākiti mataparaxinirenikata nauakasaaki, nota apaka kona kataparaxinireno, Xesosi sākire auikinina īkapani. Ikinī kākiti sauaki nauakasaaki, nīkamari kākiti auini atoko nītxa nota auini, ininiā ikinipoko nīposotakiti nīkama apanakini maerekani makatxakiko īkapani. ²³ Ikara atoko nīkama Teoso iokanapirena erekari nīsāpiretini īkapani. Nīkamari ikinipoko, Teoso iokanapirena erekari nīsāpiretini īkapani. Ikara atoko ininiā, nota apaka apakapari Teoso iokanapirena erekari hītekata.

Saporiēta Apakapakari

²⁴ Himarotari mitekatxi. Kākiti miteēkani miteka, iuaritika ātinoka apakapari imitekini īki. Merepitipanika mitekatxi mapotōkire apokakarīnoka apakapari imitekini īki. Ininiā miteēkari atoko hītxako. Hīsapitipo. Teoso parīka hīkamapitipo hīparīka īki hāpakapini īkapani. ²⁵ Ikinī miteēkari parīkauatapitipo iīto tapara iteene auini īkapani. !Auirītari iīto misiritakari. Ikara atoko ikama, saporīēta imitekini īki apakapini īkapani. Ikara saporīēta kona okanani aua. Oxipokapitīkako. Ate parīkauatapitipo ātiāo āāpakapakiti āāpakapini īkapani. Ikara āāpakapakiti !ixipoka. ²⁶ Miteēkari isinimoni mīmarotakati atoko !nītxaua. Nīmarotari nīsinimoni. Nīsapitipo mitekatxi mapotōkiremoni. Maxikatīika !nīneenamauata. Na neenamauata nīsanōkakata. ²⁷ Nītxīkitakari nīito nīnitiri ininiua, nota nīreēkiti ikamini īkapani, kotxi nīsāpiretapekari ikara apanakinimoni, ininiākara kona nīnīrekari nīmapakapakaniri notaka parīka īki.

10

Kākiti Isaeokini Aōerekini Pirena

¹ Nota nirekari hīxinikiniri kitzakapirīka, aātokiriakorini takanapakasaakiri Exito tixini, ikinika ninoa aua katxiāri patapi. Iua katxiāri oerekana isinimonina. Apaka ikinika ninoa napari potxoari uiniti āki. ² Ninoa sari Moisesikata, ininiā katxiāri patapi auakasaakina, potxoari uiniti patapi auakasaakina, iusaaki ninoa patxisatiko atoko aua iusaaki. ³ Ninoa ikinikana nikari xinitxi Teoso iokanatakiti. ⁴ Ninoa ikinikana iātari āparaā Teoso sikakiti. Ninoa iātari āparaā kai auīteākiriā. Kristo iua kai auīte āparaā potorikiniātaā atokokana. Iua sari ninoakata. ⁵ Txamari Teoso !apokaerekatari kaiāopokori ninoa, ininiā ipinana. Iītona iarika āparaā makipakaniātaā.

⁶ Uatxa axinikana ninoa, ininiā aimarotari amanirekakaniri maerekati ninoa nirekiniri atoko. ⁷ !Hīteosonetapiri kākiti kamakiti, ninoa apanakini teosonetiniri atokokana, kotxi Teoso sākire iōkatsopatakori txari:

Ninoa topāka inipokotinina ĩkapani, iātinina ĩkapani, eereka ōkitikauana isarauatinina ĩkapani teoso ikamakitina apisatoō.

⁸ !Apakata aanokarauatini ninoa apanakini anokarauatini atoko, kotxi āti ōtinokara vītxi tres mio ninoa okaāka ĩkora maerekati xika. ⁹ !Apakata aātamakaerekatiniri Kristo ninoa apanakini kitzakapirīka atamakaerekatiniri atoko, kotxi iua xika imini okana ninoa. ¹⁰ !Hītsoatape, ninoa apanakini kitzakapirīka tsoatini atokokana, kotxi eereka Teoso nitiri xipokana ninoa.

¹¹ Ikara imisiritikona apoka ninoamoni apanakini pinitiko ĩkapani. Ikara imisiritikona iōkatsopataāka ate pinitiko ĩkapani, kotxi itixi mapotōkire ōti apokaāpota. ¹² Hītemoni ereka hinini, ininiā erepaniko, kotxi atxiīti paītiki hīkamari maerekati. ¹³ Hīte atamakaerekataāka ikinimane atamakaerekataāka atokotxikana. Iuaritika Teoso !itakana-pai hīte. Kona iua auiritari hātamakaerekatiko himamīteenekakinini. Iusaaki oerekai himitekini, ininiā hīposotari himīteenekiniri.

Teoso Kākiti Kamakiti

¹⁴ Ininiā nitariakori nota tirketakini, himiteka teoso kākiti kamakiti hītakanapini. ¹⁵ Hīte kākiti kimarorerini, ininiā iteene himixinikariko nisākire. ¹⁶ Iāriā aātakasaaki, akinika aāpotiitakasaakiua, axinikari Xesosi ipinini. Iusaaki atxari Teoso: “Erekapitikai, kotxi Xesosi arēka xiketa ate ĩkapani.” Amaxiōpekitakasaakiri komiri, anikasaakiri, aāpitiitakasaakiua, axinikari Kristo ĩto noropatiko ate ĩkapani. ¹⁷ Iusaaki itomaneua ate, iuaritika ātika komiri atokokana atxaua. Ātika ĩtotxi atokokana atxaua, kotxi amakinika anikari ātika komiri. Ikara komiri Kristo ĩto atokokana itxaua.

¹⁸ Hīxinikanako kākiti Isaeokini ĩkorapokoritikini. Ninoa sikari Teoso xinitxi. Eereka ninoa nikari ikara xinitxi. Inikasaakirina ikara xinitxi, iusaaki ninoa oerekari iTeosonetinirina iua. ¹⁹ Kiripa ninireka nisāpiretinii? Nisāpiretari teoso kākiti kamakiti kona kakamareri. Iua teoso siākori kona itxa. ²⁰ Iuaritika erepaniko. Ikara atāo maerekati. Xoteo minakaniua sikakiti teoso kākiti kamakitimoni ninoa sika Satanasi nitiriakorimoni. Kona Teoso atāo inakari isikana isiākitina. Ininiā na ninirekari hīte moianatiniri Satanasi nitiriakori. ²¹ Kona hīposotari Apiananiri iākoanaā hiātini, apaka Satanasi nitirini iākoanaā hiātini. Kona hīposotari Apiananiri kiena hinikini, apaka Satanasi nitirini kiena hinikini. ²² Atauako anirekatari akaminiri Teoso naiatinuia? Ate tapara apiata atxiīti?

Xesosi Auiākani Kamakiti

²³ Nota posotari ikinipoko ninireēkiti nikamini, txamari kona ikinika erekari nikamini. Ikinipoko ninireēkiti niposotapitika nikamini, txamari kona ikinipoko kamari nākixinire aneini. ²⁴ !Hinitapiriko hīteka nireēkiti hāpakapini. Himoianatariko āti iua nireēkiti apakapini.

²⁵ Hīposotari hinikiniri nipokori amotakoriātaā auakari. Iusaaki kona hīpimaāpiri: “Ia nipokori sikaākapeka teoso kākiti kamakitimoni?” !hītxapeko. Kotxi himarotakasaakiri hinikiniri nipokori teoso kākiti kamakitimoni sikiko, hākixinire karotaāka atxiīti. ²⁶ Teoso sākire sāpiretaua:

Itixi Apiananiri nakiti itxaua, ikinika itixi auakani pakini.

²⁷ Xesosi mauīākani aiatakasaakii hīte hinipokotini ninoakata, hinirekiniāri hīsa. Hinikariko isikakitina. Kona hīpimaāpiri: “Ia nipokori teoso kākiti kamakiti sikaākapeka?” kona hītxape, hākixinire himakarotakaniri īkapani. ²⁸ Txamari apanakini kākiti iuaā sāpiretakasaakii: “Ia nipokori sikaākapeka teoso kākiti kamakitimoni,” itxa. Iuasaaki kona hinikapiri, kotxi atxiīti hīkaroxiniretari ikara kākiti mataparaxinireti, kotxi:

Itixi Apiananiri nakiti itxaua, ikinika itixi auakani pakini.

²⁹ Na nitxai: “Kona hinikapiri ikara, hīteka ākixinire himakarotakani īkapani,” !nitxai. Nitxai: “!Hinikapiri ikara, āti kākiti ākixinire himakarotakani īkapani.” Nota ākixinireē nota nireēkiti nikamini īkapani erekari. Āti kākiti ākixinireē nota nirekakiti nikamini īkapani !erekari, ininiā iuamoni ikara nikamakasaaki, nikamari maerekati. Kinirepa !apakata nikaminiri nota ākixinire auiritakiti? ³⁰ Napakapakasaakiri nipokori, ininiā iuasaaki nimisākiretari Teoso erekari isikakiti. Ininiā kinirepa nimisākirepiretaāka?

³¹ Nisāpiretai hīte. Hinikasaaki, hiātakasaaki, ikinipoko hīkamakasaaki, hīkamariko ikinika Teoso ereka inini imarotiko īkapani. ³² Kona hītxīkitakapiri, Xoteoakori, Xoteo minakanua, kākiti Xesosi sākire auīākani pakini kaminiri maerekati. ³³ Ninirekari ikinimane kākiti nireēkiti nikamini, ikinika nikamakasaaki. !Ninirekari erekari notanani īkapani. Ninirekari erekari itomaneri īkapani, imaerekanina Xesosi makatxakini īkapani.

11

Sitoākini Xesosi Sākire Auiākani

¹ Hīkamariko nota kamakiti atoko inakari. Kristo kamakiti atoko nota kamini atokotxikana hīkamako. ² Nitariakori, peerekai hīte, kotxi iteene hīxinikano nota. Peerekai hīte, kotxi hīkamapanikari noereēkiti nisāpiretakiti iaōka.

³ Ninirekari himarotiniiri ia: Kiki auīte Kristo itxaua. Sito auīte kiki itxaua. Kristo auīte Teoso itxaua. ⁴ Ininiā kiki ikii māka imamakatzakakaniā Teoso imisākiretakasaaki, apaka Teoso sākire oerekasaaki, kona ipaxitari iauīte Kristo.

⁵ Sito okii māka mauakaniā Teoso omisākiretakasaaki, apaka Teoso sākire oerekasaaki, kona opaxitari oāuīte oītaniri. Okii māka omatakakaniā, oa kii kixākakori atoko itxa.

⁶ Okii māka omanirekakaniā, ininiā okisauakaiākotaākakako. Opētatuatiniā, okii kixākiko xika, oiāko kisauakiko xika, ininiā iuasaaki okii māka otaka. ⁷ Kiki misākiretakasaakiri Teoso, kona erekari itakiniri ikii māka, kotxi Teoso atoko itxa iua. Ikamaāka Teoso ereka oerekini īkapani. Sito kamaāka otaniri ereka oerekini īkapani. ⁸ Merepitipanika Teoso kona kamari kiki sito ītoā. Teoso kamaro sito kiki ītoā. ⁹ Kiki kona kamaāka sito īkapani. Sito kamaāka kiki īkapani. ¹⁰ Ininiā oa takari okii māka. Ikara atoko ininiā, oerekari oauītetiniri oītaniri. Iuasaaki Teoso nitiriakori iaxitikini apaka imarotari oauītetiniri oītaniri.

¹¹ Kiki, sito pakini Apiananiri sākire auikasaaki, sito nirekari kiki. Kiki nirekaro sito. !Apakata sitonoka auiniā. !Apakata kikinoka auiniā. ¹² Kotxi sito ina kiki ītoā. Eereka ikinipoko kiki iponaniā sito ītoā. Ikara atoko itxapitikama, Teoso kamari ikinipoko. ¹³ Hīteka hīxinikapiretari ia: Sito kii māka mauakaniā, iuasaaki atāokani Teoso omisākiretini? ¹⁴ Kākiti itotakiti oerekaua kiki itanoiākori pētatico. ¹⁵ Sito auiniā oiāko paītanori, oōuikari oiāko, kotxi oiāko sikaāka okii ipatakari īkapani. ¹⁶ Kākiti nirekiniāri ineenamauatini iākotxi pirena xika, ininiā kona ate, ikinika Teoso sākire auīākani pakini !auari ikara. Ininiā !apaniātai ikara atoko inakari hīkamini.

Xesosi Ipinini Xinikiko Kiiniriti

¹⁷ Uatxa niōkatsopatakitiā kona niuikai, kotxi hāpotiitakasaakiua, apia erekari kona hīkama. Apiata maerekati hīkama. ¹⁸ Merepanika nikenakopiretari hāpotiitakasaakiua

Teoso misākiretiko aikotiā hītaparakienatakakiniua. Nixinikari ipixini ikara nikenakopiretakiti atāo inini. ¹⁹ Apanakini oerekakiti atāo minakati auapitika hīte sauaki. Ak-enakotakasaakiri ninoa oerekakiti, aimarotari Teoso ! apokaerekatana ninoa. Iua apokaerekatana iua sākire atāo inakari oerekakani. ²⁰ Hāpotiitakasaakiaua, kona atāo hīkamari kiiniri, Apiananiri ipinini xinikiko kiiniriti. ²¹ Kotxi hinikasaaki, himixirikari hīkiena apanakini nikiniri apisapanika. Ininiā apanakini natxita, apanakini poāta iusaaki. ²² Auapitika haāpoko hinikini ikapani, hiātini ikapani. Hāpotiitakasaakiaua, homanatarari apanakini Xesosi sākire auiākani. Hīkamapētatarari aītariakori matiini. Kiripa nitxai hīte? Atxiīti hinirekari niuikinii? Kona xatiki niuikai hīte.

²³ Apiananiri sāpiretakiti notamoni, iua atokotxikana nisāpiretapekai hīte. Ia nisāpiretai: Īkanōka Apiananiri Xesosi mīkapiritiko ōtisaaki, iua kosekari komiri. ²⁴ Iusaaki imisākiretari Teoso: “Erekapitikari ia komiri pisikakiti atemoni,” itxa. Iposo atoko imaxiōpekari iua komiri, sika itxari imoianariakorimoni. Itxana: “Apakapa, nika hītxako. Ia niīto okaāka hīte ikapani. Ia komiri hinikasaaki, hīxinikanoko nota. Hīxinikari nipinini hīte ikapani,” itxa. ²⁵ Ninoa nipokotaka atoko, mitxi komiri ikosekini atokokana, ikosekari iākoanotxi. Iusaaki itxana: “Ia iākoanotxi oerekari Teoso kamapekari ikamaenetakiti amaneri, kotxi niarēka xiketa hīte ikapani. Ia iāriā hiātakasaaki, hīxinikanoko nota. Hīxinikariko nipinini hīte ikapani,” itxa Xesosi.

²⁶ Ia komiri hinikasaaki, ia iākoanotxiākiri hiātakasaaki, hōerekari Apiananiri ipinini kākiti ikapani. Ikara hōerekiniritika iua ikorapokoriti kanapiriāko.

²⁷ Maxikatiīka kākiti nikiniāri ia komiri, maxikatiīka iātiniāri Apiananiri iākoanaākiri, ikamari maerekati, kotxi ! ipaxitari Apiananiri īto, iarēka pakini. ²⁸ Ia komiri hinikini apisapanika, ia iākoanotxiākiri hiātini apisapanika, erekari hīxinikiniri hāxixinireē auakari. Maerekati auakasaaki, hamanaāri Teoso imakatzakiniri ikapani. Eereka ia komiri hinika, ia iāriā hiāta. ²⁹ Maxikatiīka hinikiniāri, hiātiniāri, ininiā hīteka akiritari himisiritiko apokini, kotxi kona hīpaxitari Apiananiri īto. ³⁰ Ikara xika itomaneri hīte sauaki iōkapeta. Ikara xika apanakini amianata. Ikara xika apanakini ipīpeka.

³¹ Amaerekani anitiniā, aamanainiāri Teoso makatzakiniri amaerekani, ininiā amisiritiko kona apoka. ³² Txamari Apiananiri apokiniāri amaerekani, imisiritaua ate uatxa, amaerekani atakanapini ikapani, ininiā eereka ! imisiritaua iua sākire mauīkanikata.

³³ Ininiā nitariakori, hāpotiitakasaakiaua Xesosi ipinini xinikiko kiiniriti ikapani, hiātapana apanakini. ³⁴ Hinatxitiniā, hinipokotako hāpoko. Ininiā hāpotiitakasaakiaua ! hīkamari maerekati, ininiā Teoso ! imisiritai. Apikomoni nōtākikai ereē napokasaaki.

12

Erekari Matamatakoti Sikakiti Kākitimoni

¹ Nitariakori, ninirekari himarotiniri Erekari Matamatakoti sikakiti. !Apakata himimarotakaniri. ² Mitxi Xesosi sākire mauīkani hinakasaakiaua, himisirienetaāka, ininiā hāuikari teoso kamakori masākireti teoso atāo inakari ininiua. Ikara himarotape. ³ Kākiti sāpiretiniāi hīte: “Maerekati kamakari itxaua Xesosi,” ininiā iusaaki himarotari Erekari Matamatakoti ! auari iuamoni. Kākiti sāpiretiniāi hīte: “Apiananiri itxaua Xesosi,” ininiā iusaaki himarotari Erekari Matamatakoti auapitika iuamoni, kotxi ikara iua oerekakiti.

⁴ Erekari Matamatakoti siākiti ikini sereti aua, iuaritika Erekari Matamatakoti ātinoka aua. ⁵ Ikini sereti parīkatxi Teoso ikapani aua, iuaritika Apiananiri ātinoka aua. ⁶ Ikini sereti Teoso kamakiti aua kākiti ikapani, iuaritika Teoso ātinoka aua.

⁷ Erekari Matamatakoti iuaka oerekaua kākitimoni, ikinimane ereka inini ikapani. ⁸ Iua Erekari Matamatakoti sikari apanakinimoni isākire kīkiterini ininiuana ikapani. Iua Erekari Matamatakoti sikari apanakinimoni isākire kimarorerini ininiuana ikapani. ⁹ Iua sikari apanakinimoni Teoso sākire iteene auikinina ikapani. Isikari apanakinimoni

amianatakani imakananitinina ĩkapani. Erekarī Matamatakoti ātinoka aua, iuaritika ikini sereti isika kākītimoni. ¹⁰ Apanakini isikaposotiireta posotiiretxi ikaminina ĩkapani. Apanakini isikaimaroreta Teoso sākire isāpiretinina ĩkapani. Apanakini isikaimaroreta Erekarī Matamatakoti sākirauatakasaaki imarotininina ĩkapani, maerekati matamatakoti sākirauatakasaaki imarotininina ĩkapani apaka. Apanakini isikaimaroreta ikini sereti kākīti sākire isākiretinina. Apanakini isikaimaroreta ikara sākiretxi mimarotakoti ikenakotakasaakina, isāpiretinirinina iua kenakotakani ninoa sākireē ninoa apaka imarotininina ĩkapani. ¹¹ Ātinoka Erekarī Matamatakoti aua. Iuanokara parīkauata ikara atoko. Isikarī ikara isikakīti kākītimoni inireēkīti iaōka.

Kristo Īto Pirena

¹² Kākīti ĩto ātinoka aua, iuaritika aua ikii, ikanoke, iuako, itapike, ikiti, txaāpota. Itorī ikara atoko inakarī aua ĩtotxiā, iuaritika ātinoka ĩtotxi aua. Iua atokokana itxa Kristo ĩto. Xesosi sākire auiākani Kristo ĩto atoko itxauana. ¹³ Atxiīti Xoteoakorī atxaua. Atxiīti Xoteo minakaniua atxaua. Atxiīti nitiritxi amotakoni atxaua. Atxiīti nitiritxi minakatiua atxaua. Iuaritika ātika ĩtotxi atoko atxaua, kotxi Erekarī Matamatakoti ātinoka inakarī apoka atemoni. Iua apotiitaua ātika ĩtotxi atoko anini ĩkapani. Iua aua aākixinireē.

¹⁴ Kākīti ĩto ātinoka aua, iuaritika aua ikii, ikanoke, iuako, itapike, ikiti, txaāpota. ĩtotxiā kaiāopokorī aua. ¹⁵ Ininiā !apakata kitītxi sāpiretiniā: “Uakōtxi !nitxaua, ininiā ĩtotxiā auakarī !nitxaua.” Ikara atoko isāpiretiniā, iuaritika ĩtotxiā auakaripitikara kitītxi. ¹⁶ Kenakokitxi sāpiretiniāri: “Okītxi !nitxaua, ininiā ĩtotxiā auakarī !nitxaua.” Ikara atoko isāpiretiniā, iuaritika ĩtotxiā auakaripitikara kenakokitxi. ¹⁷ ĩtotxi okītxinoka auiniā, kanatokopa itxa kākīti kenakorauatini? ĩtotxi kenakokitxinoka auiniā, kanatokopa itxa kākīti imixikarauatini? ¹⁸ Teoso kamari ikinika ĩtotxiā auakarī. Iua inireēkīti iaōka ikaminana ninoa. ¹⁹ Ātinoka ĩtotxi auakīti auiniā, ĩtotxi !auari. ²⁰ ĩtotxiā auakani itorī aua, iuaritika ĩtotxi ātinoka aua.

²¹ Okītxi kona posotarī isāpiretiniri uakōtxi: “Kona nota nirekai pite.” Apaka kiītxi kona posotarī isāpiretiniri kitītxi: “Kona nota nirekai pite.” ²² Kona ikara atoko itxa. Atxiīti auākatari āti aīto auakarī !itxa, kotxi !kataparari, iuaritika ikara mauakaniā, aīto !iparīkauata atāo. ²³ Kākīti tīretari iītoā auakarī poiāori kākīti atamatakīti. Ipatari apanakini iītoā auakarī kākīti matamatakani ĩkapani. ²⁴ Aītoā auakarī apiata apotxitakīti aua apaka. Kona apatarī ikara. Apanakini aītoā auakarī Teoso takari aītoā iteene apaxitini ĩkapani. ²⁵ Ininiā Teoso kamari ĩtotxi ātinoka inini. Ikamari ĩtotxiā auakani itīretakakinuana ĩkapani. Apanakini ĩtotxiā auakarī naiatiniāri apanakini ĩtoā auakarī, !apakata. ²⁶ Āti ĩtotxiā auakarī tsiīka. Iuasaaki ikinika kākīti ĩto atatsiirauata. Āti ĩtotxiā auakarī iuikaāka, ininiā ikinika ĩtotxi auakini poxokoniuata.

²⁷ Kristo ĩto atoko hītxaua hīte. ĩtotxiā auakani atoko hītxaua Kristo ĩtoā. ²⁸ Teoso sākire auiākani ĩtotxiā auakani atoko itxauana. Ikini sereti parīkatxi aua ĩtotxi ĩkapani akamini ĩkapani. Merepanika Teoso mereēri iua iokanatakini. Eereka imereēri kākīti Teoso sākire sāpiretakani. Eereka imereēri kākīti Teoso sākire oereēkani. Eereka imereēri kākīti Teoso posotiire oereēkani, amianatakani makananitakani, kākīti moianatakani, auītetxiakorī, kākīti sākire apanakini mimarotakiniti sākiretakani pakini. Teoso takari ikara atoko inakani parīkauatakani iua sākire auiākani imoianatinina ĩkapani. ²⁹ Kona ikinimaneni Teoso iokanatakini txaua. Kona ikinimaneni Teoso sākire sāpiretakani txaua. Kona ikinimaneni Teoso posotiire oereēkani txaua. ³⁰ Kona ikinimaneni amianatakani makananitakani txaua. Kona ikinimaneni imarotarī isākiretiniri kākīti sākire apanakini mimarotakiniti. Ikinimane !iposotarī isāpiretiniri ikara sākiretxi iua kenakotakanimoni ninoa sākireē ninoa apaka imarotini ĩkapani. ³¹ Auapitika ikara Erekarī Matamatakoti sikakīti aparīkauatini ĩkapani. Iuaritika hinirekariko isikakīti apiaerekatakari. Uatxa noerekaiko isikakīti apiaerekatakari.

13

Tiraōkitxi Pirena

¹ Atxiīti nimarotari ikini uāka sākire nisākiretini. Atxiīti nimarotari Teoso nitiriakori iaxitikini sākire nisākiretini, txamari iuasaaki nitiraōkiuatini ! auari, ininiā ! apakata nimarore. Metao āsokiko ene atoko nitxa. Ipi panera tore āsokiko ene atoko nitxa.

² Atxiīti nimarotari Teoso sākire nisāpiretini. Atxiīti nimarotari ikinipoko apanakini mimarotakiniti. Atxiīti ikinipoko imaroretxi aua notamoni. Atxiīti iteene nauikari Teoso posotiire, ininiā niposotari ōtanoxiratarari nipaniātini ātiātaā isini. Txamari iuasaaki nitiraōkiuatini ! auari, ininiā minakati nitxaua. ³ Atxiīti nisikari ikinipoko nitii, nitx-ineirote pakini matxineirotenimoni. Atxiīti nauiritari niīto arikiko. Txamari iuasaaki nitiraōkiuatini ! auari, ininiā ! apakata.

⁴ Pitiraōkiuatakasaaki, piposotari piātapiniri pinirekakiti apokini. Pitiraōkiuatakasaaki, pikamari erekari ātimoni. Pitiraōkiuatakasaaki, kona pixikotari āti. Pitiraōkiuatakasaaki, kona pisāpiretari apanakini piuikiniri pikamakiti. Pitiraōkiuatakasaaki, ! piuikaua.

⁵ Pitiraōkiuatakasaaki, kona pitxīkitakari āti pētauatini. Pitiraōkiuatakasaaki, kona pinirekari piteka nireēkitinani. Pitiraōkiuatakasaaki, ! katimari pomanākarauatini. Pitiraōkiuatakasaaki, ! pixinikapinikari maerekati apanakini kamakiti pitemoni.

⁶ Pitiraōkiuatakasaaki, kona pipoxokoniua āti kamakasaakiri maerekati. Pitiraōkiuatakasaaki, pipoxokoniua atāo inakari pikenakotakasaaki. ⁷ Pitiraōkiuatakasaaki, pimīteenekari ikinipoko. Pitiraōkiuatakasaaki, pauikari kākiti sākire. Pitiraōkiuatakasaaki, pauikari kākiti kamaenetakiti ikamini. Pitiraōkiuatakasaaki, ! katimari pitakanapiniri piparīka pikamini. ⁸ Tiraōkitxi ! ixipoka. Txamari kākiti sāpiretakiti xipokapitikako. Kākiti sākiretiniri āti uāka sākire xipokapitikako. Kākiti imarore ereēkokapitikako. ⁹ Kotxi poiāonoka aimarore. Poiāonoka Teoso sākire aimarota asāpiretini. ¹⁰ Āti ōti aimarotari ikinipoko atāo inakari. Iuasaaki atāo minakati ! auaika. ¹¹ Amarini ninakasaakiua, nisākirauata amarini sākirauatini atokokana. Iuasaaki nimarotakiti amarini imarotakiti atoko itxa. Nixinikakiti amarini xinikakiti atoko itxa iuasaaki. Txamari kikipe ninakasaakiua, ! ninirekaikari amarini atokokana nininiua. ¹² Uatxa aātamatakiti Teoso oerekakiti ! aposota iteene aātamatinini. Ātakaāri katxikoroā atamatakori atoko itxa aātamatakiti, Teoso oerekakiti. Āti ōti Teoso apisatoō aāpoka. Uatxa poiāonoka nimarota. Āti ōti Teoso apisatoō aāpokasaaki, nimarotari ikinipoko, Teoso imarotinino atokokana.

¹³ Ininiā aua ipi āti pakini erekari aākixinireē auakari. Aua Teoso sākire auikiko. Aua Teoso kamaenetakiti ikamini auikiko. Aua tiraōkitxi. Ikara tiraōkitxi apiaerekatakari.

14

Erekari Matamatakoti Siākiti

¹ Ininiā ikiniōtika hītiraōkiuatako. Hinirekariko Erekari Matamatakoti siākiti. Apiata hinirekariko iua sikinii Teoso iokanapirena hīsāpiretini. ² Kākiti sākire mimarotakoti sākiretakari misākiretari Teoso. ! Imisākiretari kākiti, kotxi kākiti ! imarotari isākire. Erekari Matamatakoti posotiireē isāpiretari atāo inakari Teoso oerekakiti. ³ Teoso sākire sāpiretakaripekana misākiretari kākiti. Iua txīkitakari kākiti apiata auikiniri Teoso sākire. Isikataparaxiniretana ninoa. Imīkapiritari ninoa ākixinire. ⁴ Kākiti sākire mimarotakoti sākiretakari, iuaka txīkitakaua apiata auikiniri Teoso sākire. Teoso sākire sāpiretakaripekana, txīkitakari ikinika Xesosi sākire auiaākani apiata auikinirina Teoso sākire. ⁵ Erekari hīte hīkinika sākiretiniri kākiti sākire mimarotakoti. Iuaritika apiaerekata hīsāpiretiniri Teoso sākire, kotxi Teoso sākire sāpiretakari apiari itxaua. Kākiti sākire mimarotakoti sākiretakari poiāori itxaua. Iua sāpiretiniāri isākire kenakotakani ninoa sākireē ninoa apaka imarotiniri ikapani, iuasaaki erekari, kotxi iuasaaki itxīkitakari Xesosi sākire auiaākani apiata auikiniri Teoso sākire. ⁶ Hītemoni napokasaaki, nisākiretiniāri kākiti sākire mimarotakoti, nitxīkitakatai hīte apiata hāuikiniri Teoso sākire? Konapitini. Ininiā kona

itxa. Noerekiniāi Teoso oereēkiti notamoni, nisāpiretiniāi Teoso imarore, nisāpiretiniāi Teoso sākire, noerekiniāi Teoso sākire atāo hāuikini ĩkapani, iusaaki nitxīkitakai hīte apiata hāuikiniri Teoso sākire. ⁷ Maxinikari xikari moianatakarī atxiīti viorāo, atxiīti xōkakori pakini. Kākiti mimatireni kaminiāri ikara, iusaaki xikari atāo inakari !imarotaāka. Ienenoka aua.

⁸ Ātipekana noerekai. Trōpetā ene atāo ininiā, sotatoakori kenakotakasaakiri, aiamatana ineenamauatini ĩkapani. Trōpetā ene na atāo ininiā, sotatoakori !imarotari neenamati manapīpe inini.

⁹ Iua atokokana kākiti sākire imarotakiti himasākiretakaniā, kiriāpa ninoa imarotari hīsāpiretakiti? Ikara atoko hīsākirauatiniā, maxikatīka hīsākirauata. ¹⁰ Itori uākati sākire aua ikini itixiti. Apakata ikinika imarotiko. ¹¹ Kākiti sākire nimimarotakaniā, ininiā notamoni iua āti tixinikiri atoko itxa. Apaka iuamoni nota āti tixinikiri atoko nitxa. ¹² Hīte iteene nirekari Erekarī Matamatakoti siākiti hāpakapini, ininiā apiata hinirekariko isikinii isikakiti Teoso sākire auīākani iua sākire iteene auīkinina ĩkapani.

¹³ Ikara atoko ininiā, erekari kākiti sākire mimarotakoti sākiretakari amanainiri Teoso isikaimaroretiniri iua sāpiretiniri isākire kenakotakani ninoa sākireē ninoa apaka imarotini ĩkapani. ¹⁴ Teoso nimisākiretiniā kākiti sākire mimarotakotiā, nixinire misākiretari Teoso, txamari !nimarotari notaka sākire. ¹⁵ Ininiā kipa atāo nikamini? Ia atāo: Nimisākiretari Teoso nixinireē. Apaka nimisākiretari Teoso niīkiteē. Nixikarauata nixinireē. Apaka nixikarauata niīkiteē. ¹⁶ Kākiti sākire mimarotakotiā hīsāpiretiniāri Teoso ereka inini, kākiti ereē pisākire mimarotakani sauaki, !iposotari “atāopitikara” inini, kotxi !imarotari pisāpiretakiti. ¹⁷ Atxiīti atāo hīsāpiretiniri Teoso ereka inini, txamari iusaaki kona pitxīkitakari iua kākiti apiata auīkiniri Teoso sākire.

¹⁸ Peerekari Teoso, kotxi apiata isikaimaroretano nota nimisākiretiniri iua kākiti sākire mimarotakotiā. Poiāonoka hīte imarotari kākiti sākire mimarotakotiā himisākiretiniri iua. ¹⁹ Iuaritika, Xesosi sākire auīākanikata nauakasaaki, apiaerekata nisāpiretinina sīkonoka sākiretxi ninoaka sākireē, kotxi apakata ninoa imarotini ĩkapani nisākire. Nipositiniāri sīko mio sākiretxi kākiti sākire mimarotakotiā nisāpiretiniri kākiti, itori nisākire, iuaritika maxikatīka nisākirauata, kotxi kākiti !imarotari.

²⁰ Nitariakori, !apakata himarore amarini xapitikiri imarore atokokana inini. Iuaritika amarini xapitikiri makamakaniri maerekati ātimoni, iua atokotxikana amarini xapitikiri atoko !hīkamapiri maerekati ātimoni. Aneēkari imarore atoko itxako hīte imarore. ²¹ Teoso sākire iōkatsopatakori txari:

Niokanatarī āti uāka hītemoni, hīte nimisākiretini ĩkapani. Āti tixinikini sākireē nimisākiretai hīte. Iuaritika kona hīkīpitari nisākire, itxa Apiananiri.

²² Ininiā Teoso sākire auīākari sākiretiniāri Teoso sākire mauīākani sākire, iua mimarotakinī, Teoso sākire mauīākani iusaaki imarotari Teoso posotiire. Teoso sākire auīākari sāpiretiniāri Teoso sākire apanakini Teoso sākire auīākanimoni, ninoa iusaaki imarotari Teoso posotiire. ²³ Teoso sākire auīākani apotiitiniāua, ikinimane sākiretiniāri kākiti sākire mimarotakotinani, iusaaki kākiti Teoso sākire poiāopanika imarotakari ĩroiniā, Teoso sākire mauīākati atxiīti ĩroiniā, ininiā iua uākatai hīte mapitxiritakani hininiua.

²⁴ Txamari ikinimane sāpiretiniāri Teoso sākire iusaaki, Teoso sākire mauīākati ĩroiniā, kākiti Teoso sākire poiāopanika imarotakari ĩroiniā, ininiā iua imarotari maerekati kamakari ininiua. Iusaaki imarotari imisiritiko auapitika āti ōti. ²⁵ Iusaaki ikinimane imarotari iua xinikakiti ākixinireē. Ininiā iusaaki ikapotoreēkaua Teoso apisatoō. Itxari: “Atāopitikara Teoso aua hīte sauaki,” itxa.

Kākiti Apotiitakasaakīua Teoso Apisatoō

²⁶ Nitariakori, kanatokopa itxa Teoso sākire auīākani apotiitakasaakīua? Aāpotiitakasaakīua, akinika aminari xikari Teoso ĩkapani. Akinika iposope Teoso sākire

aõerekini atão aimarotini ĩkapani. Akinika iposope Teoso oerekakiti asãpiretini. Akinika iposope kãkiti sãkire mimarotakoti asãkiretini. Akinika iposope iua sãpiretakiti asãpiretini ĩkinimane imarotini ĩkapani. Ikara atoko itxa aãpotiitakasaakiua Teoso apisatoõ. Iuasaaki makamari ĩkinika, Teoso sãkire Teoso nakitiakori apiata auikini ĩkapani. ²⁷ Iuasaaki kãkiti sãkiretiniãri kãkiti sãkire mimarotakoti, ipinoka kãkiti kamari ikara atoko inakari, atxiĩti ipi ãti pakini kamari ikara atoko inakari. !Apakata apikomoni kãkiti sãkiretiniri kãkiti sãkire mimarotakoti iuasaaki. ãti sãkirauatakasaaki, apanakini kenakotari. ãtinoka sãkirauata iuasaaki. Isãkirauataka atoko, ãti sãpiretari isãpiretakiti isãkire mimarotakani sãkireẽ, isãpiretakiti imarotinina ĩkapani. ²⁸ Iuasaaki isãkire sãpiretakari mauakaniã, !apakata kãkiti sãkire mimarotakoti sãkiretakari sãkirauatini. Erekari ãkixinireẽ isãkirauatini Teosokata.

²⁹ Kãkiti apotiitakasaakiua Teoso apisatoõ, iuasaaki ipi, atxiĩti ipi ãti pakini Teoso sãkire sãpiretakani sãpiretariko Teoso sãkire. Iuasaaki apanakini xinikariko iua sãpiretakiti, atão inini imarotini ĩkapani. ³⁰ Topãkakari xinikasaakiri apikomoni Teoso oerekakiti, ininiã iuasaaki sãkirauatakari iotoka, Teoso oerekakiti topãkakari sãpiretini ĩkapani. ³¹ Ikara atoko ininiã ĩkinimane posotari Teoso sãkire isãpiretinina. Teoso sãkire sãpiretakani ãti sãkirauata, eereka ãti sãkirauata. Ikara atoko itxaãpotana. Ininiã ĩkinimane oerekaãkako. ĩkinimane sikataparaxiniretaãkako. ³² Teoso sãkire sãpiretakani posotari iãtapiniri Teoso oerekakiti isãpiretini ĩkapani. ³³ Kotxi Teoso kona potxitari ienenoka auini. !Apakata kaiãopokori sãkirauatini, kotxi apanakini !imarotari ninoa sãpiretakiti. Neenamtxi atoko itxa. Teoso nirekari inakitiakori kamakiti atão inini apotiitakasaakiuana iua apisatoõ.

³⁴ !Apakata sito sãkirauatini hãpotiitakasaakiua Teoso apisatoõ. !Auiritaãka osãkirauatini iuasaaki, kotxi Teoso sãkire iõkatsopatakori paniãtaro sito kaminiri kiki paniãtakiti. ³⁵ Ninoa nirekiniãri ipimarauatinina imimarotakiniti imarotinina ĩkapani, ininiã ninoa pimaãna ĩtanirina aapokona apokasaakina. Sito sãkirauatiniã kãkiti apotiitakasaakiua Teoso apisatoõ, kãkiti pãtauata oa sãkirauatini xika.

³⁶ Hĩte kona apokaerekatatarini nisãpiretakiti? Atxiĩti hĩte kamari Teoso sãkire? Konapitini. Atxiĩti Teoso sãkire iokanataãka hĩtenanimoni? Konapitini.

³⁷ Teoso sãkire sãpiretakani hininiãua, Erekari Matamatakoti siãkiti auiniã, ininiã iuasaaki himarotari ikara nisãkire niõkatsopatakiti Apiananiri paniãtakiti inini. Hĩsãpiretariko hãuikiniri ikara. ³⁸ Himamaãkatakaniãri ikara nisãkire, apanakini !imaãkatari hĩte sãkire.

³⁹ Ininiã nitariakori, iteene hinirekariko Teoso sãkire hĩsãpiretini. Apaka hãuiritariko kãkiti sãkire mimarotakoti sãkiretiko. ⁴⁰ Ininiã hĩkamariko ĩkinika atão hãpotiitakasaakiua Teoso apisatoõ, Teoso sãkire ĩkinimane kenakotini ĩkapani.

15

Xesosi Õkitikiniua Pirena

¹ Nitariakori, uatxa iuaĩkana ninirekari hĩte xinikiniri Teoso iokanapirena erekari hĩtemoni nisãpiretakiti. Hĩte apakapapekari ikara nisãpiretakiti. Hĩte iteene auikari ikara. ² Ikara Teoso iokanapirena erekari oerekai himaerekani makatxakiko. Ininiã atão hĩxinikariko ikara nisãpiretakiti. Itene hãuikiniãri Teoso iokanapirena erekari, himaerekani makatxakaãka. Atão minakati hãuikiniã, ininiã maxikatĩka hãuikari.

³ Nisãpiretapekai mitxi nota apakapakiti, kotxi ia himimarotakaniã !apakata. Ia napakapakiti: Kristo ipina amaerekani imakatxakini ĩkapani. Teoso sãkire iõkatsopatakori sãpiretaua ikara. ⁴ Eereka ikataãka. Ipi õti, ãti õtisaaki iuaĩkana õkitikaua. Teoso sãkire iõkatsopatakori sãpiretaua ikara. ⁵ Eereka Petro atamatari iua. Eereka ĩkinika Kristo moianariakori atamatari iua. ⁶ Eereka kiẽtosi aĩtariakori atamatari iua ãti õti apotiitakasaakiuana. Kaiãopanikani ninoa auapanika. ãtikaka ipĩpe. ⁷ Eereka Txiako

atamatari iua. Eereka ikinika Xesosi iokanatakini atamatari iua. ⁸ Imapotōkire nota apaka atamatari iua. !Natamatari Xesosi ikorapokoriti itīpokotakasaaki. Eereka iua apoka notamoni.

⁹ Xesosi iokanatakiti poiāori nitxaua. Apanakini iua iokanatakini apiata. Mitxi ! erekari nikamakiti, kotxi nimisiritana Xesosi sākire auīākani Teoso nakitiakori, iuaritika Xesosi akiritano iua iokanatakiti nininiua. ¹⁰ Teoso sikari ikinipoko erekari notamoni, ininiākara iua iokanatakiti kākitimoni nitxaua. Kona maxikatiīkani isikari ikinipoko erekari notamoni, kotxi iteene niparīkauata Teoso ikapani. Apanakini Xesosi iokanatakini iteene parīkauata, iuaritika nota parīkauata apiata. Kona nota posotiireēni niparīkauata. Ikinipoko erekari Teoso sikakiti notamoni sikaposotiiretano nota niparīkauatini ikapani. ¹¹ Atxiīti nota sāpiretai ikara Kristo sāpiretakiti. Atxiīti apanakini iua iokanatakini sāpiretai. Ikara Kristo sāpiretakiti ate sāpiretai. Ikara Kristo sāpiretakiti hīte auika.

Ipīkani Ōkitikiko Pirena

¹² Ate sāpiretai Kristo iuaīkana ōkitikiniua. Ininiā kinirepa ātikaka hīte txari ia? “!Auari ipīkani iuaīkana ōkitikiniua,” hītixa. ¹³ Ipīkani iuaīkana ōkitikiniua mauakaniā, ininiā Kristo apaka kona ōkitikaua. ¹⁴ Kristo mōkitikakaniāua, ininiā maxikatiīka asāpiretai iua sākire. Kristo mōkitikakaniāua, maxikatiīka hāuikari iua sākire. ¹⁵ Kristo mōkitikakaniāua, na atāo asāpiretai Teoso kamakiti, kotxi ate sāpiretapekai iua ōkitikiniri Kristo. Ipīkani iuaīkana ōkitikiko mauakaniā, Teoso kona ōkitikari Kristo. ¹⁶ Kotxi ipīkani iuaīkana mōkitikakaniāua, Kristo apaka kona ōkitikaua. ¹⁷ Kristo iuaīkana mōkitikakaniāua, maxikatiīka hāuikari iua sākire, kotxi !imakatxakari himaerekani. ¹⁸ Kristo iuaīkana mōkitikakaniāua, ipīkani iua sākire auīākani pīpinanaka. ¹⁹ Xesosi mōkitikakaniāua, iuaritika ikiniōtika ate auikari iua sākire ikorapokoriti aāuakasaaki, ininiā mīīkiteni apiarini atxaua ate.

²⁰ Ikara na atāo. Uatxa maxinikari atāo inakari. Kristo ipīkaripeka ōkitikapeēkaika. Iua amātiiri merepitipanika auakari atoko itxa. Iua merepanika ōkitikaua, ininiākara aimarotari apīkasaaki ate apaka ōkitikaua. ²¹ Āti kiki kamakitiā ipīkitxi apoka ikini-manemoni. Iua atokokana āti kiki kamakitiā, ipīkani ōkitikiko apoka. ²² Adāo kamakitiā ikinimane ipina. Kristo kamakitiā iua sākire auīākani auapininiika ātipirika. ²³ Kākiti ōkitikaāka ia atoko. Kristo mitxi ōkitikaua. Iua merepanika ōkitikakariua. Ikanapiriākasaaki iua nakitiakori ōkitikauako apaka. ²⁴ Eereka itixi xipokaāka. Iuasaaki ikinika auītetxi maerekati, ikinika kaposotiireri maerekati pakini ixipokako. Eereka ikinika iua nakitiakori isika iri Teosomoni. ²⁵ Kristo ikinimane auīte itxauako. Iuasaaki ixipokari ikinika imokaiakari posotiire, kotxi ikiti patapi itakana ninoa. ²⁶ Imokaiakari atoko itxa ipīkitxi. Imokaiakariakori ixipokasaaki, imapotōkire ixipokari ipīkitxi. ²⁷ Teoso sākire iōkatsopatakori txari:

Teoso takapekari ikinika iua kiti patapi.

Ikara Teoso sākireē “ikinika” aua, iuaritika aimarotari iuaka !itakaua Xesosi kiti patapi, kotxi Teosora txīkitakari Xesosi ikinimane auīte ininiua. ²⁸ Kristo ikinimane auīte inakasaakiua, iua Teoso ākiri auītetariko Teoso, kotxi mitxi Teoso txīkitakari iua ikinimane auīte ininiua. Iuasaaki Teosonoka ikinimane auīte itxaua.

²⁹ Ipīkani mōkitikakaniāua, kinirepa apanakini patxisataāka ipīkani ōkitikiniua ikapani? ³⁰ Atepekana, ipīkani mōkitikakaniāua, kinirepa ikiniōtika amīteenekari monōkori? ³¹ Nitariakori, nimarotari ipīkitxi monōkori ikiniōtika. Ikara nisāpiretai, kotxi niuikai hīte. Niuikari aāuini aāuīte Kristo Xesosikata. ³² Uai Épeso sitatxitiā kākiti ākiti kaneenamari atoko inakani nirekari imaīkinino nota. Ipīkani mōkitikakaniāua, kinirepa nimīteenekari ikara atoko inakari? Ipīkani mōkitikakaniāua, ininiā atxari:

Manipokota, maiāta, kotxi katana apinako.

³³ Kona hāuiritapiri āti misirienetini. Kākiti erekari moianatiniāri maerekati kamakani, ninoa txīkitakari iua maerekati kamakari ininiua. ³⁴ Himerekako. Himarotariako atāo inakari hīkamini īkapani. Maerekati !hīkamapinikako. Hīpētatauatako, kotxi apanakini hīte !imarotari Teoso.

Kākiti Īto Ōkitikasaakia

³⁵ Atxiīti āti txari: “Kanatokopa itxa kākiti ōkitikiko? Iuasaaki kanatokopa inakaripa iīto?” itxa. ³⁶ !Kiīkiteri kākiti pimarauatini ikara atoko. Takariki, pimatakakaniāri kipatxi āki !ipitxaka. ³⁷ Pitakarauatakasaaki, pitakari okinoka, atxiīti triko, atxiīti kimi. Takari aneēkari kona pitaka. Kona takariki atokoni itxa takari ipitxakasaaki. Ipitxere ipinimoni. ³⁸ Teoso kamari takari pitxere inireēkiti iaōka. Ikinī takariki Teoso sikari ipitxere. ³⁹ Āti xinitxi kona āti xinitxi atokoni. Aua kākiti xini. Kaxipirini xini ipinimoni itxa. Kotipiriki xini ipinimoni itxa. Ximaki xini ipinimoni itxa.

⁴⁰ Aua iaxiti apiko nopinixiti auakani, aua itixi takote auakani apaka. Peereri ikinipoko, iuaritika iaxiti apiko nopinixiti auakani ipinimoni, itixi takote auakani ipinimoni. ⁴¹ Peereri atokatxi. Peereri kasiri apaka, txamari kasiri ātiāo. Peereri iōriki apaka, txamari iōriki ātiāo. Apaka āti iōriki āti iōriki atokotxikana !auari.

⁴² Iua atokokana itxa ipīkani iuaīkana ōkitikikosaaki. Ītotxi ixiti taākori !auaika. Iua ōkitikakori kona ipinaika. ⁴³ Ītotxi katikosaaki, !erekari. Ītotxi iuaīkana ōkitikikosaaki, peerekari. Ītotxi katikosaaki !kataparari. Iuaīkana ōkitikikosaaki, kataparari. ⁴⁴ Aīto katikosaaki, aīto itixi auakani ĩto atokotxikana. Aīto iuaīkana ōkitikikosaaki ātiāo aīto. Ītotxi īkorapokoriti aāuini īkapani aua. Apaka aua ĩtotxi ipinimoni, Teoso sikakiti apīkasaaki. Ikara ĩtotxi !ipina. ⁴⁵ Teoso sākire iōkatsopatakori txari:

Teoso txīkitakari kiki merepitipanika auakari Adāo inakori auāki inini.

Adāo imatonōkari auakari, Kristo inakori, txīkitakari kākiti auāki inini, apaka imapinakanani īkapani.

⁴⁶ Teoso nireēkiti axinikini kona apoka merepanika. Merepanika axinikari ateka nireēkiti, eereka axinikari Teoso nireēkiti. ⁴⁷ Kiki merepitipanika auakari kipatxi kamakori itxaua. Āti kiki Apiananiri, Teoso tixinekiri iua. ⁴⁸ Ikinimane kākiti itixi auakani, iua Adāo kipatxi kamakori atokokana. Ikinimane kākiti Teoso tixine sikani, Kristo Teoso tixinekiri atokokana. ⁴⁹ Aponaniākasaaki, kipatxi kamakori aīto, Adāo ĩto atokokana itxa aīto. Iua atokokana Teoso tixinekiri ĩto, Kristo ĩto atokokana itxako aīto.

⁵⁰ Nitariakori, nisāpiretai hīte, !apakata kākiti ĩto, iarēka pakini sini Teoso auītetxi ininiātaāua. Ipinakari kona auapininiika !itxa. ⁵¹ Hīkenakotariko nisākire. Nisāpiretaiko kākiti mimarotakiniti mitxi. Kona ikinimaneni ipina. Iuaritika amakinika txīkitakaāka ipinipo aniniua. ⁵² Iuasaaki imapotōkire trōpetakero xōkaāka. Iuasaaki mēkokari katimari atoko itxa. Poki katimari matākaātini atoko itxa. Amakinika katimaritika txīkitakaāka ipinipo aniniua. Iua trōpeta xōkikosaaki, iuasaaki ipīkani ōkitikaāka. Kona ipinaikanako. Iuasaaki atxīkitakaāka ipinipo aniniua. ⁵³ Kotxi arakakani txīkitakaākako miarakakani ininiua. Ipīkani txīkitakaākako mipīkani ininiua. ⁵⁴ Arakakani txīkitakikosaaki miarakakani ininiua, apaka ipīkani txīkitakikosaaki mipīkani ininiua, iuasaaki Teoso sākire iōkatsopatakori apopeka. Ia atoko itxa Teoso sākire kitxakapirīka:

Ipīkitxi xipokaākako. Auape kāiatakari, ipīkitxi xipokakari.

⁵⁵ Ipīkitxi tsii !auaika. Maerekani misiritikoātaā anikakari kona kāiata.

⁵⁶ Ipīkitxi tsii mitxi aua amaerekani xika. Teoso paniātakiti iōkatsopatakori oerekaua amaerekani. Teoso paniātakiti iōkatsopatakori mauakaniā, !auari kākiti misiritiko. Txamari maerekanitxi tapara aua, kotxi Teoso paniātakiti iōkatsopatakori auapitika.

⁵⁷ Erekapitikari Teoso, kotxi aāuīte Xesosi Kristo txīkitakaua akāiatini.

⁵⁸ Ikara atoko ininiā, nitariakori nota tirketakini, kataparaxinire hītxako. Kona hāuiritapiri apanakini txīkitakinii maerekati hīkamini. Hīparīkauatako ikiniōtika Apiananiri ĩkapani, kotxi himarotari maxikatiika !hīparīkauata iua ĩkapani. Hīparīka ĩki hāpakapapitikako.

16

Txineiro Sikiko Xesosi Sākire Auiākani ĩkapani

¹ Uatxa nisāpiretai txineiro himakatzakini Teoso nakitiakori ĩkapani. Hīkamariko Karásia tixini auakani nipaniātini atokotxikana. Nipaniātana ninoa Teoso misākiretikoātaā apotiitakaniua ia atoko: ² Ikini Tomīko hīkinika hīte nīkataro txineiro ninoa ĩkapani. Txineiro Teoso siākiti iaōka, hinīkatari ipixini ninoa ĩkapani. Ininiā ereē napokasaaki apikomoni txineiro kona apotiitaāka. ³ Napokasaaki ereē, niokanatarī kākiti, txineiro hīsikakito anikakani Xerosareēmoni. Hīsāpiretano hīokanatsopatakitiā himereēkini hītxineirote anikakani ĩkapani. ⁴ Atxiīti erekari nota sini apaka, ininiā ninoa moianatano nota.

Paoro Paniātakiti Pirena

⁵ Masetónia tixinimoni nisako, eereka napoka hītemoni, kotxi nisapitikako Masetóniamoni. ⁶ Iuasaaki atxiīti nikaikota hītekata. Atxiīti nikaikota mitaāsaaki hītekata. Ininiā eereka hīte posotari himoianatinino nota naiamatakasaaki apikoxiti nisini ĩkapani. ⁷ Kona ninirekari mapaōtinoka nikaikotini hītekata uatxa. Apiananiri auiritiniāno, ninirekari apikomoni nikaikotini hītekata. ⁸ Txamari nikaikota uai Épeso sitatxiti Pētekósitxi kiiniriti manapi ōti. ⁹ Kotxi uatxa kaiāopokori kākiti ĩkorapokoriti auakani nirekari nisāpiretiniri Teoso iokanapirena erekari ninoamoni. Txamari kaiāopokori kākiti !inirekano.

¹⁰ Atxiīti Tximótxio sari hītemoni, ininiā hāpakapariko iua, imapīkarauatakani ĩkapani hīte sauaki, kotxi iua parīkauata Apiananiri ĩkapani nota parīkauatini atokokana. ¹¹ Ininiā kona apakata kākiti mamaākatakaniri iua. Ikanapiriākasaaki notamoni, iuasaaki hīokanatarī iua erekaxinire inini. Niātapari iua aītariakorikata.

¹² Iteene ninirekari aītari Aporo apokini hītemoni aītariakorikata. Txamari uatxa ! inirekari isini hītemoni, iuaritika iposotakasaaki isapitikako hītemoni.

¹³ Araōkire hītxako. Iteene hāuikariko Teoso sākire. Hītaparaxinireritika hāuako. Hītapararitika hāuako Teoso ĩkapani. ¹⁴ Xesosi tiraōkiā ĩkinipoko hīkamako.

¹⁵ Hīte imarotari Esitépana, inirimane pakini. Ninoa Akaia tixini auakani. Iuaātaā ninoa merepitipanika auikari Xesosi sākire. Ninoa iteene parīkauata Teoso nakitiakori ĩkapani. Nitariakori, iteene nipaniātai hīte. ¹⁶ Hīkamariko kākiti ikara atoko inakani paniātakiti. Hīkamariko ĩkinimane amoianari paniātakiti, atekata parīkauatakani paniātakiti. ¹⁷ Esitépana, Potonato, Akaiko pakini apokasaaki uai, nipoxokoniuata, kotxi ĩminarina notamoni mauakati hīte masikakinīti. ¹⁸ Ninoa sikapoxokonitari nākixinire, hīte ākixinire apaka. Erekari ate iuikiniri kākiti ikara atoko inakani.

¹⁹ Teoso misākiretikoātaā apotiitakaniua Ásia tixini auakani xinikamanapitai hīte. Ákira inakori, Pisisira inakoro pakini iteene xinikamanapitai hīte, kotxi Apiananiri nakiti hītxaua. Apaka Xesosi sākire auiākani ninoa aapoko apotiitakaniua xinikamanapitai hīte. ²⁰ ĩkinimane aītariakori uai auakani xinikamanapitai hīte. Haōkitakakasaakiaua, himaratakakauako, kotxi Teoso nakitiakori hītxaua.

²¹ Nota Paoro iōkatsopatarī ia nitakapiretanapini niuakoā. ²² Kākiti matiretakaniāri Apiananiri Xesosi Kristo, maerekati takaāka iua nopini.

“Apiananiri, uai pina atemoni,” atxari Xesosi.

²³ Apiananiri Xesosi Kristo sikari ĩkinipoko erekari hītemoni. ²⁴ Nitiretai hīte hīkinika, kotxi Kristo Xesosi nakitiakori atxaua. Ameē.

2 KORĪTO

Paoro Iokanatsopatakiti Iuaĩkana Korīto Auakanimoni

¹ Nota Paoro, Xesosi Kristo iokanatakino. Teoso nirekari iokanatinino kākitimoni isākire nisāpiretini ĩkapani. Ia aātsopa niōkatsopata. Aĩtari Tximótxio aua notakata. Ia iōkatsopari niokanata kākiti Teoso mereēkinimoni, Korīto sitatxiti auakanimoni. Apaka ia iōkatsopari niokanata kākiti Teoso nakitiakorimoni, Akaia tixini auakanimoni. ² Aĩri Teoso, Xesosi Kristo Apiananiri pakini sikari ikinipoko erekari hĩtemoni. Ikamaerekaxiniretai hĩte.

Teoso Mĩkapiritiniua Pirena

³ Peerekari Teoso. Aāuĩte Xesosi Kristo iri itxaua. Kaamonĩkareri iua. Āti kākiti amonĩkakari iua atoko inakari ! auari. Amaerekaxinirensaaki, iua atekata aua. Amaerekaxinireni imaktxakinaua. Iuasaaki imĩkapiritaua. ⁴ Imĩkapiritaua amaerekaxinirensaaki, ininiā apanakini maerekaxinirensaaki, iua atokotxikana ate mĩkapiritana ninoa apaka, kotxi aimarotari Teoso mĩkapiritiniua ate. ⁵ Kristo iteene misiritaāka, ininiā ate misiritaāka apaka. Iua atokokana Teoso moianatari Kristo, ininiā iua moianataua ate apaka. ⁶ Apanakini misiritaua, kotxi anirekari Teoso mĩkapiritinii hĩte. Anirekari Teoso makatxakiniri himaerekani. Teoso mĩkapiritaua ate, ininiā hĩte apaka imĩkapirita. Teoso mĩkapiritakasaakii hĩte, isikataparatai himisiritiko hĩpoxokoniritika himĩteenekini ĩkapani. Hĩte misiritiko ate misiritiko atokokana. ⁷ Aimarotapitikari erekari Teoso sikinii hĩte, kotxi himisiritaāka ate misiritiko atokokana, ininiā Teoso mĩkapiritai hĩte, ate imĩkapiritini atokokana.

⁸ Aĩtariakori, anirekari hĩxinikiniri ate misiritiko Āsia tixini aāuakasaaki. Iuasaaki iteene amaxikaāka. Kona amĩteenekari. Auākatari aōkiko. ⁹ Iuasaaki aākixinireē atxa: “Apinapitikako,” atxa. Ikara atoko ininiā, aimarotari kona ate posotiire ! auari. Aimarotari Teosonoka sikataparataua, kotxi iua posotari ōkitikiniri ipĩkari. ¹⁰ Pamonōkoniri iuasaaki, iuaritika Teoso makatxakaua amapinakani ĩkapani. Iua makatxakapanikaua amapinakani ĩkapani. Ate auikari iua sākire, iuaĩkana imaktxakininiua tĩkane. ¹¹ Hĩte moianataua ate, kotxi himisākiretari Teoso ate ĩkapani. Ininiā Teoso kamari hamanaākiti iaōka, kotxi Teoso kamari erekari atemoni. Eereka kaiāopokori kākiti sāpiretari Teoso iua ereka inini, kotxi ikamari ninoa amanaākiti iaōka ate ĩkapani.

Paoro Masikani Korĩtomoni

¹² Ate poxokoniuata, kotxi ate kamari erekarinoka Teoso oerekakitinoka, kākitimoni, hĩtemoni apaka. Atāonoka anireka akamini kākitimoni. Aimarotari ikara aākixinireē, ininiā apoxokoniuata. Ikara atoko aāuini, kotxi ikinipoko erekari Teoso sikakiti sikataparataua. Kākiti imaroreē ! iposotari ikaminiri iua auini ereka inini, kotxi !kiĩkiteri kākiti. ¹³ Hātatsopatakasaakiri aiōkatsopatakiti hĩtemoni, himarotari axinikakiti aākixinireē. Axinikakiti, asākire pakini ātinoka itxaua. ¹⁴ Hĩte na iteene imarotapanikaua ate, iuaritika ninirekari hĩuikiniua ate, Apiananiri Xesosi uai ikanapiriini ōtisaaki, ate iuikini atokotxikana.

¹⁵ Ikara nimarota, ininiā ninirekamari hĩtemoni nisini, ipikata hĩpoxokoniuatini ĩkapani. ¹⁶ Masetónia tixinimoni nisini apisapanika, ninirekamari hĩtemoni nisini. Eereka nikanapiriākasaaki uaimoni, ninirekamari hĩtemoni iuaĩkana nisini, ininiā iuasaaki ninirekamari hĩte iokanatinino nota Xotéia tōpamoni. Txamari na nisa. ¹⁷ Atxiĩti hĩte txano nota: “Pixinikasaakiri uai papokini, na iteene pinirekari uai papokini,” hĩtxano. Txamari ninirekapitikari napokini hĩtemoni. Na nota xinikari Teoso sākire mauĩākani xinikakiti atoko, kotxi ninoa sākire: “Ari, nisapitika,” txamari ākixinireē itxana: “Na nisapani,” itxana. ¹⁸ Nota sākire hĩtemoni ninamaā: “Ari nisapitika,” ninakasaaki,

nākixinireē apaka txari: “Ari, nisapitika,” nitxa. Teoso atāonoka sākirauatakari imarotari ikara nisākire atāo inini. ¹⁹ Sírasi inakori, Tximótxio inakori, nota pakini sāpiretapekai hīte Teoso ākiri, Xesosi Kristo sākire. Xesosi sākire inamaā auakari, isākire ākixinireē auakaritxikana isākireta. “Nikamapitikariko,” inakasaaki, ākixinireē inirekapitikari ikaminiri. Ikamari isākire iaōka. ²⁰ Teoso sikaenetakiti kākitemoni kaiāopokori aua. Iua Kristo sikaua ikinipoko Teoso sikaenetakiti, ininiākara atxari: “Ameē.” Peerekari Teoso, kotxi Kristo sikapitikaua Teoso sikaenetakiti. ²¹ Teosokara sikataparaxiniretai hīte, ate apaka, Xesosi Kristo amatakanapakani ĩkapani. Teosokara mereēua iua nakitiakori aniniua ĩkapani. ²² Apaka Teosokara sikaua Erekar Matamatakoti, Teoso nakiti aniniua aimarotini ĩkapani. Iua Erekar Matamatakoti aua aākixinireē. Teoso takaōtxikare itxaua iua. Iua Erekar Matamatakoti merepitipanika Teoso sikakiti atemoni, ininiā aimarotari apikomoni isikapanikaua itanapoko inīkatakiti ate ĩkapani.

²³ Kona nisari hīte Korīto sitatxiti auakanimoni, kotxi kona ninirekari hīte matina-niuatini hīte maerekani nisāpiretini xika. Teoso imarotari ikara atāo inini. ²⁴ Hīauīte kona ate txaua. Kona apaniātai: “Ia atoko inakari hāuika. Kona ikara atoko inakari kona hāuikape.” Kona ikara atoko !atxai hīte, kotxi hīte auikapitikari Teoso sākire atāo inakari. Aparīkauata hītekata hīpoxokoniuatini ĩkapani.

2

¹ Nākixinireē nitxari: “Na nisa iuaīkana ninoamoni nikamamatinanitinina ĩkapani.” ² Nota xika maerekaxinireninoka hininiā, kiripa kamapoxokinitano nota? Hītenoka aua nota kamapoxokonitakani. Ininiā kona nota nirekari maerekaxinireni hinini nota xika. ³ Kona ninirekari hītemoni napokini, maerekaxiniretikano ninini, hīte maerekani xika, ininiākara nota iokanatsopatar ĩkora mitxi niōkatsopatakiti hītemoni ereē napokini apis-apanika. Kotxi nikamapoxokonitakini hītxaua hīte. Nimarotari ia. Nota nienenīkasaaki, hīte himakinika enenīka apaka. ⁴ Niokanatsopatar ĩkora niōkatsopatakiti hītemoni, kotxi himaerekani xika maerekaxiniretinoka nitxa. Nitxiapata. Niokanatsopatar ĩkora niōkatsopatakiti hītemoni, iteene nitiretinii himarotini ĩkapani. Na ninirekari nikamamatinanitinii.

Maerekanitxi Maxinīkaretiko

⁵ Iua kiki maerekati kamakari maerekaxinireti txīkitakano. Iua apia maerekaxinireti txīkitakai hīte, maerekati ikamini xika. Na iteene ninirekari nitxitiniri iua. ⁶ Uatxa atokopeka homanatiniri. Iua txitaākapeka imaerekani xika. ⁷ Uatxa himaxinīkaretariko maerekati ikamakiti, ininiā hāpakapariko iua. Himisākiretariko iua. Hīkamapoxokonitari iua. Ikara atoko himinakaniāri, iua kona erekaxinireri. Ikara atoko himinakaniāri, atxiīti itakanapari Teoso kimapore. ⁸ Ininiākara nota ōtākikai hīte nitapararitika. “Atiretapitikai,” hītxariko iua, hītiretiniri imarotini ĩkapani. ⁹ Ininiā mitxi niokanatsopata hītemoni, kotxi iusaaki nataerekatai hīte. Ninirekari nimarotiniri, hīkīpitatar nōtākikini atxiīti? ¹⁰ Himaxinīkaretakasaakiri maerekati āti kamakiti, nota apaka maxinīkaretari. Maerekati āti ereē kamakiti auiniā, nimaxinīkaretari, kotxi nitiretai hīte. Kristo nirekari nimaxinīkaretiniri maerekati ikamakiti. ¹¹ Axinikasaakiri maerekati āti kamakiti, akamari Satanasi nireēkiti. Ininiākara !akamari Satanasi nireēkiti. Paimatireri iua. Inirekari akerokiniri. Aimarotari iua nireēkiti, ininiā apia imatirerini matxaua.

Txito Paoro Nitini

¹² Tóatxi sitatxiti napokasaaki Kristo iokanapirena erekari nisāpiretini tīkane, kākiti iuaā auakani nirekari nisākire imarotinina, kotxi Apiananiri sikanireōtana nisākire imarotinina ĩkapani. ¹³ Iuaritika !erekaxinireno, kotxi ninitapiimari aītari Txito inakori. Kona napokari. Ininiā nitakapiretanapana kākiti iuaā auakani: “Ereēpiko. Masetónia tixinimoni nisako,” nitxana.

Kamariāro Atoko Atxa

¹⁴ Peerekari Teoso kamakiti ate ĩkapani. Kristo nakiti aniniāua, Teoso txĩkitakaua ātipirika akāiatini, ikinimane imarotini ĩkapani. Teosokata akāiata. Teoso paniātaua Kristo pirena imarotiko ikini tōpati iaripiretini, kamariāro iarikatxiātini atokokana Kristo pirena iaripiretini ĩkapani. ¹⁵ Kristo sikaua Teosomoni, ininiā Teoso apokaerekataua, kotxi kamariāro arikiko Teoso ĩkapani atokokana atxa. Kamariāro arikasaaki omari samariāpota ikini tōpati. Iua atokokana asaāpota kākitemoni, kākiti apokakonimoni, kākiti pĩpinanaākanimoni apaka. ¹⁶ Kākiti pĩpinanaākanimoni kanaiatxiāri atoko atxa, kotxi asāpiretana Kristo sākire imauikakaniāna, ipinana. Kākiti Teoso apokakinimoni kamariāro eretxiāro atoko atxa, kotxi asāpiretana Kristo sākire auikiniāna, auapininiika itxanako Teosokata. Kiripa posotari ikara atoko inakari parĩkatxi ikamini Teoso ĩkapani? ¹⁷ Ate posotari Teoso ĩkapani aparĩkauatini, kotxi kona apanakini atokoni !atxa ate. Kaiāopokori kākiti sāpiretari Teoso sākire txineiro apakapini ĩkapani. Ninoamoni Teoso sākire tiitxi vētxitiko atoko itxa. Kona ikara atokoni !akama, kotxi Teoso iokanataua ate kākitemoni. Teoso atamataua, ininiā atāonoka asākirauata, kotxi Kristo nitiriakori atxaua.

3

Iōkatsopari Atoko Hĩtxa

¹ Atxiĩti iuaĩkana ate sāpiretatari erekari akamakiti asākire hāuikini ĩkapani? Atxiĩti hinirekatari apanakini iōkatsopatiniri erekari ate kamakiti ate sākire hāuikini ĩkapani? Atxiĩti ate nirekatari apanakini iōkatsopatiniri erekari hĩte kamakiti hĩte sākire ate auikini ĩkapani? Apanakini kamari ikara atoko. Ate kona kamari ikara atoko. ² Kona ninirekari iōkatsopari ikara atoko inakari, kotxi iua iōkatsopari atoko hĩtxa hĩte. Ate ākixinireē iōkatsopari atoko hĩtxa. Ikinimane atatsopatarari ikara iōkatsopari, ininiā imarotarina erekari hĩte kamakiti. ³ Iōkatsopari Kristo iōkatsopatakiti ate mĩkiti atoko hĩtxa. Kona txĩtaā iōkatsopataāka. Erekari Matamatakoti Teoso Mapinakati iōkatsopatarari. Kona aātsopaā iōkatsopataāka. Kākiti ākixinireē iōkatsopataāka.

⁴ Ikara atoko atxai hĩte, kotxi iteene aimarotari Teoso, Kristo nakitiakori aniniua. ⁵ ! Kimaroreua ate. Ateka !aposotari aparĩkauatini Teoso ĩkapani. Teosora sikaposotiiretaua. Isikari imarore atemoni. ⁶ Isikaposotiiretaua Teoso ĩkapani aparĩkauatini ĩkapani, isākire amaneri kākiti asāpiretini ĩkapani. Ikara isākire amaneri oerekaua Erekari Matamatakoti aākixinireē auini. Isākire amaneri !oerekaua ipaniātakiti iōkatsopatakori Moisesimoni isikakiti. Ipaniātakiti iōkatsopatakori Moisesimoni isikakiti paniātari kākiti ipinini imaerekani xika. Erekari Matamatakoti aākixinireē auiniā, itxĩkitakaua aāuapininiika anini.

Teoso Parĩka Amaneri

⁷ Teoso paniātakiti tesi pakini iōkataāka kai nopini. Teoso sikasaakiri ikara Moisesimoni, Teoso iotximere iteene aua. Moisesi toō iuasaaki apakapari Teoso iotximere. Iteene iotximere aua Moisesi toō, ininiā kākiti Isaeo auakani kona posotari atamatiniri. Iotximere poiāoāpotakasaaki, !iposotapanikarina itoō atamatinina. Ininiā Teoso iotximere auakasaaki, isākire iōkatakori apoka itiximoni kākiti ipinini ĩkapani. ⁸ Uatxa iua Erekari Matamatakoti txĩkitakari kākiti ātipirika auini ĩkapani, ininiā uatxa Teoso parĩka apiata. Peerekari ikara iparĩka. ⁹ Peerekari Teoso parĩka ipaniātakiti iōkatakori kākitemoni isikasaaki, txamari iuasaaki oerekari kākiti misiritiko imaerekani xika. Uatxa Teoso parĩka apiaerekata, kotxi Kristo kamaerekatarari kākiti. ¹⁰ Uatxa Teoso parĩka apiata. Peerekari. Iotximere apiari atoko itxa, ininiā iua parĩka kitxakapirĩka iotximere napakari atoko itxa. ¹¹ Kitxakapirĩka Teoso parĩka ipaniātakiti iōkatakori isikasaaki peerekari, txamari ikara Teoso parĩka xipope. ĩkorasaaki iparĩka kākiti ikamaerekatini !ixipoka, ininiā apiaerekata.

¹² Ia Teoso parĩka !ixipoka, ininiā ataparaxinireritika asākirauata. ¹³ Moisesi atoko ! atxaua, kotxi iua ipatoōtaua mākaxi mataā, itoō iotximere Isaeo auakani matamatakani

īkapani. Itoō iotximere poiāota, iuaritika !iposotarina atamatinirina. ¹⁴ Moisesi ipatoōtiniua atokokana ninoa Isaeo auakani oki ipataāka, kotxi !imarotarina atāo Teoso nireēkiti. Uatxapiima okina ipataākapanika atatsopatakasaakirina Teoso sākire iōkatsopatakori, Xesosi apokini apisapanika auakari sākiretxiti. !Imarotarina Teoso nireēkiti. Kristo sākire auikikosaaki, iua ipatoōtiko makatxakaāka, ininiā iuasaaki kākiti imarotari Teoso nireēkiti. ¹⁵ Īkorasaaki apaka Moisesi iōkatsopare atatsopatakasaakina, !imarotarina. Okina ipataākapanika. ¹⁶ Kākiti akiritakasaakiri Apiananiri, ipatoōtiko makatxakaāka. ¹⁷ Erekarī Matamatakoti itxaua Apiananiri. Erekarī Matamatakoti auiniā aākixinireē, !aparīkauataika amaerekani makatxakiko īkapani, kotxi Xesosi makatxakapekari amaerekani. ¹⁸ Xesosi sākire auīākani atxaua, ininiā atoō kona ipataāka. Ātakaāri atoko atxaua. Kākiti atamatakasaakiua ate, atamatarī Apiananiri iotximere. Apiananiri Erekarī Matamatakoti aākixinireē txīkitakaāpotaua ikara atoko aniniua, ininiā apiaāpota aiotximere.

4

Teoso Iokanapirena Erekarī Pokamara Atoko Itxa

¹ Teoso amonīkaua ate, ininiā iua paniātaua ia parīkatxi akamini, iokanapirena erekarī apanakinimoni asāpiretini. Ikara atoko ininiā, isikataparaxiniretaua, ininiā !anirekarī atakanapiniri ikara parīkatxi. ² Kākiti kipatari ikamakiti, maerekati ikamakasaaki, kotxi ipētauata. Ikara atoko inakari maerekati !akamaika. Atakanapapekari. !Amisirienetari kākiti. Kona akoketari ate sākire Teoso sākirekata. Teoso kenakotari asākire, ininiā atāonoka asākire, ininiā kākiti ākixinireē imarotari akamakiti atāo inini. ³ Kākiti mimarotakanisaakiri Teoso iokanapirena erekarī asāpiretakiti, kākiti pīpinanaākari atoko itxa. ⁴ Kākiti pīpinanaākari !imarotari Teoso iokanapirena, kotxi kākiti teosone, Satanasi inakori, ipatari ninoa oki, ininiā !atamatarina pokamara ninoa iopiniākari. Teoso iokanapirena erekarī pokamara atoko itxa. Peerekari ikara Teoso iokanapirena. Iua erekarī pirena sāpiretari Kristo Apiananiri ininiua, kotxi Teoso itxaua. ⁵ Ate kona sāpiretari kākiti ateka pirena. Ate sāpiretari Xesosi Kristo Apiananiri ininiua. Ate hīte nitiriakori atxaua, kotxi Xesosi nirekarī hinitiriakori aniniua. ⁶ Kitxakapirīka ipiānoka auakasaaki, Teoso txari: “Piopinikaxitita.” Iuasaakipeka iopinikaxitita. Iua Teosotxikana iopinikari aākixinire. Ikara iopinikare kamaimaroretāua Teoso Apiananiri kaiotximereri ininiua. Kristo aātamatakasaaki, aātamatarī Teoso iotximere.

Xesosi Sākire Auiākani Misiritiko

⁷ Kopiti maikoti atoko atxaua, kotxi atapara !auari. Iuaritika atemoni auari Teoso iokanapirena erekarī katireri. Ininiā aimarotari Teosonoka kaposotiireri, kataparari ininiua. Atepekana !aposotari. Atapara !auari. ⁸ Asinimoni amaxikakini aua, iuaritika !okaua ate. Atxiīti !aimarotari akamakiti tīkane, iuaritika kona aiotokakari Kristo sākire aāuikini. ⁹ Amisiritiko aua, iuaritika Teoso kona takanapaua ate. Atxiīti akarotaāka, iuaritika kona aōkaāka. ¹⁰ Ikinioṭtika aīto okiko monōkoni aua Xesosi sākire aāuikini xika. Xesosi atatsiirauata. Ipina. Iua atokotxikana ate atatsiirauata. Atxiīti aīto ipina iua sākire aāuikini xika. Xesosi auapika, kotxi ipīpe, eereka ōkitikaua, ininiā iua atokokana aīto auapika. ¹¹ Auapanika anakasaaki, aōkiko monōkoni aua Xesosi sākire aāuikini xika. Aīto ipinapitikako, iuaritika aāuapanika, kotxi Xesosi auapanika. ¹² Xesosi iokanapirena asāpiretini xika, apanakini nirekarī okiniua ate. Xesosi iokanapirena asāpiretakasaakii, hīte auikari, ininiā hīte auapika himaxipokakani.

¹³ Teoso sākire iōkatsopatakori txari:

Nota auikari Teoso sākire, ininiā nisāpiretari kākiti.

Iua atokotxikana ate auikari Teoso sākire, ininiā ate sāpiretari kākiti. ¹⁴ Teoso ōkitikari Apiananiri Xesosi, iuaīkana auini īkapani, ininiā aimarotari Teoso ōkitikiniua ate apaka, iuaīkana aāuini īkapani. Eereka Teoso anikauako ate hītekata Xesosi aāōkitini Teoso

apisatoõ. ¹⁵ Amĩteenekari ikinipoko amisiritiko Xesosi sãkire hĩtemoni asãpiretini ĩkapani. Kãkiti apikomoni, apikomoni, apikomoni, txaãpota apakapari ikinipoko erekari Teoso sikakiti, ininiã ninoa kãkiti kaiãopokori txari Teoso: “Erekapitikari pisikakiti notamoni.” ĩkara atoko ininiã, kãkitipokoni txari: “Peerekari Teoso,” itxako.

Maerekaxinireni !Atxaua

¹⁶ Ininiãkara maerekaxinireni !atxaua. Aĩto xipokaãpota, iuaritika aãkixinire ikiniõtika apiataparaãpota. ¹⁷ ĩkorasaaki amaxikiko auapitika Xesosi sãkire aãuikini xika. Kona okanani aua amaxikiko. Eereka Teosokata ãtipirika aãuapika, kotxi aãuikari isãkire. Peerekari iusaakiko. !Axinikaikari mitxi amaxikiko, kotxi iusaakiko peerekari. ¹⁸ Kona amaãkatari aãtamatakiti. Amatamatakiniti axinika. Atamatakori xipokako. Matamatakoti kona xipoka.

5

Aãuapoko Teoso Tixineẽ

¹ ĩkorapokoriti aãuakasaaki, aĩto aãuapoko itxaua aãkixinire ĩkapani. Āti õti aĩto xipoka. ĩxipokasaaki, Teoso sikari ãtião aãuapoko. Iua aĩto isikaua, itixine aãpokasaaki. Iua aĩto kona xipokaika. Iua aãuapoko kona uakõtxiã kamakorini. ² ĩkorasaaki aãtatsiirauatakasaaki, atxari: “Ninirekari ãtião niĩto, niĩto Teoso sikakiti itixine napokasaaki.” ³ Anirekari ãtião aĩto, ininiã maĩtotika !atxaua. ⁴ ĩkorasaaki ia aĩto auapanika inakasaaki, aãtatsiitari katsiiri. Kona kataparari ia aĩto. Anirekapitikamari aĩto. Anirekari ãtião aĩto, ininiã aĩto maxipoãkati makatxakari aĩto xipoãkari. ⁵ Teoso kamari aĩto maxipoãkani ĩkapani. Isikapanikauako aĩto ikara atoko inakari. Aimarotari ikara atão inini, kotxi isikapekari Erekar Matamatakoti atemoni. ĩpixini Teoso sikaenetakiti isikapekaua, ininiã apikomoni isikaenetakiti isikapitikauako.

⁶ Ininiã kataparaxinirepitikaua ate. Aimarotari aãuapoko ia aĩto ininiãua, kona aãpokapanika Apiananiri tixinemoni. ⁷ Xesosi sãkire auikiko oerekaua atão aãuini tĩkane. Aõkinoka kona oerekaua atão aãuini tĩkane. ⁸ Kataparaxinirepitikaua ate. Kona ate pĩkari apinini. Apiaerekata apinini, kotxi iusaakiko Apiananirikata aãua. ⁹ Anirekari amiinitiniri Apiananiri, ia aĩto ãki aãuakasaaki, ia aĩto xipokasaaki apaka. ¹⁰ Āti õti ate amakinika sariko Kristomoni. Iusaaki Kristo sãpiretaua aparĩka ĩki. Iua imarotari ikinipoko akamakiti ia aĩto ãki aãuakasaaki. Atxiĩti akamari erekari. Atxiĩti akamari maerekati. Akamakiti iaõka isikaua aparĩka ĩki.

Kãkiti Mikanapirĩko Teosomoni

¹¹ Aimarotari Apiananiri katapara inini, kotxi imisiritari kãkiti imaerekani xika. Ininiã asãpiretari kãkiti auikiniri iua sãkire. Aparĩkauata, iua sãkire kãkiti auikini ĩkapani. Teoso iteene imarotaua. Imarotari axinikakiti aãkixinireẽ. Ninirekari hĩte apaka iteene imarotiniua ate hãkixinireẽ. ¹² Kona ate nirekari iuaĩkana asãpiretinii hĩte ereka anini. Anirekari asãpiretinii, apakatapitika hũukiniua ate, kotxi atãonoka akama. ĩkara atoko inakari himarotiniã, himarotari kãkiti hãpakapapiretini, ninoa misãkirepiretakasaakiaua ate. Ninoa kãkiti ate misãkirepiretakani iukari atamakorinoka. Kona imaãkatari kãkiti ãkixinire ereka inini. ¹³ Atxiĩti kãkitimoni kona kiĩkiteua ate. ĩkara atoko atxa Teoso ĩkapani. Atxiĩti paĩkiteua ate. ĩkara atoko atxa hĩte ĩkapani. ¹⁴ Kristo iteene tiretaua, ininiãkara anirekari iua nireẽkiti akamini, kotxi aimarotari iua ipina ikinimane ĩkapani, kotxi ikinimane ipĩkani atoko itxauana. ¹⁵ Kristo ipina ikinimane kãkiti ĩkapani, kãkiti mapinakanani ĩkapani, kãkiti ãtipirika auini ĩkapani. Ininiã iua kãkiti kona kamaikariko iuaka nireẽkiti ikiniõtika. ĩkamariko Kristo nireẽkitinoka, kotxi Kristo ipina iua ĩkapani. Iuaĩkana õkitikapekaua.

¹⁶ Ininiã uatxa !axinikaikari kãkiti ĩkorapokoriti auakanani xinikakiti atokokana. Mitxi axinikari Kristo ninoa xinikiniri atoko. Uatxa !axinikaikari Kristo ninoa xinikiniri

atoko. ¹⁷ Kristo sākire auiākari ākixinire amaneri itxaua. Mitxi maerekati ikamakiti kona ikamaika. Amanerinoka ikama. ¹⁸ Ikara atoko inakari Teosora kaminaua. Mitxi amokaiakari atoko itxa Teoso, iuaritika imikanapiriāua ate iuamoni, kotxi Kristo ipina ate ĩkapani. Ipaniātaua ate asāpiretiniri ikinimane kākiti, Teoso nirekari imikanapiriinina ninoa iuamoni. ¹⁹ Teoso mikanapiriāri kākiti ikini itixiti auakani iuamoni, kotxi Kristo ipina kākiti ĩkapani. Teoso mikanapiriākasaakiri kākiti iuamoni, kona iaōtari maerekati ikamakitina. Kona ixinikaikari imaerekanina, ininiā kona imisiritana imaerekani xika. Ia pirena, kākiti imikanapiriini pirena, ipaniātaua asāpiretiniri ikinimane kākiti.

²⁰ Asāpiretari Kristo sākire kākitemoni. Asākirauata iua ĩkapani, ininiā Teoso iteene ōtākikai hīte ate sākireē. Kristo nireēkiti iaōka ate ōtākikai hīte. Hīkanapiriāko Teosomoni. ²¹ Kristo kona kamari maerekati, iuaritika Teoso misiritari iua maerekati kamakari imisiritini atokokana. Ininiā Xesosi sākire aūuikiniā, Teoso apakapaua ate, maerekati makamakani apakapini atoko, kotxi iua kamaerekataua ate.

6

¹ Ate parīkauata Teosokata, ininiā ate iteene ōtākikai hīte. Teoso sikari ikinipoko erekari hītemoni, ininiā !apakata mamaākatakinitika hininiri Teoso. ² Kotxi Teoso sākire iōkatsopatakori txari:

Erekari kākitemoni nisika. Niketo apokasaaki, iuasaaki nikenakotari hākiritinino nota.

Kākiti maerekani nimakatzakini ōtisaaki, nimoianatai hīte.

Nisāpiretai. Uatxa apokapeka Teoso keto erekari kākitemoni isikini. Uatxa Teoso makatzakari kākiti maerekani.

Teoso Nitiriakori Atāo Inakani

³ Kona xatiki akerokari akamakiti kākitemoni, ininiā kākiti kona txari: “Ninoa kerokari ikamakitina, atāo minakati isāpiretiniaua,” !itxana. ⁴ Teoso nitiriakori atāo atxaua. Aūuini ikiniōtika oerekari kākiti Teoso nitiriakori atāo inakani aniniua, kotxi amīteenekari amaxikiko. Amīteenekari amisiritiko. Amīteenekari katsiiri. ⁵ Teoso nitiriakori atāo atxaua, kotxi Teoso parīka akamini xika anoropataākapeka. Kateia āki atakaākapeka. Ahoaātaā kākiti apotiitakaniaua naiatapekaua. Teoso parīka akamini, pasāpaniri aparīka. Itokata !aimaka. Itokata anatxita. ⁶ Kākiti imarotari ate Teoso nitiriakori aniniua, kotxi kona akamari maerekati. Aimarotari Teoso sākire. Kona katimari aomanākarauatini. Amoianatari kākiti. Erekari Matamatakoti oerekaua atāo akamini. Atāo atiretari kākiti. Ikara atoko aniniā, kākiti imarotari Teoso nitiriakori aniniua. ⁷ Ate Teoso nitiriakori atāo atxaua, kotxi atāo inakarinoka asāpireta. Teosora sikaposotiiretaua. Erekari akamakiti aīkeeko akikomoni, asanaremoni pakini atoko itxa, kotxi erekari akamakasaaki, maerekati iokanataāka. ⁸ Teoso nitiriakori atxaua, ininiā apanakini kākiti paxitaua. Txamari apanakini kākiti kona paxitaua. Apanakini sākire: “Peerekana ninoa.” Txamari apanakini sākire: “!Erekana ninoa.” Apanakini sākire: “Kamisirienererini ninoa,” iuaritika atāo inakarinoka asākire. ⁹ Minakaniaua ate, iuaritika ikinimane imarotaua. Kaiāokatani apinaarita, iuaritika aūuapanika. Amisiritaāka, iuaritika kākiti kona okapanikaua. ¹⁰ Amatinaniuatakasaaki, Apiananiri kamapoxokonitaua ate. Kona katxineiroteua ate, iuaritika atxīkitakari kaiāopokori kākiti ikini sereti erekari Teoso sikakiti apakapinina. Minakani atxaua, iuaritika ikinipoko erekari Apiananiri sikakiti aua atemoni.

¹¹ Hīte Korīto sitatxiti auakani asāpiretai ikinipoko axinikakiti. Nikipatakiti !auari. Iteene atiretai hīte. ¹² Ate nirekari atiretinii hīte, txamari kona hīte nirekari hītiretiniaua ate. ¹³ Uatxa nimisākiretai hīte namariteakori nimisākiretini atokotxikana. Hītiretauako ate, ate tiretinii atokotxikana. Hōerekaua hītiretiniaua ate.

Xesosi Sākire Mauiākani Moianariakori !Hītxapeua

¹⁴ Xesosi sākire mauiākani moianariakori !hītxapeua, kotxi !apakata erekari kaikotini maerekatikata. !Apakata pokamara ĩkanōkarikata auini. ¹⁵ Kona Kristo moianatari Satanasi. Xesosi sākire auiākari nireēkiti āti. Xesosi sākire mauiākati nireēkiti ātiāo. Ininiā

!apakata Xesosi sākire auiākari auini Xesosi sākire mauīākatikata. ¹⁶ Teoso misākiretiko aikoti āki !auari kākiti kamakiti teoso. Aīto Teoso misākiretiko aikoti atoko itxa. Teoso ātipirika auakari itxaua. Iua txari:

Nota auako ninakitiakorikata. Nitīpokota ninoa sauaki. Ninoa Teosone nitxauako. Nota nakitiakori itxauanako ninoa.

¹⁷ Ininiākara hītakanapanako nisākire mauīākani. Kona ninoakata !hāuape. !Hīkaikotape maerekati takote, ininiā napakapai hīte.

¹⁸ Ininiā hīri nitxauako. Namariteakori, namariteakoro hītxauako hīte, itxa Apiananiri, Kaposotiireri sākire.

7

¹ Nitiretakini ikara atoko itxa Teoso kamaenetakiti ate īkapani. Ininiā matakanapari ikinipoko maerekati aīto txikotakari, aākixinire txikotakari pakini. Teoso nakitiakori-noka matxaua. Erekarinoka makama Teoso apaxitini.

Paoro Poxokoni

² Hītiretauako ate. Kona amisiritari kākiti. Kona aōerekari kākiti maerekati ikamini. Kona amisirienetari kākiti. ³ Kona ikara atokoni nitxa hīte nitxitini īkapani. Kona nitxitai, kotxi nisāpiretapakai iteene atiretinii hīte. Ininiā ipīkitxi kona oiarikaua. Auakari kona oiarikaua. Ate oiarikakari !auari. ⁴ Nimarotari hīte kaminiri nota ōtākikakiti iaōka. Nota iuikai hīte. Hīte kamatapaxiniretano nota. Amaxikaākapika, iuaritika iteene nipoxokoniua.

⁵ Masetónia tixini ate apokasaaki, kona aiotoka. Kona atomata, kotxi asinimoni aua kākiti ate misiritakani. Kākiti naiataua. Aākixinireē apīkarauata. ⁶ Teoso, mīkapiritari kākiti matinaniuatakani, ininiā imīkapiritaua ate Txito apokasaaki. ⁷ Iua apokini kamapoxokonitaua. Apaka isākire kamapoxokonitaua, kotxi isāpiretaua hīte kamapoxokonitini iua. Isāpiretaua ate hīte kinirāo aōkitaka ininino nota. Isāpiretaua, hīte maerekaxinireni, kotxi hītxīkitakano maerekaxinire ninini. Isāpiretaua hīte ātipirika sāpiretiniri apanakini nota kamakiti ereka inini. Txito sāpirena nikenakotakasaaki, apia nipoxokoniua.

⁸ Mitxi niokanatsopatakiti hītemoni maerekaxinireti txīkitakai hīte, iuaritika erekari niokanatiniri iua niōkatsopatakiti hītemoni. Merepanika nota matinaniuata, kotxi nimarotari niokanatsopatakiti hātatsopatini xika hīte matinaniuata. Mapaōtinoka maerekaxinireni hītxaua. ⁹ Uatxa poxokopekano nota. Na nipoxokoniua hīte maerekaxinireni nitxīkitakini īkapani. Nipoxokoniua, kotxi maerekaxinireni hinini xika, hītakanapari maerekati hīkamakiti. Iuasaaki hīkanapiriā Teosomoni. Teoso apokaerekatari ikara atoko inakari himaerekaxinireni, ininiā kona ate misiritai. ¹⁰ Erekarī Teoso txīkitakiniri kākiti matinaniuatini, kotxi iuasaaki kākiti takanapari maerekati ikamakiti. Ikanapiriā Teosomoni, ininiā Teoso makatxakari iua maerekani. Ikara atoko inakari matinanitxi erekari. Txamari kākiti Teoso manirekakani matinani ātiāo, ininiā ninoa ipinapikako. ¹¹ Hīte matinaniuata himaerekani xika, ininiā Teoso kamaerekatai. Ininiākara uatxa erekarinoka hinireka hīkamini. Uatxa iteene hinirekari hīkaminiri Teoso nireēkiti. Hinirekari ikinimane imarotiniri hīkamakiti ereka inini. Uatxa homanitari maerekati mitxi hīkamakiti. Maerekaxinireti hītxaua himaerekani xika. Uatxa iteene hītiraōki aua. Hinirekari himarotiniri nota pirena, nota ereka ninini himarotini īkapani. Uatxa hinirekari maerekati kamakari misiritiko. Ininiākara kona hīkerokari, iua kiki maerekati ikamakasaaki.

¹² Iua iōkatsopari mitxi niokanatakiti hītemoni, niōkatsopata hīte īkapanikara. Kona iua maerekati kamakari īkapanini niokanatsopata. Kona iua maerekati kamakari misiritakiti īkapanini niokanatsopata. Niokanatari iua iōkatsopari hītemoni atiraōki himarotini īkapani. Teoso imarotari atiretinii.

¹³ Ininiā ate kamatapaxiniretaāka, kotxi hīte kamatapaxiniretaāka apaka. Apaka apoxokoniua, kotxi Txito poxokoniua. Iua poxokoniua, kotxi hīte himakinika kamapoxokonitari iua. ¹⁴ Txito hītemoni isini apisapanika, nota sāpiretari iua niuikinii

hīte, kotxi peerekai hīte. Atāo nisākire, kotxi kona nipētauata hīkamakiti xika, kotxi hīkamakiti atāo. Atāonoka asākire hītemoni. Atāonoka asākire Txitomoni apaka ate iuikinii hīte. ¹⁵ Apiaāpota Txito tiretinii, kotxi hīkamari iua sākire iaōka. Imarotari hāpakapiniri iua hīpaxitiniritika. ¹⁶ Nipoxokoniuata, kotxi nimarotapitikari hīkaminiri nōtākikinii iaōka.

8

Txineiro Apanakini Sikakito

¹ Nitariakori, anirekari asāpiretinii Teoso misākiretikoātaā apotiitakaniu Masetónia tixini auakani. Peerekari Teoso kamakiti ninoa īkapani, kotxi ikinipoko erekari isika ninoamoni. ² Ninoa !iteene kauarena. Pasāpaniri ninoa misiritiko, iuaritika ienenīkana ninoa. Na katxineiroteni, iuaritika ipotxitarina itiina isikinina kākiti kaamonirini-moni. ³ Nota imarotari ninoa minakati auiniāna, isikarauatana apanakinimoni. Itene isikarauatana, ininiā kaiāokatani inatxitana. ⁴ Nota kona amanaāri ninoa txineirote kākiti Teoso nakitiakori Xerosareē sitatxiti auakani īkapani, iuaritika ninoaka txano: “Ate nirekari txineiro asikini ninoamoni. Pauiritaua asikiniro ninoamoni. Asikiniāro apoxokoniuata, kotxi ikara atoko akamini amoianatari kākiti Teoso nakitiakori,” itxana. ⁵ Kona ikarananini ninoa nireka. Itene ninoa kamapoxokonitaua ate, kotxi mitxipe ninoa txaua: “Ate nirekari Apiananiri nireēkiti akamini,” itxana. “Iua oerekiniāri inireēkiti hītemoni, ate nirekari hīte paniātakiti apaka akamini,” itxana Masetónia tixini auakani. ⁶ Txito amanaāpekai hīte txineiro hīsikini Xerosareē sitatxiti auakani īkapani, ininiā apaniātari iua sinī hītemoni hīsikakiti apakapini īkapani, hītiraōki ninoa Teoso nakitiakori hōerekini īkapani. ⁷ Hīte itene aukari Xesosi sākire. Apanakini poiāoka. Hīte imarotari Xesosi sākire hīsāpiretini kākitimoni. Apanakini na itene imarotari. Hīte itene imarotari Xesosi sākire. Apanakini poiāonoka imarota. Hīte itene nirekari Teoso parīka hīkamini. Apanakini poiāonoka nirekari. Hīte itene tiretaua ate. Apanakini poiāoka tiretaua. Hīte apiaerekata, ininiākara ninirekari hīsikakiti apaka apiari inini, kotxi ikara atoko hīkaminiā, hōerekari Xerosareē sitatxiti auakani hītiretinina.

⁸ Kona nipaniātai nitapararitika hīsikiniro hītxineirote ninoamoni. Nataerekatari hītiraōki. Atāo atxiīti hītiretari apanakini? Masetónia tixini auakani atāo tiretari apanakini. Hīte tiraōki ninoa tiraōki atoko atxiīti? ⁹ Himarotari Apiananiri Xesosi Kristo sikari ikinipoko erekari hītemoni. Itanapoko auiniri Xesosi Teoso tixine auakasaaki. Iuaritika itakanapari ikinipoko. Minakati mauakinitinoka itxapeka hīte īkapani. Ininiākara ikinipoko itakanapini xika, ikinipoko aua hītemoni.

¹⁰ Uatxa nota otākikai hīte, erekari hīkaminiri hīsākire iaōka, kotxi kita anokanani hīte merepanika xinikari: “Natokopa itxa akaminiri Xerosareē sitatxiti auakani īkapani?” hītxa. Hīte merepanika nirekari txineiro hīsikinina ninoa. ¹¹ Ininiā nōtākikai uatxa. Hīkamariko mitxi hīsākire iaōka. Hīpoxokoniritika hinirekariko hīokanatiniro txineiro ninoamoni, ininiā erekari hīpoxokoniritika hīkaminiri hīsākire iaōka. Ipixini txineiro hītemoni auakaro hīsikako ninoamoni. ¹² Hīpoxokoniritika hinirekiniāri hīsikarauatini Teosomoni, iua apakapapitikari hīsikakiti. Poiāoka auiniāi, ininiā erekapitikari poiāonoka hīsikini Teosomoni. Iua apakapapitikari. Iua imarotari !apakata apikomoni hīsikiniri.

¹³ Kona ate nirekari hīte kaamoni hinini, ikinipoko ninoamoni auini īkapani. Erekari ninoa auakiti hīte auakititxikana. ¹⁴ Uatxa hīte txineirote auapitika ninoa hīsikini īkapani. Āti ōti hīte txineirote mauakanisaaki, atxiīti ninoa txineirote aua, ininiā ninoa sikai hīte. Ininiā hīte moianatinina atokotxikana, ninoa moianatai hīte. Ikara atoko inakari atāo. ¹⁵ Teoso sākire iōkatsopatakori txari:

Kiki kaiāopokori apakapakari itetakori !auari. Kiki poiāoka apakapakari !kaamoniri.

Txito Iokanatiko Korītomoni

¹⁶ “Peerekai,” atxari Teoso, kotxi iua sikanireōtari Txito itiretinii hīte, nota tiretinii atokotxikana. ¹⁷ Txito nirekapitikari ate paniātakiti ikamini, hītemoni isini.

Apaniâtiniri apisapanika, inirekari hîtemoni isini, ininiã ipoxokoniritika isa hîtemoni. ¹⁸ Aiokanatarî âti aîtari iuakata. Ikinimane Teoso misâkiretikoâtaã apotiitakaniua iteene apokaerekatarî iua, kotxi isâpiretari Teoso iokanapirena erekari ikinimanemoni. ¹⁹ Ninoa mereêri iua aîtari atekata isini Xerosareêmoni, oa txineiro aanikasaaki. Oa txineiro asikakito oerekana Xerosareê auakani Apiananiri ereka inini. Oerekana apoxokoniritika amoiantanina.

²⁰ Oa txineiro kaiãopokoro aua, ininiã iua aîtari siniã atekata, iua imarotari atão asikiniro oa txineiro Xerosareê auakanimoni. ²¹ Anirekari atão akamini oa txineiro asikasaaki ninoamoni. Anirekari Apiananiri imarotiniri atão akamini. Anirekari kâkiti apaka imarotiniri atão akamini.

²² Iuaîkana aiokanatarî âtipekana aîtari hîtemoni. Aãtaerekatapekari iua. Ipoxokoniritika imoianatarî kâkiti. Apiapoxokonita iua, kotxi imarotari hîte kaminiri mitxi hîsâkire iaõka. ²³ Txitopekana, nota moianari itxaua. Iua miparîkatano nota, hîte amoianatinî îkapani. Xesosi sâkire auiâkani mereêna aîtariakori Txitokata sikani hîtemoni. Kâkiti imarotakasaakina ninoa, “Peerekari Kristo,” itxana kâkiti. ²⁴ Ininiãkara hõerekanako ninoa kikiakori atão hîtiretinina, ininiã ikinimane Xesosi sâkire auiâkani imarotari atão hîtiraõkiuatini. Iuasaakiko ninoa imarotari ate sâkire atão inini ate iuikinii hîte.

9

¹ Nisâpiretai hîte txineiro asikakito tîkane Teoso nakitiakorimoni, Xerosareê auakanimoni. Nimasâpiretakaniãi hîte, iuaritika hîte nirekari hîtxineirote hîsikini ninoamoni. Nimarotari ikara. ² Nimarotari iteene hinirekari himoiantanina ninoa. Nitxapekana Masetónia tixini auakani: “Nota iuikana aîtariakori Korîto sitatxiti auakani, Akaia tixini auakani, kotxi kita anokanani ninoa iposope txineiro iokanatinina Xerosareêmoni,” nitxana. Hîte poxokoni txineiro hîokanatinî, sikanireõtana Masetónia tixini auakani apaka iokanatiniro txineiro. ³ Uatxa niokanatanana ninoa aîtariakori ipi âti pakini hîtemoni. Hîte iposope hininiã hîtxineirote hîokanatinî, erekapitikari, kotxi ikara nisâkire iaõka. Ininiã atão ate iuikinii hîte. ⁴ Masetónia tixini auakani siniã notakata, hîtxineirote miposonitipanika, ininiã ate pêtãuata, kotxi ate auikari hîsâkire. Hîtepekana apia pêtãuata hîsâkire iaõka himakamakani xika. ⁵ Ininiãkara ninirekari ninoa aîtariakori sini hîtemoni nota ereê napokini apisapanika. Ninoa moianatai txineiro kaiãopokoro hîsikaenetakito hãpotiitini îkapani. Ininiã napokasaaki ereê, iposope hîsikakito nanikini. Ininiã iuasaaki aimarotariko kinirão sikaenetaka hinakito txineiro. Iuasaaki aimarotariko hîpoxokoniritika hîsikiniro hîtxineirote.

Takari Itori Auini

⁶ Ia nisâkire hîxinika. Poiãoka komiri pitakiniã pitakarauatakasaaki, poiãonoka iri pimaporoka. Kaiãopokori pitakiniã, kaiãopokori pimaporoka. ⁷ Ininiã pãkixinireê pixinikari atão pisikakiti âtimoni. Kona erekari pimanirekasikatakiniti pisikini. Âti itapararitika paniâtiniãi pisikarauatini, !apakata. Teoso apokaerekatarî kâkiti ipoxokoniritika isikarauatini âtimoni. ⁸ Teoso posotari ikinipoko erekari isikinii hîte, ininiã ikiniõtika ikini sereti hiamonitakiti auiniã, hãpakapari ikinika hinireêkiti. Ininiã ikinipoko erekari hîkama. ⁹ Teoso sâkire iõkatsopatakori txari:

Teoso sikari itori erekari matxineirotenimoni. Teoso kamakiti atão inakari !ixipoka. Auapikako.

¹⁰ Teosora sikari takariki katakarerimoni itakarauatini îkapani, ininiã eereka iposope inakasaaki, auari kienatxi inikakiti îkapani. Iua atokokana Teoso sikari kaiãopokori takariki hîtemoni. Iua anekakari hîtakare, ininiã eereka iposope inakasaaki, kaiãopokori auari, ininiã kaiãopokori hîkamakiti atão inakari apanakinimoni. ¹¹ Teoso sikai ikini sereti erekari, ininiã ikinipoko auape hîtemoni. Ininiãkara kâkiti mauarenimoni hîsakariko kaiãopokori. Ate anikasaakiro hîsikakito apanakinimoni, ninoa txariko: “Peerekari Teoso, kotxi ninoa sikaua ate aamonitakiti,” itxanako.

¹² Ikara atoko inakari hīkaminiā, hīsikari Teoso nakitiakori amonitakiti ninoamoni. Apaka hīsikasaakiri hīsikakiti ninoamoni, ninoa kaiāopokori txari: “Peerekari Teoso,” itxanako. ¹³ Ninoa poxokoniuatako, kotxi hīte sikari kaiāopokori ninoamoni, apanakini-moni apaka. Ninoa txariko: “Peerekari Teoso,” kotxi imarotarina erekari hīte kamakiti. Imarotarina hīte kaminiri Kristo paniātakiti iaōka. Imarotarina hīte atāo auikiniri Kristo iokanapirena erekari. ¹⁴ Ininiā ninoa misākiretari Teoso hīte ĩkapani, kotxi iteene ninoa tiretai hīte, kotxi Teoso sikari ikinipoko erekari hītemoni. ¹⁵ Matxari Teoso: “Peerekai pite, kotxi pite sikaua pamarite. Āti pisikakiti iua atoko inakari !auari.”

10

Paoro Apakapapiretari Apoītiko

¹ Kataparaxinireri Kristo, iuaritika ianaka ōtākikari kākiti, ininiā nota Paoro ianaka nōtākikai. Txamari apanakini hīte sauaki auakani txari: “Paoro ĩtakoxiti auakasaaki, itapararitika itxitaua ate, atemoni iōkatsopatakasaaki. Txamari iua atekata auakasaaki, ipīkarauata amaerekani isāpiretiniua,” itxana. Ikara apanakini sākire na atāo, kotxi ĩtakoxiti nauanāta, iuaritika amaātiki nōtākikai hīte. ² Kona ninirekari noerekini hīte apanakini nitxitini ereē napokasaaki. Niposotapitikari nitapararitika nitxitiniri apanakini ereē napokasaaki, kotxi ninoa txari: “Paoro kamakiti Teoso sākire mauīākani kamakiti atokotxikana,” itxana. Txamari na atāo ninoa sākire. ³ Aīto tapara poiāoka, kotxi kākiti atxaua, ininiā aīto taparaā !apakata anaiatiniri maerekati. Teosora sikataparataua aākixinireē, maerekati anaiatini ĩkapani. ⁴ Ate ikeeko kona Xesosi sākire mauīākani ikeeko atokoni. Teoso ikeeko isika atemoni. Kaposotiireri Teoso ikeeko, ininiā aposotari Satanasi kamakiti axipokini aiko kaikori axipokini atokokana. ⁵ Kākiti iuikaua. !Inirekarina auikinirina Teoso imarore. “Paimatireua ate,” itxanātana. Teoso sikaimaroretua ate, ninoa sākire paxirari inini aōerekini ĩkapani. Ikinipoko axinikakiti anireka Kristo nireēkiti iaōka axinikini, ininiā axinikakiti ātiāo auiniā, atxīkitakari iua axinikakiti imamakini Kristo nireēkiti iaōka inini ĩkapani. ⁶ Hīte iteene kamakasaakiri Kristo nireēkiti iaōka, ate misiritariko kākiti ereē Kristo nireēkiti imakamakanisaaki.

⁷ Hīte xinikari hātamatakinoka. Kona hīxinikari kākiti ākixinireē auakari. Kākiti ereē uākatiniāri Kristo nakiti ininiuana, erekari imarotinirina ate apaka Kristo nakitiakori aniniua, ninoa Kristo nakiti ininiuana atokotxikana. ⁸ Atxiīti iteene niuikari Apiananiri sikaposotiiretiniua ate, iuaritika kona nipētauata niuikiniri ikara, kotxi Apiananiri sikaposotiiretaua ate, hīte akamataparaxiniretini ĩkapani. Kona ate nirekari hīte ākixinire tapara poiāoāpotini. ⁹ Kona ninirekari hīpīkarauatini, iōkatsopari niokanatsopatakiti hātatsopatini xika. ¹⁰ Apanakini txari: “Paoro txitaua itapararitika iokanatsopatakitiā, txamari iua atekata auakasaaki, isākire ātiāo. Iuasaaki kona kataparaxinireri iua. Iuasaaki ipīkarauata ate itxitini,” itxana apanakini. Na atāo ninoa sākire. ¹¹ ĩtakoxiti ate auakasaaki, asākire aiokanatsopatakiti iuatxikana asākireta, ereē hītekata aūauakasaaki.

¹² Ninoa ate misākirepiretakani iteene iuikaua. Atauako ninoa apiaerekata? Atauako ! erekaua ate? !Kiīkitena ninoa. Ninoa uākatari ninoa kamakitinoka erekari inini, ininiā ninoa iaōtari apanakini kamakiti. Apanakini kamakiti ninoa kamakiti atoko ininiā, ninoa uākatari apanakini kamakiti apaka erekatxikana. Txamari na atāo. ¹³ Atepekana, kona ate iuikari ateka kamakiti. Ate iuikari parīkatxi Teoso sikakiti atemoni akamini ĩkapani. Iuanoka ate iuika. Iua paniātaua aparīkauatini hīte ĩkapani. Iua aparīka ate iuikapitika. ¹⁴ Teoso paniātakitinoka akama. Ia aparīka, ininiā ate sari hītemoni Kristo iokanapirena erekari asāpiretini ĩkapani. Ininiā apakatapitika ate iuikiniri ikara aparīka. ¹⁵ Apanakini parīka Teoso ĩkapani ate kona txari: “Iua parīkatxi ate kamakiti,” kona atxa. Ate nirekari hīte auikaāpotiniri Kristo sākire, Kristo sākire iteene hāuikini ĩkapani, ininiā ate nirekari aparīkauatini Teoso ĩkapani hīte auiniātaā, Kristo sākire apanakini auikini ĩkapani. ¹⁶ Ate nirekari Kristo iokanapirena erekari asāpiretiniri kākiti, hīte tixine apiko

auakani Xesosi sākire masāpiretakotipanika ininiātaā. Ininiā kona aparīkauata apanakini parīkauatiniātaā. Ininiā apanakini parīka: “Ate parīkakara iua,” kona atxari.

¹⁷ Teoso sākire iōkatsopatakori txari:

Pinirekatari piuikarauatini? Pinirekiniāri, ininiā piuikariko Apiananiri kamakitinoka.

¹⁸ Teoso kona apokaerekatari kākiti iuaka, “Erekapitikano,” inakari. Teoso sāpiretiniāri: “Erekapitikari iua kākiti,” ininiā Teoso apokaerekatari iua.

11

Teoso Maiokanatakini

¹ Atxiīti mīikiteti sākirauatini atoko nimisākiretai hīte, iuaritika hāuiritano nota. ² Teoso nirekinii hīte iua nakitiakorinani hininiua, iua atokotxikana nota nirekai hīte Teoso nakitiakorinani hininiua. Nisikaenetai Kristomoni hītaniri atoko inini ikapani. Iuamoninani nisikaenetai. Ninirekari iuamoni nisikinii, ātokoro kikikata masirīkakato atoko inakaro. ³ Kitxakapirīka Satanasi auātotari imini. Iua imini misirienetaro Eva, kotxi paimatireri Satanasi sākire. Nipīkari Satanasi misirienetini hīte apaka, ininiā eereka hīxinikakiti na atāoni. Nota pīkari Xesosi hītakanapini. Mitxi iteene hītiretari iua. Iuananira hītireta. ⁴ Kotxi hīte apakapari hīpoxokoniritika ikinimane ereē apokakani, “Ate Xesosi sākire sāpiretakaniua” inakani, txamari Xesosi pirena ninoa sāpiretakiti na atāoni. Kona ate sāpiretari ikara atoko inakari, iuaritika hāuikari ninoa sākire. Hāuikasaakiri ninoa sākire, atxiīti hāpakapari matamatakoti, txamari kona hāpakapari Erekarī Matamatakoti ate sāpiretakiti. Ate sāpiretai hīte atāo Kristo iokanapirena erekari, txamari hīte auikari ātiāo.

⁵ Hītemoni, Teoso iokanataka ninoa kākitimoni. Hītemoni, ninoa Teoso iokanatakini apiarini. Nota poiāo atxiīti? Ninoa apiata atxiīti? Konapitini. ⁶ Atxiīti kona nota iteene imarotari nisākirauatini, iuaritika nimarotapitikari Teoso sākire. Himarotapekari ikara atoko inakari, kotxi asāpiretapekai.

⁷ Teoso iokanapirena erekari nisāpiretakasaakii hīte, maxikatiīka nisāpiretai. Kona ninirekari hīikitxitinino, ininiā nota poiāotakaua, hīte atāo inakari himarotini ikapani. Ikara atoko nikerokatari atxiīti? ⁸ Hītekata nīparīkauatakasaaki, kākiti ātiātaā Xesosi sākire auīākani iokanataro txineiro notamoni, txamari kona nota moianataka ninoa iuasaaki. Hītekara nimoianata iuasaaki. ⁹ Hītekata nauakasaaki, nota nirekamaro txineiro. Txamari kona nota amanaāi hītxineirote. Aītariakori Masetónia tixinikini mininano itanapoko niamonitakiti. Iua atokotxikana kona namanaāpaniro hītxineirote nota ikapani, kotxi atxiīti nota minari atoko nitxa hīporikiā. Kona ninirekari ikara atoko inakari nininiua. ¹⁰ Kristo atāonoka isākire. Isākire nākixinireē auape, ininiā nota sākire apaka atāo. Nisāpiretapanikari kākiti hītxineirote nimanirekakani pirena. !Auari ikara nisākire iotokakakari ikinika Akaia tixiniā. ¹¹ Kinirepa ikara atoko nitxa sākireta? Atxiīti kona nitiretai hīte? Teoso imarotari nota iteene tiretinii hīte.

¹² Uatxa iuaīkana nisāpiretai hītxineirote nīmapakapakani. Nanera kākiti uatxa hītekata auakani Teoso maiokanatakini txari: “Ate kamari Paoro parīkatxikana,” itxana. Ikara atoko ininiā iuikauana. Txamari ninoa parīka ātiāo, kotxi ninoa apakaparo hītxineirote. Ate kona apakaparo hītxineirote. ¹³ Teoso kona iokanataka nanera hītemoni. Na atāo Teoso iokanatakini !itxauana. Imisirienetaina hīte, “Aparīkauata Teoso ikapani,” inakasaakina. Nanera txari: “Kristo iokanatakiniraua ate,” itxana. Txamari na atāo nanera sākire. ¹⁴ Ikara atoko inakari auapitika, kotxi Satanasi sari kākitimoni. Itxari: “Nota Teoso nitiri nitxaua. Nota oerekaī atāo inakari.” Ininiā iua sākire auīākani auapitika. ¹⁵ Ininiākara nanera kikiakori Satanasi nitiriakori txari: “Atāo inakari kamakaniua ate. Teoso nitiriakori atxaua,” itxana. Xipokatxi ōtisaaki imisiritaākanako ninoa maerekati ikamakitina xika.

Paoro Misiritiko Pirena

¹⁶ Iuaīkana nisāpiretai. Miīkiteti !nitxaua, iuaritika hīte potxitari kākiti miīkiteni, ininiā miīkiteti atoko niuikaua, kotxi nota posotari niuikiniua. ¹⁷ Apiananiri kona sākirauata ia atoko. Miīkitetinoka sākirauata ia atoko iuikiniua. ¹⁸ Nanera kikiakori iuikaua, Teoso sākire mauiākani iuikiniua atokokana, ininiā nota apaka sāpiretari niuikiniua. ¹⁹ Hīte auiritari kākiti miīkiteni himoianarini ininiua, kotxi !kiīkitei hīte. ²⁰ Nanera hītekata auakani txīkitakai hīte initiriakorina hininiua. Hīte auiritari ikara atoko inakari. Nanera amanaaāpotari ikini sereti hīte nakiti. Ikamarina inireēkitina hītemoni. Ipaniātaina ikiniōtika inireēkitina hīkamini. Imisiritaina hīte. Hīte auiritari ikara atoko inakari ikaminina. ²¹ Erekarī nīpētauatini atxiīti? Kotxi kona kataparaxinireno nota nanera kamakiti atoko nikamini hītemoni. Kataparaxinirena nanera.

Ikamakitina iuikana, ininiā miīkiteti atoko kataparaxinireno nota. Nikamakiti niuikako. ²² Nanera Epireoakorikani? Ari. Nota apaka Epireo nitxaua. Nanera Isaeo apika mekaniriakorikani? Ari. Nota apaka Isaeo apika mekaniri nitxaua. Nanera Apraō apika mekaniriakorikani? Ari. Apraō apika mekanirikanarano nota apaka. ²³ Nanera Kristo nitiriakorikani? Atxiīti. Miīkiteti iuikiniua atoko nitxa: “Kristo nitiri apiaerekatakari nitxaua nota.” Nota apia parīkauata Teoso īkapani. Apiata nimisiritiko, kotxi kaiāokatani kateia āki nitakaāka. Kaiāokatani nota noropataāka aāpitsaā. Kaiāokatani nipinaarita. ²⁴ Ipi ipi āti pakinikata Xoteoakori noropatano aāpitsaā. Iuasaaki inoropatanona trīta novi pakinikata. ²⁵ Ipi āti pakinikata Homanoakori noropatano aākeē. Ātikata kai soroā nikiporonakaāka. Ipi āti pakinikata maporoā nisikasaaki, maporo sakika apanīkakiā. Āti īkanōkati, āti pokamarariti pakini ninapa potxoari uiniti nipimakaātini. ²⁶ Nianaxititapika. Natamonōkonitari uini torōkani. Natamonōkonitari kiītiririni. Natamonōkonitari ninirimane. Natamonōkonitari ninirimane minakanuia. Natamonōkonitari sitatxi nauakasaaki, kākiti mauakaniātaā nauakasaaki, potxoari uiniti nīpiriātakasaaki pakini. Natamonōkonitari kākiti, “Xesosi sākire aāuika” inakanikata nauakasaaki, kotxi na atāo ninoa sākire. ²⁷ Kaiāokatani nisāpaka itori parīkatxi xika. Kaiāokatani nitsii aua. Kaiāokatani kona apakata nimakini īkanōka. Kaiāokatani ninatxita, niposonata. Kaiāokatani nipokori !auari. Kaiāokatani nimīteenekari katxīkareri. Kaiāokatani nimāka !auari. ²⁸ Ikara atoko inakari monōkori auapika notamoni. Apaka nīparīka kasāpaniri aua, kotxi ikiniōtika nīparīkauata kākiti Teoso misākiretikoātaā apoti-itakaniua īkapani. ²⁹ Āti iōkapetiniā, nota apaka niōkapeta. Āti txīkitakaāka maerekati ikamini, ininiā nota maerekaxiniretinoka nitxa.

³⁰ Hīte nirekiniāri niuikiniua, ininiā niuikari niōkapere. ³¹ Aāuīte Xesosi Kristo iri, Teoso imarotari nisākire atāo inini. Ātipirika matxari: “Peerekai.” ³² Tamásiko sitatxiti nauakasaaki, kākiti auīte apiari Areta inakori auakasaaki, Tamásiko auakani auīte paniātari sotatoakori kaikotini sitatxi kākiti īronakiniātaā nota imaīkinina īkapani. ³³ Txamari kona nota pokīka sitatxi toreātaā. Nīroā kotari mitari āki. Iuasaaki aītariakori iokatxakano aapokotxi sonaā sitatxi pirikere mapara. Ixitipe apoka nitxa. Ikara atoko itxa nimatekini, ininiā kona ninoa maīkano iuasaaki.

12

Taponetxi Teoso Sikiniri Paoro

¹ Hinirekatari apikomoni niuikiniua? !Apakata, iuaritika hinirekiniāri, niuika-panikauako, kotxi Apiananiri sikano taponetxi peereri. Iua oerekano imarore. ² Akokaxiti katosi anokanani inakasaaki, nanikaāka Teoso tixinemoni iaxiti apiko nopinixiti. Iuasaaki nitaponeuataako? Atxiīti niīto atāo anikaākauako? Kona iteene nīmarotari. Teosonokara imarotari. ³ Ianoka nīmarota. Nanikaāka Teoso tixinemoni nitaponeē atxiīti, atāo niīto anikaāka atxiīti. Teosonoka imarotari. ⁴ Iuaxiti nīkenakotari sākiretxi erekari. Ikara kona nīmarota iuaīkana nisāpiretini. Apaka !auiritaāka nisāpiretiniri kākiti. ⁵ Nīnīrekiniāri, niuikari nitapone ikara atoko inakari, txamari !

apakata notaka niuikiniua. Niōkaperenoka niuika. ⁶ Ninirekiniāri niuikiniua, atāonoka nisāpireta, kotxi kona miikiteti !nitxaua. Txamari kona ninirekari niuikiniua, kotxi atxiīti kākiti uākatari nota apiari nininiua. Ninirekari kākiti atāo imarotinino. Erekarī kākiti imarotinino nisākireē, nikamakitiā pakini.

Paoro Misiritiko Inako Tsii Atoko Inini

⁷ Peerekari nitikakiti Teoso tixine nanikikosaaki, iuaritika Teoso kona nirekari niuikiniua, ininiākara Teoso auiritari Satanasi misiritinino niūtoā. Katsiiri. Inako atoko itxa niūtoā, ininiā niuikiniua !auari. ⁸ Ipi āti pakinikata namanaāri Apiananiri ia nitsii imakatzakini. ⁹ Txamari itxano: “Kona nimakatzakari. Ikinipoko erekari nisikakiti sikataparatai. Iuanoka pinireka. Piōkapetakasaaki, nota tapara pākixinireē apiata,” itxano. Ininiākara nipoxokoniritika niuikari niōkaperē, kotxi iuasaaki nimarotari Kristo posotiire nākixinireē auini. ¹⁰ Niōkapetakasaaki, nipoxokoniua. Nixiniketikosaaki, nipoxokoniua. Nimaxikikosaaki, nipoxokoniua. Nimisiritikosaaki, nipoxokoniua. Nikamakiti tīkane nimimarotakanisaaki, nipoxokoniua. Ikara atoko inakari nimīteeneka nipoxokoniritika, kotxi Kristo nakiti nitxaua. Niōkapetakasaaki, nitapara nākixinireē apiata.

Paoro Nirekari Erekarī Korīto Auakanimoni

¹¹ Miikiteti sākirauatini atoko nisākirauata, txamari hīte xika nisākirauata miikiteti sākirauatini atoko, kotxi hīte iuikaākamanoko nota, kona nota nirekamariko niuikiniua. Minakati nitxaua, iuaritika nanera Teoso maiokanatakini hītekata auakani kona api-aerekata. ¹² Hītekata nauakasaaki, nikamakiti oerekai atāo Teoso iokanatakiti nininiua, kotxi iuasaaki noerekai Teoso oerekakiti kākitemoni. Noerekai kākiti maposotakiniti. Noerekai posotiiretxi iuasaaki. !Asāpaka ikara atoko inakari aōerekini hīte. ¹³ Atxiīti apiata nitiretari apanakini Teoso misākiretikoātaā apotiitakaniua ātiātaā auakani? Konapitini. Ninoa nitiretini atokotxikana nitiretai hīte. Namanaāna ninoa txineirote niamonitakiti ikapani. Hīte txineirote kona xatiki namanaāi, ininiā nikerokatari atxiīti? Himaxinīkaretariko ia nikerokakiti.

¹⁴ Ipiakata nisipeka hītemoni. Naiamatapeka iuaīkana hītemoni nisini tīkane. Kona hītxineirote kona namanaāpanii. Hītxineirote kona ninireka. Hītera ninireka. Amarini kona nīkatana iri, inoro pakini. Iri, inoro pakinira nīkatana imiakori. Nota hīri atoko nitxaua. ¹⁵ Nipoxokoniua ikinika nota nakiti nisikinii hīte. Notaka nisikaua hītemoni. Nipoxokoniritika nisikai. Txamari nota tiraōki hīte ikapani apiaāpotakasaaki, hīte tiraōki nota ikapani poiāōpota.

¹⁶ Atāokani ikara atxiīti? Iuaritika ia nimarota. Kona xatiki namanaāi hinakiti hīsikinino. Atxiīti āti ereē auakari txari: “Paoro misirienetaua ate. Paxirari isākire,” itxa atxiīti. Txamari ikara na atāo. ¹⁷ Natokopa nitxa nimsirienetini? Atauako kikiakori hītemoni nota iokanatakini misirienetai hīte? !Imisirienetaina. ¹⁸ Nōtākikari Txito hītemoni isini tīkane. Nipaniātari āti āitari iuakata isini. Atauako Txito misirienetai hīte? Konapitini. Erekarī Matamatakotira anikano nota. Iua apaka anikari Txito. Nota sari Xesosi nirekinimoni. Txito apaka sari iua nirekinimoni.

Paoro Pīkare

¹⁹ Atxiīti hīte xinikari ikara asāpiretai, ate ereka anini himarotini ikapani. Konapitini. Ate sākirauata hītekata Kristo sākirauatini atokokana, kotxi Teoso atamataua. Ate tiretakini hītxaua hīte, ininiā ikinipoko akamakiti akaminii hīte, hīte ākixinire tapara auini ikapani. ²⁰ Nipīkarauata ereē napokini, kotxi atxiīti hīte kamari nimanirekakiniti. Atxiīti napokasaaki ereē, kona hīte apokaerekatano nota. Ereē napokasaaki, nipīkari nimarotiniri hīte txitakakiniua, hīxikotakakiniua, homanatakakiniua, hīpotxinani auini, himisākirepiretakakiniua, aāpirena hīsāpiretini, hīuikiniua, hineenamauatini. Ikara nimarotini nipīka, ereē napokasaaki. ²¹ Ininiā hītemoni napokasaaki, nipīkari Teoso kamapētatinino nota hīte maerekani xika. Nipīkari nitxiapatini maerekati hīkamakiti xika, kotxi kaiāopokori kamari maerekati akokaxiti, iuaritika !itakanapapanikari iua

maerekati. Ixinikakitina maerekatinoka. Maerekati ikini sereti iītona nireēkiti aua. Ītanoro minakotokatika isirīkana. Ikara atoko inakari kona itakanapananikana.

13

Paoro Sākire Imapotōkire Ōtākikare

¹ Ipi kata nota sari hītemoni. Iuaīkana hītemoni nisako. Teoso sākire iōkatsopatakori txari: Ipi āti pakini kākiti atamatiniāri maerekati āti kamakiti, ninoa sākire auikaāka, ininiā iua maerekati kamakari misiritaākako. Ipi kākiti atamatiniāri maerekati āti kamakiti, ninoa sākire apaka auikaāka, ininiā iua maerekati kamakari misiritaākako, itxa Teoso sākire. ² Akokaxiti hītekata nauakasaaki, nōtākikapekai himaerekani hītakanapini. Iuasaaki nōtākikana mitxi maerekati kamakani, apanakini apaka. Nitxana: “Ātikata uai napokasaaki, nimisiritapitikari ikinimane maerekati kamakani,” nitxapekana. Iuaīkana uatxa ĩtakoxiti nauakasaaki, ikara nisākiretxikana nisāpiretai hīte. ³ Hīte nirekari himarotiniiri: “Atāokani atxiīti Paoro sāpiretari Kristo sākire?” hītxa. Napokasaaki ereē, himarotapitikariko atāo nisāpiretiniri Kristo sākire. Kristo !iōkapeta. Oerekepekai iposotiire hīte sauaki. ⁴ Kristo okikosaaki aamina ĩpiriāmitakari nopini, iīto iōkapere aua. Uatxa kataparari iua, kotxi Teoso sikataparatarari iua. Ate ĩto apaka iōkapeta, mitxi Kristo ĩto iōkapetini atoko, iuaritika Teoso sikataparataua Kristokata aāuini hīte amoianatini ĩkapani.

⁵ Hīxinikariko hākixiniireē auakari. Atāokani hāuikatari Teoso sākire? Hīteka ataerekatauako. Himarotatarari Xesosi Kristo hākixiniireē auini? Teoso sākire hākixiniireē mauakaniā, Kristo Xesosi !auari hākixiniireē. ⁶ Ninirekari himarotiniiri Kristo Xesosi auini ate ākixiniireē. ⁷ Ate misākiretari Teoso, maerekati hīte makamakani ĩkapani. Kona ate nirekari kākiti sākire: “Peerekari Paoro. Iua imarotapitikari Teoso sākire oerekini, kotxi Korīto sitatxiti auakani kamari Teoso sākire iaōka.” Ikara kona ate nireka, ate iuikiniua ĩkapani. Atxiīti kākiti uākatari Xesosi Kristo !auari ate ākixiniireē, iuaritika ate nirekari hīte kaminiri atāonoka. ⁸ !Apakata aiotokakiniri atāo inakari. Atāo inakari auapika. Atāo inakari !ixipoka. Apakata aōerekiniri atāo inakari. ⁹ Atxiīti ate iōkapeta, iuaritika apoxokoniuata hītaparaxinire akenakoenetakasaaki. Ate misākiretari Teoso hīte atāonoka hīkamini ĩkapani ikiniōtika, Xesosi sākire iaōka hīkamini ĩkapani. ¹⁰ Ikara atoko inakari niōkatsopata hīte ĩkapani hītekata nimauakanisaaki, kotxi ereē napokasaaki, kona ninirekari nitxitinii hīte. Niposotapitikari nitxitinii, kotxi Apiananiri sikaposotiiretapekano atāo nikamini hītemoni. Txamari kona ninirekari Xesosi sākire hītakanapini, nota txitinii xika. Ninirekari hīte kataparaxinire hinini, Xesosi sākire iteene hāuikini ĩkapani.

¹¹ Nitariakori, xipope niōkatsopare. Ereēpiko. Ikiniōtika atāonoka hīkamako. Xesosi sākire iaōka hīkamako. Hīkamariko nisāpiretakiti iaōka. Hīxinikakiti ātinoka itxauako. Kona hītxitakapeua. Ininiākara Teoso katiraōkiri, kauaīreri, auapikako hītekata.

¹² Haōkitakakasaakiua, hīpoxokoniritika hāpakapakakauako, kotxi Apiananiri nakitiakori hītxaua.

Īkinimane Teoso nakitiakori uai auakani xinikamanapitai hīte.

¹³ Apiananiri Xesosi Kristo sikari ikinipoko erekari hītemoni. Teoso iteene tiretai. Erekari Matamatakoti moianatai hīte hīkinika. Amē.

KARÁSIA

Paoro Iokanatsopata Karásia Auakanimoni

¹ Nota Paoro iokanatsopata ia aãtsopa hĩtemoni. Nota Teoso iokanatakitino kãkitimoni Teoso iokanapirena nisãpiretini ĩkapani. Kona kãkitini iokanatanota. Xesosi Kristora iokanatanota. Aĩri Teoso, Xesosi ipinaãka atoko õkitikakarira, iuara iokanatanota kãkitimoni. ² Ikinika aĩtariakori notakata auakani, nota apaka xinikanãtai hĩte. Hĩte ikini aikoti Teoso misãkiretikoãtaã apotiitakaniua Karásia tixini auakani axinikanãtapika.

³ Aĩri Teoso, Xesosi Kristo aãũte pakini sikari ikinipoko erekari hĩtemoni. Ninoa kamaerekaxiniretai hĩte.

⁴ Xesosi ipina amaerekani imakatzakini ĩkapani. !Erekari uatxa auakani. Maerekati kamakani sauaki aãuakasaaki, Xesosi ipina ate imakatzakini ĩkapani, amapinakani ĩkapani. Xesosi ipĩpe ate ĩkapani, kotxi aĩri Teoso nirekari Xesosi ipinini ate maerekani imakatzakini ĩkapani. ⁵ Ikiniõtika: “Peerekai,” matxari Teoso. Ætipirika kãkiti txapikari Teoso: “Peerekai.” Ameẽ.

Æti Iokanapirena Erekari !Auari

⁶ Nikenakopiretari Teoso hĩtakanapaãpotini. Iuasaaki nitsorĩkaãnãta. Kinirepa hĩtakanapari Teoso sãkire? Kotxi mapa kasiritinoka hĩte auikari Teoso iokanapirena erekari. Kristo iteene tiretai hĩte, ininiã akiritai hĩte inakitiakori hininiua ĩkapani. Kinirepa hãuikatari Æti iokanapirena? ⁷ Atão nisãpiretai hĩte. Æti iokanapirena erekari !auari. Nikenakopiretari kãkiti hĩte oereẽkani. Ninoa nirekari ikoketinirina isãkirena Kristo iokanapirenakata. Uatxa !himarotaikari atão sãpirenatxi. ⁸ Atão asãpiretapekai Teoso iokanapirena erekari. Ætião sãkiretxiti asãpiretiniã, Teoso iokanataua ate kãkiti misiritikomoni, Ætipirika misirikaretxi auiniãtaã. Teoso nitiri iaxitikiri apaka sãpiretiniã Ætião iokanapirenatxi, Teoso iokanataru iua initiri imisiritikomoni Ætipirika misirikaretxi auiniãtaã. ⁹ Hĩte aukapekari Teoso iokanapirena erekari. Ætião iokanapirenatxi sãpiretakari sãpiretiniã Teoso iokanapirena atão minakati, iokanataãkako imisiritikomoni Ætipirika misirikaretxi auiniãtaã. Asãpiretapekai ikara inakari sãkiretxiti. Uatxa iuaĩkana nisãpiretai.

¹⁰ Ikara atoko nitxai hĩte, ininiã himarotari kona ninirekari: “Peerekari Paoro kamakiti,” niniko. Nota nirekari Teosonoka: “Peerekari Paoro kamakiti” ininino. Nanera atão minakati sãpiretakani txai hĩte: “Paoro nirekari kãkiti apokaerekatiniri iua.” Ikara na atãoni. !Ninirekari kãkiti apokaerekatinino nota. Ninirekiniãri kãkiti apokaerekatinino, kona Kristo nitiri !nitxaikaua.

Teoso Akiritari Paoro

¹¹ Nanera atão minakati sãpiretakani hĩte oereẽkani: “Paoro iokanapirena kona Teoso iokanapirenani,” itxana ninoa sãkire. Nitariakori atãopitikara nisãpiretai hĩte. Iokanapirenatxi hĩtemoni nisãpiretakiti kona kãkiti sãkireni. Teoso sãkirera. ¹² Kona kãkitini sãpiretano ia iokanapirenatxi. Kona kãkitini oerekano. Xesosi Kristora sãpiretano nota iua iokanapirenatxi.

¹³ Hĩte imarotari mitxi nauakasaaki, Xoteo kiomaneakorini oerekakiti nauikasaaki, iuasaaki kona nitiretana Xesosi sãkire auĩãkani. Iteene nimisiritana ninoa. Ninirekari nixipokiniri Xesosi sãkire kĩpitakani. ¹⁴ Iuasaaki nimarotari Xoteoakori kitxakapirĩkarini paniãtakiti. Nikamari imakinika ninoa paniãtakiti. Iuasaaki nimoianariakori apaka kamari ninoa kitxakapirĩkarini paniãtakiti. Nota apiata kamari ninoa sãkire iaõka. Iteene ninirekari nikaminiri kitxakapirĩkarini paniãtakiti.

¹⁵ Teoso iteene taretano nota. Iua mereẽno nota nauini apisapanika. Iuasaaki akiritano nota initiri nininiua tĩkane. ¹⁶ Teoso keto manapi apokasaaki, oerekari imi

notamoni, imi Xoteo minakonimoni nisãpiretini ìkapani. Iuasaaki kona nisãpiretari kãkiti Teoso oerekakiti sãkiretxiti, ininiã na kãkitini sãpiretano nikamakiti tìkane. ¹⁷ Iuasaaki kona nisari Xerosareẽ sitatxitimoni, ininiã nota apisapanika Teoso iokanatakini kona õtãkikano. Kona kãkitimonini nisa noerekiko ìkapani. Arápia tixinimoni nisapitipo. Eereka nikanapiriã Tamásiko sitatxitimoni.

¹⁸ Ipi anokanani, ãti anokanani pakinikanani napaãka atoko, nisa Xerosareẽmoni Petro nimisãkiretini ìkapani. Ipi semanati ninapa Petrokata. ¹⁹ Apanakini Teoso iokanatakini isãkire sãpiretakani kona naõkita. Apiananiri itari Txiako inakorinoka naõkita. Ininiãkara kona kãkiti sãkireni nisãpiretai hìte. Teoso iokanapirenakara nisãpiretai hìte.

²⁰ Ia niõkatsopatakiti nisãpiretakiti hìtemoni atão inakari. Teoso imarotari atão inakari nisãpiretinii.

²¹ Xerosareẽmoni nisaãka atoko, nisari Síria tixini, Sirísia tixini apaka. ²² Iuasaaki Kristo sãkire auiãkani, Xotéia tõpa auakani, !aõkitapanikano nota iuasaaki. ²³ Ninoa imarotari apanakini minapiretakiti. Apanakini sãkire: “Kiki mitxi ate misiritakari, uatxa sãpiretari Xesosi sãkire. Mitxi iua nirekari ixipokiniri Xesosi oereẽkiti sãkiretxiti, iuaritika uatxa inirekari oerekiniri Xesosi oerekakiti sãkiretxiti kãkitimoni,” itxana apanakini sãkire. ²⁴ Ininiãkara ninoa: “Peerekari Teoso,” itxana, kotxi nota aukapekari Xesosi sãkire.

2

Xesosi Iokanatakini Apakapari Paoro

¹ Katosi anokanani napaãka atoko, nikanapiriã Xerosareẽmoni nimoianari Panapee inakorikata. Nanikari nimoianari Txito inakori apaka notakata. ² Xerosareẽmoni nisa, kotxi Teoso oerekano nisini iuamoni. Iuaã napokasaaki, nisãkirauata Xesosi sãkire auiãkani auíteakorikata. Ninoakatanoka nisãkirauata. Teoso iokanapirena erekari Xoteo minakonimoni nisãpiretakiti nisãpiretana ninoa. Nota nirekari ninoa imarotiniiri nisãpiretakiti atão inini. Apaka ninirekari ninoa imarotiniiri iuaĩkana katana nisãpiretakiti atão inini ìkapani. Nisãpiretakiti ikenakotakasaakina, ninoa: “Atãopitikara pisãpiretakiti Xoteo minakonimoni,” itxana. ³ Txito nimoianari na Xoteo !itxaua. Krekora itxaua, ininiãkara Teoso takaõtxikare !auari iuamoni, iuaritika Xesosi sãkire auiãkani auíteakori na paniãtari itsiki mata kisauakiko. ⁴ Mitxi apanakini kikiakori apoka iuaã. Ninoa sãkire: “Ate aukari Xesosi sãkire,” itxana ninoa. Txamari na atão ninoa sãkire. Ninoa apotiitaua Xesosi sãkire auiãkanikata. Inirekarina Txito ìtoã Teoso takaõtxikare takiko. Ninoa nirekari imarotiniirina kitxakapirĩkarini Xoteo kiomaneakorini paniãtakiti atakanapini, kotxi atakanapapekari ipixini ninoa paniãtakiti, kotxi Kristo Xesosi nakitiakori atxapekua. Ninoa nirekari imarotiniiri ikinika ate oerekakiti sãkiretxiti. Ninoa nirekari ate kaminiri ikinika kitxakapirĩkarini Xoteo kiomaneakorini paniãtakiti. Ninoa nirekari ikinika Xesosi sãkire auiãkani, Xoteo minakanuia apaka kaminiri Xoteo kiomaneakorini paniãtakiti. Ninoa nirekari nitiritxi amotakoni atoko aniniua. ⁵ Kona xatiki akamari ninoa nireẽkiti, kotxi inirekarina Teoso iokanapirena atão inakari akoketini Xoteo kiomaneakorini paniãtakitikata. Ate nirekari Teoso iokanapirena atãonoka inakari asãpiretinii.

⁶ Xesosi sãkire auiãkani auíteakori txari notamoni: “Xoteo minakonimoni pisãpiretakiti erekapitikari. Apikomoni ate sãkire !auari ninoa pisãpiretini ìkapani,” itxana. Ninoa auĩtetxiakori itxauana, iuaritika Teosomoni ninoa apanakini kãkiti poiãorini atokotxikana itxauana, kotxi Teoso atamatari aãkixinire. Ininiãkara nota !nipĩkari auĩtetxi. ⁷ Ninoa Xesosi sãkire auiãkani auíteakori apokaerekatari niparĩka. Ninoa imarotari Teoso sikano nota ia parĩkatxi, ia iokanapirenatxi erekari nisãpiretinina Xoteo minakanuia. Iua atokotxikana Teoso sikari parĩkatxi Petromoni, iokanapirenatxi erekari Xoteoakori isãpiretini ìkapani. ⁸ Teoso iokanatarari Petro Xoteoakorimoni,

ininiã isikaposotiiretari iua ninoa sauaki iparĩkauatakasaaki. Iua atokotxikana Teoso iokanatanano nota Xoteo minakonimoni. Nota apaka isikaposotiireta ninoa sauaki niparĩkauatakasaaki. ⁹ Iuasaaki ninoa auĩteakori Txiako, Petro, Xoão pakini imarotari Teoso sikinino notamoni ia parĩkatxi, ininiãkara imaĩkarina niuako, Panapee uako pakini, kotxi akinika aparĩkauata Teoso ĩkapani. Akinika aãpokaerekatari nota, Panapee pakini sãpiretiniri Teoso sãkire Xoteo minakonimoni. Akinika aãpokaerekatari Txiako, Petro, Xoão pakini sãpiretiniri Teoso sãkire Xoteoakorimoni. ¹⁰ Ninoa paniãtaua ate matxineiroteni atiretini. Iuanoka ipaniãtaua. Napokaerekatari ninoa sãkire, kotxi ninirekapitikari matxineiroteni nitiretini.

Paoro Ôtãkikari Petro

¹¹ Eereka Petro motikaẽtaua ate Âtxiokia sitatxiti aãuakasaaki. Iuasaaki Petro kamakiti na atãoni. Ininiãkara nota sãkirauata Petro apisatoõ: “Petro, pite kerokari,” nitxari iua. ¹² Merepanika Petro nipokota ikiniõtika aĩtariakori Xoteo minakonikata. Eereka aĩtikaka kikiãkini apoka Txiako iokanatakini. Iuasaaki Petro pĩkana ninoa, ininiã kona inikaika aĩtariakori Xoteo minakonikata, Xoteo kiomaneakorini sãkire xika, kotxi ninoa sãkire: “Kãkiti Teoso takaõtxikare ĩtoã mauakaniã, !pinipokotape ninoakata,” itxana ninoa sãkire. Petro pĩkana Txiako iokanatakini, kotxi ninoa nirekari Teoso takaõtxikare auini aĩtariakori ĩtoã, Xoteo minakanuia ĩtoã. ¹³ Apanakini Xoteoakori Xesosi sãkire auĩãkani apaka kamari Petro kamakiti atokokana, ininiã ninoa apaka kerokari. !Inipokotaikana aĩtariakorikata, Xoteo minakanikata. Ninoa kerokiniri xika Panapee apaka kerokari. Iua apaka !inipokotaika aĩtariakorikata, Xoteo minakonikata. ¹⁴ Nimarotakasaakiri ninoa kerokiniri ikamakitina, nota misãkiretari Petro ikinimane õkiãtaã, kotxi ninoa !ikamari atão inakari. Teoso iokanapirena erekari iaõka !ikamana. Nitxari iua: “Xoteokarai, iuaritika pauanãta Xoteo minakanuia sauaki, ininiã Xoteo kamakiti atoko !pikamaika. Xoteo minakanuia atoko pitxaua. Ininiãkara kinirepa pite paniãtana Xoteo minakanuia: ‘Hĩkĩpitariko Xoteo kiomaneakorini sãkire?’ !Erekari,” nitxa Petromoni.

Xesosi Sãkire Auikiko Kamaerekatari Kãkiti

¹⁵ Ate Xoteo atxaua, kotxi aĩri, ainoro pakini Xoteo txaua apaka. Xoteo kiomaneakorini sãkire: “Xoteo minakanuia maerekati kamakani itxauana,” itxana isãkirena. Xoteo minakanuia !atxaua ate. ¹⁶ Aimarotari, aãuikiniãri Xesosi Kristo sãkire, iua kamaerekatari aãkixinire, ininiãkara Teoso apakapaua. Kitxakapirĩka Teoso sãpiretari Moisesi ipaniãtakiti kãkiti kamini tĩkane. Ininiãkara Moisesi iõkatsopatari ikara Teoso sãkire. Txamari !aposotari akaminiri imakinika Teoso paniãtakiti, Moisesi iõkatsopatakiti, ininiãkara !ikamaerekatari aãkixinire. !Apakapaua ate. Ate auikari Xesosi sãkire ereka anini ĩkapani, ininiã Teoso apakapapitikaua ate. Teoso paniãtakiti iõkatsopatakori ikinika !aposota akamini, ininiã Xesosi kamaerekatari aãkixinire Teoso apakapiniua ĩkapani, Kristo sãkire aãuikasaaki. ¹⁷ Anirekasaakiri Teoso kamaerekatinina, aãpoka Kristomoni. Iuasaaki aimarotari maerekati kamakani aniniua. Iuaritika Kristo makatxakari amaerekani Teoso apakapiniua ĩkapani. Ikara atoko ininiã, atxiĩti Kristo nirekatari maerekati akamini, imakatxakiniri ĩkapani? Konapitini. ¹⁸ Atxiĩti kãkiti imarotari Xoteo kiomaneakorini paniãtakiti kamiko na kamaerekatari kãkiti aĩkixinire, ininiã itakanapari ninoa paniãtakiti ikamini. Atxiĩti aĩti õti iuaĩkana ikamari ninoa Xoteo kiomaneakorini paniãtakiti iaõka, ininiã iuasaakiikarako ikerokari. ¹⁹ Moisesi iõkatsopatakiti oerekano nota ipĩkari atoko nininiua, kotxi nota kona posotari ikinika Moisesi iõkatsopatakiti iaõka nikamini, ininiã nimisiritiko auapitikako. Ininiã nimarotari Moisesi iõkatsopatakiti kona makatxakari nimaerekani. Ininiã nimarotari Xesosi sãkire auĩãkarinokara auapininiika. Ininiã uatxa ikiniõtika ninirekari Teoso nireẽkitinoka nikamini. ²⁰ Xesosi okaãka aamina ĩpiriãmitakari nopini. Aamina ĩpiriãmitakari nopini okakori atoko nitxaua, kotxi maerekati mitxi nikamakiti !nininirekari nikaminiri. Mitxi ninireẽkiti kona auaiika. Iuaritika auãkipanika nitxaua, kotxi Kristo aua nãkixinireẽ. Teoso aĩkiri sãkire nauikiniã,

auãkipanika nitxa. Iua turetano nota. Iua ipĩpe nota ìkapani. ²¹ Moisesi iõkatsopatakiti kamiko kamaerekatiniãua ate, kinirepa Xesosi ipina? Moisesi iõkatsopatakiti kamiko na xatiki kamaerekataua ate. Teoso tiraõkinokara kamaerekatari aãkixinire.

3

Natokopa Itxa Teoso Kamaerekatiniua?

¹ Hĩte Karásia tixini auakanii kona kiĩkitei hĩte. Kipa misirienetai hĩte atão inakari himakamakani ìkapani? Kotxi himarotapitikari atão inakari. Himarotari Xesosi Kristo ipina aamina ìpiriãmitakari nopini amaerekani imakatzakini ìkapani. Ate oerekapekai ikara atão inini. ² Ianoka nipimaãi hĩte: Kisaakipa hãpakapari Erekarì Matamatakoti? Hãpakapatari iua, Moisesi paniãtakiti hĩkamakasaaki? Konapitini. Hãpakapatari Erekarì Matamatakoti Teoso iokanapirena erekarì hãuikasaaki? Ari, Teoso iokanapirena erekarì hãuikasaaki, iusaakiikara hãpakapari iua Erekarì Matamatakoti. ³ Kipa iomaĩkitetai hĩte? Merepanika Teoso sikari Erekarì Matamatakoti hĩtemoni, ininiã Erekarì Matamatakoti sikaposotiiretai hĩte Teoso paniãtakiti hĩkamini ìkapani. Uatxa hĩxinikatarì Teoso paniãtakiti hĩkamini hĩteka posotiireẽkani? Konapitini. Kona hĩte posotari. ⁴ Himisiritapeẽkaika Xesosi sãkire hãuikini xika. Kinirepa himĩteenekatarì himisiritiko? Atauako uatxa kona hãuikaikari mitxi hãuikakiti Xesosi sãkire? ⁵ Kirisaakipa Teoso sikari Erekarì Matamatakoti hĩtemoni? Kirisaakipa Teoso oerekari iposotiire hĩtemoni? Atauako ikara atoko itxa Moisesi paniãtakiti hĩkamakasaaki? Konapitini. Isikai Erekarì Matamatakoti, oerekai iposotiire, Teoso iokanapirena hãuikasaaki.

⁶ Hĩxinikariko Apraãoni. Apraão auikari Teoso sãkire, ininiãkara Teoso kamaerekatari iua, ininiã Teoso apakapari iua. ⁷ Ininiã ninirekarì himarotiniri, kãkiti Teoso sãkire auĩãkani Apraão apika mekaniriakori atão inakani itxauana ninoa. ⁸ Teoso kamaerekatari Xoteo minakaniua, kotxi ninoa auikari Xesosi sãkire. Kitxakapirĩka Teoso sãkire iõkatsopatakori sãpiretapekari ikara Teoso iokanapirena erekarì Apraãomoni. Ikara iõkatsopari txari: “Nota sikariko erekarì ikinimane kãkitimoni, kotxi pite Apraão auikari nota sãkire.” ⁹ Apraão kĩpitari Teoso sãkire, ininiãkara Teoso takari erekarì iuamoni. Iua atokotxikana Teoso takari erekarì iua sãkire kĩpitakanimoni.

¹⁰ Apanakini uãkatari Teoso apakapinina ninoa, kotxi ikĩpitarina Moisesini sãkire. Txamari Teoso misirikare pamonõkonipaniriko ninoamoni, kotxi Teoso sãkire iõkatsopatakori txari: “Teoso misiritariko kãkiti ikinika Moisesi paniãtakiti ikiniõtika imakamakanisaaki.” ¹¹ Teoso sãkire iõkatsopatakori txari: “Teoso kamaerekatariko kãkiti, iua sãkire auĩãkani. Ininiã isãkire auĩãkani auapininiika itxako Teosokata,” itxa Teoso sãkire iõkatsopatakori. Ininiãkara aimarotari Moisesi paniãtakiti kĩpitiko kona kamaerekatari kãkiti. ¹² Moisesini iõkatsopatakiti kona paniãtaua aãuikiniri Xesosi ipinini amaerekani imakatzakini ìkapani. Moisesi iõkatsopatakiti paniãtaua akaminiri ikinika Teoso paniãtakiti. Teoso sãkire iõkatsopatakori txari: “Kãkiti, Teoso paniãtakiti iõkatsopatakori ikinika makerokakatirako auapininiika itxako Teosokata,” itxa Teoso sãkire iõkatsopatakori.

¹³ Txamari ãtika Teoso paniãtakiti Moisesi iõkatsopatakiti akerokiniã, amisiritaãkako. Kristo makatzakaua ate ikara misirikaretxi monõkori, kotxi Teoso misiritari Xesosi Kristo aamina ìpiriãmitakari nopini ate maerekani xika ate mapinakani ìkapani. Teoso sãkire iõkatsopatakori txari:

Kãkiti aamina nopini okakori Teoso misiritakiti itxaua.

¹⁴ Teoso sikaenetari erekarì Apraãomoni. Kristo ipĩpe hĩte Xoteo minakaniua ikara erekarì hãpakapini ìkapani. Ininiã Xesosi Kristo sãkire aãuikasaaki, aãpakapari mitxi Teoso sikaenetakiti. Aãpakapari aãkixinireẽ Erekarì Matamatakoti, Teoso sikaenetakiti atemoni.

Teoso Sikaenetakiti Sãkiretxiti

¹⁵ Nitariakori, ikinimane kākiti imarotakiti nisāpiretaiko hīte, noereēkiti sākiretxiti iteene himarotini ĩkapani. Ipi kākiti aua itiina isikaenetakakana. Iuasaaki, iōkatarina iuākana isikaenetakitina tsopaā. Eereka !auritaākana imaxinīkaretinirina isikaenetakitina. Apaka !auritaāka sākiretxi apikomoni itakinina isikaenetakitina tsopaā. Teoso sikaenetakiti inakitiakorimoni ikara atoko itxa. ¹⁶ Himarotariko ia. Teoso sikaenetari erekari Apraāomoni, Apraāo apika mekanirimoni apaka. Teoso sākire iōkatsopatakori na txari: “Apika mekaniriakori.” Teoso sākire iōkatsopatakori txari: “Apika mekaniri.” Ininiā ātika apika mekaniri. Kristo itxaua iua. ¹⁷ Ia ninireka nisāpiretinii. Kitxakapirīka Teoso sikaenetakiti Apraāomoni apokapeka. Koatrosētosi trīta pakini anokanani Apraāo auaka atoko, Teoso sāpiretari Moisesi ipaniātakiti iōkatsopatini ĩkapani kākiti kamini ĩkapani. Moisesi iōkatsopatakiti kona xipokari Teoso sikaenetakiti Apraāomonikari. ¹⁸ Teoso sikari Kristo kākitemoni, kotxi mitxi isāpiretari isikaenetakiti Apraāomoni. Teoso sikasaakiri ipaniātakiti sākiretxiti Moisesimoni ikara iaōka kākiti kamini ĩkapani, isikaenetakiti auapeka iuasaaki. Ipaniātakiti sikiko !ixipokari isikaenetakiti.

¹⁹ Ininiākara kininiāpa Teoso sikari ipaniātakiti Moisesimoni kākiti kamini ĩkapani? Teoso paniātakiti iōkatsopatakori oerekaua maerekati kamakaniua ate, kotxi !aposotari ikinika ipaniātakiti akamini. Kristo, Apraāo apika mekaniri ĩkorapokoriti apokini apisapanika, Moisesi iōkatsopatakiti oerekaua Teoso nireēkiti akamini ĩkapani. Teoso sikaenetakiti itxaua Xesosi Kristo. Teoso sikasaakiri ipaniātakiti sākiretxiti Moisesimoni, Teoso nitiriakori aua iuaātaā. Teoso sāpiretari isākire Moisesimoni. Eereka Moisesi sāpiretari kākiti. ²⁰ Teoso sāpiretakasaakiri Apraāo isikaenetakiti, !ipaniātari āti kākiti sāpiretiniri Apraāo. Teosonokara sāpiretari Apraāo.

Moisesi Iōkatsopatakiti

²¹ Moisesi iōkatsopatakiti aāuikiniā, atxiīti !anirekaikari Teoso sikaenetakiti? Anirekapitikari. Akiomaneakorini paniātakiti sākiretxiti, kona txīkitakaua aāuapininiika anini tīkane. Ininiākara akiomaneakorini sākire kona kamaerekataua ate, ininiā Teoso kona apakapaua ate, ininiākara kona aāuapininiika !atxa Teosokata. !Auari mauiritakoti sākiretxiti kākiti auapininiika inini txīkitakakari. ²² Teoso sākire iōkatsopatakori txari: “Ikininape kākiti kamari maerekati.” Kateia āki auakani atoko atxaua, kotxi !aposotari erekari akamini. Teoso sikaenetakiti sikaāka Xesosi Kristo sākire auiākanimoni.

²³ Xesosi Kristo sākire auikiko apisa, kākiti kateia āki auakani atokokana itxauana. Kākiti moiaākari atoko itxaua Teoso paniātakiti Moisesimoni sikakori. !Aposotari anirekinimoni asini. Uatxara aposotapitikari anirekinimoni asini, kotxi Xesosi apokapeka ĩkorapokoriti. Ipinapeka kākiti ĩkapani, ininiā uatxa aāuikiniāri iua sākire, kona Teoso misiritaikaua uatxa. ²⁴ Kristo mapokakani apisa, ate oerekakari atoko itxaua Teoso paniātakiti iōkatsopatakori. Kristomoni anikakari atoko itxaua ikara. Kristo apokasaaki, Teoso kamaerekataua ate, kotxi aāuikari Kristo sākire. ²⁵ Uatxa apokapeka Xesosi Kristo sākire auikiko. Ininiākara Teoso paniātakiti iōkatsopatakori !imoiaāikaua ate.

²⁶ Teoso anaakori hītxaua, kotxi hāuikari Kristo Xesosi sākire. ²⁷ Hīte patxisa-tapeēkaika, ininiākara hīpatxisatiko oerekari apanakini Kristo ātipirika himoianatini ĩkapani. Ininiākara Kristo atokopeka hītxa. ²⁸ Ikara atoko aniniā, akinika Kristo Xesosi nakiti atxaua, kotxi akaikotapika iuakata. Xoteoakori, Xoteo minakaniua, nitiritxi, nitiritxi minakaniua, kiki, sito, amakinika Kristo nakiti atxaua. ²⁹ Kristo nakiti pininiāua, Apraāo apika mekaniri pitxaua apaka. Ininiā pite apakapapitikariko Teoso sikaenetakiti.

4

Teoso Anaakori

¹ Apikomoni nisāpiretaiko hīte āti sākiretxiti. Amarini !apakapari irini tii itakanapakiti iua ĩkapani, kotxi xapitipanikari. Ikinipoko irini nakiti imi nakiti txapekua, iuaritika

na apakapapanikari. Axapitipanika inakasaaki, nitiritxi atoko itxaua. ² Axapitipanika inakasaaki apanakini moiaãri iua. Ninoa nĩkatari itxineirote. Irini ketotiniri manapi apokasaaki, imi apakapari ikinika irini tii itakanapakiti. ³ Mitxi iua eenetxi atoko atxaua ate. Nitiritxi atoko atxaua ate. Akiomaneakorini paniãtakiti sãkiretxiti amoiaãkiri atoko itxaua, kotxi oerekaua akamakiti tĩkane. ⁴ Teoso iokanatarari imi kãkitimoni iketo manapisaaki. Sito ĩto ãki aua merepanika, ikinimane kãkiti atoko. Iua kĩpitari ikinika Teoso paniãtakiti iõkatsopatakorari. ⁵ Amakamakaniãri ikinika Teoso paniãtakiti iõkatsopatakorari, amisiritiko auapitika. Xesosi makatzakaua ate amamisiritakoni ĩkapani. Ininiã Teoso anaakori atxaua.

⁶ Teoso anaakori aniniãua, Teoso iokanatarari Erekarari Matamatakoti imi nakiti aãkixiniremoni. Ininiã iua Erekarari Matamatakoti aãkixinireẽ auiniã, aãkiritari Teoso: “Papai, niri,” atxariko. ⁷ Ininiã nitiritxi atoko !atxaikaua. Teoso anaakori atxapekaua. Iua anaakori aniniãua, ikini isikaenetakiti isikaua atemonikari, kotxi Kristo makatzakapekarari amaerekani.

!Erekaxinireri Paoro Karásia Auakani Xika

⁸ Mitxi hĩte !imarotari Teoso. Iuasaaki nitiritxiakori amotakoni atoko hĩtxaua. Hĩparĩkauata teoso minakaniua ĩkapani. ⁹ Uatxa hĩte imarotari Teoso. Ari, uatxa Teoso imarotari hĩte. Ininiã kinirepa hĩte nirekarari hĩkanapiriini mitxi hĩauĩteakorimoni. Kona kaposotiirena ninoa. !Kĩkitena ninoa. Kinirepa hĩte nirekarari iuaĩkana ninoa nitiriakori amotakoni atoko hininiãua? Kinirepa hĩte nirekatari iuaĩkana hãuikiniri ninoa oereẽkiti sãkiretxiti? ¹⁰ Hĩte nirekarari Xoteo kamakiti atoko inakari hĩkamini. Hĩuãkatari Teoso apokaerekatinii hĩte, kotxi ninoa kiinirite atokotxikana hĩte apaka kama. ¹¹ Ininiã !erekaxinireno nota ikara nikenakoenetini. Atauako maxikatĩika nota sãpiretarari Teoso sãkire hĩtemoni?

¹² Nitariakori, nota iteene õtãkikai hĩte. Hĩtakanapariko Xoteo kiomaneakorini paniãtakiti hĩkamini. Nota atoko hĩtxako, kotxi hĩte sauaki nauakasaaki nota hĩte atoko nitxaua. Xoteo minakaniua atoko nitxaua. Hĩtekata nauakasaaki, !himisiritano nota. Hĩtoretano nota. ¹³ Hĩxinikari merepitipanika Teoso iokanapirena erekarari hĩte nisãpiretakasaaki, namianare xikara nisãpiretai hĩte, hĩtekata nauakasaaki. ¹⁴ Iuasaaki namianatakasaaki, hĩparĩkauatapitipo nota ĩkapani. !Hinaiakakano. !Hĩokanatanano nisini namianare xika. Hĩte apakapano nota Teoso nitiri iaxitikiri hãpakapini atokokana. Hĩte apakapano nota, Kristo Xesosi hãpakapini atokokana. ¹⁵ Iuasaaki hĩte iteene hĩpoxokoniua. Nimarotari ereka hinini, kotxi noki amianatakasaaki, hĩposotaãkamariko, himakatzakamariko hĩteka oki notamoni hĩsikini ĩkapani. ¹⁶ Atauako uatxa himokaiakari nitxataua nota, atão inakari nisãpiretinii xika?

¹⁷ Ninoa kamisirienererini iteene tiretapitikamai hĩte, txamari ninoa ãkixinire nireẽkiti !erekari hĩte ĩkapani. Inirekarina hĩte omanatinia ate. Inirekarina hĩte apokaerekatinina ninoanoka. ¹⁸ Erekarari kãkiti iteene tiretinii hĩte, ãkixinire inireẽkiti erekarari inakasaaki. Nota hĩtekata nimauakanisaaki apaka, erekarari kãkiti iteene tiretinii, ãkixinire inireẽkiti erekarari inakasaaki. ¹⁹ Hĩte namariteni nota tiretakini atoko hĩtxa. Hinoro atokotxikana nitxa nota. Kaiamapeka auaenetakaro atoko nitxa, kotxi nota atatsiirauata hĩte xika. Kristo kamakiti atokotxikana hĩkamakasaaki, iuasaakinoka nitsii nãkixinire auakarari iotoka. ²⁰ Kinirão auaka nitxa hĩtekata uatxa. Ninirekarari aãpisatoõtakaniua, ininiã nixinikakiti ipinimonipo itxa atxiĩti. !Erekaxinireno nota hĩte xika.

Akaa, Sara Pakini

²¹ Hĩte Xoteo kiomaneakorini paniãtakiti nireẽkani, himarotatarari ninoa sãkire? ²² Teoso sãkire iõkatsopatakorari sãpiretaua, ipi Aprão anaakori aua. Sito niterotxi iamotakitokata aua imi ãti. Niterotxi minakotokata ĩtanorokata aua ãti imi. ²³ Akaa inakoromoni, niterotxi iamotakitomoni imi aua, kotxi Aprão sirĩka oakata. Imi aua Saramoni niterotxi minakotomoni, kotxi Teoso sikaenetari iua imi. ²⁴ Aprão anaakori oerekaua

Teoso paríka kãkiti íkapani. Iparíka ipi aua, naia sito ipi atoko. Akaa inakoro ãkiri nitiritxi amotakori itxaua. Teoso paríka õtanoxiratarí Sinai inakori iua auakasaaki, niterotxi Akaa atoko itxa. Teoso paniãtakiti iusaaki amakamakaniã, amisiritiko auapitikako, nitiritxi amotakori atokotxikana. Nitiritxi makamakaniãri ipatrãote paniãtakiti imisiritiko auapitikako. ²⁵ Ininiãkara õtanoxiratarí Sinai inakori Arápia tixini auakari Akaa atoko itxa. Apaka íkorasaaki Xerosareẽ sitatxiti oa atokokana itxa, kotxi Xerosareẽ auakani Akaa anaakori atoko itxana ninoa. Nitiritxiakori amotakoni atoko itxana. Ninoa Xerosareẽ auakani !ikamari ikinika Teoso paniãtakiti, ininiã Teoso misiritapitikanako ninoa. ²⁶ ãti Xerosareẽ auapitika, iaxiti auakari Xerosareẽ, Teoso tixine. Xerosareẽ iaxiti auakari Sara atoko, kotxi Sara niterotxi amotakoro !otxaua oa. Ate inoro atoko otxaua oa. Sara ãkiri atoko atxaua, kotxi amisiritiko !auaika. Aãuikiniãri Xesosi sãkire, akiomaneakorini kona paniãtaikaua ate ninoa nireẽkiti akamini. ²⁷ Teoso sãkire iõkatsopatakori txari:

Pite sito meenetoí pipoxokoniuatoko. Pite sito pauãkitakarauatini tsii mimarotakatoi, pixikarauata pipoxokoniritika, kotxi pite takanapakoroi, itori pamariteakori auako. Kĩtaniriro poiãoka oamariteakori auako, itxa Teoso sãkire iõkatsopatakori.

²⁸ Ininiã nitariakori, Sara ãkiri, Isaki inakori atoko atxaua, kotxi Teoso sikaenetari Apraõ imi Saramoni auini. Iuatxikana Teoso sikaenetaua Xesosi amaerekani imaktxakini íkapani, Teoso anaakori aniniua íkapani. ²⁹ Akaa ãkiri Isimaéo inakori iponaniã, kotxi Apraõ nirekari imi, ininiã iua siríka Akaakata. Sara ãkiri Isaki inakori iponaniã Erekarí Matamatakoti posotiireẽ. Eereka Isimaéo misiritari Isaki. Iua atokokana itxa uatxa. Teoso anaakori minakaniua misiritari Teoso anaakori. ³⁰ Teoso sãkire iõkatsopatakori txari:

Hĩokanataroko niterotxi iamotakoro osipinini imikata, kotxi niterotxi ãkiri kona apakapapaniri ipixini iri tii. Niterotxi minakoto ãkirinoka apakapari iri tii, itxa Teoso sãkire iõkatsopatakori. ³¹ Ininiã nitariakori, niterotxi amotakoro ãkiri atoko !atxaua. Niterotxi minakoto ãkiri atoko atxaua.

5

Takaõtxikari !Ikamaerekatari Kãkiti

¹ Nitiritxi kamari ipatrãote nireẽkitinani. Ikara atoko uatxa !atxaika, kotxi aãuikari Kristo sãkire. Kristo makatzakapekaua amisiritiko monõkoni. Ininiãkara nitiritxi amotakoni atoko iuaíkana !hĩtxapeua. !Hãuiritapiri kãkiti paniãtinii ninoa auíãkiti hãuikini.

² Hĩkenakotako. Nota Paoro sãpiretaiko hĩte. Hãuiritiniãri takaõtxikari takiko hĩtoã Xoteo atoko, ininiã hãuikari takaõtxikari kamaerekatinii hĩte Teoso apakapinií íkapani. Txamari na atão. Kristonoka kamaerekatari kãkiti Teoso apakapini íkapani. Erepaniko, pinirekiniãri takaõtxikari, !pinirekaikari Kristo. ³ Iuaíkana nota õtãkikai hĩte. Hãuiritiniãri takaõtxikari takiko hĩtoã Xoteo atoko, ininiã Moisesi paniãtakiti ipixini hĩkamapeka. Ikara atoko hininiã, ikinika ipaniãtakiti hĩkamako. ⁴ ãtikaka hĩte nirekari Moisesi paniãtakiti hĩkamini Teoso kamaerekatinii íkapani. Txamari ikara atoko hinirekiniã, hĩtakanapari Kristo. Ininiãkara Teoso !iposotari ikinipoko erekari isikinii. ⁵ Atepekana, ate auikari Xesosinoka txíkitakiniri kãkiti ereka inini íkapani, Teoso apakapini íkapani. Ikamaerekataua Erekarí Matamatakoti posotiireẽ, kotxi aãuikari Xesosi sãkire. ⁶ Takaõtxikari hĩtoã auiniã, iua takaõtxikari !ikamaerekatai hĩte. Takaõtxikari hĩtoã mauakaniã, takaõtxikari mauakani !ikamaerekatai apaka. Kristo Xesosi nakitiakori aniniãua, Teosora kamaerekataua, kotxi aãuikari Xesosi sãkire, ininiã atiretari iua.

⁷ Merepanika hĩte auikapitikari Xesosi sãkire. Kipa xipokatari atão inakari Teoso sãkire hãuikini? Natokopa itxa Teoso sãkire atão inakari hĩtakanapini? ⁸ Hĩte akiritakari itxaua Teoso. Kona iuani xipokari hãuikiniri atão inakari isãkire. ⁹ Kãkiti sãkire txari: “Pão ãtikaãkari axapitiri ipani, iuaritika iãtikakakiti itori ipe.” Iua atokokana ãtika maerekati

kamakari xika kaiãopokori kãkiti kamari maerekati. ¹⁰ Teoso kamaimaroretano nota hïte takanapiniri hïkerokakiti, atão inakari hïkamini ïkapani. Hïte nitariakori hïtxaua, kotxi Apiananiri nakitiakori atxaua, ininiãrako nimarotari nota õtãkikinii iaõka hïkamapanikako. ! Nimarotari iua kiki himisirienetakiri. Ia nimarota. Teoso misiritapanikariko iua.

¹¹ Apanakini sãpirenãtari: “Paoro paniãtari Xoteo minakaniua takiniri takaõtxikari iïtoãna.” Na atão ninoa sãkire. Nipaniãtaãkamariko takaõtxikari takiko, nimisiritiko ! auamako. Kona nipaniãtari Xoteo minakaniua takiniri takaõtxikari iïtoãna. Ikara xika nimisiritaãka. Nisãpiretari ia: Kristo aamina ïpiriãmitakari nopini ipïpe amaerekani imakatzakini ïkapani. Kristonoka kamaerekataua Teoso apakapiniua ïkapani. Ikara noerekakiti xika nimisiritaãka. ¹² Ninoa kamisirienenererini nirekiniãri itsiki mata kisauakiko, erekari itsikipatï tsoatiko apaka. Nomanãkarauata, ninoa misirienetini xika.

¹³ Nitariakori, Teoso akiritai hïte iua nakitiakori hininiua ïkapani, ininiãkara uatxa hïposotari hïteka nireëkiti hïkamini. Iuaritika ! hïkamapiri maerekati hïto nireëkiti. Ia hïkamako: Hïtoretakakauako ãtipirika. Ikara atoko hininiã, himoianatakakauako. ¹⁴ Teoso paniãtakiti txari: “Pitiretana apanakini piteka pitiretiniua atokokana.” Ikara paniãretxi pikaminiã, pikamapekari ikinika Moisesi paniãtakiti. ¹⁵ Kaxipiri ïtopa auakani atoko ! hïtxape. Ninoa karotakakaua, okakakaua itxana. Erepaniko. Kaxipiri ïtopa auakani atoko hininiã, hïxipokakauako.

Aïto Nireëkiti

¹⁶ Nõtãkikare ia atoko itxapaniko: Hãuiritariko Erekarï Matamatakoti oerekini iua kimapore ikiniõtika. Iua hïkimapore oereëkari ininiãua, ! hïkamapiri maerekati hïto nireëkiti. ¹⁷ Aïto !inirekari Erekarï Matamatakoti nireëkiti. Iuatxikana Erekarï Matamatakoti !inirekari hïto nireëkiti. Erekarï Matamatakoti mokaiakari itxaua aïto. Ininiã aãkixinire nireëkiti !aposota akamini aïto nireëkiti xika. ¹⁸ Iua Erekarï Matamatakoti oerekiniãi pikimapore ikiniõtika, pikaminiãri iua nireëkiti, ininiã Xoteo kiomanekorini paniãtakiti !oerekaikari pikimapore.

¹⁹ Aimarotapitikari kãkiti ïto nireëkiti. Inirekari ïtaniritxi minakotikatika osirïkini, ïtanorotxi minakotokatika isirïkini, mitxitakari ãtokata isirïkini. Kãkiti ïto nirekari kãkiti xinikaxititini maerekati iïto nireëkiti. Kãkiti ïto nirekari ãti kãkiti ïto, maerekati ikaminina ïkapani. ²⁰ Kãkiti ïto nirekari teoso kãkiti kamakiti iteosone ïkapani. Kãkiti ïto nirekari maerekani matamatakoni paniãtakiti ikamini. Kãkiti ïto nirekari omanãkaretxi, neenamatzï, xikoretxi, norikaretxi, iuikaretxi. Kãkiti ïto nirekari kãkiti omanatiniri apanakini. ²¹ Kãkiti ïto nirekari ãti kãkiti tii. Inirekari okanitxi, poãtakatzï, maerekati kiiniriti ikamini. Ikara atoko inakari maerekati kãkiti ïto nireëkiti. Uatxa nipinitai hïte, mitxi nipinitini atokotxikana. Ikara maerekati kamakani !auapani Teoso auïtetxi ininiãtaãua.

Erekari Matamatakoti Nireëkiti

²² Iua Erekarï Matamatakoti aãkixinireë auiniã, !ikara atokoni itxa akamakiti. Iua Erekarï Matamatakoti aãkixinireë auiniã, atiraõkiuata. Apoxokoniua. Erekaxinireua. !Katimari aomanãkarauatini. Aamonïkarauata. Erekaua. Akamaenetakiti akamapitika. ²³ Ate !iuikaua. !Akamari maerekati aïto nireëkiti. Ikara atoko atxa, Erekarï Matamatakoti aãkixinireë auiniãua. Ikara atoko aniniã, amisiritiko !auari. ²⁴ Kristo nakitiakori aniniãua, !anirekaikari akaminiri maerekati aïto potxitakiti, aïto nireëkiti. Amanirekakiniti aõkini atokokana, aõkapekari maerekati aïto nireëkiti. ²⁵ Erekarï Matamatakoti txïkitakari axinire auãki inini, ininiãkara makamari ikinipoko iua nireëkiti ikiniõtika. ²⁶ !Apakata aãuikiniua. !Apakata aneenamauatini. !Apakata axikotakakiniua.

6

Himoianatakakiniua

¹ Nitariakori, h̄ite Erekar̄i Matamatakoti nireēkiti kamakanii, himarotakasaakiri āitari kaminiri maerekati, h̄õtākikariko iua imaerekani itakanapini ĩkapani. H̄õtākikariko h̄ītiraōkiritika. Iuasaaki erepaniko, kotxi atxīiti h̄ite apaka nirekar̄i iua maerekani atokotxikana h̄ĩkamini. ² Himoianatakakauako h̄ĩtapara poiāonoka inakasaaki. Ikara atoko hininiā, h̄ĩkamari Kristo paniātakiti apanakini h̄ĩtiretini. ³ !Erekar̄i ate iuikiniua. Kākiti minakati: “Apiari nota,” inakar̄i, iuanika misirienetaua. ⁴ Erekar̄i nataerekatiniri notaka kamakiti. Erekar̄i atxīiti? Nikamakiti ereka ininiā, nipoxokoniua. !Apakata nākixinireē nixinikiniri: “Iua āti kamakiti apiaerekata. Nota kamakiti poiāo erekar̄i.” ! Apakata ikara atoko ninini. ⁵ Ikininape kākiti aua ipar̄ĩka kasāpaniri. Iuanoka posotari ĩkaminiri.

⁶ Teoso sākire oereēkar̄i oerekiniāi pite Teoso sākire, iuasaaki minakati auiniāi pisikari iuamoni. Nipokori atxīiti, txineiro atxīiti, pisika iuamoni, kotxi iua kikiote ! auari. ⁷ Piteka !pimisirienetapeuako, kotxi !piposotari Teoso pimisirienetini. Teoso misirienetakari !auari. Pikikioteē mitxi pitakakiti iaōka papakapa. Iua atokokana pikamakiti ereka inini, papakapari erekar̄i. Pikamakiti maerekati inini, papakapari maerekati. ⁸ Pīito nireēkiti pikaminiā, papakapari pīito siākitinoka. Pīito sikai ip̄ĩkitxinoka. Teoso misiritapitikai. Erekar̄i Matamatakoti nireēkiti pikaminiā, papakapari iua siākiti. Iua siākiti Teosokata ātipirika pauini ĩkapani. ⁹ !Apakata asāpakini erekar̄i ikiniōtika akamini. Makamari erekar̄i ikiniōtika, maiotokakanikaua anini. Erekar̄i akamini amaiotokakaniā, erekar̄i Teoso sikakiti aāpakapini apokapitikako. ¹⁰ Ininiā aposotakasaakiri, makamari erekar̄i ikininapemoni. Merepanika makamari erekar̄i āitariakorimoni Xesosi sākire auiākanimoni.

Imapotōkire Ōtākikaretxi

¹¹ H̄ātamatariko ia niōkatsopare mitari. Ia iōkatsopari imapotōkire nota niuakoā niōkatsopatakiti. ¹² Apanakini h̄ite sauaki nirekar̄i ninoaka apokaerekatiko, ininiā isāpiretari kākiti potxitakininoka. Ninoakara paniātai h̄ĩtakiniri takaōtxikari h̄ĩtoā. Kininiāpa ninoa nirekatari takaōtxikari h̄ĩtakini? Ninoa misiritiko monōkoni xika, ninoa paniātari Xoteo minakaniua takiniri takaōtxikari ītoāna, ininiā Xoteoakori potxitari ninoa oereēkiti sākiretxiti. Inirekarina Xoteoakori apokaerekatinina ninoa. Txamari Kristonoka kamaerekatari kākiti, kotxi ip̄ipe aamina ĩpiriāmitakari nopini kākiti maerekani imaktxakini ĩkapani. ¹³ Ninoa kamisirienererini kamari Moisesi paniātakiti takaōtxikari itakinina ītoāna. Txamari ikinika Moisesi paniātakiti !ikamana. Ninoa nirekar̄i h̄ite takiniri takaōtxikari h̄ĩtoā, ininiā eereka ninoa iuikaua, kotxi h̄ite kamari ninoa paniātakiti. ¹⁴ Kona ninirekar̄i niuikiniua. Teoso !inirekar̄i niuikiniua. Nota iuikari aāūite Xesosi Kristo. Iuanokara niuika, kotxi iua ipina aamina ĩpiriāmitakari nopini ate ĩkapani. Ininiā nota !ninarekaikari Xesosi sākire mauīākani nireēkiti. Iu-atxikana ninoa !inirekar̄i nota nireēkiti. ¹⁵ Takaōtxikari h̄ĩtoā auiniā, iua takaōtxikari !ikamaerekatai h̄ite. Takaōtxikari h̄ĩtoā mauakaniā, takaōtxikari mauakani !ikamaerekatai. Teoso tx̄ĩkitakiniāi iua anaakori hininiāua, iuasaaki ikamaerekatai h̄ite. Ininiākara h̄ākixinire amaneri itxaua. Ininiā mitxi hinireēkiti !hinirekaika. ¹⁶ Teoso kamaerekaxiniretai h̄ite, ikara sākiretxiti h̄āuikasaaki. Iua amon̄ikai h̄ite. Ikara atoko Teoso kamari kākiti iua nakitiakori ininiuana, atāo Isaeo mekaniriakori ininiuana.

¹⁷ Ixipope ia iōkatsopari. Nipinitana nota kamamaxiretakani. !H̄ĩkamamaxiretapeno, kotxi nimisiritaākapeka. Nikaro mata auapeka nītoā. Aūitetxi nitiri amotakori karo mata atoko itxa nikaro mata, kotxi Apiananiri Xesosi nitiri nitxaua.

¹⁸ Nitariakori, aāūite Xesosi Kristo sikari ikinipoko erekar̄i h̄ite ākixiniremon̄i. Ameē.

ÉPESO

Paoro Iokanatsopatakiti Épeso Auakanimoni

¹ Nota, Paoro. Niõkatsopatari ia aãtsopa. Teoso nirekano Xesosi Kristo iokanatakiti nininiua. Ininiã niokanatsopata Teoso nakitiakorimoni Épeso sitatxiti auakanimoni. Kristo Xesosi sãkire auiãkanimoni, ipaniãtakiti kamakanimoni niokanatsopata. ² Aĩri Teoso, Apiananiri Xesosi Kristo pakini sikari ikinipoko erekari hĩtemoni. Ninoa ka-maerekaxiniretai hĩte.

Teoso Mereẽua Itixi Kamiko Apisapanika

³ Masãpiretari Teoso, aãũite Xesosi Kristo iri: “Erekapitikai,” kotxi itakapekari ikinika erekari ate ãkixiniremoni, kotxi Kristo nakitiakori atxaua. Ikara erekari isikakiti Teoso tixinekiri. ⁴ Itakari ikara erekari ate ãkixiniremoni, kotxi itixi kamiko apisapanika Teoso mereẽpekaua Kristo nakitiakori aniniua. Imereẽua Teoso nireẽkitinoka akamini ĩkapani, maerekati amakamakani ĩkapani, atiraõkiuatini ĩkapani. ⁵ Itixi kamiko apisapanika, Teoso mereẽua iua anaakori aniniua ĩkapani. Xesosi Kristo ipĩpe ate ĩkapani, ininiã iua txĩkitakaua Teoso anaakori aniniua. Teoso txĩkitakaua iua anaakori aniniua, kotxi iua potxitari ikara atoko ikamini. Inirekari ikara atoko ikamini. Erekaripotxitakiti ikamini tĩkane.

⁶ Teoso txĩkitakaua iua anaakori aniniua, kotxi inirekari asãpiretiniri: “Peerekari ikinipoko erekari pisikakiti kãkitimoni.” Teoso sikaua ikara erekari, kotxi iua tirketakiti nakitiakori atxaua.

⁷ Xesosi iĩkitxitari amaerekani, kotxi iarẽka xiketa ate ĩkapani, ininiã Teoso max-inĩkaretari amaerekani. Uatxa !imisiritaikaua amaerekani xika. Teoso kamari ikara ate ĩkapani, kotxi ikinipoko erekari isika atemoni. !Ixipoka ikara erekari Teoso sikakiti. Ikinipoko erekari aua iuamoni. ⁸ Kãkiti kona posotari iaõtiniri erekari Teoso sikakiti ate maerekati kamakanimoni. !Kaiãotikori. Ikinipoko imaroretxi aua iuamoni. Atão inakarínoka imarota ikamini, ininiã ikara erekari ikaminiãua. ⁹ Mitxi !aimarotari Teoso inireẽkiti ikamini tĩkane. Uatxa ikamaimarorettaua. Ipotxitari oerekiniua inireẽkiti. Peerekari iua potxitakiti. ãkixinireẽ ixinikari ikara ikamini. ¹⁰ Teoso ketotini õti manapi, ikinipoko iposope inakasaaki, iua apotiitariko ikinimane itixine auakani, itixiã auakani pakini.

¹¹ Xesosi Kristo nakitiakori atxaua, ininiã aãpakapari ate ĩkapani inĩkatakiti. Itixi kamiko apisapanika ixinikari ikamakiti ate ĩkapani. Ikamari ikinika inirekakiti iaõka. ¹² Iua mereẽua ate, merepitipanika Kristo sãkire auiãkaniua, ikinimane asãpiretini ĩkapani: “Peerekari Teoso. Erekapitikari ikamakiti.”

¹³ Hĩtepekana auikari Xesosi sãkire, atão inakari hĩkenakotakasaaki. Ikara atão inakari Teoso iokanapirena erekari itxaua, kotxi iua iokanapirena oerekai himaerekani makatxakiko. Xesosi sãkire hãuikasaaki, Erekaripotxitakiti Matamatakoti apoka hãkixinireẽ. Iua Teoso takaõtxikare itxaua. Iua oerekai hĩte Teoso nakitiakori hininiua. Xesosi sikaenetapekari Erekaripotxitakiti Matamatakoti atemoni iokanatinĩ. ¹⁴ Isikaenetakiti Erekaripotxitakiti Matamatakoti atemoni auape, ininiã aimarotapitikari aãpakapiniri ikinika isikaenetakiti, inĩkatakiti ate ĩkapani. Iuasaaki Xesosi apakapaua ate iua nakitiakori, iua iamotakini, kotxi imakatxakapekari amaerekani. ĩkara atoko ininiã, ikinimane kãkiti txari iua: “Peerekai pite. Erekapitikari ikinipoko pikamakiti.”

Paoro Misãkiretiniri Teoso

¹⁵ Ikara atoko ininiã, nota kenakopiretakasaakiri Apiananiri Xesosi sãkire hãuikini, ikinimane Teoso nakitiakori hĩtoretini nikenakopiretakasaaki, ¹⁶ nimisãkiretapikari Teoso

hîte ïkapani. Nitxari iua: “Erekapitikai, kotxi pite makatxakari ninoa Épeso sitatx-iti auakani maerekani,” nitxa. ¹⁷ Teoso, aãuïte Xesosi Kristo Teosone itxaua. Xesosi iri itxaua. Kaiotximereri iua Teoso. Nimisãkiretari Teoso hîte ïkapani ia atoko: “Pisikaimaroretana ninoa ãkixinire. Ninirekari Erekar Matamatakoti oerekinina pite iteene imarotinina ïkapani. ¹⁸ Piopinikariko ninoa ãkixinire atão inakari imarotinina ïkapani. Pite akiritana ninoa ikinipoko erekari apakapinina ïkapani. Ikara poerekana ninoa imarotininina ïkapani, iãtapininina ïkapani. Pikamaimaroretana ninoa pite nïkatakiti pite nakitiakori ïkapani. Ikara pinïkatakiti, pisikaenetakiti, peerekari. Itori pinïkatakiti. ! Ixipoka pinïkatakiti. !Kaiãotikori pinïkatakiti pinakitiakori ïkapani. ¹⁹ Pikamaimaroretana ninoa kaposotiire pinini. Ininiã piposotari iteene pisikaposotiiretiniua ate pisãkire auiaãkani. Ikara piposotiire ! auari ãtimoni. Pataparari pite posotiire.” Ia atoko nimisãkiretari Teoso hîte ïkapani.

²⁰ Ikara Teoso posotiire õkitikari Kristo ipïkani sauaki auakasaaki. Iposo atoko iposotiireẽ itakari Kristo apiari topãkiniãtaã, ikikomoni itixineẽ. ²¹ Ininiã Kristo Apiananiri itxaua. Iua posotiire apiata. Maerekani matamatakoni auiteakori posotiire poiãoka. ïkorapokoriti auitexiakori posotiire poiãoka. Kristo posotiire apiata. ïkorasaaki Kristo Apiananiri. Apaka katana Kristo atoko inakari !auari. !Auari ãti kaposotiireri Kristo atoko. Kristo apiata. ²² Teoso txïkitakari Kristo ikinimane auite ininiua. Itakari ikinimane imokaiakariakori ikiti patapi, ininiã Xesosi paniãtakitinoka ikamana. Imokaiakari !auaika. Ininiã ikinipoko Teoso kamakiti auite itxaua Kristo. Teoso sikari iua isãkire auiaãkani auite ininiua. Inakitiakori kii atoko itxa Xesosi. ²³ Iua ïto atoko itxa inakitiakori, ininiã ikinimane inakitiakori sauaki iua aua. Itxïkitakari ikinipoko atão inini.

2

Mitxi Ipïkani Atoko Atxaua

¹ Hïtepekana, Xesosi txïkitapekari hïxinire auãki inini. Mitxi, isãkire hãuikini apisapanika, ipïkani atoko itxa hãkixinire, Teoso manirekakiniti hïkamini xika, himaerekani xika. ² Iuasaaki hîte kamari ikini sereti maerekati, ïkorapokoriti auakani maerekani atokokana. Iuasaaki hïkïpitari Satanasi sãkire, maerekani matamatakoni auite sãkire. Iua, initiriakorikata aua ïtima auiniãtaã. Iua parïkauata Teoso sãkire makïpitakani xinire ãki. ³ Mitxipeka amakinika ate Teoso sãkire makïpitakani atxaua, kotxi akamari maerekati aïto paniãtakiti. Iuasaaki akamari maerekati aïto nireẽkiti. Akamari maerekati axinikakiti iaõka iuasaaki. Ikinimane itixi auakani atoko, ate, apanakini apaka maerekati kamakani atxaua iuasaaki, ininiã Teoso omanãkarauata amaerekani xika. Iposope amisiritiko.

⁴ Iuaritika Teoso iteene amonïkaua. Kaamonïkareri Teoso atoko inakari !auari. Iua iteene tiretaua. Ate maerekati kamakani atxaua, iuaritika itiretaua. ⁵ Ipïkani atoko anakasaaki, maerekatinoka akamakasaaki, iuasaaki itxïkitakaua auãki anini, Kristo auãki inïkitakini atoko. Iuasaaki imakatxakari amaerekani, kotxi inirekari ikinipoko erekari isikiniua. ⁶ Ininiã Teoso õkitikaua ipïkani sauaki aãuakasaaki, Kristo õkitikini atokokana. Ininiã itixineẽ Teoso takaua ate aïtopãkini Kristo Xesosikata, kotxi iua nakitiakori atxaua. ⁷ Ininiã katanarako ãtipirika inirekari oerekiniri ikinipoko erekari atemoni. Erekar isikakiti !ixipoka. !Kamapotõkireri. Kona erekaua, iuaritika iteene itiretaua, kotxi Xesosi Kristo nakitiakori atxaua. ⁸ Atemoni erekari isikakitinokara makatxakari amaerekani, isãkire aãuikasaaki. Ininiã !aposota ateka maerekani amakatxakini, kotxi maerekati kamakani atxaua. Teoso sikakitinokara makatxakari amaerekani. ⁹ Akamakiti erekari !iposotari amaerekani imakatxakini. Ininiã kãkiti iuikiniua !auari. Teosonokara posotari imakatxakiniri kãkiti maerekani. ¹⁰ Peerekari Teoso parïka aãkixinireẽ, kotxi ikamaua ate ereka anini. Ininiã Xesosi Kristo nakitiakori atxaua. Ikara iparïka amaneri. Ikamaua ate amaneri anini, erekari akamini

ĭkapani. Ikara ikamini apisapanika Teoso xinikari ikara. Iuasaaki inirekari erekarinoka akamini.

Kristo Nakitiakori Ātika Nirimanetxi

¹¹ Xoteo minakaniua hĭtxaua, kotxi ikara atoko hĭponaniā. Teoso takaōtxikare auaĭtotakini takauākatai hĭte: “Teoso takaōtxikare mauaĭtotakini.” Xoteoakori auari ikara Teoso takaōtxikare, kotxi ikisauakarina amarini tsiki mata axapiti. Ikara oerekari Teoso nakitiakori ininiuana. ¹² Hĭxinikariko mitxi, Kristo sākire hāuikini apisa, Kristo !auari hĭtemoni. Iuasaaki maparakini atoko hĭtxaua. Isaeokini !hĭtxaua. Ātiāo hĭtxaua. Ikara xika kona hĭte posotari hāpakapiniri Teoso sikaenetakiti iuasaaki. Iuasaaki !himarotari Xesosi makatzakiniri himaerekani. Iuasaaki !himarotari Teoso.

¹³ Uatxa Kristo Xesosi apakapapekai hĭte. Mitxi ĭtakoxiti auakani atoko hĭtxaua, iuaritika uatxa iua minai hĭte Teosomoni, kotxi Kristo arēka xiketa hĭte ĭkapani.

¹⁴ Iuanokara kamaerekaxiniretaua, ininiā ixipokari Xoteo, Xoteo minakaniua pakini omanatakakiniua. Ikara omanākaretxi paretxi atoko itxa. !Auiritari Xoteo sini Xoteo minakonimoni. Uatxa ātika nirimanetxi atxaua. ¹⁵ Kristo ipĭkasaaki, ixipokari ikara omanākaretxi, kotxi iuasaaki ikamari ikinika paniātakori iōkatsopatakori ikinimane ĭkapani. Ikara Xoteoakorimoni sikakori. !Isikaāka Xoteo minakonimoni. Ininiā Kristo ipĭkasaaki, itxĭkitakana Xoteoakori, Xoteo minakaniua pakini ātika kākiti amaneri atoko inini. Neenamati !auaika, kotxi Kristo kamaerekaxiniretaua amakinika. ¹⁶ Ipinā aamina ĭpiriāmitakari nopini, ininiā iuasaaki iuaĭkana iminana Xoteoakori, Xoteo minakaniua pakini Teosomoni. Ātika nirimanetxi atoko iminana Teosomoni. Iuasaaki ixipokari Xoteoakori, Xoteo minakaniua omanatakakiniua. ¹⁷ Xesosi apoka ĭkorapokoriti Teoso iokanapirena erekari isāpiretiniri kākiti. Isāpiretari kākiti, Teoso omanatiniri kākiti imaerekani xika xipope, Xesosi sākire auikasaakina. Isāpiretai hĭte Xoteo minakaniua. Apaka isāpiretari Xoteoakori. Mitxi ōtakoxiti auakani atoko hĭtxaua, kotxi iuasaaki ! himarotari Teoso sākire. Mitxi Xoteoakori imarotari Teoso sākire, ininiā Teoso takote auakani atoko itxauana. ¹⁸ Erekari Matamatakoti ātinoka aua. Kristo sākire aāuikasaaki, iua Erekari Matamatakoti anikaua aĭri Teosomoni. Anikari Xoteoakori, Xoteo minakaniua pakini iuamoni.

Teoso Aapoko Atxaua

¹⁹ Uatxa Teoso mimarotakani !hĭtxaikaua. Uatxa āti uāka !hĭtxaikaua. Teoso tixine auakani hĭtxaua, apanakini Teoso sākire auĭākanikata. Iua aapoko auakani hĭtxaua.

²⁰ Teoso aapoko atoko atxaua. Aapokotxi kamaāka kaikori nopini imirikakani ĭkapani. Xesosi moianariakori tosi pakini, iua iokanatakini kākitimoni, ninoā sāpiretakiti iua kaikori atoko itxa. Kitxakapirĭka Teoso sākire sāpiretakani sāpiretakiti apaka iua kaikori atoko itxa. Aapokotxi aua ātika kai mitari, apanakini kai soro maĭkakari. Xesosi Kristo iua kai mitari atoko itxa. ²¹ Ininiā iua maĭkaua. Iuakata aāua, ininiā kākiti itoāpotari auikiniri Xesosi sākire. Apiananiri aapoko aneeāpotini atoko itxa. Iua Apiananiri aapoko atoko atxa. Imisākiretiko aikoti atoko atxa. ²² Ininiā iua apotiitai hĭte hĭkinika iua aapoko hininiua ĭkapani, kotxi Teoso auiniātaā hĭtxaua. Erekari Matamatakoti auiniātaā hĭtxaua apaka.

3

Paoro Sāpiretari Teoso Sākire Xoteo Minakonimoni

¹ Ikara atoko ininiā, nota Paoro kateia āki naua, hĭte Xoteo minakaniua Xesosi Kristo sākire nisāpiretini xika. Kateia āki naua, kotxi nauikari Xesosi sākire.

² Hĭkenakopiretipekari parĭkatxi Teoso sikakiti notamoni, isākire Xoteo minakaniua nisāpiretini ĭkapani. Ikinipoko erekari isika notamoni, hĭte nisāpiretini ĭkapani. ³ Teoso oerekapekano kākiti mitxi mimarotakiniti. Mitxi axapitiki ikara Teoso oerekakiti

niõkatsopatapeka hĩtemoni. ⁴ Uatxa ia hātatsopatakasaaki, hĩposotari himarotiniri nimarotakiti, kākiti mitxi mimarotakiniti, Kristo parĩka kākiti ĩkapani. ⁵ Kitxakapirĩka kākiti kona imarotari ikara Kristo parĩka kākiti ĩkapani. Uatxa Erekarĩ Matamatakoti oerekari ikara Xesosi iokanatakinimoni. Apaka oerekari ikara Teoso sākire sãpiretanimoni. Teoso parĩkanoka ikamana ninoa. ⁶ Nisãpiretai hĩte kākiti mitxi mimarotakiniti. Xoteo minakanuia apakapariko Teoso nĩkatakiti itixineẽ, Xoteoakori apakapiniri atokotxikana. Xoteo minakanuia, Xoteoakorikata Kristo ĩto atoko itxauana. Xoteo minakanuia apakapariko Teoso sikaenetakiti, Xoteoakori apakapiniri atokotxikana. Teoso iokanapirena erekari sãpiretari kākiti isikaenetakiti, kotxi isikari Kristo, Xoteoakori maerekani, Xoteo minakanuia maerekani apaka imakatzakini ĩkapani. Ikara kākiti mitxi mimarotakiniti.

⁷ Teoso iokanatanano nota kãkitimoni iua iokanapirena erekari nisãpiretini ĩkapani. Ikara parĩkatxi isikano, kotxi ikinipoko erekari Teoso sikano nota iposotiireẽ. ⁸ Itomaneri Teoso nakitiakori poiãorini, iuaritika nota poiãori nininiua atoko inakari !auari. Iuaritika Teoso sikano ikinipoko erekari, kotxi iokanatanano Xoteo minakonimoni erekari Kristo auakiti nisãpiretinina ĩkapani. Ikara erekari !ixipoka. Itori. !Kimarotikori ikinipoko erekari Kristo auakiti. ⁹ Apaka Teoso nirekari noerekiniri ikinimane, ikara mitxi imimarotakiniti, Teoso nakitiakori tiretakakiniua. Itixi kamikosaaki, Teoso kipatari ikara kākiti mimarotakiniti. Ikipatiniritika uatxa ikara noerekari ikinimane. Teoso kamakasaakiri itixi, Xesosi Kristokata ikamari ikinipoko. Mitxi kona xatiki !auari. ¹⁰ Uatxa Teoso nirekari imereẽkini oerekiniri ikinipoko Teoso imarore auĩtetxiakori matamatakonimoni, Teoso tixine auakanimoni. ¹¹ Itixi kamiko apisapanika, ãtipirika Teoso nirekari aãũte Kristo Xesosi kaminiri ikinika inirekakiti kākiti ĩkapani. ¹² Kristo kamakiti ate ĩkapani aãuikiniã, aposotapitikari aãpokini Teosomoni, ininiã !kapĩkareua Teosomoni aãpokini. Ataparaxinireritika asari iuamoni. ¹³ Ininiãkara nõtãkikai hĩte. !Hĩmatinaniuatape nimisiritiko xika. Nimisiritaãka hĩte ĩkapani, Xesosi sākire hãuikini ĩkapani, ininiã hũikariko nimisiritiko. Teoso auiritari nimisiritiko, kotxi iua iteene tiretai hĩte.

Iuaĩkana Paoro Misãkiretiniri Teoso

¹⁴ Teoso nirekakiti kākiti ĩkapani nixinikasaaki, nikapotoreẽkaua aãũte Xesosi Kristo iri apisatoõ, nimisãkiretiniri ĩkapani. ¹⁵ Ikinimane Teoso nakitiakori, itixine auakani, apaka ikinimane ĩkorapokoriti auakani apakapari iua uãka. ¹⁶ Ia atoko nimisãkiretari Teoso hĩte ĩkapani: “Peerekai pite. Ikinipoko erekari aua pitemoni. !Ixipoka ikara erekari. Ininiãkara, pisikaposotiiretana Épeso auakani ãkixinire. Ninirekari Erekarĩ Matamatakoti iteene sikataparatinina ninoa ãkixinire. ¹⁷ Ninirekari iteene auikinirina Kristo sākire, ininiã Kristo auapika ãkixinireẽna. Ninirekari ninoa iteene imarotiniri pite tiraõki. Takari kotsa kipatxi erekari ãki auini atokokana, ninirekari ninoa kaikotini pitekata pitiraõki sikataparatinina ĩkapani. Imarotiniãrina pitiraõki, !irikana. !Ikamarina maerekati. ¹⁸ Ninirekari ninoa, pinakitiakori, apanakini pinakitiakori pakini, imarotiniri Kristo tiraõki kākiti ĩkapani, kotxi Kristo tiraõki !ixipoka. !Kaiãotikori iua tiraõki. ¹⁹ Kākiti kona posotari imarotiniri ikinika Kristo tiraõki. Ninirekari ninoa Épeso auakani apakapiniri ikini sereti erekari pisikakiti ãkixinireẽna, pite atão imarotininina ĩkapani.” Ikara atoko nimisãkiretari Teoso hĩte ĩkapani.

²⁰ Ininiã uatxa maxinikariko iua. Kaposotiireri apiatakari itxaua. Ikinipoko iposota ikamini. Imaposotakiniti !auari, ininiã ikinika aamanaãkiti, ikinika axinikakiti pakini, iposota ikamini. Ari, apikomoni iposota ikamini ate ĩkapani. Axinikakiti, aamanaãkiti poiãoka. Apiata iposotiire. Iua posotiire parĩkauata aãkixinireẽ. ²¹ Ininiã Teoso mereẽkini kitxakapirĩka auakani, uatxa auakani, katana auakani pakini ãtipirika txariko Teoso: “Peerekai pite. Apiananiri pitxaua.” Ikara atoko itxana, kotxi Xesosi Kristo makatzakari amaerekani Teoso anaakori aniniua ĩkapani. Ameẽ.

4

Xesosi Auiākani Ātika Īto Atoko Itxauana

¹ Kateia āki naua, kotxi nauikari Apiananiri sākire. Ininiā nota iteene ōtākikai hīte ikiniōtika atāo hīkamini, kotxi Teoso akiritai hīte iua anaakori hininiua ĩkapani. Ikara atoko hininiā, iua kamakiti atokokana hīkamako. ² Ininiākara ! hīuikapeua. ! Hinirekapiri hinirekakitinoka hīkamini. Hāuiritariko āti kaminiri iua nirekakiti. Katima homanākarauataka ! hītxapeko. Himīteenekakakauako hīkerokasaakiri hīkamakiti. Hītiretakakauako. ³ Erekarī Matamatakoti txīkitakari axinikakiti, anireēkiti pakini ātinoka inini, kotxi iua kamaerekaxiniretaua. Ininiākara hīparīkauatako ikara atoko auini ĩkapani. ⁴ Xesosi ĩto atoko atxaua. Ātika ĩto, ininiā ĩtotxi ātika atoko atxaua. Erekarī Matamatakoti ātinoka aua. Teoso akiritakasaakii inakitiakori hininiua, hiātapariko hāpokini iua tixine iuakata hāuini ĩkapani. Ininiā ātinoka hiātapakiti. ⁵ Ātinokara Apiananiri aua. Ātinokara aāuiākiti sākiretxiti aua. Ātinokara apatxisatiko. ⁶ Ātika Teoso aua. Iua ikinimane iri ātika aua. Iua ikinimane apisatoō apiatakari itxaua. Ikini itixiti iua aua. Amakinika aākixinireē iua aua.

Teoso Sikakiti Atemoni

⁷ Kristo sikapekari iposotiire ate amakinimoni iparīka akamini ĩkapani. Iposotiire isikaua aparīka akamini ĩkapani. Aparīka pamimari, ininiā apiata isika iposotiire atemoni. ⁸ Kotxi Teoso sākire kitxakapirīka txari:

Ikanīkasaaki itixinemoni, imikanapiriāna kākiti mitxi imokaiakari maīkakini. Iuasaaki isikari erekari kākitimoni.

⁹ Iua kanīka, kotxi mitxipe iua katxaka itixi patapixiti ipīkani auiniātaā. ¹⁰ Iua itixi patapixiti katxakakari, iuatxikana kanīka iaxiti apiko nopinixiti, ininiā uatxa iua aua ĩkini itixiti, iaxiti, Teoso tixine pakini. !Auari iua mauakaniātaā.

¹¹ Iposotiire isikasaaki isākire auiākanimoni, isikari ia atoko parīkauatakani ininiuana ĩkapani: Kristo iokanatakini kākitimoni, Teoso sākire sāpiretakani, Teoso iokanapirena erekari sāpiretakani, Teoso nakitiakori ōtākikakani, Teoso sākire oerekakani pakini isikaua. ¹² Ikara atoko isikaua, kotxi inirekari ninoa oerekiniua inakitiakori iparīka atāo akamini ĩkapani. Ikara atoko isikaua, kotxi ninoa sikataparaxiniretaua. ¹³ Ninoa sikataparaxiniretiniritika ātika aāuiākiti auako. Ipinimoni inakari aāuiākiti !auaika, kotxi atāo aimarotariko Teoso ākiri sākire. Ininiā kiīkiteua, kimaroreua iuasaaki. Kristo atoko atxauako, kotxi paimatireri iua.

¹⁴ Ininiā iuasaaki amarini atoko ! atxaikaua, kotxi amarini ! imarotari atāo inakari. Tsakati anikakiti atoko, ĩtima anikakiti atoko itxana kākiti kamisirienereri sākire auiākani. !Imarotarina atāo Teoso sākire. Ninoa kamisirienereri xinikaxitita atāo minakati oerekini ĩkapani. ¹⁵ Atāo inakaranoka asāpiretako kākiti atiraōkiritika. Ikara atoko akaminiā, aimarore aneeāpota. Kristo sākire iteene aāuikaāpota. Erekarī akamakiti aneeāpota. Ininiā Kristo atoko atxaua, kotxi iua ĩto atokotxikana atxaua. Ate kii atoko itxaua Kristo. ¹⁶ ĩtotxi kamari ikii paniātakiti. Iua atokokana ate kamari Kristo paniātakiti. Ininiā aāpotiitaua. Amoianatakakaua Kristo parīka akamini ĩkapani, kotxi ĩtotxi ātika atoko atxaua. Kristo sikataparataua amoianatakakiniua. Ininiā ikinika Kristo nakitiakori atāo parīkauatiniā iua ĩkapani, apiaāpota aimarotari iua imarore atāo akamini ĩkapani. Akinika atāo aparīkauatiniā Kristo ĩkapani, ikamataparaxiniretaua. Iuasaaki atiretakakaua. Iuasaaki ĩtotxi erekari, mamianatakati atoko itxaua Kristo nakitiakori.

Aāuini Amaneri

¹⁷ Ikara atoko ininiā, ia nisāpiretai. Apiananiri imaroreē iteene nōtākikai. ! Hīkamapinikariko apanakini Xoteo minakaniua kamakiti atoko. ! Kiīkiteri ninoa kamakiti. ! Kiīkiteri ixinikakitina. ¹⁸ !Imarotarina atāo inakari. Mapiāri atoko itxa ĩkitena. Ikara atoko ininiā, !kimarorena. Teoso !itxīkitakana auapininiika ininina, kotxi

ãkixinireëna !inirekarina atão inakari imarotinina. ¹⁹ Ninoa ãkixinire ãpatapeka, ininiã ! ipêtauatana maerekati ikamakasaakina. Ininiãkara ninoaka sikaua Satanasimoni iitona nireëkitinoka ikaminina ïkapani. Ininiã ikamarina ikinika maerekati. Itori maerekati inireka ikaminina. !Inirekarina iotokakinirina ikara maerekati ikaminina.

²⁰ Hïtepekana, ikara maerekati !hõerekaãka, Kristo himarotakasaaki. ²¹ Iuasaaki hïkenakotapitikari iua sãkire. Iua oerekai atão inakari, kotxi Xesosi imarotari ikinipoko atão inakari. ²² Hõerekaãka hïtakanapiniri maerekati mitxi hïkamakiti, hïxinikakiti pakini. Himãka kitxakari hõkini atokokana hïtxapaniko himaerekani hïtakanapini. Hïtakanapariko ikara kitxakari hinireëkiti, kotxi ikara maerekati hinireëkiti misirienetai. ²³ Ininiã eereka hamanaãriko Teoso txïkitakiniri hïxinikakiti, hinireëkiti pakini amaneri inini. ²⁴ Ininiã himãka amaneri hïeretakini atokokana, amanerinoka atão inakarinoka hïkamako, kotxi Teoso txïkitakai hïxinire amaneri inini, Teoso atoko hinini ïkapani. Ininiã atão inakari himarota. Erekarinoka hïkama. Teoso ïkapaninanira hïparïkauatako.

²⁵ Ininiã aãpirena kona hïkamape hïtariakorimoni. Atão inakarinoka hïsäkiretako, kotxi amakinika ate ätika ïtotxi atoko atxaua. ²⁶ Hinaiatakasaakia, !hãuiritapiri homanãkare txïkitakinii maerekati hïkamini. Himakini apisapanika, hïtokakariko homanãkarauatini. ²⁷ Ikara homanãkare himatakanapanisaaki, hãuiritari Satanasï txïkitakinii maerekati hïkamini, ininiã !hãuiritapiriko iua.

²⁸ Atxiïti hïtiriatapeka, ininiã !hïtiriatapinikako. Hïparïkauatako. Erekarï parïkatxi hïuakoã hïkamako, hïparïka ïki hãpakapini ïkapani. Ininiã eereka aua minakati hïtemoni, kãkiti minakati mauinakinimoni hïsikini ïkapani. ²⁹ Maerekati säkiretxiti !hïsäpiretapiri kãkiti. Erekarinoka hïsäpiretako, hïsäkire kenakotakani hïsikataraxiniretini ïkapani, ikinipoko erekari Teoso sikakiti ninoa apakapini ïkapani. ³⁰ Kona hïkamamatinanitapiri Erekarï Matamatakoti Teoso nakiti himaerekani xika. Erekarï Matamatakoti Teoso takaõtxikare itxaua. Teoso sikapekari iua atemoni, ininiã aimarotapitikari aãpakapiniri ikinipoko Teoso sikaenetakiti Kristo uai kanapiriãkasaaki. Iuasaaki imakatzakaua ikinika maerekati auiniãtaã. ³¹ !Hinïkatapiri homanãkare hãkixinireë. Katima na-iataka !hïtxapeko. Ätipirika apanakini homanatini, hïtakanapako. !Hïtxitapiri äti. !Himisãkirepiretapiri äti. Ikini sereti maerekati ikara atoko inakari hïtakanapako. ³² Erekarï hïkaminakakauako. Hiamonïkakuako. Himaxinïkaretariko maerekati äti kamakiti hïtemoni, maerekati ate kamakiti Teoso maxinïkaretini atokotxikana. Teoso maxinïkaretari amaerekani, kotxi Kristo ipina ate ïkapani.

5

Hïtiraõkiuatako Ikinioëtika

¹ Teoso anaakori itiretakini hïtxaua, ininiã hïkamariko Teoso kamakiti atokotxikana. ² Hïtiraõkiuatako ikiniõtika, Kristo tiretiniua atokotxikana. Iuaka isikaua Teosomoni, kotxi ipina ate ïkapani. Teoso apokaerekatari Kristo ipinini ate ïkapani. Peerekari isikiniua Teosomoni.

³ Teoso nakitiakori hïtxaua, ininiã kona ninirekarï nikenakopiretiniri pïtaniri minakotikatika, pïtanoro minakotokatika pisirïkini. !Apakata maerekati hïto nireëkiti hïkamini. !Apakata maerekati hïto nireëkiti hïxinikini, hïsäpiretini. Ikara hïxinire txikotakari hïtakanapako. Txineiro potxitakani !hïtxapeuako. ⁴ !Hïsäpiretapiriko säkiretxi maerekati. Säkiretxi mükiteti apaka !hïsäpiretape. !Hinapetapiri äti. Hïsäkirauatakasaaki, hïtxariko: “Peerekari Teoso, kotxi isikaua ikinipoko erekari.” ⁵ Aimarotari ia: ïtanoro minakotokatika sirïkakari, maerekati iïto nireëkiti kamakari, txineiro potxitakani pakini !iteosonetari Teoso. Teoso kamakori misãkiretakani atoko itxana. Ikara atoko inakani !apakapari Teoso sikaenetakiti iua anaakorimoni, Kristo, Teoso pakini auïtetxi ininiãtaãua.

⁶ Kona hãuiritapiri kãkiti misirienetini hĩte miĩkiteti sãkiretxitiã. Kona !hãuikapiri ninoã sãkire, kotxi ikara atoko inakari maerekati xika, Teoso misiritariko isãkire makĩpitakani. ⁷ Ininiã ikara atoko inakani moianariakori !hĩtxapeuako.

Pokamara Atoko Hĩtxaua

⁸ Mitxi hĩte mapiãri atoko hĩtxa, kotxi !himarotari Apiananiri iusaaki. Uatxa hĩte imarotapitikari iua, ininiã pokamara atoko hĩtxaua. Ininiãkara erekarinoka hĩkamako ikiniõtika. ⁹ Erekariki Matamatakoti auakasaaki kãkiti ãkixinireẽ, erekarinoka inireka ikamini. Atãonoka ikama. Atão inakarinoka isãpireta. Ikara atoko inakari Erekariki Matamatakoti sikakiti. ¹⁰ Hinitariko Apiananiri nireẽkiti hĩkamini ĩkapani. ¹¹ Ikara atoko ininiã, kona himoianatapiri kãkiti maerekati kamakani, kotxi ikara parĩkatxi ipiaã potarikakari. Ikara atoko inakari parĩkatxi !iminari erekariki atemoni. Ininiã maerekati !hĩkamape. Ia hĩkamako. Hõerekariko kãkiti maerekati makamakani. ¹² Apẽtauata asãpiretiniri Teoso sãkire makĩpitakani kamakiti ipiaã, kotxi apia maerekati ĩkora. ¹³ Ikinika tirikapi kamara auiniãtaã atamataãka, ¹⁴ kotxi tirikapi iopinikari ikinika. Ininiã ãti txari: “Himereka, imakakani atoko inakanii. Hõkitikauako ipĩkani atoko inakanii. Ininiã iusaaki Kristo iopinikariko hãkixinire.”

Miĩkiteti !Hĩtxapeua

¹⁵ Erepaniko. Atão inakari hĩkamako ikiniõtika. !Hĩkamapiri miĩkiteti kamakiti atoko. Hĩkamariko kãkiti kiĩkiteri kamakiti atoko. ¹⁶ Hĩkamariko erekariki, kotxi poiãonoka hãuini. Hĩkamariko erekariki ikiniõtika, kotxi maerekati auapitika ĩkorsasaaki. ¹⁷ Ininiã miĩkiteti !hĩtxapeua. Himarotariko Apiananiri nireẽkiti.

¹⁸ Kona hiãtaperõ iãriã kapõãro hĩpoãtini ĩkapani, kotxi itxĩkitakai maerekati hĩkamini. Hãuiritariko Erekariki Matamatakoti txĩkitakinii erekarinoka hĩkamini. ¹⁹ Hĩsãpiretakakaua xikari Teoso ĩkapani, xikari kitxakari, xikari ĩkorapokoriti auakari pakini. Hĩxikaretari ikara atoko inakari xikari Teoso ĩkapani. Hãkixinireẽ apaka hĩxikarauata Teoso ĩkapani. ²⁰ Ætipirika hĩtxariko aĩri Teoso: “Erekapitikai pite, kotxi erekariki ikinipoko pisikakiti atemoni.” Xesosi Kristo aãũite ininiua, asãpiretari Teoso ikara atoko inakari.

Tanorotxi Pirena.

²¹ Hĩpaxitakakauako, ãti nirekakiti hĩkamini, kotxi hĩpĩkariko Teoso manirekakiniti hĩkamini. ²² Ininiã hĩte sitoakoro hĩkamariko hĩtaniri nireẽkiti. Apiananiri nireẽkiti hĩkamini atokokana hĩkamariko hĩtaniri nireẽkiti, ²³ kotxi pĩtãniri pikii atoko itxaua. Ininiã iua piauĩte itxaua. Iua atokokana Kristo inakitiakori kii atoko itxaua Kristo. Iua ĩto atoko atxaua. Aãũite itxaua. Amaerekani makatxakakari itxaua. Ininiã sito kamariko oĩtaniri paniãtakiti. ²⁴ Ininiã kãkiti Kristo nakitiakori kamari Kristo nireẽkiti. Iua atokotxikana sito kamariko ikinipoko oĩtaniri nireẽkiti.

Taniritxi Pirena

²⁵ Hĩte taniritxi, hĩtiretaroko hĩtanoro. Kristo tiritinina inakitiakori atokokana, hĩtiretaroko hĩtanoro. Iua iteene tiritana, kotxi ipina inakitiakori ĩkapani. ²⁶ Iua ipina, kotxi inirekariki itxĩkitakiniiua ate iua nakitiakori aniniua. Inirekariki imaktxakiniri amaerekani. Æparaã makatxakiniri aĩto txiko atokokana, iua sãkire makatxakari amaerekani aãkixinireẽ auakari. ²⁷ Kristo ipina inakitiakori ĩkapani, kotxi inirekaua iposope anini ate apakapini ĩkapani. Iusaaki peerekaua. Ætika amaerekani !auaika. Ætika akerokakiti !auaika. Ikara atoko inakari maerekati !auaika. Iusaaki atão Teoso nakitiakori atxaua. Erekarinoka akama iusaaki. ²⁸ Ikara atoko ininiã, kiki tiritaroko ĩtanoro, ĩto itiritini atokokana. ĩtanoro tiritakari iuaka itiretaua. ²⁹ Kãkiti !omanatari iuaka ĩto. Isikakienatari. Itiretari. Apiananiri tiritiniri inakitiakori atokokana, kãkiti tiritari iuaka ĩto. ³⁰ Apiananiri ĩto atoko atxaua. Ixini atoko atxaua. Api atoko atxaua. Ikanoke atoko atxaua. Iuako atoko atxaua. Itxããpota. ³¹ Iua ĩto atoko atxaua, ininiãkara kiki ĩtanorouatakasaaki, itakanapana iri, inoro pakini ĩtanorokata ikaikotini ĩkapani. Ininiã

ãtinoka ïtotxi atoko itxauana. ³² Nisãpiretai mitxi !kimarotikori. Kristo inakitiakorikata ãtika ïtotxi atoko itxauana. Kãkiti !imarotari ikara mitxi. ³³ Ininiã pitiretaroko pïtãnororo piteka ïto pitiretini atokokana. Pite tanorotxipekana, pipaxitariko pïtaniri.

6

Amarini Pirena

¹ Hïte amariniakori, hïkïpitanako hïri, hinoro pakini sãkire, kotxi ikara Apiananiri paniãtakiti. Atão pikïpitanako ninoa sãkire. ² Kitxakapirïka Teoso sãkire paniãtaua: Hïpaxitanako hïri, hinoro pakini.

Ikara Teoso paniãtakiti hïkaminiã, Teoso sikaenetakiti isika hïtemoni. Mitxi Teoso paniãtakiti !auari Teoso sikaenetakiti.

³ Hïri, hinoro pakini sãkire hïkïpitiniã, ia isikaenetakiti apokapitikako hïtemoni. Hïkïpitiniãri ninoa sãkire, erekari hãuini. Hïkïpitiniãri ninoa sãkire, hãuiniritika kiomãtxi hïtxauako.

Irïtxi Pirena

⁴ Hïtepekana irïtxiakori, kona hïtxïkitakapena hamariteakori omanãkarauatini atão minakati hïkamini xika. Hõerekanako Apiananiri nireëkiti ikaminina. Hõerekanako Apiananiri sãkire imarotinina.

Nitiritxi Pirena

⁵ Hïtepekana nitiritxiakori amotakoni, hïkamariko hïauïteakori ïkorapokoriti auakani paniãtakiti. Hïpaxitanako ninoa. Hïpïkariko ninoa manirekakiniti hïkamini. Hãkixinireë hinirekariko ninoa nireëkitinoka hïkamini. Kristo paniãtakiti hïkamini atokokana, hïkamariko ninoa paniãtakiti. ⁶ !Hïparïkauatapeko hïparïka erekari apanakini atamatini ïkapani ïkapani, kotxi iuasaaki hinirekari ninoa poxokotini. Kristo nitiriakori hïtxaua, ininiã hïparïkauata Teoso nireëkiti hïkamini, kotxi hãkixinireë ikaranoka hinireka hïkamini. ⁷ Hïkamariko hïparïka ikinika hïpoxokoniritika, hinirekiniritika. Apiananiri ïkapani hïparïkauatini atokokana, hïparïkauatako hïauïte ïkorapokoriti auakari ïkapani. ⁸ Kotxi himarotari Apiananiri sikariko parïkatxi ïki kãkitimoni, ikinipoko erekari ikamakiti ïki. Nitiritxi iamotakoni, apaka nitiritxi miamotakoni Kristo nakitiakori apakapariko erekari ikamakitina ïki.

Patrão Pirena

⁹ Hïtepekana patrão, ia atoko inakari hïkamako hinitiriakorimoni. !Hïtxapiri hinitiriakori: "Ikinika nota paniãtakiti himakamakaniã, iteene nimisiritai hïte," kotxi hïte patrãote aua apaka iaxiti. Iua Teoso. Teoso kamakiti poiãorimoni, iua atokotxikana ïkamakiti auïtetximoni.

Kãkiti Xinire Tokapare

¹⁰ Nitariakori, ia nisãkire mapotõkire: Katapara hïtxako. Hïkosekataparatariko Apiananiri tapara, kotxi kaposotiireri iua. ¹¹ Sotato ieretakari ïto tokapare, neenamatzxi ikamini apisapanika. Iua atokokana Teoso sikaua axinire tokapare, ininiã maeretakariko ikinika ikara axinire tokapare, kotxi neenamatzxi auapitika Satanasikata. Iua paimatireri. Ixinikaxititapekari itxïkitakiniua maerekati akamini. ¹² !Aneenamauata kãkitikata. Aneenamauata maerekani matamatakoni auïteakorikata, ikinika maerekani matamatakoni kaposotiirerinkata. Aneenamauata auïtetxiakorikata ïkorapokoriti ipiãã auakanikata. Aneenamauata ikinipoko maerekani matamatakoni iaxiti auakanikata.

¹³ Ininiãkara hïeretakariko ikinika Teoso sikakiti hïxinire tokapare. Ininiã maerekati apokasaaki, !inokai. Kona hïrika. Kona himiteka. Hïokanataro Satanasini. Hïte kãiata.

¹⁴ Sotato iposope ineenamauatini atoko hïtxako. Sotato takari ipakiomatare. Ipakiomatare maïkari ikinipoko ïto tokapare. Sotato pakiomatare atoko itxa hïxinire tokapare maïkiko. Atão inakari sãkiretxiti itxaua iua. Ininiã hïtakariko ikara hïpakiomatare.

Sotato takari itorota koana, itorota tokapare ĩkapani. Sotato torota koana atoko itxa hĩkamakiti atão inakarínoka. Ininiã hĩretakariko ikara hĩtorota tokapare.

¹⁵ Sotato kiti apaka iposope ineenamauatini, kotxi itakari ikiti mata ikiti tokapare ĩkapani. Sotato kiti mata atoko itxa Teoso iokanapirena erekari aanikapiretakiti kãkitimoni. Ikara iokanapirena sãpiretaua Teoso !imisiritaikaua, isãkire aãuikasaaki. Ininiã hĩretakariko ikara hĩkiti mata.

¹⁶ Sotato maĩkari itokapare, iĩto imokaiakari xiripi minokakani ĩkapani. Xiripitxi tirinakari itokaparemoni apokasaaki, oaka. Iua tokaparetxi atoko itxa Teoso sãkire auikiko. Iteene hãuikiniãri Teoso sãkire Satanasi !iposotari inokinii maerekatiã. Ininiã himaĩkariko ikara tokaparetxi.

¹⁷ Sotato takari ikii tokapare metao kamakori. Sotato kii tãta atoko itxa amaerekani makatzakiko aimarotini. Ikara imaroretxi axinikakiti akii tokapare itxaua. Ininiã hĩtakariko ikara hĩkii tãta.

Sotato anikaro iouata mĩtaro. Oa iouata mĩtaro atoko itxa Erekari Matamatakoti sãpiretiniua Teoso sãkire. Ininiã himaĩkaroko oa iouata mĩtaro.

¹⁸ Himisãkiretariko Teoso ãtipirika. Hamanaãriko, Erekari Matamatakoti nireẽkiti iaõka hãpakapini. Araõkire hĩtxako. !Hĩtakanapapiri hĩsãkirauatini Teosokata. Hamanaãriko Teoso, ikinimane inakitiakori nireẽkiti isikinina.

¹⁹ Himisãkiretari Teoso nota ĩkapani apaka. Hamanaãri Teoso, isãkire isikinino nisãkirauatakasaaki, nitaparaxinireritika nisãkirauatini ĩkapani, kotxi ninirekari Teoso iokanapirena erekari nisãpiretiniri kãkiti. Mitxi Teoso iokanapirena erekari !kimarotikori. ²⁰ Uatxa Teoso iokanatano nota kãkitimoni, iokanapirena erekari nisãpiretini ĩkapani. Ikara nisãpiretini xika, kateia ãki naua nota uatxa. Hamanaãri Teoso, isãkire nitaparaxinireritika nisãpiretini, kotxi ikara inakari nĩparĩka.

²¹ Niokanatarari Txĩkiko inakori hĩtemoni. Aĩtari atiretakiti iua. Apiananiri nitiri itxaua. Atão iparĩkauata Apiananiri ĩkapani. Iua sãpiretaiko hĩte nota pirena. Ikara atoko himarotariko nauini, nikamakiti pakini. Iua sãpiretai ikinipoko nota pirena.

²² Ininiã niokanatarari iua hĩtemoni ate pirena himarotini ĩkapani, isikataparaxiniretinii hĩte ĩkapani. ²³ Nitariakori, aĩri Teoso, Apiananiri Xesosi Kristo pakini kamaerekaxiniretai. Itiretaina hĩte. Itxĩkitakaina Teoso sãkire iteene hãuikini. ²⁴ Teoso sikari ikinipoko erekari aãũte Xesosi Kristo ãtipirika tiretakanimoni. Ameẽ.

PIRIPOSI

Paoro Iokanatsopatakiti Piriposi Auakanimoni

¹ Nota Paoro, Tximótxio pakini, Kristo Xesosi nitiriakori iua amotakini atxaua. Niõkatsopata ikini kãkiti Kristo Xesosi nakitiakorimoni, Piriposi sitatxiti auakanimoni aiokanapireta. Niõkatsopata hïte kõtãkikarerinimoni, kotxi hïte õtãkikana Xesosi sãkire auiãkani. Hïtepekana, kamiparïkarerini, niõkatsopata hïtemoni, kotxi hïte moianatana Xesosi sãkire auiãkani.

² Ereëkai hïte. Aïri Teoso, Xesosi Kristo Apiananiri pakini sikai ikinipoko erekari. Ninoa kamaerekaxiniretai.

Paoro Misãkiretari Teoso Piriposi Auakani Ìkapani

³ Hïte nixinikasaaki: “Erekapitikari aTeosone,” nitxa. ⁴ Teoso nimisãkiretakasaaki hïte himakinika Ìkapani, nipoxokoniritika nimisãkiretari Teoso. ⁵ Nipoxokoniuata, kotxi hïte miparïkatano nota Teoso iokanapirena erekari nisãpiretini Ìkapani, kotxi hïte iokanataro txineiro notamoni. Teoso iokanapirena erekari hãuikasaaki, hïpotorika himiparïkatinino. Eereka kona hïte iotokaika himiparïkatinino nota. Uatxa auapika himiparïkatinino nota. ⁶ Teoso sikari erekari hïtemoni merepanika isãkire hãuikasaaki, ininiã nota imarotapitikari Teoso sikari erekari hïtemoni ikiniõtika. Ikara Teoso parïka hïtemoni. Erekarisikiniritika Xesosi kanapiriã Ìkorapokoriti. ⁷ Atãopitika nixinikinii hïte nipoxokoniritika, kotxi iteene nitiretai hïte himakinika. Atxiïti kateia ãki naua. Atxiïti mapara naua, kãkiti Teoso iokanapirena erekari atão ininiua noerekini Ìkapani. Atxiïti nisãpiretari Teoso iokanapirena erekari, kãkiti iteene imarotiniri Ìkapani. Kateia ãki nauakasaaki, mapara nauakasaaki, ikiniõtika hïte notakata apakapari ikinipoko erekari Teoso sikakiti. ⁸ Nota iteene tiretai hïte. Kristo Xesosi tiretinii atokokana nitiretai hïte. Teoso imarotari ikara nisãkire atão inini.

⁹ Nota misãkiretari Teoso hïte Ìkapani ia atoko: Ninirekari hïtiraõkiuatini apiaãpotini ikiniõtika. Hïtiraõki aneeãpotakasaaki, ninirekari himarore apaka aneeãpotini. Imaroretxi himaroãpotakasaaki, ninirekari atãonoka himarotini. ¹⁰ Ikara atoko hininiã, himereëri apia erekari hïkamani. Ininiã maerekati !hïkama. Maerekati na apanakinimoni !hïkama. Ikara atoko hininiã, iposopeka hïtxa Kristo kanapiriãkasaaki. ¹¹ Ikara atoko hininiã, ikinipoko hïkamakiti erekari. Xesosi Kristonokara kamaerekatai hïte hïkamakiti ereka inini Ìkapani. Apanakini atamatakasaakiri erekari hïkamakiti, ninoa imarotari Teoso posotiire, ininiã eereka ninoa: “Peerekari Teoso,” itxanako.

Paoro Misiritiko Pirena

¹² Nitariakori, himarotari nota iteene misiritaãka. Iuaritika Teoso iokanapirena erekari iaripiretapeka. Ninirekari himarotiniri, nimisiritiko xika apikomoni kãkiti imarotari Teoso iokanapirena erekari. ¹³ Ininiã nimisiritiko xika ikinika sotatoakori, Homanoakori auïte aapoko inïkatakani, ikinimane kãkiti mapara auakani apaka imarotari nota uai kateia ãki nauakasaaki Kristo sãkire nisãpiretini xika. ¹⁴ Itori aïtariakori Apiananiri sãkire auiãkani, sikataparaxiniretaãka, kotxi imarotarina Teoso nïkatinino nota kateia ãki nauakasaaki. Ininiã ninoa sãpiretari Teoso sãkire itaparaxinireritikana. Mapïkaretika itxana.

¹⁵ Ninoa sãpiretari Kristo sãkire, kotxi inirekarina erekari ikaminina. Txamari apanakinipekana sãpiretari Kristo sãkire nota xikotiko xika. Inirekarina kãkiti auikiniri ninoaka sãkire, nota sãkire poiãoka auikinina Ìkapani. Ninoa sãpiretari Kristo iokanapirena, kotxi ninoa potxitari kãkiti taparakienatakakiniua. ¹⁶ Aïtariakori, erekaritanani nirekakani, sãpiretari Kristo iokanapirena, kotxi ninoa tiretano nota. Ninoa imarotari Teoso sikininota ia parïkatxi, Teoso iokanapirena erekari atão inini noerekini

ĭkapani. ¹⁷ Nota xikotakani sãpiretari Kristo sãkire, txamari inirekarina ninoaka nireẽkiti ikaminina. !Inirekarina Teoso nireẽkiti. Inirekarina nota apia atatsiitiniri nimisiritiko uai kateia ãki nauakasaaki.

¹⁸ Atxiĩti Kristo iokanapirena sãpiretakani ãkixinire erekari. Atxiĩti ninoa ãkixinire kona erekari. Iuaritika erekapitikari, kotxi Kristo iokanapirena sãpiretapeẽkaika. Ininiãkara nipoxokoniuaata nota. Ari, !niotokapani nipoxokoniuatini. ¹⁹ Nipoxokoniuaata, kotxi nimarotari nitakanapiniri kateia, kotxi hĩte misãkiretari Teoso nota ĭkapani. Nimakatzakaãkako kateia ãki, kotxi Erekari Matamatakoti Xesosi Kristokata auakari moianatano nota. ²⁰ Kona ninirekari nipẽtauatini, Kristo iokanapirena nisãpiretakasaaki. Ninirekari kataparaxinire ninini, Kristo apanakini nisãpiretini ĭkapani. Ikara atoko nininiã, apanakini imarotari Kristo Apiananiri ininiua. Ikiniõtika nauapanika ninakasaaki, ninirekari kãkiti imarotiniri Kristo Apiananiri ininiua. Ari, nipĩkasaaki apaka, ninirekari apanakini imarotiniri Kristo Apiananiri ininiua. ²¹ Auapanika ninakasaaki, ninirekari Kristo nireẽkitinoka nikamini. Erekapitikari nipinini, kotxi eereka Kristokata nauapika. ²² Auapanika ninakasaaki, niparĩkauatapitipo Teoso sãkire nisãpiretini, ininiãkara erekari niparĩka. Kipa ninireka? Nota auapanika nininikani? Nipininikani? !Nimarotari ninireẽkiti. ²³ Ninirekari auapanika ninini. Apaka ninirekari nipinini. Apiata ninirekari nipinini Kristokata nauini ĭkapani. Ikara atoko apiaerekata. ²⁴ Txamari hĩte noerekini ĭkapani, ninirekari auapanika ninini, kotxi hĩte nirekapanikano nota. ²⁵ Ikara nimarotapitika, ininiã auapanika nitxa, himakinika noerekini ĭkapani, kotxi nota nirekari himaroãpotiniri Teoso sãkire. Ninirekari hãuikiniri hĩpoxokoniritika. ²⁶ Ininiã eereka hĩtxari: “Erekapitikari Kristo Xesosi, kotxi Paoro iuaĩkana apoka atemoni,” hĩtxapaniko. Ininiã iteene hĩpoxokoniuaata iuasaaki.

²⁷ Atxiĩti auapanika nitxa, atxiĩti nipina, iuaritika ikiniõtika ereka hĩtxako hãuini. Erekari Kristo iokanapirena, ininiã hĩte apaka ereka hĩtxako hãuini. Atxiĩti nisa hĩtemoni. Atxiĩti kona nisa. Atxiĩti nikenakopiretai hĩte uai kateia ãki nauakasaaki. Iuaritika, hãuini ereka inakasaaki, nimarotariko hĩte himakinika iteene auikiniri Kristo sãkire iua iokanapirena erekari. Hãuini ereka inakasaaki, nimarotari hĩte himakinika sãpiretiniri Kristo iokanapirena iaõka apanakinimoni. ²⁸ Hãuini ereka inakasaaki, na hĩpĩkana hĩte omanatakani. Hĩtaparaxinireritika hãuiniã, ninoa hĩte omanatakani imarotari ixipokinina ãti õti. Hĩtaparaxinireritika hãuiniã, ninoa imarotari Teoso makatzakinii hĩte himapinakani ĭkapani. ²⁹ Ininiã Teoso sikari erekari hĩtemoni, kotxi iua auiritai hĩte auikiniri Kristo iokanapirena. Apaka erekari isikai hĩte, kotxi iua auiritai hĩte atatsiitiniri himisiritiko Kristo ĭkapani. ³⁰ Hĩte atamatapekari nota misiritiko, hĩte sauaki nauakasaaki. Hĩkenakopiretari nimisiritiko auapanika uatxa. Uatxa hĩte nota atoko, kotxi hĩte apaka misiritaãka.

2

Kristoka Poiãotakaua.

¹ Kristo sikataparaxiniretaua ate, iua nakiti aniniãua. Kristo mĩkapiritaua ate, amarini axapitiri inoro mĩkapiritini atoko itxa, kotxi iua tiretaua. ãtipirika iua Erekari Matamatakoti amoianari itxaua. Kristo iteene tiretaua. Iua amonĩkaua. ² Ininiãkara nota õtãkikai hĩte hĩkinika. Hĩxinikariko Teoso nireẽkitinoka hĩkamini, ininiã hĩxinikakiti ãtinoka txauako. Hĩtiretakakauako Teoso tiretinuia atokokana. Hinireẽkiti ãtinoka txauako. Ikara atoko hininiã, iteene hĩkamapoxokonitano nota. ³ Kona kapotxinaniri hĩtxapeua. ! Hĩuikapeua. Hĩteka minakati hĩtxauako. Hĩxinikariko: “Apanakini apiata, nota poiãoka”. ⁴ !Hĩxinikapiri pite nireẽkitinani. Himiparĩkatanako apanakini, ninoa nireẽkiti ikaminina ĭkapani.

⁵ Xesosi Kristo xiniãkitikanerako hĩxinikako. Kristo kamakitikanerako hĩkamako. ⁶ Teoso itxaua Kristo Xesosi, ininiã iposotari ipaniãtiniri ikinimane inireẽkiti ikaminina. ⁷ Iuaritika itakanapari auĩtetxi ininiua. Nitiritxi atoko itxapekaua. Iuaka minakati

itxĩkitakaua, kotxi kãkitipeka itxaua uai itixi iponaniãkasaaki. ⁸ Iuasaaki kiki inakasaakiua, iuaĩkana iuaka ipoiãotakaua, kotxi ikĩpitari Teoso sãkire ipininĩ ĩkapani. Imarotari okiko tĩkane, kokaniri okiko atoko inaãkako aamina ĩpiriãmitakari nopini. Iuaritika ikĩpitari Teoso sãkire ipininĩ ĩkapani. ⁹ Ikara atoko ininiã, Teoso txĩkitakari iua Apiananiri ininiãua. Āti iua atoko inakari !auari. Teoso takari iuãka. Āti uãka iua atoko inakari !auari, ¹⁰ kotxi kãkiti ikininape kenakotakasaakiri iuãka Xesosi, ikapotoreẽkauako Xesosi apisatoõ. Ikinimane Teoso tixine auakani, ikinimane itixi auakani, ikinimane ipĩkani auiniãtaã pakini kapotoreẽkauako Xesosi apisatoõ, kotxi iauĩtena itxaua Xesosi. ¹¹ Ikinipoko kãkiti txako: “Xesosi Kristo Apiananiri itxaua,” itxanako. Ikara atoko ininiã ikinimane: “Peerekari aĩri Teoso,” itxanako.

Iõriki Atoko Hĩtxako

¹² Ininiã nota tiretakini, hĩkĩpitariko nisãkire uatxa, mitxi hĩtekata nauakasaaki nisãkire hĩkĩpitini atokokana hĩtxako. Uatxa kona hĩtekataikano, iuaritika ninirekari apiata hĩkĩpitiniri nisãkire. Teoso makatxakapekari himaerekani itixine hĩsini ĩkapani, ininiãkara ikiniõtika hĩparĩkauatako Teoso ĩkapani. Hĩpĩkariko maerekati hĩkamini. Erekarinanira hĩkamapikako. ¹³ Hĩposotari ikara atoko hĩkamini, kotxi Teosokara moianatai hĩte. Iua kamanirekaretai hĩte iua nireẽkiti hinirekini ĩkapani. Iua sikaposotiiretai hĩte iua nireẽkiti hĩkamini ĩkapani.

¹⁴ Hĩparĩkauatakasaaki, !hĩtsoatape, !hĩtxitakapeua. ¹⁵ Ikara atoko hĩkaminiã, hĩkerokiniri !auari, himaerekani !auari, ininiã erekarinoka hĩkama apanakinimoni. Ininiã Teoso anaakori erekarini hĩtxaua. Kãkiti kamisirienererini sauaki hãuanãta hĩte. Kãkiti maerekani sauaki hãuanãta. Iõriki iopinikari iaxiti ĩkanõka. Iõriki atoko hĩtxako. Hĩopinikariko maerekati auiniãtaã, atão inakari kãkiti imarotini ĩkapani. ¹⁶ Hĩte iopinikari ipiã, Teoso sãkire apanakinimoni hĩsãpiretakasaaki. Teoso sãkire txĩkitakari kãkiti ãtipirika auãki inini tĩkane, Teosokata auini ĩkapani. Hĩte Teoso anaakori erekarini hininiãua, nota iuikaiko hĩte, Kristo uaimoni kanapiriãkasaaki, kotxi hĩte auikapekari Teoso sãkire nisãpiretakiti. Kona maxikatĩkani nĩparĩkauatapitipo hĩte ĩkapani, kotxi hĩte auikapekari Teoso sãkire nisãpiretakiti.

¹⁷ Atxiĩti nota okaãka Teoso sãkire nisãpiretini xika. Atxiĩti niarẽka oxikepoakataãka, Teosomoni sikakori atoko inakari, Teoso sãkire nisãpiretinii xika, Teoso sãkire hãuikini xika. Nokaãka atxiĩti, iuaritika nipoxokoniuata. Nipoxokoniuata hĩtekata. ¹⁸ Ininiã erekari hĩte apaka poxokoniuatini. Erekari hĩpoxokoniuatini notakata.

Tximótxio Pirena

¹⁹ Xesosi Apiananiri nirekiniãri nota iokanatiniri Tximótxio hĩtemoni, ininiã ma-paõtipeka inakasaaki niokanataru iua. Ininiã eereka iua minapiretari hĩte pirena, nota apaka poxokoniuatini ĩkapani. ²⁰ Āti Tximótxio atoko inakari uai !auari, kotxi iua iteene tiretai hĩte. Iua nirekari hãuini ereka inini. ²¹ Apanakini kãkiti xinikari ninoaka nireẽkitinoka. !Ixinikarina Xesosi Kristo nireẽkiti. ²² Himarotari iua Tximótxio parĩkauatape notakata, imi irikata parĩkauatakari atoko itxa. Iparĩkauata notakata Teoso iokanapirena erekari apanakini asãpiretini ĩkapani. Ininiãkara himarotari Tximótxio atamakaãkapeka, ininiã himarotari erekapitikari iua. ²³ Kiatokopa ninataãka? Uatxa !nimarotari. Nimarotakasaakiri, niokanataru Tximótxio hĩtemoni. ²⁴ Apiananiri kamaimaroretano nota, Tximótxio tikinimoni nota apaka apoka ereẽ hĩtemoni.

Epaparotxito Pirena

²⁵ Notamoni erekari iuaĩkana niokanatiniri hĩokanapirena mĩkari, Epaparotxito inakori. Hĩte iokanatapekari iua notamoni nota itiretini ĩkapani. Iua nitari atoko itxa. Imiparĩkatapitipono nota, Teoso iokanapirena asãpiretakasaaki. Iua, nota pakini sotato atoko atxaua, kotxi ate neenamauata Teoso ĩkapani. ²⁶ Iua ipiãtai hĩte hĩkinika. Iua maerekaxiniretinoka itxa, kotxi ikenakopiretari hĩte imaropiretiniri iua amianatini.

²⁷ Atãopitikara iua amianatapitika. Iua ipinaarita, iuaritika Teoso amonĩkari iua. Itxĩkitakari iua iuaĩkana ereka inini. Ininiã Teoso amonĩkano nota apaka, kotxi Epararotxito ipinaãkamako, apia maerekaxiniretinoka nitxamako. ²⁸ Ininiãkara iteene ninirekari niokanatiniri iua hĩtemoni, hĩpoxokoniuatini ĩkapani haõkitakasaakiri. Ikara atoko ininiã, nota maerekaxiniretinoka ninini !auaika. ²⁹ Ininiã hĩpoxokoniritika hãpakapariko iua, kotxi iua Epararotxito aĩtari itxaua, kotxi Apiananiri nakitiakori atxaua. Hĩpaxitariko kãkiti Epararotxito atoko inakari, ³⁰ kotxi Kristo ĩkapani iparĩkauatini xika ipinaarita. Iuaka monõkorimoni isa nota imoianatini ĩkapani, kotxi iua imarotari hĩte nirekapitika-mari himoianatinino, txamari !hĩposota himoianatinino, ininiã iua iteene moianatano.

3

Kiatokopa Kãkiti Atão Ereka Inini?

¹ Nitariakori, apikomoni nisãpiretai. Hĩpoxokoniuatoko, kotxi Apiananiri nakitiakori atxaua. !Nisãpaka iuaĩkana nisãpiretakitipeka nisãpiretinii hĩte. Iuaĩkana nõtãkikai hĩte, atão minakati himauikakani ĩkapani. ² Erepaniko kãkiti maerekati kamakani, atão minakati sãpiretakani, kotxi ninoa sãpiretari kãkiti: “Teoso takaõtxikare pĩtoã mauakaniã, kona Teoso nakiti !pitxaua,” itxana. ³ Ninoa auapitika Teoso takaõtxikare ĩtoãna, txamari kona Teoso nakitiakori !itxauana. Atera Teoso nakitiakori, kotxi atemoni aua atão inakari Teoso takaõtxikare ate ãkixinireẽ, kotxi Erekar Matamatakoti oerekaua amisãkiretiniri Teoso. Kristo Xesosinokara ate iuika. Aimarotari ateka kamakiti !itxa. Teoso kamakitinokara apakata.

⁴ Hĩuãkatari atxiĩti hĩte kamakiti ereka inini Teoso apakapinii ĩkapani? Konapitini. Nota kamakiti apiaerekata, iuaritika nikamakiti !txĩkitakano Teoso apakapinino ĩkapani. Hĩkenakotariko erekari nota kamakiti: ⁵ Teoso takaõtxikare nĩtoã takaãka oito õti nauakasaaki. Nirini, ninoroni pakini Xoteo itxauana. Natokiri kitxakapirĩka Pẽxamĩ inakori. Kitxakapirĩka natokiriakorini, nakiroakoroni pakini ikinika Xoteoakori itxauana, ininiã atão Xoteo nitxaua. Nota kĩpitari aũũteakori kitxakapirĩkarini paniãtakiti, kotxi nota pariseo nitxaua, ininiã Teoso sãkire iõkatsopatakori oerekakari nitxaua. ⁶ Nota iteene nirekari Teoso nireẽkiti nikamini, ininiã nimisiritari kãkiti Xesosi sãkire auiãkani, kotxi niuãkatari Teoso nirekari ikara nikamini. Aãtokiriakorini paniãtakiti ikinika nikĩpita. !Nikerokari.

⁷ Mitxi niuãkatari ikara atoko nininiã erekapitikari, ininiã, “Teoso apakapapitikano nota,” nitxa. Uatxa nimarotari Kristo, ininiã nimarotari mitxipe minakati nininiua nota. ⁸ Uatxa nimarotari niauĩte Kristo Xesosi. Ikara apiaerekata. Xesosi nimarotini apisapanika, nikamakiti !itxa xatiki. Nitakanapapekari mitxi nikamakiti. ! Itxaika. Mitxi nikamakiti itiki atoko, kotxi !niniãkari. Kristo nakiti uatxa nitxaua. ⁹ Nitakanapapekari mitxi nikamakiti Kristokata ãtipirika nauini ĩkapani. Nota kĩpitari Moisesini paniãtakiti. Ikara atoko inakarinani kona ereka txĩkitakano nota. Teosonokara kamaerekatano nota, kotxi nauikari Kristo sãkire. ¹⁰ Ninirekari Kristo iteene nimarotini. Ninirekari nimarotiniri Teoso posotiire, kotxi iposotiireẽ õkitikari Kristo, iuaĩkana auãki inini ĩkapani. Kristo atatsiirauatape, ininiã nota apaka nirekari natatsiirauatini atão imoianari nininiua ĩkapani. Ninirekari nota nireẽkiti ipinini, Kristo aamina ĩpiriãmitakari nopini ipinini atoko. Ninirekari Xesosi nireẽkitinoka nikamini, ininiã iua atoko nitxaua. ¹¹ Ininiã itixi xipokini õti Teoso õkitikanoko, iuaĩkana auãki ninini tĩkane.

Mitekakari Atoko Nitxa

¹² Ikara ikinika !nimarotapanika. Nimaroãpotapanikariko. Teoso kamapanikari iparĩka nota ãkixinireẽ. !Ixipokapanikari, ininiã !niotokakari niparĩka Teoso ĩkapani. Niparĩkauatapitipo. Mitekakari mitekini atoko, !niotoka. Mitekakari nirekari mitekaxi mapotõkire apokini. Iua atokokana nota nirekari niparĩka mapotõkire napokini, kotxi Kristo Xesosi mereẽno nota ikara atoko nikamini ĩkapani. ¹³ Nitariakori, niparĩka

mapotōkire !napokapanika. Ia nikamako: !Nixinikaikari mitxi nikamakiti. Mitekakari masapotorikakati atoko nitxa. Nitapararitika nisa apikomoni, niparīka mapotōkire napokini īkapani. ¹⁴ Mitekakari iteene nirekari mitekaxi mapotōkire apokini imitekini īki apakapini īkapani, ininiā imitekapitipo. !Iotoka. Iua atokokana nota parīkauatapitipo Teoso īkapani, niparīka mapotōkire napokini īkapani, niparīka īki Teoso sikakiti napakapini īkapani, kotxi Teoso pīkapiretano nota Kristo Xesosiā itixine nisini īkapani, niparīka īki napakapini īkapani.

¹⁵ Akinika ate Kristo iteene imarotakani xinikamariko nota oerekakiti atoko inakari. Ikara atoko himaxinikakanisaaki, Teoso oerekaiko hīte atāo inakari. ¹⁶ Mitekaxi kamakari paniātakiti iaōka mitekakari kama imitekasaaki. Iua atokokana makamariko Teoso paniātakiti. Uatxaika akamakiti atokokana makama.

¹⁷ Nitariakori, hīkamario nota kamakiti atoko inakari, kotxi ate oerekapekai hīte ikara atoko inakari hīkamini. Hīkīpitariko nota kamakiti atoko inakari kamakani sākire. ¹⁸ Kaiāopokori kākiti !auikari Kristo ipinini amaerekani imakaxakini īkapani. Kristo omanatakani itxauana ninoa. Itokatapeka ikara nisāpiretai hīte, ininiā iuaīkana uatxa ikara nisāpiretai. Iteene nimatinaniuata ninoa xika. ¹⁹ Itixi mapotōkire ōtisaaki ninoa iokanataākako maerekani misiritikoātaā. Iītona iteasonena atoko itxana, kotxi iītona nireēkitinoka ikamana. Ikamakitina !erekari, iuaritika iuikarina ikamakitina. !Ipētauatana. Ninoa xinikapikari īkorapokoriti. !Ixinikarina Teoso. ²⁰ Atepekana, Teoso tixine auakani atxapekaua. Aiātapari apoxokoniritika kākiti maerekani makaxakakari iuaxitikiri uaimoni apokini. Iua Xesosi Kristo Apiananiri itxaua. ²¹ Iuasaakiko inoākari aīto mataparati. Itxīkitakari aīto iua īto erekari atoko inini. Iposotari, kotxi kaposotiireri itxaua iua. Ikinimane kamapitikariko ipaniātakiti, kotxi kataparari iua Xesosi.

4

Ōtākipirenatxi

¹ Nitariakori, nota iteene tiretai hīte. Nipiātai hīte. Hīkamapoxokonitano nota. Niuikai hīte, kotxi niparīka īki atoko hītxa. Nitiretakini, hīxinikariko ikara nota ōtākikinii uatxa. Nota ōtākikinii hīkīpitiniā, !hītakanapari Apiananiri.

² Nota ōtākikai hīte Epótxia inakoro, Sītxiki inakoro pakini. Hīkīpitariko Apiananiri sākire. Hīotokakariko hītxitakakiniua. ³ Pitepekana nimoianari erekari, nota nirekai pite ōtākikinina naia sito ipi, kotxi ninoa parīkauatapeka notakata Teoso iokanapirena erekari asāpiretakasaaki. Ninoa parīkauata notakata, Kremētxi inakori pakinikata, apanakini nimoianariakorikata apaka. Ninoa uāka Teoso aātsopateē iōkatapeēkaika, Teosokata auapininiika ininina tīkane.

⁴ Hienenīkapikako, kotxi Apiananiri nakiti hītxaua. Iuaīkana nitxai. Hienenīkako.

⁵ Erekari hīkamako apanakinimoni. !Hītxitapena. Erekari apanakini imarotiniri hīte ereka hinini. Apiananiri kaiamapeka ikanapiriini uaimoni. ⁶ Na xatiki maerekaxiniretika !hītxape. Maerekaxinireti hinakasaaki, himisākiretariko Teoso. Hamanaāri hinireēkiti. Himisākiretakasaakiri Teoso, hītxariko: “Erekapitikari notamoni pikamakiti,” hītxariko. ⁷ Ikara atoko aniniā, Teoso kamaerekaxiniretaua. Kiātokopa ininiāpa Teoso kamaerekaxiniretaua? !Kimarotikori, iuaritika peerekari. Hākixinire erekaxinirepeka ininiā, maerekati !iīroā hākixinireē. !Hinirekaikari maerekati hīxinikini. !Hinirekaikari maerekati, kotxi Kristo Xesosi nakiti hītxapekaua.

⁸ Nitariakori, nisāpiretakiti xipokini apisa, nisāpiretapanikaiko hīte. Hīxinikariko atāo inakari sākiretxiti. Hīxinikariko atāo inakari hīsāpiretini. Hīxinikariko atāo inakari hīkamini. Hīxinikariko erekarinoka. Hīxinikariko tiraōkitxi. Hīxinikariko potxitakori. Ikara atoko inakarinoka hīxinikako, kotxi erekapitikari ikara. Peerekari ikara. ⁹ Hīkamapikariko noerekakiti iaōka. Hīsāpiretanako apanakini hītemoni nisāpiretakiti. Hīkamario nota kamakiti hītiākiti atokokana. Ininiā Teoso kākiti kamaerekaxiniretakari kaikota hītekata.

Paoro Potxitari Ninoa Sikakiti

¹⁰ Apiananiri nakiti nitxaua, ininiã iteene nipoxokoniua. Iuaĩkana hĩte oerekari hĩtiretinino, txineiro hĩsikakito hĩokanatinano, ininiã nipoxokoniua. Ātipirika hĩxinikano, kotxi iteene hĩtiretano. Txamari mitxi !hĩposotari hĩsikakiti hĩokanatini notamoni. ¹¹ !Namanaã iuaĩkana txineiro hĩokanatini notamoni. Ikinipoko ninireẽkiti auakasaaki, nipoxokoniua. Ikinipoko ninireẽkiti mauakanisaaki, iuaritika nipoxokoniua. ¹² Nota napapekari nimamãkani, nimanipokoreni, nimatxineiroteni pakini. Apaka nimarotari ātikataã ninireẽkiti ikinipoko auinano. Teoso oerekapekano ikiniõtika nipoxokoniuatini. Nienenĩka nipokori auakasaaki. Nienenĩka ninatxitakasaaki apaka. Nienenĩka ikini sereti auinakasaakino. Nienenĩka minakati mauinakanisaakino. ¹³ Ikinipoko niposota nikamini, kotxi Kristo sikano iposotiire.

¹⁴ Erekapitikai hĩte, kotxi nimatxineirotenisaaki, hĩokanatarari txineiro notamoni. ¹⁵ Teoso iokanapirena erekari merepitipanika hĩkenakotakasaaki, ereẽ Masetónia tixini nosipikasaaki, hĩte Piriposi auakaninokara iokanataro txineiro napakapini ĩkapani. Apanakini Xesosi sãkire auiaĩkani ātiãtaã auakani, !iokanatinano nota. Himarotapekari ikara. ¹⁶ Tesarónika sitatxiti nauakasaaki, ninirekakiti auakasaaki, itokata txineiro hĩokanatinano. ¹⁷ !Niãtaparo txineiro hĩsikinino. Niãtapari Teoso sikinii erekari, kotxi hĩte tirtapekano nota. ¹⁸ Napakapapekari ikinipoko hĩokanatakiti. Kaiãopokori hĩokanatakiti. Eparotxito inakori mininano hĩsikakiti, ininiã ikinika ninireẽkiti uatxa auinano nota. Teosomoni sikakori kamariri atoko itxa hĩte sikakiti notamoni. Teoso potxitari hĩsikakiti notamoni. ¹⁹ NiTeosone sikaiko hĩte hinireẽkiti ikini sereti, kotxi ikinipoko aua iuamoni. Isikaua, kotxi Kristo Xesosi nakitiakori atxaua. ²⁰ Ātipirika matxari Teoso: “Peerekai aĩri, aTeosone. Ameẽ.”

Takanapapirenatxi

²¹ Hĩsãpiretanako ikinimane ereẽ auakani Kristo Xesosi nakitiakori, nixinikamanapitinina ninoa. Aĩtariakori uai notakata auakani xinikamanapitai hĩte apaka. ²² Ikinimane uai auakani Teoso nakitiakori iokanapireta hĩtemoni ixinikiniina. Homanoakori auĩte aapoko auakani, Teoso nakitiakori, iokanapireta hĩtemoni iteene ixinikiniina.

²³ Xesosi Kristo Apiananiri sikari ikinipoko erekari hĩtemoni. Ameẽ.

KOROSO

Paoro Iokanatsopatakiti Koroso Auakanimoni

¹ Nota Paoro. Niokanatsopata hītemoni. Teoso mereēno nota, kotxi inirekari nota Xesosi Kristo iokanatakiti nininiua. Aītari Tximótxio apaka iokanapireta hītemoni. ² Ininiā aiokanataria ia iōkatsopari Teoso nakitiakorimoni, ikinika Teoso paniātakitika kamakanimoni Koroso sitatxiti auakanimoni. Aītariakori hītxaua. Aīri Teoso, Apiananiri Xesosi Kristo pakini sikari ikinipoko erekari hītemoni. Ninoa kamaerekaxiniretai hīte.

Teoso Misākiretiko Koroso Auakani Īkapani

³ “Erekapitikai,” atxari Teoso, aūūte Xesosi Kristo iri, iua amisākiretakasaaki hīte Īkapani. Ātipirika amisākiretari Teoso hīte Īkapani. ⁴ Ikara atoko atxari Teoso, kotxi ate kenakopiretari hīte auikiniri Kristo Xesosi sākire. Apaka akenakopiretari hīte tīretiniri ikinika kākiti Teoso nakitiakori. ⁵ Teoso iokanapirena erekari atāo sākiretxiti itxaua. Ikara hīkenakotakasaaki, hīkenakotari Teoso sikaenetakiti ipotetakiti itixineē hīte Īkapani, ininiā hiātapani hāpakapiniri Teoso sikaenetakiti. Himarotari hāpakapiniri, ininiā Teoso sākire hāuikini aua, hītiraōkiuatini pakini aua. ⁶ Teoso iokanapirena erekari hīkenakotakiti iaripiretapeka ikini itixitimoni. Ikiniōtika apikomoni kākiti kenakotari. Iuasaaki kākiti auikaāpotari Teoso iokanapirena. Ikiniōtika kākiti apakapari erekari Teoso sikakiti. Iua atokokana hīte kenakotari Teoso iokanapirena erekari. Iuasaaki himarotari ikinipoko erekari Teoso sikakiti. Iuasaaki himarotari Teoso atāo sakiniri ikinipoko erekari kākitimoni.

⁷ Amoianari, atiretakiti, Epápara inakori, iuara oerekai Teoso sakiniri ikinipoko erekari kākitimoni. Iua Kristo nitiri itxaua. Ātipirika iparīkauata Kristo Īkapani, ininiā ātipirika iparīkauata hīte Īkapani. ⁸ Iua sāpiretaua ate hītiraōki, Erekar Matamatakoti siākiti hītemoni.

⁹ Hīte pirena akenakopiretakasaaki, ātipirika amisākiretari Teoso hīte Īkapani. Ate nirekari hīte iteene imarotiniri Teoso nireēkiti hīkamini Īkapani. Anirekari kiikiteni hininiāua. Anirekari himarotiniri Teoso imarore Erekar Matamatakoti siākiti.

¹⁰ Ininiā ate misākiretari Teoso hīte atāo hīkamini ikiniōtika, kotxi Apiananiri anaakori hītxaua. Anirekari hīkamakiti kamapoxokonitini Teoso. Ininiā hīkamakiti ikiniōtika erekarinoka, amātiiri erekari atoko. Ininiā ikiniōtika himaroāpotari apikomoni Teoso nireēkiti. ¹¹ Anirekari Teoso sikataparaxiniretinii hīte iposotiireē, kotxi kaposotiireri iua. Ininiā iuasaaki hiātapani himisiritiko xipokini. Iuasaaki !hinaiataua. Iuasaaki hīposotari himīteenekiniri himisiritiko hīpoxokoniritika. ¹² Iuasaaki hītxariko aīri: “Erekapitikai,” kotxi iua kamaerekataua. Ininiā aāpakapari iua potetakiti inakitiakori Īkapani Teoso tixineē, ipiā mauakaniātaā. ¹³ Iua sikakaua ipiā posotiireē aāuakasaaki, maerekati posotiireē aāuakasaaki. Iua anikaua imi itiretakiti auiniātaā. Iuaātaā auakani aūte itxaua imi. ¹⁴ Imi Kristo iīkitxitari Teoso amaerekani ĩki ipīkasaaki, ininiā Teoso makatxakari amaerekani. !ixinikaikari amaerekani.

Kristo Apiananiri

¹⁵ Kākiti kona posotari atamatiniri Teoso. Teosotxikana itxaua Kristo, iuaritika aposotari Kristo aātamatini. Ikinipoko kamiko apisa, Kristo aua Teosokata. ¹⁶ Iua kamari ikinipoko. Ikamari iaxiti auakani, uai itixi auakani apaka. Ikamari ikinipoko kākiti atamatakiti, kākiti matamatakiniti apaka. Ikamari ikinika kaposotiirerini, aūitexiakori matamatakoni, ikinika Teoso nitiriakori pakini. Ikamari ikinika. Ikinika kamaāka iua Īkapani. ¹⁷ Kristo aua ikinipoko apisa. Iua maīkari ikinika imaxipokakani Īkapani. Ikara atoko ininiā, ikinipoko auapanika. Iua mauakaniā, ikinika iarika. Iua mauakaniā, ikinipoko xipoka.

¹⁸ Kākiti Teoso mereēkini Kristo ïto atoko itxauana. Teoso mereēkini kii atoko itxa Kristo. Merepitipanika ipïkari òkitikakariua iua. Ininiã òkitikasaakia, oerekari kākiti Apiananiri ininiua. Äti kaposotiireri iua atokokana inakari !auari. ¹⁹ Teosotxikana iua. Ikinika Teosomoni auakari aua iuamoni. Ikara atoko Teoso apokaerekatari. ²⁰ Kristo arēka xiketakasaaki aamina İpiriãmitakari nopini, iusaaki Kristo xipokari Teoso omanãkarauatini kākiti maerekani xika. Kotxi Teoso nirekari Kristo mininiri İkinipoko iuaïkana iuamoni, İkorapokoriti auakani, iaxiti auakani pakini. Ininiã uatxa Teoso apakapari Kristo sãkire auiãkani.

Kristo Kamakiti Koroso Auakani İkapani

²¹ Hïtepekana, mitxi !himarotari Teoso. Iusaaki !hãuari Teosokata. Maerekati hïkamakiti xika homanatarari Teoso hãkixinireē. Teoso mokaiakariakori hïtxaua iusaaki. Uatxa Teoso apakapai hïte, ²² kotxi Kristo ïto ipina hïte İkapani. Ininiã iua anikai hïte Teosomoni iua makatxakakini hininiua İkapani. Teosomoni himaerekani !auaika, kotxi Kristo makatxakapekari imakinika himaerekani. Teoso apisatoõ hãpokasaaki, kona äti posotari apoïtini himaerekani xika. ²³ Ikara atoko aua hïtemoni, iteene hãuikiniãri Kristo sãkire İkiniõtika, Kristo sãkirenoka hãuikiniã, isãkire himatakanapakaniã. Ikara atoko hïkaminiã, apanakini kona txïkitakai hïtakanapiniri hiãtapiniri İkinika Teoso kamakiti hïte İkapani. Teoso iokanapirena erekari sãpiretaua İkinika Teoso kamakiti inakitiakori İkapani. Hïte kenakotapekari Teoso iokanapirena erekari. Isãpiretaãkapeka İkinika itixi auakanimoni. Nota Paoro Teoso nitiri, iua iokanapirena erekari İkinimane nisãpiretini İkapani.

Paoro Parïkauata Kākiti Teoso Mereēkini İkapani

²⁴ Uatxa nipoxokoniuata hïte İkapani natatsiirauatini, kotxi natatsiirauatini xika hïte auikari Kristo sãkire. Natatsiirauata niïtoã Teoso mereēkini İkapani. Kristo ïto atoko itxauana kākiti Teoso mereēkini. Natatsiirauatitika, iuaritika Kristo atatsiirauatini apiata. ²⁵ Teoso iokanatano nota imereēkini nitiri nininiua. İpaniãtano nisãpiretiniri İkinika isãkire hïtemoni. ²⁶ İpaniãtano nisãpiretinii mitxi kākiti mimarotakiniti. Okananipeka Teoso !oerekari ikara kākiti mimarotakiniti. Kristo ipinini apisa İkini itixiti auakani !imarotari ikara. Mitxi kākiti mimarotakiniti uatxa oerekaãka Teoso nakitiakorimoni. ²⁷ Uatxa Teoso nirekari inakitiakori Xoteo minakanua imarotiniri mitxi kākiti mimarotakiniti, kotxi peerekari. Natokopa itxa ikara kākiti mimarotakiniti? Nisãpiretai. Kristo posotari kākiti äkixinireē auini. Ia mitxi kākiti mimarotakiniti. Kristo aua hãkixinireē. Ininiã himarotari hïsini Teoso tixinemoni. ²⁸ Ininiã asãpiretari kākiti Kristo pirena. Aõtäkikari İkinimane Teoso imaroreē. Aõerekari İkinimane Teoso imaroreē, kotxi Teoso sikaimaroretua. Iua aua İkinika imaroretxi. Ikara atoko aanikana Kristo nireēkitinoka kamakani Teosomoni. ²⁹ Ikara nikamini İkapani, niparïkauatapitipo. Pasãpaniri. Kristo posotiireē niparïkauata, kotxi kaposotiireri iua. Iua iteene sikataparatarari nãkixinire, ininiã niposotari iteene niparïkauatini iua İkapani.

2

Paoro Nirekakiti

¹ Ninirekari himarotiniri iteene nimisiritiko hïte İkapani. Apaka iteene nimisiritãka Araotxiséia sitatxiti auakani İkapani. Nimisiritãka apanakini nimataõkitakini İkapani apaka. ² Ninirekari İkinimane ninoa kataparaxinire ininina. Apaka ninirekana itiretakiniuana, ininiã ätika ninoa nireēkiti. Ikara atoko ininiãna, iteene imarotarina İkinika Teoso sãkire. Iusaaki imarotarina Kristo, mitxi kākiti mimarotakiniti, mitxi aãri Teoso moerekakiniti. ³ Paimatireri Kristo. Iua mimarotakiniti !auari. İkinipoko imarota. ⁴ Ikara atoko nisãpiretai hïte, apanakini mamisirienetakanii tïkane kākiti

imaroreẽ. ⁵ Niĩto !auari hĩtekata, iuaritika nixinikapikai hĩte nãkixinireẽ. Nipoxokoni-uata, kotxi nimarotari hĩkamakiti atão inini. Apaka nipoxokoni-uata, kotxi hĩte iteene auikari Kristo sãkire.

Atão Kristo Sãkire Auiãkani Kamakiti

⁶ Hãpakapapekari Kristo Xesosi hĩauĩte ininiua ĩkapani, ininiã hĩkamariko inirekakiti ikiniõtika. ⁷ Iua taparanoka hĩkosekako. Aãkotsa kosekiniri ãparaã atoko hĩtxako. Ikara atoko hininiã, kataparari hĩxinire. Ininiã atão hãuikari Kristo sãkire mitxi aõerekakiti atoko, ininiã kataparaiko. Ininiã iteene hĩtxariko Teoso: “Ikinika pikamakiti ate ĩkapani peerekari,” hĩtxako.

⁸ Erepaniko. Kona hãuiritapiri kãkiti makatxakinii Teoso kimaporeẽ. !Hãuikapiri ninoa sãkire, kotxi ãtião ninoa sãkire. Na atão isãkirena. Kãkiti imarorenoka imarotana. Kamisirienenererini ninoa. Maxikatĩka isãkirauatana. Kitxakapirĩka auakani sãpiretakiti ninoa sãkire. ĩkorapokoriti auakani nireẽkiti maerekati isãpiretana kãkiti. Kona Kristo sãkireni.

Apiananiri Itxaua Kristo

⁹ Kristo aua iĩto, iuaritika Teosotxikana iua. Kristo aua ikinipoko Teoso posoti-ire, ikinipoko itiraõki, ikinipoko imarore, txaãpokata, kotxi Teoso itxaua. ¹⁰ Kristo aua hãkixinireẽ, ininiã ikinipoko aua hĩtemoni. !Auari apikomoni hinirekakiti, kotxi auĩtetxiakori iaxiti auakani auĩte itxaua. Apiananiri itxaua. Kaposotiireri iua atoko inakari !auari.

Kristo Kamakiti Hĩte ĩkapani

¹¹ Hãpakapapekari Teoso takaõtxikare kãkiti mataãkiniti. Hãkixinireẽ Teoso takari itakaõtxikare. Kristo makatxakasaakiri himaerekani hiĩto nireẽkiti, iuasaaki hãpakapari Teoso takaõtxikare. ¹² Hĩpatxisatikosaaki, Kristokata ikatakoni atoko hĩtxaua. Eereka hõkitikaãka Kristo õkitikiko atoko. Hĩte õkitikaãkako, kotxi hĩte auikari Teoso posotiire Kristo õkitikini ipĩkasaaki.

¹³ Mitxi ipĩkani atoko hĩtxaua himaerekani xika. Xoteo minakaniua hĩte, ininiã mitxi kona himarotari Teoso nireẽkiti. Hĩponaniãkasaaki, maerekati auape hĩtemoni. Iuaritika Teoso txĩkitakai auãki hinini Kristokata. Teoso makatxakari ikinipoko himaerekani. !Ixinikaikari himaerekani. ¹⁴ Iua oakari iõkatsopatakori amaerekani sãpiretiko. Ikara iõkatsopatakori sãpiretari amisiritiko amaerekani xika. Amitekini !auari. Amisiritiko auapitika. Iuaritika iua oakari ikara iõkatsopatakori. Imakatxakari ikara iõkatsopatakori. ĩpiriãmitakari nopini Kristo tokakitikosaaki, ikara iõkatsopatakori tokakitaãka apaka iuaã, ininiã !itxaika. Iuasaaki amisiritiko !auaika. ¹⁵ Kristo ĩpiriãmitakari nopini ipĩkasaaki, iuasaaki imakatxakari ikinika Satanasi posotiire, iniritiakori posotiire pakini. Iua oerekari ikinimane !kaposotiirena ninoa. Iua õkitikasaakiua, oerekari ikinimane iuananira Apiananiri ininiua. Iuasaaki Kristo oerekari ikinimane ikãiatini.

¹⁶ Ininiã kona hãuiritapiri apanakini txitinii hinikakiti xika, hiãtakiti xika pakini. Kona hãuiritapiri apanakini txitinii kiiniri Teoso ĩkapani hĩkamini xika, kiiniri kasiri itopaĩtakasaaki hĩkamini xika, kiiniri tomatiko õti hĩkamakiti xika pakini. ¹⁷ Kiiniri Teoso ĩkapani ĩkorasaaki sanõkatxi atoko itxa. Oerekaua atão inakari, txamari na iteene oerekaua. Iteene oerekaãka atemoni, Kristo aõkitakasaaki. ¹⁸ Erepaniko kãkiti ia atoko inakari: Ninoa iuikari imiuiakaniuana. Ninoa teosonetari Teoso nitiriakori matamatakoni. Ninoa sãpiretari kãkiti matamatakoni aõkitinina itaponeẽna. Ixinikarina ninoaka nireẽkitinoka. Ixinikarina kimarorerini ininiuana, ininiã iuikauana. Erepaniko kãkiti ikara atoko inakani. Hãuikiniãri ninoa sãkire, !auaika hĩparĩka ĩki. ¹⁹ Kãkiti ikara atoko inakani !inirekari Kristo iauĩtena ininiua. Kotxi Kristo akii atoko itxa. Ate iua ĩto atoko atxaua. Ikara atoko ininiã, isikataparataua. Aãpotiitaua. Asikataparatakakaua. Ātika ĩtotxi atoko atxaua. Ikara atoko aniniã, aimaroãpotari isãkire. Aaneẽ, kãkiti ĩto aneini atoko.

Apinini, Aãuini Pakini Kristokata

²⁰ Mitxi hinireëkiti itixi auakani nireëkiti atoko. Hãuikasaakiri Kristo sãkire, mitxi hinireëkiti !auaika. Ipïpe. Txamari hïkamapanikari ïkorapokoriti auakani kamakiti atoko. Ninoa nireëkiti iaõka hïkamapanika. ²¹ Ninoa txari: “Kona pimaïkapiri ikara. Kona pinikapiri ikara nipokori. Kona piouãtakapiri ikara.” Kinirepa hïkïpitari ikara isãkirena? ²² Ninoa paniãtakiti xipokapitikako. Ikara atoko !itxa, kotxi ikara atoko inakari paniãtakori kãkitinoka paniãtakiti. Kãkiti oerekakiti sãkiretxitinoka ikara. ²³ Kãkiti uãkatari ninoa paniãtakiti kimarorerini paniãtakiti atoko. Ninoa xinikakiti iaõka inirekarina Teoso. “!Erekano,” itxana, txamari ãkixinireëna itxana “Peerekano.” Ninoaka misiritaua ïtoãna. Ikamarina ikinika ïtona nireëkiti.

3

Atão Hïkamakiti Erekarì Hãuini ïkapani

¹ Hïte õkitikaãka Kristokata hãuini amaneri inini ïkapani, ininiã hinirekariko hïkaminiri Teoso tixine auakani kamakiti iaõka. Iuaã Kristo topãkanãta Teoso kikomoni. Api-ananiri itxaua Teoso kikomoni topãkakari. ² Hïxinikariko Teoso tixine. Kona hïxinikapiri ïkorapokoriti. ³ Ipïkani atokopeka hïtxa, kotxi hãuini kitxakari !auaika, ininiã kona hïxinikaikari ïkorapokoriti auakari. Teoso sãkire mauïãkani !imarotari hãuini amaneri Kristokata Teoso auiniãtaã. ⁴ Kristo txïkitakari aãuini amaneri inini. Iua uai apokasaaki iuaïkana atamataãka. Iuasaaki hïte apaka atamataãka iuakata. Iuasaaki hïtemoni auari Kristo iotximere atokokana. ⁵ Hïxipokariko hïito nireëkiti, kotxi ïkorapokoriti auakari nirekari ïtotxi nireëkitinoka. Hõkariko. Kipa aua aãkixinireë aõkini ïkapani? Auari anokaretxi. Auari aïto nireëkitinoka kamiko nirekiko. Auari ãti ïto nirekiko. Apaka auari ãti nakiti nirekiko aãkixinireë. Iteene anirekiniãri ãti nakiti, ateosone atoko itxaua anireëkiti. ⁶ Ikara maerekati xika, Teoso omanãkare apokapitikako Teoso paniãtakiti makïpitakanimoni. ⁷ Mitxi hïte kamari maerekati ikara atoko inakari. Iuasaaki hïtotapekari ikara atoko inakari hïkamini. ⁸ Uatxa ia atoko inakari hïtakanapako: omanãkaretxi, ãti iteene txitiko, Teoso misãkirepiretiko, maerekati sãkiretxiti pakini. ⁹ Kona himisirienetakapeua, kotxi hïtakanapapekari maerekati mitxi hïkamakiti. Himãka kitxakari hõkini atoko, hïtakanapapekari ikara maerekati.

¹⁰ Uatxa hïkamakiti amaneri. Himãka amaneri hïretakini atoko, hïkamakiti uatxa amaneri. Teoso txïkitakari hïkamakiti amaneri inini, ininiã himarotari atão inakari imaroretxi. Ininiã Teoso kamakiti atokokana hïkama, kotxi hïte kamakari itxaua. ¹¹ Uatxa kãkiti apiari !auari. Krekoakori, Xoteoakori, Teoso takaõtxikare auaïtotakini, Teoso takaõtxikare mauaïtotakini, mimaroreni, kãkiti ïtopa auakani, nitiritxi amotakoni, kãkiti miamotakoni pakini !auari kãkiti apiari. ãti kãkiti ãti kãkititxikana, kotxi Kristonoka Apiananiri. Iua aua ikinimane isãkire auïãkani ãkixinireë.

¹² Ininiãkara hiamonïkariko ãti. Hïkamariko erekari ãtimoni. !Hïuikapeua. Kaneenama !hïtxape. !Katimari homanãkarauatini. Ikara atoko hãuako, kotxi Teoso mereëkini, iua nakitiakori, itiretakini hïtxaua. ¹³ Himïteenekakakauako. Himaxinïkaretariko apanakini kamakiti, hïte mapokaerekatakiniti. Kristo maxinïkaretapekari maerekati hïte kamakiti, ininiã iua atokotxikana himaxinïkaretariko maerekati apanakini kamakiti hïtemoni. ¹⁴ Ikara erekari hïkamako. Erekarì apiari hïkamini, hïtiraõkiuatini. Hïtiraõkiuatako. Hïtiraõkiuatakasaaki, ininiã iuasaaki ikinika hïkamakiti atão.

¹⁵ Kristo kamaerekaxiniretai, ininiã erekari hãkixinire. Hãuiritariko ikara erekari kaikotini. !Hïkamapiri ikara erekari makatxakiko ïkapani. Hïkinika ãtika ïtotxi atoko hïtxaua. Teoso akiritai hïte hãkixinire ereka inini ïkapani. Hïtxariko Teoso ãtipirika: “Erekapitikari pikamakiti nota ïkapani,” hïtxako. ¹⁶ Hãuiritariko ikinika Kristo sãkire kaikotini hãkixinireë, ininiã iuasaaki himarore iteene aua. Hõerekakakaua. Hõtãkikakakaua. Hïxikaretari xikari Teoso ïkapani. Hïxikaretariko xikari Teoso sãkire iõkatsopatakori xikariti. Hïxikaretariko xikari kitxakari, amaneri pakini Teoso ïkapani. Hïxikarauatakasaaki,

hākixinireē hītchariko Teoso: “Erekapitikari pikamakiti nota ĩkapani.” ¹⁷ Ikinika hĳkamakiti hĳkamako Apiananiri Xesosi ĩkapani. Hĳsĳkirauatakasaaki, hĳsĳkirauata Apiananiri Xesosi ĩkapani. Iuasaaki hītchariko aĳri Teoso: “Erekapitikari pikamakiti nota ĩkapani,” hītchariko.

Kĳkiti Aapoko Auakani Ōtĳkikiko

¹⁸ Hĳte ĩtanorotxi, hĳkĳpitariko hĳtaniri sĳkire, kotxi Apiananiri nakiti hĳtxaua, ininiĳ ĩkara atĳo hĳkamini.

¹⁹ Hĳte ĩtaniritxi, hĳtĳretaroko hĳtanoro. Kona hĳtxitapero oa. Kona homanatapero.

²⁰ Hĳte amarini, hĳkĳpitariko hĳri, hinoro pakini sĳkire. Ikinika ninoa paniĳtakiti hĳkamako, kotxi Teoso apokaerekatari ĩkara atoko inakari.

²¹ Hĳte irĳtxi, kona hĳkamanaiamanetapena hamariteakori, kotxi eereka maerekaxinireti aua ninoamoni, ininiĳ !inirekaikarina hĳte paniĳtakiti ĩkaminina.

²² Hĳte nitiritxi, hĳpatrĳote ĩkorapokoriti aua, ininiĳ hĳkamariko ikinika ninoa paniĳtakiti. Apanakini iteene parĳkauata ipatrĳote apisatoō, iua apokaerekatiniri ĩkapani. Iua mauakanisaaki apaka iteene hĳparĳkauatako. Ikinika hĳxinireritika hĳkamariko hĳparĳka. ĩkara atoko ininiĳ, atĳo hĳpaxitari Teoso. ²³ Ikinika hĳkamakiti hĳkamako hĳtaparaxinireritika. Hĳparĳkauatakasaaki, parĳkatxi Apiananiri ĩkapani hĳkamini atokotxikana, hĳparĳkauata kĳkiti ĩkapani. ²⁴ Hĳparĳkauatako ĩkara atoko, kotxi himarotari Apiananiri sikinii ipotetakiti iaxitikiri hĳparĳka ĳki. Itixine hĳpokasaaki, hĳpakapariko. Apiananiri Kristo nitiriakori hĳtxaua. ²⁵ Maerekati kamakari apakapariko imisiritiko. Teoso misiritari ĳti maerekati kamakari, ĳti maerekati kamakari imisiritini atokotxikana.

4

¹ Hĳte patrĳo, hĳkamariko atĳo inakari hinitiriakori ĩkapani. Kona himisirienetapena ninoa. Kotxi hĳte apaka aua hĳpatrĳote Teoso tixineē.

Apikomoni Paoro Ōtakikakiti

² Kona hĳtakanapapiri Teoso himisĳkiretini. Araōkire hĳtxako maerekati mapokakani ĩkapani. Ātipirika hĳtxariko Teoso: “Erekapitikari ikinipoko pikamakiti nota ĩkapani,” hĳtxariko iua.

³ Apaka himisĳkiretariko Teoso ate ĩkapani. Hamanaĳriko Teoso, iua oerekiniua isĳkire apanakinimoni asĳpiretini ĩkapani, kotxi anirekari asĳpiretiniri kĳkiti Kristo pirena, mitxi kĳkiti mimarotakinĳti. ĩkara nisĳpiretini xika, kateia ĳki naua.

⁴ Himisĳkiretariko Teoso, Kristo pirena atĳo nisĳpiretini ĩkapani, kĳkiti atĳo imarotini ĩkapani.

⁵ Kimarorerini hĳtxauako Teoso sĳkire mauĳĳkani sauaki hĳuakasaaki. Aĳuini poiĳo, ininiĳ ĩkiniōtika hĳnitari kĳkiti Teoso sĳkire hĳsĳpiretini ĩkapani.

⁶ Teoso sikapekai ikinipoko erekari, ininiĳ hĳsĳkirauatakasaaki, hōerekari kĳkiti hĳsĳkireē hĳtĳretinina. Iōkira mauakaniĳ nipokoriĳ, !kaposeri. Iua atokotxikana erekari mauakaniĳ hĳsĳkireē, kĳkiti !inirekari ikenakotiniri hĳsĳkire. Erekaru hĳsĳkire ininiĳ, himarotari hĳpakapapiretiniri kĳkiti.

Paoro Iokanapiretini Pirena

⁷ Txĳkiko inakori sĳpiretaiko ikinika nota pirena. Aĳtari, atĳretakiti itxaua. Iua parĳkauatapitipo Apiananiri ĩkapani. Apiananiri nitiri itxaua atekata. ⁸ Niokanataru iua hĳtemoni, hĳte imaropiretini ĩkapani, hĳte isikataparaxiniretini ĩkapani. ⁹ Niokanataru Onĳsimo inakori apaka iuakata. Koroso sitatxitikiri iua, hĳte atoko. Aĳtari atĳretakiti itxaua apaka. Ātipirika atĳo iparĳkauata Kristo ĩkapani. Ninoa sĳpiretaiko hĳte ikinipoko Kristo sĳkire auĳĳkani kamakiti uai.

¹⁰ Arisitako inakori, notakata kateia ĳki auakari, xinikamanapitai hĳte. Panapee itaro ĳkiri Marko, xinikamanapitai hĳte apaka. Nisĳpiretapekai hĳte Marko pirena. Ininiĳ ereē iua apokasaaki, hĳpoxokoniritika hĳpakapariko iua. ¹¹ Xosoe Xōsito inakori

xinikamanapitai hīte apaka. Ninoa ipi āti pakini Xoteoakori notakata parīkauatakani itxauana. Ninoa parīkauata notakata, Teoso auītetxi ininiua pirena asāpiretini īkapani. Isikataparaxiniretanona nota.

¹² Epápara inakori apaka xinikamanapitai hīte. Ereēkiri iua. Kristo nitiri itxaua. Ātipirika imisākiretari Teoso hīte īkapani, Teoso nireēkitinoka hīkamini īkapani, ikinika hīkamakiti atāonoka hīkamini īkapani. ¹³ Nota imarotari iteene iparīkauatini hīte īkapani. Apaka nimarotari iparīkauata kākiti Araotxiséia sitatxiti auakani īkapani. Apaka nimarotari iparīkauata Ierapori sitatxiti auakani īkapani.

¹⁴ Aītari atiretakiti, amianari imarotakari Arókasi inakori apaka xinikamanapitai hīte. Témasi inakori apaka xinikamanapitai hīte. ¹⁵ Hīsāpiretanako aītariakori Araotxiséia auakani nixinikinina ninoa. Hīsāpiretaroko Nīpa inakoro, Teoso mereēkini oaāpoko apoti-itakaniua pakini, nixinikinina ninoa. ¹⁶ Ia niokanatsopatakiti hātatsopatako hīkinika hīkenakotini īkapani, eereka hīpaniātariko atatsopatariko Araotxiséia sitatxitiā, Kristo sākire auīākani kenakotiniri īkapani. Apaka hīte atatsopatariko Araotxiséia auakani iokanatsopatakiti. ¹⁷ Hītchariko Akipo inakori: “Pikamariko ikinipoko parīkatxi Apiananiri paniātakiti pikamini.” ¹⁸ Nota Paoro niōkatsopataria ia niuakoā: Hīxinikariko kateia āki nauini. Teoso sikari ikinipoko erekari hītemoni. Ameē.

1 TESARÓNİKA

Merepanika Paoro Iokanatsopatakiti Tesarónika Auakanimoni

¹ Paoro, Sírası, Tximótxio pakini iokanatsopata Teoso mereëkinimoni Tesarónika sitatxitiã. Aïri Teoso nakitiakori hïtxaua. Apiananiri Xesosi Kristo nakitiakori hïtxaua. Aïri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hïte.

Paoro Misäkiretari Teoso Tesarónika Auakani İkapani

² Amisäkiretari Teoso hïte İkapani. Ätipirika atxari Teoso: “Peerekai pite, kotxi Tesarónika auakani auikari pisäkire,” atxari. ³ Aïri Teoso amisäkiretakasaaki, axinikapikari hïte parïka Teoso İkapani. Atão hïparïkauata, kotxi iteene hâuikari iua säkire. Axinikari hïparïka Teoso İkapani, kotxi iteene hïtoretari iua. Axinikari himarotiniri Apiananiri Xesosi Kristo säkire iaõka hïkamini. Hïpoxokoniritika hiätapari isäkire iaõka apokini.

⁴ Nitariakori, Teoso turetakitikai hïte. Iua mereëi hïte iua nakitiakori hininiua İkapani. Aimarotari ikara. ⁵ Teoso iokanapirena erekari hïtemoni asäpireta Teoso posotiireë. Ate säkirenoka !kaposotiireri. Erekari Matamatakoti oerekai asäkire atão inini. Hïte iteene imarotari asäkire atãonoka inini. Hätamatari aparïka hïte İkapani hïte sauaki aãuakasaaki, ininiã himarotapitikaua ate. ⁶ Ininiã hïte kamari ate kamakiti atokotxikana. Hïkamari Apiananiri kamakiti atokotxikana. Himisiritiko aua, iuaritika hâuikari Xesosi säkire. Himisiritiko aua, iuaritika Erekari Matamatakoti kamapoxokonitai. ⁷ Ininiãkara Masetónia tixini auakani, Akaia tixini auakani pakini nirekari hïte atoko ininina. ⁸ Inirekarina hïte atoko ininina, kotxi hïte säpiretari Apiananiri säkire Masetónia auakanimoni, Akaia auakanimoni pakini. Apaka ikini itixiti iaripireta hïte iteene auikiniri Teoso säkire. Ininiã kona ate säpiretari kãkiti iteene hâuikiniri Teoso säkire, kotxi ikinimane imarotape. ⁹ Ikinimane säpiretari hïpoxokoniritika hãpakapiniua ate. Ninoa säpiretari hïte takanapiniri teoso kamakori. Isäpiretarina hïparïkauatini uatxa Teoso atão inakari İkapani, auãkipika inakari İkapani. ¹⁰ Ninoa säpiretari, hïte iãtapiniri Teoso äkiri itixine auakari kanapiriini İkorapokoriti. Iua Xesosi. Ipïkani sauaki Teoso õkitikakiti iua. Iua makatxakapekari amaerekani, ininiã amisiritiko !auaika kãkiti misiritiko õti apokasaaki.

2

Paoro Parïka Tesarónika Sitatxitiã (Ätosi 17.1-9)

¹ Nitariakori, himarotari maxikatïka kona ate sari hïtemoni. ² Himarotari amisiritiko Piriposi sitatxiti aãuakasaaki, hïtemoni aãpokini apisa. Iuaã auakani äsokaua, kateia äki taka itxauana. Iuaritika Teoso sikataparaxiniretaua asäpiretiniri Teoso iokanapirena erekari hïtemoni. Itori kãkiti !nirekari asäkire, iuaritika ate säpiretari Teoso iokanapirena erekari hïtemoni. ³ Ate oerekakiti !akeroka. Teoso nireëkitinoka anireka akamini. Äti anireëkiti !auari. !Anirekari amisirienetini hïte.

⁴ Teoso auiritaua iua iokanapirena erekari asäpiretiniri kãkiti. Teoso auikari atão asäpiretiniri isäkire kãkitimoni, ininiã asäpiretari isäkire kãkitimoni. Asäkirauata, kona kãkiti akamapoxokonitini İkapanini. Anirekari akamapoxokonitini Teoso, kotxi iua ataerekatari aãkixinire. ⁵ !Asäpiretai ereka hinini, ate nireëkiti hïkamini İkapani. Asäpiretari Teoso säkire hïtemoni, kona hïte nakiti anirekini İkapanini. Ikara himarotape. Teoso apaka imarotari ikara nisäkire atão inini. ⁶ Ate !anirekari kãkiti iuikiniua ate. !Anirekai

hïte iuikiniua ate. !Anirekari apanakini iuikiniua ate. Kristo iokanatakiniua ate hïtemoni, ininiã aposotari apaniãtinii ikinipoko anireëkiti hïsikiniua. Iuaritika !anirekari ikara atoko akamini. ⁷ Hïte sauaki aãuakaçaaki iteene atiretai hïte. Sito tiretiniri oimi atokokana, ate tiretai hïte. ⁸ Iteene atiretai, ininiã anirekari asikini Teoso iokanapirena erekari. Kona iuananini anireka asikini hïte. Axinire, aïto pakini anireka asikini, kotxi ate tiretakini hïtxapekaua. ⁹ Nitariakori, hïxinikari aparïka hïte sauaki. Pasãpaniri. Ìkanõka, pokamara pakini aparïkauatapitipo, akiena, anireëkiti pakini aãpakapini ìkapani, kotxi !anirekari aamanainii hïte aamonitakiti ìkapani. !Anirekari hïte parïka apiatini ate ìkapani, Teoso iokanapirena erekari asãpiretakasaakii.

¹⁰ Hïte Kristo sãkire auiãkani sauaki aãuakasaaki, hïte itikari aãuini ikiniõtika. Teoso apaka itikari. Himarotari Teoso nireëkitinoka akama iusaaki. Himarotari erekarinoka akama iusaaki. Himarotari !akamari maerekati iusaaki. ¹¹ Hïri atoko atxaua iusaaki, kotxi aõtãkikai hïte. Amïkapiritai, imi iri mïkapiritini atokokana. Apaniãtai atão inakarinoaka hïkamini. ¹² Ikara atoko akaminii, kotxi Teoso anaakori hïtxaua, ininiã anirekari hïte kaminiri hïri kamakiti iaõka. Iua akiritai hïte hïauïte inini ìkapani. Inirekari hãtamatini iua iotximere itixine hãuakasaaki. ¹³ Ininiã ãtipirika amisãkiretari Teoso: “Erekapitikai, kotxi Tesarónika auakani auikari pisãkire, ninoamoni asãpiretakiti. Ninoa imarotari kona ate sãkireni asãpiretana. Ninoa imarotari asãpiretana atão pite sãkire,” nitxari Teoso. Teoso sãkire parïkauata hïte Xesosi sãkire auiãkani ãkixinireë isãkire hãuikini ìkapani. ¹⁴ Xotéia tixini auakani, Kristo Xesosi nakitiakori, Teoso sãkire auiãkani, ninoa kamakiti atoko hïkamako hïte nitariakori. Xoteoakori misiritana ninoa. Iua atokotxikana hïte nirimane misiritapekai hïte. ¹⁵ Ninoa Xoteoakori okari Apiananiri Xesosi. Ninoa apaka okana ninoaka nirimane, Teoso sãkire sãpiretakani. Ninoatxikana misiritapekaua ate. Teoso !apokaerekatari ninoa kamakiti. Ninoa omanatari kãkiti. ¹⁶ Kotxi !auritarina Xesosi sãkire asãpiretini Xoteo minakaniua, imaerekanina makatxakiko ìkapani. Uatxa ninoa maerekani xãpoka. Uatxa Teoso omanãkare apokaþeka ninoamoni.

Paoro Ipiãtinina Tesarónika Auakani

¹⁷ ãtiãtaã ate auakasaaki, ãtipirika axinikapikai. Aïto hïtekata mauakanisaaki, aãkixinire xinikapikai. Ate ipiãtai. Iteene anirekari iuaïkana aõkitinii. ¹⁸ Anirekapitikamari hïtemoni akanapiriini. Nota Paoro itokata nirekamari napokini hïtemoni, txamari Satanasi !auritaua asini hïtemoni. ¹⁹ Aãuïte Xesosi ãti õti ìkanapiriãkasaaki, aãpotiitaua iua apisatoõ. Iusaaki aiãtapakiti apokaþeka. Kipa aiãtapakiti? Hïtera. Iusaaki iteene apoxokoniuatako. Kinirepa apoxokoniuata? Kotxi hïte aua iuaã. Iusaaki aãpakapari aparïka ìki. Kinirepa aãpakapari aparïka ìki? Kotxi hïte auikari Xesosi sãkire ate sãpiretakiti. Ininiã peerekari iusaaki. ²⁰ Atãopitikara nisãkire. Ate iuikai hïte. Hïte kamapoxokonitaua ate.

3

¹ Iusaaki !amïteenekari amimaropiretakani hïte, ininiã axinikari atenoka kaikota uai Atena sitatxitiã. ² Ininiã iusaaki aiokanatarari aïtari Tximótxio hïtemoni. Teoso nitiri itxaua. Imoianataua Kristo iokanapirena erekari asãpiretakasaakiri kãkiti. Aiokanatarari iua hïtemoni, Xesosi sãkire iteene hãuikini ìkapani, isikataparaxiniretinii ìkapani. ³ Ikara atoko ininiã, kona hïxinikari Teoso sãkire hïtakanapini, kãkiti misiritinii xika, kotxi himarotari amisiritiko apokapitikako. Teoso aauritari. ⁴ Hïtekata aãuakasaaki, asãpiretapekai amisiritiko apokini. Uatxa himarotapitikari atão asãkire, kotxi uatxa apopeka asãkire iaõka. ⁵ Ininiã apikomoni !nimïteenekaikari nimimaropiretakani hïte. Ininiã iusaaki niokanatarari Tximótxio hïtemoni, Xesosi sãkire hãuikini nimarotini ìkapani. Nipïkari Satanasi sikanireõtini hïte, Xesosi sãkire hãuikini hïtakanapini. Nipïkari maxikatiika Xesosi sãkire asãpiretinii hïte, hïtekata aãuakasaaki.

Tximótxio Sãpiretakiti Ikanapiriãkasaaki

⁶ Uatxa Tximótxio kanapiripeka atemoni. Iua minapiretai h̄ite. Erekarī is̄āpiretakiti. Iua txaua ate: “Tesarónika auakani iteene auikari Xesosi s̄ākire. Ninoa tiraōkiuatapika. Ipotxitarina ixinikiniina h̄ite. Ipiātaina h̄ite, ninoa h̄ipiātini atokotxikana,” itxa Tximótxio atemoni. ⁷ Nitariakori, ate amaxikiko auapitika. Ate misiritiko auapitika, iuaritika h̄īkamapoxokonitaua, kotxi iteene h̄āuikari Xesosi s̄ākire. ⁸ Uatxa peerekari ate auini, kotxi Apiananiri s̄ākire iaōka h̄īkama. ⁹ Iteene apoxokoniuata Teoso apisatoō, kotxi h̄āuikari iua s̄ākire. Axinikasaakii, apoxokoni iteene auapitika. Ininiā ātipirika atxari aTeosone: “Peerekai pite, kotxi Tesarónika auakani iteene auikari pis̄ākire, ininiā ikamapoxokonitauana ate,” atxari. ¹⁰ Īkanōka, pokamara pakini iteene aamanaāri Teoso h̄ite iuaīkana aaōkitini, kotxi anirekari apikomoni Teoso s̄ākire himimarotakinīti aōerekiniī.

¹¹ Anirekari aīri Teoso, aāuīte Xesosi Kristo pakini oerekiniāua aāpokini h̄itemoni. ¹² Anirekari Apiananiri tx̄īkitakinīi himarotiniri h̄ītiretakiniua. Anirekari h̄ītiraōki aneini. Anirekari iteene h̄ītiraōkiuatini. Anirekari ikinimane apaka h̄ītiretini, ate t̄iretinīi h̄ite atokotxikana. ¹³ Anirekari Apiananiri sikataparaxiniretinīi h̄ite. Ininiā Apiananiri Xesosi Kristo ikinika inakitiakorīkata ĩkasaaki uai, iuasaaki maerekati !auaika h̄itemoni aīri Teoso apisatoō. Iuasaaki h̄ite apoītakari !auari. Iuasaaki erekai h̄ite.

4

Akamakiti Teoso Apokaerekatakiti

¹ Nitariakori, apikomoni nis̄āpiretai. As̄āpiretapekai h̄īkamakiti t̄īkane, h̄āuini Teoso apokaerekatini ĩkapani. Ikara atoko inakari h̄īkamapitika uatxa. Erekarī h̄āuini uatxa, ininiā nōtākikai Apiananiri Xesosi posotiireē, apikomoni iua apokaerekatakiti ikiniōtika h̄īkamini ĩkapani. ² Himarotapitikari aōereēkiti h̄īkamini ĩkapani. Apiananiri Xesosi paniātaua ikara aōerekiniī h̄ite.

³ Teoso nirekari himaerekani xipokaāpotini h̄ākixinireē. Ininiākara h̄ītaniri minakotikatika, h̄ītanoro minakotokatika, !h̄īsīrīkape. ⁴ !H̄āuiritapiri h̄iito nireēkiti ikamini. H̄iito auīte h̄ītxauako, ininiā maerekati h̄iito nireēkiti !h̄īkama. Atāo h̄īpaxitariko h̄īteka ĩto, apanakini ĩto apaka. ⁵ !Apakata h̄īxinikiniri ātipirika maerekati h̄iito nireēkiti āti ĩtokata h̄īkamini. Xoteo minakaniua, Teoso mimarotakani, xinikari ikara atoko inakari. ⁶ !Apakata h̄ītx̄īkitakiniri āti aītari maerekati ĩtotxi nireēkiti ikamini, kotxi Apiananiri misiritariko k̄ākiti ikara atoko inakari maerekati ikaminiā. As̄āpiretapekai ikara. Apinitapekai. ⁷ Teoso kona akiritaua iuamoni, maerekati aīto nireēkiti akamini ĩkapani. Akiritaua iua nakiti aniniua ĩkapani, erekarinoka akamini ĩkapani. ⁸ Ininiā ikara as̄ākire manirekakati, !omanataua ate. Omanatari Teoso. !Inirekarī Teoso s̄ākire, kotxi Teoso sikari Erekarī Matamatakoti k̄ākitimoni.

⁹ H̄ītariakori h̄ītiretini pirena kona aiōkatsopata h̄itemoni, kotxi Teoso oerekapekai h̄ītiretakiniua. ¹⁰ Nimarotari h̄ītiretiniri ikinika h̄ītariakori Masetōnia tixini auakani. Iuaritika nitariakori, aōtākikai apiata h̄ītiretiniri k̄ākiti ikiniōtika. ¹¹ H̄āpaiaōkariko h̄ītsorīkaātini. Apanakini parīka !h̄īmaākatape. H̄īkamariko h̄īteka parīka h̄āuini ĩkapani. Ikara atoko as̄āpiretapekai h̄ite. ¹² Ikara atoko h̄īkaminiā, Xesosi s̄ākire mauīākani paxitai. Ikara atoko h̄īkaminiā, !auari h̄īamonitakiti.

Apiananiri Kanapiriini

¹³ Nitariakori, anirekari himarotiniri atāo inakari ip̄īkani pirena. Kona anirekari himatinaniuatini Xesosi s̄ākire mauīākani matinaniuatini atoko, kotxi ninoa ip̄īkasaaki, !imarotarina isinimonina. ¹⁴ Aāuikari Xesosi ipinini. Aāuikari iuaīkana ōkitikiniua. Ininiākara aāuikari ip̄īkani Teoso s̄ākire auīākani apaka ōkitikiniua. Teoso minana ninoa Xesosikata ikanapiriākasaaki. ¹⁵ Iuasaaki ate auākipanika inakaniua Apiananiri kanapiriākasaaki, !asari ninoa mitxi ip̄īkani apisapanika. Mitxi ninoa sa. Iposo atoko ate sa Apiananirimoni. Apiananirira s̄āpiretapekaua ikara. ¹⁶ Iuasaaki Apiananiri poterika

itixine. Iuaka katzaka uaimoni. Iuasaaki akiripoakata iua apokasaaki, ininiã kãkiti kenakotariko Teoso nitiriakori auïte sãkire. Teoso trõpetane xõkiko kenakotaãka. Iuasaaki mitxi ipĩkani, Kristo sãkire auiãkani, merepanika õkitikauako. ¹⁷ Eereka ate auapanika inakanuia anikaãkako ipĩkanikata Apiananiri aaõkitini ïkapani. Aaõkitari iua itanoxiti katxiãriã. Ininiã eereka iuakata aãuapininiika. ¹⁸ Ikara sãkiretxiti hĩsãpiretakakauako, ininiã hĩkamataparaxiniretakakauako.

5

Apiananiri Kanapiriini Ôti

¹ Nitariakori, kona asãpiretari Xesosi kanapiriini õti. !Asãpiretari apokini kasiriti, ikanapiriinikanani pakini. ² Kotxi atão himarotari, Apiananiri uai apokini, kiïtiriri ïkanõka apokini atokokana itxako. Ininiã kãkiti !imarotari Apiananiri apokini õti. ³ Iuasaaki kãkiti sãkire: “Nenamamtxi !auari. Erekaua. Imonõkoni !auari,” inakasaaki, iuasaakipeka katimaritika Teoso xipokari ikinipoko. Katimari sito amarini tsiiikini atoko itxako. Oa sito tsii apokasaaki, omitekini !auari. Iua atokokana kãkiti mitekini !auari iuasaaki Xesosi kanapiriãkasaaki. ⁴ Nitariakori, kãkiti ipiã auakani atoko !hĩtxaua. Himarotapitikari ãti õti Apiananiri uai kanapiriini, ininiã hiãtapari ikanapiriini õti apokini, himatikokakani ïkapani, kiïtiriri tikokakiniri kãkiti atoko himinakani ïkapani ikanapiriãkasaaki. ⁵ Hĩte hĩkinika kaiotximereri anaakori hĩtxaua. Pokamarari anaakori atoko hĩtxaua. !Akaikota ipiã. !Akaikota ïkanõka, kotxi !anirekaikari maerekati akamini. ⁶ Ininiãkara apanakini imakakani atoko !himapeko. Araõkire matxako, maerekati mapokakani ïkapani. Aïto auïte matxaua. ⁷ Imakakani imaka ïkanõka. Poãtakani poãta ïkanõka. !Iãtapari Xesosi kanapiriini. Ikara atoko !hĩtxapeko.

⁸ Pokamarari anaakori atxaua, ininiã aïto auïte matxaua. Sotato takari itorota koana, itorota tokapare ïkapani. Sotato torota koana atoko itxa Teoso sãkire iteene hãuikini. Sotato torota koana atoko itxa apaka hĩtiraõki. Ininiã hãuikasaakiri Teoso sãkire, hĩtiraõkiuatakasaaki, hãkixinire tokapare auape. Sotato takari ikii tãta ikii tokapare ïkapani. Sotato kii tãta atoko itxa amaerekani makatxakiko aimarotini. Ikara imaroretxi axinikakiti akii tokapare itxaua. ⁹ Teoso mereẽua ate kona imisiritiniua ïkapanini. Iua mereẽua ate amaerekani aãuïte Xesosi Kristo makatxakini ïkapani. ¹⁰ Iua ipina kãkiti ïkapani. Ipina iuakata aãuini ïkapani. Ikanapiriãkasaaki, isãkire auiãkani auãkipanika inakani, ipĩkani pakini aua iuakata. ¹¹ Ininiã hĩsikataparaxiniretakakauako. Himoianatakakauako Teoso sãkire iteene hãuikini ïkapani. Uatxa ikara atoko inakari hĩkamapeka.

Paoro Ôtãkikare Mapotõkire

¹² Nitariakori, aõtãkikai himarotinina hĩte sauaki parĩkauatakani, Apiananiri sãkire sãpiretakani, hĩte õtãkikakani. ¹³ Ininiã iteene hĩpaxitanako. Hĩtiretanako ninoa, kotxi ninoa iteene parĩkauata hĩte ïkapani. !Hĩtxitakakapeua. !Hineenamauatape. ¹⁴ Nitariakori, iteene aõtãkikai hĩte ia atoko: Hĩpinitariko kãkiti paniãtakiti makĩpitakani. Hĩsikataparaxiniretariko pĩkarauatakani. Himoianatariko mataparani. Katima !hĩtxapeko homanãkarauatini kãkiti kerokasaaki. ¹⁵ Kona hãuiritapiri misiritakori misiritiniri imisiritakiri. ãtipirika hĩkamariko erekari hĩtariakorimoni, Xesosi sãkire mauiãkanimoni apaka.

¹⁶ ãtipirika hĩpoxokoniuatako. ¹⁷ Himisãkiretapikariko Teoso. ¹⁸ Hĩpoxokoniuatakasaaki, hĩtxariko Teoso: “Erekari pikamakiti nota ïkapani,” hĩtxako. Himatinaniuatakasaaki, iuaritika hĩtxariko Teoso: “Erekari pikamakiti nota ïkapani,” hĩtxako. Ikara atoko Teoso nirekari ãtipirika hĩsãpiretiniri iua, kotxi Kristo Xesosi nakitiakori hĩtxaua. ¹⁹ !Hĩotokakapiri Erekari Matamatakoti parĩkauatini hãkixinireẽ. Hĩkamariko ipaniãtakiti. ²⁰ !Homanatapiri Teoso sãkire kãkiti sãpiretakiti. ²¹ Hãtaerekatariko ikinika. Erekarinoka hĩkamako.

²² !Hĩsipeko maerekati kamikoãtaã, kotxi hĩsiniã, apanakini xinikari atão maerekati hinireka hĩkamini.

²³ Anirekari Teoso, kãkiti kamaerekaxiniretakari, iua iteene kamaerekatini hĩte iua nakitiakorinoka hininiua ĩkapani. Nimisãkiretari Teoso hĩte ĩkapani, hĩxinire, hãkixinire, hĩto pakini ereka inini, ininiã aãũte Xesosi Kristo uai apokasaaki maerekati !auaika hĩtemoni, ininiã hĩte apoĩtiko !auari. ²⁴ Hĩte akiritakari kamari isãkire iaõka.

²⁵ Nitariakori, himisãkiretariko Teoso ate ĩkapani. ²⁶ Haõkitakakasaakiua, hĩtiraõkiritika hãpakapakakauako, kotxi hĩtariakori itxauana. ²⁷ Apiananiri posotiireẽ nipaniãtai hãtatsopatiniri ia niokanatsopatakiti ikinika aĩtariakori kenakotini ĩkapani. ²⁸ Aãũte Xesosi Kristo sikari ikinipoko erekari hĩtemoni. Ameẽ.

2 TESARÓNİKA

Paoro Iokanatsopatakiti Iuaĩkana Tesarónika Auakanimoni

¹ Paoro, Sírası, Tximótxio pakini iokanatsopata Teoso mereẽkinimoni Tesarónika sitatxitiã. Aĩri Teoso nakitiakori hĩtxaua. Apiananiri Xesosi Kristo nakitiakori hĩtxaua. ² Aĩri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hĩte.

Xesosi Kanapiriini Pirena

³ Nitariakori, ātipirika atxari Teoso: “Erekapitikari pikamakiti Tesarónika auakani ĩkapani,” atxa. Ikara atoko asāpiretari Teoso, kotxi ĩkiniõtika Teoso sākire hāuikini apiaāpota. Apaka hĩtoretakiniua ĩkiniõtika apiaāpota. ⁴ Ininiã apanakini Teoso sākire auĩkanikata aāuakasaaki, asāpiretana ninoa ate iuikini hĩte. Ate iuikari himisiritiko himĩteenekini. Ate iuikari hāuikiniri Teoso sākire. Iteene himaxikiko, himisiritiko pakini, iuaritika himĩteenekari. Iteene hāuikari Teoso sākire.

⁵ Himisiritiko himĩteenekini oerekari Teoso misiritiniri maerekati kamakani, kotxi ikara atāo. Hĩte misiritaāka, kotxi hĩkamari hĩauĩte Teoso paniātakiti, ininiākara iuamoni apakatapitika hāuini Teoso auĩtetxi ininiātaāua. ⁶ Teoso kamari atāo inakarinoka. Ininiã imisiritariko hĩte misiritakani. ⁷ Ixipokariko hĩte misiritiko, ate misiritiko apaka. Iuasaaki hĩtomata atekata. Ikara atoko inakari ikama, Apiananiri Xesosi oerekikosaaki Teoso tixine ipotorikasaaki, initiriakori kaposotiirerinkata. ⁸ Xamina tirinakariã imisiritanako Teoso mimarotakani, aāuĩte Xesosi Kristo iokanapirena erekari makĩpitakani. ⁹ Ninoa misiritaākako ātipirika. Ikinipoko xipope ninoa ĩkapani. !Auiritaākana Apiananiri auiniātaã apokinina. !Atamatarina iua iotximere. !Atamatarina iposotiire. ¹⁰ Ninoa misiritaāka, Apiananiri kanapiriini õtisaaki. Iuasaaki inakitiakori, isākire auĩkani, txariko: “Peerekai. Peerekai. Āti kaposotiireri pite atoko inakari !auari,” itxanako. Ikara atoko hĩte apaka sāpiretari iua iuasaaki, kotxi hĩte auikari asāpiretakiti hĩtemoni.

¹¹ Ininiã amisākiretapikari aTeosone hĩte ĩkapani. Ia atoko atxari iua: “Pite akiritari Tesarónika auakani pinakitiakori ininiuana ĩkapani, ininiã ninirekari pite apokaerekatiniiri ninoa kamakiti pite ĩkapani. Pisikaposotiiretana ninoa ikinipoko inireẽkitina erekari ikaminina ĩkapani. Ninoa auikari pisākire, ininiã iparĩkauatana pite ĩkapani. Ininiã pisikaposotiiretana ninoa ikara iparĩkana ikaminina ĩkapani.” ¹² Ikara atoko amisākiretari Teoso, kotxi apanakini atamatakasaakiri erekari hĩkamakiti, itxarinako aāuĩte Xesosi Kristo: “Peerekai pite,” itxanako, ininiã Xesosi uāka iuikaāka. Apaka Xesosi txaiko hĩte: “Peerekai hĩte,” itxaiko. Ikara atoko aua, kotxi aTeosone, Apiananiri Xesosi Kristo pakini sikari ikinipoko erekari hĩtemoni.

2

Apia Maerekati Apokini

¹ Nitariakori, maxinikari aāuĩte Xesosi Kristo kanapiriini. Maxinikari iuakata aāpotiitiniua. Ikara axinikasaaki, aõtākikai hĩte. ² Apanakini sāpiretai: “Apiananiri kanapiriini õti apokapeka,” itxana. Maerekaxiniretika !hĩtxape. Ikara atoko inakasaakina, !hĩpĩkarauatape. Paxirari ninoa sākire. Atxiĩti ninoa txari: “Erekari Matamatakoti sāpiretano ikara.” Atxiĩti ninoa txari: “Paoro sāpiretari ikara.” Atxiĩti ninoa txari: “Paoro iõkatsopatarı ikara.” Paxirari ninoa sākire. Kona hāuikapiri ikara atoko inakari. ³ Kona xatiki hāuiritapiri kākiti misirienetini. Apiananiri kanapiriini apisapanika, kākiti !inirekari Teoso sākire ikĩpitini. Iuasaaki maerekati kamakari apiatakari apoka. Xipokatxi ākiri akiritaāka. Iua xipokaākapitikako. ⁴ Iua apia maerekati !inirekari Teoso

paniãtakiti ikamini. Iuikauako. “Kãkiti teosonetakini posotiire poiãoka. Nota posotiire apiata,” itxako. Iuasaaki iitopãka Teoso misãkiretiko aikoti ãki. “Teosorano nota. Notanokara Teoso txaua. ãti Teoso !auari,” itxako iuasaaki. ⁵ Hĩtekata nauakasaaki, nisãpiretapekai ikara. Atxiĩti hĩte xinikapanikari nisãpiretakiti? ⁶ Uatxa kona apakat-apanika iua apia maerekati apokini. Himarotari Teoso !auiritari iua apokini uatxa. Iketo õtinokara Teoso auiritari iua apokini. Iuasaaki iuaka oerekaua. ⁷ Maerekati kipatakori posotiire auape uatxa, iuaritika maerekati mauiritakati !auiritapanikari iteene maerekati iarikini. ãti õti maerekati mauiritakati makatxakaãka. ⁸ Iuasaaki iua apia maerekati oerekaua kãkitimoni. Apiananiri kanapiriãkasaaki, okari iua. Ixõkare, isinanirenani xipokari iua. Iotximere xipokari iua apia maerekati. ⁹ Iua apia maerekati apokasaaki, Satanasi posotiire aua iuamoni. Ikamariko ikini sereti posotiiretxi kãkiti maposotakinini. Iua oerekari ikara, kãkiti imisirienetini ãkapani, isãkire kãkiti auikini ãkapani. ¹⁰ Ikini sereti maerekati ikama kãkiti pĩpinanaãkani imisirienetini ãkapani. Ninoa pĩpinanaãkani xipokapitikako, kotxi !inirekarina atão inakari itiretinina, ininiã imaerekanina makatxakiko !auari. ¹¹ Ininiã iuasaaki Teoso txĩkitakana auikinirina ninoa misirienetakani sãkire, ininiã auikarina atão minakati apiatakari. ¹² Ininiã atão inakari mauikakati misiritaãkako, kotxi iteene ipotxitari imaerekani.

Iteene Hãuikariko Teoso Sãkire

¹³ Nitariakori, Apiananiri tiretakini, ãtipirika erekari amisãkiretiniri Teoso hĩte ãkapani ia atoko: “Erekapitikai, kotxi pite mereẽna Tesarónika auakani imaerekanina pimakatx-akini ãkapani.”

Itixi kamiko apisapanika, iua mereẽi hĩte. Imaktxakari himaerekani, kotxi Erekar Matamatakoti txĩkitakai Teoso nakitiakori hininiua. Imaktxakari himaerekani, kotxi hãuikari atão inakari. ¹⁴ Teoso iokanapirena erekari asãpiretakiti hĩtemoni hãuikasaaki, iuasaaki Teoso akiritai hĩte. Ininiã aãũte Xesosi Kristo iotximere hĩte apaka apakapako. ¹⁵ Ininiã nitariakori, iteene kataparaxinire hĩtxako. Iteene hãuikariko Teoso sãkire asãpiretakiti, aiõkatsopatakiti pakini. !Hĩtakanapapiri.

¹⁶ Anirekari aãũte Xesosi Kristo, aĩri Teoso pakini sikataparaxiniretinii hĩte. Nino iteene tiretaua. ãtipirika isikataparaxiniretaua. Isikaua erekari aiãtapini ãkapani. Aimarotari ikara erekari apokapitikako. Ikara atoko inakari ikama ate ãkapani, kotxi isikaua ikinipoko erekari. ¹⁷ Erekar hĩsãkiretakasaaki, erekari hĩkamakasaaki, anirekari isikataparaxiniretinii hĩte apikomoni erekari hĩkamini ãkapani.

3

Himisãkiretariko Teoso Ate ãkapani

¹ Nitariakori, nisãkire mapotõkire apoka. Himisãkiretariko Teoso ate ãkapani Apiananiri sãkire katima iaripiretini ãkapani. Himisãkiretariko Teoso Apiananiri sãkire auikiko ãkapani, hĩte auikiniri atokotxikana. ² Himisãkiretariko Teoso imaktxakiniua ate amap-inakani ãkapani, maerekati kamakani sauaki aãuakasaaki, kotxi apanakini !auikari Teoso sãkire. ³ Apiananiri kamari ikinika isãkire iaõka. Iua sikataparaxiniretai hĩte. Itokapakeẽtai, ininiã Satanasi !inokai. ⁴ Apiananiri txĩkitakaua ate aimarotiniri ate paniãtakiti hĩkamini. Ate imarotari, katana apaka hĩkamapanikariko asãkire iaõka. ⁵ Anirekari Apiananiri oerekinii Teoso tiraõki. Anirekari himĩteenekiniri ikinika himisiritiko, Kristo imisiritiko imĩteenekini atokokana.

Kãkiti Paniãtakiti Makĩpitakani

⁶ Nitariakori, aãũte Xesosi Kristo nireẽkiti iaõka asãpiretai hĩte, ininiã apaniãtai ia atoko. Hĩtari kãkiti paniãtakiti makĩpitakati, aõereẽkiti iaõka imakamakaniã, ininiã iua moianari !hĩtxapeuako. Hĩtakanapariko iua. ⁷ Hĩte imarotari akamakiti iaõka hĩkamini, kotxi hĩtekata aãuakasaaki ate kĩpitari kãkiti paniãtakiti. ⁸ Kona anikari nipokori

amaĩkitxitakiniti. Iuasaaki iteene aparĩkauata. Īkanõka, pokamara pakini aparĩkauata akiena aiamotini ĩkapani, kotxi !anirekari hĩte kaamatini hĩte kiena. ⁹ Apakatapitika kãkiti ĩkitxitiniua aparĩka ĩkapani, iuaritika !anirekari hĩkitxitiniua, kotxi anirekari hĩte parĩkauatini ate parĩkauatini atokokana. ¹⁰ Hĩtekata ate auakasaaki, ate paniãtai hĩte ia atoko: “Kãkiti manirekakaniãri iparĩkauatini, !inikapani.”

¹¹ Ate kenakopiretari hĩte sauaki auari kãkiti paniãtakiti makĩpitakani. !Iparĩkauatana. Ātipirika ipotxitarina imarotininirina ãti kãkiti kamakiti. ¹² Aãũte Xesosi Kristo posotiireẽ, apaniãtana kãkiti ikara atoko inakani iparĩkauatinina. Aõtãkikana iparĩkanoka ikaminina ikienana apokinina ĩkapani. !Himaãkatapiri apanakini kamakiti. ¹³ Nitariakori, ! hĩsãpakape erekari hĩkamini.

¹⁴ Kãkiti ereẽ makamakaniãri ate õtãkikakiti ia iõkatsopariã, erepaniko iua. Iua moianari !hĩtxapeuako. Hĩtakanapariko iua, ininiã iuasaaki atxiĩti ipẽtauata. Iuasaaki atxiĩti iuaĩkana atão ikama. ¹⁵ Imoianari !hĩtxapeuako, iuaritika himokaiakari !itxaua. Hĩpinitariko iua, kotxi hĩtari itxaua.

Paoro Sãkire Mapotõkire

¹⁶ Anirekari Apiananiri, kãkiti kamaerekaxiniretakari, kamaerekaxiniretinii hĩte ikiniõtika. Anirekari iua kaikotini hĩtekata.

¹⁷ Nota Paoro iõkatsopata nisãkire mapotõkire niuakoã. Ia nitakaõtxikare, ininiã himarotari atão ia nota iokanatsopatakiti. Ia atoko inakari niõkatsopata. ¹⁸ Aãũte Xesosi Kristo sikari ikinipoko erekari hĩte hĩkinikamoni. Ameẽ.

1 TXIMÓTXIO

Merepanika Paoro Iokanatsopatakiti Tximótxiomoni

¹ Nota Paoro iokanatsopata pite Tximótxiomoni. Xesosi Kristo iokanapirena sãpiretakari nota. Teoso amaerekani makatxakakari itxaua. Aimarotari Xesosinoka anikaua Teoso tixinemoni. Apiananiri itxaua. Teoso, Xesosi Kristo pakini iokanatanota kãkitimoni, iokanapirena nisãpiretini ïkapani. ² Pite Tximótxio, nota ãkiri atoko pitxaua, kotxi merepitipanika pauikari Xesosi sãkire nota sãpiretakasaakii. Aãri Teoso, aãuïte Xesosi Kristo pakini sikai ikinipoko erekari. Iamonïkaina. Ikamaerekaxiniretaina pite.

Atão Minakati Oerekakani

³ Masetónia tixinimoni nisikasaaki, nipaniãtai pite Épeso sitatxiti pikaikotini. Uatxa iuaïkana nipaniãtai ereë Épeso pikaikotini. Ikara ninireka, kotxi apanakini ereë auakani oerekari Teoso sãkire kãkitimoni, txamari na atãoni ninoa oerekakiti. Ninirekai pite pinitinina ninoa atão minakati imoerekakanina ïkapani, ⁴ kotxi ninoa sãpiretapikari kitxakapirïkari pirena. Ninoa xinikapikari aãtokiriakorini uãka, ininiãkara kãkiti taparakienatakakaua iuãkana ïxinikasaakina. Põtãkikanako ninoa ikara atoko inakari sãkiretxiti itakanapinina, kotxi ikara sãkiretxiti !oerekari kãkiti Teoso nireëkiti. Teoso sãkire aãuikiniã, aimarotari Teoso nireëkiti. ⁵ Nipaniãtai pite ikara atoko, kotxi ninirekari ereë Teoso sãkire auiãkani tiretakakiniua. Kãkiti ãkixinire maerekati mauakaniã, ininiã itiretakakaua. Kãkiti imarotakasaakiri ikamakiti ereka inini, itiretakakaua. Kãkiti ikara atoko inakari atão auikari Xesosi sãkire. ⁶ Kãkiti, Teoso sãkire atão masãpiretakani, takanapari ikara erekari kimaporiti. Pïpinanaãkani atoko itxauana, kotxi !imarotaikarina Teoso kimapore. Maxikatiïka isãkirauatapikana. ⁷ Ninoa kãkiti nirekamari Teoso paniãtakiti oerekakani ininiuana, txamari !imarotarina Teoso paniãtakiti. !Imarotarina isãpiretakitina, iuaritika ninoa: “Atãopitika asãkire,” itxanãtana.

⁸ Kãkiti atão sãpiretakasaakiri Teoso paniãtakiti iõkatakori, iuasaaki aimarotari ipaniãtakiti ereka inini. ⁹ Mauiritakoti aua, kona kãkiti atão inakari kamakani ïkapanini. Mauiritakoti aua, kotxi maerekati kamakani auapitika. Aua mauiritakoti manireëkani. Aua Teoso manireëkani. Aua maerekati kamakani. Aua erekari manireëkani. Aua Teoso paniãtakiti napetakani. Kãkiti aua iri okakani. Kãkiti aua inoro okakani. Aua kokanirini. Mauiritakoti aua, kãkiti ikara atoko inakari ïkapani. ¹⁰ Aua kãkiti ãti ïtanorokata sirïkakari. Aua kãkiti ãto tanirikata sirïkakarõ. Aua kiki ãti kikikata sirïkakari. Aua sito ãto sitokata sirïkakarõ. Aua kãkiti ãti kãkiti ïtiriãkani ivëtxitiniri ïkapani. Aua aãpirenaãri. Aua kãkiti ãti apoïtakani. Mauiritakoti aua ikara atoko inakari kãkiti ïkapani. Ninoa !auikari Teoso sãkire atão inakari. ¹¹ Ikara Teoso iokanapirena erekari sãpiretaua. Peerekari Teoso. Peerekari iua iokanapirena. Iua paniãtano nota iua iokanapirena nisãpiretini ikininapemoni.

Teoso Amonïkiniri Paoro

¹² Nitxari aãuïte Kristo Xesosi: “Erekari pite kaminano, kotxi pisikataparaxiniretano nota pite ïkapani nipaïkauatini ïkapani. Erekari pauikiniri nisãkire. Erekari pimereinino nota pisãkire ikininapemoni nisãpiretini ïkapani,” nitxari Kristo Xesosi. ¹³ Meresaaki nota misãkirepiretari iua Xesosi. Nasikatikinitana iua sãkire auiãkani nokinina ïkapani. Kaneenamari nitxaua iuasaaki. Iuaritika Teoso amonïkano. !Imisiritano nota, kotxi iuasaaki !nimarotari nikamakiti Xesosi sãkire nimauikakani xika. ¹⁴ Iuasaaki !erekano. Maerekati nitxaua. Iuaritika aãuïte Kristo Xesosi sikari ikinipoko erekari notamoni. Kristo Xesosi nakiti nitxapekaua, ininiãkara nauikari isãkire. Iua nakiti nininiãua, nitiretari iua. Nitiretari apanakini apaka. Mitxi !nimarotari nitiraõkuiatini.

¹⁵ Nisãpiretaiko ia sãkiretxiti atão inakari, pauikiniri ïkapani, ikinimane auikiniri ïkapani. Nitxai: “Kristo Xesosi apoka ïkorapokoriti maerekati kamakani maerekani imakatzakini ïkapani,” nitxa. Maerekati apiata kamakari nitxaua nota. ¹⁶ Maerekati apiata kamakari nitxaua, iuaritika Teoso !imisiritano. Iamonïkano, kotxi inirekari apanakini imarotiniri Kristo matima omanãkarauatakani kãkiti maerekani xika. Xesosi nirekari nota eereka auakani, isãkire auiãkani imarotiniri Xesosi amonïkinina ninoa, kotxi iua amonïkano nota maerekati apiata kamakarino. Ninoa auikari isãkire, ininiãkara auapininiika Teosokata. ¹⁷ Nitxari Teoso: “Ari Teoso, peerekai. Ætipirika ikinimane auïte pitxaua. Pipinini !auari. Matamatakoti pitxaua. Pitenokara Teoso txaua. Pitenokara kimaroreri. Ikinimane paxitaiko ãtipirika. Ikinimane ãtipirika sãpiretaiko ereka pinini. Atãopitikara nisãkire. Ameẽ.”

Xesosi Sãkire Iteene Auikiko

¹⁸ Tximótxio, namarite atoko pitxaua. Nisãpiretai noerekakiti sãkiretxiti pikaminiri ïkapani. Pixinikariko akokaxiti Teoso sãkire sãpiretakani sãpiretakiti. Ninoa sãpiretai Teoso nirekakiti pite kamini tïkane. Nota sãkire uatxa ninoa sãkire atokotxikana. Ikara ninoa oerekakiti sãkiretxiti pikamapikako, ininiãkara pite sotato erekari atoko pitxaua Satanasi pinaiatini. ¹⁹ Pauikapikariko Xesosi sãkire. Ikara pikeeko atoko itxa. !Pikamapiri pãkixinire mapokaerekatakiniti. Ikara apaka pikeeko atoko itxa. Apanakini kamapekari ãkixinirena mapokaerekatakiniti, ininiã eereka !auikaikarina Xesosi sãkire. Kanaua sakikini atoko itxa ninoa auikiniri Xesosi sãkire. ²⁰ Imeneo inakori, Arexãtri inakori apaka ikara atokokana itxana. Ninoa misãkirepiretari Teoso, ininiãkara nota sikanapana ninoa Satanasi. Satanasi misiritakasaakina ninoa, atxiïti itakanaparina Teoso imisãkirepiretinina.

2

Teoso Misãkiretiko Ikinimane ïkapani

¹ Merepanika nõtãkikai pimisãkiretiniri Teoso ikininape kãkiti ïkapani. Pimisãkiretariko Teoso ninoa nireẽkiti ïkapani. Pamanaãriko Teoso sikiniri erekari ninoamoni. Pitxariko Teoso: “Peerekai pite, kotxi erekari pisikakiti kãkitimoni.” ² Teoso pimisãkiretako auïtetxiakori apiari ïkapani, auïtetxiakori poiãori ïkapani apaka. Pamanaãriko Teoso ninoa ïkapani, aãuini ereka inini ïkapani, neenamatchi mauakani ïkapani. Ikara atoko aniniã, akamari Teoso nireẽkiti erekarinoka. ³ Ikara akaminiã erekapitikari. Teoso, amaerekani makatzakakari, apokaerekatari asãkire ikara atoko inakari akamini. ⁴ Teoso nirekari imakatzakiniri ikinimane maerekani. Inirekari ikinimane imarotiniri atão inakari sãkiretxiti. ⁵ Ætinokara Teoso aua. Æti kikinokara mikanapiriãri kãkiti Teosomoni. Xesosi Kristonokara mikanapiriãri kãkiti Teosomoni, kotxi iuanoka misãkiretari Teoso kãkiti ïkapani. ⁶ Iua ipina ikinimane kãkiti iïkitxitini ïkapani. Teoso ketotini õti manapi Xesosi ipina. Xesosi ipinini oerekaua Teoso nirekiniri imakatzakiniri ikinimane maerekani. ⁷ Ininiãkara Teoso akiritano nota isãkire ikinimanemoni nisãpiretini ïkapani. Ininiã Teoso iokanatakiti kãkitimoni nitxaua nota. Ikara nisãkire atão. Kona paxirarini. Teoso akiritano Xoteo minakaniua noerekini ïkapani. Akiritano atão inakari sãkiretxiti noerekinina ïkapani. Akiritano noerekinina Teoso sãkire auikinina ïkapani.

⁸ Ininiã ninirekari kikiakori erekarinoka kamakani, ikini itixiti auakani, misãkiretiniri Teoso. Ninirekari Teoso imisãkiretakasaakina, iusaaki ninirekari isãkire auikinina apaka, ãti imomanatakanina.

Sitoakoro Xesosi Sãkire Auiãkani

⁹ Ninirekari sito mãka atão inini, kiki paxitiniro ïkapani. !Apakata oõuikiniua omãka ereka inini xika. !Erekari sito ãtipirika oeretiniri oiãko kãkiti xikaueretiniro ïkapani. Oro, pérora pakini otakinia õitoã kãkiti xikaueretiniro ïkapani, !erekari. !Erekari mãkatxi kakaroneri oieretakini. ¹⁰ Sito Teoso nireẽkiti nireẽkaro kaminiãri erekari, erekapitikari.

Mãkatxi peereri atoko itxa erekari okamakiti, kotxi kãkiti atamatari okamakiti. ¹¹ Teoso sãkire sãpiretakari oerekarauatakasaaki, erekari sito kenakotiniri. !Apakata iuasaaki osãkirauatini. Erekari opaxitiniri iua, isãkire okĩpitini ìkapani. ¹² Nota !auiritaro sito oerekinina kikiakori, ikamakitina tìkane opaniãtinina. Erekari masãkiretoka onini. ¹³ Ikara atoko itxa, kotxi merepitipanika Teoso kamari kiki Adão inakori. Eerekaikara ikamaro sito Eva inakoro. ¹⁴ Kona Adãoni misirienetaãka. Sitora misirienetapeẽka. Oa kamari maerekati, kotxi !okamari Teoso paniãtakiti, ininiãkara !apakata sito paniãtiniri kiki ikamakiti tìkane. ¹⁵ Sito auikiniãri Teoso sãkire, otiretiniãri apanakini, maerekati omakamakaniã, omasarauatakaniã, Teoso makatxakari omaerekani, kotxi ãto sito eenetari Xesosi, amaerekani makatxaãkari.

3

Kõtãkikarerini Pirena

¹ Ia nisãkire atão. Kiki nirekiniãri kõtãkikarerini ininiua, Teoso sãkire auiaãkani õtãkikini inirekiniã, iua nirekari parĩkatxi erekari. ² Ia atoko kõtãkikarerini txauako: !Ikamari maerekati, ininiã iua apoĩtiko !auari. ãtonanirako ìtanoro. Kiĩkiteri itxauako. !Katimari omanãkarauatini. Ipaxitaãkako. Kãkiti ãtiãtaã ìkani apakapako aapoko. Imarotariko oerekarauatini. ³ !Ipoãtapeko. Kaneenamari !itxapeuako. Katiraõkiri itxauako. !Ipotxitapiriko neenamati. Txineiro iteene !ixinikaperoko. ⁴ Iua nĩkatanako aapoko auakani, ninoa auini ereka ininina tìkane. Itxĩkitakanako imiakori ipaniãtakiti ikĩpitinina ìkapani, ininiã ninoa paxitari iua. ⁵ Ikara atoko itxako kõtãkikarerini, kotxi aapoko auakani imamimatanĩkaretakaniã, ininiã !imarotari kãkiti Xesosi sãkire auiaãkani inĩkatini. ⁶ Kiki mapaõtinoka auikiniãri Xesosi sãkire, !apakata iua Xesosi sãkire auiaãkani õtãkikakarini ininiua. Xesosi sãkire auiaãkani õtãkikakarini ininiãua, iuikaua atxiĩti. Iuikiniãua, Teoso misiritari iua, kitxakapirĩka Satanasi iuikasaakia imisiritini atokokana. ⁷ Kiki Xesosi sãkire auiaãkani õtãkikakarini paxitaãkako, Xesosi sãkire mauiaãkani apaka paxitari iua. Ikara atoko ininiã, !ikamapaniri kãkiti kamapõtatakari. Ininiã Satanasi !imaĩkari iua itakapiremoni.

Kamiparĩkarerini Pirena

⁸ ãtipekana, Xesosi sãkire auiaãkani miparĩkatakanipekana nisãpiretaiko: Iua kamariko erekari, ipaxitiko tìkane. ãtika isãkire itxauako. !Ipoãtapeko. !Apakata txineironoka ixinikini. ⁹ Kamiparĩkarerini iteene auikariko Teoso sãkire atão inakari. ãkixinire imarotariko ikaminiri Teoso sãkire iaõka. ¹⁰ Xesosi sãkire auiaãkani ataerekatariko kiki, kamiparĩkarerini ininiua nireẽkari. Erekarinoka ikaminiã, ininiã iua auiritaãka ninoa miparĩkatakari ininiua. ¹¹ Iua atokokana kamiparĩkarerini ìtanoro kamariko erekari opaxitiko ìkapani. Aãpirena !okamapeko. !Opoãtapeko. Okamariko okamaenetakiti iaõka. Ininiã kãkiti auikari osãkire. ¹² ãtonanirako kamiparĩkarerini ìtanoro. Inĩkatariko imiakori, kãkiti iua aapoko auakani apaka, ninoa auini ereka ininina ìkapani. ¹³ Kamiparĩkarerini atão parĩkauatiniã, iteene ipaxitaãka. Apanakini apokaerekatari iparĩka. Ininiã itaparaxinireritika isãpiretari Kristo Xesosi sãkire auikiko kãkitimoni.

¹⁴ Uatxa pitemoni niõkatsopatakasaaki, ninirekari paĩtiki nisini hĩtemoni. ¹⁵ Atxiĩti uai okanani nauapanika, ininiã ia iõkatsopari oerekaiko pite Teoso nakitiakori atão auini ikiniõtika, kotxi Teoso aapoko atoko atxaua, iua auiniãtaã ìkapani. Teoso auãki itxapika. Kãkiti iua nakitiakori nĩkatari iua sãkire. !Auiritana apanakini koketiniri atão minakati Teoso sãkirekata. Isãpiretana ikinimane Teoso sãkire atão inakari. ¹⁶ Peerekari Teoso parĩka kãkiti ìkapani. Merepanika kãkiti !imarotari, eereka Teoso oerekari iparĩka. Ia atoko Teoso kaminua ate:

Kãkiti itxapekaua. Iua Xesosi. Erekari Matamatakoti oerekari kãkiti Xesosi sãkire atão inini. Teoso nitiriakori iaxitikini atamatari iua. Isãkire sãpiretaãka ikini

itixiti auakanimoni. Kākiti auikari isākire. Eereka Xesosi anikaāka iaxiti Teoso tixinemoni.
Ikara atoko inakari Teoso parīka kākiti īkapani.

4

Atāo Minakati Oerekakani

¹ Iua Erekari Matamatakoti sāpiretaua, apanakini ! auikaikari Xesosi sākire itixi mapotōkire ōti takote. Ikara atāo. Iuasaaki ninoa auikari maerekani matamatakoni misirienere. Auikarina Satanasi nitiriakori oerekakiti. ² Kākiti ikara atoko inakani sāpiretari atāo minakati. Ninoa sākire āti, txamari ninoa xinikakiti ipinimoni. Ninoa ākixinire sākire !auaika. !Isāpiretaikarina maerekati imakamakanina īkapani. Kapatakari arikakiti atoko itxa ninoa ākixinire sākire. ³ Kākiti ikara atoko inakani ! auiritari kākiti ītanorouatini. “!Erekari kākiti ītanorouatini,” itxa ninoa sākire. Teoso kamari ikini nipokori kākiti nikini īkapani. Txamari ninoa kamisirienenerini ! auiritari kākiti apanakini nipokori inikinina. Teoso nirekari Xesosi sākire auiākani, atāo inakari imarotakani, nikiniri ikara nipokori Teoso imisākiretaka atoko: “Erekapitikai ia nipokori pisikiniāua.” ⁴ Ikinika Teoso kamakiti erekari. !Apakata kākiti manirekakaniāri apanakini nipokori. Ikinipoko nipokori hinikasaaki, himisākiretariko Teoso. Hītchariko: “Erekapitikai ia nipokori pisikiniāua.” ⁵ Teoso sākire sāpiretaua ikinipoko nipokori anikini. Nipokori anikasaaki, amisākiretiniāri Teoso, nipokori isikakiti ereka inini asāpiretiniāri, ininiā ikara nipokori erekari anikini.

Kristo Xesosi Nitiri Erekari Inakari

⁶ Aītariakori pōtākikiniā ikara atoko, Xesosi Kristo nitiri erekari pitxaua. Nipokori sikataparitari kākiti īto. Teoso sākire aāuiākiti, oerekaretxi atāo inakari, nipokori atoko itxa, kotxi isikataparitari axinire. Pite auikapikari oerekaretxi atāo inakari. ⁷ ! Pimaākatapiri miīkiteti sāpiretakiti, sākiretxi Teoso mapokaerekatakiniti. Ikiniōtika piteka poerekauako Teoso paniātakitinoka pikamini, ininiā Teoso nireēkitixikana pikama. ⁸ Piīto parīkauatakasaaki, piīto tapara apiaāpota, ininiā erekari piparīkauatini. Api-aerekata pixinire parīkauatini pixinire auāki inini īkapani. Pixinire īkorasaaki auāki ininiā, pauapikako Teosokata ātipirika. ⁹ Ikara nisākire atāo. Erekari ikinimane auikiniri ikara. Erekari ikinimane kaminiri ikara. ¹⁰ Ininiākara iteene aparīkauata Teoso īkapani. Pasāpaniri, iuaritika aparīkauatipitipo, kotxi aāuikari Teoso sākire, Teoso mipīkati sākire. Iua ikinimane kākiti maerekani makatxaākari itxaua. Iua makatxakari isākire auiākani maerekani, maerekani misiritikoātaā imasikanina īkapani.

¹¹ Pipaniātariko kākiti noerekakiti sākiretxiti iaōka ikaminina. Poerekana noerekakiti.

¹² Pite ātokoripanika, iuaritika pimarotapitikari Teoso sākire, ininiā !pauiritapiri kākiti napetiniri poerekakiti sākiretxiti. Atāo inakarinoka pikamako Xesosi sākire auiākani atamatini īkapani, ininiākara ninoa auikapitkariko pisākire, ininiā ninoa nirekari pite atoko ininina. Erekarinoka pisāpiretako. Erekarinoka pikamako. Kākiti pitiretako. Iteene pauikariko Teoso sākire. Maerekati !pikamapeko. Ikara atoko pininiā, ninoa nirekari pite atoko ininina. ¹³ Ereē nimapokakanisaakipanika, patatsopatariko Teoso sākire iōkatsopatakorini, apanakini kenakotiniri īkapani. Pisāpiretanako Teoso sākire. Teoso sākireē pōtākikanako. Poerekana Teoso sākire atāo imarotinina īkapani. Ikara atoko pitxapikanako, ereē napokini apisapanika. ¹⁴ Akokaxiti kōtākikarerini sāpiretai piparīka Teoso īkapani. Iuasaaki ninoa takari iuakona pite nopini, pite īkapani imisākiretakasaakirina Teoso. Ikara atoko ininiākara, pikamapikariko ikara piparīka Teoso īkapani. ¹⁵ Ātipirika pixinikariko ikara nōtākikini. Ikiniōtika pikamariko piparīka Teoso īkapani. Ininiā apanakini imarotari Teoso sākire apiaāpota pauikini. ¹⁶ Erepaniko pikamakiti ereka inini īkapani. Erepaniko poerekakiti sākiretxiti Xesosi oerekakiti iaōka inini. Ikara ātipirika pikaminiā, piteka makatxakaua pimapanakani īkapani. Apaka pimakatxakana pisākire auiākani imapanakani īkapani.

5

Ōtākipirenatxi Pirena

¹ !Pitxitapiri kiki aneēkari. Pōtākikariko, piri pimisākiretini atokokana. Pōtākikariko kikiakori pite tikini auakani, pitariakori pimisākiretini atokokana. ² Pōtākikaroko sito aneēkaro pinoro pōtākikini atokokana. Pōtākikaroko ātokoro, pitaro pōtākikini atoko. Iuusaaki pipaxitaroko.

Sitoākini Tikinitakoni

³ Pinīkatanako sitoākini tikinitakoni onirimane matiretakini. ⁴ Tikinitakoro oimiakori auiniā, oītariakori anaakori auiniā, ninoa nīkatamaroko oa. Ikara ikaminiāna, erekari Teosomoni. Teoso poxokotana ninoa. Merepanika ninoa kaminiāri erekari ninoaka aapoko āki, aimarotari ninoa atāo auikiniri Teoso sākire, kotxi meresaaki irina, inorona pakini nīkatana ninoa. ⁵ Tikinitakoro minīkatakoto auikari Teoso inīkatiniro oa. Oa misākiretari iua pokamara, īkanōka pakini inīkatiniro īkapani. ⁶ Tikinitakoro osarauatininoka nireēkaro, ipīkaro atoko otxaua. ⁷ Pisāpiretanako ereē auakani, Xesosi sākire auīākani nīkatiniro inorona, inorona itaro tikinitakoro pakini. Inīkatiniāna, !apoītaākana. ⁸ Xesosi sākire auīākani manīkatakaniāri inirimane, itakanaparina Teoso sākire auikinina. Apia maerekanita iua aapoko āki auakani imanīkatakaniā. Kākiti Teoso sākire mauīākati maerekati itxaua. Apia maerekati itxaua iua aapoko āki auakani manīkatakati.

⁹ Apanakini sito tikinitakoni moianatana Xesosi sākire auīākani. Pitakariko ninoa tikinitakoni uāka aātsopaā himoianatini īkapani. Sito ikara atoko inakaro sesēta ano apiko auakaro oa. Ātinoka oītanirini. ¹⁰ Oa imarotaāka, kotxi erekarinani okama. Atāo oōerekari oimiakori. Osikakienatana ātiātaā īkani. Oimarotaāka, kotxi oa arokakititari kākiti Teoso nakitiakori. Oimarotaāka, kotxi kākiti maerekaxinireni otireta. Oimarotaāka, kotxi ikini sereti erekari ātipirika okama. Tikinitakoro ikara atoko inakoro uāka aātsopaā pitaka himoianatini īkapani.

Tikinitakoni Ātokoropanika Inakani Ōtākikiko

¹¹ !Pitakapiri tikinitakoro uāka iua aātsopaā, ātokoropanika inakaro, kotxi iuaīkana onirekari kikikata osirīkini, ininiā onirekari iuaīkana oītaniriuatini, ininiā !onirekaikari Kristo. ¹² Ikara atoko okaminiā, okamari maerekati, kotxi mitxi osākire: “Nikamariko parīkatxi Teoso īkapaninani. !Nītaniriuataikako,” otxama. ¹³ Tikinitakoro ātokoropanika inakaro itotari oiarinauatini. Oianapokotapika. Apia maerekati okama, kotxi ototari aāpirena okamini. Onirekari ikinika apanakini kamakiti oimarotini, txamari ikara atoko !apakata. !Apakata āti kamakiti osāpiretini apanakinimoni. ¹⁴ Ikara atoko ininiā, !pitakapiri tikinitakoro ātokoro inakaro uāka iua aātsopaā. Nota ōtākikana ātokoroakoro tikinitakoni iuaīkana taniriuatini. Erekari keene ininina, aapokona iparīkauatinina. Ikara atoko ininiā, Xesosi sākire mauīākani kona misākirepiretana Xesosi sākire auīākani. ¹⁵ Nota ikara atoko nisāpiretai, kotxi ātikaka tikinitakoni ātokoroakoro inakani takanapapekari Xesosi sākire auikinina, Satanasi paniātakiti ikaminina īkapani. ¹⁶ Xesosi sākire auīākani inirimanena tikinitikoā, inīkatanako ninoa. !Erekari imanīkatakanirina inirimanena tikinitakoni. !Erekari inirekinirina apanakini Xesosi sākire auīākani nīkatiniro inirimanena, kotxi ninoa nīkatana kaiāopokori tikinitakoni manirimaneni. Pasāpaniri ninoa parīka.

Kōtākikarerini Pirena

¹⁷ Kōtākikarerini atāo kaminiāri iparīka Xesosi sākire auīākani īkapani, erekari hīsikinina iparīkana īki apiata. Teoso sākire isāpiretiniāna apanakinimoni, Teoso sākire oerekiniāna, ininiākara erekapitikari apiata iparīkana īki hīikitxitinina. ¹⁸ Teoso sākire iōkatsopatakori txari:

!Hīaxirikanamatapiri kema auīte iparīkauatakasaaki, triko ikatxaratakasaaki. Pauiritariko inikiniri triko iki, iparīkauanātakasaaki.

Teoso sãkire iõkatsopatakori txari apaka:

Erekapitikari parĩkauatakori apakapiniri iparĩka ĩki.

¹⁹ Āti apoĩtiniãri kõtãkikareri, !pimaãkatapiri isãpiretakiti. Ipi, atxiĩti ipi āti pakini kãkiti atamatiniãri kõtãkikareri kaminiri maerekati, isãpiretiniãina pite, pikenakotapitikari ninoa sãpiretakiti. ²⁰ Põtãkikanako Xesosi sãkire auiãkani maerekati kamakani apanakini Xesosi sãkire auiãkani apisatoõ, ininiãkara apanakini pĩkari maerekati ikaminina.

²¹ Tximótxio, nota paniãtai ikara noerekakiti iaõka pikamini. Teoso apisatoõ, Api-ananiri Xesosi Kristo apisatoõ apaka, Teoso nitiriakori iaxitikini imereẽkini apisatoõ apaka, nipaniãtai ikara noerekakiti iaõka pikamini. Ninoa kenakotari nisãkire pite-moni. Ātinokarako pisãkire txauako ikininape kãkitimoni. Erekariki pikamako ikininape kãkitimoni, kãkiti pipotxitakinimoni, kãkiti pimapotxitakinimoni apaka. ²² Atxiĩti aua Teoso sãkire auiãkari iteene pimimarotakiniti. Ininiã !pimereẽpiri iua Xesosi sãkire auiãkani õtãkiãkari ininiua. Atxiĩti ikamapanikari maerekati. Pimereiniãri iua, pite moianatari iua maerekati ikamini. Erepaniko maerekati pimamakamani ĩkapani.

²³ Pite itokata amianata. Pitsii iriko, ininiãkara kona ãparaãnanini piãta. Ovaã poiãoka apaka piãtako pipini ĩkapani.

²⁴ Apanakini ! ikipatari maerekati ikamakiti, ininiã ikinimane imarotari. Apanakinipekana maerekati ikamakitina ! atamataãka ikamakasaakina. Ninoa kipatari. Okananixiti atokoikara imarotaãka ninoa maerekani. ²⁵ Iua atokokana erekari apanakini kamakiti atamataãka. Erekariki apanakini kamakiti ! atamataãka ikamakasaaki. Iuaritika okananixiti atokoikara imarotaãka.

6

Nitiritxi Amotakoni Pirena

¹ Nitiritxi amotakoni, Xesosi sãkire auiãkani, iteenerako iparĩkauatana ipatrãotena ĩkapani. Ninoa paxitanako ipatrãotena. Ikara atoko ininiãna, Teoso uãka ! imisãkirepiretaãka. Iua sãkire ate oerekakiti apaka !imisãkirepiretaãka iusaaki. ² Nitiritxi patrãote Xesosi sãkire auiãkari ininiãua, initiri paxitariko iua, kotxi itari apaka itxaua iua. !Apakata poiãonoka ipaxitiniri ipatrãote, itari ininiua xika. Erekariki iteene iparĩkauatini ipatrãote ĩkapani, kotxi ipatrãote auikari Xesosi sãkire. Teoso tirketakiti ipatrãote. Tximótxio, ikara noerekakiti sãkiretxiti poerekariko apanakinimoni. Põtãkikanako ikara iaõka ikaminina.

Txineiro Potxitakani Pirena

³ Aua kãkiti atão minakati oereẽkani. Ninoa !auikari aũũte Xesosi Kristo sãkire atão inakari. !Auikarina atão inakari oerekakori, Teoso sãkire. ⁴ Kãkiti ikara atoko inakari iuikaua, txamari !kimaroreri. Ipotxitari isãkirauatini apanakinikata itaparakiendatakakiniuana ĩkapani. Ininiãkara xikoretxi aua, neenamati aua, misãkirepiretakatxi aua. Ininiã kãkiti !auikari āti sãkire. Iuãkatari āti kaminiri maerekati. ⁵ Ninoa txitakakapikaua, kotxi ixinikakitina maerekatinoka. !Imarotaikarina Teoso sãkire atão inakari mitxi imarotakitina. Ninoa oerekari Teoso sãkire kãkitimoni txineiro ito apakapinina ĩkapani. Txamari na atão ninoa oerekakiti sãkiretxiti. !Pimaãkatapiri kãkiti ikara atoko inakari.

⁶ Teoso nireẽkitinoka pinirekiniã, ikinipoko pinireẽkiti auape, ininiã pãkixinire poxokoniua. Kipa apikomoni pinireka? !Auari. ⁷ Kiripa ate mina uai itixi aponaniãkasaaki? !Kaminareua. Kiripa aanika atekata apĩkasaaki? !Kanikareua. ⁸ Kamãka aniniã, kanipokore aniniã, apakatape. ⁹ Satanasi oerekari kãkiti maerekati ikamini txineiro apakapini ĩkapani. Ininiã tiitxi nireẽkari mokatanitika kamari Satanasi oereẽkiti. ! Erekariki tiitxi nireẽkari nireẽkiti. !Kiĩkiteri iua. Inireẽkiti txikatoro atoko, kotxi imaĩkari iua. Eereka !auaika itii, itxineirote, ipoxokoni pakini xipope. Inireẽkiti xika Teoso iokanatariki iua kãkiti misiritikomoni. ¹⁰ Kãkiti iteene potxitiniãri txineiro, ikamari maerekati. Takari aneẽ, kotxi ikotsa aua. Iua atokokana maerekati aua ikotsa. Txineiro

potxitiko maerekati kotsa itxaua. Txineiro potxitiko auiniã, ikini sereti maerekati aneë. Apanakini txineiro potxitakani takanapaãpotari Teoso sãkire, ininiãkara txineiro potxitakari iuaka karotapekaua ãkixinireë. Iuaka maerekaxinireti itxĩkitakaua.

Paoro Ôtãkikiniri Tximótxio

¹¹ Pitepekana Tximótxio, Teoso paniãtakiti kamakari pitxaua, ininiãkara ikara maerekati xatiki ! pikamape. Atão inakarinanirako ikiniõtika pikamako. Teoso nireëkitinoka pikamako. Iteene pauikariko Teoso sãkire. Katiraõkiri pitxauako. Pimisiritiko auakasaaki, pimĩteenekariko. Teoso nireëkitinoka pinirekako. Kona pinirekapiri piteka nireëkiti. ¹² Pineenamauatako Teoso ïkapani. Ikara neenamatchi erekari, Satanasi piokanatini, kãkiti Teoso sãkire auikini ïkapani. Papakapariko Teoso sikakiti, kotxi iua akiritai iuakata pauapininiika pinini ïkapani. Kaiãopokori kãkiti imarotari Xesosi sãkire iteene pauikini, kotxi ikenakotapekari pisãpiretinina. Peerekari pisãkire ninoamoni. ¹³ Tximótxio, nimisãkiretai pite Teoso apisatoõ, Kristo Xesosi apisatoõ apaka. Ninoakara kenakotari nisãkire uatxa. Teoso ikinimane auãki inini txĩkitakakari iua. Kristo Xesosi Homano auite Põsio Pirato inakori apisatoõ auakasaaki, isãpiretari atão Teoso sãkire. ¹⁴ Nipaniãtai ikara noerekakiti sãkiretxiti iaõka pikamini. ! Pimamakapiri ikara noerekakiti. Ikara noerekakiti iaõka pikaminiritika aãuite Xesosi Kristo kanapiriãko. ¹⁵ Teoso ketotari Xesosi kanapiriini õti. Iuasaaki Teoso akiritari Xesosi ïkorapokoriti ikanapiriini ïkapani. Iuanokara kaposotiireri. Peerekari iua. Auĩtetxiakori auite itxaua. Apiarini sauaki iuanokara Apiananiri txaua. ¹⁶ Iuanoka ! ipina. Iuanokara ikinipoko auãki inini txĩkitakakari. Iua auiniãtaã iotximere auapika, ininiãkara kãkiti ! iposota imatokotiniri Teoso. ! Katamatikori. Kãkiti ! iposotari atamatiniri iua. Iuanokara kaposotiireri ãtipirika. ãtipirika maãkiritari: “Peerekari Teoso.” Ameë.

Xesosi Sãkire Auiãkani Katxineiroterini

¹⁷ Pipaniãtanako kãkiti katxineiroterini: “Katii hininiã, !hũikapeuako. !Hĩpoxokotapero hĩtxineirote, kotxi ãti õti atxiĩti hĩtxineirote ! auaika. Hĩpoxokotariko Teoso, ãtipirika auãkiri, kotxi iuara sikaua ikinipoko apotxitakiti. Kaiãopokori isikaua. ¹⁸ Erekari hĩkamako. Hĩtxineirote kaiãopokoro auini atokokana, erekari kaiãopokori hĩkaminanako apanakini. Kaiãopokori hĩtii auiniã, hĩsika kãkiti kaamonirimoni. Himarotakasaakiri, matxineiroteni amonitakiti hĩsikanako ninoa. ¹⁹ Ikara atoko hininiã, hãpotiãpotari erekari Teoso tixinekiri. Iuaã apotiitakori !ixipoka. Ipinaãkana atoko, auinapanikana. Ikara atoko hĩkaminiã, hãpakapari Teoso sikakiti. Iua txĩkitakai hãuapininiika hinini Teosokata.”

Ikara pisãpiretako katxineirotenimoni.

Paoro Iõkatsopare Mapotõkire

²⁰ Ari, Tximótxio, atão pikamariko parĩkatxi Teoso sikakiti pitemoni pikamini ïkapani. !Pimaãkatapiri sãkiretxi Teoso mapokaerekatakiniti. !Pimaãkatapiri kãkiti, “Kimaroreno nota,” inakari, kotxi !imarotari imaroretxi atão inakari. ²¹ Ninoa sãkire: “Imaroretxi auapitika notamoni,” itxa. Txamari na xatiki imarotari Teoso imarore. Ikara xika ninoa takanapaãpotari Teoso sãkire auikinina.

Teoso sikai ikinipoko erekari. Ameë.

2 TXIMÓTXIO

Paoro Iokanatsopatakiti Iuaĩkana Tximótxiomoni

¹ Tximótxio, nota Paoro iokanatsopata pitemoni. Teoso mereẽno nota, Kristo Xesosi iokanatinino ĩkapani, isãkire nisãpiretini ĩkapani. Kãkiti Kristo Xesosi nakiti ininiãua, Teoso txĩkitakari ixinire auãki inini, kotxi Teoso kamaenetapekari ikara ikamini.

² Pite Tximótxio namarite nitiretakiti atoko pitxaua. Aĩri Teoso, aãũte Kristo Xesosi pakini sikai ikinipoko erekari. Iamonĩkana. Ikamaerekaxiniretaina.

Paoro Őtãkikiniri Tximótxio

³ Nota parĩkauata Teoso ĩkapani. Ninirimane kitxakapirĩkarini parĩkauatini atokokana niparĩkauata. Nãkixinireẽ nimarotari maerekati nimakamakani, Teoso ĩkapani niparĩkauatakasaaki. Nota txari Teoso: “Erekapitikari pikamakiti Tximótxio ĩkapani,” nitxa. Nimisãkiretapikari Teoso pite ĩkapani, ĩkanõka, pokamara, ĩkanõka, pokamara nitxapika. ⁴ Nipiãtai. Nixinikari pite txiapatini nitakanapakasaakii, ininiã ninirekari naõkitinii iuaĩkana nipoxokoniuatini ĩkapani. ⁵ Nixinikari pite atão auikiniri Teoso sãkire. Merepanika pakiro Aróitxi inakoro, pinoro Eonisi inakoro pakini atão auikari Teoso sãkire. Nimarotapitikari pite apaka auikiniri Teoso sãkire ninoa auikiniri atokotxikana. ⁶ Ininiãkara nõtãkikai. Akoka niuako nitakasaakiri pikiiã, Teoso sikai parĩkatxi iua ĩkapani pikamini. Iuasaaki isikaposotiiretai ikara parĩkatxi pikamini ĩkapani. Itene pikamariko ikara parĩkatxi iua ĩkapani. ⁷ Teoso sikapekua Erekar Matamatakoti, ininiã !kapĩkareua. Iua Erekar Matamatakoti sikataparatarari aãkixinire. Iua oerekaua atiraõkiuatini. Oerekaua maerekati aĩto nireẽkiti amanirekakani.

⁸ Ininiã !pipẽtatapiri aãũte sãkire pisãpiretini. Apaka !pipẽtatapeno nota, kotxi kateia ãki naua Xesosi sãkire nisãpiretini xika. Maãtatsiirauata, Teoso iokanapirena erekari asãpiretini xika, kotxi Teoso sikataparataua amisiritiko amĩteenekini ĩkapani. ⁹ Teoso makatzakapekari amaerekani. Iua akiritapekua inakitiakori aniniua ĩkapani. Aparĩka kona txĩkitakari Teoso makatzakakiniri amaerekani. Imakatzakari amaerekani, kotxi inirekari ikara atoko ikamini. Imakatzakari amaerekani, kotxi inirekari ikinipoko erekari isikiniua. Itixi kamiko apisapanika Kristo Xesosi sikari ikara erekari atemoni. Iuasaaki imakatzakari amaerekani. Iuasaaki akiritaua inakitiakori aniniua ĩkapani. ¹⁰ Uatxa Teoso oerekari ikara erekari kãkitimoni, kotxi amaerekani makatzakakari Xesosi Kristo apokapeka ĩkorapokoriti. Iua xipokapekari ipĩkitxi. Isãpiretari Teoso iokanapirena erekari, kãkiti mapinakani ĩkapani, Teosokata ãtipirika auini ĩkapani.

¹¹ Teoso mereẽno nota ikara iokanapirenatxi sãpiretakari nininiua tĩkane. Imereẽno iua iokanatakiti kãkitimoni nininiua. Imereẽno Xoteo minakanuia oereẽkari nininiua.

¹² Teoso iokanapirena erekari nisãpiretini xika, natatsiirauata. Iuaritika !nipẽtauata, kotxi nimarotari Xesosi. Itene nauikari iua sãkire. Nimarotapitikari iua nĩkatinino nota. Inĩkatiniritikano ikanapiriãko. ¹³ Teoso sãkire pitemoni noerekakiti iaõka poerekako apanakini, kotxi noerekakiti atão. Pauikapikariko Kristo Xesosi sãkire. Katiraõki pitxako, kotxi Xesosi nakiti atxaua. ¹⁴ Pimarotari Teoso iokanapirena erekari. !Pauritapiri ikoketiko. Teoso sikari ikara iokanapirena pitemoni, apanakini pisãpiretini ĩkapani. Erekar Matamatakoti auaĩtotaua. Iua posotiireẽ pinĩkatariko Teoso iokanapirena pitemoni isikakiti.

¹⁵ Pimarotari kãkiti Xesosi sãkire auiãkani Ásia tixine auakani takanapano nota. Aĩtariakori Pixero inakori, Emoxeni inakori pakini takanapano nota. ¹⁶ Onesĩporo inakori !itakanapano. Ninirekari Teoso tiretinina iua aapoko auakani. Itokata ikamapoxokonitano nota. !Ipẽtatano kateia ãki nauakasaaki. ¹⁷ Homa sitatxiti apokasaaki, initaãpotano nota, eereka apokano. ¹⁸ Pite imarotari iua itene moianatinino nota, Épeso

sitatxiti nauakasaaki. Ininiã nixari Apiananiri: “Ninirekari piamonĩkiniri Onesíporo itixi xipokini õti manapisaaki.”

2

Misirikaretxi Mĩteenekiko

¹ Pitepekana namarite Tximótxio, kataparaxinire pitxako. Kristo Xesosi nakitiakori atxaua, ininiã iua sikari ikinipoko erekari atemoni. Ikara erekari sikataparatarari axinire. ² Pite kenakotapekari nisãkire noerekakiti kãkitimoni. Ininiã poerekariko ikara iaõka apanakinimoni atão inakari kamakanimoni. Eereka ninoa posotari oerekiniri nisãkire noerekakiti apanakinimoni apaka.

³ Sotato erekari mĩteenekari imisiritiko. Kristo Xesosi sotatone atoko atxaua, ininiã pimĩteenekariko pimisiritiko sotato erekari mĩteenekiniri atoko. ⁴ Sotato parĩkauatakasaaki, !ixinikaikari iparĩka mitxi ikamakiti sotato iminakanisaaki. Ixinikapikari sotato auĩte nireẽkiti ikamini, iauĩte poxokotiniri ĩkapani. Ikaranokara ixinikanãta.

⁵ Ātipekana nisãpiretai. Miteẽkari mitekaxi mapotõkire merepanika apoãkari apakapari imitekini ĩki. Mitekaxi paniãtakari paniãtini iaõka imitekiniã, apakapari imitekini ĩki.

⁶ Ātipekana nisãpiretai. Katarereri poparĩkari nikari itakare merepanika, kotxi iteene iparĩkauata. ⁷ Pixinikariko ikara nisãkire. Apiananiri kamaimaroretai ikara.

⁸ Pixinikariko Teoso iokanapirena erekari nisãpiretakiti kãkitimoni. Xesosi Kristo nisãpireta ikinimanemoni. Iua ipinaka atoko, iuaĩkana auãki itxĩkitakaãka. Iua Taviini apika mekaniri. ⁹ Natatsiirauata Teoso iokanapirena erekari nisãpiretini xika. Nota omanatakani iaxirikapekano kohẽtxiã, kokaniri iaxirikinina atoko, nota masikani ĩkapani. Teoso sãkire !iaxiriãka. Iaripireta ikini tõpati. ¹⁰ Teoso mereẽpekari kãkiti, imaerekani imaktxakini ĩkapani. Ininiã nota mĩteenekari nimisiritiko Teoso iokanapirena ninoa kenakotini ĩkapani, imaerekanina Kristo Xesosi makatxakini ĩkapani, ãtipirika Teosokata auinina ĩkapani. Iuasaaki peerekari. ¹¹ Nisãpiretaiko ia sãkiretxi atão inakari:

Xesosi Kristo ipina ate ĩkapani, ininiã amanirekakaniãri mitxi anireẽkiti, Xesosi nireẽkitinoka anirekiniã, ininiã aãuapika iuakata ãtipirika.

¹² Amĩteenekiniãri amisiritiko Xesosi sãkire aãuikini xika, auĩtetxi atxauako iuakata. Akipatiniãri iua aimarotini, iua apaka kipatarari ate imarotini.

¹³ Atxiĩti !akamari akamaenetakiti. Xesosi kamapitikari iua kamaenetakiti, kotxi iua liposotari maerekati ikamini.

Teoso Nitiri Atão Inakari

¹⁴ Ikara nisãkire pikamaxinikaretana Xesosi sãkire auĩãkani. Ninoa Apiananiri apisatoõ apotiitakasaakia, põtãkikanako: “!Hĩtxitakapeua maxikatiĩka kãkiti sãkire xika, kotxi !erekari,” pitxako ninoamoni. Kãkiti kenakotiniãri hĩtxitakakiniua, ininiã ! inirekaikarina Xesosi sãkire auikinina.

¹⁵ Tximótxio, pite Teoso nitiri pitxaua, ininiã iteene papaiaõkariko isãkire iõkatsopatakori Teoso apokaerekatini ĩkapani. Ininiã !pipẽtauata, kotxi atão poerekari Teoso sãkire iõkatsopatakori apanakinimoni. Teoso sãkire iõkatsopatakori atão inakarínoka itxa.

¹⁶ Apanakini sãkirauatakasaaki, isãkiretarina sãkiretxi Teoso mapokaerekatakiniti. Ikara atoko !pisãkiretape. Kãkiti ikara atoko inakani takanapaãpotari Teoso. ¹⁷ Ninoa oerekakiti sãkiretxiti karõtxi arakakari atoko itxa. Ikara atoko inakari amianari iarikaãpota. Ikara amianari iarikini atoko, ninoa oerekakiti iarikaãpota. Itxĩkitakari kãkiti maerekati ikamini. Imeneo inakori, Pireto inakori pakini oerekakiti sãkiretxiti ikara atoko itxa.

¹⁸ Ninoa takanapapekari Teoso sãkire atão inakari. Ninoa sãkire: “Teoso õkitikapekana Xesosi sãkire auĩãkani ixinirena auãki inini ĩkapani. !Õkitikapanina iĩtona itixi xipokini õti,” itxana. Ikara ninoa sãkire xika, apanakini !auikaikari Xesosi sãkire.

¹⁹ Aapokotxi tsota paikori inakasaaki, itsota iriko paítanori inakasaaki, iua aapokotxi ! irika. Teoso sãkire ikara aãtsota atoko. Auapika. !Ixipoka. Teoso sãkire txari: “Apiananiri imarotari inakitiakori.” Apaka Teoso sãkire txari: “Kãkiti, ‘Nota Kristo nakiti’ inakari takanapariko imaerekani.”

²⁰ Ikini sereti tiitxi aua aapokotxi mitari ãki. Aua apiata karonetakari oro kamakori, pirata kamakori pakini. Apaka aua poião ãki aamina kamakori, kipatxi kamakori pakini. Apanakini tiitxi ãki kaapokori takari nipokori kiiniri ãkapani. Apanakini tiitxi ãki itakari nipokori ikiniõtika kãkiti nikini ãkapani. ²¹ Ikara tiitxi atoko itxa kãkiti. Kãkiti takanapiniãri imaerekani, tiitxi apiata karonetakari atoko itxa iua. Teoso nirekari iua. Imereëri iua iparïka erekari ikamini ãkapani. Ininiã kãkiti iua atoko inakani iposope Teoso parïka ikamini ãkapani.

²² Ætokoripanika pinakasaakiaua, apanakini nirekiniãi maerekati pikamini, pimitekako, maerekati pimakamakani ãkapani. Pinirekariko atão inakarínoka pikamini ikiniõtika. Pinirekariko Xesosi sãkire iteene pauikini. Pinirekariko iteene katiraõki pinini. ! Pinirekapiri neenamati. Ikara atoko kãkiti kaminiã, erekaxinireri. Iua akiritari Apiananiri imoianatiniri ãkapani.

²³ Tximótxio, kãkiti txitakakasaakiaua sãkiretxi miïkiteti mimaroreti xika, !pikamapiri ikara atoko inakari, kotxi eereka ninoa neenamauata isãkirena xika. ²⁴ Apiananiri nitiri atão inakari ia atoko itxako: “!Itxitari ãti. Itiretari ikinimane. Koerekareri erekari itxaua. !Katimari omanãkarauatini. ²⁵ Õtãkikanako isãkire mauikakani momanãkaretika.” Ikara atoko Apiananiri nitiri ininiãua, atxiiti Teoso oerekana isãkire mauikakani atão inakari imarotinina ãkapani, imaerekani itakanapinina ãkapani. ²⁶ Ininiã iuaãkana kiïkitepeka itxana. Teoso sikakana ninoa txikatoro Satanasi takakitiã, kotxi mitxi Satanasi maïkana, iua nireëkiti ikaminina ãkapani.

3

Itixi Xipokini Õti Apisa

¹ Tximótxio, pimarotariko ia nisãkire. Itixi xipokini õti apisa pamonõkopianiriko. ² Iuasaaki kãkiti ia atoko inakari: Kapotxinaniri iua. Txineiro turetakani iua. Isãpiretari iposotiire ikinimanemoni. Iuikaua. Imisãkirepiretari Teoso, kãkiti pakini. !Ikamari iri paniãtakiti. Inoro paniãtakiti apaka !ikama. Æti kamakasaakiri erekari iuamoni, !itxari: “Erekapitikari pikamakiti nota ãkapani,” !itxari. !Inirekari Teoso. ³ !Itiretari inirimane. !Ikamari ikamaenetakiti. Imisãkirepiretari ãti maxikatiïka. !Iposotari erekari ikamini. Paneenamari. Omanatana erekari kamakani. ⁴ Imïkapiritari ãti. Ikamakiti ikamini apisa, !ixinikari ikamakiti tikane. Iuaka ixinikapikaua. Isarauatininokara itireta. ! Itiretari Teoso. ⁵ Iua sãkire: “Nauikari Teoso sãkire,” txamari !auikari Teoso posotiire. !Pauikapiri kãkiti ikara atoko inakari sãkire.

⁶ Kãkiti ikara atoko inakari ianapokota sitomoni oaãpokomoni. Sito ikara atoko inakaro miïkiteto. Maerekatinoka okama. Oïto nireëkiti maerekati onirekapika. Iua ianapokotapika oamoni, ininiã oa auikaãpotari iua oerekakiti sãkiretxiti. ⁷ Sito ikara atoko inakaro nirekari oimarotiniri oerekaretxi, txamari !oimarotari oerekaretxi atão inakari.

⁸ Kitxakapirïka Moisesi Exito tixine auakasaaki, Xani inakori, Xãpiri inakori pakini ! inirekari auikinirina Moisesi sãpiretakiti. Ninoa atokokana kãkiti itixi xipokini õti apisa auakani, !inirekari atão inakari. Ixinikapikarina maerekatinoka. Teoso !inirekari kãkiti ikara atoko inakari, kotxi iua kãkiti !auikari Teoso sãkire. ⁹ Poiãonoka kãkiti auikari ikara atoko inakari sãkire, kotxi imarotari miïkiteti iua. Iua atokokana kitxakapirïka apanakini imarotari Xani, Xãpiri pakini miïkiteni ininiua.

Teoso Nakitiakori Misiritiko

¹⁰ Pitepekana, pimarotapitikari noereëkiti sãkiretxiti. Pimarotari nikamakiti ikiniõtika. Pimarotari ninireëkiti nikamini. Pimarotari iteene nauikiniri Xesosi sãkire. Pimarotari nimĩteenekiniri nimisiritiko. Pimarotari nitiretiniri ãti. Pimarotari !katimari nomanãkarauatini. ¹¹ Pimarotari nimisiritiko. Pimarotari natatsiirauatini. Pimarotari nimĩteenekiniri nimisiritiko Átxiokia sitatxiti nauakasaaki, Ikónio sitatxiti apaka nauakasaaki, Arisitara sitatxiti apaka nauakasaaki. Iteene natatsiirauata, iuaritika Apiananiri makatxakano ikinika nimisiritiko. ¹² Ari, ikininape kãkiti nirekiniãri Kristo Xesosi nakiti ininiãua, inirekiniãri Teoso nireëkitinoka ikaminiã, atatsiitariko imisiritiko. ¹³ Iuasaaki maerekati kamakani maerekani, kamisirienererini maerekani, apiaãpotako. Ninoa misirienetari apanakini. Apaka apanakini misirienetana ninoa.

Teoso Sãkire Iõkatsopatakori

¹⁴ Pitepekana Tximótxio, pauikapikariko atão inakari poerekiko. Ikara pauikapitika, kotxi pimarotana pite oerekakani. Pimarotari atãonoka ninoa oerekakiti. ¹⁵ Pite axapitipanika pinakasaaki, pimarotari Teoso sãkire iõkatsopatakori. Iua sãkire iõkatsopatakori txĩkitakaua kimatire anini. Isãkire iõkatsopatakori oerekaua Teoso makatxakiniri amaerekani Kristo Xesosi sãkire aãuikasaaki. ¹⁶ Teoso oerekana isãkire iõkatsopatakani atãonoka iõkatsopatinina, ininiã ikinika Teoso sãkire iõkatsopatakori atãonoka. Ininiã apakata Teoso sãkire iõkatsopatakori oerekiniua atão Teoso sãkire aãuikini ìkapani. Oerekaua ikinipoko Teoso sãkire iõkatsopatakori atão inini. Isãkire iõkatsopatakori õtãkikaua amaerekani atakanapini. Oerekaua atão inakarínoka akamini. ¹⁷ Ininiã kãkiti Teoso nakiti imarotiniãri Teoso sãkire iõkatsopatakori, iposotari ikinika parĩkatxi Teoso paniãtakiti ikamini. Erekarì iparĩka.

4

Tximótxio Õtãkikiko

¹ Tximótxio, nõtãkikai Teoso apisatoõ, Apiananiri Xesosi Kristo apisatoõ apaka, kotxi ãti õti Kristo Xesosi kanapiriãkasaaki, isãpiretari ikininape kãkiti sinimoni. Isãkire auĩãkani sari Teosomoni ikaikotinina ìkapani. Isãkire mauĩãkani sari kãkiti misiritikomoni ikaikotinina ìkapani. Isãpiretari kãkiti auapanika inakani, kãkiti mitxi ipĩkani apaka. Xesosi kanapiriã ikininape auĩte ininiua ìkapani, ininiãkara nipaniãtai ia: ² Pisãpiretariko Teoso sãkire kãkitimoni. Iposope pitxako Teoso sãkire ikiniõtika pisãpiretini kãkitimoni, piĩto tapara auakasaaki, pisãpakasaaki apaka. Põtãkikanako imaerekani itakanapinina, erekarínoka ikaminina ìkapani. Pisikataparaxiniretanako, Teoso sãkire poerekiniua. Pisãkirauatakasaaki, !katimari pomanãkarauatini. ³ ãti õti apokako. Iuasaaki kãkiti ! inirekaikari oerekaretxi atão inakari ikenakotinina. Ninoaka nireëkitinoka inirekana, ininiã apotiiãpotana ninoakata koerekarerini ninoa potxitakiti oerekaretxiti oereëkani. ⁴ !Inirekaikarina atão inakari. Auikarina sãkiretxi atão minakati.

⁵ Pitepekana, ikinika pikamako piĩkiteritika. Pimĩteenekariko pimisiritiko. Pikamariko piparĩka Teoso iokanapirena erekarì pisãpiretini kãkitimoni ninoa auikiniri ìkapani. Teoso nitiri pitxaua, ininiã pikamariko ikinika piparĩka Teoso paniãtakiti.

⁶ Notapekana, nipinini õti manapi apokaãpotape. Nipinako Teoso ìkapani. Pirãtxi Teoso ìkapani okiko atokokana, notaka sikauako Teosomoni. Niketo apokapeka itixi nosipikini ìkapani. ⁷ Neenamatchi erekarì inakari nikamapeka Satanasi ninaiatini. Miteëkarì mitekatchi mapotõkire apokini atokokana, nota apokapeka niparĩka mapotõkire. !Nitanapanari Xesosi sãkire nauikini. ⁸ Uatxa Teoso nĩkatari niparĩka ìki nota kãiatakiti napakapini ìkapani. Miteëkarì merepanika mitekatchi mapotõkire apokakari apakapari imitekini ìki. Apakapari saporĩeta. Iua atokokana Apiananiri sikanoko niparĩka ìki, kotxi nota nirekarì atão inakarínoka nikamini. Apiananiri imarotari atão, ininiã imarotari parĩkatxi ìki apakapakani. Imarotari imisiritiko apakapakani apaka. Niparĩka ìki isikano

notamoni uai ikanapiriini õtisaaki. Na notananini apakapari. Isikari parĩkatxi ĩki ikininapemoni ikanapiriini nirekakanimoni.

Paoro Iõkatsopatakiti Mapotõkire

⁹ Piposotiniã, katima pitxako notamoni papokini. ¹⁰ Témasi inakori asikapekano, kotxi itiretari Xesosi sãkire mauiãkani nireẽkiti. Isipeka Tesarónika sitatxitimoni. Kiresẽtxi inakori sari Karásia tixinimoni iparĩkauatini ĩkapani. Txito inakori sari Taomásia tixinimoni iparĩkauatini ĩkapani. ¹¹ Arókasinokara moianatano uatxa. Pakiritariko Marko. Piminari iua pitekata. Iua posotari imiparĩkatinino, Xesosi sãkire nisãpiretakasaaki kãkitimoni. ¹² Txíkiko inakori nipaniãta Épeso sitatxitimoni isini. ¹³ Tóatxi sitatxiti nauakasaaki, nitakanapari nimãka ãti nimãka nopini nitakakiti. Nitakanapari iua nimãka Kapo inakorikata. Pite uai ĩkasaaki piminariko. Apaka piminariko atatsopari ninakiti aãtsopa kamakori. Apia ninirekari pimininiri atatsopari ninakiti aamata kamakori.

¹⁴ Arexãtri inakori iteene misiritano. Iua Arexãtri tiitxi kamakari iua. Tiitxi metao kamakorinoka ikama. Iua misiritinino xika, Teoso misiritari iua. ¹⁵ Erepaniko iua. Pamonõkoniri iua, kotxi iua iteene misãkirepiretari aõereẽkiti sãkiretxiti.

¹⁶ Merepitipanika nota apoĩtakani anikasaakino auĩtetxiakori apisatoõ, nisãkire ikenakotinina ĩkapani, na ãti nimoianari kaikota notakata iusaaki. Ikinimane nimoianariakori takanapano, iuaritika na ninirekari Teoso misiritinina itakanapinino xika. ¹⁷ Ninoa takanapano, iuaritika Apiananiri kaikota notakata. Iua sikataparaxiniretano, ininiã niposotari Teoso iokanapirena ikinika nisãpiretinina ninoa Xoteo minakaniua ikenakotinirina ĩkapani. Ininiã ãkiti namaã takote nauakasaaki, Teoso tokapakeẽtano nota. ¹⁸ Nimarotapitĩkari Apiananiri tokapakeẽtapanikano nota ikini sereti maerekati auakasaaki. Iua nĩkatano. Anikano itixinemoni, iua auĩtetxi ininiãtaãua. Ikinimane ãtipirika sãpiretari iua: “Peerekai. Pitenokara erekari.” Ameẽ.

¹⁹ Pisãpiretana Pirisira inakoro, Ákira inakori pakini nixinikamanapitana. Apaka Onesíporo inakori aapoko auakani nixinikamanapita. ²⁰ Erásito inakori kaikota Korĩto sitatxiti. Tópimo inakori nitakanapa Mireto sitatxitiã, kotxi iua amianata.

²¹ Tximótxio, piposotiniã, mitaã apisapanika papokako uaimoni. Eoporo inakori, Porotẽtxi inakori, Arino inakori, Karáotxia inakori pakini ikini aĩtariakorikata iokanapireta pitemoni ixinikamanapitiniina.

²² Apiananiri Xesosi Kristo ãtipirika kaikota pitekata pãkixinireẽ. Ikinipoko erekari isika pitemoni. Ameẽ.

TXITO

Paoro Iokanatsopatakiti Txitomoni

¹ Nota Paoro. Teoso nitiri amotakori nitxaua. Xesosi Kristo iokanatakiti nitxaua. Iua iokanatano kâkitimoni Teoso mereêkini auiâkiti sâkiretxiti nisâpiretini îkapani. Iokanatano kâkitimoni atâo inakari imarotina îkapani. Atâo inakari imarotiko oerekaua Teoso nireêkiti akamini îkapani. ² Aâuikari aâuapininiika anini Teosokata, kotxi kitxakapirîka itixi kamiko apisa Teoso kamaenetari ikara. Ininiâ apokapitikako, kotxi atâonoka iua sâkire. !Iposotari atâo minakati isâpiretini. ³ Iketotini manapi oerekari isâkire. Isâkire sâpiretakani sâpiretari isâkire. Ininiâ Teoso sâkire notamoni isikakiti nisâpiretai, kotxi Teoso amaerekani makatxakakari paniâtano nota nisâpiretiniri isâkire.

⁴ Niokanatsopata pite Txitomoni. Namarite atâo inakari atoko pitxaua, kotxi pite auikari Xesosi sâkire nota auikiniri atokotxikana. Aîri Teoso, aâuîte Xesosi Kristo amaerekani makatxakakari pakini, sikari ikinipoko erekari pitemoni. Ninoa iamoni kai. Ikamaerekaxiniretaina.

Kõtâkikarerini

⁵ Nitakanapai pite Kreta pokomiriîti, kotxi aparîka iuaâtaâ kona xipokapanika, ininiâ ninirekari pite kaminiri ikara parîkatxi. Pimereêna kõtâkikarerini ikini sitatxitiâ Teoso sâkire auiâkani ôtâkikakani tîkane. Pimereêna mitxi nisâpiretakiti iaõka. ⁶ Ia atoko inakari kâkiti pimereê kõtâkikarerini îkapani: Iua kamari erekari, ininiâ maerekati auakasaaki, kona iua xikani maerekati apoka. Âtonokara îtanoro aua. Imiakori auikari Xesosi sâkire. Ninoa !neenamauata. Ikamarina iri paniâtakiti iaõka.

⁷ Teoso sikari iparîka kõtâkikarerimoni ikamini îkapani, ininiâ kõtâkikarerini kamari erekarinoka. Maerekati auakasaaki, kona iua xikani maerekati apoka. !Iuikaua. !Katimari omanâkarauatini. !Ipoâta. Kona kaneenamari. !Itiretaro txineiro. ⁸ Kõtâkikarerini atâo inakari potxitari apakapiniri kâkiti iua aapoko âki. Ipotxitari kâkiti erekari kamakani. !Katima omanâkarauatini. Erekarinoka ikama. !Ikamari maerekati. Erekarini imarotakiti !itakanapari ikamini. ⁹ Kõtâkikarerini atâo inakari oerekaâkapeka Teoso sâkire. Imarotari Teoso kaminiri isâkire iaõka, ininiâ iteene inîkatari Teoso sâkire. !Imamakari Teoso sâkire. Ininiâkara imarotari ôtâkikiniri apanakini. Iteene imarotari Teoso sâkire, ininiâ imarotari oerekiniri apanakini Teoso sâkire manirekakani, Teoso sâkire auikinina îkapani.

Erepaniko, Atâo Minakati Oerekakani

¹⁰ Kaiâopokori kâkiti kona nirekari Teoso nireêkiti ikaminina. Maxikatiîka isâkirauatapika. Kamisirienererini ninoa. Ikara atoko inakani nirekari Teoso takaõtixikare Xoteo minakaniua îtoâ auini. ¹¹ Matxîkitakari ninoa iotokakiniri atâo minakati isâpiretinina, kotxi kâkiti aapoko âki auakani naiatakakaua ninoa oerekakiti sâkiretxiti xika. !Apakata ninoa oerekakiti sâkiretxiti. Iuaritika ninoa oerekari atâo minakati, txineiro apakapinina îkapani. ¹² Ninoa atokirini kitxakapirîka, koerekareri, uai Kreta pokomiriîti auakarini, txari: “Kreta auakani âtipirika misirienetari kâkiti. Maerekati kamakani itxauana. Kaneenamari îtopa auakari atoko ikamana. Iarinouatana. Paixonina,” itxa iua.

¹³ Isâpiretakiti atâopitikara. Ininiâ pitaparaxinireritika pipinitana ninoa imasâpiretakanirina ikara atâo minakati, Xesosi sâkire atâo auikinina îkapani. ¹⁴ Ininiâ pisâpiretana: “!Himaâkatapiriko Xoteoakori kiomaneakorini sâkire atâo minakati. !Himaâkatapena atâo inakari manirekaâkani paniâtakiti.” ¹⁵ Kâkiti Teoso kamaerekatakiti, ikamakiti erekari. Ikinipoko ikamakiti erekari, kotxi Teoso makatxakapekari imaerekani. Kâkiti imaerekani auapanika inakari, Teoso sâkire iaõka makamakati, ikinipoko ikamakiti aua imaerekani. Imaerekani txikotari ixinikakiti. Imaerekani

txikotari iua ãkixinire, ininiã ãkixinire ! òtãkikari iua maerekati imakamakani ìkapani. ¹⁶ Ninoa txa: “Ate imarotari Teoso,” txamari ikamarina Teoso manirekakiniti, ininiã ! imarotarina Teoso. !Inirekarina Teoso. Arakakani atoko itxana, maerekati ikamakitina xika. !Ikamarina Teoso nireëkiti, ininiã !iposotarina erekari ikaminina.

2

Txito Òtãkikiko

¹ Ininiã poerekariko ikinika atão inakari Teoso oerekiko sãkiretxiti.

Kiki Aneëkani Òtãkikiko

² Ia atoko põtãkikana kiki aneëkani: “Hìxinikariko hìkamakiti tìkane hìkaminiri apis-apanika. Erekari hìkamako apanakini paxitinii ìkapani. Kona hìkamapiri hiïto nireëkiti. Iteene himarotariko hãuiãkiti. Iteene hìtiraõkiuatako. Katima omanãkarauataka !hìtxape.” Ikara atoko põtãkikana kiki aneëkani.

Sito Aneëkani Òtãkikiko

³ Ia atoko põtãkikana sito aneëkani: “Hìkamariko Teoso pìkakani kamakiti atoko. Maxikatiika ! hãpoìtapiri ãti. Kona iteene hiãtapiri iãriã kapoãro. Erekarinoka hõerekako.” Ikara atoko põtãkikana ninoa. ⁴ Apaka põtãkikana sito aneëkani òtãkikinina ãtokoroakoro ia atoko: “Hìtiretanako hìtaniri, hamariteakori pakini. ⁵ Kona hìkìpitapiri hiïto paniãtakiti. Erekarinanira hìkamako. Hìkamariko hìparìka haãpoko ãki. Erekari hìkamako apanakini ìkapani. Hìtaniri nireëkiti hìkamako, ininiã iuasaaki Teoso sãkire mauiãkani ! imisãkirepiretari Teoso sãkire.” Ikara atoko sito aneëkani oerekanako ãtokoroakoro.

Ãtokoriakori Òtãkikiko

⁶ Ininiã iua atokokana põtãkikana ãtokoriakori ia atoko: “!Apakata hìkaminiri hiïto nireëkiti.”

Txito Òtãkikiko

⁷ Txito, ikini pikamakiti pikamako kãkiti erekari kamiko imarotini ìkapani. Poerekarauatakasaaki, poerekari kãkiti pitiretiniri atão inakari sãkiretxitinoka. Poerekanako Teoso sãkirenoka apiari inini. Poerekarauatakasaaki, poerekariko kãkiti pimako-ktaniri atão minakati pisãkirekata. ⁸ Poerekariko atão inakarinoka, ininiã ! auari papoìtiko, kotxi !pikerokari pisãkire. Ikara atoko ininiã, pimokaiakarini pëtauata, kotxi ! iposotarina imisãkirepiretinii.

Nitiritxi Amotakoni Òtãkikiko

⁹ Ia atoko poerekanako nitiritxi amotakoni: “Hìkìpitariko hìpatrãote sãkire. Hìkamariko hìpatrãote apokaerekatakitinoka. Kapakapaenere !hìtxape. ¹⁰ !Hiitirìkapiri hìpatrãote ti. Hõerekariko hìpatrãote pisãkire atão inini. Ininiã hìpatrãote nirekari imarotininina Teoso oerekiko, amaerekani makatxakakari oerekiko.”

Ikinipoko Erekari Teoso Sikakiti

¹¹ Ikinimanemoni Teoso oerekapekari erekari isikakiti kãkiti maerekani imakatxakini. ¹² Teoso sikakiti erekari oerekaua atakanapiniri Teoso manirekakiniti. Teoso sikakiti erekari oerekaua amanirekakaniri ìkorapokoriti auakani ìto nireëkiti. Teoso sikakiti erekari oerekaua aïto paniãtakiti atakanapini, atão inakarinoka akamini, Teoso nireëkiti akamini ìkorapokoriti aãuakasaaki. ¹³ Ìkorapokoriti aãuakasaaki, aiãtapari poxononitxi òti Apiananiri aTeosone apokini òti. Iuasaaki Xesosi Kristo, amaerekani makatxakakari, motika atemoni. ¹⁴ Iuaka sikaua Teosomoni ate ìkapani ipìkasaaki. Iuasaaki iikìtxitari Teoso, ininiã Teoso makatxakaua ikinika maerekanitxi sauaki. Ikara atoko ininiã, ikamaerekataua ate. Ininiã itxìkitakaua inakitiakori aniniua, ininiã anirekari erekari akamini.

¹⁵ Auìtetxi pininiua atoko pipaniãtariko kãkiti kìpitiniri ikara nisãpiretakiti. Põtãkikana nisãkire makìpitakani. Kona paunitapiri kãkiti sãpiretiniri pisãkire atão minakati inini.

3

Teoso Nireēkiti Kamiko

¹ Txito, ia atoko poerekariko kākiti: “Hīpaxitariko ĩkorapokoriti auĩtetxiakori paniātakiti, poiāori auĩtetxiakori paniātakiti apaka. Iposope hĩtxako ikinika erekari hĩkamini. ² Kona himisākipiretapiri apanakini. !Hineenamauatape. Merepanika hĩxinikariko apanakini, eereka hĩteka hĩxinika. Hōerekariko kākiti, hĩxinireē hinirekiniri erekari hĩkamini ikini-manemoni.” Ikara atoko poerekana.

³ Teoso aimarotini apisapanika miĩkiteni atxaua. Kona akĩpitari kākiti sākire, Teoso sākire apaka. Iuasaaki ate misirienetaāka. Iuasaaki akamari aĩto nireēkitinoka. Ikini sereti maerekati akama apoxokoniuatini ĩkapani. Iuasaaki ikiniōtika axinikari maerekati akamini. !Apakata akamakiti. Kaxikororini atxaua iuasaaki. Ate omanataāka. Apaka ate omanatari apanakini iuasaaki.

⁴ Ininiā eereka Teoso tiraōki, amaerekani makatxakakari tiraōki, iua amonĩkare, apoka atemoni. ⁵ Ateka parĩka erekari ĩmakatxakari amaerekani. Iua amonĩkarenokara makatxakari amaerekani. Iuasaaki na atāo akama, iuaritika imakatxakari amaerekani, kotxi itiretaua. Iuasaaki iua arokari aākixinire. Itxĩkitakaua ate aponaniini iuaĩkana. Iuasaaki Erekari Matamatakoti kamari ikinika amaneri axinireē. ⁶ Teoso iokanatarĩ Erekari Matamatakoti kaposotiireri atemoni, kotxi Xesosi Kristo, amaerekani makatxakakari, ipina ate ĩkapani. ⁷ Iua sikari ikinipoko erekari atemoni, ininiā ikamaerekataua. Ininiā itxĩkitakaua Teoso anaakori aniniua, ininiā aāpakapariko ipotetakiti ate ĩkapani. Iua atoko ininiā, aiātapari ātipirika Teosokata aāuini ĩkapani. ⁸ Atāopitikara ia nisāpiretakiti.

Ininiā ninirekari ātipirika pisāpiretiniri ikinika nisāpiretakiti Teoso sākire auĩākanimoni. Ikara atoko Teoso auĩākani itaparaxinireritika kamariko erekari apanakini ĩkapani. Kona maxikatiĩka ikamarina erekari. Teoso atāo ĩkitxitariko kākiti. Ikara atoko kākiti kaminiā, ininiā erekari ikinimane ĩkapani.

⁹ Kona pimaākatapiri miĩkiteti sākire. !Hĩtaparakienatakakapeua kitxakapirĩkarini uāka xika. Kona himaākatapenako kākiti kiomātxiakori oerekakiti xika tsoatakani. Ikara sākiretxiti !itxĩkitakai erekari hininiua. !Itxa ikara sākiretxiti.

¹⁰ Kākiti oerekiniāri atāo minakati Teoso manirekakiniti, pōtākikari iua ipikata. Iposo atoko !pimaākataikari. ¹¹ Ikara atoko inakari atāo ĩkite !auari. Maerekati ikama. Ikamakiti oerekari apanakini, maerekati kamakari ininiua. Iuaka imaerekani xika imisiritiko apokako.

Paoro Sāpiretakiti Mapotōkire

¹² Niokanatarĩ Atemasi inakori, atxiĩti Txĩkiko inakori apaka pitemoni. Ninoa apokasaaki, paiamata pisini ĩkapani, katimari notamoni Nikópori sitatxitiā hāpokini ĩkapani. Ninirekari ia mitaāti nikaĩkotini iuaā.

¹³ Pimoianatarĩ Sena inakori, Aporo inakori pakini. Auĩtetxiakori paniātakiti imarotakari iua Sena. Pimoianatanako ninoa aiamatini. Iamonitakitina pisikanako.

¹⁴ Aĩtariakori Xesosi sākire auĩākani apaiaōkariko erekari ikaminina, kākiti minakati mauakinini imoianatinina ĩkapani. Makamaretika hinini !apakata.

¹⁵ Notakata auakani xinikapikai pite. Pisāpiretanako ate tiretakani ereē Xesosi sākire auĩākani nixinikamanapitana ninoa.

Ikiniika erekari Teoso sikai hĩte hĩkinika. Ikara atoko niōkatsopata pitemoni. Ameē.

PIREMÕ

Paoro Iokanatsopatakiti Piremõmoni

¹ Nota Paoro. Kateia äki naua, Kristo Xesosi sãkire nauikini xika. Nota, aĩtari Tximõtxiokata aiokanatsopata pitemoni Piremõmoni. Ate iteene tiretai pite. Atekata parĩkauatakari pitxaua. ² Aiokanapireta Xesosi sãkire auiãkanimoni, paapoko apotiitakanimoni. Aiokanapireta aĩtaro Ápiamoni, Akipo pakinimoni. Iua Akipo Xesosi sotatone itxaua, ate Xesosi sotatone atokotxikana.

³ Aĩri Teoso, Xesosi Kristo Apiananiri pakini sikai ikinipoko erekari. Ikamaerekax-iniretaina.

Piremõ Tiraõkiuatini Pirena

⁴ Nitari Piremõ, Teoso nimisãkiretakasaaki, ãtipirika nisãkirauata pite ĩkapani. Nisãpiretari Teoso ereka inini, kotxi iua kamaerekatai pite. ⁵ Ikara atoko itxa nisãkire, kotxi nikenakopiretari iteene pauikiniri Apiananiri Xesosi sãkire. Nikenakopiretari ikinimane kãkiti Teoso nakitiakori pitiretini. ⁶ Nimisãkiretari Teoso pite ĩkapani, kotxi ninirekari pisãpiretiniri pauĩãkiti sãkiretxiti ikiniõtika apanakinimoni, ininiãkara pimarotari ikini sereti erekari Teoso siãkiti Kristo nakitiakorimoni. ⁷ Ate poxokoniũata, kotxi pite tiretana kãkiti Teoso nakitiakori. Pitiraõki iteene sikataparaxiniretaua ate. Pite aĩtari kamapoxokonitana Teoso nakitiakori ãkixinire.

Paoro Amanaãkiti Sãkiretxiti

⁸ Kristo sikaposotiiretano, ininiã nitapararitika niposotapitikari nipaniãtinii atão inakari pikamini. ⁹ Iuaritika nitapararitika na nipaniãtai atão inakari pikamini. Nõtãkikai Kristo tiraõkiã pikaminiri atão inakari. Nota Paoro kiomãtxipekano. Kateia äki nauanãta, Kristo Xesosi sãkire nauikini xika. Notakara õtãkikai pite atão pikamini. ¹⁰ Nota amanaãi pinitiri Onésimo inakori piamonĩkini ĩkapani. Namarite atoko inakari iua, kotxi iua kĩpitari nisãkire uai kateia äki nauakasaaki. Uatxa iua auikari Xesosi sãkire. ¹¹ Nimarotari iuãka poparĩkari uãka itxaua. Mitxi !iparĩkauata, pitekata auakasaaki. Paiariniri. Uatxa poparĩkari itxapekaua iuãka atokokana. Uatxa iparĩkauatapitikako pite ĩkapani, nota ĩkapani iparĩkauatini atokokana.

¹² Niokanatariko Onésimo, ikanapiriini pitemoni. Ininiã papakapariko iua. Nitiretari iua nota niĩto nitiretini atokokana. ¹³ Ninirekamari notakata uai ikaikotini, nota imoianatini ĩkapani, kotxi pite kona posotari pimoianatinino uai kateia äki nauakasaaki, kotxi pite auini maioakari. Nota uai aua Teoso iokanapirena erekari nisãpiretini xika. ¹⁴ Ninirekamari Onésimo uai, txamari !ninarekari nikaminiri pite mauiritakiniti. ! Ninirekari nitapararitika nipaniãtinii paunitiniri Onésimo notakata ikaikotini. Pite nirekiniãri, imoianatano.

¹⁵ Akokaxiti Onésimo miteka. Mapakanani itakanapai. Atxiĩti Teoso auiritari poiãoka itakanapini, ãtipirika pitekata iuaĩkana ikaikotini ĩkapani. ¹⁶ Iua pinitiri piamotakiti itxapanikaua. Uatxa apiaerekata iua. Pitari pitiretakiti itxapekaua, kotxi iua auikari Kristo sãkire. Iteene nota tiretari iua. Pite apia tiretariko iua, kotxi iua pinitiri itxaua. Apaka iua pitari itxaua, kotxi Apiananiri nakiti hĩtxaua.

¹⁷ Nota pimoianari nininiãua, nota papakapini atokokana pitxariko papakapiniri iua. ¹⁸ Akokaxiti maerekati ikaminiã, ĩtiriuatiniã, pisãpiretano. Nota ĩkitxitaiko. ¹⁹ Nota Paoro, uatxa niuakoã niõkatsopataria sãkiretxiti. Notakarako ĩkitxitai pite. Pite imarotari pite xinire auãki inini, kotxi notara akokaxiti nisãpiretai Xesosi sãkire pauikini ĩkapani. Ininiã atxiĩti erekape pite ĩkitxitinino nota? ²⁰ Ininiãkara nitari, pikaminano ninirekakiti, kotxi Apiananiri nakitiakori atxaua. Pikamapoxokonitariko nãkixinire, kotxi Kristo

nakitiakori atxaua. ²¹ Niōkatsopatari pite ĩkapani, kotxi nimarotapitikari pikaminiri namanaãkiti. Ari, nimarotari apiata pikaminano.

²² Apikomoni nitxai. Poeretari ereẽ nimakiniãtaã ĩkapani. Hĩte misãkiretapekari Teoso kateia nitakanapini ĩkapani, ininiã nimarotari Teoso auiritano iuaĩkana nikanapiriini hĩtemoni.

Itakapiretanapini Pirena

²³ Epápara inakori notakata kateia ãki aua, kotxi iua parĩkauata Kristo Xesosi ĩkapani. Iua xinikamanapitai hĩte. ²⁴ Markoma, Arisitakoma, Témasima, Arókasima pakini notakata parĩkauatakani, ninoa apaka xinikamanapitai hĩte.

²⁵ Aãũte Xesosi Kristo sikari ikinipoko erekari hãkixiniremoni. Ameẽ.

EPIREO

Teoso Ākiri Apiatini Pirena

¹ Teoso kitxakapirīka sāpiretari isākire kaiāokataikani, isākire sāpiretakanimoni. Ininiā ninoa sāpiretana aātokiriakorini Teoso sāpiretakiti. Kiriāpa Teoso misākiretana ninoa? Kaiāopokoriā imisākiretana ninoa: Itaponeēna, ixinireēna, isākire iōkatsopatakoriā, initiri itixine auakari sākireē, txaāpota imisākiretinina ninoa.

² Uatxa ĩkorasaaki, Teoso misākiretaua iua ākiri sākireē. Teoso mereēri iua ākiri ikinipoko apakapini ĩkapani. Teoso ākiri kamari ikinipoko. Ikamari itixi, ikinipoko iaxiti apiko nopinixiti auakari apaka. ³ Iua iotximere Teoso iotximeretxikana. Teosotxikana iua. Kaposotiireri iua, kotxi isākireēnoka imaĭkari imakinika auini ĩkapani. Iuanokara makatxakari amaerekani. Amaerekani imakatxakasaaki, iusaaki iitopāka ikinimane auīte Teoso kikomoni itixineē.

Teoso Ākiri Apiata, Initiriakori Poiāoka

⁴ Ininiā Teoso ākiri iteene apiaerekata. Apiananiri iua. Teoso nitiriakori iaxitikini poiāorini. Teoso mereēri iuāka apiari. Ninoa uāka poiāorini itxauana.

⁵ Teoso ĩsāpiretari initiriakori ia isākire kitxakapirīkari:
Pite nota ākiri pitxaua. Uatxa pite iri nitxaua nota,
!itxa initiriakorimoni.

Apaka Teoso ĩsāpiretana ninoa ia isākire kitxakapirīkari:
Nota iua iri nitxauako. Iua nota amarite itxauako,
!itxa initiriakori itixine auakanimoni.

⁶ Ātipekana. Teoso mīkasaakiri iua ākiri imatonōkari ĩkorapokoritimoni, iponaniini ĩkapani, iusaaki Teoso txari initiriakori:
Ninitiriakori, hīkapotoreēkauako iua apisatoō. Hīteosonetariko iua,
itxa. Ikara atoko Teoso paniātari initiriakori.

⁷ Teoso sākire iōkatsopatakori, initiriakori pirena txari:
Itxīkitakana initiriakori matamatakoni ininiuana, ĩtima atoko ininiuana. Xamina tiri-
nakari atoko itxauana ninoa, kotxi kaposotiirerini ninoa,
itxa. ⁸ Iua amaritemoni Teoso txari:
Teoso pitxaua. !Ixipoka auītetxi pininiāua. Ātipirika pite atāo mīkiikari pite auītetakani.

⁹ Pite tiretari atāo inakari. Pomanatari maerekati. Ikara atoko ininiā, nota piTeosone mereēi pite apiari pininiua ĩkapani, pimoianariakori poiāorini inini-
uana ĩkapani, kotxi apiata nikamapoxokonitai pite. Ītxiā nimereēkiti nopini
nitakini atokokana, nitakari poxokonitxi pite nopini. Nimereēi pite auītetxi
pininiāua.

Ikara atoko itxa Teoso kitxakapirīka. ¹⁰ Iuaĭkana Teoso sākire iōkatsopatakori txari:
Apiananiri, merepitipanika pite kamari itixi. Apaka pikamari iaxiti piuakoā.

¹¹ ĩkorapokoriti, iaxiti pakini xipokapitikako. Iuaritika pite auapanika. Mākatxi kitx-
akariāpotakari atoko itxa ikinika.

¹² Mākatxi atoko piapirikariko iaxiti, itixi pakini. Ininiā ipinimoni itxako. Iuaritika pite
mitxi atoko pitxapikako. !Pixipoka.

Itxa Teoso sākire.

¹³ Teoso txari imi:
Nota kikomoni piitopākiniritika nixipokariko pimokaiakariakori. Nikamariko ninoa
pikiti pitakiniātaā atoko ininiuana.
Ikara atoko !itxari initiriakori iaxitikini.

¹⁴ Ininiã kipa Teoso nitiriakori iaxitikini? Ninoa erekari matamatakoni. Iparĩkauatana Teoso ikapani. Teoso iokanatana ninoa imoianatinirina kãkiti iua sãkire auĩãkani, kotxi Teoso makatxakari ninoa kãkiti maerekani.

2

Erepaniko

¹ Ininiã iteene mamixinikari ikinika atão sãkiretxiti mitxi akenakotakiti. Amakamakaniãri ikara atoko, kanaua tiokaãpotakari atoko atxaua. Ininiã iuasaaki !aimarotaikari atão. Maxinikari atão inakari. ² Kitxakapirĩka Teoso nitiriakori iaxitikini sãpiretari atão inakari ate apiko atokiriakorimoni. Kãkiti makamakaniãri ninoa paniãtakiti, ininiã ninoa kãkiti apakapari Teoso misirikare. Atão ninoa apakapiniri imisiritikona. ³ Ininiã uatxa amitekini !auari, amanirekakaniãri amaerekani makatxakiko. Peerekari Teoso makatxakiniri kãkiti maerekani. Merepitipanika Apiananiri sãpiretari ikara maerekanitxi makatxakiko. Iua sãkire kenakotakani apaka sãpiretaua ate iua sãpiretakiti atokotxikana. ⁴ Teoso apaka oerekaua ninoa sãkire atão inini, kotxi oerekari itakaõtxikare. Ikamari kãkiti mimarotakiniti. Ikamari ikini sereti posotiiretxi. Erekari Matamatakoti siãkiti isika inirekakinimoni. Kãkiti isika inirekaka iaõka. Ikara atoko Teoso oerekaua ninoa sãkire atão inini.

Xesosi Kãkiti Atoko Itxa

⁵ Teoso litxĩkitakana initiriakori iaxitikini itixi amaneriã auakani auĩteakori ininiuana. Iua itixi amaneri ikari asãpiretai hĩte. ⁶ Kitxakapirĩka Teoso sãkire iõkatsopatakori Xikari oitoãtaã txari:

Kipa kãkiti? Kinirepa pite xinikana ninoa? Ate minakati. Kinirepa aĩtari iaxitikiri maãkatatari kãkiti?

⁷ Mapakanani pikamari kãkiti itari iaxitikiri poiãori ininiãua. Iuasaaki pinitiriakori iaxitikini apiatakani txaua. Eereka pitxĩkitakari iua auĩtetxi ininiua. Pitxĩkitakari iua kaiotximereri ininiua. Pitxĩkitakari ikinimane paxitiniri iua. Pitxĩkitakari iua ikinipoko auĩte ininiua.

⁸ Pitxĩkitakari ikinimane kaminiri iua paniãtakiti. !Auari ãtika iua paniãtakiti makamakati.

Ikara atoko Teoso sãpiretaua ate itxĩkitakiniri ikinipoko auĩtetiniri iua. !Auari ãtika iua mauĩtetakati. Txamari kona ate atamatapanikari iua ikinipoko auĩte ininiua.

⁹ Iuapitikara aãtamatakiti Xesosi. Mapakananinoka Teoso txĩkitakari iua poiãori ininiua. Iuasaaki Teoso nitiriakori iaxitikini apiata. Teoso txĩkitakari iua poiãori ininiua, kotxi iuasaaki Xesosi atatsiirauata. Iuasaaki ipina. Uatxa Teoso txĩkitakari iua auĩtetxi ininiua. Itxĩkitakari iua kaiotximereri ininiua. Itxĩkitakari ikinimane paxitiniri iua. Teoso kamari ikara atoko inakari, kotxi Xesosi ipina kãkiti mapinakani ikapani. Iuasaaki Teoso oerekari ikinipoko erekari isikini kãkitimoni.

¹⁰ Ikinika Teoso nakiti. Ikinika iua kamakiti. Apakata iua txĩkitakiniri kãkiti maerekani makatxakakari atatsiirauatini, kotxi iuasaaki iposope kãkiti maerekani makatxakiko, kotxi iuasaaki Xesosi kamari ikinipoko iri paniãtakiti. Ininiãkara Teoso anikari iua anaakori iotximere auiniãtaã. Kaiãori ninoa. ¹¹ Kãkiti kamaerekatakari iritxikana iua kamaerekatakiniri iri. Ikara atoko ininiã, Xesosi !ipẽtatari iua itiriakori akiritiniua ate.

¹² Itxari Teosomoni:

Nisãpiretariko piuãka nitiriakorimoni. Pitemoni apotiitakaniua sauaki nixikaretari ereka pinini.

¹³ Iuaĩkana kitxakapirĩka Teoso sãkire iõkatsopatakori txari:

Nauikariko Teoso sãkire.

Iuaĩkana Xesosi txari Teoso:

Uai nota aua pamariteakorikata. Pite sikana ninoa notamoni.

itxa.

¹⁴ Kaĩtori Teoso anaakori. Ninoa aua ixini, iarēka pakini. Ininiã kaĩtopekari Xesosi ninoa atokokana. Ininiã ipĩkasaaki ixipokari ipĩkitxi posotiire auakiti. Satanasi inakori iua. ¹⁵ Ikara atoko inakasaaki, isikakari kãkiti ipĩkitxi pĩkakani. Mitxi ninoa iaxirikakoni atoko itxana. ¹⁶ Aimarotari, iusaaki !imoianatana initiriakori iaxitikini. Iusaaki imoianatana Apraão apika mekaniriakori. ¹⁷ Ikara atoko ininiã, Xesosi txĩkitakaãka itariakori atokokana ininiua, ininiã iposotari sasetotxi auĩte apiatakari ininiua kãkiti ĩkapani. Iparĩkauatakasaaki Teoso ĩkapani, ikamari ikinipoko ikamaenetakiti. Maerekati kamakani kãkiti, iuaritika iamoniakari kãkiti. Kãkiti itxapekua Xesosi, ininiã iua ipina kãkiti maerekani imaktxakini ĩkapani, iuaĩkana kãkiti imikanapiriini Teosomoni ĩkapani. ¹⁸ ĩkorapokoriti Xesosi auakasaaki, imarotari Satanasi atamakaerekatini iua. Ininiã Satanasi atamakaerekatakasaakina kãkiti, iua posotari isikataparatinina ninoa.

3

Xesosi Apiatakari, Moisesi Poiãori

¹ Ininiã nitariakori, Teoso mereẽkini, hĩte akiritaãka Teoso tixine hãuini ĩkapani. Iteene hĩxinikariko Kristo Xesosi, kotxi iua Teoso iokanatakiti itxaua. Apaka iua sasetotxi auĩte apiatakari itxaua. Iuara asãpiretari apanakini. ² Moisesi kamari ikinika Teoso paniãtakiti inirimane apisatoõ, Teoso aapoko aamata kamakori ikamakasaaki. Iua atokokana Xesosi kamari ikinika iua mereẽkari paniãtakiti. ³ Apiaerekata Xesosi, ininiã iua apakapari apiata ipaxitiko, Moisesi poião, kotxi aapokotxi kamakari apakapari apiata ipaxitiko. Poião aapokotxi paxitiko aua. Iua atokokana, Xesosi aapokotxi kamakari atoko itxaua. Moisesi aapokotxi atoko itxaua. ⁴ Ikinika kãkiti aapokona kamakani auapitika, iuaritika Teoso ikinipoko kamakari itxaua. ⁵ Moisesi Teoso nitiri itxaua. Iua ãtipirika kamari ikinipoko Teoso nirekakiti inirimane apisatoõ. Ikara erekari ikamakiti oerekari Teoso sãkire iua sãpiretakiti atão inini.

⁶ Kristo Teoso ãkiri itxaua. Iua ãtipirika kamari ikinipoko Teoso paniãtakiti Teoso aapoko inĩkatini. Teoso aapoko atoko atxaua ate, iteene aãuikiniãri iua sãkire, apoxokoniritika ãtipirika aiãtapiniãri Xesosi kanapiriini õti.

Erepaniko, !Hĩtakanapapiri Hãuikakiti

⁷ Ininiã Erekari Matamatakoti txari:
Uatxa õti hĩkenakotakasaakiri nisãkire,

⁸ kona hĩkamapiriko hĩxinire paikori inini hãtokiriakorini atoko hinini. ãparaã makipakaniãtaã auakasaakina, iuaã ninoa !auikari nota sãkire. !Ikamarina nipaniãtakiti. Iusaaki ninoa ataerekatapikano nota.

⁹ Koarẽtakanani, ikiniõtika hĩte apika atokiriakori ataerekatapikano nota. Ninoa atamatarari niposotiire. Txamari ikiniõtika ninoa ataerekatano nota. !Auikarina nisãkire.

¹⁰ Ikara xika nomanatana ninoa. Iusaaki nitxa: “ãtipirika ninoa sapika apanakini sãkire tikini. !Imarotarina nixinikakiti, nikamakiti pakini.”

¹¹ Nomanatakasaakina ninoa imaerekanina xika, iusaaki nitxako: “Atão nisãpiretana ninoa. Ninoa maĩroãpekaniiarako nikamakiti tomatikoãtaã,”
itxa Erekari Matamatakoti.

¹² Ininiã nitariakori, erepaniko. Atxiĩti ãtikaka hĩte aua hĩxinire maerekati mauikareti. Ikara atoko inakasaaki, hĩtakanapapekari Teoso ãtipirika auãki inakari, maerekati tikini hĩsini ĩkapani.

¹³ Ininiã ikiniõtika hĩkamataparaxiniretakakauako. Uatxapanika inakasaaki hõtãkikakauako. Ininiã maerekanitxi kona misirienetai. !Ikamari kaikoxinire hinini. ¹⁴ Aãuini mapotõkire manapi iteene aãuikiniãri Kristo sãkire merepitipanika aãuikiniri atokotxikana, atão iuakata parĩkauatakani atxaua. ¹⁵ Uatxa nisãpiretai kitxakapiriãka iõkatsopatakiti:

Uatxa ia òti hĩkenakotakasaakiri iua sãkire, kona hĩkamapiriko hĩxinire paikori inini, hãtokiriakorini atoko hinini, ãparaã makipakaniãtaã auakasaakina. Ninoa !auikari nota sãkire.

¹⁶ Ninoa kenakotari Teoso sãkire, txamari !inirekarina ikaminirina isãkire iaõka. Kipa ninoa? Exito tixini Moisesi makatzakakinira ninoa. ¹⁷ Kikãkititipa kamari Teoso naiatiniua koarẽtakanani? Ninoa maerekati kamakani. Ikara xika ninoa ipĩpeka ãparaã makipakaniãtaã. ¹⁸ Kirimonipa Teoso txari ia? “Atão nisãpiretai hĩte. Kona himaĩroãpekaniiarako nikamakiti tomatikoãtaã.” Teoso sãpiretari ikara iua sãkire mauikakanimoni. ¹⁹ Ininiã aimarotari, ninoa !ĩroã iuaã, Teoso sãkire imauikakanina xika.

4

Tomatikoãtaã Aua Teoso Nakitiakori Īkapani

¹ Auapitika Teoso kamaenetakiti kãkiti tomatiniãtaã Teoso kamakiti aĩroini tĩkane, ininiã erepaniko. Atão inakari hĩkamako iuaã hiĩroini Īkapani. ² Teoso iokanapirena erekari sãpiretaãka atemoni, kitxakapirĩka Moisesi auakasaaki auakanimoni apaka. Txamari maxikatiĩka ninoa kenakotari Teoso sãkire, kotxi ninoa !auikari ikenakotakitina. ³ Ate, Teoso sãkire auiãkaniua, ĩroã ikara Teoso kamakiti tomatikoãtaã. Ininiã Teoso sãpiretakiti iaõka auapeka. Ia atoko Teoso txari:

Nomanatakasaakina ninoa imaerekanina xika, iusaaki nitxako: “Atão nisãpiretana ninoa. Ninoa maĩroãpekaniiarako nikamakiti tomatikoãtaã,”

itxa Teoso. Ikara atoko itxama, iuaritika ikara tomatikoãtaã iposope iparĩka ixipokasaaki, itixi ikamakasaaki. Ikara atoko ikama ate Īkapani. ⁴ Teoso sãkire iõkatsopatakori sãpiretari itomatini òti pirena. Itxari:

Iparĩkauata seisi òti, ininiã eereka apikomoni ãti òti inakasaaki itomata. Iusaaki itakanapari ikinika iparĩka,

itxa Teoso sãkire iõkatsopatakori. ⁵ Teoso sãkire iõkatsopatakori txari:

Ninoa maĩroãpekaniiarako nikamakiti tomatikoãtaã.

⁶ Iuaritika apanakini ĩroãpanikako iua tomatikoãtaã. Txama apanakini kitxakapirĩka auakani !ĩroã. Ninoa merepitipanika sãpiretaãka Teoso iokanapirena erekari, txamari !ĩroãna, kotxi !ikamarina Teoso paniãtakiti. ⁷ Ininiã Teoso kamari iketo òti apanakini iuaãtaã apokini Īkapani. Iusaaki Teoso akiritari iketo òti “uatxa.” Ikara atoko Teoso misãkiretari Tavii:

Uatxa òti hĩkenakotiniãri nisãkire, ininiã kona hĩkamapiriko hĩxinire paikori inini.

⁸ Aãtokiri kitxakapirĩka auakari Xosoe inakori, iuara anikari kãkiti itixi Teoso sikaenetakitimoni. Txamari !ĩroãna atão inakari tomatikoãtaã Teoso sikakiti, kotxi eereka Teoso sãpiretari ãti òti tomatikoãtaã ĩroĩko òti. ⁹ Ikara atoko ininiã, auapanikako Teoso kamakiti tomatikoãtaã inakitiakori Īkapani. ¹⁰ Ininiã kãkiti ĩroãkasaaki Teoso kamakiti tomatikoãtaã, iotokakari iparĩka, Teoso iparĩka iotokakini atokokana. ¹¹ Ininiã nitariakori makamariko ikinika atão inakari iua tomatikoãtaã aĩroini Īkapani. Erepaniko, kotxi apanakini !ĩroã, Teoso sãkire imauikakanina xika. Ininiã !hĩkamapiri ninoa kamakiti atokokana.

¹² Teoso sãkire kaposotiireri. Isãkire auãki itxapika, kotxi Teoso ãtipirika auãki inakari sãpiretakiti. Saasara ipi auanaro auakaro, iteene kauanaro, ininiã iposotari ikisauakiniri inirekiniãtaã. Iposotari ikisauakiniri kãkiti pakaki, iua ãki auakari axĩpe imakatzakini Īkapani. Apiata Teoso sãkire, kotxi Teoso sãkire posotari apokini kãkiti iĩkite kãkiti xinirekata apotiitiniãtaãua. Teoso sãkire imarotari ikinika axinikakiti, anireẽkiti pakini aãkixinireẽ. Teoso sãkire atamakaerekatari ikara aãkixinireẽ auakari. ¹³ Teoso atamatarari ikinipoko akamakiti, ininiã !auari iomaãtakori. Ikinipoko !ipataãka. Aãũte Teoso apisatoõ ikinipoko kasarori.

Xesosi Sasetotxi Auĩte Apiatakari

¹⁴ Ininiã atemoni auari sasetotxi auñte apiatakari, Xesosi, Teoso ãkiri. Apiananiri iua. Iua sari iaxiti Teoso auiniãtaã. Ininiã iteene maãuikari iua sãkire. ¹⁵ Ate nakiti sasetotxi auñte apiatakari imarotari ate ãkixinire iõkapetini. Imarotari ate maposotakiniti. Imarotari ate tsii. Ikara atoko inakari imarota, kotxi Satanasi iteene atamakaerekatari iua, ate atamakaerekatiko atoko. Iuaritika maerekati !ikama. ¹⁶ Ininiã ataparaxinireritika masa Teosomoni. Aãuñte topãkiniãtaã masa ikinipoko erekari isikakiti aãpakapini ïkapani, iamoniãkiniua ïkapani. Isikaua ikinipoko erekari. Isikataparataua amaxikiko auakasaaki.

5

Xesosi Sasetotxi Auñte Apiatakari Mereïko

¹ Ikinimane sasetotxi auñte apiatakari mereeëka kãkiti sauaki. Iua misãkiretari Teoso kãkiti ïkapani. Isikari kãkiti sikakiti iuamoni. Kitxakapirïka iua okari pirãtxi Teoso apisatoõ kãkiti maerekani iïkitxitini ïkapani. ² Iamonïkari mimaroreni, Teoso takanapakani pakini, kotxi imarotari kãkiti ãkixinire iõkapetini, kotxi iua apaka kãkiti itxaua. ³ Sasetotxi apaka maerekati kamakari itxaua. Ikara xika merepanika iua okari pirãtxi Teoso apisatoõ iuaka maerekani iïkitxitini ïkapani. Eereka iua okari pirãtxi kãkiti maerekani iïkitxitini ïkapani.

⁴ Kãkiti paxitari sasetotxi, iuaritika ninoa kona mereëri sasetotxi parïka. Teosonoka mereëri kãkiti sasetotxi ininiua ïkapani, sasetotxi Arão inakori Teoso mereini atokokana kitxakapirïka.

⁵ Xesosi iuaka !ikamaua sasetotxi auñte apiatakari ininiua. Kona itxari: “Apakatapitika sasetotxi nininiua.” Iuaritika Teoso txari iua: Pite namarite. Uatxa noerekariko kãkiti nota pite iri nininiua, itxa Teoso.

⁶ Iuaïkana Teoso txari: ãtipirika sasetotxi pitxaua. Sasetotxi Meokisiteki inakori atoko inakari pitxaua, itxa Teoso Xesosimoni. ⁷ Xesosi ïkorapokoriti auakasaaki, iua iteene misãkiretari iri. Ipinini apisapanika iteene amanaãri iri imapinakani ïkapani. Imisãkiretakasaakiri iua, iteene itxiïta. Irinokara posotari itxïkitakiniri imapinakani. Iri kenakotari isãkire, kotxi Xesosi txari: “Pinirekakitinokara ninireka.” ⁸ Xesosi Teoso ãkiri, iuaritika atatsiirauatakasaaki, imaroãpotari Teoso nireëkiti iaõka ikamini. ⁹ Iua kamari ikinipoko iri paniãtakiti. Ikara atoko ininiã, kãkiti maerekani makatxakakari itxapekua. Imakatxakari ipaniãtakiti kamakani maerekani, ininiã ninoa auapininiika itxanako Teosokata. ¹⁰ Teoso mereëri iua sasetotxi auñte apiatakari ininiua, Meokisiteki inakori sasetotxi ininiua atokokana.

Erepaniko, Atão Sãkiretxiti !Hïtakanapape

¹¹ Aua apikomoni kaiãopokori ikara atoko inakari asãpiretinii hïte, txamari pamimari ikara asãpiretinii hïte, kotxi !katimari himarotiniri Teoso sãkire. ¹² Akokaxiti hïte auikari Xesosi sãkire, ininiã uatxa apiaerekata Xesosi sãkire oereëkani hininiua. Txamari hïte nirekari ãti oerekinii iuaïkana merepitipanika atão inakari Teoso sãkire iõkatsopatakoriã auakari. Hïte eenetxi xapitikiri atoko. Hinirekari Teoso sãkire tinitxiã atoko inakari. Teoso sãkire nipokori atoko inakari !hïposotapanika hãpakapini. ¹³ Teoso sãkire imarotakari tinitxiãnoka nirekakari atoko inakari, iteene !imarotapanikari Teoso sãkire. ! Imarotari atão inakarinoka ikamini, kotxi iua eenetxi xapitiri atoko inakari. ¹⁴ Kãkiti aneëkari nikari xinitxi. Kataparaxinireri nirekari Teoso sãkire, xinitxi aneëkari nirekini atokokana. Kãkiti ikiniõtika kenakotiniãri Teoso sãkire, ininiã imarotari atão inakari. Imarotari atão minakati apaka.

6

Maãpaiaõkarauata Apikomoni

¹ ! Apakata ikiniõtika merepitipanika Kristo sãkire oerekakorinoka axinikini, kotxi aimarotapekari. Aimarotapekari atakanapiniri maerekati akamakiti. Aimarotapekari ateka kamakiti txĩkitakaua apinini. Aimarotapekari Teoso sãkire aãuikini. ² Aimarotapekari apatxisarauatini. Aimarotapekari atakauakotiniua ãti nopini. Aimarotapekari ipĩkani iuaĩkana õkitikiniua. Aimarotapekari Teoso misiritinina maerekati kamakani ãtipirika. !Apakata ikara ãtipirika aõerekinii. ³ Apikomoni auapitika, ininiã maãpaiaõkarauata apikomoni. Teoso auiritiniãua, apikomoni maxinika.

⁴ Kãkiti takanapiniãri Teoso sãkire auikini, !apakataika ikanapiriinina Teosomoni. Mitxi ninoa imarotari Teoso sãkire atão inakari. Mitxi ninoa imarotari erekari iaxitikiri. Mitxi imarotari Erekari Matamatakoti parĩka ãkixinireẽna. ⁵ Mitxi imarotarina Teoso sãkire ereka inini. Mitxi imarotarina Teoso posotiire itixi amaneri apokasaaki. ⁶ Ikara atoko ninoa imarota, iuaritika ninoa takanapari Teoso. Ininiãkara !apakata iuaĩkana ikanapiriinina Teosomoni, kotxi iuaĩkana imisiritarina Teoso ãkiri aamina ĩpiriãmitakari nopini imisiritiko atoko. Iuasaaki ninoa txĩkitakari kãkiti iuaĩkana napetiniri Xesosi.

Kikio Atoko Anini Pirena

⁷ Teoso takari erekari itixi ia atoko inakari nopini: ãparaã ikipa kaiãokatani iuaã, ininiã iminaua kienatxi katakareri nirekakiti. ⁸ Txamari itixi inako, aanaia pakini auiniã, ! itxa. Ikara xika atxiĩti imisiritaãka. Ininiã arikaãkako. Ikara atoko inapeẽkanako kãkiti. Maerekati aniniãua, ininiã pamonõkoniri atemoni. Ikara atoko ininiã, imapotõkire õti Teoso linirekaikaua ate. Ixipokaua aanaia xipokiko atoko.

⁹ Nitariakori, ikara atoko asãpiretai hĩte, iuaritika ate imarotari kona hĩte ikara atokoni. Aimarotari hãpakapiniri erekari, kotxi Teoso makatxakapekari himaerekani. ¹⁰ Teoso kamari ikinika atão. Iua !imaxinĩkaretari hĩparĩka iua ĩkapani. Hĩtiraõki iuamoni !imaxinĩkareta, kotxi himoianatapekari iua nakitiakori. Uatxa himoianatapanikana ninoa. ¹¹ Ate nirekari ikinika hĩkaminiritika Teoso ĩkapani imapotõkire õti manapĩ apokini. Ikara atoko ininiã, himarotari hiãtapakiti apokapitĩkako hĩtemoni. ¹² Kona apakata hĩarinauatini. Apanakini Teoso sãkire auiãkani kamakiti atoko hĩkamako, kotxi ninoa iãtapari Teoso sikaenetakiti apakapinina.

Teoso Sikapitikariko Isikaenetakiti

¹³ Kitxakapirĩka Teoso sãpiretari isikaenetakiti Apraãomoni. Apiatakari Teosonokara aua. ãti apiatakari iua atoko inakari !auari, ininiã iuaka uãkaã isãpiretari isikaenetakiti isikini Apraãomoni. ¹⁴ Ininiã Teoso txari Apraão: “Nitakapitikari erekari pitemoni. Nisikaiko itomaneri papika mekaniriakori,” itxa. ¹⁵ Ininiã Apraão kenakotakasaakiri ikara, iteene iãtapari Teoso sãpiretakiti apokini. Eereka Apraão apakapari Teoso sikaenetakiti.

¹⁶ Kãkiti sãpiretakasaakiri isikaenetakiti ãti kãkitimoni, iuasaaki ninoa apoka ãti apiatakari apisatoõ isikaenetakiti isãpiretinina ĩkapani. Ininiã iuasaaki kãkiti imarotapitikari isãkire atão inini. Ikara atoko ininiã, aãpirena !auari isikaenetakiti xika. ¹⁷ Teoso nirekari inakitiakori iteene imarotiniri imatakanapakaniri isikaenetakiti isikinina ninoa. Ininiã isikaenetakiti isãpiretakasaaki, isikari isãkire iuaka uãkaã. ¹⁸ Ininiã ipi aua: Teoso, Teoso sãkire pakini. Teoso mitxi atoko itxapikako. Teoso sãkire mitxi atoko itxapikako. Ininiã Teoso !iposotari atão minakati isãpiretini. Amiteka iuamoni, iua nĩkatiniua ĩkapani, aiãtapakiti aãpakapini ĩkapani. Ininiã asikataparaxiniretaãka.

¹⁹ Ikara atoko inakasaaki, aposotari iteene aãuikiniri Teoso sãkire. Aiãtapari ikinipoko iua sãkire iaõka apokini. Teoso sãkire aãuikini, minari maporo maĩkakari atoko itxa. Maporo maĩkakari !auiritari maporo tiokini. Teoso sãkire aãuikini maĩkari axinire. Isikataparatarari axinire. !Auiritaua atiokini maerekanitximoni. Teoso sãkire aãuikini anikaua Teosonani Auini Pakitaãtaã, mãkatxi mata arõkakari apikomoni auakari pakitamoni. Kitxakapirĩka sasetotxiakori auĩte apiatakarinoka ĩroã iuaã. ²⁰ Iuaã Xesosi ĩroã ate ĩroini

apisa. Iuaã imisãkiretari iri ate ìkapani. Sasetotxiakori auîte apiatakari itxapekaua àtipirika ate ìkapani. Meokisiteki inakori sasetotxi ininiua atoko itxa Xesosi.

7

Meokisiteki Pirena

¹ Meokisiteki inakori Sareẽ tixini auakani auîte itxaua. Iuasaaki sasetotxi itxaua apaka. Teoso, Apiananiri, kamari iua sasetotxi ininiua. Kitxakapirika Apraão kamari neenamatzixi àti tixini auakani auîteakorikata. Iua kanapiriãkasaaki, aõkitari Meokisiteki. Iuasaaki Meokisiteki takari erekari Teoso sikakiti iuamoni. ² Iuasaaki Apraão sikari iua tiitxi imaktxakakiti ipixini. Tesi tiitxi auiniã, isikari àti Meokisitekimoni. Meokisiteki akiritaãka “Auõtetxi Atão Inakari Kamakari.” Apaka akiritaãka “Auõtetxi Kãkiti Kamaerekaxiniretakari.” ³ !Kimarotikori Meokisiteki iri, inoro pakini. !Kimarotikori apika atokiriakori. !Kimarotikori iponaniini, ipinini pakini. Teoso ãkiri atoko itxa. Sasetotxi àtipirika itxaua.

⁴ Hìxinikariko iua Meokisiteki. Apiatakari iua. Apraão iteene paxitari iua, ininiã isikari ipixini tiitxi iua makatxakakiti iuamoni. ⁵ Eereka àti õti Apraão tikini Teoso paniãtari Arevii apika mekaniriakori, sasetotxiakori, apakapiniri ipixini kãkiti apakapakiti, txineiro, tiitxi pakini. Ninoa apakapari kãkiti sikakiti Teoso ìkapani. Ikinimane ninoa Apraão apika mekaniriakori itxauana. Iuaritika sasetotxiakori apakapari inirimane sikakiti. ⁶ Iua Meokisiteki Arevii nirimane !itxaua. Iua aua kitxakapirika Arevii apisapanika. Iuaritika iua apakapari ipixini Apraão makatxakakiti. Eereka Meokisiteki takari erekari Teoso sikakiti Apraãomoni, Teoso sikaenetakiti apakapakarimoni. ⁷ Iua Apraão poiãori. Apiatakari Meokisiteki, kotxi apiari takari erekari Teoso sikakiti poiãorimoni. ⁸ Ikinika Arevii apika mekaniriakori, Teosomoni kãkiti sikakiti apakapakani, ipinanipeka. Àtipirika auakari atoko itxa Meokisiteki. ⁹ Atxiiti aposotari asãpiretiniri ia atoko: “Arevii sikari isikakiti Meokisitekimoni Teoso ìkapani, kotxi iua ina Apraão ìto ãki.” ¹⁰ Kotxi Apraão aõkitakasaakiri Meokisiteki, iuasaaki Arevii kona auapanika. Ininiã iua auini apisapanika Apraão ìtoã aua, kotxi Apraão apika mekaniri itxaua Arevii.

Xesosi Meokisiteki Atoko Inini

¹¹ Arevii apika mekaniriakori sasetotxiakori itxauana. Iua apika mekaniri Arão inakori. Arão apika mekaniriakori apaka sasetotxiakori itxauana. Teoso sikari ipaniãtakiti iõkatsopatakori ninoamoni, isãkire kãkiti imarotini ìkapani. Iuaritika ninoa sasetotxiakori parika !oerekari kãkiti kamaerekatiko. Ininiã àtião sasetotxi nirekaãka. Sasetotxi Arão atoko inakari !inirekaãkaika. Sasetotxi Meokisiteki atoko inakari nirekaãka.

¹² Àtião sasetotxi auakasaaki, àtião Teoso paniãtakiti iõkatsopatakori aua iuasaaki. ¹³ Xesosi kona Arevii apika mekanirini. Iua Xotaa apika mekaniri. Xotaa mekaniriakori kona sasetotxiakorini. Ninoa kona okari pirãtxi Teoso ìkapani. Kona iparikaumatana Teosomoni sikakori takikoãtaã. ¹⁴ Ikinimane imarotari aãuîte Xesosi Xotaa nirimane ininiua. Moisesi iõkatsopatakiti !auritana ninoa sasetotxi ininiuana. ¹⁵ Ate sãpiretapekari Meokisiteki pirena. Aimarotari auapitika àti sasetotxi, Meokisiteki atoko inakari. Uatxa aimarotari Xesosi Meokisiteki atoko itxaua.

¹⁶ Kitxakapirika sasetotxi pitxaua, kotxi pikiomaneakori sasetotxi apaka itxauana. Teoso kamari Xesosi sasetotxi ininiua, kotxi iua auapikako. Kaposotiireri iua. !Ixipoka. ¹⁷ Teoso txari Xesosi isãkire iõkatsopatakoriã:

Àtipirika sasetotxi pitxaua. Sasetotxi Meokisiteki atoko inakari pitxaua, itxa.

¹⁸ Ininiã mitxi auakari sasetotxiakori parika !auaika, kotxi itapara !auari. Xipope ikara. ¹⁹ Moisesi paniãtakiti iõkatsopatakori !ikamari kãkiti ereka inini. Uatxa api-aerekatakari aiãtapakiti apokapeka ìkorapokoriti. Ininiã iua anikaua Teosomoni.

²⁰ Teoso isäkireẽ txĩkitakari Xesosi sasetotxi ininiua. ²¹ Teoso !isäkirauata ikara atoko kãkiti sasetotxipeka inakasaaki. Teoso txĩkitakari Xesosi sasetotxi ininiua isäkireẽ, kotxi itxari Xesosi:

Nota Apiananiri sãpiretapekari nikamaenetakiti. Ikara nikamapitikako, ininiã ãtipirika sasetotxi pitxaua, sasetotxi Meokisiteki atoko inakari pitxaua, itxa Teoso. ²² Ininiã ikara Teoso sãkireẽ, aimarotari Teoso kamapitikariko ikamaenetakiti apiari, kotxi iposope isikiniua Xesosi.

²³ Auapeka itori sasetotxiakori. Ninoa kona posotari ãtipirika iparĩkauatinina, kotxi ikoriãpekana. ²⁴ Xesosi auapikako, ininiã ãtipirika sasetotxi itxaua. ²⁵ Ininiã iposotari imakatzakiniri ikinika amaerekani, Teosomoni anikasaakia, kotxi ãtipirika aua, ininiã ãtipirika imisäkiretari Teoso ate ïkapani.

²⁶ Ininiã ikara atoko inakari sasetotxi auĩte apiatakari anirekapitika. Apiaerekatakari iua. !Kaneenamari. Ikerokakiti !auari. Itxiko ixinireẽ !auari. Maerekati !ikama. Iaxiti apiko nopinixiti auakari, auĩtetxi Apiatakari itxaua. Ikara atoko inakari sasetotxi anirekapitika. ²⁷ Apanakini sasetotxi auĩte apiatakani ïkorapokoriti auakani atoko ! itxaua. Ninoa ikiniõtika okari pirãtxi, merepanika ninoaka maerekani makatzakiko ïkapani. Eereka ninoa okari pirãtxi kãkiti maerekani makatzakiko ïkapani. Kona ikara atokoni itxa Xesosi. Ætikatanokara Xesosi oxiketari iarẽka kãkiti ïkapani. Iuaka ipina kãkiti ïkapani. ²⁸ Mitxipe sasetotxi auĩte apiatakani mereeẽka Moisesi paniãtakiti iõkatsopatakori iaõka. Ninoa tapara !auari. Moisesi sãkire tikini Teoso mereẽri imi ãtipirika sasetotxi ininiua ïkapani. Ætipirika erekarinoka kamakari iua.

8

Xesosi Sasetotxi Auĩte Apiatakari

¹ Ia atoko asãpiretakiti: Atemoni auapitika atão sasetotxi auĩte apiatakari. Iaxiti iua topãka aãuĩte Teoso kikomoni, auĩtetxi auiniãtaã. ² Iuaã Teoso auiniãtaã, imisäkiretari iua ate ïkapani. Iuaã aua atão inakari Teoso aapoko, Apiananiri kamakiti. Kona kãkiti kamakitini.

³ Ikinika sasetotxi auĩte apiatakari auari iparĩka. Isikari kãkiti siãkiti Teosomoni. Isikari pirãtxi okakori Teosomoni. Ininiã Xesosi parĩka apaka aua isikarauatini. Iuaka isikaua Teosomoni. ⁴ ïkorapokoriti Xesosi auakasaaki, sasetotxi !itxaua, kotxi auape ïkorapokoriti sasetotxiakori kãkiti siãkiti sikakani Teosomoni. Moisesi iõkatsopatakiti atokotxikana ikamana. ⁵ Sasetotxi ïkorapokoriti auakani kamakiti atão, txamari ninoa parĩka !inirekaãkaika. Ninoa parĩka sanõkatxi atoko itxa, Xesosi parĩka iaxitikiri aimarotini ïkapani.

Kitxakapirĩka Teoso paniãtakasaakiri Moisesi Teoso aapoko aamata kamakori ikamini ïkapani, Teoso txari Moisesi:

Pikamariko naapoko nipaniãtakiti iaõka ixirata auĩte nopini aãuakasaaki noerekakiti.

Ipinimoni inakari !pikamape, itxa Teoso.

⁶ Xesosi parĩka Teoso sikakiti apiaerekata. Kitxakapirĩka sasetotxiakori parĩka poião erekari. Iua atokokana Teoso kamaenetakiti amaneri apiaerekata. Kitxakapirĩka ikamaenetakiti poião erekari. Xesosi txĩkitakari Teoso kamaenetakiti amaneri apokini kãkiti ïkapani, kotxi iua ipina kãkiti ïkapani. Teoso kamaenetakiti amaneri apiaerekata, kotxi ikamaenetari kaiãopokori erekari apiaerekatakari.

⁷ Teoso kamaenetakiti Moisesimoni apakatiniã maerekati imakatzakini ïkapani, ininiã kona ikamari ãti ikamaenetakiti apiatakari. ⁸ Txamari Teoso !apokaerekatari kãkiti, kotxi kãkiti kamapanikari maerekati. Ininiã Apiananiri txari kãkiti:

Æti õti nisãpiretariko nikamaenetakiti amaneri Isaeo nirimanemoni, Xotaa nirimanemoni pakini.

- ⁹ Kitxakapirĩka nisãpiretari mitxi nikamaenetakiti ninoa atokiriakorinimoni. Iuasaaki nota makatxakana ninoa imisiritikosaakina Exito tixiniã. Txamari ninoa ! ikamari nisãkire iaõka. Ininiã nitakanapana ninoa. Nikamaenetakiti amaneri kona mitxi nikamaenetakiti atokoikani.
- ¹⁰ Āti õti ĩkari nikamaenetakiti amaneri nisãpiretariko Isaeo tixini auakani. Ia atoko inakari nikamaenetakiti amaneri: Nitakariko nipaniãtakiti kãkiti ĩkĩteẽ. Niõkatariko nipaniãtakiti ninoa ãkixinireẽ. Iuasaaki ninoa Teosone nitxauako. Iuasaaki ninoa nota nakitiakori itxauanako.
- ¹¹ Iuasaaki kãkiti kona oerekari āti imarotiniri Apiananiri. Kona kãkiti oerekari itari imarotiniri Apiananiri, kotxi iuasaaki ikinimane imarotanoko nota. Poiãoka inakani, apiatakani pakini imarotanoko nota.
- ¹² Nimaxinĩkaretariko ikinika maerekati ikamakitina. Kona nimisiritaitakanako ninoa. Kona nixinikaikariko maerekati ikamakitina, itxa Apiananiri. ¹³ Teoso kamakasaakiri ikamaenetakiti amaneri, iuasaaki oerekari kãkiti mitxi ikamaenetakiti Xoteoakorinoka ĩkapani ikamape, ininiã inapape. Tiitxi kitxakari patimari xipokini atoko, ikara mitxi Teoso kamaenetakiti xipoka.

9

Teoso Aapoko Aamata Kamakori

¹ Kitxakapirĩka Teoso kamaenetakiti isãpiretakasaakiri Moisesi, Teoso oerekari Moisesi oerekiniri kãkiti Teoso apisatoõ apokini. Iua apaka sãpiretari kãkiti iua aapoko ĩkorapokoriti ikaminina ĩkapani. ² Ininiã ninoa kamari Teoso aapoko aamata kamakori. Sasetotxiakori ĩroiniãtaã aua tirikapi takiko tiitxiti. Iuaã aua apaka komiri Teosomoni siãkori amesa nopini. Iua pakita ninoa takauãkatari “Teoso Auini Pakitaãtaã.” ³ Apanĩkaki mãkatxi mata kasipiri arõkakari aua. Iua mãkatxi mata apikomoni auakari pakita ninoa takauãkatari “Teosonani Auini Pakitaãtaã.” ⁴ Iuaã aua kamariãro arikiko amesati oro kamakoro. Iuaã aua Teoso kaixane. Iua kaixa akiritaãka “Teoso kamaenetakiti kaixati.” Iua kaixa nopini mapara itaãka oronokara. Iua ãki itakaãka kopitipaki oro kamakoro. Iua kopitipaki ãki itakaãka xapitiri komiri manaa inakori. Iua kaixa ãki aua apaka Arão tsonareke. ĩkora mitxi pitxaka iuaĩkana. Apaka iua kaixa ãki aua ipi kaita. ĩkora kaita nopini aua Teoso paniãtakiti iõkatakori. ⁵ Iua kaixa nopini aua ipi Teoso nitiriakori iaxitikini atoko inakani. Oro kamakori ninoa. Akiritaãka Keropiĩ inakoni. Keropiĩ matameẽkari imĩkita iua kaixa tore nopini. Iuaã Teoso maxinĩkaretari kãkiti maerekani.

Uatxa !apakata apikomoni noerekinii ikara pirena.

⁶ Teoso Auini Pakitaãtaã sasetotxiakori ĩroã ikiniõtika iparĩkana ikaminina Teoso ĩkapani. ⁷ Sasetotxi auĩte apiatakarinoka ĩroã Teosonani Auini Pakitaãtaã. Ātikanani ātikatika ĩroã. Iua anikari arẽkatxi iuakata. Arẽkatxi imanikakaniã, !ĩroã. Iua arẽkatxi isika Teosomoni merepanika iuaka maerekani Teoso makatxakini ĩkapani. Eereka ikamari ikara apanakini kãkiti maerekani Teoso makatxakini ĩkapani. ⁸ Iuasaaki Teoso kona auiritari kãkiti ĩroini Teosonani Auini Pakitaãtaã. Ikara atoko Erekari Matamatakoti oerekaua ate, kotxi kona Teoso oerekapanikari ikinimane kãkiti ĩroini Teoso apisatoõ. Teoso aapoko aamata kamakori auapanika inakasaaki, Teoso kona oerekari kãkiti iuamoni apokini. ⁹ Ikara Teoso aapoko kitxakapirĩka auakari ate oerekiko itxaua uatxa. Oerekari ia. Kãkiti sikakiti Teosomoni, pirãtxi okiko Teoso ĩkapani apaka, kona posotari oeretiniri Teoso teosonetakani ãkixinire. ¹⁰ Ikara Teoso oerekakiti kitxakapirĩka oerekari kãkiti iniãkiti atão inakari, iãtakiti atão inakari pakini. Oerekari kãkiti iĩto arokiko, itii arokiko pakini Teoso apisatoõ apokini iposope inini ĩkapani. Teoso kamaenetakiti amaneri apokasaaki, kona akamaikari ikara mitxi Teoso oerekakiti.

Kristo Arẽka

¹¹ Kristo apokapeka. Sasetotxi auñte apiatakari itxaua. Oerekaua erekari Teoso sikakiti. Iparĩkauata Teoso aapoko apiaerekatakari āki. Iua Teoso aapoko kākiti makamakiniti. Iua aapoko !auari ĩkorapokoriti. ¹² Iua ĩroākasaaki iuaātaā, !anikari potxi arēka, kema auñte ākiri arēka ĩĩroini ĩkapani. Iua ĩroākasaaki Teosonani Auini Pakitaātaā iaxiti auakariātaā, anikari iuaka arēka, kotxi ikitakari iarēka ātikatika ikinimane kākiti ĩkapani. Ininiā ĩkitxitari Teoso ātikatika kākiti maerekani ĩki, ininiā kākiti aua Teosokata ātipirika. ¹³ Potxi arēkaā, kema auñte arēkaā, kema auñte ākiri ariākori paniā pakiniā, kitxakapirĩka sasetotxi tseētari maerekati kamakani Teoso apisatoō apokinina ĩkapani. Ininiā iusaaki maparanoka oeretaāka. Ākixinirena !oeretaāka.

¹⁴ Apiaerekata Kristo arēka, kotxi iua posotari oeretiniri aākixinire. Maerekati ! auari Āristomoni. Iuaka sikaua Teosomoni Erekari Matamatakoti posotiireē, ātipirika auakari posotiireē. Iuara oeretari aākixinire. Imakinika akamakiti apinini txĩkitakakari imaktxaka. Ininiā uatxa aposota aparĩkauatini Teoso ātipirika auāki inakari ĩkapani.

¹⁵ Ininiā iua Kristo txĩkitakari Teoso kamaenetakiti amaneri apokini. Ininiā kākiti Teoso akiritakini posotari apakapiniri ātipirika Teoso sikaenetakiti iua anaakori ĩkapani. Kristo ipĩkasaaki, isikakana ninoa imaerekanina itakanapinina ĩkapani. Iusaaki ĩkitxitari Teoso imaerekanina ĩki. Ikara imaerekanina ikamana Teoso kamaenetakiti mitxipe auakari auakasaaki.

¹⁶ Kākiti ipinini apisa, iōkatsopatarari itii apakapakani uāka, ininiā ipĩkasaaki itii apakapakani imarotaāka. Ininiā iua ipinini imarotiko tsopa auiniā, iusaaki itii apakapakani apakapari ipĩkari tii. ¹⁷ Ipĩkari tii apakapakani imarotiko tsopa nirekaāka kākiti ipĩkasaakinokara. Ikara !inirekaāka ipinini apisa. Iua auākipanika inakasaaki, kākiti !apakapari itii. ¹⁸ Ininiākara mitxi Teoso sikaenetakiti isika kākitimoni, arēkatxi auakasaaki, ipĩkari auakasaaki. ¹⁹ Kitxakapirĩka Moisesi merepitipanika sāpiretari kākiti ikinika Teoso paniātakiti iōkatsopatakori. Eereka ikosekari kema auñte ākiri arēka, potxi arēka pakini. Ikara ikoketa āparaākata. Iposo atoko itseētari Teoso sākire aātsopate, ikinimane kākiti pakini isopo inakori poria, soti auñte piti pōkamarariā pakiniā. ²⁰ Iusaaki itxari: “Ia arēkatxi oerekaua Teoso kaminiri ikamaenetakiti. Teoso paniātai hĩkĩpitiniri iua sākire.” ²¹ Iua atokokana Moisesi tseētari Teoso aapoko aamata kamakori, ikinika iua āki auakari pakini arēkatxiā. ²² Teoso sākire iōkatsopatakori paniātari kākiti, tiitxi pakini oeretiko arēkatxiā. Okakori mauakaniā, arēkatxi kitaākori mauakaniā, Teoso ! imaktxakari kākiti maerekani.

²³ Ininiā Moisesi takari pirātxi arēka ikinika Teoso aapoko āki auakari nopini oeretiniri ĩkapani. Ikinika Teoso aapoko āki auakari ĩkorapokoritikiri, iaxitikiri oerekiko ĩkapani itxa. Sanōkatxi atoko itxa. Pirātxi arēka kona apakata iaxiti ĩkapani. Teoso nirekakari arēkatxi apiatakari. ²⁴ Kristo iparĩka ikamakasaaki ate ĩkapani, kona ĩroā Teoso aapoko kākiti kamakitiā. ĩkorapokoriti kākiti kamari Teoso aapoko atoko inakari, txamari na atāo iua aapoko. Kristo ĩroā atāo Teoso aapoko Teoso tixineē. Uatxa iuaātaā Teoso apisatoō iua misākiretari Teoso ate ĩkapani. ²⁵ Sasetotxiakori auñte apiatakari ĩroā Teosonani Auini Pakitaātaā ikinikanani. Iusaaki anikari pirātxi arēka. Kristo !ikamari ikara atoko. Ātikatika Kristo oxiketari iarēka. ²⁶ Iua ninoa atoko inaākamako, itokata imisiritaākamako itixi kamikosaakipekamako. Uatxa imapotōkire ōti takote iua apokapeka maerekati ātikatika imaktxakini ĩkapani. Iuaka isikaua ipinini ĩkapani, amaerekani ixipokini ĩkapani. ²⁷ Teoso kamari ikinimane kākiti ātikatika koriini. Eereka ikinimane sari Teoso apisatoō. Iusaaki apanakini apakapari imisiritiko. Apanakini apakapari iparĩkana ĩki. ²⁸ Ininiā Kristo okaāka ātikatika kaiāopokori kākiti ĩkapani, imaerekanina imaktxakini ĩkapani. Iuaĩkana iua kanapiriā. Iusaaki !imisiritaākaikako kākiti maerekani xika. Iua ĩkasaaki, imaktxakariko iua iātapakani, maerekani sauaki auakani. Anikana itixinemoni ātipirika Teosokata auinina ĩkapani.

10

Pirãtxi Arẽka Kona Apakata

¹ Kitxakapirĩka Teoso paniãtakiti Xoteoakorimoni sanõkatxi atoko itxa. Ikara oerekari kãkiti iuasaaki auakani atão inakari apokini ãti õti. Ikinipoko atão inakari !apokapanika ninoamoni. Ininiã pirãtxi okiko ãtipirika kona txĩkitakari kãkiti iposope Teosomoni apokini. !Ikamaerekatana ninoa. ² Pirãtxi arẽka makatxakiniãri kãkiti maerekani, ininiã ninoa takanapamariko pirãtxi okinina, kotxi Teosomoni apokakani oeretapeẽkaika, ininiã imarotamarina ãkixinireẽna imaerekanina mauakani. ³ Txamari pirãtxi arẽka !imaktxakari kãkiti maerekani. Ininiã ikinikanani pirãtxi okakori oerekari kãkiti imaerekani auapanika. ⁴ Kema auĩte arẽka, potxi arẽka pakini kona posotari imaktxakiniri kãkiti maerekani.

⁵ Kristo apokasaaki ãkorapokoriti, itxari Teoso:

Pirãtxi okakori pitemoni siãkori kona pinireka. Ininiã pite kamari ãtotxi nota ãkapani.

⁶ Pirãtxi arikiko pite ãkapani, pite !apokaerekatari. Kãkiti sikiniri isikakiti pitemoni imaerekani pimaktxakini ãkapani, pite !apokaerekatari. !Ikamapoxokonitai.

⁷ Iuasaaki nitxai. “Uaĩkarano nota. Paãtsopateẽ iõkatapeẽkaika nota pirena. NiTeosone uai napoka pinireẽkiti nikamini ãkapani,”

itxa Xesosi.

⁸ Merepanika Xesosi txari iri: “Pirãtxi okakori pitemoni siãkori kona pinireka. Pirãtxi arikiko pite ãkapani, pite !apokaerekatari. Kãkiti sikiniri isikakiti pitemoni, pite !apokaerekatari. !Ikamapoxokonitai,” itxa. Iuaritika Teoso sãkire iõkatsopatakori kitxakapirĩka paniãtari ikara kamiko. ⁹ Eereka Kristo txari iri: “Uaĩkarano nota. Uai napoka pinireẽkiti nikamini ãkapani,” itxa. Ikara atoko inakasaaki, Xesosi xipokari pirãtxi okiko, kotxi iua apoka uai Teoso nireẽkiti ikamini ãkapani.

¹⁰ Teoso nireẽkiti iaõka ikamini kamaerekataua ate, kotxi Xesosi Kristo ipina ãtikatika ikinimane ãkapani.

¹¹ Sasetoxiakori ãkorapokoriti auakani sapika ikiniõtika Teoso apisatoõ iparĩkana ikaminina ãkapani. ãtipirika iua okari pirãtxi Teoso isikini ãkapani. Itxama, ikara !iposotari maerekati imaktxakini. ¹² Iuaritika Kristo, ate sasetotxine, iuaka sikapekua ikoriini kãkiti maerekani imaktxakini ãkapani. Ikamari ikara ãtikatika. Iposo atoko, iitopãka Teoso kikomoni. Ikara atoko ininiã, ixipokari iparĩka. ¹³ Iuaã iãtapari ikinika imokaiakari xipokini. Ikiti itakiniãtaã atoko ninoa. ¹⁴ Ininiã ãtikatika okaãka kãkiti ereka inini ãkapani. Iua kamaãpotana ninoa erekaãpo ininina ãkapani.

¹⁵ Erekari Matamatakoti apaka txaua ate ikara atão inini. Merepanika itxari:

¹⁶ Apiananiri txari: “Ia nikamaenetakiti nikamako ninakitiakori ãkapani ãti õti. Ia nikamaenetakiti: Nipaniãtakiti nitakako ninoa ãkixinireẽ. Nipaniãtakiti niõkatakoi ãkitekẽna.”

Itxa Erekari Matamatakoti. ¹⁷ Apikomoni itxa:

Kona nixinikaikari maerekati ikamakitina. Apaka nipaniãtakiti ninoa takanapakiti, !nixinikaikako.

¹⁸ Teoso makatxakasaakiri maerekati akamakiti, ininiã amaerekani makatxakaãkapeka. Ininiã !auaika okakori kãkiti maerekani makatxakini ãkapani.

Maãpoka Teosomoni

¹⁹ Ininiã nitariakori uatxa !hĩpĩkarauatape hĩĩroini Teosonani Auini Pakitaãtaã, kotxi Xesosi ãkitxitapekari aĩroini ãkapani iuaka arẽkaã. ²⁰ Xesosi ipĩkasaaki, iua kamari kimapori amaneri, maxipokati, Teosomoni asini ãkapani. Ipĩkasaaki, imaktxakari mãkatxi mata Teosonani Auini Pakitaãtaã arõkakari, Teosomoni aĩroini ãkapani.

²¹ Atemoni aua sasetotxi apiatakari Teoso aapoko nĩkatakari. ²² Ininiã maãpoka Teosomoni. Maãuiritari atão inakarínoka kaikotini aãkixinireẽ. Maãuikari ikinika iua sãkire. Kãkiti kitxakapirĩkarini tseẽrauata arẽkatxiã, maerekati makatxakiko ãkapani.

Ininiã maamanaãri Xesosi tseētiniiri aākixiniire oeretiniiri ĩkapani. Kitxakapiriřka kākiti kipaãtaua Teoso aapoko ĩroini ĩkapani. Iua atokokana maamanaãri Xeosi aĩto arokini āparaã ereriã. Ikara atoko aniniã, maãpoka Teosomoni. ²³ Iteene maãuikari aimarotakiti asãpiretakiti, kotxi Teoso kamapitikariko ikamaenetakiti. ²⁴ Maxinikariko ia. Natokopa itxa aõtãkikakakiniua atiraõkiuatini ĩkapani, erekari akamini ĩkapani apaka? ²⁵ ! Apakata atakanapiniiri aãpotiitiniua Teoso ĩkapani. Apanakini !itotaikari apotiitiniua Teoso ĩkapani. Masikataparaxiniretakakaua. Apiata masikataparaxiniretakakaua, kotxi aãũite kanapiriini ĩkorapokoritimoni kaiaapeka.

²⁶ Atão inakari aimarotiniã, atão inakari aãpakapiniã, eereka maerekati akamapika, kotxi anirekari maerekati akamini. Iuasaaki !auaika amaerekani ĩkitxitiko. Iuasaaki !auaika amaerekani makatxakiko. ²⁷ Iuasaaki aimarotari kākiti ikara atoko inakani misiritaãkako, kotxi Teoso mokaiakariakori itxauana. Arikatxi apiatakari xipokanako ninoa. Pĩkaretxinoka aua ninoa ĩkapani. ²⁸ Kitxakapiriřka kākiti makĩpitakaniãri Moisesi paniãtakiti okapeẽkaika. Ipi, atxiĩti ipi āti pakini kākiti atamatiniãri iua kaminiri maerekati, ininiã okaãka. !Auiritaãka imitekini. ²⁹ Ininiã natokopa itxa kākiti misiritiko Teoso ākiri sãkire imakĩpitakaniã? Apiata iua misiritiko, kotxi Teoso ākiri ikatxaratini atoko itxa imakĩpitakaniri iua sãkire. Iuasaaki !ipaxitari iua arẽka amaerekani makatxakakari Teoso sikaenetakiti. Iuasaaki imisãkirepiretari Erekari Matamatakoti, ikinipoko erekari sikakari. ³⁰ Aimarotari ia sãpiretakari. Iua txari: Notanoka xikatxirauata. Notanoka misiritanako ninoa imaerekanina xika, itxa Teoso.

Apaka Teoso sãkire iõkatsopatakori txari:

Apiananirinoka sãpiretari kākiti inakitiakori misiritiko.

³¹ Kākiti maerekati kamakani apokasaaki Teoso ātipirika auãki inakari apisatoõ, iuasaaki pamonõkoniri, kotxi kākiti misiritakari itxaua.

³² Hĩxinikariko merepitipanika Teoso sãkire hãuikini õti. Hĩĩkite iopinikiko atoko itxa iuasaaki. Iuasaaki himarotari Teoso sãkire. Iuasaaki iteene hãtatsiirauata Xesosi sãkire hãuikini xika. Iuaritika iuasaaki hĩtaparaxinireritika hãua. Iuasaaki !hĩtakanapari Xesosi sãkire hãuikini. ³³ Iuasaaki kākiti apisatoõ apanakini napetai. Ninoa misãkirepiretai hĩte. Imisiritaina hĩte. Iuasaaki hĩte moianatari apanakini Teoso sãkire auĩãkani, kākiti misiritakini. Ininiã iuasaaki hĩte apaka misiritaãka. ³⁴ Hĩtiretana apanakini Teoso sãkire auĩãkani kateia āki auakani. Apanakini mixirikari hĩtii Kristo sãkire hãuikini xika, iuaritika hĩpoxokoniuata, kotxi iuasaaki himarotapekari auapitika iaxiti hĩtii Teoso sikakiti. ĩkora tiitxi kona xipoka. Apiaerekata tiitxi iuaxiti auakari.

³⁵ Ininiã kona hĩtakanapapiri hĩtaparaxiniire, kotxi āti õti Teoso ĩkitxitai hĩtaparaxiniire auiniã. ³⁶ Himĩteenekariko ĩkinika Kristo ĩkapani. Hĩkamariko ĩkinika hĩtaparaxinireritika. Ininiã Teoso paniãtakiti hĩkamakasaaki, hãpakapariko isikaenetakiti. ³⁷ Teoso sãkire iõkatsopatakori txari:

Apikomoni mokatanitika iua kanapiriãko. Iketo õti ikanapiriãpitika.

³⁸ Kākiti atão inakari kamakari auini erekari, kotxi auikari nota sãkire. Kākiti sipikapapiretiniãri nisãkire, nota !apokaerekatari iua,

itxa Teoso. ³⁹ Ate kona sipikapapiretari Teoso sãkire. Ininiã !axipokaãka. Teoso sãkire auĩãkani atxaua ate. Iua makatxakari amaerekani aākixiniireẽ auakari.

11

Teoso Sãkire Auikiko Pirena

¹ Atão aãuikasaakiri Teoso sãkire, iuasaaki aimarotapitikari aãpakapiniiri aiãtapakiti. Atão aãuikasaakiri Teoso sãkire, iuasaaki aimarotari amatamatakiniti auapitika.

² Kitxakapiriřka Teoso apokaerekatana isãkire auĩãkani, kotxi iteene auikarina isãkire.

³ Teoso sãkire aãuikasaaki, aimarotari iua kamari itixi, iaxiti pakini isãkireẽnokara. Aãtamatakitiã !ikamari itixi, iaxiti pakini. Isãkireẽnokara ikamari ikinipoko.

Teoso Sākire Auiākari Apeo Inakori
(Xénesisi 4.2-12)

⁴ Apeo inakori auikari Teoso sākire, ininiā Teosomoni isikakiti apiaerekata, kotxi Apeo sikari Teosomoni Teoso sākire iaōka. Itari Kaiī inakori sikakiti poiāo erekari. Apeo auikari Teoso sākire, ininiā Teoso apokaerekatari iua sikakiti. Teosomoni atāo inakari kamakari itxaua Apeo. Kitxakapirīka Apeo koriā, iuaritika iua auikiniri Teoso sākire oerekapanikaua Teoso tiretiniri kākiti isākire auiākani.

Teoso Sākire Auiākari Enoki Inakori
(Xénesisi 5.21-24)

⁵ Enoki inakori apaka auikari Teoso sākire. Ininiā Teoso anikari iua iaxiti. Kona ipina. Mapīkatipanika anikaāka Teosomoni. Iuasaaki kākiti !apokaikari iua, kotxi Teoso anikapekari iua. Isini apisa kākiti imarotari Teoso apokaerekatiniri iua. Iua kamapoxokonitari Teoso. ⁶ Teoso sākire amauikakaniā, kona akamapoxokonitari Teoso. Kākiti Teosomoni apoākari, merepanika auikariko Teoso auini. Apaka ninoa auikariko Teoso sikiniri erekari kaiāopokori iua nitakarimoni.

Teoso Sākire Auiākari Noee Inakori
(Xénesisi 5.28-9.29)

⁷ Noee apaka auikari Teoso sākire. Teoso sāpiretari iua kākiti mimarotakiniti monōkoni. Iuasaaki iua pīkarauata, ininiā ikamari maporo mitari iua aapoko āki auakani mapinakani īkapani. Noee auikari Teoso sākire, ininiā isāpiretari Teoso misiritiniri kākiti imaerekani xika. Teoso txīkitakari iua atāo inakari ikamini, kotxi iua auikari Teoso sākire.

Teoso Sākire Auiākari Apraão Inakori

⁸ Apraão apaka auikari Teoso sākire, Teoso paniātakasaakiri iua ātiātaā isini. Iua kīpitari Teoso sākire, ininiā iua sari, txamari kona imarotari isinimoni. ⁹ Iua auikari Teoso sākire, ininiā iua aua Teoso sikaenetakiti tixitiā. Iuaā iua aapoko aamata kamakori, kotxi āti tixinikiri itxaua. Apaka Isaki, Xakoo pakini aua aapokotxi aamata kamakori. Ninoa apaka apakapari itixi Teoso sikaenetakiti. ¹⁰ Apraão iātapari Teoso sitatxine apokini, kotxi Teoso kamari ikara sitatxi. Ixinikakiti iaōka ikamari. Ikara sitatxi kamaāka kaikori nopini, ininiā !ixipoka.

¹¹ Apraão auikari Teoso sākire. Iua imarotari ikiomaneēpeka inini. Apaka imarotari ītanoro Sara kona posotaikari keene onini. Iuaritika auikari Teoso sākire irītxi ininiua īkapani. Imarotari Teoso sikapitikariko isikaenetakiti. ¹² Ininiā iua kiki iteene kiomātxi inakariua, iuaritika irītxi itxaua. Iua aua itomaneri imekaniriakori, itomaneri apika mekaniriakori pakini. Itomaneri apika mekaniriakori iōriki iaxiti auakani atoko itx-anako. Ikipatxite atoko itxanako apika mekaniriakori. Kaiāopanina ninoa.

Teoso Sākire Auiākani Iātapakiti

¹³ Ikinika ninoa kākiti Apeo, Enoki, Noee, Apraão pakini auikari Teoso sākire. Iko-riākasaakina, ninoa kona apakaparina ikinika Teoso sikaenetakiti. Ninoa imarotari Teoso sikaenetakiti ōtakopanikari apokini tīkane. Ninoamoni īkorapokoriti kona atāo ninoa tixine. Maparakini atoko itxauana. ¹⁴ Kākiti ikara atoko inakani oerekari ninoa nitiniri ninoaka tixine. ¹⁵ Itixi itakanapakitina ixinikaākamanako, ininiā iuaīkana ikanapiriāmanako iuaātaā. ¹⁶ Ninoa kona kanapiriā, kotxi inirekarina apiaerekatakari itixiti, iaxiti auakari. Ininiā Teoso !ipētauata ninoa Teosone ininiua īkapani, kotxi iua kamapekari sitatxi ninoa īkapani.

Apraão Okaaritiniri Imi

¹⁷ Apraão auikari Teoso sākire, Teoso ataerekatakasaakiri iua. Iuasaaki iposope okiniri Isaki Teoso īkapani. Teoso sikaenetakiti apakapakari iua Apraão. Iposope imatonōkari imi okini Teoso īkapani. ¹⁸ Teoso sāpiretapekari iua: “Isakimoni auako

pimekaniriakori, papika mekaniriakori pakini,” itxari. ¹⁹ Iuasaaki Apraão xinikari Isaki ipininiã, Teoso õkitikari iua iuaïkana. Iuasaaki Isaki ipinaarita, ininiã kãkiti ipïkari iuaïkana õkitikiniua atoko itxa Isaki iuasaaki.

Isaki, Xakoo, Xosee Pakini Auikiniri Teoso Sãkire

²⁰ Isaki apaka auikari Teoso sãkire, kotxi itakari erekari imi Xakoo, Isaoo pakinimoni, Teoso nireëkiti iaõka ikaminina tïkane. ²¹ Xakoo apaka auikari Teoso sãkire. Ikorïini apisa itakari erekari Xosee anaakorimoni. Iuasaaki isãpiretari Teoso iua ereka inini. Iuasaaki iioïteka itsonarekeë. ²² Xosee apaka auikari Teoso sãkire. Ipinini apisa isãpiretana Isaekini Exito osipikinina ïkapani. Ininiã iua paniãtana ninoa anikiniri iua api Teoso siãkiti itixitimoni.

Moisesi Auikiniri Teoso Sãkire

²³ Moisesi iri, inoro pakini auikari Teoso sãkire. Iponaniãka atoko, ninoa kipatari iua ipi ãti pakini kasiriti. Iuasaaki imarotarina Moisesi kona ãti eenetxi atokoni. Ipinimoni itxa. Ninoa imarotari Paraoo paniãtiniri amarini okiko, iuaritika !ipïkarina Paraoo paniãtakiti.

²⁴ Moisesi auikari Teoso sãkire. Mitapeka inakasaaki, kona inirekari kãkiti akiritiniri iua Paraoo ãkero ãkiri ininiua. ²⁵ Iua mereëri imisiritiko Teoso nakitiakorikata. Ininiã iua sari ninoakata. !Inirekari poxokonitxi maerekati kamakiti, kotxi ikara poxokonitxi mokatanitika xipoka. ²⁶ Iuamoni apiaerekata ninoa xinitiniri iua Kristo sãkire auikini xika. Kona iua nirekari katiiri ininiua Exito auakanikata, kotxi imarotari ãti õti Teoso sikiniri iua iparïka ïki.

²⁷ Exito ipotorikasaaki, iua auikari Teoso sãkire. Iuasaaki Exito auakani auïte omanãkarauata. Iuaritika !ipïkari iua. Imïteenekari ikinipoko, kotxi auikari Matamatakoti sãkire. Atamatakiti sãkire auikini atokotxikana, auikari imatamatakiniti sãkire. ²⁸ Iua auikari Teoso sãkire, ininiã ipaniãtari kãkiti okiniri soti auïte. Eereka ipaniãtari itakiniri iarëka ïronakikoãtaã tinikata. Ininiã Teoso nitiri ipïkitxi mïkari iaxitikiri ninoa nopini inapaãpotakasaaki, kona okari Isaekini merepanika auakani, kotxi atamatari arëkatxi.

²⁹ Kãkiti Isaekini auikari Teoso sãkire, ininiã ïpiriãtarina potxoari uiniti Põkamarariã inakori sonãkakari kimaporiti nopini. Kãkiti Exitokini apaka nirekari inapinina ninoa napini atoko. Txamari iuasaaki ãparaã kanapiriãpe iua kimapori nopini, ininiã ikinika ninoani axãpoãtape.

Teoso Sãkire Auiãkani Kãiatini

³⁰ Isaekini auikari Teoso sãkire, ininiã Xerikoo sitatxiti iakirokana setxi pakini õti. Iuasaaki pirikeri sitatxi ãkitakari irikapoakata, kotxi ninoa kamari Teoso sãkire iaõka.

³¹ Haapi inakoro kanokarero otxaua mitxi. Eereka oãuikari Teoso sãkire, kotxi oãpakapana kãkiti iuaãtaã apokakani, Teoso iokanatakini, ininiã kona okoriã kãkiti Teoso sãkire mauiãkanikata.

³² Kiripa apikomoni nisãpiretai? Auapitika apikomoni itomaneri kãkiti Teoso sãkire auiãkani. Kona apakata uatxa nisãpiretinii hïte Kitxião pirena, Paraki pirena, Sãsão pirena, Xepitee pirena, Tavii pirena, Samoeo pirena, apanakini Teoso sãkire sãpiretakani pirena pakini. ³³ Ninoa kãkiti auikari Teoso sãkire. Ininiã inaiatakasaakina Teoso sãkire mauiãkani, ninoa kãiata. Ninoa kamari atão inakarinoka. Iuasaaki apakaparina Teoso sikaenetakiti. Ninoa okaãka ãkitimoni. Iuaritika kona ãkiti okana. ãkiti nama totaãka iuasaaki. ³⁴ Xaminamoni okapeëkana, iuaritika xamina !arikana. Kona apakata okikona iouata mitaroã. Ninoa mataparani, iuaritika kataparaxinirepeka itxana, kotxi auikarina Teoso sãkire. Neenamtxi auakasaaki, pataparana ninoa, ininiã ãti uãka sotatoakori miteka.

³⁵ Sitoakoro Teoso sãkire auiãkani iuaïkana aua imiakori, kotxi Teoso õkitikana ninoa ipïkasaakina. Apanakini Teoso sãkire auiãkani noropataãka. Imatakanapakaniãrina Teoso

sākire auikinina, okaākana, iuaritika ninoa !inirekarina itakanapinirina, kotxi ninoa imarotari āti ōti Teoso ōkitikana ninoa. Iuasaaki apiaerekata ninoa apakapakiti.

³⁶ Apanakini Teoso sākire auīākani napetaāka. Inoropataākana aāpitsaā. Apanakini Teoso sākire auīākani iaxirikaāka, kateia āki taka inaākana. ³⁷ Apanakini kiporonakaāka kai soroā. Apanakini kākiti sehotxiā kitxirākaāka apanīkaki iītona, auākipanika inakasaakina. Apanakini okapeēka iouata mitaroā. Apanakini māka soti auīte mata, potxi mata pakini. !Kamākana. !Katiina. Maerekati kamakani nitana ninoa okinina īkapani. Imisiritapeēkana. ³⁸ !Apakata īkorapokoriti ninoa īkapani, kotxi ninoa iteene erekari.

Ninoa miteēkata āparaā makipakaniātaā, ōtanoxiratari auiniātaā apaka. Aariko itixiākiriā, kai iriko āki apaka apanakini Teoso sākire auīākani aua, kotxi aapokona !auari.

³⁹ Teosomoni peerekana ninoa, kotxi iteene auikarina iua sākire. Iuaritika ninoa !apakapapanikari Teoso sikaenetakiti iuasaaki. ⁴⁰ Teoso nirekari apiari erekari ate īkapani. Inirekana ninoa atekata aāpakapiniri isikaenetakiti.

12

Teoso Oerekari Atāo Iua Anaakori Aniniua

¹ Ininiā kaiāopokori Teoso sākire auīākani itixine apokakani atamataua ate uatxa. Ininiā matakanapari ikinika ate iomakotetakari. Matakanapari maerekati akamakiti, kotxi ikara patimari iaxirikiniri axinire. Ataparaxinireritika maāuako. Mamīteenekari ikinipoko. Mitekakani mitekini atoko mamitekako Teoso oerekinimoni. ² Ātipirika maātamatari Xesosi. Maāuikari iua sākire, kotxi iuanoka amaerekani makatxakakari. Iua txīkitakaua ate atāo aāuikiniri Teoso sākire. Xesosi xinikari poxokonitxi apokini ōti, ininiā iuasaaki imīteenekari aamina īpiriāmitakari nopini ipinini. !Imaākatari pētatxi ikara atoko ipinini. Ikinipoko iposo atoko iitopāka iri kikomoni, kotxi iparīka ate īkapani iposope. ³ Hīxinikariko Xesosi. Iteene imīteenekari maerekati kamakani manirekakaniri iua. Hīxinikariko iua, ininiā kataparaxinirei hīte. Iuasaaki !hiōkapeta.

⁴ Hīarēka kona xiketapanika maerekati hītakanapini xika. Ininiā hīte kona naiatari maerekati iua Xesosi naiatiniri atoko. ⁵ Atxiīti himaxinīkaretari Teoso sāpiretakiti ate isikataparaxiniretini īkapani. Iua akiritaua iua anaakori aniniua. Ia isākire:

Namarite, Apiananiri auiritai pite atatsiirauatini atāo inakari pimarotini īkapani, ininiā kona pimatinaniuatape iua misiritakasaakii pimaerekani xika.

⁶ Kotxi Apiananiri misiritana itiretakini maerekati ikamakasaakina, imaerekani itakanapinina īkapani. Imisiritana ikinimane iua anaakori atāo inakari imarotina īkapani.

⁷ Ininiā himīteenekariko hīri iaxitikiri misiritinii himaerekani xika. Ikara himisiritiko oerekaī Teoso anaakori hininiua, kotxi inīkatai hīte amarini irītxi nīkatini atokokana. Ikinini irītxi īkorapokoriti auakari misiritari iua anaakori atāo erekari ikaminina īkapani.

⁸ Teoso mamsiritakaniāi hīte maerekati hīkamakasaaki, ininiā iua anaakori atāo inakani !hītxaua. Teoso hīri !itxaua iuasaaki. Ikinimane Teoso sākire auīākani misiritaāka, maerekati ikamakasaakina. ⁹ Akinika ate irītxi aua īkorapokoriti. Ninoa misiritaua maerekati akamakasaaki. Iuaritika ate paxitana ninoa. Apiata apaxitari aīri iaxiti auakari imisiritakasaakiau ate, maerekati akamakasaaki, kotxi axinire iri itxaua.

Ininiā akamakasaakiri aīri iaxiti auakari nireēkiti, aāuapininiika atxako. ¹⁰ Īkorapokoriti auakani irītxi misiritaua maerekati akamakasaaki. Mapakananinani ikara atoko ikamana. Imarotakitina iaōka ikamana. Teoso misiritaua maerekati akamakasaaki ereka anini īkapani iua atoko anini īkapani. ¹¹ Amisiritikosaaki, kona apoxokoniuata, kotxi patsiiri. Iuaritika eereka akamari atāo inakaranoka. Iuasaaki erekaxinireua, kotxi Teoso oerekapekaua atakanapiniri amaerekani imisiritakasaakiau.

¹² Ininiā hōkitikari hīuako sāpakakari. Hīkamataratari hīpotoriki iōkapetakari.

¹³ Hōeretariko kimapori atāo hīsini īkapani. Ikinika himaerekani hītakanapako. Ininiā hīkamakiti atāo inakari aua. Ininiā apanakini hīte atamatakani !irika hīte maerekani

xika. Ininiã maerekati likamana, kotxi hïte oerekepekana erekari imarotinina ïkapani. Ininiã erekepekana ninoa.

¹⁴ Ikinipoko hïkamako apanakinikata himaneenamauatakani ïkapani. Ikinipoko hïkamako erekarinoka hïkamini ïkapani. Kãkiti makamakanisaakiri erekari, kona atamat-apaniri Apiananiri. ¹⁵ Erepaniko, kotxi atxiïti kona hãpakapari ikinipoko erekari Teoso siãkiti. Kona hãuiritapiri kapixi inakari aneini hãkixinireë, kotxi ikara maxikari kaiãori kãkiti. Itxikotari ninoa ãkixinire. ¹⁶ Kona hãuiritapiri anokaretxi kamakani auini hïtekata. Kona hãuiritapiri Teoso manirekakiniti kamakari Isao atoko inakari auini hïte sauaki. Merepitipanika iponaniãkari iua Isao, txamari isikari iri sikaenetakiti itarimoni axapitiki nipokori apakapini ïkapani. ¹⁷ Eereka iuaïkana inirekamari ikara iri sikaenetakiti. Inirekari iri takiniri erekari iuamoni, txamari !apakataika iua apakapiniri. Itxiapata, kotxi mitxi ikamakiti inirekari imamakini, txamari iposope itarimoni iri sikaenetakiti isikini.

¹⁸ Kitxakapirïka kãkiti Isaeokini sari ixirata Sinai inakorimoni Teoso paniãtakiti apakapinina ïkapani. Iuasaaki ixirata arika. Ipiã, ïtima kataparari apaka aua iuasaaki. Ikara atoko inakari ixiratamoni kãkiti maãtakakitimoni !haãpoka. ¹⁹ Ixirata Sinai inakoriãtaã kãkiti kenakotari trõpeta. Ikenakotari iaxitikiri sãkire. Iuasaaki iteene ipïkarena auana, ininiã !inirekaïkarina ikenakotinirina apikomoni ikara sãkiretxi. ²⁰ Kotxi iuasaaki !imïteenekarina ia Teoso paniãtakiti, kotxi iuasaaki Teoso txari: “Kãkiti, pirãtxipeka apaka maãtakiniãri oxiratari, ïkiporonakaãkana kai soroã ipininina ïkapani.” ²¹ Iua xirata auïte kamari kãkiti pïkarauatini. Iuasaaki Moisesi txari: “Nititinanaka. Iteene nipïkarauata,” itxa.

²² Hïte kona apoka oxiratari Sinai inakorimoni. Hïte apokapeka ixirata auïte iaxitikiri Siã inakorimoni. Hãpokapeka Xerosareë sitatxiti iaxitikirimoni, Teoso ãtipirika auãki inakari sitatxineãtaã. Hïte apokapeka Teoso nitiriakori iaxitikini apotiitiniãtaãua. Ninoa iaõtiko !auari, kotxi kaiãopokori. ²³ Hïte apopeka Teoso mereëkini apotiitiniãtaãua. Ipoxokoniuatana. Teoso anaakori itxauana. Iuãkana iõkatsopatapeëkaika Teoso aãtsopateë itixineë. Hïte apopeka Teosomoni. Iuara sãpiretari kãkiti misiritiko. Apaka iua ïkitxitana atão inakari kamakani erekari ikamakiti ïkapani. Hïte apopeka erekari kamakanimoni. Teoso txïkitakana ninoa atão inakari ikaminina. ²⁴ Hïte apoka Xesosimoni. Iuara txïkitakari Teoso kamaenetakiti amaneri apokini. Xesosi arëka xiketakasaaki, hïte apoka Teosomoni. Apeo oxiketari pirãtxi arëka imaerekani makatxakiko ïkapani. Kristo oxiketari iuaka arëka ãtikatika amaerekani imakatxakini ïkapani, ininiã Kristo arëka apiaerekata.

²⁵ Ininiã erepaniko. Hïkenakotariko Teoso sãkire isãkirauatakasaaki. Kitxakapirïka kãkiti manirekakaniãri Teoso sãkire sãpiretakari ïkorapokoriti auakari, imisiritaãkana. Imitekinina !auari. Teoso tixine auakari sãkire amanirekakaniã, apiata amisiritiko. Amitekini !auari, ininiã erepaniko. ²⁶ Teoso misãkiretakasaakiri Moisesi, itixi iakeka. Uatxa Teoso sãpiretari ikamaenetakiti. Itxari: “Iuaïkana niõkokariko itixi. Niõkokariko iaxiti apaka,” itxa. ²⁷ Isãkire “iuaïkana,” kotxi iõkokariko ikinipoko ikamakiti. Ninoa makatxakaãkako. Auapitikako maiõkokaeëtakoni. Ikara kaikotako.

²⁸ Teoso auïtetxi ininiãtaãua, ate sinimoni, !iõkokaãka. Iuaãtaã ixipokini !auari. Ininiã mapoxokoniuata. Masãpiretari iua: “Peerekai pite.” Atão maparïkauata Teoso ïkapani. Makamari iua apokaerekatakiti. Mapaxitari iua. Mapïkari iua manirekakiniti akamini. ²⁹ Kotxi aTeosone xipokari imanirekakiniti, xamina tirinakari xipokiniri atokokana.

13

Iõkatsopari Mapotõkire Pirena

¹ Ininiã hïtiretakakauako. Itaritxi atoko hïtxako, kotxi Teoso anaakori hïtxaua. ² ãtiãtaã ïkani apokiniã, hãpakapanako ninoa haãpoko. Apanakini apakapakasaakina ãtiãtaã ïkani,

apakapana Teoso nitiriakori itixinekini. Iuasaaki !imarotarina ninoa Teoso nitiriakori ininiuana. ³ Hītiretanako Teoso sākire auīākani kateia āki auakani. Kateia āki ninoakata hāuini atokokana, hīxinikanako ninoa. Ininiā hītiretanako misiritakoni. Kākiti misiritiniāi hīte, iuasaaki hinirekari apanakini tiritinii. Iua atokotxikana hītiretanako misiritakoni.

⁴ Hīpaxitaroko āti !tanoro. Hīpaxitariko āto !taniri. Pītanirikatanani pisirīkako. Pītanorokatanani pisirīkako. Teoso misiritanako ikinika kanokarero, kanokareri pakini.

⁵ Txineiro !hītiretape. !Hinirekapiri āti kākiti nakiti. Hīpoxokotariko hīteka tii, hīteka txineirote pakini. Apikomoni !hinirekape, kotxi Teoso txari:

Nimatakanapapekaniikaraiko hīte. Nimasikapekaniikaraiko hīte, itxa. ⁶ Ininiā ia Teoso sākire iōkatsopatakori aūuika:

Apiananiri nimoianari itxaua, ininiā kona nipīkari kākiti kaminiri maerekati notamoni.

⁷ Hīxinikariko hāuīteakori Teoso sākire hītemoni sāpiretakani. Hīxinikariko ninoa auini, ninoa ipinini apaka. Hāuikariko Teoso sākire ninoa auikiniri atokotxikana. ⁸ Xesosi Kristo kitxakapirīka atokotxikana uatxa. Xesosi Kristo uatxa atokotxikana ātipirika.

⁹ Kona hāuikapiri apanakini oerekakiti atāo minakati, kotxi ikini sereti oerekakori atāo minakati auapitika. Hāuiritariko ikinipoko erekari Teoso sikakiti sikataparatiniri hākixinire. Anikakiti !isikataparataro aākixinire, ininiā !hāuikapiri kākiti sāpiretinii apanakini nipokori erekari hīxinire !kapani, apanakini nipokori !erekari hīxinire !kapani.

¹⁰ Sasetotxiakori Teoso aapoko aamata kamakori āki parīkauatakani Teosomoni sikakori takikoātaā !apakaparina erekari Teoso sikakiti ate apakapiniri atokokana.

¹¹ Teoso aapoko aamata kamakori auakasaaki, sasetotxiakori auīte apiatakari anikari pirātxi arēka Teosonani Auini Pakitaātaā. Iuaā isikari pirātxi arēka Teosomoni kākiti maerekani Teoso makatxakini !kapani. Iua pirātxi !to anikaāka aapokotxi mapotōkire. Iuaā arikaāka. ¹² Xesosi pirātxi okakori atoko itxa, kotxi anikaāka sitatxi mapotōkire okiko !kapani. Ininiā iua arēkaā imakatxakari kākiti maerekani, ikamaerekatinina !kapani. ¹³ Ininiā masa iuamoni ipininiātaā. Iua napetiko atokokana maāpakapa.

¹⁴ !korapokoriti kona aua sitatxi maxipoākati. Aiātapari sitatxi iaxiti !kari.

¹⁵ Kipa asika Xesosimoni Teoso !kapani? Ātipirika masikari asākire erekari. Matxari: “Peerekari Teoso.” Ikara asikakiti Teosomoni, kotxi asāpiretari kākiti iua aūūte ininiu. ¹⁶ !Himaxinīkaretapiri erekari hīkamini apanakinimoni. !Himaxinīkaretapiri himoianatakakiniua. Ikara atoko akaminiā, Teosomoni asikakiti inireēkiti atoko itxa, ininiā ikara atoko inakari akaminiā, ikamapoxokonitari Teoso.

¹⁷ Hīkīpitariko hāuīteakori sākire. Hīkamariko ninoa paniātakiti, kotxi ninoa nīkataro hīxinire. Teoso sikari ikara parīkatxi ninoamoni, ininiā āti ōti ninoa sāpiretari Teoso ikamakitina. Ininiā hīkamariko ninoa paniātakiti, ininiā iuasaaki ninoa poxokoniuata iparīkauatakasaaki. Himakamakaniāri ninoa paniātakiti, ninoa matinaniuata, ininiā ikara atoko inakari !erekari hīte !kapani.

¹⁸ Himisākiretariko Teoso ate !kapani. Aimarotari aākixinire ereka inini, kotxi anirekari ikiniōtika atāo inakarinoka akamini. ¹⁹ Iteene namanaāi himisākiretiniri Teoso, iua paītiki iokanatinino iuaīkana hītemoni.

Teoso Misākiretiko

²⁰ Nimisākiretari Teoso, kākiti kamaerekaxiniretakari. Aūūte Xesosi ipīkaripeka inakasaaki, Teoso ōkitikari iua. Soti auīte atoko atxaua. Soti auīte nīkatakari apiari atoko itxa Xesosi, ininiā iua iteene nīkataua. Xesosi ipīkasaaki, iuasaaki kākiti apakapari Teoso sikaenetakiti. Ātipirika Teoso sikari ikara isikaenetakiti kākitimoni. ²¹ Nimisākiretari Teoso isikiniri ikinika erekari hinireēkiti hītemoni, iua nireēkiti hīkamini !kapani. Namanaāri iua Xesosi Kristo uākaā, ikaminua ate iua apokaerekatakiti. Ātipirika kākiti txari Xesosi: “Erekai pite.” Ameē.

²² Nitariakori, iteene hīkenakotariko ikara nisāpiretakiti. Ia niōkatsopatakiti xapitinoka.

²³ Ninirekari himarotiniri aĩtari Tximótxio kateia ãki auakari sikakaãka. Mokatanitika iua apokiniã uai, nota sari iuakata hĩtemoni. ²⁴ Hĩsãpiretari hĩauĩteakori ate xinikamanapitinina ninoa. Hĩsãpiretari ikinimane Teoso nakitiakori axinikamanapitinina. Xesosi sãkire auiãkani uai Itária tixini auakani xinikamanapitai hĩte. ²⁵ Ikinipoko erekari Teoso sikakiti aua hĩtemoni.

Ameẽ.

TXIAKO

Txiako Iokanatsopatakiti

¹ Nota Txiako. Teoso nitiri nitxaua. Apiananiri Xesosi Kristo nitiri nitxaua apaka. Niõkatsopataria aãtsopa hĩtemoni, Xoteoakori tosi nirimanaximoni Xesosi sãkire auĩãkanimoni. Hĩte iarikape ikinika itixiti.

Ereẽkai hĩte.

Auiãkori Ataerekatiko

² Nitariakori, ikini sereti maerekati apokasaaki hĩtemoni, hieneniãkako, kotxi ikara ataerekatai hĩte. ³ Kotxi himarotari hãuiãkiti ataerekatikosaaki, hĩtaparaxinireritika hãua. Himĩteenekari imakinika himisiritiko hĩpoxokoniritika. ⁴ Ininiã imakinika himĩteenekasaaki, hĩxinikakiti, hĩsãkire, hĩkamakiti pakini erekari. Kona apikomoni pinireka ereka pinini ĩkapani.

⁵ Himarore mauakanisaaki, hamanaãri Teoso imarore isikinii ĩkapani. Ininiã isikaiko hĩte hamanaãkiti. Itori Teoso sikakiti ikinimanemoni. !Isãpaka ate ãtipirika aamanainiri iua. !Itxitai. Isikapitiki hamanaãkiti. ⁶ Hamanaãkasaakiri, hãuikariko Teoso sikinii hamanaãkiti. !Erekari hĩxinikiniri: “Atxiĩti iua sikano namanaãkiti. Atxiĩti kona isikano namanaãkiti.” Ikara atoko !hĩxinikape. Ikara atoko xinikakari, tsakati potxoari uinitikiri atoko itxa. Ītima anikari tsakati itano, eereka ixitika. Kãkiti ikara atoko inakari, ãti õti auikari Teoso sãkire, ãti õti kona auikari Teoso sãkire. Itxaãpota. ⁷ Kãkiti ikara atoko inakari kona xatiki apakapari Apiananiri siãkiti, ⁸ kotxi ipi ixinikakiti aua, ininiã apanakini !auikari isãkire ikamakiti tĩkane.

Matiiti, Katiiri Pakini Poxokoniuatini

⁹ Pite aĩtari Teoso sãkire auĩãkari, atxiĩti poiãori pitxaua, iuaritika pipoxokoniuatako, kotxi Teoso txĩkitakai pite apiari pininiua. ¹⁰ Pite katiirii, pipoxokoniuatako, kotxi Teoso kamapoiãotakai pite, kotxi katimari pixipokini aãui katimari xipokini atoko. ¹¹ Atokatxi kanĩkasaaki, kapatakari itxaua. Iuasaaki katsotati txiaroka. Iiui katxaka. !Erekaikaro. Iua atokokana kãkiti katiiri xipokini. Paĩtiki ipinako, ininiã itakanapariko imakinika itii, iparĩka pakini.

Misirikaretxi Mĩteenekakani

¹² Teoso takari erekari kãkitimoni imisiritiko mĩteenekakarimoni, Teoso sãkire matakapanakatimoni. Ikinipoko imĩteenekasaaki, Teoso txĩkitakari iua ãtipirika auini Teosokata. Apiananiri sikaenetari ikara iua turetakanimoni.

¹³ Pinirekasaakiri maerekati pikamini, kona pitxapiri: “Teoso sikanireõtano maerekati nikamini,” kotxi Teoso kamanireõtiko maerekati ikamini ĩkapani !auari. Apaka kona Teoso sikanireõtari kãkiti maerekati ikamini ĩkapani. ¹⁴ Kãkiti sikanireõtãka maerekati ikamini, kotxi iua ĩto nireẽkiti kosekari iua maerekati ikamini. Iuasaaki iteene inirekari inireẽkiti ikamini. ¹⁵ Maerekati piĩto nireẽkiti pikamakasaaki, maerekati itxaua. Ininiã eereka maerekati pikamapika. Eereka iua maerekati txĩkitakari pixinire ipinini.

¹⁶ Nitariakori nota turetakinii, kona hãuiritapiri ãti misirienetini. ¹⁷ Ikinipoko sikakori erekari atão inakari, iaxitikiri itxaua. Aĩri sikakiti ikara. Iuara kamari atokatxi, kasiri, iõriki pakini ponikini. Iua ãtipirika kamari erekarinoka. Kita, uatxa, katana pakini, iua atokotxikana aĩri Teoso. ¹⁸ Aponaniã iuaĩkana aãkixinireẽ, kotxi aãuikari iua sãkire. Iua nirekari aponaniini ikara atoko. Teoso kamari ikinipoko. Ikamakini, merepanika iuaĩkana ponaniãkani, atxaua ate.

Teoso Sãkire Kĩpitiko Pirena

¹⁹ Ininiã nitariakori nota tirketakini, iteene himixinikariko ãti sãkire. Eereka iteene hĩxinikariko hĩkenakotakiti, hĩsãkirauatini apisapanika. Katima !hĩtxape hinaiatiniua. Hinaiatiniua apisa hĩxinikariko hĩkamakiti tĩkane, ²⁰ kotxi kãkiti omanãkarauatakasaaki, !ikamari atão inakari Teoso paniãtakiti iaõka. ²¹ Ininiã hõkariko ikinika maerekati hãkixinire txikotakari. Hĩtakanapariko ikinipoko maerekati. Hãuikariko Teoso sãkire hãkixinireẽ takakori. Himarotariko iuanoka makatxakiniri himaerekani.

²² Teoso sãkire akenakotakanani atxa, !hĩtxape. Hĩkamari isãkire iaõka apaka. Teoso sãkire kenakotakani makamakaniãri ipaniãtakiti, ninoaka misirienetaua. ²³ Teoso sãkire kenakotakari makamakaniãri isãkire iaõka, kiki ãtakaãriã atamatoõtakari atoko itxa. ²⁴ Iua itoõ atamataka atoko, isa. Iuasaakipeka imaxinĩkaretoõtapekua. Isanõka !ixinikaika. ²⁵ Ikinika Teoso paniãtakiti erekari. Maerekati kamakani iaxirikakoni atoko. !Iposotarina erekari ikaminina. Ininiã kãkiti kamakasaakiri Teoso paniãtakiti, Teoso paniãtakiti sikakari kãkiti erekari ikamini !kapani. Kãkiti iteene imarotiniãri Teoso paniãtakiti, imamaxinĩkaretakaniãri, ãtipirika ikaminiãri, ininiã Teoso takari erekari iuamoni, ikamakitimoni.

²⁶ Kãkiti sãpiretiniãri: “Nota auikari Teoso sãkire. Nikamari iua sãkire iaõka,” txamari kãkiti nini iauĩte atoko itxa. !Iposotari iotokakiniri maerekati isãpiretini. Iuaka misirienetaua. Iua auĩãkiti na atão. Ikamakiti na atão apaka. ²⁷ Kãkiti auĩãkiti atão inakari auakasaaki, ikamakiti atão inakari auakasaaki, ãri Teoso apokaerekatari. Iua kãkiti kamari ia atoko: Itiretana imenõkariakori, tikinitakoni pakini, kotxi mauareni ninoa. !Auiritari !korapokoriti maerekati txikotiniri iua ãkixinire.

2

Hĩpaxitana Ikini Kãkiti

¹ Nitariakori, Xesosi Kristo aãuĩte Apiananiri itxaua. Iua sãkire atão auĩãkani hininiãua, ininiã hĩpaxitariko ikinimane kãkiti. !Apakata hĩpotxitakininani hĩtiretini. ² Maxinikariko. Atxiĩti hãpotiitakasaakiua, kiki apoka eremãkari. Iuakokiã aneo oro kamakoro aua. Apaka iuasaaki apoka ãti kiki matiiti. Kitxakari imãka. ³ !Apakata hĩpaxitiniri eremãkarinoka. Hĩsãpiretiniãri: “Uai iitopanatxi ereri nopini piitopãka,” pitxari. Txamari hĩsãpiretari matiiti: “Ikiraã pitima.” Atxiĩti hĩsãpiretari iua: “Uai ixiti nikiti takote piitopãka,” pitxari. Ikara atoko hĩkaminiã, !apakata. ⁴ Ikara atoko hĩkamakasaaki, hĩxinikari katiiri apiaerekatini, matiiti poião ereka inini. Iuasaaki hĩxiniãkiti na atão itxaua. Hãkixinire maerekati itxaua.

⁵ Nitariakori nota tirketakini, hĩkenakotariko nisãkire. Teoso mereẽpekari matiini !korapokoriti auakani isãkire iteene auikinina !kapani. Ininiã ninoa Teoso tirketakani sariko Teoso auĩtetxi ininiãtaãua. Ikara isikaenetapeka iua tirketakanimoni. ⁶ Txamari hĩte kona paxitana matiini. !Apakata. Katiirinira misirienetai hĩte. Ninoa anikai hĩte kãkiti misiritiko mereẽkanimoni. ⁷ Ninoa katiirini misãkirepiretari Teoso. Peerekari iua uãka, iuaritika ninoa kona paxitari iuãka. Ninoa misãkirepiretakiti nakitiakori hĩtxaua hĩte.

⁸ Kitxakapirĩka Teoso sãkire iõkatsopatakori txari:

Piteka pitiretiniua atokokanera, pitiretanako pite takote auakani.

Ikara ikinimane auĩte paniãtakiti hĩkaminiã, hĩkamari atão inakari. ⁹ Hĩtiretiniãri hĩpotxitakininani, maerekati hĩkama. Ikara Teoso paniãtakiti oerekai maerekati kamakani hininiãua. ¹⁰ Ikinika Teoso paniãtakiti hĩkaminiã, txamari ãtinoka Teoso paniãtakiti himakamakaniã, ininiã ikinika ipaniãtakiti makamakani atoko hĩtxaua. ¹¹ Teoso txari:

Kona pisirĩkape pĩtanoro minakotokatika.

Apaka itxari:

Kona pokaniuatape.

Atxiïti kona pisirîka pîtanoro minakotokatika, txamari pokaniuata, ininiâkara !pikamari ikinika Teoso paniâtakiti. Âtika Teoso paniâtakiti pimakamakaniâ, !apakata. Ikara atoko ininiâ, Teosomoni maerekati kamakari pitxaua.

¹² Teoso sâkire iaôka akaminiâ, aposotari erekari akamini. Ôpoïkakoni atoko atxaua. Maerekati !imaïkaikaua. Ininiâkara atâo hîsâkirauatako. Atâo inakari hîkamako, kotxi Teoso kamariko hîtemoni isâkire iaôka. ¹³ Himaamonîkakaniâri âti, Teoso kona amonîkai hîte. Imereêri himisiritiko. Apiaerekata hiamonîkiniri âti, maerekati ikamakasaaki. Poiâo erekari himisiritiniri iua imaerekani xika.

Kâkiti Sâkire, Kâkiti Kamakiti Pakini Pirena

¹⁴ Nitariakori, kâkiti txari: “Nota Teoso sâkire auiâkari nitxaua,” itxamari, !ikamari Teoso nirekaâkiti. Atauako iua auikari Teoso sâkire? Atauako, iua sâkire posotari imaktxakiniri imaerekani Teosomoni isini îkapani? Konapitini. ¹⁵ Atxiïti hîtari, atxiïti hîtaro Teoso sâkire auiâkani imâkana !auari. Atxiïti nipokori !auari ninoamoni. ¹⁶ Iuasaaki atxiïti hîtxana: “Hîsipiniikaua, erekaxinire hinini. Kamâkaiko. Itene hinikako,” hîtxana atxiïti. Txamari iuasaaki mâkatxi !hîsikana, nipokori !hîsikana. Ikara atoko hîkaminiâ, !apakata hîkamakiti. Hîsâkirenanira hîsikiniâ, ininiâ maxikatîika hîsâpiretakiti. ¹⁷ Atxiïti ikara atoko atxa. Asâpiretari aâuikiniri Xesosi sâkire. Txamari kona akamari ipaniâtakiti. Ikara atoko aniniâ, asâkire kona itxa. Aâuiâkiti sâkiretxiti ipinakari atoko itxa. !Kakamareri iua.

¹⁸ Kâkiti atxiïti txari: “Pite auikari Teoso sâkire. Nota parîkauata Teoso îkapani.” Piposotari atxiïti poerekinino pauîâkiti, Teoso paniâtakiti pimakamakanisaaki? Kona piposota, kotxi atâo pauîâkiti !auari. Notapekana, nota posotari noerekiniri nisâkire nauîâkiti nikamakitiâ Teoso paniâtakiti nikamakasaaki. Ikara atoko nininiâ, kâkiti imarotapitikari atâo nauikiniri Xesosi sâkire. ¹⁹ Pite auikari âtinani Teoso auini. Ininiâ erekapitikari pauikakiti. Txamari ikara !imaktxakari pimaerekani Teosomoni pisini îkapani, kotxi Satanasi nitiriakori apaka auikari âtinani Teoso auini. Iua xika ninoa titinanaka ipîkarauatiniâna. Ninoa imarotari âti ôti ixipokinina.

²⁰ !Kiîkitei pite. Pinirekatari noerekinii !apakata pisâkireê pauikiniri Xesosi sâkire, iua paniâtakiti iaôka pimakamakanisaaki. Iuasaaki pisâkire na atâo. Ipîkari atoko itxa. ²¹ Maxinikariko ate apika atokirini, Apraão. Kitxakapirîka isikasaakiri amarite Isaki inakori Teosomoni sikakori takikoâtaâ, iuasaaki Teoso apokaerekatari ikamakiti, kotxi ikamakiti oerekari Teoso, iua auikiniri isâkire, ininiâ Teoso kamaerekatari iua. ²² Ininiâ himarotari atâo iua auikiniri Teoso sâkire. Ikamakiti oerekari isâkire atâo inini. Hîxinikari iua. Atâo ikamari Teoso paniâtakiti, ininiâ atâo iua auikari Teoso sâkire. ²³ Ininiâ Teoso sâkire iôkatsopatakori apokapeka. Itxari:

Apraão auikari Teoso sâkire, ininiâ Teoso txîkitakari iua atâo inakari ikamini, Teoso apakapiniri îkapani.

Ininiâ iua akiritaâka Teoso moianari. ²⁴ Ininiâkara ia himarota. Teoso kamaerekatari kâkiti âkixinire isâkire iaôka ikamakasaaki. Kona Teoso kamaerekatari kâkiti âkixinire, isâkirenoka auakasaaki. Inirekari atamatiniri kâkiti parîka apaka.

²⁵ Âto atâo Teoso sâkire auiâkaro nisâpiretai hîte. Kitxakapirîka kanokarero Haapi inakoro aua. Teoso kamaerekatari oa âkixinire, kotxi oa apakapana Xosoe iokanatakini otixine apokasaakina. Oaâpoko okipatana ninoa. Iuasaaki oa oerekana âti kimaporiti imitekinina îkapani.

²⁶ Kâkiti îtoâ ixinire mauakanisaaki, iua ipîpe. Iua !kakamareri. Ininiâ iua atokokana iua sâkire iua auiâkiti ipinakari atoko, erekari imakamakanisaaki. Iua auiâkitinani, isâkirenani, !imaktxakari imaerekani.

3

¹ Nitariakori, !apakata itori hĩte Teoso sãkire oerekakani hininiua, kotxi ate Teoso sãkire oerekakani maerekati akamakasaaki, apiata Teoso misiritaua ate. ² Amakinika ate kerokapanikari. Kãkiti makerokakaniãri isãkire, ininiã erekari iua. !Auiritari iĩto kaminiri maerekati.

³ Anirekasaakiri kavaro kĩpitiniri anireẽkiti, atakari inamaã metaoke ĩpiriãketakari. Ininiã iuasaaki ikamariko anireẽkiti. Ia metaoke axapitikeri, iuaritika aposotari akakiriokiniri kavaro, ininiã isari anirekinimoni.

⁴ Apaka hĩxinikaroko maporo. Maporo mitaro. Ītima kataparari anikaro. Maporo oerekakire axapitiki, iuaritika kãkiti kakiriokaro maporo oerekakireẽ, ininiã maporo sari kãkiti nirekinimoni.

⁵ Iua atokokana, aĩtoã auakari anini apaka axapitiki, iuaritika iposotari iteene maerekati ikamini. Hĩxinikariko. Xaminamĩniki axapitiki, iuaritika iposotari iotikiniri itori kikio. ⁶ Iua atokokana ninitxi. Xamina tirinakari atoko itxa, ininiã kona erekari. Maerekati ninitxi sãpiretakiti. Iarika kãkiti xinireẽ ikinika, xamina ĩtopa iarikini atoko. Ininiã iua maerekatinoka itxa, ininiã ikinipoko ikamakiti maerekatinoka. Maerekani misiritikoãtaã ĩkari itxa asãkire maerekati. Xamina tirinakari iuaãtaãkiri atoko itxa asãkire maerekati.

⁷ Kãkiti piratari ikini sereti kaxipiri ĩtopakiri, kotipiriki, imini, iaã auakari pakini. Itori kãkiti piratapeka. ⁸ Txamari ninitxi paneenamari. Kãkiti !iposotari imĩkapiritiniri inini. Kona ikamari anireẽkiti. Imini katsiiri atoko itxa. Imini tsii posotari okiniri kãkiti. Iua atokokana, kãkiti sãpiretakiti posotari okiniri kãkiti.

⁹ Anini posotari isãpiretiniri erekari aĩri aãũtemoni. Apaka iposotari maerekati isãpiretini kãkitimoni. Īkora atoko !erekari, kotxi Teoso kamari kãkiti iuaka atoko inakari ĩkapani. ¹⁰ Anamaã potorika erekari, maerekati pakini. Nitariakori, ia koketakori na atão. !Apakata. ¹¹ Amomo !oposotari ãparaã ponikoãri, posiãri pakini otxĩkitakini. ¹² Nitariakori, atauako mãka mina iritari iõpeta? Atauako iõpeta mina iritari mãka? Konapitini. Apaka amomo ãparaã ponikoãri !auari ãparaã maxiãri pakini. Iua atokokana kãkiti sãkire. !Apakata kãkiti ãti õti isãkire ereka inini, ãti õti isãkire maerekati inini.

Imaroretxi Pirena

¹³ Kiripa kimaroreri hĩte sauaki auakari? Kãkiti atão kimaroreri inakari, oerekari imarore ikamakiti erekari ikamakasaaki. Erekari ikamakasaaki, !iuikaua, kotxi atão imaroretxi auiniã kãkitimoni, !auiritari iua iuikiniua. ¹⁴ Txamari pinĩkatiniãri xikoretxi papixiri pãkixinireẽ, piteka nireẽkitinani pinirekiniã pãkixinireẽ, kona pitxape: “Kimaroreno nota.” Iuasaaki kona pikipatapiri atão inakari. ¹⁵ Īkora pimarore ! iaxitikirini. Īkorapokoritikirinokara ikara pimarore. Ikara pimarore piĩto nireẽkitikara. Imaroretxi ikara atoko inakari Satanasi oerekakiti. ¹⁶ Xikoretxi auakasaaki, piteka nireẽkitinani pinirekini auakasaaki, ikara atoko inakasaaki, neenamatzinoka aua, ikini sereti maerekati aua apaka.

¹⁷ Imaroretxi iaxiti ĩkari kona ikara atokoni itxa. Iua imaroretxi imarotakari, erekari-noka ikama. !Inirekari neenamatzxi. Merepitipanika ixinikari apanakini kãkiti nireẽkiti. Apiananiri nireẽkiti ikama. Iamonĩkari ãti. Erekarinoka ikama ãtimoni. Apiarimoni isãkire atokotxikana isãkire poiãorimoni. Ikamakiti isãkire iaõka itxa. ¹⁸ Kauaĩreri õtãkikari apanakini imaneenamauatakani, ininiãkara itori kãkiti kamari atão inakaranoka.

4

Īkorapokoriti Auakani Nireẽkiti !Hinirekape

¹ Neenamatzxi auakasaaki hĩtemoni, hĩtxitakakasaakiua, nãpa ikara atoko inakari potorika? Hãkixinireẽ ipotorika neenamatzxi. Hinireẽkiti maerekati xika hineenamauata. ² Hinireẽkiti kona hãpakapa, ininiã hõkari ãti. Iteene hinirekari ãti nakiti, txamari !hãpakapari hinireẽkiti. Hĩtxitakakaua. Hineenamauata. Txamari kona hãpakapari

hinireēkiti. Kona hamanaāri Teoso hinireēkiti hāpakapini ĩkapani. Ikara xika kona hāpakapari hinireēkiti. ³Atxiīti Teoso hamanaākasaaki, kona hāpakapari hinirekakiti, kotxi hamanaākasaaki, maerekati hīxinikapanika. Hinirekari hāpakapiniri hamanaākiti hītenani ĩkapani, hītenoka poxokoniuatini ĩkapani. Ikara xika Teoso !isikai hinireēkiti.

⁴Kanokarero, kanokareri pakini atoko hītxaua. Hīte takanapari Teoso, ĩkorapokoriti auakaninoka hītiretini ĩkapani. Hītiretiniāri ĩkorapokoritinoka, iusaaki homanatarī Teoso. Hinirekiniāri ĩkorapokoriti auakani nireēkiti, ininiā Teoso mokaiakari hītxaua. ⁵Kona maxikatiīka Teoso sākire iōkatsopatakori sāpiretaua ia atoko inakari:

Erekari Matamatakoti aākixinireē auakari nirekari ĩtene anirekiniri Teoso tiretiniua. Iua !inirekari anirekiniri ĩkorapokoriti auakaninoka tiretiniua.

⁶Teoso sikari ĩtene erekari atemoni, kotxi Teoso sākire iōkatsopatakori txari:

Teoso !apokaerekatari kākiti iuikakaniua. !Imoianatana ninoa. Kākiti miuikakaniua, ĩkinipoko erekari isika ninoamoni.

⁷Ininiā hāuiritariko Teoso hāuīte ininiua. Iua nireēkitinoka hīkamako. Kona hīkamapiri Satanasi nireēkiti. Kona hīkīpitapiri iua sākire, ininiā eereka iua miteka.

⁸Teosomoni hāpokako, ininiā iua apoka hītemoni. Maerekati kamakani hininiāua, hītakanapariko himaerekani. Kona hāuiritapiri hīuako kaminiri maerekati. Hītepekana, hīte sākire ipinimoni itxa. Hākixinire xinikakiti ipinimoni itxa. Ininiākara hīokanatariko maerekati hākixinire auakari, erekarinoka kaitotini ĩkapani. ⁹Himatinaniuatako, hītxiapatako ĩtene, maerekati hīkamakiti xika. Hītakanapariko hīsiroatini hītxiapatini ĩkapani. Hītakanapariko hīpoxokoniuatini himatinaniuatini ĩkapani. Ikara atoko hīkamako, maerekati hīkamakiti xika. ¹⁰Apiananirimoni hītxariko: “Nīmaerekani xika !erekano nota. Minakati nitxaua. !Niposotari erekari nikamini. Piamonīkano,” hītxariko Teoso. Eereka iua sikataparaxiniretai hīte.

!Himisākirepiretapiri Hītari

¹¹Nitariakori, !himisākirepiretakapeua. Āti misākirepiretiniāri āti, kona ipaxitari Teoso paniātakiti. Āti akiritiniāri āti: “Maerekati kamakariī,” akiritari Teoso paniātakiti: “maerekati.” Ikara atoko inakasaaki, iuamoni iuaka sākire apiata, ininiā iua !ikamari Teoso paniātakiti iaōka. ¹²Teosonokara atāo inakari imarotakari aua. Iuanoka posotari isāpiretiniri kākiti: “Pite kamakiti kona erekari. Pitepekana kamakiti erekari.” Iuanoka posotari ikara atoko ininii, kotxi iuanoka posotari kākiti maerekani imakatzakini. Iuanoka posotari iokanatiniri kākiti imisiritikomoni. !Apakata ikara atoko hīte ininiri apanakini.

Katana Kamaenetakori

¹³Atxiīti hīte txari: “Atxiīti uatxa, atxiīti katana asa sitatximoni. Anapariko ātikanani iuaātaā. Aparīkauata itomane txineiro aāpakapini ĩkapani,” hītxama. ¹⁴Txamari kona himarotari katana auakari tīkane. Kanatokopa itxa kākiti? Ianiī atoko itxa kākiti. Ianiī apoka, eereka patimari ixipokini. Ikara atoko kākiti auini. ¹⁵Apiaerekata hīsākire ia atoko hinini: “Teoso nirekiniāri, nauapanika ninakasaaki, nikamariko ikara parīkatxi,” hītxako. ¹⁶Ikara atoko himasākirauatakaniā, hīuikaua, kotxi hīuikari hīkamakiti tīkane. Maerekati ikara atoko inakari. ¹⁷Ininiā erepaniko. Kākiti erekari imarotakani makamakaniāri ikara erekari imarotakiti, ikamari maerekati.

5

Katiiri Pirena

¹Hīkenakotariko nisākire. Ikinika katiirini kapotxinanirini hīkenakotariko nisākire. Hītxiapatako. Hākiripoatako, kotxi itori hātatsiire apokako hītemoni. ²Hītii pa-iakepeka. Kapite nikapekari himāka. ³Hinakiti oro kamakori, pirata kamakori pakini oereēkatapeka. Ikara oerekari hīkamakiti !apakata. Hītii xipokini atoko, hīte apaka xipokako. Apiata himisiritiko. Maxikatīka hāpotiitari hītii, kotxi itixi xipokini ōti

apokanapanoka. ⁴ Himarotariko ia. Kākiti hīte kikioteē parīkauatakasaaki, himisiriene-tana ninoa. Na atāo hīikitxitana iparīkana īki. Ininiā ninoa akiritari Teoso. Iuasaaki Apiananiri kaposotiireri kenakotari ninoa sākire. ⁵ Īkorapokoriti hāuakasaaki, ikinipoko aua hītemoni. Hiamotari ikinika hīito potxitakiti. Kākiti sikari kema auīte ito kienatxi, okiko ōti manapi paīperi inini īkapani. ⁶ Hīte iokanatapekari kākiti erekarini ipininimoni. Hōkapekana ninoa maxikatiīka. Ninoani kona naiatai hīte, iuaritika hōkana ninoani.

Apiananiri Kanapiriini Hiātapini

⁷ Nitariakori, atxiīti hītemoni !katimari Apiananiri kanapiriini, iuaritika hiātapariko hīpoxokoniritika, kotxi himarotapitikari āti ōti iua kanapiriini. Hīxinikariko katakareri. Iua iātapapikari itakare aneini, ikiena iposope inikini īkapani. Iātapari āparaā kipini itakare aneini īkapani. Iua imarotapitikari ikiena aneini, ininiā iātapari. ⁸ Iua atokokana hiātapariko Apiananiri kanapiriini. Hītaparaxinireritika hiātapari, kotxi Xesosi kaiaapeka ikanapiriini. ⁹ Nitariakori, kona hītxitakapeua. Hītxitakaniāua, hāpakapariko himisiritiko. Kākiti misiritiko mereēkari kaiaapeka apokini hītemoni.

¹⁰ Nitariakori, hīxinikariko Teoso sākire sāpiretakani, kitxakapirīka auakani, sāpiretari Teoso sākire Teoso posotiireē. Ninoa misiritaāka, iuaritika ninoa mīteenekari imakinika. Ninoa oerekaua amīteenekiniri imakinika. ¹¹ Ari, aimarotari Teoso takari erekari misirikaretxi mīteeneēkanimoni. Hīxinikari Xo inakori. Iua iteene atatsiirauata, iuaritika, !itapanari Teoso. Atatsiirauataka atoko, Apiananiri sikari ikini sereti erekari iuamoni, kotxi katiraōkiri, kaamonīkareri itxaua iua.

¹² Nitariakori, “Ari,” hinakasaaki, “Kona,” hinakasaaki, kona maxikatiīka hīsākirauatape. Hīkamariko hīsāpiretakiti iaōka. Hīkamaenetakiti hīsāpiretakasaaki, kona hākiritapiri Teoso tixine auakani uāka, kona hākiritapiri itixi auakani uāka, hīsāpiretakiti apanakini atāo imarotini īkapani. Na atāo hīsākire ininiā, Teoso misiritapitikai.

Teoso Misākiretiko Kākiti Īkapani

¹³ Hātatsiirauatakasaaki, himisākiretariko Teoso. Hīpoxokiniuatakasaaki, hīxikarauata Teoso īkapani. ¹⁴ Āti amianatakasaaki, hīpīkapiretanako kōtākikarerini Xesosi sākire auīākani Teoso imisākiretinina amianatakari īkapani. Iuasaaki itakarina iītxi iua amianatakari nopini Apiananiri uākaā. ¹⁵ Hāuikiniāri Teoso posotiire himisākiretakasaakiri Teoso, iua makananitapitikari iua amianatakari. Ininiā Apiananiri ōkitikariko iua. Maerekati ikaminiā, Teoso makatzakari imaerekani apaka. ¹⁶ Ininiā hīkerokakiti hīsāpiretakakauako. Himisākiretariko Teoso āti īkapani. Ininiā apanakini misākiretariko Teoso hīte īkapani. Iua atokokana, Teoso txīkitakari hākixinire ereka inini. Atāo inakarinoka kamakari sākire kataparari, Teosokata isākirauatakasaaki, kotxi Teoso kamapitikari iua amanaākiti iaōka.

¹⁷ Kitxakapirīka Erīasi inakori, ate atoko inakari iua. Iua misākiretari Teoso itaparar-itika āparaā makipakani īkapani. Ikara atoko inakasaaki, āparaā !kipa ipi āti pakini anokanani, seisi kasiriti. ¹⁸ Iuaīkana imisākiretari Teoso āparaā iuaīkana ikipini īkapani. Ininiā āparaā kipa. Iuaīkana itixi iriuata.

¹⁹ Nitariakori, āti takanapiniāri atāo inakari Teoso sākire, hōtākikariko iua Teosomoni ikanapiriini īkapani. ²⁰ Maerekati kamakari takanapiniāri imaerekani, iua pōtākikasaaki, ininiā pite makatzakapekari iua ipinini. Teoso makatzakari ikinipoko maerekati ikamakiti.

1 PETRO

Merepanika Petro Iokanatsopatakiti

¹ Petro nitxaua nota. Xesosi Kristo iokanatakiti nitxaua. Niokanatsopata hīte Xesosi sākire auīākanimoni. Hīte iarikape Pōto tixiniā, Karásia tixiniā, Kapatósia tixiniā, Ásia tixiniā, Pítxínia tixiniā pakini. Hītakanapari hīteka tixine Xesosi sākire hāuikini xika. Āti uākakata hāuanāta.

² Aīri Teoso mereēi hīte iua nakitiakori hininiua īkapani. Itixi kamiko apisa, iua imarotapekari hīte iua anaakori hininiua. Erekarī Matamatakoti parīkauata hākixinireē Teoso nireēkitinoka hīkamini īkapani. Ininiā uatxa hīposotiire aua Xesosi Kristo paniātakiti hīkamini īkapani, kotxi Xesosi Kristo arēka xikepoata hīte īkapani. Teoso sikari ikinipoko erekari hītemoni. Itori isikai. Iteene ikamaerekaxiniretai.

Kākiti Maerekani Makatxakiko

³ Mamisākiretari Teoso: “Peerekai pite. Aāuīte Xesosi Kristo Teosone pitxaua. Iua iri pitxaua,” matxari. Maerekati kamakaniua, iuaritika iteene iamoniākaua. Itxīkitakari axinire iuaīkana iponaniini, kotxi Xesosi Kristo ipina, iuaritika iuaīkana ōkitikaua. Ininiā ikiniōtika aimarotari Teoso kaminiri ikinipoko ikamaenetakiti. ⁴ Iuaīkana axinire iponaniā, ininiā iua anaakori atxaua. Ininiā aīri potetakiti erekari aua itixineē aāpakapini īkapani. Ikara ipotetakiti lixipoka. !Oerēkata. Auapika. Teoso nīkatari ikara hīte īkapani.

⁵ Hīte auikari Teoso sākire, ininiā iposotiire tokapakeētai hīte. Hīte itokapakeētinititika Xesosi kanapiriāko xipokatxi ōtisaaki. ⁶ Ikara himarota, ininiā iteene hīpoxokoniuata. Uatxa atxiīti !erekaxinirei hīte, kotxi ikini sereti maerekati apoka hītemoni. ⁷ Ikini sereti himaxikiko apoka hītemoni, kotxi iusaaki Teoso imarotari atāo hāuikiniri iua sākire, himīteenekiniāri himaxikiko. Iusaaki Teoso ataerekatai hīte, oro ataerekatiko atokokana. Kākiti axitaro oro otxiko makatxakiko īkapani, oronoka kaikotini īkapani. Iusaaki peerekaro. Pakaronero. Iuaritika āti ōti oxipokaākako. Erekaro oro, iuaritika apiaerekata hāuikiniri Teoso sākire, kotxi isākire hāuikini !ixipoka. Xesosi Kristo kanapiriākasaaki īkorapokoriti, Teoso sāpiretaiko hīte: “Erekarī hāuikiniri nisākire, kotxi himīteenekari ikinipoko. Peerekai hīte,” itxaiko hīte. Iusaaki hīto iotximere auape Xesosi iotximere atokokana.

⁸ Hīte kona aōkitapanikari Teoso, iuaritika hītiretari iua. Kona hātamatapanikari, iuaritika hāuikari iua sākire. Ininiā hīte iteene poxokoniuata. Kākiti sākireē !apakata hīsāpiretiniri hīpoxokoni. ⁹ Hīpoxokoniuata, kotxi himaerekani makatxakaākapeka. Ininiā hīxinire ! ipinaika, kotxi hāuikari Xesosi sākire.

¹⁰ Kitxakapirīka Teoso sākire sāpiretakani nirekamari imarotininirina kākiti maerekani makatxakiko. Initarina ikara imarotininina Teoso sākire iōkatsopatakoriā. Iteene apaiaōkarauatana ikara imarotininina īkapani. Ninoa sāpiretari ikara erekari, Teoso āti ōti sikiniri kākiti. ¹¹ Inirekarina imarotininirina ikara erekari apokini ōti. “Kisaakipa apoka atxiīti? Natokopa itxa apokini?” itxanātana. Iusaaki Erekarī Matamatakoti oerekana ninoa ākixinireēna Kristo atatsiirauatini tīkane. Oerekana ninoa Kristo atatsiirauatini xipoka atoko, ikinimane auīte itxauako. Peerekari iusaaki. ¹² Kitxakapirīka Teoso sāpiretari ikamakiti tīkane isākire sāpiretakanimoni, kona ninoanoka imarotini īkapanini. Ninoa sāpiretari Teoso kamakiti tīkane hīte īkapani, kotxi uatxa apokapeka ninoa sākire iaōka. Kitxakapirīka Teoso sāpiretari ikamakiti tīkane ninoamoni, ate uatxa imarotini īkapani. Teoso iokanapirena erekari sāpiretakani sāpiretapekai uatxa ikara Teoso sāpiretakiti kitxakapirīka. Teoso paniātari Erekarī Matamatakoti potorikini itixine uai apokini īkapani. Erekarī Matamatakoti posotiireē ninoa sāpiretari Teoso iokanapirena erekari. Teoso nitiriakori iaxitikini iteene nirekamari imarotininirina hīte imarotakiti.

Ereka Hītixako

¹³ Ininiã iposope hĩtxako hĩxinikiniri atão inakari hĩkamini. !Hĩkamapiri maerekati hĩto nireẽkiti. Iteene hãuikariko hãpakapiniri ikinipoko erekari Teoso sikakiti Xesosi Kristo kanapiriãkasaaki. ¹⁴ Amarini kaminiri iri paniãtakiti atokotxikana, hĩkamariko Teoso paniãtakiti. Xesosi sãkire himimarotakanisaaki, hĩkamari maerekati hinireẽkiti. Uatxa !hĩkamapinikariko. ¹⁵ Hĩte akiritakari kamari erekarinoka, ininiã iua atokokana erekarinoka hĩkama ikiniõtika. ¹⁶ Teoso sãkire iõkatsopatakori txari: Erekarinoka hĩkamako, kotxi nota kamari erekarinoka, itxa Teoso kitxakapirĩka.

¹⁷ Himisãkiretari hĩri iaxiti auakari. Atãonoka ikaminana ikinimane kãkiti iparĩkana atamatakasaaki. Ininiã kãkiti kamakasaakiri maerekati, aĩri misiritiniri ãti atokotxikana, imisiritari ãti. Himitekini !auari. Hĩxinikariko, haãpoko atão inakari ãkorapokoriti !auari. Teoso tixineẽ aua haãpoko. Ininiã ãkorapokoriti hãuakasaaki, iteene hĩpaxitariko Teoso. Hĩpĩkariko iua manirekakiniti hĩkamini. ¹⁸ Mitxi !apakata hãuini, kotxi iuasaaki hĩkamari hãtokiriakorini sãkire iaõka. Uatxa Xesosi oerekai ãtião hãuini, kotxi iamotai hĩte, iua nakitiakori hininiua ãkapani. Himarotari iamotinii. !Iamotai pirataã. !Iamotai oroã. !Iamotai txineiroã, kotxi pirata, oro, txineiro pakini xipokako. ¹⁹ Kristo arẽkaã iamotai hĩte, kotxi ipĩkasaaki iamotai hĩte. Peerekari iua arẽka, kotxi iua arẽka makatzakari amaerekani. Soti auĩte erekari atoko itxa Kristo. Kona maerekati aua iuamoni. ²⁰ Itixi kamiko apisa, Teoso mereẽri iua. Iua apoka uai himaerekani imakatzakini ãkapani. ²¹ Xesosi txĩkitakai hĩte auikiniri Teoso auini, kotxi Teoso iuaĩkana õkitikari Xesosi ipĩkani sauaki. Iuasaaki isãpiretari Xesosi ikinika ikamakiti ereka inini. Ikara atoko ininiã, hãuikari Teoso sãkire. Himarotari isãkire iaõka ikamini. ²² Erekari Matamatakoti oerekapekai atão inakari, ininiã uatxa hĩkamari atão inakari. Ikara atoko ininiã, hãkixinire erekari. Ininiãkara atão hĩtaretari hĩtariakori. Ininiã iteene hĩtaretakakauako hãkixinireẽ.

²³ Hĩte xinire iuaĩkana iponaniãpeka. Teoso sãkireẽ hĩxinire iponaniã iuaĩkana. Teoso sãkire auapika. !ixipoka. Ininiã iua anaakori hĩtxaua. Hĩri ãkorapokoriti auakani xipoka. Hĩri iaxiti auakari !ixipoka, ininiã hĩte iua anaakori !ixipoka apaka. ²⁴ Teoso sãkire iõkatsopatakori txari:

Kãkiti katsotati atoko itxa. Katsotati paĩtiki ipinini. Iua atokokana patimari kãkiti ipina. Ikinika erekari ikamakiti, aãui atoko itxa. Aãui patimari ipinini. Iua atokokana patimari kãkiti kamakiti xipokini.

²⁵ Iuaritika Teoso sãkire auapika. !Kaxiporeri, itxa Teoso sãkire iõkatsopatakori. Teoso sãkirepitikara sãpiretaãkapeka hĩtemoni, hĩkenakotakasaakiri Teoso iokanapirena erekari.

2

¹ Ininiãkara hĩtakanapariko ikinipoko maerekati hĩkamakiti. !Himisirienetapiri ãti. Hĩkamariko hĩsãkire iaõka. !Hĩxikotapiri ãti. !Himisãkirepiretapiri ãti. Ikini sereti maerekati kãkiti kamakiti hĩtakanapako.

² Hinirekariko Teoso sãkire makoketakoti. Tinitxiã imi axapitiri nirekini atokokana, hinirekariko Teoso sãkire. Teoso sãkire hãpakapakasaaki, himaroãpotari iua, ininiã apiaãpota hãuikiniri iua sãkire. ³ Kotxi uatxa himarotapekari Apiananiri ereka inini.

Kai Atoko Itxa Xesosi

⁴ Ininiã hĩsako Xesosimoni, kotxi auapika inakari itxaua. Kai aapokotxi kamakari manirekakiniti atoko itxa Xesosi. Kãkiti !inirekari iua. Iuaritika Teoso mereẽri iua. Teoso taretakiti itxaua Xesosi. ⁵ Hĩte apaka kai atoko hĩtxaua Teoso aapoko ãkapani. Itxĩkitakari hĩxinire auãki inini, kotxi iua nakitiakori hĩtxaua. Ininiã, Teoso aapoko atoko hĩtxaua. Ininiã iua aapoko ãki sasetotxi hĩtxaua, iua ãkapani hĩparĩkauatini. Ininiã hĩsakariko iua amanaãkiti, iua nireẽkiti. Iua apakapariko hĩsikakiti, kotxi Xesosi Kristo makatzakapekari himaerekani. ⁶ Teoso sãkire iõkatsopatakori txari:

Hätamata. Nitakari kai Sião sitatxitiã. Iua kai apiari, Teoso mereëkiti. Apiaerekata iua. Iua kai atoko inakari sãkire auiãkani !ipëtauata, itxa Teoso sãkire.

⁷ Iua kai atoko inakari itxaua Xesosi. Peerekari Xesosi hitemoni, kotxi hite auikari iua sãkire. Äti iua atoko inakari !auari. Txamari isãkire makïpitakani !inirekari iua. Teoso sãkire iökatsopatakori txari:

Aiko kamakani txari: “!Apakata ia kai. !Anirekari.” Iuaritika iua kai apiari. Itakaãka aiko kamikosaaki, apanakini kai soro maïkakari ininiua ïkapani.

⁸ Iuaïkana Teoso sãkire iökatsopatakori txari:

Iua kai xika kãkiti mãkitita. Iua kai xika kãkiti irika, itxa Teoso sãkire. Imãkititana, kotxi !auikarina Teoso sãkire. Teoso txïkitakana ninoa irikini, kotxi !auikarina iua sãkire.

⁹ Hïtepekana, Teoso mereëkini hïtxaua. Sasetotxi hïtxaua. Hïparïkauata Apiananiri ïkapani. Hïte makatxakaãka maerekani sauaki erekarinoka hïkamini ïkapani. Teoso nakitiakori hïtxaua. Imereëi hïte iua ereka inini kãkiti hõerekini ïkapani, kotxi ipiã hãuakasaaki, iuara akiritai hïte ipiã hïtakanapini ïkapani. Itakai ikamaraã atão inakari himarotini ïkapani. Peerekari iua kamara. ¹⁰ Mitxi Teoso nakitiakori !hïtxaua. Uatxa Teoso nakitiakori hïtxapekua. Mitxi Teoso !amonïkapanikai. Uatxa Teoso amonïkapekai.

Teoso Nitiriakori Jamotakoni Pirena

¹¹ Nitiretakini, uai itixi hãuakasaaki, äti tixinikini atoko hïtxa. Atão hãapoko Teoso tixine aua. ïkorsaaki hïsaãpota hãapokomoni. Ininiã ikini nixinireritika nõtãkikai hïte himakamakaniri maerekati hiïto nireëkiti. Hiïto nireëkiti hïxinire mokaiakari atoko itxa. Hiïto !inirekari hïxinire nireëkiti. ¹² Teoso sãkire mauïãkani sauaki hãuakasaaki, ikiniõtika erekarinoka hïkamako. Atxiïti ninoa maxikatiïka apoïtai maerekati hïkamini, iuaritika iusaaki ninoa imarotari erekarinoka hïkamini. Ininiã Teoso ketotini õti manapi iua oerekariko atão inakari ninoamoni. Ininiã iusaaki ixinikarinako erekari hïkamakiti. Ininiã itxarinako Teoso: “Peerekai pite,” itxana.

Hïkamariko Hïauïte Paniãtakiti

¹³ Hïkamariko kãkiti auïtetakini paniãtakiti, kotxi Apiananiri nirekari ikara atoko hïkamini. Ikinimane hïauïteakori paniãtakiti hïkamako. Hïauïte apiari paniãtakiti hïkamako. ¹⁴ Hïauïte poiãori paniãtakiti apaka hïkamako, kotxi hïauïte apiari paniãtana hïauïte poiãorini maerekati kamakani imisiritinina ïkapani. Ipaniãtana ninoa isãpiretinina erekari kamakani: “Erekapitikari hïkamakiti.” ¹⁵ Teoso nirekari hïkaminiri erekari, ininiã iusaaki mükiteni liposotari imisãkirepiretinii hïte. !Kasãkirena iusaaki, kotxi apanakini imarotari erekarinoka hïkamini. ¹⁶ Hïposotari ikinipoko hinireëkiti hïkamini, kotxi Teoso sikakai hïte. Iuaritika kona hinirekapiri maerekati hïkamini. Teoso nitiriakori hïtxaua, ininiã iua paniãtakitinoka hïkamako. ¹⁷ Hïpaxitariko ikinimane. Hïtiretanako ikinimane aïtariakori Teoso sãkire auiãkani. Hïpïkariko Teoso. Hïpaxitariko hïauïte apiari.

Hïkamariko Hïpatrãote Paniãtakiti

¹⁸ Nitiritxiakori, hïkamariko hïpatrãote paniãtakiti. Hïpaxitariko iua. Atxiïti iua tiretai. Atxiïti imisiritai. Iuaritika hïpaxitariko iua. ¹⁹ Erekapitikari himïteenekiniri kãkiti misiritinii maxikatiïka. Himïteenekiniãri, Teoso nireëkiti hïkamini ïkapani, erekapitikari. ²⁰ Erekari hïpatrãote misiritinii hïte, maerekati hïkamakasaaki. Iusaaki himïteenekiniri himisiritiko kona txïkitakari Teoso apokaerekatini. Erekari hïkamakasaaki, himïteenekiniãri himisiritiko, iusaaki Teosomoni erekapitikai.

Kristo Misiritiko

²¹ Teoso akiritai hïte inakitiakori hininiua ïkapani, himisiritiko himïteenekini ïkapani. Kristo misiritaãka hïte ïkapani, ininiã iua nirekari amïteenekiniri amisiritiko iua misiritiko imïteenekini atokokana.

²² Maerekati !ikama. !Imisirienetari äti.

²³ Ninoa misãkirepiretakasaakiri iua, !apakapaenetana. Imisiritakasaakirina iua, !itxitana. !Isãpiretana imisiritinina imaerekanina xika. Iua auikari iri nãkatiniri iua, kotxi atãonoka kamakari itxaua Teoso. Atão imarotari kãkiti kamakiti. ²⁴ Aamina ïpiriãmitakari nopini Xesosi ïto misiritaãka ate maerekani xika. Ipina ate ïkapani, apikomoni maerekati akamini amanirekakani ïkapani. Inirekari anireëkiti maerekati ipïkari atoko inini. Itxïkitakari axinire auãki inini atão inakaranoka akamini ïkapani. Xesosi karo txïkitakaua erekape anini. ²⁵ Xesosi himarotini apisapanika, soti auïte pïpinanakakani atoko hïtxa. Uatxa hïkanapiriãpeka hïpitikirimoni. Hïxinire nïkatarimoni hãpokapeka uatxa.

3

Taniritxi, Tanorotxi Pakini Ôtãkikiko Pirena

¹ Nitiritxi kaminiri ipatrãote paniãtakiti atokokana, hïte tanorotxi hïkamariko hïtaniri nireëkiti. Atxiïti hïtaniri !auikari Teoso sãkire, ininiã erekarinoka hïkamako. Atamatakasaakirina erekari hïkamakiti, ninoa auikari Teoso sãkire. Hïkamakiti erekari txïkitakana auikinirina Teoso sãkire. Hïsãkirenoka !itxïkitakana auikinirina. ² Maerekati himakamakanisaaki ikiniõtika, Teoso iteene hïpaxitiniã ikiniõtika, iusaaki ninoa auikari Teoso sãkire atão inini.

³ Apanakini sito xinikapikari oiãko oõeretini, oro oiã otakini, omãka ereri oieretakini, oiã ere inini ïkapaninani oxinika. Sito erero !oxinikari ikaranani. ⁴ Sito erero oãkixinire ereri apaka. Hãkixinire ereri inakasaaki, ikara ereri !ixipokapani. Hãkixinire ereri inakasaaki, !hïtxitapiri hïtaniri. Hïkamari iua nireëkiti. Teosomoni apiaerekata hãkixinire ereri inini.

⁵ Kitxakapirïka sitoãkini ererini, Teoso sãkire auiãkani, ikara atoko inakani. Ninoa ãkixinire erekari, kotxi ikïpitarina ïtanirina sãkire. ⁶ Sara inakoro kamari Apraão sãkire iaõka. Oa kamari Apraão paniãtakiti, kotxi oamoni oa auïte itxaua Apraão. Sara anaakoro atoko hïtxaua atãonoka hïkaminiã, himapïkarauatakaniã.

⁷ Hïte taniritxi, iua atokokana hïxinikariko erekari hïkaminana hïtanoro. Hïpaxitaroko hïtanoro, kotxi !katapararo. Oa apaka hïtekata apakapariko Teoso sikakiti erekari. Iua txïkitakai hãuapininiika hinini iuakata. Hïtitaroko hïtanoro, ininiã Teoso kenakotariko himisãkiretiniri iua.

Himisiritiko Pirena

⁸ Ia nisãkire mapotõkire nisãpiretai. Hïxinikakiti ãtika xinikakiti atoko hïtxako. Hiamonïkakauako. Hïtitariko ãti, hïtari hïtoretini atokotxikana. Hïkamariko erekari ãtimoni. !Hïuikapeua. ⁹ ãti kaminiãri maerekati hïtemoni, !hïkamapiri maerekati iuamoni. ãti misãkirepiretakasaakii, kona hïte misãkirepiretapiri iua. ãti kaminiãri maerekati hïtemoni, iusaaki hamanaãri Teoso sikiniri erekari iuamoni, kotxi Teoso paniãtai ikara atoko inakari hïkamini, erekari Teoso sikakiti hïte apaka apakapini ïkapani. ¹⁰ Teoso sãkire iõkatsopatakori txari:

Pinirekiniãri pauini ereka inini, pinirekiniãri ikiniõtika pipoxokoniuatini, !pauiritapiri pisãkire maerekati inini. !Pimisirienetapiri ãti.

¹¹ Pinirekiniãri pauini ereka inini, pitakanapariko maerekati pikamini. Erekarinoka pikamako. Pitakanapariko pineenamauatini. Pinirekariko kãkiti auini ereka inini.

¹² Apiananiri nïkatari kãkiti atão inakari kamakani. Teoso imisãkiretakasaakina, Teoso kenakotapitikari isãkirena. Txamari Apiananiri misiritari maerekati kamakani, itxa Teoso sãkire kitxakapirïka.

¹³ Erekari hïkamakasaaki, kãkiti !inirekari imisiritinii. ¹⁴ Atão inakari hïkamakasaaki, kãkiti misiritiniã, hãpakapariko erekari Teoso sikakiti. Ininiã !hïpïkapena ninoa. Maerekaxiniretinoka !hïtxape. ¹⁵ Hãkixinireë hïtxako: “Teosonoka niauïte. Apiananiri itxaua. Iua nireëkitinoka nikamako.” Ikara atoko hïtxako. Hãpaiaõkariko Teoso sãkire, isãkire iteene himarotini ïkapani. Ininiã kãkiti pimainiã: “Kinirepa hãuikari Teoso sãkire?”

Iuasaaki himarotari hāpakapapiretiniri iua. Hāpakapapiretakasaakiri iua, ! hītxitapiri. Hīpaxitariko iua iuasaaki. ¹⁶ Hīsākiraauatakasaaki, !hīsāpiretapiri hākixinire manirekakiniti. Hinirekariko erekari hākixinire nireēkiti hīkamini. Apanakini misākirepiretai. Ninoa atamatakasaakiri erekari hīkamakiti Kristo paniātakiti, ipētataro imisākirepiretinii. ¹⁷ Teoso nirekiniāri hātatsiirauatini erekari hīkamini xika, ininiā erekari, kotxi iuasaaki hīkamari erekari. Txamari hātatsiirauatiniā himaerekani hīkamini xika, !erekari, kotxi iuasaaki hīkamari maerekati.

¹⁸ Xesosi Kristo ipina kākiti maerekani imaktxakini ikapani. Iuasaaki iposope imaktxakiniri kākiti maerekani. Iuaīkana !atatsiirauataika kākiti maerekani imaktxakini ikapani. Erekarinoka kamakari ipīpe maerekati kamakani ikapani. Ipīpe, Teosomoni ate anikini ikapani. Iito ipīpe, iuaritika Erekaro Matamatakoti txīkitakari iua iuaīkana auāki inini. ¹⁹ Iuasaaki Erekaro Matamatakoti posotiireē isari ipīkani auiniātaāmoni. Iuaā kateia āki ipīkani aua. Iuaā isāpiretana Teoso misiritinina ninoa, kotxi iuaka kāiata. ²⁰ Kitxakapirīka ninoa ipīkani, auākipanika inakasaakina, !inirekarina Teoso paniātakiti ikaminina. Iuasaaki Noee kamanātari maporo. Teoso iātapana imaerekanina itakanapinina ikapani. Txamari !itakanaparina. Iuasaaki poiāonoka !ipina. Oitonoka !ipina, xirataātxi apokasaaki. Teoso nīkatana ninoa imapinakani ikapani. ²¹ Ikara xirataātxi hīpatxisatikoko atokokana. Hīpatxisatikoko oerekari kākiti, Teoso maktxakapekai himapinakani ikapani. Hīpatxisataāka hītoākiri txiko maktxakiko ! ikapanini, kona maerekati hīkamakiti maktxakiko ikapanini. Hīpatxisatikosaaki, hīttxari Teoso: “Nākixinireē ninirekaro nīkaminiri ikinika pite nireēkiti iaōka,” hīttxariko. Xesosi iuaīkana ōkitikasaakiaua, imaktxakai himapinakani ikapani. ²² Iua kanapiriā Teoso tixinemoni. Uatxa iri kikomoni iitopāka. Iuaā Teoso nitiriakori, auītetxiakori, kaposotirerini pakini auīte itxaua. Ninoa ikinika kamari Xesosi paniātakiti.

4

Hīkamariko Ikinipoko Teoso Nireēkiti

¹ Xesosi atatsiirauata iitoā hīte ikapani. Ininiā hinirekariko Xesosi xinikakiti iaōka hīkamini. Ikara atoko hinirekiniā, hīxinikakiti sikataparataro hākixinire. Kākiti atatsiirauatakasaaki iitoā, !inirekaikari maerekati ikamini. ² Ininiākara ikorapokoriti auakasaaki, !inirekaikari maerekati iito nireēkiti ikamini. Ikamari Teoso nireēkiti iaōka ikiniōtika. ³ Mitxi maerekati hīkamakiti iaōpe. Mitxi Teoso sākire mauīākani nireēkiti iaōka hīkama. Ikinini sereti maerekati hīkama iuasaaki. Iuasaaki hīkamari ikini sereti hīto nireēkiti. Hinirekaro āti kākiti iito. Hīpoāta. Ikinipoko maerekati hīkama hīpoātakasaaki. Hīkamari kiiniri maerekati. Hīteosonetari kākiti kamakiti, Teoso mauiritakinini.

⁴ Ninoa Teoso sākire mauīākani txai: “Kinirepa kona hīpotxitari ate kamakiti iaōka hīkamini? Peerekari akamakiti,” itxaina. Ininiā ninoa nireēkiti iaōka himanirekakani xika, ninoa misākirepiretai hīte. ⁵ Txamari āti ōti ninoa apakapapiretariko Teoso, kotxi Teoso iposope isāpiretiniri maerekati kamakani misiritiko. Isāpiretari kākiti auākipanika inakani, apaka kākiti mitxi ipīkani. ⁶ Ininiā Teoso iokanapirena erekari sāpiretaākapeka kākiti. Uatxa ninoa ipīpe. Auākipanika inakasaaki, isāpiretaāka ninoamoni kākiti misiritiko imaerekani xika. Isāpiretaāka ninoamoni kākiti kaminiri Teoso nireēkiti ākixinireē ikiniōtika.

⁷ Imakinika xipokini ōti imatokotapeka. Ininiā kona hāuiritapiri hīto kaminiri inireēkiti. Araōkire hīttxako, ininiā hīposotari himisākiretiniri Teoso. ⁸ Iteene hītiretakakauako. Ia apiata Teoso nirekakiti. Iteene hītiretakakauako, kotxi iteene hītiretiniāri āti, poiāo hīxinikari maerekati ikamakiti. ⁹ Kākiti apokasaaki hāapoko, hīpoxokoniritika hāpakapanako. Kona hītsoatape hākixinireē ninoa apokini xika. ¹⁰ Hīkinika hāpakapapekari imaroretxi Teoso parīka hīkamini ikapani. Ikara Teoso sikakiti hītemoni. Ininiā ikara himaroreē hīparīkauata apanakini ikapani. Iuasaaki Teoso nitiriakori erekarini hīttxaua. Hīsikariko ātimoni ikini sereti erekari Teoso sikakiti.

¹¹ Hīsākirauatakasaaki, hīsāpiretariko Teoso sākire kākitimoni. Himoianatakasaakiri āti, himoianatariko Teoso posotiireē, ininiā iuasaaki kākiti txari Teoso: “Peerekai pite, kotxi Xesosi Kristo nakitiakori atxaua,” itxari Teoso. Ātipirika ikinimane txapikari Teoso: “Peerekai pite. Ikinipoko posotiiretxi aua pitemoni.” Ameē.

Xesosi Sākire Auiākani Misiritiko

¹² Nitiretakini, !hītikokape himisiritiko apokasaaki, kotxi ikara ataerekatai. Iteene himisiritaākako, kotxi ikara atoko inakari apokapitikako. ¹³ Iuasaaki hīpoxokoniuatako, kotxi Xesosi atatsiirauatape, ininiā hīte apaka atatsiirauatako. Xesosi kanapiriākasaaki, peerekari iuasaaki. Hīte atamatariko ikara, ininiā iuasaaki iteene hīpoxokoniuata. ¹⁴ Kākiti xinitakasaakii hīte, Kristo nakitiakori hininiua xika, hīpoxokoniuatako, kotxi iuasaaki himarotari Teoso aua hītekata. Himarotari Erekarī Matamatakoti aua hākixinireē. ¹⁵ Kokaniri, kiītiriri, maerekati kamakari, aāpirena kamakari pakini ! hītxapeuako. Ikara atoko inakari hininiāua, apakatapitika hātatsiirauatini, kotxi hātatsiirauata maerekati hīkamini xika. ¹⁶ Iuaritika hātatsiirauatiniā Xesosi sākire hāuikini xika, ininiā iuasaaki erekapitikari. !Hīpētauatape. Hītxariko Teoso: “Peerekai pite, kotxi Xesosi nakiti nitxaua,” hītxako. ¹⁷ Apokapeka Teoso anaakori misiritiko ōti. Merepanika Teoso misiritari iua anaakori imaerekanina xika. Teoso misiritiniāua ate isākire auiākani amaerekani xika, ininiā Teoso iokanapirena erekarī manirekakani mitekini ! auari. Iteene imisiritana ninoa. ¹⁸ Kitxakapirīka Teoso sākire iōkatsopatakori txari: Pamimari atāo inakari kamakani sini Teoso tixinemoni. Ininiākara Teoso manirekakani mitekini, maerekati kamakani mitekini ! auari. Imisiritaākapitikanako, itxa Teoso sākire. ¹⁹ Apanakini atatsiirauata, kotxi Teoso nirekarī atatsiirauatini. Ikara atoko hātatsiirauatiniā, iuaritika erekarī hīkamapanikako. Hāuikariko ikinipoko kamakari sākire, kotxi iua kamari ikinipoko isākire iaōka.

5

Kōtākikarerini, Ātokoriakori Pakini

¹ Kōtākikarerini nitxaua nota, ininiā nōtākikai hīte kōtākikarerini. Nota atamatari Kristo misiritiko. Ikanapiriākasaaki, natamatari iua iotximere ikinimane auīte inakasaakiaua. ² Ininiā nota ōtākikai hīte. Hinīkatanako Teoso sākire auiākani ereē. Soti auīteakori ipitikiri nīkatini atokokana, hinīkatana. Hīsāpiretanako Teoso sākire, kotxi ikara sikakienatari ninoa ākixinire. Teoso sikana ninoa hītemoni hinīkatinina īkapani. Atāo hinirekariko hinīkatinina ninoa. Kona hītxape hākixinireē: “!Ninirekarī ninīkatinina ninoa, iuaritika ninīkatana, kotxi ikara nīparīka.” Kona hīxinikapiri ikara atoko inakari. !Hīparīkauatape txineiro hāpakapini īkapani. Hīparīkauatako apanakini himoianatini īkapani. ³ Ninoa auīte atoko !hītxapeua. Teoso sikana ninoa hītemoni hinīkatinina īkapani, soti auīteakori ipitikiri nīkatini atokokana, ininiā erekarī hīkamako, hīte kamakiti iaōka ninoa kamini īkapani. ⁴ Ininiā ipitikiri apiari apokasaaki, Xesosi apokasaaki, hāpakapariko hīparīka īki. Iuasaaki hāpakapariko saporīēta atoko inakari. Ikara Teoso sikakiti peerero, ininiā ikara apakapakani auapininiika. Atamatapikarina Teoso iotximere. Iuasaaki erekarī hāpakapakiti !ixipoka.

⁵ Hīte ātokoriakoripekana, hīkamariko aneēkani paniātakiti. Hīkinika, himoianatakakauako. !Hīuikapeua, kotxi Teoso sākire iōkatsopatakori txari: Teoso iotokakari iuikakaniaua kaminiri inireēkitina. Iua sikari ikinipoko erekarī miuikakaniuamoni.

Itxa Teoso sākire. ⁶ Ininiā hīteka poiōtakauako, kotxi Teosonoka kaposotiireri. Iketo manapi Teoso iuikai hīte, erekarī hīkamakiti isāpiretiniri ikinimane. ⁷ Maerekaxiniretinoka hinakasaaki, imakinika himaerekaxinire hīsāpiretariko iua. Hīsikariko himaerekaxinireni iuamoni, kotxi iua tiretai.

⁸ Kona hīkamapiri hīto nireēkiti. Araōkire hītxako, kotxi himokaiakari Satanasi inakori ākiti monōkori atoko itxa. Isaāpota initiniri ikiena. ⁹ Satanasi apokasaaki hītemoni,

iteene hãuikariko Teoso sãkire. Iuasaaki hõtaparaxinireritika hãuako. !Himitekape. ! Hĩkamapiri inireẽkiti. Himarotari hõtariakori ikini itixiti auakani atatsiitini imisiritikona hĩte atatsiirauatini atokotxikana. ¹⁰ Hĩte atatsiirauatako poiãonoka, eereka Teoso parĩka hãkixinireẽ iposope ikamini. Iua sikataparaxiniretai. Iteene hãuikari Teoso sãkire iuasaaki. Satanasi liposotari itxĩkitakini maerekati hĩkamini iuasaaki. Teoso, ikinipoko erekari sikakari, kamari ikara atoko inakari hĩte ĩkapani. Iua akiritai itixine hĩsini, ãtipirika hãuini ĩkapani, iua iotximere ãtipirika hãtamadini ĩkapani, kotxi Kristo Xesosi nakitiakori hĩtxaua. ¹¹ ãtipirika ikinimane txari iua: “Peerekai pite.” ãtipirika ikinimane auĩte itxaua. Ameẽ.

Petro Takapiretanapini

¹² Sĩrasi moianatano ia niõkatsopatakiti axapitiri niõkatsopatini hĩte ĩkapani. Iua aĩtari. Iua iteene auikari Xesosi sãkire. Niõkatsopata hĩte nisikataparaxiniretini ĩkapani. Ninirekari himarotiniri atão asãpiretinii erekari Teoso sikakiti pirena. !Hĩtakanapapiriko erekari Teoso sikakiti hĩtemoni. ¹³ Teoso nakitiakori, Papirónia sitatxiti auakani, xinikamanapitai hĩte. Teoso mereẽna ninoa hĩte imereini atokotxikana. Marko, namarite atoko inakari, xinikamanapitai hĩte apaka. ¹⁴ Haõkitakakasaakua, himaratakakauako, kotxi hĩtiretakakaua. Teoso kamaerekaxiniretai hĩte Kristo Xesosi sãkire auĩãkani. Ameẽ.

2 PETRO

Petro Iuaïkana Iokanatsopatakiti

¹ Nota Simão Petro nitxaua. Xesosi Kristo nitiri, iua iokanatakiti nitxaua. Niokanatsopata hitemoni, kotxi hite auikari Xesosi Kristo sãkire, ate auikiniri atokotxikana. Peerekari iua sãkire aãuikini. Aãuikari iua sãkire, kotxi atãonoka kamakari itxaua. ATeosone, amaerekani makatxakakari itxaua Xesosi Kristo.

² Himaroãpotakasaakina Teoso, aãuïte Xesosi pakini, hãpakapari ikinipoko erekari ninoa sikakiti. Itori hãpakapa. Ninoa iteene kamaerekaxiniretai hite.

Erekari Akamini

³ Teoso posotiireë isikaua imakinika anireëkiti ïkorapokoriti aãuini ïkapani, Teoso paniãtakiti akamini ïkapani. Aãpakapari iua posotiire, iua aimarotakasaaki. Iua akiritaua iua nakitiakori aniniua ïkapani. Aãpoka iuamoni akiritakasaakiua, kotxi peerekari iua. Aãpoka iuamoni, kotxi erekarinoka ikama. ⁴ Ikara atoko ininiã, isikaua apia erekari isikaenetakiti. Isikaenetakiti anirekakiti apiari. Ikamaenetari ikamakiti erekari ikaminua. Teoso nirekari ikara atoko ikaminiãua, atão inakaranoka akamini ïkapani, atão inakaranoka Teoso kamini atokotxikana. Kristo sãkire mauïãkani nirekari maerekati ïitona nireëkiti ikaminina. Hite !inirekaikari ninoa nireëkiti iaõka hïkamini, ininiã ikara maerekati !inokai hite.

⁵ Ininiã ikinika hãkixinire taparaã hãuikariko Teoso sãkire. Hãuikiniãri Teoso sãkire, hïkamariko erekarinoka. Erekarinoka hïkaminiã, hinirekariko Teoso sãkire iteene himarotini. ⁶ Iteene himarotiniãri Teoso sãkire, hïito auïte hïtxauako. Hïito auïte hininiãua, himïteenekariko himisiritiko. Himisiritiko himïteenekiniã, hïkamariko erekari Teoso kaminiri atokokana. ⁷ Hïkaminiãri erekari Teoso kaminiri atokokana, hïtiretanako hïtariakori, Teoso sãkire auïãkani. Hïtariakori, Teoso sãkire auïãkani, hïtiretiniã, hïtiretari ikinimane. ⁸ Ikara atoko hininiã, ikara atoko apiaãpotiniã, aãuïte Xesosi Kristo himarotakasaaki, erekari hïparïka iua ïkapani. Iuasaaki makamareti atoko !hïtxapeuako. Himinariko ito kãkiti Kristomoni isãkire auikinina ïkapani. ⁹ Ikara erekari mauakaniã hitemoni, mõiããreni atoko hïtxaua. !Himarotari atão inakari. !Hïxinikari Teoso kamakiti katana. Himaxinïkaretapekari Xesosi makatxakiniri himaerekani mitxi hïkamakiti.

¹⁰ Ininiã nitariakori, ikara atoko !hïtxapeko. Hïkamariko ikinipoko Teoso paniãtakiti, ininiã iteene himarotari Teoso akiritinii inakitiakori hininiua ïkapani. Iuasaaki himarotari Teoso mereinii hite iua anaakori hininiua ïkapani. Ikara atoko inakari hïkaminiã, !hïkamari maerekati. ¹¹ Ikara atoko hïkaminiã, Teoso ipoxokoniritika apakapai hite aãuïte Xesosi Kristo auïtetxi ininiãtaãua hãuini ïkapani. Iuaã Xesosi, amaerekani makatxakakari, ãtipirika ikinimane auïte itxauako.

Atão Inakari Teoso Sãkire

¹² Ninirekari ikara noerekakiti ãtipirika nisãpiretinii. Himarotapekari ikara noerekakiti, iuaritika iuaïkana nisãpiretai. Hite imarotari ikara noerekakiti atão inini, iuaritika kona nitakanapari ikara nisãpiretinii. ¹³ Nota auapanika ninakasaaki, notamoni atãopitika nitxïkitakinii hite ikara noerekakiti hïxinikini. ¹⁴ Kotxi nimarotari païtiki nipinini. Aãuïte Xesosi Kristo oerekepekano païtiki nipinini. ¹⁵ Ininiã uatxa Teoso sãkire nisãpiretapikai, ininiã kona himaxinïkaretari noerekakiti nipïkasaaki.

¹⁶ Asãpiretai aãuïte Xesosi Kristo posotiire. Asãpiretai iua iuaïkana kanapiriini. Ikara asãpiretakiti hitemoni kona kãkiti sãkireni. Kona kãkiti kimarorerini xinikakitini asãpiretai. Atão inakari ate sãpiretai hite, kotxi ateka atamatari Xesosi ikinimane auïte ininiua. ¹⁷ Aïri Teoso oerekari iuikiniri iua. Oerekari iua ereka inini, kotxi itxari iua: “Ere namarite, nitiretakiti. Iua iteene kamapoxokonitano,” itxa Teoso kaposotiireri. ¹⁸ Ateka

kenakotari ikara Teoso sãkire, itixineẽ isãkirauatakasaaki. Iuasaaki ate aua Xesosikata õtanoxiratarari Teoso nakiti nopini.

¹⁹ Ininiã aimarotapitikari Teoso sãkire sãpiretakani sãpiretakiti kitxakapirĩka atão inini. Himixinikariko ninoa sãpiretakiti. Ninoa sãpiretakiti tirikapĩ ipiã iopinikini atoko itxa, kãkiti sinimoni atamatini ĩkapani, kotxi axinikasaakiri ninoa oerekakiti, aimarotari atão inakari, atão minakati pakini. Teoso sãkire sãpiretakani sãpiretakiti hĩxinikiniritika Xesosi kanapiriãko. Iuasaaki iua txĩkitakai Teoso iteene himarotini. Iuasaaki atokatxi ponikini atoko itxa Xesosi apokini. Iõriki ĩkanõkapanika pokĩkini atoko itxa iuasaaki Xesosi apokini. ²⁰ Merepanika ninirekari iteene himarotiniri Teoso sãkire sãpiretakani sãpiretakiti Teoso sãkire iõkatsopatakoriã. Kona ninoa sãkireni. Kona ninoa xinikakitini. ²¹ Kitxakapirĩka Teoso sãkire sãpiretakani kona iõkatsopatarari kãkiti nireẽkiti sãkiretxiti. Erekarari Matamatakoti txĩkitakari kãkiti Teoso nakitiakori sãpiretiniri atão inakari Teoso sãkire.

2

Atão Minakati Oerekakani

¹ Kitxakapirĩka Teoso sãkire sãpiretakani auakasaaki, auari apaka atão minakati oerekakani. Iua atokotxikana uatxa aua atão minakati oerekakani hĩte sauaki. Kãkiti mimarotakanisaakiri, oerekari atão minakati. Kona erekarari ninoa oerekakiti. Na atão ninoa oerekari Teoso sãkire. Ninoa !auikari Apiananiri ipinini kãkiti ĩkapani Teoso ĩkitxitini ĩkapani. Ikara xika mokatanitika Teoso xipokanako ninoa. ² Itori kãkiti auikari isãkirena, ininiã ikamarina ninoa kamakiti atokokana. Ikamarina maerekati ĩtona nireẽkiti, maerekati ninoa kamini atokotxikana. Ininiã ikara xika, apanakini misãkirepiretari Teoso sãkire atão inakari auikiko. ³ Kapotxinanirini ninoa atão minakati oerekakani. Isãkirena atão minakati xika, imisiritienetai. Ninoa nireẽkiti iaõka ikaminiina hĩte. Kitxakapirĩka Teoso sãpiretapekari imisiritinina ninoa imaerekanina xika. Ixipokinina õti paĩtiki apokapitikako. Teoso !imaka. Ninoa xipokini õti apokapitikako.

⁴ Teoso nitiriakori iaxiti auakani kamakasaakiri maerekati, imisiritana. !Auiritana imitekinina. Iokanatanana maerekani misiritikoãtaã. Iuaã itakana kateia ãki ipiãã. Iuaã iãtaparina Teoso misiritinina ninoa imaerekanina xika.

⁵ Kitxakapirĩka Teoso xipokari ikinimane kãkiti iua nireẽkiti manirekakani xirataãtxiã. Teoso !auiritana ninoa mitekini. Noee, apikomoni setxi kãkitikata nĩkataãka. Ninoanoka !xipokaãka. Iua nĩkatari Noee, kotxi atão inakari sãpiretakari itxaua.

⁶ Apaka ixipokari Sotoma sitatxiti auakani, Komoha sitatxiti auakani pakini arikatxiã. Atapaninoka kaikota iuasaaki. Ininiã ikara pinitari kãkiti Teoso nireẽkiti manirekakani. ⁷ Iuasaaki Teoso makatxakari Aroo inakori imapinakanani ĩkapani, kotxi erekarari kamakari itxaua. Maerekati kamakani txĩkitakari Aroo matinaniuatini, kotxi ikiniõtika iua atamatari maerekati ninoa kamakiti, maerekati ninoa ĩto nireẽkiti. Itxiko atoko itxa ninoa kamakiti. ⁸ Aroo, atão inakari kamakari, aua ninoa sauaki. Ikiniõtika atamatari maerekati ninoa Teoso paniãtakiti manirekakani kamakiti. Ikiniõtika ikenakotari maerekati ninoa sãpiretakiti. Ininiãkara ãkixinireẽ Aroo maerekaxiniretinoka itxa ninoa maerekani xika, kotxi iua ãkixinireẽ inirekarari atão inakarinoka ikamini.

⁹ Ikara atoko ininiã, Apiananiri imarotari iua nireẽkiti nirekakani imakatzakini imisiritikosaakina. Iua apaka imarotari imisiritiniri atão minakati kamakani uatxa. Apaka imarotari imaĩkinina ninoa, kãkiti misiritiko sãpiretiko õtisaaki imisiritinina ĩkapani. ¹⁰ Iteene Teoso misiritari kãkiti, maerekati ĩto nireẽkiti kamakani. Ninoa maerekani txikotari ninoa ãkixinire. Apaka iteene imisiritari auĩtetxi paniãtakiti makamamani.

Ninoa atão minakati oerekakani iteene iuikaua. !Ipaxitarina ãti. !Ipĩkarina imisãkirepiretinirina iaxiti auakani. ¹¹ Teoso nitiriakori iaxitikini iteene kaposotiireni.

Apiataparatanana ninoa. Iuaritika Teoso nitiriakori ! apoïtana ninoa atão minakati oerekakani. !Imisäkirepiretana Teoso apisatoõ.

¹² Ninoa atão minakati oerekakani misäkirepiretari ikinika imimarotakininitina. Kaxipiri ïtopa auakari atoko itxana, kotxi ikamarina ïtona nireëkitinoka. Kaxipiri ïtopa auakari iponaniã, eereka imaïkaãka, oka inaãka. Iua atokokana ninoa atão minakati oerekakani xipokaãkako imaerekanina xika.

¹³ Ininiã ninoa misiritaãka, kotxi na atão ninoa kamakiti. Kona ïkanõkananini ikamarina maerekati. Ipotxitarina maerekati ïtona nireëkiti ikaminina pokamara, ikinimane atamatini ïkapani. Ninoa kamapikari maerekati, iuaritika apotiitauana hïtekata kiiniri Teoso ïkapani hïkamakasaaki. Ininiã apanakini ! auikari hïte sãkire ninoa maerekani xika. Itxiko mãkatxi kasarori nopinikiri atoko itxana ninoa. Karõtxi kãkiti toõã auakari atoko itxana ninoa. ¹⁴ Inirekapikarina sito ïtanoro minakotokatika isirïkinina. Kona iposotarina iotokakinirina maerekati ikaminina. Anikarina kãkiti mataparaxinireni, maerekati ikaminina ïkapani. Kapotxinanixinirena ninoa. Ininiã Teoso misiritapitikanako ninoa. ¹⁵ Ninoa osipikari kimapori atão inakari. Ipïpinanakana. Ikamarina maerekati Paraão inakori maerekani atokokana. Iua Paraão, Peoo inakori ãkiri. Kitxakapirïka aua. Iua nirekaro txineiro maerekati ikamini ïkapani. ¹⁶ Txamari ipira txitari iua imaerekani xika, kotxi Teoso txïkitakari poho sãkirauatini kãkiti sãkirauatini atokokana. Ininiã ipira iotokakari iua atão minakati sãpiretakari kaminiri maerekati miïkiteti.

¹⁷ Ninoa atão minakati oerekakani ! iposotari ikaminirina ikamaenetakitina. Aariko ãparaã mauakiniti atoko itxana. Kãkiti nirekari ãparaã, txamari ! auari. Katxiãri ïtima anikakiti atoko itxana ninoa. Kãkiti nirekari ãparaã kipini, txamari ! ikipa. Teoso mereëri ipiaãtaã ninoa ãtipirika kaikotini ïkapani. Kãkiti atamarauatini iuaãtaã ! auari. ¹⁸ !Kiïkiteri ninoa sãkire. Iuïkauana isãkirauatakasaakina. Isãpiretarina kãkiti, erekari akaminiri aïto nireëkiti. Ininiã isikanireõtari kãkiti ikara maerekati ikamini. Imisirienetarina Teoso sãkire poiãopanika auïãkani. Ninoa ! okananipanikani auikari Teoso sãkire. ! Okananipanikani imarotarina atão inakari. Atão minakati oerekakani sikanireõtana ninoa ikara maerekati ikaminina.

¹⁹ Itxana: “Kateia ãki auakani atoko hïtxaua. !Erekari ikara atoko hinini. Hïkamariko hinirekakiti. Ininiã ikara atoko hïkaminiã, hïsikakaãka,” itxana. Txamari ninoaka kateia ãki auakani atoko itxauana, kotxi ninoa ! iposotari itakanapinirina imaerekanina. Imaerekanina iauïtena itxaua, kotxi ikamarina imaerekanina paniãtakitinoka. ²⁰ Mitxi ninoa imarotari Apiananiri Xesosi Kristo sãkire, kãkiti maerekani makatxakakari sãkire. Iuasaaki ninoa iotokakari ikaminirina Xesosi sãkire mauïãkani kamakiti, kãkiti xinire maerekati inini txïkitakakari. Txamari eereka iuaïkana ikamarina ikara maerekati. Eereka ! iposotaïkarina ikara maerekati itakanapinina. Ininiã uatxa apiata imisiritikona. ²¹ Erekamariko atão inakari kamiko ninoa mimarotakanimako, kotxi ninoa imarotari, iuaritika ! inirekaïkarina Teoso paniãtakiti, iua iokanatakini sãpiretakiti. Uatxa ninoa misiritiko apiata. ²² Atãopitikara kitxakapirïka sãkiretxiti:

Anãpa kanapiriã okanakakitimoni onïkiniri ïkapani. Irari ipitikiri arokakito kanapiriã iãropemoni osirïkini ïkapani.

Ininiã iuaïkana ninoa atão minakati oerekakani kamari maerekati, mitxi ninoa takanapakiti.

3

Apiananiri Kanapiriini

¹ Nitiretakini, mitxi niokanatsopatapeka hïtemoni. Iuaïkana niõkatsopatari ia aãtsopa. Imakinika niõkatsopata, kotxi ninirekari hïte iuaïkana hïxinikiniri erekari mitxi himarotakiti. ² Ninirekari hïxinikiniri Teoso sãkire sãpiretakani sãkire kitxakapirïka, kotxi Teoso nakitiakori itxauana. Apaka ninirekari hïxinikiniri ate paniãtakiti, kotxi Apiananiri iokanatakini atxaua. Kãkiti maerekani makatxakakari iokanatakini atxaua.

³ Merepanika himarotariko ia: Imapotōkire ōti takote auako kākiti Teoso sākire napetakani. Ninoa kamari maerekati iitona nireēkiti. ⁴ Ia atoko itxanako: “Ītapari iua? ‘Nikanapiriāko,’ itxa iua. Txamari kona apoka. Aātokiriakorini ipīkasaakipanika, itixi kamikosaakipanika iuatxikana. Mitxi itixi, uatxa iuatxikana,” itxana.

⁵ Ninoa nirekari imaxinīkaretinirina Teoso kamakiti kitxakapirīka auakari, kotxi Teoso txīkitakari iaxiti apiko nopinixiti auini isākireē. Apaka ikamari itixi āparaā kamakori. Ikamari itixi āparaā sauaki. ⁶ Apaka ninoa maxinīkaretari ia: Teoso iokanataru iua āparaā, ininiā xirataātxi xipokari itixi mitxi auakari, ikinimane kākiti iuasaaki auakani apaka. ⁷ Uatxa isākireē inīkatari iaxiti apiko nopinixiti, itixi pakini arikatxi xipokiniri īkapani. Imakinika inīkatiniritika Teoso manirekakani misiritiko isāpiretako. Iuasaaki ninoa xipokaākako. Iuasaaki ixipokari iaxiti apiko nopinixiti, itixi pakini.

⁸ Nitiretakini, kona himaxinīkaretapiri ia nisākire: Teosomoni āti ōti, mio anokanani atokotxikana itxa. Iuamoni mio anokanani, āti ōti atokotxikana itxa. ⁹ Apiananiri kamapitikari ikamaenetakiti. Apanakini kākiti xinikari !katimari ikaminiri ikamaenetakiti. Kona ikara atokoni. Iātapari kākiti auikiniri isākire, kotxi !inirekari kākiti sini imisiritikomoni. Inirekari ikinimane takanapiniri imaerekani.

¹⁰ Apiananiri kanapiriākasaaki, kiītiriri īkanōka apokini atokokana. Iua apoka kākiti mimarotakanisaakiri. Iuasaaki iaxiti apiko nopinixiti ereēkoka itaparakieneritika. Iuasaaki ikinipoko xipokaāka arikatxiā. Iuasaaki iteene ipataka aua. Imakinika itixi xipokako iuasaaki.

¹¹ Ikara atoko itxako ikinipoko xipokini, ininiākara natokopa itxa hāuini ikiniōtika ereka hinini? Erekarinoka hīkamako ikiniōtika, kotxi iua nakitiakori hītxaua. Teoso nireēkitinoka hīkamako ikiniōtika. ¹² Iuasaaki hiātapari hīpoxokoniritika Teoso keto apokini. Iteene hinirekariko ikara ōti apokini. Iuasaaki iaxiti apiko nopinixiti xipokaāka arikatxiā. Ikinika iākokako kapatakari xika. ¹³ Iuaritika aiātapari iaxiti apiko nopinixiti amaneri, itixi amaneri apaka atāo inakari kamakani īkapani. Ikara atoko inakari Teoso sikaenetakiti.

¹⁴ Ininiā nota tiretakini, hinirekasaakiri Xesosi kanapiriini ōti apokini, iteene hīparīkauatako maerekati himakamakanani īkapani. Ininiā iua kanapiriākasaaki, iua imarotari himakamakaniri maerekati. Iuasaaki imarotari hīkerokiniri !auari. Iuasaaki imarotari erekaxinire hinini. ¹⁵ !Katimari iua kanapiriini, kotxi iātapari kākiti takanapiniri maerekati ikamakiti, imisiritiko mapokakani īkapani. Iua atokokana aītari atiretakiti Paoro iōkatsopata hītemoni Teoso imaroreē. ¹⁶ Ikinika Paoro iokanatsopatakitiā isāpiretari Apiananiri kanapiriini ōti Teoso imaroreē. Ipixini iua iōkatsopatakiti pamimari kākiti imarotiniri īkapani. Aua kākiti miīkiteni. !Apakata aūikiniri ninoa sākire. Kākiti ikara atoko inakani oerekari Paoro iōkatsopatakiti, apanakini Teoso sākire iōkatsopatakori pakini, txamari na atāo ninoa sāpiretakiti. Ipinimoni ninoa oerekakiti. Imamakarina Teoso sākire, ininiā ikara xika ixipokaākanako.

¹⁷ Nitiretakini, himarotapekari pamonōkoniri ninoa atāo minakati oerekakiti. Ininiā araōkire hītxako. Kona hāuikapiri Teoso sākire kerokakani sākire, kotxi Teoso paniātakiti makamakanani itxauana. Kona hītakanapapiri Teoso sākire atāo inakari, uatxa iteene hāuikakiti. ¹⁸ Ikiniōtika himarotariko ikinipoko erekari aūiite Xesosi Kristo sikakiti hītemoni, amaerekani makatxakakari sikakiti hītemoni. Ikiniōtika himaroāpotariko iua. Ninirekari ikinimane uatxa sāpiretiniri iua: “Peerekai pite.” Ninirekari ikinimane ātipirika sāpiretiniri iua: “Peerekai pite.” Ameē.

1 XOÃO

Merepanika Xoão Iokanatsopatakiti

Xesosi “Teoso Sākire” Inakori

¹ Nota iōkatsopata hīte īkapani, iua “Teoso sākire” inakori asāpiretini īkapani. Ātipirika auakari itxaua. Itxīkitakari ikinipoko auāki inini. Itixi kamiko apisa iua aua. Atera kenakotari isākire. Aōkiā ate atamatari iua. Auakoā amaātakari iua. Ininiā atāopitika ate imarotari iua. ² Iua ikinipoko auāki inīkitaākari. Iuaka oerekaua atemoni. Ate imarotapekari iua, ininiā asāpiretai aātamatakiti, akenakotakiti pakini. Ate sāpiretai hīte iua ātipirika auakari, kākiti auāki inīkitaākari, ininiā kākiti auapikako Teosokata. Iua Xesosi Kristo inaāka akiritiko. Iua aua irikata, Teosokata. Iuaka oerekaua atemoni. Aātamatarī iūto. ³ Ate sāpiretai hīte aātamatakiti, akenakotakiti pakini, amoianatakakiniua īkapani. Atāo nisāpiretai. Amoianatakakaua Teosokata, Xesosi Kristo pakinikata. ⁴ Ia sākiretxiti aiokanata hītemoni, iteene hīpoxokoniuatini īkapani.

Teoso Pokamara Atoko Itxa

⁵ Teoso pokamara atoko itxa, kotxi maerekati !ikama. Ipiā !auari Teoso auiniātaā, kotxi maerekati !ikama. Ikara iokanapirena imi sāpiretaua ate. Ininiā ate sāpiretai hīte. ⁶ Maerekati akamakasaaki, ipiā auakani atoko atxa. Iuasaaki, “Teoso amoianata,” aniniā, paxirari asākire. Kona atāo akamakiti iuasaaki. ⁷ Teoso aua ikamaraā, kotxi erekarinoka ikama. Ate ikamaraā aūuiniā Teoso atoko aniniā, erekarinoka akaminiā, ininiā ate Teoso sākire auiākani moianariakori atxaua, ininiā amoianatakakaua. Ikamaraā aūuiniā, Teoso arokaua Xesosi arēkaā. Imaktxakari ikinika maerekati akamakiti, kotxi imi Xesosi Kristo ipina ate īkapani. Iarēka xikepoakata ate maerekani imaktxakini īkapani.

⁸ “Na nota kamari maerekati,” aniniā, ateka misirienetaua. Ikara atoko aniniā, ate !imarotari atāo Teoso sākire aākixinireē. ⁹ Amaerekani Teosomoni asāpiretiniā, iua makatxakapitikari amaerekani. Oeretari ate ākixinire. Imaktxakari ikinipoko amaerekani. Ikamari ikara atoko, kotxi imaktxakaenetari amaerekani. Ikamapitikari ikamaenetakiti. Ikamapikari atāo. ¹⁰ “Uatxapiima maerekati !nikama,” pininiā, pitemoni Teoso sākire paxirari atxiīti? Kotxi Teoso txapekari kākiti: “Maerekati kamakari kākiti.” “Maerekati !nikama,” pininiā, !pimarotari Teoso sākire pākixinireē. !Pikamari Teoso sākire iaōka iuasaaki.

2

Kākiti Teoso Atāo Imarotakari

¹ Namariteni nota tiretakini atoko hītxaua hīte. Ikara niōkatsopata, maerekati himakamakani īkapani. Maerekati akamakasaaki, masāpiretari Xesosi Kristo. Aīri Teoso misākiretakari itxaua Xesosi. Atāo inakarinoka kamakari itxaua iua. Iua misākiretari Teoso ate īkapani, amaerekani imaktxakini īkapani. ² Iua makatxakari maerekati akamakiti. Kona ate maerekaninanini imaktxaka. Ipina ikini itixiti auakani maerekani imaktxakini īkapani.

³ Teoso paniātakiti akīpitiniā, atāo aimarotari Teoso. ⁴ Teoso paniātakiti makīpitakati, “Nota imarotari Teoso,” inakari, paxirari isākire. Ākixinireē !imarotari atāo inakari Teoso sākire. ⁵ Teoso sākire kīpitakari iteene taretari Teoso. Kininiāpa aimarotatari iua nakiti aniniāua? ⁶ Akamakiti ikiniōtika Xesosi kamakiti atokokana akaminiā, iuasaaki aimarotari Teoso nakiti aniniāua. “Teoso nakiti nitxaua,” pininiā, pikamariko Xesosi kamakiti atokokana.

Iteene Matiretakakaua

⁷ Nitiretakini, Apiananiri paniãtaua atiretakakiniua. Ia paniãtxi niõkatsopatakiti hĩtemoni, kona amaneriikani. Hĩkenakopiretapekari ikara paniãtxi merepitipanika Xesosi sãkire hĩkenakotakasaaki. Iuasaaki hĩkenakotari ikara paniãtxi hĩtiretakakiniua tĩkane. Ikara paniãtxi kitxakapirĩkari itxaua. Hĩkenakotapekari ikara paniãtxi. ⁸ Iuaritika ikara paniãtxi amaneri itxaua. Xesosi kĩpitari ikara paniãtxi, kotxi itiretari kãkiti. Hĩte apaka tiretari kãkiti, ininiã aimarotari ikara paniãtxi ereka inini. Ininiã ipiã napaãpota, kotxi kãkiti imaroãpotari atão Teoso sãkire. Atão inakari kãkiti imarotakasaaki, pokamarari atoko itxa kãkiti ãkixinireẽ.

⁹ “Pokamara naua,” pininiã, txamari iuasaaki pomanatari pitari Xesosi sãkire auiãkari, ikara atoko pininiã, uatxapiima ipiãã pauapanika. ¹⁰ Pitari Xesosi auiãkari pitiretiniã, pokamara pauapitika. Ininiã erekari pãkixinire, ininiãkara pãkixinireẽ auakari kona txĩkitakai maerekati pikamini. ¹¹ Pitari Xesosi sãkire auiãkari pomanatiniã, ipiãã auakari atoko pitxaua. Iuasaaki pitĩpokotapika ipiãã. !Pimarotari pisinimoni. Mõsiãreti atoko pitxaua, kotxi !apakata patamarauatini ipiã xika.

¹² Namariteni nota tiretakini, niõkatsopata hĩte ĩkapani, kotxi Xesosi makatxakapekari himaerekani, kotxi kãkiti maerekani makatxakakari itxaua.

¹³ Hĩte irĩtxiakoripekana, niõkatsopata hĩte ĩkapani, kotxi hĩte iteene imarotari Xesosi, itixi kamikosaaki auapeka inakari.

Hĩte ãtokoriakoripekana, niõkatsopata hĩte ĩkapani, kotxi homitikapekari Satanasi hĩtapararitika.

Namaritenipekana, niõkatsopata hĩte ĩkapani, kotxi himarotari aĩri Teoso.

¹⁴ Hĩte irĩtxiakoripekana, niõkatsopata hĩte ĩkapani, kotxi himarotari Xesosi. Itixi kamikosaaki auakaripeka itxaua.

Hĩte ãtokoriakoripekana, niõkatsopata hĩte ĩkapani, kotxi pataparari hãkixinire. Teoso sãkire auapika hãkixinireẽ. Homitikapekari Satanasi hĩtapararitika.

!Hinirekapiri Itixi Auakani Nireẽkiti

¹⁵ Itixi auakani nireẽkiti atoko inakari !hinirekape, kotxi ninoa nirekari maerekati ikaminina. Hĩtiretiniãri ninoa kamakiti, !hĩtiretari aĩri Teoso. ¹⁶ Maerekati kãkiti kamakiti ia atoko itxapaniko: Inirekarina maerekati iĩtona nireẽkiti ikaminina. Inirekarina maerekati okina nireẽkiti ikaminina. Iuikauana, katii ininiãuana. Iuikarina ikamakitina. Ikara maerekati kãkiti kamakiti potorika ĩkorapokoriti. Kona Teosomonikirini ikara. ¹⁷ Itixi xipokako. Ikinipoko tiitxi kãkiti nireẽkiti apaka xipokako. Kãkiti Teoso nireẽkiti kamakarirako !ixipoka. Auapininiika Teosokata.

Kristo Omanatakani

¹⁸ Namariteni nota tiretakini, itixi xipokini õti katanapananoka apoka. Kristo omanatakani auĩte apokako itixi xipokini õti apisa. Ikara himarotapeka. Uatxa Kristo omanatakani itomane apokapeka. Ikara atoko ininiã, aimarotari itixi xipokini õti takotepeka inini. ¹⁹ Ninoa Kristo omanatakani, mitxi atekata apotiitaua, Teosokata aãpotiitakasaakia. Txamari ninoa !auikari Xesosi sãkire ate auikiniri atokokana, ininiã ninoa sipe. Ninoa atão Xesosi sãkire auikaãkamako, atekata ikaikotapikamanako. Itakanapaua, kotxi ate auikari Xesosi sãkire. Ninoa !auikari.

²⁰ Teoso, erekarinoka kamakari, sikapekai hĩte Erekari Matamatakoti himoianari tĩkane. Ininiã hĩte imarotari atão inakari Xesosi sãkire. ²¹ Hĩte imarotari atão inakari Xesosi sãkire, iuaritika niõkatsopata hĩtemoni. Niokanatsopata hĩtemoni, kotxi himarotari atão inakari. Paxiene kamakari !imarotari atão inakari sãkiretxiti.

²² Natokopa itxa iua paxiene kamakari? Paxiene kamakari txari: “Xesosi kona Teoso mereẽkitini.” Kãkiti ikara atoko inakari Kristo omanatakari itxaua iua. Iua !inirekari aĩri Teoso. Imi apaka !inireka. ²³ “Xesosi kona Teoso ãkirini” inakari, na kaikota Teosokata. “Teoso ãkiripitikara Xesosi” inakarirako kaikotapitikako Teosokata.

²⁴ Hãuiritariko merepitipanika Xesosi sãkire hĩkenakotakiti kaikotini hãkixinireẽ. Ikara kaikotiniã hãkixinireẽ, Teoso ãkirikata hĩkaikotapikako. Aĩri Teosokata hĩkaikota apaka. ²⁵ Xesosi sikaenetapekaua aãuapininiika anini Teosokata.

²⁶ Niõkatsopata hĩte nõtãkikini ĩkapani, kotxi aua kãkiti Xesosi hĩtakanapini nireẽkani. ²⁷ Erekaru Matamatakoti, Xesosi sikakiti, auapanika hĩte ãkixinireẽ, ininiã hĩte na nirekari ãti koerekareri. Iua Erekaru Matamatakoti oerekai ikinipoko. Iua oerekakiti atãopitika. Kona paxieneni iua. Ininiã hĩkaikotako Xesosikata, Erekaru Matamatakoti oereẽkiti hĩkĩpitini.

²⁸ Ininiã namariteni nota tirketakini, himoianatapikariko Xesosi. Ininiã uaimoni ikanapiriãkasaaki, hĩpĩkarauatini !auari. Ininiã na hĩpẽtauata haõkitakasaakiri iua. ²⁹ Xesosi kamari atão inakarínoka. Ikara himarotapeka. Ininiãkara himarotari, kãkiti atão inakarínoka kamakani Xesosi anaakori ininiuana.

3

Teoso Anaakori

¹ Aĩri Teoso iteene tirketaua ate. Hĩxinikariko iua tiraõki. Iua iteene tirketaua ate, ininiã, “Namariteni,” itxaua ate. Ari, atãopitikara Teoso anaakori atxaua. Ninoa Teoso anaakori minakanuia !auikari Teoso anaakori aniniua, kotxi ninoa !imarotari Teoso. ² Nitirketakini, Teoso anaakori atxapekaua uatxa. Eereka !aimarotari kanatokoako atxapaniko. Ia aimarotapitika. Xesosi kanapiriãkasaaki, Xesosi atoko atxapekauako, kotxi iusaaki aãtamatariko iua. ³ Kãkiti ikara auiãkani, !inirekarina maerekati ikaminina, kotxi Xesosi !ikamari maerekati.

⁴ Maerekati kamakari !ikamari Teoso paniãtakiti. Amakamakanisaakiri Teoso paniãtakiti, iusaakipeka akamari maerekati. ⁵ Himarotari Xesosi apokapeka ĩkorapokoriti maerekati akamakiti imaktxakini ĩkapani. Xesosi !ikamari maerekati. ⁶ Kãkiti Xesosi ãtipirika moianatakari !inirekaikari maerekati ikamini. Iua ãtipirika maerekati kamakari !aõkitapanikari Xesosi. !Imarotapanikari Xesosi.

⁷ Namariteni nota tirketakini, !hãuiritapiri apanakini misirienetini hĩte. Atão inakarínoka kamakari kamapitikari Teoso nireẽkitinoka, Xesosi kaminiri atokokana, kotxi Xesosi kamari atão inakarínoka. ⁸ ãtipirika maerekati kamakari Satanasi nakiti itxaua, kotxi Satanasi kamapikari maerekati. Itixi kamikosaakipekara ikamaãpokatapitiporiri maerekati. Uatxa ikamapanikari. Teoso ãkiri apoka ĩkorapokoriti maerekati Satanasi parĩka ixipokini ĩkapani.

⁹ Teoso anaakori !inirekaikari maerekati ikaminina, kotxi Teoso aua ãkixinireẽna. Ininiã !iposotarina maerekati ikamaãpotinina, kotxi iritarina Teoso. ¹⁰ Ininiã kipa Teoso anaakori txataua? Atão inakarínoka kamakanira Teoso anaakori txaua. ãti tirketakanira Teoso anaakori txaua. Ininiã kipa Satanasi anaakori txataua? Erekaru makamakanira Satanasi anaakori txaua. ãti matirketakanira Satanasi anaakori txaua.

Kãkiti Tirketakiniua Pirena

¹¹ Matirketakakaua. Merepitipanika Xesosi sãkire hĩkenakotakasaaki, hĩkenakotari ikara õtãkipirenatxi, hĩtirketakiniua. ¹² Kaiĩ inakori atoko !hĩtxape. Maerekatinoka kamakari nakiti itxaua iua Kaiĩ. Satanasi nakiti itxaua. Kaiĩ okari atão itarika. Kixikapa okari? Ixikotiniri xika okapiri, kotxi itari kamari erekarínoka. Kaiĩ kamari maerekatinoka.

¹³ Nitariakori, Xesosi sãkire mauĩãkani omanatakasaakii hĩte, !hĩtsorĩkaãtapeko. “Kixikapa ninoa omanataua ate?” !hĩtxapeko, kotxi ikara atoko inakari apokapitikako.

¹⁴ Atirketiniãri aĩtariakori Xesosi sãkire auiãkani, aimarotari !apinaika. Aãuapininiika Teosokata. Matiraõkiti ãkixinire ipĩkari atoko itxa. ¹⁵ Kãkiti itari omanatakari, Xesosi sãkire auiãkari omanatakari, kokaniri atoko itxaua. Himarotari kokaniri !auari ãtipirika Teosokata.

¹⁶ Xesosi Kristo ipina amaerekani imaktxakini ĩkapani, ãtipirika Teosokata aãuini ĩkapani. Ikara oerekaua atão tiraõkitxi. Ininiã erekaru aĩtariakori atirketini. Xesosi

tiretiniua ate atokokana, erekari atiretiniri aītariakori. Atxiīti apina aītari mapinakani ĩkapani. ¹⁷ Pitii, pikiena pakini auiniāi, pitari, Teoso sākire auīākari tii, ikiena pakini mauakaniā, pisikariko iuamoni. Pimasikakaniāri iuamoni, Teoso tiraōki pākixinireē ! auari. ¹⁸ Namariteni nota tiretakini, “Apanakini ate tireta,” atxaua, txamari kaamoni inakasaakina na asikana minakati, ininiā na atāo atiretana. Atāo matiretana apanakini. Kaamoni inakasaakina, masikana ninoa amonitakitina.

Teoso Sākire Kĭpitakari

¹⁹ Ikara atoko akaminiā, aimarotari Teoso anaakori aniniāua. Aimarotari atāo inakari sākiretxiti akĭpitini. Ikara atoko akaminiā, erekapitakari aākixinire. Ikara atoko akaminiā, !apĭkari Teoso amisākiretini. ²⁰ “Kona erekano,” pininiā pākixinireē, mitxi pimaerekani pikamini xika, !pipĭkarauatape, kotxi Teoso iteene imarotai, iuaritika iteene iamoniāki. Poiāoka aimarotari aākixinireē auakari. Teoso imarotari ikinipoko.

²¹ Nitiretakini, pākixinireē: “Namanaāpekari Teoso imakinika nimaerekani imakatkakini,” pininiā, kataparaxinirepitikai Teoso pimisākiretini. ²² Ininiā iua sikaua aamanaākiti, kotxi ate kamari ipaniātakiti iaōka. Iua apokaerekatakatinoka akama. ²³ Teoso paniātaua ate: “Hāuikariko namarite Xesosi Kristo sākire.” Apaka Teoso paniātaua: “Hĭtiretakakauako.” Teoso paniātaua ikara akamini. ²⁴ Teoso sākire iaōka kamakari kaikotapika Teosokata ātipirika. Teoso kaikotapika iuakata ātipirika apaka. Aimarotari Teoso kaikotini atekata, kotxi iua sikaua Erekari Matamatakoti aākixinireē auini ĩkapani.

4

Atamakaerekarauatini

¹ Nitiretakini, !hāuikapiri ikinimane kākiti sākire, “Erekari Matamatakoti aua nota ākixinireē,” inakani. Hātaerekatanako ninoa. Atāo Erekari Matamatakoti auatana atxiīti ākixinireēna? Atxiīti matamatakoti ākixinireēna auakari kona Teosomoni ĩkarini. Ito-maneri kākiti, “Nota Teoso sākire sāpiretakarino,” inakani, txamari na atāo ninoa sākire. Kākiti ninoa atoko inakani aua ikini itixitika. !Isāpiretarina atāo Teoso sākire. Imisirienerarina kākiti. ² Kākiti sāpiretiniāua: “Teoso ākiri Xesosi Kristo apokapeka ĩkorapokoriti. Kākitipeka itxaua,” ininiā iusaaki aimarotari Erekari Matamatakoti auapitika iua ākixinireē. Ikara atoko aimarotari Erekari Matamatakoti Teoso sikakiti auaĭtotiniri kākiti. ³ Kākiti sāpiretiniāua: “Xesosi na atāo kākiti !itxaua,” ininiā iusaaki aimarotari Erekari Matamatakoti !auari iua kākiti ākixinireē. Matamatakoti iua kākiti ākixinireē auakari Satanasi nakiti itxaua. Kristo omanatakari nakiti itxaua. Iua Erekari Matamatakoti Teoso nakiti itxaua. Hĭkenakopiretapekari: “Maerekati Matamatakoti Kristo omanatakari iokanatakiti apokapitikako ĩkorapokoriti,” itxa. Uatxa apokapeka.

⁴ Hĭte namariteni, Teoso nakitiakori hĭtxaua. Ininiā hĭte !auikari atāo minakati sāpiretakani sāpiretakiti, kotxi Erekari Matamatakoti hĭte ākixinireē auakari apia posotireri itxaua iua. Maerekati matamatakoti, Xesosi sākire mauīākani ākixinireē auakari, kaposotiireri itxaua, iuaritika Erekari Matamatakoti hĭte ākixinireē auakari apia sikaimaroretai hĭte. ⁵ Ninoa atāo minakati sāpiretakani xinikakiti, itixi auakani xinikakiti atokotxikana, ininiākara itixi auakani auikari ninoa sākire. ⁶ Atepekana, Teoso nakitiakori atxaua. Teoso imarotakari auikari asākire. Teoso nakiti minakatiua !auikari asākire. Ininiākara aimarotari kākiti Erekari Matamatakoti auaākixiniretakini. Iua Erekari Matamatakoti atāonoka isākiraauata. Aimarotari kākiti āti matamatakoti auaākixiniretakini. Iua āti matamatakoti kamisirienereri itxaua.

Teoso Tiraōki

⁷ Nitiretakini, matiretakakaua, kotxi tiraōkitxi Teosomoni potoriakari itxaua. Kati-raōkirini Teoso anaakori itxauana. Ninoa atāo imarotari Teoso. ⁸ Matiraōkiti !imarotari Teoso, kotxi Teoso tiraōkiuatapika. Tiraōkitxi Teosomoni potoriākari itxaua. ⁹ Teoso iokanataru imatonōkari imi atemoni, Teosokata ātipirika aāuini ĩkapani. Ikara atoko ininiā, Teoso oerekaua itiretiniua. ¹⁰ Ikara tiraōkitxi atāo inakari itxaua. Mitxi ate !atiretari

Teoso. Iuaritika iua tiretaua ate, ininiã iokanatarimi imi atemoni ipinini ïkapani, maerekati akamakiti imaktxakini ïkapani.

¹¹ Nitiretakini, ikara atokorako itxa Teoso tiretiniua, ininiã matiretakakaua. ¹² !Auari Teoso atamatakari, iuaritika Teoso auari aãkixinireë, atiretakakiniãua. Ininiã Teoso oerekaua atão atiraõkiuatini.

¹³ Aimarotari Teosokata akaikotini ätipirika. Aimarotari Teoso ätipirika kaikotini atekata. Aimarotari ikara atoko inakari, kotxi iua sikari Erekarim Matamatakoti atemoni. ¹⁴ Aãtamatapekari Xesosi kamakiti. Akenakotapekari isãpiretakiti. Ininiã asãpiretari ikini-manë, aãri Teoso iokanatarimi imi kãkitimoni, amaerekani makatxakakari ininiua ïkapani, kãkiti ätipirika Teosokata auini ïkapani. ¹⁵ “Xesosi Teoso äkiripitikara,” ina sãkiretakani, Teoso kaikotapika ninoakata. Apaka ninoa kaikota Teosokata ätipirika. ¹⁶ Aimarotari Teoso tiretiniua. Aãuikapiretapitikari Teoso tiretiniua.

Teoso tiraõkiuatapika. Kãkiti katiraõkiri kaikota Teosokata ätipirika. Teoso kaikota ätipirika iuakata apaka. ¹⁷ Teoso oerekepekaua atão atiraõkiuatini iua tiraõkiuatini atokokana. Ininiã kataparaxinireua Kristo apisatoõ aãpokasaaki, kãkiti misiritiko õtisaaki. Aimarotari !imisiritaua iuasaaki, ininiã kataparaxinireuako, kotxi ïkorapokoriti aãuakasaaki Kristo atoko atxaua. ¹⁸ Atiraõkiuatakasaaki, !apïkarauata. Atão atiraõkiuatiniã, !auari apïkare. Apïkarauatakasaaki, amaãkaua.

¹⁹ Atiretari Teoso, kotxi mitxipeka iua tiretaua ate. ²⁰ Iua itari omanatakari, “Nota tiretari Teoso” ina sãkiretakari, paxirari isãkire. !Itiretari itari iuakata auakari. Ininiã !iposotari itiretiniri Teoso imaõkitakiniti. ²¹ Ininiã Teoso paniãtaua: “Teoso tiretakari tiretariko itari apaka.”

5

Teoso Äkiri Auikiko

¹ Xesosi Teoso mereëkiti itxaua. Ikara auiaãkani Teoso anaakori itxauana. Aãri Teoso atiretiniã, aãtariakori apaka atireta, kotxi Teoso anaakori ninoa apaka txaua. ² Teoso atiretiniã, inireëkiti iaõka akaminiã, aimarotari Teoso anaakori apaka atiretini. ³ Teoso atiretiniã, akïpitari ipaniãtakiti. Aposotari akaminiri ipaniãtakiti, kotxi na kamimari ipaniãtakiti. ⁴ Aposotari akaminiri iua paniãtakiti, kotxi iua anaakori atxapekaua, ininiã isikataparataua, maerekati itixi auakani nireëkiti amakamakani ïkapani. Kininiãpa isikataparataua maerekati ninoa nireëkiti amakamakani ïkapani? Isikataparataua, kotxi Xesosi sãkire aãuika. ⁵ Kipa posotatari maerekati itixi auakani nireëkiti imakamakani? Kãkiti auikiniãri Xesosi Teoso äkiri ininiãua, iuanokara posotari maerekati imakamakani.

⁶ Xesosi Kristo Teoso äkiri itxaua. Teoso oerekepekaua Xesosi iua äkiri ininiãua. Kãuaãriã Xesosi patxisatikosaaki isãpiretaua. Iuaãkana Teoso sãpiretaua Xesosi iua äkiri ininiãua, Xesosi ipïkasaaki iarëka ixikepoatakasaaki. Teoso sãpiretaua kona Xesosi patxisatikosaakinanini. Iua oerekaua Xesosi Teoso äkiri ininiãua ipïkasaaki apaka. Erekarim Matamatakoti sãpiretaua Xesosi Teoso äkiri ininiãua. Iua atãonoka isãkire. ⁷ Teoso tixini auakani ipi, äti pakini oerekaua Xesosi Teoso äkiri ininiãua, aãri Teosoma, “Teoso Sãkire” inakorima, Erekarim Matamatakotima pakini. Naia ipi, äti pakini ätinoka. ⁸ ïkorapokoriti auakani ipi, äti pakini, Erekarim Matamatakotima, Xesosi patxisatikoma, Xesosi ipinin-ima pakini oerekaua Teoso äkiri ininiãua Xesosi. ⁹ Kãkiti erekarini sãpiretakiti aãuikapitika, ininiã apiata maãuikari Teoso sãpiretakiti, kotxi atãonoka isãkire. Iuara sãpiretaua Xesosi iua äkiri ininiãua. ¹⁰ Teoso äkiri auiaãkari äkixinire imarotari ikara Teoso sãpiretakiti atão inini. Teoso sãpiretakiti mauiaãkati txari: “Paxirari Teoso sãkire,” kotxi !auikari Teoso sãpiretakiti Xesosi iua äkiri ininiua. ¹¹ Kiripa Teoso sãpiretaua? Iua sãpiretaua: “Nitxïkitakai auãki hinini notakata hãuapininiika hinini tïkane. Ikara atoko nitxïkitakai namarite nakitiakori hinakasaakia.” ¹² Iua Teoso äkiri nakiti Teosokata ätipirika auako. Iua Teoso äkiri nakiti minakatiua, !aupani ätipirika Teosokata.

Aãuini Ātipirika Anini Tĩkane

¹³ Hĩte auikari Xesosi Teoso ākiri ininiua. Niokanatsopata hĩtemoni, Teosokata ātipirika hãuini himarotini ĩkapani. ¹⁴ Teoso nireēkiti atokotxikana aamanainiãri Teoso, aimarotari ikenakotari amisākiretiniri, ininiã kataparaxinirepitikaua amisākiretiniri, kotxi aimarotari iua apakapapiretapitikaua. ¹⁵ Ikara atoko aniniã, aimarotari ikenakotari aamanaãkiti, ininiã isikapitikaua.

¹⁶ Himarotakasaakiri pitari kaminiri maerekati, himisākiretari Teoso iua ĩkapani. Ininiã Teoso makatxakari maerekati ikamakiti. Teoso kamari iua ātipirika iuakata auini ĩkapani. Ikara maerekati makatxakiko auapitika, ininiã kona itxĩkitakari iua xinire ipinini. Ātiã maerekati kãkiti kamakiti aua. Ikara maerekati makatxakiko ! auari, ininiã itxĩkitakari kãkiti xinire ipinini. Nota !õtãkikai himisākiretiniri Teoso ikara atoko inakari maerekati kamakari ĩkapani. ¹⁷ Teoso paniãtakiti amakamakaniã, iuara maerekati txaua. Iuaritika aamanainiãri Xesosi ikara maerekati imakatxakini, ininiã ikara maerekati !itxĩkitakari kãkiti xinire ipinini.

¹⁸ Teoso anaakori atão inakani !inirekaikari maerekati ikaminina. Aimarotari ikara. !Inirekaikarina maerekati ikaminina, kotxi Teoso ākiri nĩkatana ninoa. Ininiã maerekati auĩte Satanasi !iposotari imisiritinina.

¹⁹ Ikini itixiti auakani auĩte itxaua Satanasi, maerekati kamakari. Iuaritika aimarotari Teoso anaakori aniniua ate.

²⁰ Aimarotari, Teoso ākiri apokapeka ĩkorapokoriti. Aimarotari iua sikaua imarore, ininiã aimarotari Teoso atão inakari. Akaikota iua atão inakarikata. Ari akaikota imi Xesosi Kristokata. Teoso atão inakari itxaua iua. Itxĩkitakaua iuakata ātipirika aãuini.

²¹ Namariteni, nota tirketakini, !hĩteosonetapiri Teoso minakatiua. Ameẽ.

2 XOÃO

Iuaĩkana Xoão Iokanatsopatakiti

¹ Nota Xoão, mitxipe Xesosi imarotakarino nota. Niokanatsopata hĩte Xesosi sãkire auiãkanimoni, hamariteakorimoni apaka. Teoso mereẽpekai hĩte inakitiakori hininiua ĩkapani. Nitiretai, kotxi hĩtiretari Teoso sãkire atão inakari. Kona notananini tiretai hĩte. Ikinimane atão inakari imarotakani tiretai hĩte apaka. ² Atiretai hĩte, kotxi atão inakari aua aãkixinireẽ. Atão inakari kaikotapika atekata ãtipirika.

³ Aĩri Teoso, imi Xesosi Kristo pakini sikari ikinipoko erekari hĩtemoni. Amonĩkai hĩte. Ikamaerekaxiniretaina hĩte. Ininiãkara himarotari atão inakari. Himarotari Teoso tiraõki.

⁴ Iteene nipoxokoniua, kotxi nimarotari apanakini hĩte kĩpitapikari Teoso sãkire. Atão inakarınoka hĩkama, kotxi aĩri Teoso paniãtaua ikara atoko inakari akamini.

⁵ Nota tiretakini, ia nipaniãtai: “Matiretakakaua.” Ikara Teoso paniãtakiti !amanerini. Akenakopiretapekari ikara Teoso paniãtakiti, merepitipanika Xesosi sãkire akenakotakasaaki. ⁶ Kisaakipa atiraõkiuata? Teoso paniãtakiti ikiniõtika akĩpitakasaakira, iusaaki atiraõkiuata. Merepitipanika pikenakotapekari ia Xesosi paniãtakiti: “Matiraõkiuata ikiniõtika.”

Kristo Omanatakani

⁷ Kaiãopokori kamisirienererini aua ikini itixiti. Ninoa sãkire: “Na kãkiti !itxaua Xesosi Kristo,” itxana isãkirena. Ikara atoko inakani misirienetari kãkiti. Kristo omanatakani itxauana ninoa. ⁸ Erepaniko. !Hãuikapiri isãkirena atão minakati, kotxi ninoa nirekari ixipokinirina hĩparĩka Teoso ĩkapani. Hinirekapitikari Teoso sikinii ikinipoko hĩparĩka ĩki.

⁹ Kãkiti takanapiniãri Kristo oerekakiti sãkiretxiti, ikamari maerekati. Teoso nakiti ! itxaua. Kãkiti ãtipirika auikiniãri Kristo oerekakiti, imoianatari aĩri Teoso, imi pakini.

¹⁰ Kãkiti apokiniã paapoko, Kristo oerekakiti mauikakati, sãkiretxi atão minakati oerekakari, kona paunitapiri ikaikotini paapoko. !Papakapapiri iua. ¹¹ Iua apakapakari apaka kamari maerekati iuakata, kotxi auiritari atão minakati isãpiretini.

¹² Ninirekari ito nisãpiretinii, txamari !ninirekari aãtsopaã nisãpiretakiti nitakini. Ninirekari naõkitinii hĩte. Iusaaki asãkirauatako aãpisatoõtakakiniua, ininiã iteene apoxokoniua iusaaki.

¹³ Hĩtariakori Teoso mereẽkini uai auakani iokanapireta hĩtemoni. Ixinikamanapitaina hĩte. Ameẽ.

3 XOÃO

Iuaĩkana Xoão Iokanatsopatakiti

¹ Nota Xoão, mitxi Xesosi imarotakarino, niõkatsopata pite nitiretakiti Kaiomoni. Nitiretai pite, kotxi pite tiretari atão inakari Teoso sãkire.

² Nitiretakiti, ninirekari ereka pinini pauini. Nimarotari pãkixinire ereka inini. Iua atokotxikana ninirekari piito ereka inini pimamianareni ãkapani. ³ Aĩtariakori mitxi hĩtemoni nota iokanatakini, apokapeka uai. Isãpiretanona pite iteene auikiniri atão inakari Teoso sãkire. Ikiniõtika pikamari Teoso sãkire iaõka. Atãonoka pikama. Ininiã ninoa minapiretakiti iteene kamapoxokonitano. ⁴ Namariteni atoko hĩtxaua, ininiã nikenakopiretakasaakiri ikiniõtika hĩkaminiri atão inakari Teoso sãkire iaõka, nipoxokoniata. Ikara atoko inakari minapirenatxi, ninoa minapiretakiti, apia kamapoxokonitano nota.

⁵ Nitiretakiti peerekai pite, kotxi ikiniõtika pimoianatana aĩtariakori ereẽ apokakani. Mitxi !pimarotana ninoa, iuaritika pimoianatana. ⁶ Ninoa aĩtariakori sãpiretapekari pitiraõki Xesosi sãkire auiaãkanimoni uai auakanimoni. Paapoko iuaĩkana ipotorikasaakina, erekari ninoa amonitakiti pisikinina, kotxi Teoso apokaerekatari ikara atoko pitiretinina. ⁷ Ninoa takanapari aapokona Xesosi sãkire isãpiretinina ãkapani. Xesosi sãkire mauiaãkani !isikana iamonitakitina ninoamoni. ⁸ Ininiãkara maãpakapana Xesosi sãkire sãpiretakani aãuapokoã. Ininiã amoianatana Teoso sãkire atão inakari iaripiretini ãkapani.

Txiótepi, Temétxio Pakini

⁹ Niõkatsopatapeka Xesosi sãkire auiaãkanimoni ereẽ pauiniãtaã auakanimoni. Txamari Txiótepi inakori !ikĩpitari nõtãkikare. Iua iuikapikaua. Inirekari ninoa auĩtetiniri iua, ininiã !imaãkatari nisãkire. ¹⁰ Iua kamapiretapikaua ate. Kona ikarananini ikama. Apaka !apakapana aĩtariakori, hĩtemoni sikani. Apaka !auiritana apanakini apakapinina ninoa. !Auiritaikari aĩtariakori nirekaãkani apotiitiniua Teoso misãkiretiko aikotiã. Ereẽ napokasaaki, iusaakiko nisãpiretai hĩte iua apisatoõ ikinika maerekati ikamakiti.

¹¹ Nitiretakiti, !pikamapiri maerekani kamakiti atoko. Erekarini kamakiti atoko inakarananira pikamako. Erekarini kamakari Teoso nakiti itxaua. Maerekati kamakari limarotari Teoso.

¹² Temétxio inakoripekana, ikinimane sãpiretari iua ereka inini. Atão inakari Teoso sãkire oerekaua Temétxio kamakiti atão inini. Ate apaka sãpiretari iua ereka inini. Himarotari atão inakaranoka asãpireta.

¹³ Ninirekamari ito nisãpiretinii, txamari !nininirekari aãtsopaã nisãpiretakiti nitakini.

¹⁴ Ninirekari paĩtiki naõkitinii pite. Iusaaki asãkirauatako aãpisatoõtakakauako.

¹⁵ Ninirekari Teoso kamaerekaxiniretinii. Aĩtariakori uai auakani sãpiretai ixinikamanapitinii. Pisãpiretana ikinikana aĩtariakori ereẽ auakani, axinikamanapitinina ninoa.

XOTA

Xota Iokanatsopatakiti

¹ Nota Xota. Xesosi Kristo nitiri amotakori nitxaua. Txiako itari nitxaua. Niokanatsopata kăkitimoni, Teoso akiritakinimoni, Teoso aïri turetakinimoni. Xesosi Kristo nĭkatakiniimoni niokanatsopata.

² Teoso iteene amonĭkai. Iteene ikamaerekaxiniretai. Iteene itiretai.

Atăo Minakati Oerekakani

³ Hĭte nota turetakinini, Xesosi makatxakapekari himaerekani, nota maerekani apaka. Ninirekamari niĭkatsopatiniri amaerekani makatxakiko pirena hĭtemoni. Iuanoka ninireka niĭkatsopatini, txamari nixinikari erekape atĭăo niĭkatsopatini. Ninirekari nĭtăkikinii. Teoso oerekakiti săkiretxiti inakitiakorimoni isikakiti hinĭkaenetariko. Teoso oerekakiti ikinika isikapekari inakitiakorimoni. !Hăuiritapiri apanakini koketiniri ikara ninoa oereĕkitikata. ⁴ Hĭte Xesosi săkire auĭăkani sauaki aua Teoso mapaxitakani. Merepanika ninoa apotiitakasaakiua hĭtekata, Ihimarotari kamisirienererini ininiuana. Ninoa koketari isăkirena Teoso săkirekata. Ninoa săkire: “Ate sirĭka anireĕkitokata, kotxi Teoso katiraĭkiri, ininiă iua !imisiritaua.” Ikara atokora itxana ninoa. Xesosi Kristonokara aăuĭte. Apiananiri itxaua. Iuaritika ninoa !inirekari Xesosi. Kitxakapirĭka Teoso săkire iĭkatsopatakori săpiretari Teoso misiritiniri kăkiti ninoa atoko inakani.

⁵ Kitxakapirĭka Exito tixini auakani misiritana Xoteoakori. Himarotapekari ikara inakari. Ninirekari iuaĭkana hĭxinikiniri ikara inakari pirena. Teoso moĭanatana Xoteoakori, ininiă ninoa miteka, Exito tixini osipikinina ĭkapani. Hĭxinikariko ia: Teoso makatxakana ninoa iuasaaki imapinakanina ĭkapani, iuaritika mapa kasiriti napa atoko Teoso okana ninoa iua săkire mauĭăkani.

⁶ Atĭpekana nisăpiretai. Hĭxinikariko Teoso nitiriakori iaxitikini kitxakapirĭka. Teoso txĭkitakana ninoa auĭtetxi ininiuana, txamari !inirekaikarina Teoso paniătakiti ikaminina, ininiă itakanaparina auĭniătaăna Teoso tixineĕ. Hĭxinikariko ia: Teoso paniătana ninoa ipiaă ikaikotinina atĭpirika. Itixi xipokini otisaaki Teoso misiritanako ninoa.

⁷ Atĭpekana nisăpiretai. Hĭxinikariko Sotoma sitatxiti, Komoha sitatxiti, apanakini sitatxiti apaka iuaătaă takote auakari. Iuaă auakani !inirekari Teoso paniătakiti ikaminina, ninoa Teoso nitiriakori atokokana. Maerekatnoka inirekapikana, kiki sirĭkini atĭ kikikata. Ininiă Teoso xipokari iuaă auakari sitatxiniri. Ninoa maerekani xika Teoso iokanatanana ninoa arikatxi maxipokatimoni. Iuaă imisirităăkapikana. Ikara otăkikaua maerekati amakamakani tĭkane.

⁸ Ninoa maerekati kamakani, kamisirienererini hĭte sauaki auakani, kitxakapirĭkarini atokokana itxana. Ixiniăkitina maerekati xika ninoaka ĭto imisiritauana. !Inirekarina Teoso ninoa auĭte ininiuana. Imisăkirepiretarina Teoso nitiriakori iaxiti auakani. ⁹ Mikeo inakori Teoso nitiriakori auĭte itxaua, iuaritika !imisăkirepiretari atĭ Teoso nitiri iaxitikiri. Kitxakapirĭka iua Mikeo Satanasikata itaparakienatakakaua, kotxi Mikeo nirekari Moisesini ĭto ikatini, txamari Satanasini nirekari Moisesini ĭto iua inakiti ĭkapani. Iuasaaki Mikeo !imisăkirepiretari Satanasini. Ianoka isăkire: “Teoso misiritapanikaiko pite,” itxari Satanasini. ¹⁰ Txamari ninoa kamisirienererini hĭte sauaki auakani misăkirepiretari ikinika imimarotakinitina. Ninoa ĭkĭte kaxipiri ĭtopa auakani ĭkĭte atokokana, kotxi ikamarina ĭtonani nireĕkiti. Ikara ĭkĭtena xipokanako ninoa.

¹¹ Teoso misiritanako ninoa. Kitxakapirĭka Kaiĭ inakori kamari maerekati. Iua maerekani atokokana ninoa maerekani. Kitxakapirĭka Paraăo inakori kamari maerekati txineiro apakapini ĭkapani. Iua maerekani atokokana ninoa maerekani. Kitxakapirĭka Koree inakori !inirekari Moisesini iauĭte ininiuana. Iua atokokana ninoa ! inirekari Teoso iauĭtetini. Ininiă ixipokaăkanako Koree xipokiko atokokana.

¹² Hāpotiitakasaakia hinipokotini ĩkapani, ninoa kamisirienererini apaka nipokota hĭtekata. !Ipĕtauatana. Itxikotarina iua kiiniri imaerekanina xika. Ninoaka itiretaua. !Itiretarina apanakini. Ītima anikari katxiāri iaxitikiri, ininiā katxiāri napiniātaā āparaā kipa, takari aneini ĩkapani. Txamari ninoa kamisirienererini katxiāri āki āparaā mauakiniti atoko itxa. !Erekana kākiti ĩkapani. Mitaāsaaki aua txipokori, txamari ninoa kamisirienererini mitaāsaaki aamina mariti atokokana ninoa. Aamina mariti ipĭkari atoko, kotxi !iminaua. Ninoa iua atokokana, kotxi !ikamari erekari. Aamina mariti tokaāka. Ikotsa maporokaāka, ininiā atāo ipĭkari itxaua. Ninoa kamisirienererini ikara aamina atoko, kotxi ipinanako. !Ikaikotana Teosokata ātipirika.

¹³ Potxoari uiniti tsakati pamonōkoniri atoko itxa ninoa kamisirienererini. Tsakati sori txiko atoko itxa ninoa maerekani. Iōriki atoko itxana. Iua iōriki sinimoni ! kimarotikori. Ninoa sariko ipiāmoni ātipirika ikaikotinina ĩkapani. Teoso mereēri ikara ipiātaā ninoa auini ĩkapani.

¹⁴ Kitxakapirĭka Enoki inakori sāpiretapekari kamisirienererini pirena. Iua Enoki Adāo apika mekaniri apika mekaniri itxaua. Enoki txari:

Hātamariko. Apiananiri apokako itiximoni itomaneri inakitiakorikata. Mio, apikomoni mio, apikomoni mio, itxaāpokata inakitiakori iuakata ĩkani.

¹⁵ Iua ikinipoko misiritiko sāpiretakari itxaua. Iua apokasaaki, isāpiretanako maerekati kamakani misiritiko, Teoso manireēkani misiritiko, kotxi Teoso !ipotxitari ninoakamakiti. Ninoa misākiirepiretapikari Teoso. Ninoa maerekani xika, Teoso imanirekakanina xika, imisiritaākanako, itxa Enoki sāpiretakiti kitxakapirĭka.

¹⁶ Ninoa kamisirienererini ātipirika tsoatapika. Ātipirika apoĭtapikana apanakini. Iĭtona nireēkitinanira ikamana. Iuikauana. “Peerekai pite,” itxana ātimoni inireēkitinani apakapinina ĩkapani.

Ōtākipirenatxi

¹⁷ Nitiretakini hĭxinikariko aāuĭte Xesosi Kristo iokanatakini sāpiretakiti akokaxiti.

¹⁸ Ninoa txai: “Xipokatxi ōti kaimapeka inini manapi apokanako kikiakori hĭte napetakani tĭkane. Ninoa kamariko ninoaka nireēkiti, Teoso manireēkiniti,” itxana Xesosi Kristo iokanatakini sāpiretakiti. ¹⁹ Ninoa maerekani xika kākiti txitakakaua. Ninoa kamisirienererini kamari iĭtona nireēkitinoka. Erekari Matamatakoti !auinana ninoa.

²⁰ Hĭtepekana nota tiretakini, iteene hāuikapikariko Teoso oereēkiti. Ikara atoko hininiā, kataparaxinireiko hĭte. Hāuikariko Teoso oereēkiti, kotxi Teoso sākire itxaua. Himisākiretariko Teoso. Erekari Matamatakoti oerekai atāo hĭsākirauatini ĩkapani.

²¹ Maerekati kamakanii, iuaritika aāuĭte Xesosi Kristo !imisiritai. Iua anikai ātipirika iuakata hāuini ĩkapani. Ikara hiātapakasaaki, ātipirika hĭxinikapikariko Teoso tiraōki hĭte ĩkapani. !Hĭtakanapapiri iua.

²² Apanakini !auikapanikari ikinika Teoso oereēkiti, iuaritika !hĭtxitapena. Himoiatanako ninoa iteene auikiniri ĩkapani. ²³ Pamonōkoniri, kākiti kamakasaakiri maerekati. Xamina tirinakari atoko itxa imisiritikona imaerekanina xika. Ininiā hĭsāpiretanako Teoso sākire, imisiritikona apokini apisapanika. Xamina tirinakari āki katxakakari pimakatxakini atokokana itxa, pisāpiretakasaakiri Teoso sākire ninoamoni. Apanakinipekana hiamonĭkako. Hiamonĭkasaakina, erepaniko, kotxi pamonōkoniri ninoamaerekani. Homanatariko maerekati ninoa kamakiti, hĭte makamakaniri ĩkapani.

Peerekari Teoso

²⁴ Teoso kaposotiireri nĭkataua maerekati amakamakani ĩkapani. Iua anikaua iua apisatoō apoxokoniritika. Iuasaakiko amaerekani !auaikako. Peerekari aāuini iua apisatoō. ²⁵ Āti Teoso !auari. Iuanokara Teoso txaua. Iuanokara kimaroreri. Amaerekani makatxakakari itxaua, kotxi aāuĭte Xesosi Kristo ipina ate ĩkapani. Iua

iotximere aua, kotxi imaerekani !auari. Auñtetxiakori auñte itxaua iua. Kaposotiireri iua. Iposotari ikinipoko ikamini. Itixi kamiko apisapanika ikara atoko itxa Teoso. Uatxa ikara atoko itxapanika Teoso. Ikara atoko itxapikako ãtipirika Teoso. Ameẽ.

APOKORÍPISI Xesosi Kristo Iuaka Oerekiniua Pirena

Ia Aãtsopa Oerekaua Xesosi Kamakiti

¹ Ia aãtsopa oerekari Teoso nakitiakori Xesosi Kristo paĩtiki kamaenetakiti. Teoso iokanatari inítiri iaxitikiri Xoãomoni Xesosi Kristo kamaenetakiti oerekini ĩkapani. ² Ikinika Xoão atamatakiti, ikinika ikenakotakiti pakini isãpireta ia aãtsopaã. Ikara atoko isãpiretaua ate Teoso sãkire, Xesosi Kristo sãpiretakiti iuamoni. ³ Ia aãtsopa atatsopatakani Teoso takariko erekari ninoamoni. Teoso takariko erekari ia isãkire kenakotakanimoni, ia isãkire kĩpitakanimoni, kotxi ikinika Xoão iõkatsopatakiti okatapaniri apokini.

Xoão Iõkatsopare

⁴ Nota Xoão. Niokanatari ia niõkatsopare Teoso mereẽkinimoni. Setxi sitatxiti Ásia inakori tixini auakanimoni niokanata niõkatsopare.

Teoso sikari ikinipoko erekari hĩtemoni. Ikamaerekaxiniretai hĩte. Uatxa iua aua. Merepitipanika kitxakapirĩka iua aua. Iua ãtipirika auapikako. Setxi matamatakoni iaxitikini Teoso topãkiniãtaã apisatoõ auakani sikari erekari hĩtemoni. ⁵ Xesosi Kristo apaka sikari erekari hĩtemoni. Atão inakaranoka sãpiretakari itxaua iua. Iua merepitipanika õkitikaua ipĩkani sauaki. Apaka itixi auakani auĩteakori auĩte itxaua iua.

Iua ate tiretakari. Ipinata ate ĩkapani amaerekani imakatzakini ĩkapani, ininiã isikakaua erekari akamini ĩkapani. ⁶ Itxĩkitakaua auĩtetxiakori aniniua. Itxĩkitakaua sasetotxiakori aniniua, kotxi asãkirauata Teosokata. Ininiã atxari Xesosi:

“Ãtipirika peerekai pite. Ãtipirika pitenokara kaposotiireri. Ameẽ.”

⁷ Hãtamata, Xesosi napani. Iua inako katxiãrikata. Iuasaaki ikinimane kãkiti atamatariko. Aamina ĩpiriãmitakari nopini iua tokakitakani apaka atamatariko iua. Iuasaaki ikini uãkati kãkiti atapariko iua. Ninoa atapakasaakiri iua, itxiapatana, akiripoakatana maerekati ikamakitina xika. Ikara atoko apokako. Ameẽ.

⁸ Apiananiri txari:

–Iõkatxi merepitipanika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Uatxa naua. Merepitipanika naua. Katana nota auapikako. Ikini posotiiretxi aua notamoni –itxa.

Xoão Atamatari Aĩtari Iaxitikiri

⁹ Nota Xoão, hĩtari. Nikamari Xesosi Kristo nireẽkiti, ininiã himoianari nitxaua, kotxi ãtipirika nimĩteenekari nimisiritiko, hĩte misiritiko himĩteenekini atoko. Ikara misirikaretxi apokapitika atemoni, kotxi aãũte Xesosi Kristo nakitiakori atxaua. Nota aua Patamosi inakori pokomiriĩti. Nitakaãka uai, kotxi Teoso sãkire nisãpireta apanakinimoni. Ikinipoko nimarotakiti Xesosi Kristo pirena nisãpiretini xika kãkiti takano nota uai. ¹⁰ Kãkiti Apiananiri xinikini õtisaaki, Erekari Matamatakoti sikaimaroretano nota. Iuasaaki nikenakotari sãkiretxi nitikinimoni. Sãkiretxi apiaenetakari, trõpeta atoko nikenakota. ¹¹ Itxari:

–Kãkiti apisapanika naua nota. Nota auapanika ikinipoko xipokaãka atoko. Piõkatsopata aãtsopaã patamatakiti tĩkane. Eereka piokanatari iua aãtsopa kãkiti Teoso mereẽkinimoni setxi sitatxiti auakanimoni Ásia tixineẽ. Piokanatsopata Épeso sitatxiti auakanimoni, Esimina sitatxiti auakanimoni, Pékamo sitatxiti auakanimoni, Txiatxira sitatxiti auakanimoni, Satxima sitatxiti auakanimoni, Piratéopia sitatxiti auakanimoni, Araotxiséia sitatxiti auakanimoni pakini –itxa notamoni.

¹² Ininiã eereka nikirioka notakata sãkirauatakari natamatini ĩkapani. Nikiriokasaaki, natamatari setxi tirikapi topãkini oro kamakori. ¹³ Tirikapi topãkiniãtaã, natamatari

kākiti itari iaxitikiri, iuaritika ipinimoni itxaua. Iua māka ōtanori. Ikitiāpeka apoka. Ipakiomatare atoko oro kamakoro aua itorotamoni. ¹⁴Iāko iteene kasarori mapoa atoko itxa. Xamina tirinakari atoko itxa oki. ¹⁵Ikiti mēkorīka pirōsi xamina āki imēkorīkini atoko. Isākire ene āparaā torōkani atoko. ¹⁶Iuako ikikomoni imaīkaro setxi iōriki. Inamaā iouata mitari pokīka. Iua iouata ipi uanaro aua. Atokatxi iotximere atoko itxa itoō.

¹⁷Natamatakasaakiri, nirika ikitimoni. Koriākari atoko nitxa. Ininiā iuasaaki itakari iuako ikikomnikiri nota nopini. Itxano:

—Kona pipīkarauatape, kotxi ikinipoko auini apisapanika nota aua. Ikinipoko xipokaāka atoko nota auapanika. ¹⁸Nota auākipika inakarino. Nota koriākaripekano, iuaritika hātamatano. Ātipirika auāki inakarino nota. Ameē. Kaposotiireno nota, kotxi nīpaniātari kākiti ipinini. Niposotiire aua niokanatiniri kākiti maerekati kamakani misir-itikoātaā. ¹⁹Piōkatsopatari mitxi patamatakiti, uatxaika patamatakiti pakini. Apikomoni noerekakiti apaka piōkatsopata, kotxi noerekaiko katana itiximoni īkari. ²⁰Kiripa ninoa iōriki setxi pakini niuako nikikomoni auakani? Teoso nitiriakori itxauana. Ninoa anikari nota sākire nisākire auīākanimoni ninoa setxi sitatxi auakanimoni. Kiripa ninoa setxi tirikapi topākini oro kamakori? Nisākire auīākani ninoa setxi sitatxi auakani itxauana —itxa Xesosi Xoāomoni.

2

Xesosi Iokanapirena Épeso Auakanimoni

¹Xesosi misākiretari Xoāo:

—Piokanatariko ia nisākire Teoso nitirimoni, Teoso sākire auīākanikata auakarimoni Épeso sitatxitiā:

Ninoa setxi iōriki maīkakarino nota. Nimaīkari ninoa iōriki niuako nikikomoni. Ninoa setxi tirikapi topākini oro kamakori sauaki tipokotakarino nota. Ia nota sākire. ²Nimarotari ikinika hīkamakiti. Nimarotari itori parīkatxi pamimari hīkama. Parīkatxi kamimari inakasaaki, kona hītakanapari. Maerekati kamakani apokasaaki hītemoni, kona hīte apakapana. Apokapeka apanakini kākiti hītemoni. Itxana: “Teoso iokanatakiniraua ate.” Txamari, kona atāo ninoa sākire. Nimarotari kona hīte auiritana ninoa kaminiri maerekati. Hīte atamakaerekatana. Eereka himarotari kona atāo ninoa sākire. ³Himisiritaāka nisākire hīsāpiretini xika, iuaritika himīteenekari ikinipoko nota īkapani. Kona hīsāpaka hīparīkauatini nota īkapani.

⁴Ikara hīkamakiti erekari, txamari hītakanapari hītiretinino. Merepanika hītiretano.

⁵Hīxinikariko merepitipanika hītiretinino. Uatxa poiāoka hītiretano. Iuaīkana hīkamariko merepitipanika hīkamakiti atoko. Himatakanapakaniāri ikara himaerekani, patimari napokini hītemoni. Nimakatzakariko hītirikapite topākini. Ininiā Teoso sākire auīākani !auaika ereē, himatakanapakaniāri ikara himaerekani. ⁶Auapitika atāo hīkamakiti, kotxi hīte omanatari Nikoraito inakoni kamakiti. Nota apaka omanatari ninoa kamakiti.

⁷Kakenakokii hīte, ininiā hīkenakotariko Erekari Matamatakoti sākire Teoso sākire auīākanimoni. Maerekati makamakati nauiritako amātiiri Teoso tixine apanīkaki auakari itximini. Iua amātiiri tximakari auapika ātipirika Teosokata, —itxa Xesosi Épeso auakanimoni.

Xesosi Iokanapirena Esimina Auakanimoni

⁸—Piokanatariko ia nisākire Teoso nitirimoni, Teoso sākire auīākanikata auakarimoni Esimina sitatxitiā:

Ikinipoko auini apisapanika nota aua. Ikinipoko xipokaāka atoko, nota auapanika. Nipīpe, iuaritika iuaīkana nōkitikaua. Uatxa !nipinaika. Ia nota sākire. ⁹Nimarotari hātatsiire. Nimarotari hīte minakati !auari. Iuaritika ikinipoko erekari aua hītemoni. Nimarotari apanakini misākirepiretinii hīte. Ninoa txa: “Xoteoakorira ate.” Txama

kona atão Xoteoni !itxauana. Ninoa apotiitiniãtaãua Satanasi nakiti. ¹⁰ Kona hĩpĩkapiri himisiritiko ĩkapani ĩkari. Satanasi takari apanakini hĩte kateia ãki ataerekatĩnii ĩkapani. Himisiritããkako tesi pakini õti. Atxiĩti hĩpina nisãkire hãuikini xika, iuaritika kona hĩtakanapapiri nisãkire hãuikini, ininiãkara nisikai ãtião saporĩeta. Iua saporĩeta apakapakari auapika ãtipirika Teosokata.

¹¹ Kakenakokii hĩte, ininiã hĩkenakotariko Erekarĩ Matamatakoti sãkire Teoso sãkire auĩãkanimoni. Maerekati makamakati kona iuaĩkana ikoriãika, –itxa Xesosi Esimina auakanimoni.

Xesosi Iokanapirena Pékamo Sitatxiti Auakanimoni

¹² Eereka Xesosi iuaĩkana misãkiretari Xoão:

–Piokanatariko ia nisãkire Teoso nitirimoni, Teoso sãkire auĩãkanikata auakarimoni Pékamo sitatxitiã:

Notamoni auari oa iouata ipi uana auakito. Ia nota sãkire. ¹³ Nimarotari ikinika hĩkamakiti. Nimarotari hãuiniãtaã. Ereẽ Satanasi kãkiti auĩte itxaua. Iuaritika hĩte auikari nota sãkire. Kona hĩte takanapari nisãkire hãuikini. ãtxipa inakori auama hĩte sauaki. Iua sãpiretapikari nisãkire kãkitimoni. Ikara xika okapeẽka ereẽ Satanasi auiniãtaã. Iuaritika kona hãsikano. !Hĩtakanapari nisãkire hãuikini.

¹⁴ Txamari auapitika hĩkerokakiti. Aua kãkiti hĩte sauaki Paraõo inakori sãkire auĩãkani. Kitxakapirĩka iua oerekari Paraki inakori kãkiti Isaeo auakani imisiriene-tini. Iua Paraki xika ikamarina maerekati, kotxi inikarina xinitxi teoso kamakori-moni sikakori. Oerekana kãkiti kaminiri maerekati ĩto nireẽkiti ãti kãkiti ĩtokata. ! Apakata kãkiti auikiniri Paraõo sãkire. ¹⁵ Hĩte sauaki aua kãkiti Nikoraito inakoni sãkire auĩãkani. Nota omanatari ninoa auĩãkiti sãkiretxiti. ¹⁶ Hĩtakanapariko ikinika himaerekani. Hĩkanapiriãko notamoni. Ikara atoko himakamakaniã, patimari hĩtemoni napokini. Ininiã nineenamauata maerekati kamakanikata mitaro iouataã ninamaã auakaroã.

¹⁷ Kakenakokii hĩte, ininiã hĩkenakotariko Erekarĩ Matamatakoti sãkire Teoso sãkire auĩãkanimoni. Maerekati makamakati nisikariko komiri iaxitikiri kipatakori. Apaka nisikariko kai kasarori maerekati makamakanimoni. Iua kai nopini iõkataãka kãkiti uãka amaneri apanakini mimarotakinini. Apakapakarinani imarotari iuãka amaneri, –itxa Xesosi Pékamo auakanimoni.

Xesosi Iokanapirena Txiatxira Auakanimoni

¹⁸ Eereka Xesosi iuaĩkana misãkiretari Xoão:

–Piokanatariko ia nisãkire Teoso nitirimoni, Teoso sãkire auĩãkanikata auakarimoni Txiatxira sitatxitiã:

Teoso ãkirirano nota. Noki xamina tirinakari atoko itxa. Nikiti mẽkorĩka pirõsi atoko itxa. Ia nota sãkire. ¹⁹ Nimarotari ikinika hĩkamakiti. Nimarotari hĩtiraõki. Nimarotari iteene hãuikari nisãkire. Nimarotari iteene hĩparĩkauata nota ĩkapani, apanakini ĩkapani apaka. Hĩparĩka nota ĩkapani pasãpaniri inakasaaki, iuaritika hĩkamapanikari nota ĩkapani. Uatxa apiaãpota hĩparĩka nota ĩkapani.

²⁰ Itxama, nisãpiretaiko hĩkerokakiti. Hĩte auiritaro sito, Xesapeo inakoro, maerekati okamini hĩte sauaki. Oa txa: “Teoso sãkire sãpiretakarono nota.” Otxama, omisiriene-tana ninitiriakori. Oa xika, ninoa kamari maerekati ĩtona nireẽkiti apanakinikata isirĩkinina. Apaka ninoa nikari nipokori teoso kamakori sikakori. ²¹ Niãtapari otakanapiniri omaerekani, txamari kona onirekarĩ otakanapiniri omaerekani. ²² Ininiã nota kamariko oa amianatini. Oakata sirĩkakani matakanapakaniãro, iteene ninoa atatsiirauata. ²³ Oa anaakori nokapitikako. Ikara atoko inakasaaki, ikinimane Teoso sãkire auĩãkani imarotariko nimarotari ikinika kãkiti ãkixinire, ikinika ixinikakiti pakini. Ininiã erekari nisikako erekari kamakanimoni. Apaka nimisiritari maerekati kamakani. Hĩkamakiti iaõka niĩkitxitai hĩte.

²⁴ Uatxa nimisãkiretai hĩte apanakini Txiatxira sitatxiti auakani. Hĩte auikari Teoso sãkire. Hĩte !auikari Xesapeo sãkire. Hĩte kona apaiaõkari Satanasi oerekakiti, iua

imarore. Kona ninirekari nisikinii apikomoni parĩkatxi nota ĩkapani, kotxi uatxa iteene hĩparĩkauata nota ĩkapani. ²⁵ Ianoka ninireka hĩkamini. Hĩte auikari nisĩkire, ininiã hãuikiniritika nisĩkire, nikanapiriãko.

²⁶ Iua maerekati makamakati, ãtipirika nipaniãtakiti kamakari, iuamoni nisikariko niposotiire itixi auakani auĩte ininiua. ²⁷ Teoso sãkire kitxakapirĩkari txari:

Auĩtetxi itxauako. Itapararitika ipaniãtana ninoa inireẽkiti ikaminina. Imakamaniãrina inireẽkiti, imisiritana ninoa, tiitxi kamakari tii imanirekakiniti ipakauanakini atoko.

Niri posotiire napakapakiti atoko iua apakapa. ²⁸ Apaka nisikariko iõriki ĩkanõkapanikero iuamoni, ininiã notaka nisikaua iuamoni, kotxi iua iõriki atoko nitxaua. ²⁹ Kakenakokii hĩte, ininiã hĩkenakotariko Erekaru Matamatakoti sãkire Teoso sãkire auĩãkanimoni,
–itxa Xesosi Txiatxira auakanimoni.

3

Xesosi Iokanapirena Satxi Auakanimoni

¹ Iuaĩkana Xesosi misãkiretari Xoão:

–Piokanatariko ia nisãkire ninitirimoni, Teoso sãkire auĩãkanikata auakarimoni, Satxi sitatxitiã:

Notamoni aua ninoa setxi Matamatakoni Teoso nakiti. Notamoni aua ninoa setxi iõriki. Ia nota sãkire. Nimarotari hĩparĩka. Apanakini sãpiretai hĩte auãki hinini hĩxinire, txamari Teosomoni koriãkanipekarai hĩte. ² Himereka. Araõkire hĩtxapaniko. Hĩsikataparitari erekari hãkixinireẽ auakari, kotxi iua erekari ipinaariãpota. Ininiã hĩtxĩkitakari iua erekari auãki inini iuaĩkana. Notamoni hĩparĩka Teoso apisatoõ na atão. ³ Hĩxinikariko hãpakapakiti, apaka hĩkenakotakiti. Hĩkĩpitariko hĩkenakotakiti. Hĩtakanapariko maerekati. Erekaru hĩkamako, kotxi kiĩtiriri apokini atoko napokako uai. Kãkiti kona imarotari kiĩtiriri apokini manapi. Ikara atokokana nitxako nikanapiriãkasaaki.

⁴ Hĩte Satxi sitatxiti auakani sauaki auapanika apanakini maerekati makamakani. Ninoa auikapitikari nisãkire. Ninoa kãkiti imãka matxikotakani atoko itxana. Ininiã notakata isanako. Imãkana kasarori. Ikara atoko nikaminana, kotxi ninoa kamari erekari nipaniãtakiti.

⁵ Maerekati makamakani ieretakariko mãkatxi kasarori. Kona noakapaniriko iuãkana naãtsopateẽ. Kãkiti iuãkana ikara aãtsopaã auakani ãtipirika auapikako Teosokata. Ikara atoko ininiã, nisãpiretari iuãkana nirimoni, initiriakori iaxitikini pakinimoni. Nitxana: “Nota nakitiakori itxauana ninoa.”

⁶ Kakenakokii hĩte, ininiã hĩkenakotariko Erekaru Matamatakoti sãkire Teoso sãkire auĩãkanimoni,
–itxa Xesosi Satxi auakanimoni.

Xesosi Iokanapirena Piratẽopia Auakanimoni

⁷ Iuaĩkana Xesosi misãkiretari Xoão:

–Piokanatariko ia nisãkire Teoso nitirimoni, Teoso sãkire auĩãkanikata auakarimoni Piratẽopia sitatxitiã:

Nota maerekati makamakatirano. Atão inakaranani sãpiretakarikarano nota. Kaposotiireri auĩtetxi Tavii inakori atoko nitxa, kotxi nota matakakakiti, kona ãti totari. Nota totakiti kona ãti matakakari. ⁸ Nimarotari hĩte parĩka. Hãtamata. Hĩparĩka nota ĩkapani aapokotxi tore matakakakori atoko itxa. Kona ãti posotari iseretiniri. Ininiã kãkiti !iposotari iotokakinii hĩte nisãkire hĩsãpiretini. Ikara atoko nikaminii hĩte, kotxi kona kataparai hĩte. Ikara atoko nikaminii hĩte, kotxi hĩkĩpitari nisãkire. Kona hĩkipatari nisãkire apanakini apisatoõ. ⁹ Apanakini txari: “Atão Xoteoakori atxaua.” Txamari Satanasi nakitiakori itxauana. Paxirari ninoa sãkire. Nikamariko ninoa

kapotoreëkiniãua hĩte apisatoõ. Iuasaaki ninoa txako: “Atãopitikara Xesosi turetapi-tikai.” ¹⁰ Hĩkĩpitapekari nisãkire. Kamonõkoniri inakasaaki, kona hĩtakanapari nisãkire, ininiãkara apia maerekati ikini itixiti apokasaaki, iuasaaki ninĩkataka hĩte. Iua maerekati kona misiritai hĩte. Iua maerekati apokako itixi auakani atamakaerekatini ĩkapani.

¹¹ Erepaniko, patimapaniriko napokini ereë. Ātipirika hĩkamariko erekari. Hĩtakanapapikariko maerekati. Ininiã iuasaaki āti kona posotari imakatzakiniri auĩtetxi saporietane hĩtemoni nisikakiti. !Imakatzakarina ikara hĩparĩka ĩki. ¹² Nikamariko maerekati makamakati itĩkare mina atoko inini niTeosone misãkiretiko aikoti āki. Auapika Teoso misãkiretiko aikoti āki, ininiã !itakanapari Teoso sãkire. Niõkatariko niTeosone uãka iua nopini. Apaka niõkatariko Teoso sitatxine uãka iua nopini. Ininiã apanakini imarotari Teoso nakitiakori ininiuana ninoa. Iua Teoso sitatxine Xerosareë amaneri iua tixine katxakakari. Iua maerekati makamakati nopini niõkatariko apaka nota uãka amaneri.

¹³ Kakenakokii hĩte, ininiã hĩkenakotariko Erekaru Matamatakoti sãkire Teoso sãkire auĩãkanimoni,
–itxa Xesosi Piratėopia auakanimoni.

Xesosi Iokanapirena Araotxisėia Auakanimoni

¹⁴ Iuaĩkana Xesosi misãkiretari Xoão:

–Piokanatariko ia nisãkire Teoso nitirimoni, Teoso sãkire auĩãkanikata auakarimoni Araotxisėia sitatxitiã:

Niuãka “Ameë.” Nota atão sãkiretxiti sãpiretakarikarano. Nikamari ikinika nisãpiretakiti. Merepanika nikamari ikinipoko. Ininiã ikinipoko auĩte nitxaua nota. ¹⁵ Nimarotari ikinika hĩparĩka. Hĩtxari: “Nauikapitikari Xesosi sãkire.” Txamari kona iteene hinirekari hĩkaminiri nipaniãtakiti. Apaka kona iteene hinirekari hĩtakanapiniri nisãkire. Kona kapatakari atokoni hĩtxaua hĩte. Kona katxĩkareri atokoni hĩtxaua hĩte. Poomari atoko hĩtxaua. Notamoni apiaerekata kapatakari atoko hininiua hĩte. Iuasaaki iteene hinirekari hĩparĩkauatini nota ĩkapani. Iteene himanirekakaniãri hĩparĩkauatini nota ĩkapani, apiaerekata katxĩkareri atoko hininiua hĩte, nisãkire ikinika hĩtakanapini. ¹⁶ Notamoni hĩte āparaã poomari atoko hĩtxa. Ininiã kona āparaã kapatakaãri atoko !hĩtxa. Apaka kona āparaã katxĩkareëri atoko !hĩtxa. Ikara atoko inakasaaki !niniyekai. Ininiã mapara nikanakai hĩte. ¹⁷ Hĩte txa: “Katxineiroteua ate. Katiiua ate. Apikomoni anirekakiti !auari,” hĩtxa. Txama kona himarotari hãkixinireë iteene himatinaniuatini. Hãkixinireë minakati !auari. Hãkixinireë mokiri atoko hĩtxaua. Kasarari atoko hĩtxaua hãkixinireë. Ikara atoko hininiã, kona himarotari Teoso. ¹⁸ Nõtãkikai hĩte hiamotiniri notamoni auakari oro atoko inakari. Oa oro xamina oeretakito. Ikara atoko hĩkaminiã, ikinika hinirekakiti auako hĩtemoni. Hiamotariko mãkatxi kasarori notamonikiri hĩeretakini ĩkapani, ininiã kona hĩpėtauata kasara hinini xika. Ikara atoko hĩkaminiã, hãkixinire !auari maerekati. Hiamotariko apaka pinĩtxi notamoni auakari hõki ĩkapani, ininiã atão hĩposota hãtamarauatini.

¹⁹ Nitiretakini nõtãkika, apaka noerekana. Ininiã ikinipoko atão hĩkamako maerekati hĩtakanapini ĩkapani. ²⁰ Hãtamatakoti. Hãkixinire toreë nota auapeka. Nota haãpoko maparakiri akiritakari atoko. Hĩkenakotiniãri nakiritinii, hõsereiniãri hãkixinire tore, niĩroã hĩtekata nikaikotini ĩkapani. Iuasaaki ninipokota hĩtekata. Hĩte nipokota notakata.

²¹ Nauritari maerekati makamakati topãkini notakata auĩtetxi topanere nopini. Iua auĩtetxi topanere nota nakiti. Iua atokotxikana nota topãka nĩrikata auĩtetxi topanere nopini iua nakiti nopini, kotxi maerekati makamakati nota apaka txaua.

²² Kakenakokii hĩte, ininiã hĩkenakotariko Erekaru Matamatakoti sãkire Teoso sãkire auĩãkanimoni,
–itxa Xesosi Araotxisėia auakanimoni.

4

Iaxiti Auñtetxi Topanere

¹ Eereka natamatari iaxiti tore. Itore imatakakaãka. Merepanika nikenakotari trõpeta atoko inakari. Kãkiti sãkire atoko itxa. Imisãkiretano:

—Uai pina notamoni. Noerekaiko katana auakari tĩkane.

² Iuasaakipeka Erekari Matamatakoti anikano. Iuasaaki natamatari auñtetxi topanere iaxiti. Topãkakari aua iua nopini. ³ Iuaã topãkakari kai peereri pomẽkoriri atoko itxa. Iua kai satõnia inakori atoko. Apaka ãti kai sãtxio inakori atoko itxa iua topãkakari. Kisi ãkitari iua auñtetxi topanere. Iua kisi kai esimerãota inakori atoko itxa.

⁴ Iua ãtinikata aua vĩtxi koatro pakini topaneretxi. Vĩtxi koatro pakini totiakori topãka iua topaneretxi nopini. Ninoa mãka kasarori. Ikiina aua saporieãta oro kamakori.

⁵ Auñtetxi topanereãtaã atamataãka ito mẽkokari. Iotxira, iokaamori aua iuaãtaã. Itene poenexitiri. Iua auñtetxi topanere apisatoõ aua setxi tirikapi. Setxi Matamatakoni Teoso nakitiakori itxauana ninoa setxi tirikapi.

⁶ Iua auñtetxi topanere apisatoõ ipoa ãtakaãri atoko itxa. Auñtetxi topanere ãtinikata aua koatro Teoso tixine auakani. Ninoa okĩtxinoka xãpokaĩtotakini. Auana okina ikini iĩtoãna. Itorotaãna aua okina. Iporikiãna apaka aua okina. ⁷ Okĩtxinoka xãpokaĩtotakiti ãti, ãkiti atoko itxa. ãtipekana kema auñte atoko itxa. ãtipekana aua kiki toõ atoko. ãtipekana kokoi araãkari atoko itxa. ⁸ Ninoa ikininape aua imĩkitana seisi pakini. Imĩkitana nopini, ipatapi apaka okina aua. Kona itomatana. Ikini pokamarariti, ikini ãkanõkati itxana:

“Erekai. Erekai. Erekai. Teoso Apiananiri pitxaua. Kaposotiireri pitxaua. ãtipirika auakarii. Kitxakapirĩka auakarii. Uatxa auakarii. Katana apaka pite auapanika,”

itxana ãtipirika.

⁹ Ninoa okĩtxinoka xãpokaĩtotakini xipoãtakasaaki, ixikaretarina Teoso paxitiko pirena. Ixikaretarina: “Ikinipoko ikamakiti ate ãkapani erekarinoka. Peerekari iua auñtetxi topanere topãkakari, ãtipirika auapika inakari.” Ninoa xikaretari ikara Teoso ãkapani.

¹⁰ Ninoa vĩtxi koatro pakini totiakori xikarauatakasaaki, ikapotoreẽkauana ixitimoni iua auñtetxi topanere nopini topãkakari apisatoõ. “Ateosone,” itxana iua ãtipirika auapika inakarimoni. Itakarina isaporieãtane Apiananiri apisatoõ, kotxi Teosonokara ikinimane auñte. Iuasaaki itxana:

¹¹ “Apiananiri, aTeosone pitxaua. Erekai pite, ininiã apakatapitika apaxitinii. Apakatapitika ikinimane sãpiretinii: ‘Peerekai.’ Apakatapitika pite apakapiniri ikini posotiiretxi. Ikara atão, kotxi pite kamari ikinika. Pite kamari ikinika, kotxi pite nirekari pikaminiri. Pite nirekari ikinipoko auini,”

itxana ninoa vĩtxi koatro pakini totiakori.

5

Aãtsopa Iapiriãkari Pirena

¹ Iuasaaki natamatari aãtsopa iapirikakori iua auñtetxi topanere nopini topãkakari uakoã. Iuako ikikomokiriã aua. Iua aãtsopa auari iõka ãkiriko, inopinimoni pakini. Iua aãtsopa aua setxi popitari kãkiti makatamẽkakaniri ãkapani. ² Iuasaaki natamatari ãti Teoso nitiri iaxitikiri. Kataparari iua. Itaparasãkikeritika itxa:

—Kiripa apakata imakatzakiniri ia popitari? Kiripa posotari ikatamẽkiniri ia aãtsopa? —itxa.

³ Itxama, kona auari iaxiti auakari, kona auari itixi auakari, apaka kona auari itixi patapi auakari, iua aãtsopa katamẽkakari !auari. Ninoa !iposotari ikatamẽkinirina iua aãtsopa. !iposotarina atamatinirina iua aãtsopa ãki.

⁴ Ininiã iteene nitxiapata, kotxi iua aãtsopa iapiriãkori katamêkakari !auari. Erekarî kamakari !apokaãka ikatamêkiniri ïkapani, atatsopatiniri ïkapani. ⁵ Iuasaaki ninoa totiakori ãti txari notamoni:

–Kona pitxiapatape. Patamata ikiraã. ãkiti atoko inakari iua. Xotaa apika mekaniriakori auïte iua. Tavii apika mekaniri iua. Oerekapekari Satanasi poiãori inini. Iua apiata. Ininiã iuanani posotari ikatamêkiniri iua aãtsopa iapiriãkori. Iuanani posotari imaktxakiniri ninoa setxi popitari –itxa iua toti.

⁶ Iuasaaki natamatari soti auïte okakori atoko. Iua itima iua auïtetxi topanere apisatoõ. Ninoa ipi ipi pakini okïtxinoka xãpokaïtotakini, ninoa totiakori pakini ãkitari iua. Setxi iko, setxi oki pakini aua iuamoni. Setxi oki aua iuamoni, kotxi setxi Matamatakoni Teoso nakitiakori aua. Teoso iokanatanana ninoa ikini itixitimoni. ⁷ Iua soti auïte atoko inakari sari iua auïtetxi topaneremoni. Imaïkari aãtsopa topaneretxi nopini topãkakari uakoã auakari. Iuako ikikomonikiriã aua. ⁸ Imaïkasaakiri, ninoa koatro okïtxinoka xãpokaïtotakini, ninoa vïtxi koatro totiakori pakini patimari ipamakinina soti auïte apisatoõ. Ikinikana auari arpa inakori xikari ikaminina ïkapani. Imakinikana auari kopitipaki oro kamakori. Naia kopitipaki xãpoka koria atoko inakari peeremariri. Ia kamariãro Teoso sãkire auïãkani sãkire iuamoni.

Amaneri Xikariti

⁹ Iuasaaki ninoa xikaretari amaneri xikariti. Ixikaretarina:

“Pitenani apakata papakapiniri iua aãtsopa iapiriãkori. Pitenani apakata pimaktxakiniri popitari, kotxi pitenanira erekari. Pite okaãka. Piarêkaã piamotaua ate Teoso ïkapani. Piamotapekaua ikini uãkati kãkiti sauaki. Ikini ãti uãka sãkire sãkiretakani sauaki piamotapekaua. Ikinika itixiti auakani sauaki piamotapekaua ate.

¹⁰ Pite txïkitakaua ate auïtetxiakori aniniua, sasetotxiakori apaka aniniua, Teoso ïkapani aparïkauatini. Ininiã itixi auakani auïte atxauako ate.”

¹¹ Iuasaaki natamatari itomaneri Teoso nitiriakori. Nikenakotari ninoa sãkire. Kaiãopokori ninoa. Seï mio, apikomoni seï mio, apikomoni seï mio itxaãpokatana. ! Apakata ninoa iaõtiko. Ninoa ãkitari iua auïtetxi topanere, okïtxinoka xãpokaïtotakini, totiakori pakini. ¹² Itaparásãkireritika ixikarauatana. Itxana:

“Soti auïte okaãka kãkiti ïkapani. Ininiã ãtipirika apakata iua apakapiniri posotiiretxi, ikinika erekari, imaroretxi, taparãtxi pakini. Apakata ikinimane paxitiniri iua. Apakata ikinimane sãpiretiniri iua ereka inini. Apakata ikinimane iuikiniri iua.”

Ikara atoko ninoa xikarauata.

¹³ Ikara eereka nikenakotari ikinika iaxiti auakani, ikinika ïkorapokoriti auakani, ikinika itixi patapi auakani, ikinika potxoari uiniti nopini auakani, ikinika potxoari uiniti ãki auakani pakini xikarauatini. Itxana:

“Ikinika erekari ãtipirika aua iua auïtetxi topanere topãkakarimoni, iua soti auïte pakiniimoni. Ikinika ãtipirika paxitana. Ikinika ãtipirika txari: ‘Peerekana ninoa.’ Ikinika taparãtxi ãtipirika aua ninoamoni.”

¹⁴ Ininiã ninoa koatro, okïtxinoka xãpokaïtotakini txana:

–Ameẽ.

Iuasaaki ninoa vïtxi koatro totiakori patimari pamakini.

–ATEosone pitxaua –itxana iua ãtipirika auakarimoni.

6

Soti Auïte Makatxakari Popitari

¹ Natamatari soti auïte makatxakiniri ãti popitari. Ikara natamatakasaaki, nikenakotari okïtxinoka xãpokaïtotakiti sãkire. Isãkire ïkarokirauatini atoko itxa.

–Uai pinako. Patamata –itxa.

² Iuasaaki natamatari kavaro kasarori. Kiki aua oporikiã. Iua tapotxi aua. Auñtetxi saporiētane sikaãka iuamoni. Iua sari ikini itixitimoni kãkiti auñte ininiua ïkapani.

Ñti Popitari Makatxakiko

³ Eereka soti auñte makatxakari ãti popitari aãtsopaã, ininiã ipi auape. Iuasaaki nikenakotari ãtipekana, okĩtxinoka xãpokañtotakiti sãkire:

—Uai pinako. Patamata —itxa.

⁴ Ikara eereka natamatari kavaro põkamarari. Kiki aua oporikiã. Iua kiki sikaãka posotiiretxi neenamatzxi ikamini ikini itixitiã, ininiã neenamatzxi mauakaniãtaã !auari. Itxĩkitakari kãkiti okakakiniua. Isikaãka iouata mitapoari ineenamauatini ïkapani.

Ñti Popitari Makatxakiko

⁵ Eereka soti auñte makatxakari ãti popitari, ininiã ipi ãti auape. Iuasaaki ãtipekana, okĩtxinoka xãpokañtotakiti txari:

—Uai pina. Patamata —itxa.

Ininiã iuasaaki natamatari kavaro pomamari. Kavaro nopini topãkakari aua minari iaõtiko iuakoã. ⁶ Eereka nikenakotari ãti sãkirauatini okĩtxinoka xãpokañtotakini sauaki. Itxa:

—Ipixini kiro triko ïki, ãti õti kãkiti parĩka ïkitxikana. Ñti, ipixini pakini kiro atarokiri atoko inakari ïki, ãti õti kãkiti parĩka ïkitxikana. Iĩtxiã ïki, ovaã ïki pakini poiãopanikako.

Ñti Popitari Makatxakiko

⁷ Eereka soti auñte makatxakari ãti popitari, ininiã ipi ipi pakini auape. Iuasaaki nikenakotari imapotõkirekiri, okĩtxinoka xãpokañtotakiti sãkire. Itxari:

—Uai pina. Patamata —itxa.

⁸ Iuasaaki natamatari kavaro posẽtakari. Inopini topãkakari uãka “Ipĩkitxi” inaãka. Ñti iua tikini sa. Iua akiritaãka “Maerekani Misiritikoãtaã” inaãka. Isikaãkana posotiiretxi kaiãopokori itixi auakani okiniua ïkapani, ininiã koatro kãkiti auiniãtaã ãti okaãka. Ninoa okana kãkiti neenamatzxiã, natxiã, amianariã, kaxipiri kaneenamariã pakini.

Ñti Popitari Makatxakiko

⁹ Ininiã soti auñte iuaĩkana makatxakari ãti popitari, ininiã ipi ipi ãti pakini auape. Iuasaaki natamatari Teosomoni sikakori takikoãtaã patapi kãkiti okakoni. Ninoa okaãka Teoso sãkire isãpiretinina xika. Kona itakanaparina isãpiretinina Teoso kamakiti ninoa ïkapani, ininiã ikara xika okaãkana. ¹⁰ Itapasãkiretika akirikatarina Teoso. Itxana:

—Apiananiri, ãtipirika erekari kamakarii pite. Atãonoka pisãkire. Kirisaakipa pimisiritari itixi auakani? Kirisaakipa pixikatxitaua ate, kotxi ninoa okaua ate? —itxana.

¹¹ Ininiã mãkatxi kasarori sikaãka ninoamoni. Eereka isãpiretaãkana:

—Hiãtapariko apikomoni. Teoso nirekari apanakini hĩtariakori, iniritariakori okiko hĩte atoko iniko. Hĩtariakori okaãka atoko, Teoso xikatxitai hĩte. Hiãtapariko ikara õti —itxa.

Ñti Popitari Makatxakiko

¹² Eereka nitikari soti auñte makatxakiniri ãti popitari, ininiã seisi pakini auape. Iuasaakipeka itixi iteene iakeẽkata. Atokatxi mamãka, sako mata pomamari potxi iãko kamakori atoko. Kasiri kamarãka arẽkatxi atoko. ¹³ Iõriki itori iaxiti auakaro irika ïkorapokoritimoni. Amãtiiri ïtima iokatxaãkiti atoko otxa. ¹⁴ Natamatari iaxiti aãtsopa iapirikiniua atoko. Ikinika ixirata mitari, ikinika ipokomiriũ pakini makatxakaãka. Ñtiãtaã itakaãka.

¹⁵ Iuasaaki ïkorapokoriti auñtetxiakori, kãkiti kaposotiirerini, katiirini, sotato auñteakori, kãkiti katapararini, nitiritxi amotakoni, nitiritxi minakaniua pakini kipataua aarikoã, kai mitari sauaki ixirataã. ¹⁶ Iuasaaki itxana ixirata auñtemoni apaka kai mitarimoni:

—Hĩrikako ate nopini. Hĩkipataua, kotxi topanerexi nopini topãkakarĩ, soti auĩte pakini nirekarĩ imisiritiniua ate. ¹⁷ Soti auĩte misirikare õti manapi apopeka. Kona kãkiti mĩteenekari ikara misirikaretxi.

7

Sẽto Koarẽta Koatro Mio Teoso Nitiriakori Itixi Auakani

¹ Eereka natamatari Teoso nitiri iaxitikiri timini atokatxi pokĩkinimoni, ãti atokatxi ereẽkokinimoni, ãti atokatxi kimapore sanaremoni, ãti atokatxi kimapore kikomoni. Ininiã ipi ipi pakinipe ninoa. Ninoa maĩkarĩ ĩtima ipi ipi pakini itixi auakarĩ ĩtimati. Ininiã ĩtima kona inapaika itixiã. Kona kãuaãriã !inapaika ĩtima. Kona aaminaã !inapaika ĩtima. ² Natapari ãti Teoso nitiri iaxitikiri inaãpotini atokatxi pokĩkinimoni. Teoso ãtipirika auakarĩ takaõtxikare aua iuamoni. Itapasãkireritika akiritana ninoa ipi ipi pakini Teoso nitiriakori. Ninoa parĩka itixi, potxoari uiniti pakini imisiritinina. ³ Iua Teoso takaõtxikare auakiti txari ninoamoni:

—Uatxa kona himisiritapiri itixi, potxoari uiniti, aamina pakini. Himisiritinina apisa, ate takari Teoso takaõtxikare initiriakori itixi auakani teẽtaã.

⁴ Eereka nimarotari Teoso takaõtxikare apakapakani. Itakaõtxikaãkana sẽto koarẽta koatro mio kãkiti. Ikini uãka Isaeo tixinikini takaõtxikaãka.

⁵ Tosi mio Xotaa apika mekani takaõtxikaãka.

Tosi mio Hopẽ apika mekani takaõtxikaãka.

Tosi mio Katxi apika mekani takaõtxikaãka.

⁶ Tosi mio Asee apika mekani takaõtxikaãka.

Tosi mio Natarii apika mekani takaõtxikaãka.

Tosi mio Manasee apika mekani takaõtxikaãka.

⁷ Tosi mio Simião apika mekani takaõtxikaãka.

Tosi mio Arevii apika mekani takaõtxikaãka.

Tosi mio Isakaa apika mekani takaõtxikaãka.

⁸ Tosi mio Seporõ apika mekani takaõtxikaãka.

Tosi mio Xosee apika mekani takaõtxikaãka.

Tosi mio Pẽxamiĩ apika mekani takaõtxikaãka.

Itomaneri Kãkiti Teoso Apisatoõ

⁹ Ikara eereka natamatari itomaneri kãkiti apotiitakaniua. !Apakata kãkiti iaõtiniri ikinikana. Aua kãkiti ikini itixitikini, kãkiti ikini sereti. Aua ikini uãka sãkire sãkiretakani. Ikinikana ninoa timanãta Apiananiri apisatoõ, soti auĩte pakini apisatoõ. Ninoa mãka kasarori. Aãtape aua iuakoãna. ¹⁰ Itapasãkireritika itxana:

—ATEosone topãka auĩtetxi topanere nopini. Iuara, soti auĩte pakini makatxakapekari amaerekani.

¹¹ Iuasaaki ikinika Teoso nitiriakori iaxiti auakani tima. Ninoa ãkitana auĩtetxi topanere, totiakori, ninoa ipi ipi okĩtxinoka xãpokaĩtotakini pakini. Ikapotoreẽkauana itoõna xitimoni, auĩtetxi topanere apisatoõ. “Ateosone pite,” itxana Teosomoni.

¹² Ixipoãtana Teosomoni:

—Ameẽ. ãtipirika ikinimane sãpiretai ereka pinini. Peerekai. Kimarorei. Erekari pikamakiti ate ĩkapani. Ikinimane paxitai. Kaposotiirei. Pataparai. ãtipirika ikara atoko atxai. Ameẽ.

¹³ Ininiã eereka ninoa totiakori ãti pimaãno nota:

—Kiripa ninoa kãkiti mãkatxi kasarori ieretakakani? Namonipa inana ninoa? —itxa iua.

¹⁴ Ininiã nota txari iua:

—Pitera imarotari.

Ininiã iua txano:

—Ninoa iteene misiritaãkapeka. Uatxa ixipope ninoa misiritiko. Soti auĩte makatxakapekari imaerekanina. Ininiã imãkana soti auĩte arẽkaã arokakori atoko itxauana.

Uatxa kasarori imākana, kotxi itxiko ! auari. Soti auīte makatxakapekari kākiti maerekani ipīkasaaki, ininiā mākaxi kasarori atoko itxa ninoa ākixinire.

¹⁵ –Ininiā ninoa aua Teoso topanere apisatoō. Imisākiretiko aikoti āki iparīkauatana Teoso īkapani ikiniōtika pokamara, īkanōka pakini. Ininiā iua auītetxi topanere nopini topākakari auapikako ninoa sauaki. ¹⁶ Ninoa kona natxitaika. Kona iposonataikana. Atokatxi kona arikana ninoa. Kona kapatakari kona arikana. ¹⁷ Kotxi soti auīte auītetxi topanereātaā auakari nīkatanako ninoa. Iua anikana ninoa sōtoārimoni. Iuaā auakari sōtoāri iātakani ātipirika auapikako. Teoso makatxakariko ikinika iātsaāna. ! Itxiapataikana.

8

Imapotōkire Popitari Makatxakiko

¹ Imapotōkire popitari imakatxakasaaki, ikinipoko tsorīkaxitita Teoso tixineē. Ikara atoko ipixini oara. ² Eereka natamatana setxi Teoso nitiriakori, iua apisatoō timakani. Isikaākana setxi xikari kamiko trōpetā inakori.

³ Eereka āti Teoso nitiri apoka. Itima Teosomoni sikakori takikoātaā. Kamariāro arikiko koanati oro kamakori iuamoni aua. Kamariāro ito sikaāka iuamoni, Teosomoni isikini īkapani, ikinika Teoso nakitiakori amanaākiti sākiretixitikata. Ininiā arikari iua kamariāro Teosomoni sikakori takikoātaā nopini. Oro kamakori iua Teosomoni sikakori takikoātaā auītetxi topanere apisatoō. ⁴ Ininiā iuakoā kamariāro txiā, Teoso nakitiakori amanaākiti sākiretixitikata kanīka Teoso apisatoō. ⁵ Ininiā eereka iua Teoso nitiri kosekari okoana. Ixāpokakari xaminaminiki mēkorīkakariā, Teosomoni sikakori takikoātaā nopini auakariā. Eereka okari itiximoni. Iuasaakipeka aua karokirauari, mēkokari pakini. Apaka iuasaaki itixi iakeēkata.

Koatro Trōpetā Pirena

⁶ Ininiā ninoa setxi Teoso nitiriakori setxi trōpetā auakini iposope itrōpetane ixōkinina īkapani.

⁷ Ininiā ninoa Teoso nitiriakori āti xikarauata itrōpetaneē. Iuasaaki katxīkareri kai soro atoko inakari, apaka xaminaminiki mēkorīkakari arēkatxiā koketakori okaāka itiximoni. Ikara xika apanakini aamina itixi auakari arika, ininiā ipi āti pakini aamina auiniātaā ātika arikaāka. Ikinika katsotati arika apaka.

⁸ Eereka āti Teoso nitiri xikarauata itrōpetaneē. Ininiā ixirata auīte atoko inakari arikatxikata okaāka potxoari uinitimoni. Ininiā ipixini potxoari uiniti arēkatxi itxapekaua. ⁹ Ininiā apanakini potxoari uiniti āki auakani ipīpe, ininiā ipi āti pakini potxoari uiniti auakani auiniātaā ātika ipīpe. Iuasaaki apanakini maporoni apaka xipokaāka, ininiā ipi āti maporo auiniātaā ātoka xipokaāka.

¹⁰ Eereka āti Teoso nitiri xikarauata itrōpetaneē, ininiā ipi āti pakini initiriakori xikarauatape. Iuasaaki iōriki mitari iaxitikerō katxaākata. Otirika tirikapi atoko. Oīrika ipixini uini nopini. Oīrika ipixini sōtoāri nopini apaka. ¹¹ Iōriki uāka, “Kapixiro,” otxaua. Ininiā ipixini āparaā kapixiā. Ipi āti pakini sōtoāri auiniātaā, ātinoka sōtoāri kapixiā. Ito kākiti iātari iua āparaā, eereka ikoriāna, kotxi kapixiāri āparaā.

¹² Ininiā āti Teoso nitiri xikarauata itrōpetaneē, ininiā ipi ipi pakini initiriakori xikarauatape. Iuasaaki atokatxi ponikare, kasiri, iōriki pakini kona iteene !iponikaika. Imamākapeka. Ininiākara pokamara ipi ipi pakini oara atokatxi !iponikaika. Iua atokotxikana īkanōka ipi ipi pakini oara kasiri, iōriki pakini !iponikaika. ¹³ Ininiā eereka nitikarauatakasaaki, nikenakotari āti Teoso nitiri sākire. Iua araaāpota Teoso tixine. Itapasākireritika itxari:

–Erepaniko. Erepaniko. Erepaniko itixi auakanii. Auapanika apikomoni ipi, āti pakini trōpetā Teoso nitiriakori xōkini īkapani.

9

Āti Trōpeta Xōkiko

¹ Ininiā āti Teoso nitiri xikarauata itrōpetaneē. Iuasaaki nitikari āto iōriki iaxitikero katxakini itiximoni. Iōrikimoni osikaāka xavi aariko mamapotōkire irikoti tore ĩkapani. ² Ininiā iōriki atoko inakari mataakari iua aariko. Eereka katxiāri kaiāopoko pokīka. Katxiāri tokori arikikosaaki atoko itxa. Eereka iaxiti, atokatxi pakini piāka itxiā xika. ³ Iposo atoko txītxiri atoko inakari pokīka itxiā. Posotiiretxi isiākana, ininiā kaxipiro itixi auakari posotiire atoko aua txītxirimoni, kākiti ioākini ĩkapani. ⁴ Ipaniātaākana katsotati imokakanina, apaka takari, aamina pakini imokakanina. Ipaniātaākana imisiritinina Teoso takaōtxikare iteētaā mauakini. ⁵ Kona isikaākana posotiiretxi kākiti okinina ĩkapani. Sīko kasiritinanira ninoa paniātaāka imisiritinina ninoa. Imisiritarina kaxipiro ioākini atoko. ⁶ Iuasaaki kākiti nirekariko ipinini. Itxama, kona iposotarina ikoriinina. Initarina ipīkitxi, txamari iuasaaki ipīkitxi mitekapeka.

⁷ Iua txītxiri kavaro atoko itxana. Kavaro neenamatchi kamakani atoko itxana. Ikiīāna aua saporīēta atoko oro kamakori. Itoōna kākiti toō atoko itxana. ⁸ Ninoa iāko sito iāko atoko itxana. Itsiriīna ākiti tsiriī atoko itxana. ⁹ Itorota ipatinina koana metao kamakori atoko. Imīkitana ene kavaro itomaneri miteēkani ene atoko. Mitekaī ene atoko itxana. ¹⁰ Ninoa xipi kaxipiro xipi atoko itxana. Oko aua ixipiāna. Ninoa posotari kamatsiitiniri kākiti sīko kasiriti. ¹¹ Ninoa auīte aua. Iua Satanasī nitiri. Mitxi aariko mamapotōkire irikoti āki auakari iua. Xoteo sākireē iua uāka Apatō itxaua. Kreko sākireē iua uāka Aporioō itxaua. Popīkari sākireē “Ikinipoko Xipokakari,” itxaua.

¹² Āti misirikaretxi napapeka. Txama auapanikako apikomoni ipi misirikaretxi.

Āti Trōpeta Xōkiko

¹³ Āti Teoso nitiri xikarauata itrōpetaneē. Iuasaaki seisi trōpeta xōkapeēkaika. Teosomoni sikakori takikoātaā oro kamakori aua ipi ipi pakini iko. Ikara Teoso apisatoō. Nikenakotari iko takote auakari sākirauatini. ¹⁴ Ininiā iua txari Teoso nitiri iua trōpetaā xikarauatakari:

—Pisikakanako ipi ipi pakini Teoso nitiriakori iaxirikakoni Eoparatxi inakori uiniti auakani.

¹⁵ Naia ipi, ipi pakini Teoso nitiriakori iposopekana ia anokanani, ia kasiriti, ia ōti, ia oara manapi ĩkapani. Ininiā ninoa sikakaāka kaiāopokori kākiti okinina ĩkapani. Ininiā ipi āti pakini kākiti auiniātaā auiritaāka ātika okinina. ¹⁶ Āti sāpiretano ninoa sotatone kavaro nopini auakani tosētosi mirāo aua. Kaiāopokori.

¹⁷ Natamatari ninoa sotatoakori kavaro nopini nitaponemoni. Natamatakasaakina ia atoko ninoa. Itorotana koana metao kamakori auana. Apanakini torota koana pōkamarari xamina tirinakari atoko itxa. Apanakini poporeri. Apanakini posētakari ēxōpiri atoko. Ikiina ākiti kii atoko. Inamaāna ipokīka xamina tirika, katxiāri, ēxōpiri pakini. ¹⁸ Ikara xamina tirinakari, ikara katxiāri, ikara ēxōpiri pakini inamaāna pokīkakari, okari kaiāopokori kākiti itixi auakani. Ininiā ipi āti pakini kākiti auiniātaā ninoa okari ātika. ¹⁹ Kavaro posotiire inamaā, ixipiā pakini aua. Ninoa xipi imini atoko itxa. Ixipiāna aua ito kiiri. Ninoa kii misiritari kākiti.

²⁰ Ininiā itomane kākiti koriā ia misirikari xika. Iuaritika kākiti mokakoni maerekati kamakani !inirekari itakanapinirina imaerekani. Ninoa kapotoreēkapanikaua Satanasī nitiriakorimoni. Ikamapanikarina ninoa amanaākiti. Iteosonetari aamina kamakori, oro kamakori, pirata kamakori, pirōsi kamakori, kai kamakori pakini. Ninoa teosone kona posotari atamarauatini. Kona iposotarina ikenakorauatini. Kona iposotarina itīpokotinina. ²¹ Ninoa kākiti okapanikari apanakini. Ikamapanikarina mīiti parīka. Isirīkapanikana apanakinikata. Iitirīkapanikarina apanakini kākiti tii. Kona inirekarina maerekati itakanapinina.

10

Aãtsopa Axapitiri Iapirikakori

¹ Iuasaaki natamatari Teoso nitiri iaxitikiri katzakini ïkorapokoritimoni. Kataparari iua. Iua katxiãri iaxitikiri ãki. Katxiãri imãka atoko itxa. Kisi ikii nopini aua. Itoõ atokatxi atoko itxa. Itapike aãtsota tirinakari atoko itxa. ² Imaïkanãtari aãtsopa iapirikakori axapitiri. Iuakoã aãtsopa ikatamẽka. Itakari ikiti ikikomunikiri potxoari uiniti nopini. Isanaremonikiri ikiti itakari imiriï. ³ Akiripoakata ãkiti atoko. Iuasaaki setxi iokaamori kenakotaãka. ⁴ Iuasaaki niõkatsopaaritari ninoa setxi iokaamori sãkire. Txamari nikenakotari ãti iaxitikiri sãkire. Itxano:

—Kona piõkatsopatapiri ninoa setxi iokaamori sãkire —itxa iaxitikiri.

Aãtsopa Axapitiri Nikiko

⁵ Iuasaaki Teoso nitiri aua ãti ikiti imiriï. Potxoari uiniti nopini ãti ikiti aua. Iua õtanõkari iuako iaxiti. ⁶ Iuasaaki itxa:

—Uatxa nisãpiretakiti Teoso ãtipirika auakari sãkire. Ikamari ikinika iaxiti, iaxiti auakani pakini. Ikamari ikinika ïkorapokoriti, ïkorapokoriti auakani pakini. Ikamari potxoari uiniti, ikinika iua ãki auakani pakini. Teoso misiritinina maerekati kamakani ! okananiikari apokini. ⁷ Apikomoni ãti trõpetaxikarautapanika. Iuasaaki kitxakapirika Teoso kipatakiti oerekaãkako. Teoso sãpiretakiti initiriakori ïkorapokoritimoni, isãkire sãpiretakanimoni païtiki oerekaãkako —itxa Teoso nitiri.

⁸ Eereka iuaïkana nikenakotari iaxitikiri sãkirauatini:

—Pisa. Papariko aãtsopa iapirikakori, Teoso nitiri uakoã auakari. Iua ãti ikiti imiriï, ãti ikiti potxoari uiniti pakini aua kititakari.

⁹ Ininiã nisa iuamoni, ininiã nitxari iua:

—Pisikano ere aãtsopa iapirikakari.

Iuasaaki itxano:

—Papakapariko, nika pitxari ia aãtsopa. Pitikakoã kapixiriko ia pinikakiti, iuaritika pinamaã potxoariko. Mapa atoko itxako —itxano nota.

¹⁰ Ininiã nimaïkari ïkora aãtsopa, nika nitxari. Ninamaã potxoari. Mapa atoko itxa. Txamari nitikakoã kapixiri iua aãtsopa ninikakiti. ¹¹ Iposo atoko isãpiretano:

—Iuaïkana pisãpiretariko apikomoni Teoso sãkire, kaiãopokori kãkitimoni, kaiãopokori ãti uãkamoni, kaiãopokori ãti uãka sãkire sãkiretakanimoni, kaiãopokori auïtetxiakorimoni pakini pisãpiretariko nisãkire —itxano.

11

Ipi Teoso Sãkire Sãpiretakani

¹ Aãke niaõrauatini ïkapani nisikaãka. Iuasaaki Teoso nitiri txano:

—Pisa. Piaõtariko Teoso misãkiretiko aikoti. Piaõtariko Teosomoni sikakori takikoãtaã. Piaõtana Teoso misãkiretakani iuaã auakani. ² Kona piaõtapiri Teoso misãkiretiko aikoti pirikere, kotxi Xoteo minakaniua apotiitiniãtaãua iuaã. Iuaã ninoa ïkapani. Ninoa misiritariko Teoso sitatxine koarẽta toisi kasiriti. Ikara Teoso sitatxine, Xerosareẽ inakori. ³ Nisikaposotiiretanako ipi kiki. Teoso sãkire sãpiretakani ninoa. Ninoa ieretakariko sako mata. (Sako mata kãkiti ieretakasaaki oerekari imatinaniuatini.) Ininiã mio tosẽtosi sesẽta õti pakini ninoa sãpiretariko nisãkire.

⁴ Ninoa ipi oriva mina atoko itxana. Apaka ipi tirikapi topãkini atoko itxana. Ikini itixiti auakani auïte apisatoõ, Teoso apisatoõ ninoa aua. ⁵ Kãkiti nirekasaakiri imisiritinina ninoa, iuasaaki xamina tirinakari pokika inamaãna. Ininiã iuasaaki imokaiakarini xipope. Kãkiti nirekasaakiri imisiritinina, ikara atoko itxa okikona. ⁶ Teoso sãkire isãpiretakasaakina, iposotarina iaxiti itotini. Ininiã iuasaaki ãparaã kona ikipaika ïkorapokoriti. Ninoa posotari ãparaã arẽkatxi inïkitakini. Iposotarina itxïkitakiniri ikini

sereti maerekati apokini ìkorapokoriti auakanimoni. Inirekasaakina, ninoa posotari ikara ikinika ikaminina.

⁷ Teoso sãkire isãpiretinina xipoka atoko, monõkori aariko mamapotõkire irikoti ãki potoriãkari pokîka. Iuasaaki iua kamari neenamati ninoa ipi Teoso sãkire sãpiretakanikata. Eereka iua okapena ninoa. ⁸ Ininiã ninoa ìto sirîkako kimaporiãtaã, mitari sitatxitiã. Iua sitatxitiã Apiananiri tokakitaãka aamina ìpiriãmitakari nopini. Iua sitatxi akiriuãkataãka Sotoma, Exito pakini, kotxi Sotoma, Exito pakini atoko itxa Xerosareë. ⁹ Ininiã iuaã ikini kãkiti, ikini inirimane, ikinimane ãti uãka sãkire sãkiretakani, ikini ãti uãka atamatanako ninoa ìto kimaporiãtaã. Iuaã ikaikotanako ipi õti, ãti õti, ipixini õti pakini. Kãkiti kona auiritari ikatikona. ¹⁰ Ininiã ikini kãkiti atamatariko ninoa koriãkani ìto. Ininiãkara ikinimane enenîkako. Ninoa kamari kiiniri. Ninoa iokanatariko isikakitina apanakinimoni ipoxokoniuatini ìkapani. Ninoa kamariko ikara atoko inakari, kotxi ninoamoni naia ipi Teoso sãkire sãpiretakani misiritana ninoa. Ininiã ninoa enenîka, kotxi Teoso sãkire sãpiretakani koriãpeka.

¹¹ Iuaritika ipi õti, ãti õti, ipixini õti pakini napaka atoko, Teoso txîkitakana ninoa iuaîkana auãki ininina ìkapani. Õkitakauana. Iuasaaki kãkiti atamatana, ininiã ipîkarauatana. ¹² Ikara eereka ninoa ipi Teoso sãkire sãpiretakani kenakotari iaxitikiri sãkirauatini:

—Uaimoni hina.

Ininiã ninoa kanîka katxiãriã Teoso tixinemoni. Ninoa mokaiakariakori itikana ninoa kanîkaãpotini Teoso tixinemoni. ¹³ Iuasaakipeka itixi iteene iakeëkata. Ininiã iua sitatxitiã kaiãopokori aapokotxi irika. Tesi aapokotxi auiniãtaã ãtika irika. Iuasaaki setxi mio kãkiti ipina. Kãkiti auapanika inakani pîkarauata. Iuasaaki itxana:

—Teoso iaxiti auakari apiatakari itxaua —itxana.

¹⁴ Ìkora misirikaretxi xipopeka. Iuasaaki ipi misirikaretxi apiari napapeka. Iuaritika erepaniko, kotxi paîtiki ãti misirikaretxi apiari apokapanikako.

Trõpeta Imapotõkirekiri Xõkiko

¹⁵ Iuasaaki Teoso nitiri mapotõkirekiri xikarauata itrõpetaneë. Itomane iaxiti auakani iteene akiritari:

—Ikini itixiti auakani auîte itxapekaua aãuîte Teoso, Kristo pakini. ãtipirika iua ikinimane auîte itxauako —itxana.

¹⁶ Iuasaaki vîtxi koatro totiakori Teoso topãkiniãtaã apisatoõ topãkakani pamaka Teoso apisatoõ. Itxana:

¹⁷ “Erekapitikari ikinipoko pikamakiti. Apiananiri pitxaua. Kaposotiirei pite. Uatxa pite auapitika. Pite kitxakapirîka aua. Katana ãtipirika pauapika. Erekapitikai, kotxi kaposotiirei, ininiã ãtipirika ate auîte pitxaua.

¹⁸ Kãkiti ikini itixiti auakani omanãkarauata. Uatxa piteka omanãkarauatini manapi apope. Uatxa apokapeka ipîkani misiritiko mereîko õti. Pinitiriakori, pisãkire sãpiretakani, apaka pinakitiakori pite paxitakani pakini ìkitxitiko õti apokapeka. Ikinimane kãkiti poiãorini, kãkiti kaposotiirerini pakini apakapariko ikamakitina ìki. Iuasaaki pixipokariko ìkorapokoriti xipokakani,” itxana.

¹⁹ Eereka natamatari iuaã Teoso tixineë imisãkiretiko aikoti tore imataakaãka. Iua aiko ãki natamatari Teoso kaixane, iua apokiniãtaã. Iuasaaki natamatari ito mëkokari. Nikenakotari ito okaratxirari, ito iokaamori pakini. Itixi iakeëkata. Ito ãparaã kai soro katxîkareri atoko katxaka.

12

Imini Mitapoari, Sito Pakini

¹ Eereka nitaponeë nitikoka. “Kipa atxiîti?” nitxa nãkixinireë. “Natokopa itxa Teoso oerekiniri kãkiti?” Kotxi sito tokiã Teoso tixine. Atokatxi iotximere iakirokaro oa omãka atoko inakari. Kasiri aua okiti patapi. Okiiã aua auîtetxi saporietane, tosi iõriki

kamakori. ² Oa kamixiro. Oa akiripoakata oâtatsiirauatini xika, kotxi kaiamapeka amarini oâuâkitakini.

³ Eereka iuaïkana nitikoka, kotxi imini mitapoari tokiâ Teoso tixineë. Põkamarari. Iua setxi ikii aua. Aua tesi iko. Ikininape ikii aua auïtetxi saporietane. ⁴ Ixipiâ ikosekari kaiâopokori iõriki iaxitikero, uai ixiti oka itxaro iõriki. Itima oa sito apisatoõ, kotxi païtiki amarini oâuâkitaka. Inirekari iixirâkiniri amarini, amarini auakasaaki. ⁵ Eereka oa sito auâkitakari amarini, kiki. Oa sito âkiri aneëkasaaki ikini itixiti auakani auïte itxauako. Auïtetxi kataparari itxauako iua amarini. Auakasaaki, imini !ixirâkari amarini. Patimari maïkiko iua amarini. Teoso auinimoni anikaâka amarini. Iuaâtaâ Teoso topâkanâta auïtetxi itopanere nopini. ⁶ Oa sito miteka âparaâ makipakaniâtaâ. Teoso oerekatapekari iuaâ okaikotini ïkapani. Iuaâ oinïkataâkako mio tosëtosi sesëta õti. Ipi anokanani, âti anokanani ipixini pakini itxa.

⁷ Eereka aua neenamtxi Teoso tixine. Teoso nitiri Mikeo inakori apanakinikata naiatari imini mitapoari initiriakorikata. Imini initiriakori pakini neenamauata apaka. ⁸ Teoso nitiriakori tapara apiata, ininiâ imini initiriakorikata !auritaâkaika Teoso tixine ikaikotinina. ⁹ Iua imini mitapoari iokanataâka maparamoni. Iua imini kitx-akapirïkaripekara. Iua Txiapo inakori. Iua Satanasi inakori. Iua misirienetari kâkiti ikini itixiti auakani. Maparamoni iokanatikosaaki, iua, initiriakori pakini okaâkana uai ïkorapokoritimoni.

¹⁰ Eereka nikenakotari Teoso tixinekiri sâkire kataparakieneri:

—Kâkiti maerekani makatxakiko apokapeka uatxa. Teoso makatxakari kâkiti maerekani. Uatxa Kristo posotiire oerekaâka. Uatxa oerekari ikinimane auïte ininiua. Teoso mereëkiti ikinimane auïte itxaua uatxa, kotxi aïtariakori kamapiretakari iokanatapeëkaika mapara. !Ikaikotaika Teoso tixine. Mitxi ikamapiretari aïtariakori Teoso apisatoõ. Pokamara, ïkanõka ikamapiretana. ¹¹ Aïtariakori iokanatapekari Satanasi isini. Ninoa posotari iokanatiniri Satanasi, kotxi Teoso Soti Auïtene ipina ninoa ïkapani. Iarëka xiketa ninoa ïkapani. Ninoa posotari Satanasi iokanatinina, kotxi ninoa sâpiretari atâo inakari Teoso sâkire. Ninoa iposope okikona Teoso ïkapani. ¹² Hïte Teoso tixine auakani hïpoxokoniuatako. Txamari hïte itixi auakani, potxoari uiniti auakani, erepaniko, kotxi Satanasi apopeka ereë hïte sauaki. Iua iteene naiataua, kotxi imarotari païtiki Teoso !auritaïkari iua maerekati apikomoni ikamini —itxa iua Teoso tixinekiri sâpirena.

¹³ Uai itiximoni okikosaaki, imini mitapoari asikatikinitaro oa sito amarini auâkitakakaro okiniro ïkapani. ¹⁴ Oa osikaâka ipi mïkitatxi kokoi mitari mïkita, oârainsi ïkapani. Oa araâ âparaâ makipakanimoni. Teoso oerekinimoni osa. Iuaâ Teoso nïkataro oa ipi anokanani, âti anokanani, ipixini pakini. Iuaâ imini mitapoari !iposotari oamoni apokini. ¹⁵ Oa araâkasaaki, imini mitapoari koporikaâtari âparaâ inamaâkiri oa tikini. Uini atoko itxïkitakari âparaâ, oa sito axâpoâtini ïkapani. ¹⁶ Kipatxi !auritari âparaâ sini oamoni. Ixoreka. Ixorekasaaki, ikinika âparaâ imini namaâkiri kipatxi âki isa. ¹⁷ Ininiâ imini iteene omanataro oa sito. Ininiâ asikatikinitana apanakini oa anaakori inaiatinina ïkapani. Kâkiti Teoso paniâtakiti kamakani oa anaakori itxauana. Kâkiti Xesosi Kristo sâkire auiâkani oa anaakori itxauana.

13

Monõkori Potxoari Uiniti Pokïkaâtakari

¹ Ininiâ nitaponeë nitima ikipatxite nopini. Iuaâ nitikari monõkori potxoari uiniti pokïkaâtinini, kanïkïta itxa. Iuamoni auari iko tesi pakini. Apaka ikii setxi aua. Ikinika iko aua auïtetxi saporietane. Ikini ikii aua uâkatxi Teoso misâkirepiretakari. ² Iua monõkori nitikakiti âkiti kaiõkari atoko itxa iïto. Ikiti oso kiti atoko itxa. Inama âkiti nama atoko itxa. Iua imini mitapoari sikari iposotiire maerekati, iua potxoari uinitikirimoni. Ininiâ iua auïtetxi itxaua. Imini auïtetxi ininiua atoko itxa. Imini txïkitakari iua potxoari uinitikiri sâkire kaposotiire inini, isâkire kâkiti auikini ïkapani. ³ Nota atamatari ikiiniri. Ikii âti

ipïpe ikaro mitari xika. Eereka ikaro tximõka. Iuaïkana auãki itxa ikii ipinakari. Kãkiti ikini itixitikini atamatakasaakiri, itsorïkaãtana. Ininiã auikarina isãkire. Ikamarina iua nireëkiti. ⁴ Ikinimane auikari imini mitapoari sãkire. Iteosonetarina iua, kotxi iua sikari iposotiire iua potxoari uinitikirimoni. Apaka ninoa auikari iua potxoari uinitikiri sãkire. Ninoa teosonetari iua apaka. Ninoa sãkire:

— Æti kaposotiireri potxoari uiniti pokïkaãtakari atoko inakari !auari. Kãkiti !liposotari inaiatiniri iua —itxana.

⁵ Iua potxoari uinitikiri auiritaãka isãpiretiniri maerekati sãkiretxiti. Imisãkirepiretari Teoso. Auiritaãka auïtetxi ininiua koarëta toisi pakini kasiriti. ⁶ Iua misãkirepiretari Teoso. Imisãkirepiretari Teoso uãka. Imisãkirepiretari Teoso auiniãtaã. Imisãkirepiretari Teoso tixine auakani. ⁷ Iua auiritaãka inaiatiniri kãkiti Teoso nakitiakori. Apaka auiritaãka ninoa imaïkini. Auiritaãka kãkiti ikini uãkati auïte ininiua, ikini itixiti auakani auïte ininiua, ikini kãkiti sãkire sãkiretakani auïte ininiua. Ikinimane auïtetari iua maerekati kamakari. ⁸ Ikini itixiti auakani, Teoso nakitiakori minakaniua, auikariko iua potxoari uiniti pokïkaãtakari sãkire, kotxi iteosonetarina iua. Itixi kamiko apisapanika ninoa uãka liõkatakana Soti Auïte okakori aãtsopateë. Iua aãtsopaã auauãkatakani auapikako Teosokata mapïkaninoka ininina.

⁹ Hïte, ia atatsopatakani kakenakokii, ininiã hïkenakotariko nisãkire. ¹⁰ Teoso nirekiniãri kateia ãki pitakiko, ininiã erekapitikari kateia ãki pauini. Teoso nirekiniãri pokiko iouata mitariã, erekapitikari pokiko. Ininiã pokaãkako iouata mitariã. Ininiã hïte Teoso nakiti inakaniua himïteenekariko himisiritiko. Kona hïtakanapapiri Teoso kimapore. Ætipirika hïkamariko Teoso nirekakiti.

Monõkori Itixiãkiri

¹¹ Eereka nota itikari ãti monõkori. Itixiã ipokïka. Aua ipi iko. Soti auïte ãkiri iko atoko itxa, iuaritika isãkirauata imini sãkire atokokana. ¹² Potxoari uiniti pokïkaãtakari nitiri itxaua iua itixiã pokïkakari. Potxoari uinitikiri sikaposotiiretari iua, ininiã isari ikini itixitimoni. Itxïkitakana ikinimane teosonetiniri potxoari uinitikiri. Iua potxoari uinitikiri mitxi mita karori, eereka ikaro tximõka. ¹³ Iua itixiã pokïkakari kamari posotiiretxi mitxi mimarotakoti. Ipaniãtari xamina tirinakari iaxiti auakari ïkorapokoriti apokini ikinimane atamatiniri ïkapani. ¹⁴ Iua potxoari uinitikiri auiritari itixiãkiri kaminiri posotiiretxi iua ïkapani. Posotiiretxi xika itixiãkiri misirienetari ikinimane itixiã auakani. Itxïkitakari kãkiti kaminiri potxoari uinitikiri ïto atoko inakari kai kamakori. Ikara atoko ipaxitarina potxoari uinitikiri, kotxi ikarotaãka iouata mitariã, iuaritika iuaïkana auapanika ikii. ¹⁵ Itixiã pokïkakari auiritaãka itxïkitakiniri potxoari uiniti pokïkaãtakari atoko inakari kai kamakori kosekasinaniretiniua, ininiã iua kai kamakori posotari isãkirauatini kãkitikata. Ipaniãtari kãkiti okiko imanirekakanisaakiri iteosonetiniri iua. ¹⁶ Itixiã pokïkakari paniãtari ikinimane kãkiti apakapiniri Satanasi takaõtxikare iuakoãna ikikomoni, minakaniã iteëtaãna. Ipaniãtari ikinimane kãkiti auïtetxi inakaniua, auïtetxi minakaniua, katiini, matiini, nitiritxi, nitiritxi minakaniua pakini, apakapiniri Satanasi takaõtxikare. ¹⁷ Kãkiti iua takaõtxikari mauakinini !auiritaãka iamotiitinina. !Auiritaãkana ivëtxirauatinina. Iua takaõtxikari potxoari uinitikiri uãka. Iuãka mauakanisaaki, aua nómero iua nakiti.

¹⁸ Kimarore hïtxako, ikara himarotini ïkapani. Kimarore hininiã himarotari potxoari uinitikiri nomerone kiki uãka itxa. Nómero 666.

14

Soti Auïte Sëto Koarëta Koatro Mio Kãkitikata

¹ Eereka nionakaãta nitaponeë. Natamatari Soti Auïte. Õtanoxiratari nopini auanãta. Ixirata uãka Sião inaãka. Kãkiti sëto koarëta koatro mio pakini aua iuakata. Kaiãopokori kãkiti. Iteëtaãna Soti Auïte iri uãka iõkatsopatapeëkaika. ² Eereka nikenakotari ninoa

xikarauatini. Itorõkani ene atoko itxa, kotxi ama eneeneri. Ikarokirauatini ene atoko itxa ninoa xikare. Viorão ene atoko itxa iua xikari ene. ³ Ninoa kãkiti sêto koarêta koatro mio pakini tima auïtetxi topanere apisatoõ, okïtxinoka xãpokaïtotakini ipi ipi pakini apisatoõ. Totiakori vïtxi koatro pakini apisatoõ apaka itimana. Ninoa sêto koarêta koatro mio xikaretari xikari amaneri. Apanakini !imaïkari iua xikari amaneri. Ninoa sêto koarêta koatro mio ïkorapokoriti Teoso amotakini, ninoanoka posotari ixikaretiniri iua amaneri xikariti. ⁴ Ninoa kiki !isirïkana sitokata. !Auiritarina iïtona kaminiri maerekati. Soti Auïte sinimoni ninoa apaka sa. ïkorapokoriti auakasaakina, Teoso amotana ninoa. Ninoa merepanika sikaãka Teosomoni, Teoso Soti Auïtene pakinimoni. ⁵ !Ikamarina maxikatïka isãkirena. Atão inakarinoka isãpiretana. !Ikerokarina isãkirena Teoso iauïtena apisatoõ.

Ipi Æti Pakini Teoso Nitiri Sãkire

⁶ Eereka nitikari Teoso nitiri araaãpotini iaxiti itanoxiti. Iua sãpiretari Teoso iokanapirena erekari kãkitimoni ikini itixiti auakanimoni. Iua iokanapirenatxi kona xipoka. Isãpiretari Teoso iokanapirena erekari ikini uãkatimoni. Æti uãka sãkire ipinimoni. Æti uãka sãkire ipinimoni. Itxaãpota, itixi auakani sãkire, iuaritika isãpiretari Teoso iokanapirena ikini uãkatimoni. ⁷ Itaparasãkিরeritika itxari:

—Hïpïkariko Teoso. Hïsapiretariko, iua Apiananiri ininua. Apokapeka kãkiti maerekati kamakani misiritiko õti. Hïteosonetariko Teoso, kotxi iua kamari iaxiti, ïkoraxiti, potxoari uiniti, sõtoãri pakini —itxa iua Teoso nitiri araãkari sãkire.

⁸ Iua sãkirauataka atoko, Æti Teoso nitiri txari:

—Papurónia sitatxiti xipokapeka. Iuaã auakani kaposotiirerini, iuaritika ixipokapena. Papurónia sitatxiti auakani paniãtari imakinika itixi auakani maerekati ikaminina, maerekati ïtotxi nireëkiti. Ininiã ninoa kamari maerekati Papurónia auakani paniãtakiti.

⁹ Ninoa Teoso nitiriakori ipi sãkirauataka atoko, Æti Teoso nitiri txari itaparasãkিরeritika:

—Teoso misiritanako kãkiti potxoari uinitikiri teosonetakani, potxoari uinitikiri atoko inakari kai kamakori teosonetakani. Teoso misiritanako kãkiti Satanasi takaõtxikare iteëtaãna takakani, iuakoãna takakani. ¹⁰ Kãkiti iua atoko inakani misiritaãkako, kotxi Teoso iteene omanãkarauata maerekati ninoa kamakiti xika. Teoso misiritanako ninoa, ininiã atatsiirauatana xamina tirinakariã. Ëxõpiri arikanako ninoa. Teoso nitiriakori erekarini, itixine auakani, Teoso Soti Auïtene pakini itikariko ikara kãkiti misiritiko.

¹¹ Iua xamina txïkitakari kãkiti atatsiirauatini. Iua xamina tirinapikako. !Ixipoka. Itirinapika. Itxiãkapika. Ninoa misiritiko !iotoka. Pokamara, ïkanõka auapika ninoa misiritiko. Kãkiti iua potxoari uinitikiri teosonetakani, potxoari uinitikiri atoko inakari kai kamakori teosonetakani, iuãka iïtoãna auaïtotakini misiritaãkako ikara atoko —itxa iua Teoso nitiri sãkire.

¹² Ininiã hïte Teoso nakitiakori, hïte ipaniãtakiti kïpitakani, hïte Xesosi nireëkiti Ætipirika kamakani, kataparaxinire hïtxako. Himïteenekariko kãkiti misiritinii.

¹³ Eereka nikenakotari Teoso tixine auakari sãkire. Itxano:

—Nisãpiretakiti piõkatsopata. Kãkiti ipïkasaaki Apiananiri ïkapani iparïkauatakasaaki, Teoso sikari erekari iuamoni.

Iua Erekari Matamatakoti txari:

—Ia atão. Mitxi pasãpaniri Teoso parïka ikaminina. Uatxa itomatana, kotxi Teoso imarotapekari erekari ikamakitina.

Takari Amiko Pirena

¹⁴ Eereka nitaponeë nionakaãta iaxiti. Iuusaaki natamatari katxiãri kasarori iuaã. Aïtari iaxitikiri atoko inakari topãka iua katxiãri nopini. Ikiã aua auïtetxi saporietane oro kamakori. Iuakoã saasara Ætoião aua. Pauanaro. ¹⁵ Iposo atoko Æti Teoso nitiri pokïka Teoso aapoko. Iua itaparasãkিরeritika akiritari iua katxiãri nopini topãkakari:

—Pikosekariko pisaasarate. Pamariko takari, kotxi takari amiko manapipekara. Takari ikini itixitikiri amiko manapipekara.

¹⁶ Ininiã iua katxiãri nopini topãkakari isaasateẽ isauakari ikini itixiti nopini auakari. Amari takari imakinika.

¹⁷ Iposo atoko nitikari ãti Teoso nitiri pokïka Teoso aapoko Teoso tixineẽ. Iuamoni apaka aua saasara ãtoião iuakoã. Pauanaro.

¹⁸ Iuaïkana ãti Teoso nitiri apoka. Teosomoni sikakori takikoãtaã ipotorika iua. Inïkatari xamina tirinakari iuaã. Iua itaparasãkireritika akiritari Teoso nitiri saasara auakiti:

—Pimaïkaroko pisaasate. Pimakatxakaroko ova ikini itixitikero, kotxi ova oionapeka —itxa.

¹⁹ Ininiã Teoso nitiri isaasateẽ isauakaro ova ikini itixitikero. Itsotakitataro ovatsa. Iposo atoko okaro ova ori ova iopetiko mitari ãki. Okatsonakaãka. Teoso omanãkare iua ova iopetiko atoko itxa, kotxi Teoso iteene omanãkarauata kãkiti maerekani xika.

²⁰ Ova ori kãkiti kitiã iopetikoãtaã sitatxi mapotõkire. Txamari na ovapeñi ikara atoko itxa. Arëkatxiãra ikara atoko itxa. Iua arëkatxi uini panaã atoko itxa. Tresëtosi kirómetro arëkatxi aua. Arëkatxi ãpanaã kavaro namaãpeka apoka arëkatxi. ãti metro ipixini ãpanaã arëkatxi.

15

Teoso Misirikare Mïkani Setxi

¹ Eereka nitaponeẽ nitikoka iuaïkana.

—Kipa atxiïti? —nitxa iuaïkana nãkixinireẽ, kotxi natamatari Teoso nitiriakori setxi itixineẽ.

Ninoa minari misirikaretxi setxi pakini kãkitimoni. Apikomoni misirikaretxi !auaika. Ia misirikaretxi setxi inokasaakiri kãkiti, Teoso misiritana ninoa imaerekanina xika.

² Eereka natamatari ipoa atoko inakari. ãtakaãri, xamina tirinakarikata koketakori atoko itxa ipoa. Kãkiti tima ipoa ãtinikata. Ninoa iokanatapekari Satanasi sini, kotxi ! ikamarina iua potxoari uinitikiri paniãtakiti. Iua potxoari uinitikiri atoko inakari kai kamakori paniãtakiti !ikamana. !Apakaparina Satanasi takaõtxikare, iuãka nomerone. Ikininape aua viorão atoko inakari Teoso sikakiti. ³ Ninoa xikaretari Moisesi xikare, Teoso nitiri uai itixi auakari xikare. Ixikarenãtari Teoso Soti Auïtene xikare. Ia ixikaretana. Itxana:

“Teoso Apiananiri, ikini posotiiretxi auakiti pite. Peerekari pipariãka. Pite kaposotiireri. Pite atãonani pikamakiti. Ikini uãkati auïte pitxaua pite.

⁴ Ikinimane paxitaiko pite ipïkareritika, kotxi pite Apiananiri pitxaua. Ikinimane txaiko pite: ‘Peerekai,’ itxaina. Kotxi pitenoka !auari maerekati. Kãkiti ikini uãkati apokako pitemoni. Ninoa txaiko: ‘Ate teosone pitxaua,’ itxana kotxi ikinimane itikari erekari pikamakiti.”

Ikara atoko itxa ninoa xikaretakiti.

⁵ Eereka natamatari Teoso aapoko ãki. Natamatari iua auiniãtaã. ⁶ Iposo atoko ninoa Teoso nitiriakori setxi, misirikaretxi setxi mïkani, pokïka Teoso aapoko. Ninoa mãka katsopiri, pomëkoriri. Ninoamoni aua oro kamakori. Itinimaï nopini inapa. ⁷ Ninoa ipi ipi pakini okïtxinoka xãpokaïtotakini iuaã aua. Okïtxinoka xãpokaïtotakiti sikari iãtatxi setxi pakini oro kamakori ninoa setxi Teoso nitiriakorimoni. Teoso auapininiika inakari xãpokakapekari iua setxi pakini iãtatxi omanãkareẽ. ⁸ Teoso iotximere xãpoka iua aapoko ãki. Katxiãri kasarori atoko itxa. Iuasaaki kãkiti !auritaãka Teoso aapoko ãroini, ninoa Teoso nitiriakori, misirikaretxi mïkani setxi pakini, misiritakasaakina kãkiti.

16

Iãtatxi Teoso Omanãkare Auakiti

¹ Eereka nikenakotari Teoso aapoko ãki auakari sãkire. Itaparakieneritika imisãkiretana ninoa Teoso nitiriakori setxi. Itxana:

—Hïsa. Hïkitakari Teoso omanãkare iãtatxi ãki auakari itixi auakanimoni —itxa.

² Ininiã ninoa Teoso nitiriakori sari. Merepanika âtika initiri kitakari iãtatxi âkikiri itixi auakanimoni. Iuasaaki kimiti mitari, katsiiri, apoka kãkiti Satanasi takaõtxikare auakini ïtomoni. Potxoari uinïtikiri atoko inakari kai kamakori teosonetakani ïtomoni apoka ikara atoko inakari amianari.

Ãti Iãtatxi

³ Iposo atoko âtipekana Teoso nitiri kitakari iãtatxi âkikiri potxoari uinitimoni. Iuasaaki âparaã arêkatxi itxapekaua. Kãkiti ipïkari arêka atoko itxa iuasaaki. Ininiã ikinipoko potxoari uiniti auakani iuasaaki xipoka.

Ãti Iãtatxi

⁴ Iposo atoko âtipekana Teoso nitiri kitakari iãtatxi âkikiri uinimoni, sõtoãri pakinimoni. Iuasaaki âparaã arêkatxinoka itxapekaua. ⁵ Iuasaaki nikenakotari Teoso nitiri âparaã nïkatakari sãkire. Itxari Teosomoni:

—Pite maerekati makamakatii. Âtipirika auakarii pite. Atão pikamakiti pimisiritinina maerekati kamakani ïkora atoko. ⁶ Kotxi ninoa okari kãkiti pite nakitiakori. Okarina pisãkire sãpiretakani. Ninoa oxiketari ninoa arêka. Ininiã uatxa pite sikana arêkatxi iãtinina. Atão imisiritikona kotxi maerekati ikamana —itxa Teoso nitiri.

⁷ Iposo atoko nikenakotari âti sãkire. Teosomoni sikakori takikoãtaã auakari iua. Itxari Teoso:

—Pite Teoso Apiananiri, Kaposotiireri pitxaua. Erekapitikari maerekati kamakani pimisiritini. Pite kona kerokari pikamakiti, kotxi atão inakaranoka pikama —itxa.

Ãti Iãtatxi

⁸ Eereka âtipekana Teoso nitiri kitakari iãtatxi âkikiri atokatximoni. Iuasaaki atokatxi apiata patakata. Auiritaãka kãkiti arikini itaparapatakaã. ⁹ Ininiã kãkiti arikaãka atokatxi patakaã. Iuaritika !inirekarina maerekati ikamakitina itakanapinina. “Peerekari Teoso,” kona itxana. Teosonoka posotari iotokakiniri iua misirikaretxi, txamari ninoa maerekati pirenaã akiritari Teoso uãka.

Ãti Iãtatxi

¹⁰ Ininiã ipi ipi pakini Teoso nitiriakori kitakapekari iãtatxi âkikiri itiximoni. Eereka iuaïkana âti Teoso nitiri kitakari iãtatxi âkikiri auïtetxi topaneremoni iua potxoari uiniti pokïkaãtakari topaneremoni. Iuasaakipeka iua potxoari uinitikiri auïtetxi ininiãtaãua patimari ipiãkini. Kãkiti iuaãtaã auakani akatsaninitaua itsii xika. ¹¹ Iuaritika ! inirekarina maerekati ikamakitina itakanapinina. Imisãkirepiretarina Teoso iaxiti apiko nopinixiti auakari, atatsiirena xika, kimiti xika.

Ãti Iãtatxi

¹² Eereka iuaïkana Teoso nitiri âti kitakari iãtatxi âkikiri mitari uinitimoni Eoparatxi inakorimoni. Iuasaaki uini auaã. Isonãka. Kimapori itxaua, auïtetxiakori atokatxi pokïkinimoni ïkani inapinina ïkapani. ¹³ Iposo atoko nitikari maerekani matamatakoni ipi âti pakini. Atiniro atoko itxana. Ãto pokïka mitapoari imini namaã. Ãto pokïka iua potxoari uiniti pokïkaãtakari namaã. Ãto pokïka iua itixi pokïkakari namaã. Iua itixi pokïkakari iua Satanasi sãkire sãpiretakari itxaua. Na atãoene isãkire. Poxirari ikama. ¹⁴ Ninoa maerekani matamatakoni ipi âti pakini Satanasi nitiriakori. Ninoa kamari posotiiretxi. Isana auïtetxiakorimoni, ikini itixiti auakanimoni. Akiritana kãkiti apotiitiniua ineenamauatina ïkapani. Teoso kaposotiireri naiatanako ninoa itixi xipokini õtisaaki.

¹⁵ Hïte ia atatsopatakani, Apiananiri txai hïte:

—Erepaniko. Napokako kiïtiriri apokini atoko, kãkiti mimarotakinitipanika. Napokasaaki ereẽ, pikoatiniã, kamãka pininiã, pipoxokoniua. Ikara atoko pininiã, kona kasarai ikinimane apisatoõ pisini, ininiã kona kapêtai —itxa Apiananiri sãkire.

¹⁶ Eereka ninoa ipi āti pakini Satanasi nitiriakori maerekani matamatakoni, apotiitari auñtetxiakori Amaketō inakoriātaā. Iuaātaā akiritaāka Amaketō Xoteo sākireē.

Imapotōkire Iātatxi

¹⁷ Ninoa setxi Teoso nitiriakori, seisi kitakapekari iātatxi ākikiri. Ātinoka !ikitakapanikari. Iuasaakiika iua kitakari iātatxi ākikiri ĩtimamoni. Iuasaaki nikenakotari auñtetxi itopanereātaā auakari sākire:

–Ixipokapeka –itxa itaparakieneritika.

¹⁸ Iposo atoko iotxira mēkoākata. Ikarokirauata. Pataparaeneri. Itixi iakeēkata. Mitxi !auari itixi iakeēkatini ĩkora atoko inakari. Iuasaakiikarako apiatako. ¹⁹ Iua sitatxi apiari Papirónia inakori xoreka. Ipikata ixoreka, ininiā ipi āti pakini sitatxiti atoko itxaua. Ikini itixiti auakari sitatxi xipokaāka iuasaaki. Teoso !imaxinĩkaretari Papirónia sitatxiti auakani kamakiti, ininiā iteene imisiritana ninoa, kotxi iteene omanākarauata imaerekanina xika. ²⁰ Iuasaaki ikini ipokomiriū !auaika. Ōtanoxiratarari ikinipoko xipoka iuasaaki. ²¹ Katxĩkareri iaxiti auakari, kai mitari atoko inakari, katxaka itiximoni. Apanakini kai minani koarēta siko kiro. Iua irika kākiti nopini. Ikara katxakakari pamonōkonipaniri. Iua xika kākiti iteene misākirepiretari Teoso.

17

Sito Potxoari Uinitikiri Nopini Topākakaro

¹ Ninoa Teoso nitiriakori setxi pakini iātatxi setxi auakini, seisi kaikota. Ātika ina notamoni. Itxano nota:

–Notakata pisa. Noerekai sitatxi miramaneri. Sito kanokarero kaposotiirero atoko itxa iua sitatxi. Oa topākanāta uini itori nopini. Iuaā auakani misiritiko noerekaiko pite.

² Auñtetxiakori ikini itixiti auakani kamari maerekati iua sitatxiti auakanikata isirĩkinina. Iua sitatxi auakani txĩkitakari kākiti ikini itixiti auakani maerekati ikaminina. Kapoāroā poātakari nirekini atokokana, ninoa nirekari iua maerekati iua sitatxiti auakani kamakiti –itxa notamoni.

³ Eereka iua Erekari Matamatakoti paniātano iua Teoso nitirikata nisini. Iua Teoso nitiri anikano āparaā makipakaniātaā. Iuaā natamataro sito topākanāta iua potxoari uinitikiri nopini. Pōkamarātorari iua. Iitoā aua iōkatakori kaiāopokori Teoso imisākirepiretini iōka. Ikii setxi aua. Iko tesi aua. ⁴ Oa sito māka pomamari ipixini. Pōkamarari itxa omāka. Pakaroneri omāka. Oītoā aua oro, pérora, kai soro pomēkoriri pakini aua. Omaĩkari iākoanatxi oro kamakori. Iua iākoanatxi āki aua maerekati okamakiti itxiko atoko inakari. Maerekati oīto kamakiti ikara atoko itxa. ⁵ Oteētaā aua sākiretxi iōkatakori. Itxari: “!Kimarotikori. Kanokareroakoro inoro itxaua Papirónia sitatxiti miramaneri. Maerekati kamakani inoro itxaua Papirónia.” ⁶ Nitikaro oa sito opoātini, Teoso nakitiakori arēka oātini xika. Xesosi sākire auikinina xika, okaākana. Natamatakasaakiro nitikoka.

–Kipa atxiĩti? –nitxa.

⁷ Iua Teoso nitiri txano:

–Kininiāpa pitikoka? Nisāpiretaiko oa sito pirena. Apaka nisāpiretaiko iua potxoari uinitikiri pirena, ikii setxi, iko tesi auakiti pirena, oa porikitakari pirena nisāpiretai, kotxi kona pimarotari. ⁸ Iua potxoari uinitikiri patamatakiti mitxi aua, txamari uatxa !auaika. Iua eereka ipokĩkapanikako aariko mamapotōkire irikotiā. Eereka anikaākako ixipokikomoni. Ikini itixiti auakani Teoso aātsopateē iuākana maiōkatakoni tikokako iua potxoari uinitikiri atamatakasaakinako. Itixi kamiko apisa iuākana !iōkatsopataāka Teoso aātsopateē. Iua aātsopaā iōkauākatakoni noka ātipirika auapikako Teosokata. Kākiti tikokako iua potxoari uinitikiri atamatakasaakina, kotxi mitxi auāki itxa, eereka !auaika, eereka iuaĩkana auākipeka itxa.

⁹ –Ikara inakari pimarotini ĩkapani, iteene pimixinikariko. Kinirepa ikii setxi aua? Kotxi ōtanoxiratarari setxi apaka aua. Oa sito topākanāta iua ōtanoxiratarari nopini. ¹⁰ Kinirepa ikii setxi aua? Kotxi auñtetxiakori setxi apaka auako. Auñtetxi !itxaikauana ninoa siko.

Ãtinoka auñtetxi txapanikaua. Ñti kona apokapanika. Iua apokasaaki mapaõtinoka auñtetxi itxauako. ¹¹ Iua potxoari uinitikiri mitxi auãki inakari, iposo atoko !auaika inakari, iua apokako. Iuara auñtetxi txauako. Iua mitxi apotiitaua ninoa setxi auñtetxiakorikata. Ñti õti iua xipokaãkako.

¹² –Patamatarari iko tesi pakini. Kinirepa iko tesi aua? Kotxi auñtetxi tesi aua. Ninoa auñtetxiakori kãkiti auñteakori !itxapanikauana. Ninoa sikaposotiiretaãkako auñtetxi ininiuana iua potxoari uinitikirikata. Ninoa auñtetxi itxauanako ãti oaranoka. ¹³ Ikininape ninoa tesi auñtetxiakori parĩkauata iua potxoari uinitikiri ãkapani. Iposotiireña, itaparaña iparĩkauatana iua potxoari uinitikiri ãkapani. ¹⁴ Inaiatarinako Teoso Soti Auñtene. Teoso Soti Auñtene iokanatanana ninoa isinina, kotxi iuanani Apiananiri itxaua. Auñtetxiakori auñte itxaua. Ñtipirika iuakata sikani, iua akiritakini, imereẽkini, ãtipirika iua nireẽkiti kamakani, ninoa moianatarari iua Soti Auñte ineenamauatini –itxa Teoso nitiri sãkire.

¹⁵ Iua Teoso nitiri apikomoni txari notamoni:

–Pite atamataro oa kanokarero topãkanãta kãuaãri nopini. Kinirepa kãuaãri nopini oãua? Kotxi iuaãtaã kãkitipokoni, ikini uãka, ikini itixiti auakani, ikini ãti uãka sãkire sãkiretakani pakini. Iua kãuaãri mitari atoko itxana. ¹⁶ Iua potxoari uinitikiri, ninoa tesi auñtetxiakori pakini omanataroko oa kanokarero. Ninoa makatzakariko ikinipoko oa nakiti. Imakatzakarinarako omãka. Kasarapeka otxako. Oxini inikanako. Ninoa xipokaroko oa xaminaã. ¹⁷ Teoso txĩkitakari Teoso nireẽkiti ikaminina, kotxi ninoa auñtetxiakori parĩkauata iua potxoari uinitikiri ãkapani Teoso nireẽkiti iaõka. Ininiã Teoso sãkire mitxi auakari auapeka. Isãkire iaõka ikamana. Ininiã ninoa nirekari iparĩkauatinina iua potxoari uinitikiri ãkapani. Ininiã ninoa auñtetxiakori itxauana iua potxoari uinitikiri ãkapani.

¹⁸ –Oa sito kanokarero patamatakito kona atão sitoni. Sitatxi miramaneriã auakani oa sito kanokarero atoko itxana, kotxi iua sitatxiã auakani paniãtana ikini auñtetxiakori itixi auakani maerekati inireẽkitina ikaminina.

18

Papirõnia Sitatxiti Xipokini

¹ Ikara inaãka atoko nitikari ãti Teoso nitiri Teoso tixine auakari katzakaãpotini ãkorapokoriti Teoso tixine potoriãkari. Iua kaposotiireri. Iotximere iopinikari imakinika itixi. ² Iua sãkirauata itaparasãkireritika. Itxari:

–Ixipokapeka Papirõnia sitatxiti miramaneri. !Auaika. Uatxa Satanasi nitiriakori aua iuaã. Ikini sereti maerekani matamatakoni aua iuaã. Araãkari ikini sereti arakakari nikakani, kãkiti mapokaerekatakiniti, iuaã apoka. ³ Oa sito kanokarero atoko itxa iua sitatxi, kotxi iua sitatxi auakani txĩkitakana ikini itixiti auakani maerekanitxi ninoa kamakiti iaõka ikaminina. Papirõnia sitatxiti auakani kamari maerekati ãtona nireẽkiti. Itixi auakani nirekari ikara maerekati ikaminina kapoãroã poãtakari nirekini atokokana. Auñtetxiakori ikini itixiti auakani kamari ikara maerekati Papirõnia sitatxiti auakanikata. Tiitxi vëtxitakani apakaparo txineiro kaiãopokoro, kotxi Papirõnia sitatxiti auakani amotari tiitxipokoni –itxa Teoso nitiri sãkire.

⁴ Eereka nikenakotari ãti Teoso tixine auakari sãkire. Itxari:

“Hĩte nota nakitiakori inakani takanapariko iua sitatxi. !Hĩkamapiri maerekati ninoakata. Ininiã !himisiritaãka ninoakata.

⁵ Kotxi maerekati ninoa kamakiti apiaãpota. Tiitxi tsorinatakori atoko itxana ninoa maerekani. Iaxitipeka apokaãpota ninoa maerekani. Teoso xinikari ninoa maerekani, ininiã iua misiritanako ninoa.

⁶ Himisiritanako ninoa. Hĩte imisiritinina atokokana, hĩte misiritana ninoa. Ipikata himisiritanako ninoa, ninoa maerekani xika. Ninoa misiritapekari apanakini, ininiã ia imisirikarena xika ipikata himisiritanako ninoa.

⁷ Hĩtxĩkitakanako ninoa atatsiirauatinina. Hĩtxĩkitakanako ninoa maerekaxiniretinoka ininina. Ikara atoko ninoamoni hĩkaminiã, atãopitikara hĩkamakiti, kotxi iteene iukauana ninoa. Itomaneri itiina, ininiã ninoa iarinouata. Ninoa sãkire: ‘Ate uai topãkanãta, kotxi auĩtetxi kaposotiireni atxaua. Tikinitakoro atoko !atxaua, ininiã maerekaxiniretika !atxa,’ itxana ãkixinireẽna.

⁸ Ikara isãkirena xika ãti õti ninoa misiritaãkako. Amianari, maerekaxinirenitxi, natxi pakini apokako ninoamoni. Arikatxi xipokanako ninoa, kotxi Teoso iusaaki misiritanako ninoa. Imisiritanako ninoa, kotxi Teoso Apiananiri Kaposotiireri itxaua,”

itxa iua Teoso tixine auakari sãkire.

Kãkiti Txiapatini Sitatxi Xipokini Xika

⁹ Auĩtetxiakori ikini itixiti auakani, Papirõnia sitatxiti auakanikata sirĩkakani, ninoakata tiitxi apokaerekatakani, itikasaakirina iua sitatxi misiritiko, iteene itxiapatana. Ninoauĩtetxiakori txiapata iua sitatxi arikasaaki, xamina txiã itikasaakina. ¹⁰ Õtakoxiti itimana, kotxi ipĩkarina sitatxi auakani xipokini. Iusaaki itxanako:

—!Erekari. !Erekari. Ia sitatxiti miramaneri !auaika. Papirõnia sitatxiti !auaika. Kãkiti kaposotiirerini xipokapeka. ãti oaranoka arikatxi xipokapena ninoa imaerekanina xika.

¹¹ Ikini itixiti tiitxi v̄txitakani apaka txiapatako. Ninoa maerekaxinireninoka itxanako sitatxi auakani xipokasaaki.

—Kiripa amotari atii uatxa? —itxana.

¹² Mitxi ninoa v̄txitari oro, pirata, kai soro pomẽkoriri, kai soro kasarori p̄rora inakori. Mitxi iv̄txitarina mãkatxi mata arínio inakori, mãkatxi mata seta inakori, mãkatxi mata p̄okamarari, mãkatxi mata pomamari pakini, iv̄txitana. Iv̄txitarina ikini sereti aamina eremari inakari. Iv̄txitarina ikini sereti tiitxi iko kamakori, aamina pakaroneri kamakori, pirõsi kamakori, metao kamakori, kai kamakori. ¹³ Iv̄txitarina kanera, koketxi pakini. Iv̄txitarina kamariãro miha inakori. Iv̄txitarina kamariãro pirãkĩs̄esi inakori. Iv̄txitarina iãriã, aseitona iĩ, triko, triko pani pakini. Iv̄txitarina kema auĩte, soti auĩte, kavaro, mitekaĩ kavaro anikakiti pakini. Kãkiti apaka iv̄txitana, nitiritxi ĩkapani. Kãkiti ĩto, kãkiti xinire apaka inirekana iv̄txitinina. ¹⁴ Ninoa tiitxi v̄txitakani sãkire sitatximoni:

—Ikinika h̄tii erekari hinireẽkiti xipokaãkapeka. Ikinika h̄txineirote !auaika. !Auaika h̄pokaerekatakiti. H̄tii arikapeka —itxana ninoa sãkire.

¹⁵ Ninoa tiitxi v̄txitakani katxineiroterini itxauana, kotxi kãkiti iua sitatxiti auakani mitxi amotari ninoa tii. Iua sitatxi xipokasaaki, ninoa tiitxi v̄txitakani timanãta õtakoxiti, kotxi ipĩkarina sitatxi arikini. Itxiapatana. Imatinaniuatana. ¹⁶ Itxana:

—!Erekari. Sitatxi miramaneri !auaika uatxa. Mitxi ia sitatxi peerepokori sito erero atoko itxa. Oia sito mãka pakaroneri, pomamari, p̄okamarari pakini. Oĩtoã aua oro, kai soro pomẽkoriri. P̄rora pakini aua. Oia sito atokokana ia sitatxi. ¹⁷ ãti oara napa atoko ia sitatxiã auakani tii kakaroneri xipokapeka —itxana.

Sitatxi arikasaaki, maporo auakini, maporo ãki sikani, maporo ãki parĩkauatakani apaka õtakoxiti atamatarina iua sitatxi arikini. ¹⁸ Ninoa itikasaakiri katxiãri iua sitatxi arikini, itxana:

—Ia sitatxi miramaneri atoko inakari !auari —itxana ninoa.

¹⁹ Iusaaki itakarina atapani ikiiãna imatinaniuatiniãna. Itxiapatana iusaaki. Imatinaniuatana iusaaki. Itxarina:

—!Erekari. !Erekari. Kamatinanipitikari sitatxi miramaneri xipokini. Mitxi iuaã ikinimane maporo auakini apakapari kaiãopokoro txineiro, kotxi iuaã auari txineiropokoni. Eereka ãti oara napaka atoko ixipokapeka ikinika —itxana isãkirena.

²⁰ H̄tepekana Teoso tixine auakanii h̄poxokoniuatoko iua sitatxi xipokiniã. H̄te Teoso nakitiakori h̄poxokoniuatoko. H̄te Xesosi moianariakorii, h̄te Teoso sãkire sãpiretakanii

pakini hĩpoxokoniuatoko, kotxi Teoso arikapekari iua sitatxiã auakani hĩte imisiritinina xika.

Kai Miramaneri Potxoari Uinitimoni Okiko

²¹ Eereka ãti Teoso nitiri kataparari maĩkari kai meraminapoari. Kai triko kamiriãkari atoko itxa iua kai. Okari potxoari uinitimoni. Iua txari:

—Itapararitika kai nokini atoko, Papirónia sitatxiti miramaneri xipokini. !Ata-mataãkaika sitatxi iuaã —itxa isãkire.

²² Itxari iua sitatximoni:

—Xikari !ikenakotaãkaika ereẽ. !Auaika xikari viorãokata, koitxikata, trõpeta pakinikata. Ereẽ kãkiti parĩkauatini !auaika. Atarokiri kamiko ene !kakenakotikoikari.

²³ Tirikapi kamara !katamatikoikari ereẽ. Taniriuatakani kiinirite ene !kakenakotikoikari. Ereẽ mitxi vëtxirauatakani apiari itxauana. Ninoa atoko inakari !auari ikini itixiti. Kãkiti ereẽ auakani misirienetana ikini kãkiti ikini itixiti auakani, kotxi ninoa sãkire maerekatinoka —itxa Teoso nitiri sãkire.

²⁴ Papirónia sitatxiti misiritaãka, kotxi iuaã auakani okapena Teoso sãkire sãpiretakani kãkiti Teoso nakitiakori. Ikinimane kãkiti itixi okakoni xika Papirónia sitatxiti xipokaãka.

19

Areroia, Peerekari Teoso

¹ Eereka nikenakotari kãkiti sãkire, kaiãopokori kãkiti Teoso tixine auakani. Ita-parasãkireritikana itxana:

—Areroia. Peerekari Teoso. Ate Teosone makatxakari kãkiti maerekani. Kaiotximereri aTeosone. Kaposotiireri. ² !Ikerokari ikamakiti, kotxi atão inakarinoka ikama, ininiã atão imisiritinina maerekati kamakani. Erekarinoka ikama aTeosone. Iua misiritari Papirónia sitatxiti. Kanokarero kaposotiirero atoko itxa iua sitatxi, kotxi iua sitatxi auakani iomatari kãkiti xinire ikini itixiti auakani xinire, kotxi oerekarina maerekati ãtotxi nireẽkiti ikaminina. Teoso misiritana Papirónia auakani, kotxi okana Teoso nitiriakori itixi auakani —itxana ninoa sãkire.

³ Iuaĩkana itxana itaparakieneritikana:

—Areroia. Peerekari Teoso. Iua sitatxi miramaneri arikapikako. Katxiãri iuaãkiri itimatxiãtapikako ãtipirika —itxana.

⁴ Iuasaaki ninoa totiakori vĩtxi koatro pakini, ninoa okĩtxinoka xãpokaĩtotakini ipi ipi pakini apaka, ipamakana Teoso apisatoõ. Iuasaaki Teoso topãkanãta auĩtetxi topanere nopini. Ninoa misãkiretari iua:

—Pite aTeosone. Peerekai pite. Ameẽ, areroia —itxana ninoa.

Soti Auĩte Ītanorouatini Kiiniriti

⁵ Eereka nikenakotari Teoso topanereẽ auakari sãkire. Itxari:

—Hĩte Teoso nitiriakori ikini itixiti auakanii, “Peerekari aTeosone” hĩtxako. Hĩte auĩtetxi inakanii, auĩtetxi minakanii apaka, hĩpĩkiniãri Teoso, “Peerekari aTeosone,” hĩtxako —itxa.

⁶ Iposo atoko nikenakotari itomaneri kãkiti sãkire ene atoko itxa, ãparaã kai auiniãtaã auakari ene atoko itxa, ikarokirauatini ene atoko itxa. Nikenakotari ninoa sãkire:

—Areroia, peerekari Teoso, kotxi aTeosone, Apiananiri, kaposotiireri, ikinimane auĩte itxaua —itxana ninoa.

⁷ —Mapoxokoniuatoko. Apoxokoniritika masãkirauata. Matxari: “Peerekari Teoso.” Teoso Soti Auĩtene Ītanorouatini iketo apokapeka. Ītaniriuatakaru iua ĩkapani oãiamatapeka.

⁸ Osikaãka mãkatxi ereri, kasarori oieretaãkiti tĩkane —itxana ninoa sãkire.

Teoso nakitiakori kamakiti atão inakari oa mãka atoko itxa.

⁹ Iposo atoko iua Teoso nitiri txano nota:

—Īa piõkatsopata. Iua Soti Auĩte Ītanorouatini kiiniriti kemaĩtxitakoni poxokoniuatoko —itxa notamoni.

Iuaĩkana itxano:

—Ia nisãpiretakiti Teoso sãkire atão itxa.

¹⁰ Ikara nikenakotakasaaki nipamaka iua Teoso nitiri apisatoõ, Teoso apisatoõ pamaãkarino atoko nitxaua. Txamari iua txano:

—Kona pipamakape nota apisatoõ. Nota Teoso nitiri pite atoko, pitariakori Xesosi sãpiretakiti auiãkani atoko. Teoso apisatoõnani pipamakako. Xesosi sãpiretakiti iopinikari Teoso sãkire sãpiretakani ãkixinire. Ininiã ninoa sãpiretari kãkiti atão Teoso sãkire —itxa.

Kavaro Kasarori Nopini Topãkakari

¹¹ Eereka natamatari Teoso tixineẽ auakari. Natamatari kavaro kasarori. Iua kavaro nopini topãkakari ikamaenetakiti kamakari itxaua. Isãkire atãonoka. Atão imereẽri kãkiti misiritiko imaerekani xika, kotxi iua imarotari ikinipoko kãkiti kamakiti, ininiã ikamari atão. Inaiatana maerekati kamakani, kotxi iua kamari atão. ¹² Oki xamina tirinakari atoko itxa. Ikiiã ito auĩtetxi saporietane aua. Iuãka iõkatakori iĩtoã aua. !Kimarotikori iua uãka. Iuanoka imarotari iuãka. ¹³ Arẽkatxinoka imãkaã aua. Iua akiritaãka, “Teoso Sãkire” inakori. ¹⁴ Isotatoneakori, Teoso nitiriakori Teoso tixine auakani, saãpota iuakata. Iua iikiika. Ninoa apaka topãka kavaro kasarori nopini. Imãkana peereri, kasarori. ¹⁵ Iua “Teoso Sãkire” inakori namaã opokĩka iouata mitaro neenamati ikamini ikapani. Kauanaro. Iua iouataneẽ okanako imokaiakarini ikini ãti uãka, ininiã ikini ãti uãka auĩte kataparari itxauako iua. Imisiritanako ninoa imaerekanina xika. Ova katxaratiko atoko itxako imisiritikona. Teoso kaposotiireri omanãkare ova katxaratiko atoko itxako. Teoso iteene omanãkarauata iuasaaki kãkiti maerekani xika. ¹⁶ Iua “Teoso Sãkire” inakori mãkaã, itapikeẽ apaka iõkataãka: “Auĩtetxiakori auĩte. Apiananiri,” iõkataãka.

¹⁷ Iposo atoko natamatari ãti Teoso nitiri. Atokatxi iotximereẽ itima. Iua itaparakieneritika akiritari ikinika itano araãkani:

—Hina. Hãpoka Teoso kiiniritemoni. Mitari ikiinirite —itxa.

¹⁸ —Hina. Auĩtetxiakori xini hinika. Sotatoakori auĩteakori xini hinika. Sotato xini apaka hinika. Kavaro xini hinika. Hinikari kikiãkini kavaro nopini topãkakani xini apaka. Hinikari ikini kãkiti xini, nitiritxi iamotakoni xini, nitiritxi minakaniua xini, kãkiti apiatakani xini, kãkiti mapiatakani xini apaka hinika —itxari itano araãkani.

¹⁹ Eereka nitikari iua potxoari uinitikiri. Iuakata aua itixi auakani auĩteakori, isotatoneakori apaka. Ninoa apotiitaua, iua kavaro kasarori nopini topãkakari isotatoneakorikata inaiatinina ikapani. ²⁰ Iua neenamati xipoka atoko, iua potxoari uinitikiri maĩkaãka. Isãkire sãpiretakari, atão minasãkiretakati, imaĩkaãka apaka. Mitxi iua kamari posotiiretxi iua potxoari uinitikiri ikapani. Ikara posotiiretxi xika imisirienetana ninoa potxoari uinitikiri takaõtxikare auaĩtotakini. Imisirienetana ninoa iua kai kamakori teosonetakani. Iua potxoari uiniti pokĩkaãtakari, isãkire sãpiretakari pakini, auãkipanika okaãka ipoa atoko inakarimoni, ãxõpiri arikiniãtaã. ²¹ Isotatoneakori okapeẽka iouataã, kavaro kasarori nopini topãkakari namaãkeroã. Iuasaaki ikinika maiori nikapena ninoa xini. Kamitopekana. !Iposotaikarina ikinika okakoni xini inikinina.

20

Mio Anokananisaaki

¹ Eereka nitikari Teoso nitiri katxakaãpotini Teoso tixine ikari. Iuakoã iua minaro xavi iua mamapotõkire irikotimoni. Apaka iminari kohẽtxi mitari. ² Iuasaaki imaĩkari iua imini mitapoari. Kitxakapirĩkarikara iua imini. Iua maerekani matamatakoni auĩte, Satanasi inakori. Iua maĩkari Satanasi. Iaxirikari kohẽtxiã, mio anokanani imatĩpokotakani tĩkane. ³ Iua Teoso nitiri okari Satanasi iua aarikoã, tota itxari itore. Ikakiriokari oa xavi itore sonaã, ininiã !apakata itore matakakiko. Ininiã mamapotõkire irikoti ãki ikaikota Satanasi. !Iposotaikari imisirienetiniri ikini itixiti auakani. Mio anokanani auako iriko ãki iua Satanasi. Mio ano napaãka atoko auiritaãka ipokĩkini. Mapaõtinoka auiritaãka mapara auini.

⁴ Eereka natamatari auñtetxiakori topanere. Kaiñopokori auari iuaã. Natamatari iua topaneretxi nopini topãkakani. Ninoa txĩkitaãka auñtetxi ininiuana. Iuasaaki natamatari apanakini kãkiti. Mitxi sauakanopitakoni. Okapeẽkana Xesosi iokanapirena, Teoso sãkire pakini isãpiretinina xika. !Iteosonetarina iua potxoari uinitikiri. Iua kai kamakori !iteosonetana. Iua potxoari uinitikiri takaõtxikare !itakana iteẽtaãna, iuakoãna pakini. Iuaĩkana auapekana. Auñtetxi itxapekauana Kristokata. Mio anokanani auñtetxi itxauana. ⁵ Ikara ipĩkani õkitikiko merepanika ipĩkani õkitikiko. Iua mio anokanani napaãka atoko apanakini ipĩkani õkitikaãka. ⁶ Ipĩkani merepanika õkitikiko iuaĩkana auãki ininina ĩkapani, Teoso nakitiakori itxauana ninoa. Teoso sikari erekari ninoamoni. !Atatsiitarina ãtião ipĩkitxi Teoso misiritakasaakina maerekati kamakani. Sasetotxi itxauana, kotxi Teoso nireẽkiti ikamana. Kristo nireẽkiti apaka ikamana. Mio anokanani auñtetxi itxauana Teosokata.

Satanasi Xamina Mitapoarimoni Okiko

⁷ Mio ano napaãka atoko, Satanasi kateia ãki auakari, sikakaãkako. Ipoĩka mapara. ⁸ Iuasaaki Satanasi ĩpirixititari itixi kãkiti ikini ãti uãka imisirienetini ĩkapani. Iua misãkiretari ãti uãka Koki inakori, Makoki inakori pakini. Txamari na atão isãkire. Inirekari ninoa neenamauatini iuakata. Apitiitana ninoa Teoso nakitiakori inaiatinina ĩkapani. Itori kãkiti Satanasi apotiitakini. Uini ikipatxite atoko itxana.

⁹ ĩpirixitarina itixi. Iakirokarina Teoso tiretakiti sitatxiti, kãkiti Teoso nakitiakori auiniãtaã. Iuasaaki xamina iaxitikiri katxaka. Ixipokana ninoa ikinikana. ¹⁰ Iuasaaki Satanasi, kãkiti misirienetakari, okaãka arikatxi mitapoarimoni ãxõpiri arikikoãtaã. Iua potxoari uinitikiri, isãkire sãpiretakari pakini okapeẽkaika iuaã. Iuaã ninoa atatsiirauat-apikako pokamara, ĩkanõka ãtipirika. !Ixipoka ninoa atatsiirauatini.

Ipinakani Apakapari Iparĩkana ĩki

¹¹ Eereka natamatari auñtetxi topanere kasarori mitari. Natamatari iua inopini topãkakari. Iuasaaki patimari iaxiti, itixi pakini ereẽkokini iua topãkakari apisatoõ. Iaxiti, itixi pakini kona katamatikoikari. ¹² Iposo atoko natamatari kãkiti mitxi ipinakani timini Teoso topanere apisatoõ. Kãkiti apiarini, kãkiti poiãorini pakini tima Teoso apisatoõ. Iposo atoko itori aãtsopa katamẽkitataãka. Iua aãtsopaã aua ikinika kãkiti kamakiti. Apaka ãti aãtsopa katamẽkaãka. Kãkiti uãka aua iua aãtsopaã Teosokata auakani ĩkapani. Iuasaaki ninoa mitxi ipinakani apakapari ikamakitina ĩki uai itixiã auakasaakina. ¹³ Ninoa mitxi potxoari uiniti ãki ipinakani apoka iuaã. Mitxi kipatxiã ikatakoni apaka apoka iuaã. Ikini kãkiti ipĩkani auiniãtaã auakani apoka iuaã. Ikinika apakapari ikamakitina ĩki, ikamakitina itixiã auakasaakina. ¹⁴ Eereka ipĩkitxi, ipĩkani auiniãtaã pakini okaãka iua arikatxi mitapoarimoni. Iua arikatxi mitapoarimoni iuaĩkana kãkiti ipina ãtião ipĩkitxi maxipokatimoni. ¹⁵ Kãkiti ãtipirika Teosokata auakani uãka aua Teoso aãtsopateẽ. Kãkiti iuaã mauauãkatakani okaãka iua arikatximoni.

21

Iaxiti, Itixi Pakini Amaneri Txapekaua

¹ Eereka natamatari iaxiti amaneri, itixi amaneri pakini. Iaxiti mitxiri ereẽkokape. ĩkora itixi mitxiri ereẽkokape. Potxoari uiniti !auaika. ² Natamatari Teoso sitatxine Xerosareẽ amaneri. Iua sitatxi Teoso tixinekiri. Teoso paniãtari iua sitatxi ĩkorapokoriti apokini. Natamatari ikatxakaãpotini. Iua sitatxi peereri. Sito ĩtaniriuatakasaaki, omãka peereri oĩtanirimoni osini ĩkapani. Oa sito erero atoko itxa iua sitatxi. ³ Nikenakotari Teoso topanereẽ auakari sãkire. Itapasãkিরeritika itxari:

—Uatxa Teoso kamari iua auini kãkiti sauaki. Iua ninoakata aua. Iua nakitiakori itxauana. Teosora aua ninoakata. Ninoa Teosone itxaua. ⁴ Iuasaaki iua kaxipokariko

ninoa oki ãtsaã. !Itxiapataikana. Ipïkitxi !auaika. Matinanitxi !auaika. Ætsaãtxi !auaika. Katsiiri !auaika. Ikinipoko mitxiri ereëkokapeka uatxa –itxa.

⁵ Iua auïtetxi topanere nopini topãkakari txari:

–Uatxa nikamari ikinipoko amaneri –itxa.

Apikomoni itxari notamoni:

–Piökatsopatari nisãkire, kotxi nisãkire atão. Nisãpiretakiti apokapitikako.

⁶ Apikomoni itxano:

–Uatxa niparïka xipopeka. !Auaika. Merepitipanika iõka Aopa inakori atoko nitxa, kotxi nota merepitipanika aua. Imapotökire iõka Ómika inakori atoko nitxa, kotxi ikinipoko mapotökire nitxaua apaka. Nisikari kãkiti posonatakani iãtini ïkapani. Na ninirekari iïki. Iãtarinako ãparaã amomoãkiri. Iua ãparaã txïkitakari kãkiti ãtipirika Teosokata auini. ⁷ Nisikariko iua ãparaã kãkiti Satanasi nireëkiti makamakanimoni. Ninoa Teosone nitxaua nota. Nota anaakori itxauanako ninoa. ⁸ Kãkiti mataparaxinireni okaãkako xamina mitarimoni. Teoso sãkire mauikakani apaka okaãkako iua xaminamoni. Maerekati potxitakani, kokanirini, maerekati iïtoãna potxitakiti kamakani apaka okaãkako xamina mitapoarimoni. Miïti apaka okaãkako iuamoni. Teoso kamakori teosonetakani okaãkako iuamoni. Ikinika kãkiti maxikatïïka sãpiretakani apaka okaãkako xamina mitarimoni. Ninoa kãkiti ikinikana misiritaãkako arikatxi mitariã, ëxópiri arikikoãtaã. Iuaã kãkiti iuaïkana ipina, ãtião ipïkitxi maxipokatimoni –itxa iua auïtetxi topanere nopini topãkakari sãkire.

Xerosareë Sitatxiti Amaneri

⁹ Ninoa Teoso nitiriakori setxi, iãtatxi setxi auakini, ãti ina notamoni. Iua txari:

–Uai pina. Noerekaiko pite iua Soti Auïte tirketakito ïtanoro ïkapani –itxa.

¹⁰ Iua Erekari Matamatakoti anikano nota. Itxïkitakari Teoso nitiri anikinino oxiratarari nopini. Mitaxiratarariã oerekano sitatxi Teoso nakiti Xerosareë inakori. Natamatarari iua sitatxi Teoso tixine potorikakari katxakaãpotini ïkorapokoritimoni. ¹¹ Teoso iotximeretxikana aua iua sitatxi. Kai pomëkoriri kakaroneri xásipi inakori mëkorïkini atoko itxa iotximere. Iua sitatxi iotximere peereri. Kristao mëkori atoko itxa. ¹² Pirikeri kai kamakori piriketari iua sitatxi. Iua pirikeri mitapoari, païtanori. Iua pirikeri tosi itore aua. Teoso nitiriakori iaxitikini tosi nïkatari iua tosi itore. Ikinika itore nopini iõkataãka Isaeo anaakori uãka, kotxi Isaeo tosi imiakori aua. ¹³ Ipi ãti pakini iua itore atokatxi pokïkinimoni. Ipi ãti pakini iua itore atokatxi pokïkini sanaremoni. Ipi ãti iua itore atokatxi pokïkini ikikomoni. Ipi ãti pakini iua itore atokatxi ereëkokinimoni. ¹⁴ Iua sitatxi pirikere tosi kai mitari nopini ikamaãka. Ikinika iua kai nopini Soti Auïte moianariakori uãka iõkataãka, kotxi Soti Auïte moianariakori tosi aua.

¹⁵ Iua Teoso nitiri notakata sãkirauatakari aua aãke oro kamakori iuaõã. Iua aãke iua sitatxi, itore, ipirikere pakini iaõtiko. ¹⁶ Sitatxi tore atokatxi pokïkinimoni ipotorika. Itore atokatxi ereëkokinimoni apoka. Iaõtari ipi mio, koatrosëtosi pakini kirómetro. Maioakari. Iuaïkana ipotorika sitatxi itore atokatxi pokïkini sanaremoni. Itore atokatxi pokïkini ikikomoni apoka. Iaõtari iua atokotxikana ipi mio, koatrosëtosi pakini kirómetro. Eereka iaõtari sitatxi ïtano timakari. Iua atokotxikana ipi mio, koatrosëtosi pakini kirómetro. Iua Teoso nitiri iaõtari iua sitatxi iua aãkeë. ¹⁷ Iua Teoso nitiri iaõtari pirikeri timakari. Sesëta metro ïtano. Teoso nitiri iaõrauata kãkiti iaõrauatinini atokokana. ¹⁸ Iua pirikeri kai kamakori xásipi inakori. Iua sitatxi oro kamakori. Kristao erero atoko itxa oa oro. ¹⁹ Iua kai mitari pirikeri patapi auakari ipataãka ikini sereti kai soroã. Pomëkoriri, kakaroneri iua kai soro.

Æti iua kai mitari aua kai soro xásipi inakori.

Æti iua kai mitari aua kai soro sapira inakori.

Æti aua ákata inakori.

Æti aua esimeráota inakori.

²⁰ ãti kai mitari aua kai soro satónia inakori.

ãti kai mitari aua kai soro sátxio inakori.

ãti aua krisórito inakori.

ãti aua periro inakori.

ãti aua topásio inakori.

ãti aua krisópraso inakori.

ãti aua xasíto inakori.

ãti aua ametxísita inakori.

²¹ Iua tosi itore tosi kai kasarori kamakori. Iua kai kasarori pérora inakoro. Iua itore átika, pérora átoka kamakori. Oro kamakori itxaua kimapori. Peereri. Pomëkoriri. Kristao atoko itxa ahoa.

²² Kona natamatari Teoso misãkiretiko aikoti. !Auari iua aiko iua sitatxiã, kotxi Teoso Apiananiri kaposotiireri, iua Soti Auíte apaka iuaã auapikana. ²³ Iuaã !inirekaãka atokatxi, kasiri pakini sitatxi iopinikini ïkapani, kotxi Teoso iotximere iopinikari ikinipoko. Iua Soti Auíte sitatxi tirikapite atoko itxaua. ²⁴ Kãkiti maerekanitxi mauakini ikini áti uãka auari iua kamaraã. Kãkiti ikini itixiti auakani auíteakori apokako iuaã Teoso ipaxitinina ïkapani, inirekakitina Teosomoni isikinina ïkapani. ²⁵ Iua sitatxi tore imatakakaãkapika. Ìroãpikana kãkiti. !Itotaãka, kotxi ïkanõkari !auari iuaã. ²⁶ Kãkiti ikini itixiti auakani anikariko ikinipoko erekari iua sitatximoni Teoso ipaxitinina ïkapani. ²⁷ Kãkiti maerekati kamakani !auritaãkana ïroinina. Ìtotxi nireëkiti kamakani !auritaãkana ïroinina. Atão masãpiretakani apaka !auritaãkana ïroinina. Kãkiti Teoso iõkauãkatakini aãtsopateë, ninoanokara auritaãka ïroinina iua sitatxitiã. Iua Soti Auíte aãtsopateë auauãkatakani auapikako Teosokata.

22

Iua ãparaã Iãtakari Aua Teosokata ãtipirika

¹ Eereka iua Teoso nitiri oerekano sõtoãri. Iua sõtoãri mapotõkire ikiitaã Teoso itopanere aua. Apaka iua Soti Auíte itopanere aua iuaã. Iua ãparaã peereëri. Kristao mëkori atoko itxa iua ãparaã. Iua ãparaã iãtakari !ipina. ãtipirika auapika. ² Iua sitatxi apaníkaki aua ahoa mitapoari. Iua sõtoãri sa ahoa apaníkaki. Sõtoãri ïtinikata aua amãtiirinape. Iua amãtiiri tximakani !ipina. Auapikana. !Ipinaikana. Kasiri iaõka iriuata iua amãtiiri. ãti kasiriti iri átião, eereka áti kasiriti átião. Iuaïkana áti kasiriti átião. Itxaãpota iua amãtiiri iriuatini iuaxiti. Tosi pakini kasiriti amãtiiri iriuata. Amãtiiri tsopa sikataparatarari kãkiti ïto, ikinimane kãkiti itixi auakani ïto.

³ Teoso misiritiniri kãkiti !auaika. Teoso, Soti Auíte pakini auítetxi itxauana iuaã. Teoso nitiriakori itixi auakani kamari iua nireëkiti. ⁴ Ninoa atamatariko itoõ. Teoso uãka iteëtaãna auako. ⁵ Ìkanõka !auaika iuaxiti. Kãkiti iuaã kona nirekaikari tirikapi, atokatxi kamara pakini, kotxi Teoso Apiananiri iopinikari ikinika iuaã. Kãkiti iuaã auakani auítetxiakori itxauana átipirika.

⁶ Eereka iua Teoso nitiri txari notamoni:

—Atão nisãkire. Ia iaõka apokapitikako. Teoso Apiananiri sikari Erekari Matamatakoti isãkire sãpiretanimoni. Iua paniãtari initiri itixine auakari oerekinina initiriakori itixi auakani Teoso kamakiti apokini apisapanika —itxa iua Teoso nitiri sãkire.

Xesosi Kanapiriini Pirena

⁷ —Hikenakota —itxa Xesosi. —Patimariko napokini ereë. Ia aãtsopa sãpiretari ereë nikanapiriini pirena. Kãkiti auikiniãri Teoso sãkire ia aãtsopa sãpiretakiti, apakapari erekari Teoso sikakiti —itxa Xesosi.

⁸ Nota Xoão sãpiretai hñte nitiãkiti. Nikenakotakiti apaka nisãpiretai hñte. Ikinika nikenakotaka atoko, ikinika natamataka atoko, iuasaaki nipamaka iua Teoso nitiri

apisatoõ, kotxi iua oerekari ikinipoko notamoni. Nipamaka iua apisatoõ Teoso apisatoõ nipamakini atokokana. ⁹ Txamari iua Teoso nitiri txari notamoni:

—Kona pipamakape nota apisatoõ. Nota Teoso nitiri pite atokokana nitxa. Pitariakori Teoso sãkire sãpiretakani Teoso nitiriakori itxauana. Ninoa atokokana nitxa nota. Ikini kãkiti ia aãtsopa sãpiretakiti auiãkani Teoso nitiriakori itxauana. Ninoa atokokana nitxa nota. Teoso apisatoõnoka pipamakiniã atão —itxa Teoso nitiri sãkire.

¹⁰ Iuaĩkana itxano nota:

—Ia aãtsopa sãpiretari Teoso kamakiti apokini apisapanika. Na pikipatapiri ia aãtsopa sãpiretakiti, kotxi paĩtiki Teoso sãkire iaõka apokapitikako. ¹¹ Maerekati pikamapanika pinakasaaki, ininiã apikomoni maerekati pikama. Maerekati piĩto nireẽkiti pikamapanika pinakasaaki, ininiã apikomoni pikama. Atão inakari pikaminiã, apikomoni atão inakari pikama. Teoso nireẽkitinoka pikaminiã, ininiã apikomoni Teoso nireẽkitinoka pikama —itxa.

¹² —Hĩkenakota —itxa Xesosi. —Patimapaniriko napokini ereẽ. Nimiriko ikinimane parĩka ĩki ninoa apakapini ĩkapani. ¹³ Iõkatxi merepitipanika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Ikinipoko auini apisapanika nota aua. Ikinipoko xipokaãka atoko nota auapanika. Itixi kamiko apisapanika naua. Itixi xipoka atoko nauapanika nota —itxa Xesosi.

¹⁴ Teoso sikari erekari iua nireẽkiti kamakanimoni. Ninoa kãkiti auiritaãkako Teoso amãtiirite itximinina auapika ininina tĩkane. Auiritaãkanako ĩroinina Teoso sitatxineẽ. ¹⁵ Kãkiti maerekati iĩtona nireẽkiti kamakani ! auiritaãka ĩroinina iua sitatxitiã. Miĩti, ĩtanoro minakatokatika sirĩkakani, kokanirini pakini ! auiritaãka ĩroinina iua sitatxitiã. Apaka kãkiti ikamakitika teosonetakani ! auiritaãka ĩroinina iua sitatxitiã. Aãpirena potxitakani, atão minasãkiretakani pakini ! auiritaãka ĩroinina iua sitatxitiã.

¹⁶ —Nota, Xesosi txaua. Nota paniãtari ninitiri nitixine auakari sãpiretiniri ia nisãkire pitemoni, ininiã ikara pite sãpiretanako Teoso misãkiretikoãtaã apotiitakaniua. Tavii apika mekanirirano nota. Iõriki mitaro pokamara iatokopeka inakasaaki ĩkaro atoko nitxa nota —itxa Xesosi.

¹⁷ Erekar Matamatakoti txari Xesosi:

—Uai pina.

Xesosi nakitiakori txari iua:

—Uai pina.

Hĩte ia nisãkire kenakotakanii, hĩtxariko:

—Uai pina.

Hĩte posonatakani, uai hina. Hinirekiniãri, ia ãparaã hiãtako, kotxi ia ãparaã kãkiti auapininiika inĩkitaãkari. Ia ãparaã Teoso sikakiti kãkitimoni. Na piĩkitxitari.

¹⁸ Nota, Xoão, õtãkikari kãkiti ia Teoso sãkire iõkatsopatakori kenakotakani. Ia Teoso sãpiretakiti apokini apisapanika, isãpiretaua. Ia aãtsopa sãpiretari kãkiti misiritiko. Ninoa misiritiko atokotxikana Teoso misiritai hĩte, hĩkoketiniãri hĩteka sãkire Teoso sãkirekata.

¹⁹ Kãkiti kipatiniãri ipixini ia Teoso sãpiretakiti iõkatsopatakori, Teoso ! auiritari iua tximiniri iua amãtiiri kãkiti auapininiika inĩkitaãkari. ! Auiritari iua ĩroini isitatxineẽ. Ia aãtsopa sãpiretapekari iua amãtiiri, iua sitatxiti pakini.

²⁰ Xesosi txari:

—Ia niokanapirena atão. Iposopeka napokini tĩkane.

Atxari iuamoni:

—Ameẽ. Ari, uai pina Xesosi, Apiananiri.

²¹ Xesosi Apiananiri sikari ikinipoko erekari ikinimane Teoso nakitiakorimoni. Ameẽ.